


Tti jian joajné
Jesucristo



New Testament in Popoloca, San Marcos Tlalcoyalco

Tti jian joajné Jesucristo

New Testament in Popoloca, San Marcos Tlacooyalco

copyright © 1982 Wycliffe Bible Translators, Inc.

Language: San Marcos Tlacooyalco Popoloca (Popoloca, San Marcos Tlacooyalco)

Translation by: Wycliffe Bible Translators, Inc.

Popoloca, Tlacooyalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlacooyalco

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files dated 29 Jan 2022
a23ba35e-b016-5f67-a705-694e460cf18a

Contents

SAN MATEO	1
SAN MARCOS	52
SAN LUCAS	84
SAN JUAN	137
LOS HECHOS	176
ROMANOS	223
1 CORINTIOS	244
2 CORINTIOS	264
GÁLATAS	278
EFESIOS	286
FILIPENSES	294
COLOSENSES	299
1 TESALONICENSES	304
2 TESALONICENSES	308
1 TIMOTEO	311
2 TIMOTEO	317
TITO	321
FILEMÓN	324
HEBREOS	326
SANTIAGO	342
1 PEDRO	347
2 PEDRO	353
1 JUAN	357
2 JUAN	362
3 JUAN	363
JUDAS	364
APOCALIPSIS	366

Tti Jian Joajné Jesucristo Que Dicjin Mateo

Cain nišančhen de ixin Jesucristo

(Lc. 3.23-38)

¹ Jihi ná lista de cain nišančhen de ixin Jesucristo. Jehe Jesucristo joixin de ngain razé chojni David co de Abraham.

² Abraham cjoí ndodé Isaac, co Isaac cjoí ndodé Jacob, co Jacob cjoí ndodé Judá conixin cainxin xanchó Judá.

³ Judá cjoí ndodé Fares co Zara, co janné na cjoí Tamar. Fares cjoí ndodé Esrom, co Esrom cjoí ndodé Aram.

⁴ Aram cjoí ndodé Aminadab, co Aminadab cjoí ndodé Naasón, co Naasón cjoí ndodé Salmón.

⁵ Salmón cjoí ndodé Booz co janné Booz cjoí Rahab. Booz cjoí ndodé Obed co janné Obed cjoí Rut. Obed cjoí ndodé Isai.

⁶ Isai cjoí ndodé rey David, co rey David cjoí ndodé Salomón, co janné Salomón icha saho cjoí jan nchichihi ná tattíta que vinhi Urías.

⁷ Salomón cjoí ndodé Roboam, co Roboam cjoí ndodé Abías, co Abías cjoí ndodé Asa.

⁸ Asa cjoí ndodé Josafat, co Josafat cjoí ndodé Joram, co Joram cjoí ndodé Uzías.

⁹ Uzías cjoí ndodé Jotam, co Jotam cjoí ndodé Acáz, co Acáz cjoí ndodé Ezequías.

¹⁰ Ezequías cjoí ndodé Manasés, co Manasés cjoí ndodé Amón, co Amón cjoí ndodé Josías.

¹¹ Josías cjoí ndodé Jeconías conixin cainxin xanchó Jeconías. Co ngain tiempo mé chojni Babilonia savicao cain chojni Israel para ngain nonttehe Babilonia de esclavo.

¹² Después de mé Jeconías cjoí ndodé Salatiel, co Salatiel cjoí ndodé Zorobabel.

¹³ Zorobabel cjoí ndodé Abiud, co Abiud cjoí ndodé Eliaquim, co Eliaquim cjoí ndodé Azor.

¹⁴ Azor cjoí ndodé Sadoc, co Sadoc cjoí ndodé Aquim, co Aquim cjoí ndodé Eliud.

¹⁵ Eliud cjoí ndodé Eleazar, co Eleazar cjoí ndodé Matán, co Matán cjoí ndodé Jacob.

¹⁶ Jacob cjoí ndodé José tti cjoí xixihi María, co María cjoí janné Jesús, que dinhi Cristo, tti Dios rroanha.

¹⁷ Jañá cjoí catorce ndodaha desde Abraham hasta rey David co de rey David icatorce ndodaha hasta are chojni Israel cjoí na ngain Babilonia de esclavo, co iná catorce ndodaha de are mé hasta are concjihi Cristo.

Are concjihi Jesucristo

(Lc. 2.1-7)

¹⁸ Janhi conhe para concjihi Jesucristo: janné Jesús, María, ovechonda compromiso ngain José para rrocottehe. Co saho de rroguintecao chó na, María oveyá chjan de ixin joachaxín Espíritu Santo.

¹⁹ José, tti joigoan xixihi María, cjoí ná xí jian de ngain Dios, co jehe joinaoha coequin chjni de ixin María. Jehe ijoinaoha rrogucao María. Mexinxin jehe xaxaon que irrocjanha ngain María. Jehe joinaoha conohe icha chojni que ixin jehe na ijeha novio na, mexinxin jehe xaxaon jañá.

²⁰ Co are José jixaxaon jañá, ná ángel de Dios jói ngain cottačhin are tajjioa José co ángel mé ndačho:

—José, jaha tti razé David, xañha que ixin María soan čhiha, ixin chjan que jehe rrochonda joixin xan de ngain Espíritu Santo.

²¹ Jehe sincheconcjihi ná xanxí, co jaha sincheguini xan JESÚS. Sinhi xan jañá ixin jehe xan tsjenga xan hna cainxin tti jianha que nchehe chojni xan.

²² Cain yá conhe para que joiconhe tti dindačho Dios ngain profeta que nichja:

²³ Ná xannčí que xa xonhi xí catte, xan mé xan seyá chjan,

co are tsoncjihi chjan mé, sinhi xan Emanuel,

co mé rročho: Dios jí ngayá na.

²⁴ Are José xingamehe de cottačhin, jehe joinchehe inčhin coetonha ángel de Dios co vayé María para čhihi.

²⁵ Pero vintteha na junto hasta que María joincheconcjihi xenhe que veyá. Co joincheguini xan JESÚS.

¹ Jesús concjixin ngain rajna Belén, ngain nonttehe Judea are Herodes vehe rey ngain nontte mé. De ngain iná nontte icha oriente vinttequixin ní xí para ngain ciudad de Jerusalén. Co canio xí mé de ixin conotse vagatsoanxin xa de ixin quehe siconhe ngataha nontte,

² co nttiha joanchiangui xa:

—¿Quettinó jí tti rey de chojni judío que oconcjiji? Janha na desde ngain lado oriente viconxin na conotse rey mé, co jai janha na joihi na nttihi para sinttasayá na rey mé.

³ Are rey Herodes conohe jihí, jehe veva contento, jehe conixin cain chojni que te ngain Jerusalén.

⁴ Cottimeja jehe rey Herodes vayé cain xidána que vaquetonha ngain icha xidána, co cain ximaestroe ley, co jehe rey joanchiangui ngain cain nimé ixin ttinó tsoncjixin Cristo, tti Dios rrorroanha.

⁵ Jehe na vinttendačo na:

—Ngain rajna Belén ngain nonttehe Judea, ixin profeta dicjin janhi:

⁶ Co jaha, rajna Belén que rrihi ngain nonttehe Judá, jaha tti icha importante de cainxin rajna que ttetonha nttiha, ixin de nganji sachjexin ná xí que tsetonha, co xí mé tti senda chojnina Israel.

⁷ Cottimeja Herodes jimao vayé canio xí que vinttequixin de lado oriente co joanchiangui Herodes ngain xa ixin quexehe nchanho mero xago conotse mé.

⁸ Cottimeja Herodes coetonhe canio xí mé para cjoí xa ngain rajna Belén co ndačo ngain xa:

—Tji ra nttiha, co danchiangui ra jian ttinó jí chjan yá. Co are osinchí ra xan, nchenona ra para que janha cai tsji sinttasayá xan.

⁹ Conixin tti ndačo rey jihí, canio xí mé savinttecji xa. Co tti conotse que vintteguicon xa de ngain lado oriente jitaon va nttiha direccíon de tti tettji xa hasta que tavehe va direccíon de ngain lugar tti jí xanxichjan.

¹⁰ Are canio xí mé vintteguicon xa conotse mé, anto vintteché xa;

¹¹ co are vintteguixinhi xa nchia tti jí xanxichjan ngain janné xan, María, canio jehe xa vinttetoxin nttajochjihí xa co joinchesayehe xa xanxichjan. Cottimeja vanttjé xa canxion caja que joicao xa para joinchetoen xa xanxichjan oro, co tsjoca, co iná cosa que dinhi mirra, que chojni vanchegonda inchin perfume.

¹² Cottimeja canio xí mé vitonhe xa ngain cottačhin que ixin irrocjanha xa ngain Herodes, mexinxin ojé nttiha savinttecyanxin xa para ngain nacioen xa.

Are María co José savicao na xanxichjan para Egipto

¹³ Después de savinttecji jehe tti canio xí que vinttequixin de ngain lado oriente, are tajijoa José, ná ángel de Dios joí ngain cottačhin José co ndačo ángel mé:

—Dingattjen co sattingacoho xanxichjan conixin janné xan. Sattji ra para ngain nonttehe Egipto co tadintte ra nttiha hasta que janha rroundattjo ra, ixin Herodes tsjé xanxichjan para nasoenxon xan.

¹⁴ Cottimeja vingattejen José conixin María para sajoicao na xanxichjan de ttie para Egipto.

¹⁵ Nttiha vintte na hasta que ndavenhe Herodes. Jańá conhe para joiconhe tti dindačo Dios ngain profeta, co jehe profeta dicjin: “De ngain nonttehe Egipto vayaxin Xanhna.”

Are coetonha Herodes para venhe cain xanxichjan

¹⁶ Are Herodes conohe ixin tti canio xí que vinttequixin de ngain lado oriente icjanha xa ngain inchin jehe coetonhe xa, jehe anto cońao co coetonhe xisoldadoe para nasoenxon xa cainxin xanxichjan que vinttechonda de yó nano para nontte que vintte ngain rajna Belén conixin xanvintte ngain icha rajna ngandanji Belén inchin tti tiempo que vinttendačo canio xí que vinttequixin de ngain lado oriente.

¹⁷ Jańá joiconhe tti diquentaxin profeta Jeremías:

¹⁸ Coinhi ní ná tté chojni de ngain ciudad de Ramá, que tsjanga co ta joachjaon.

Co mé Raquel tti vatsjangaxin xenhe,

co vačoha para que iná chojni rrogantsjehe joachjaon mé ixin cain xenhe ondavintteguenhe xan.

¹⁹ Pero después de ndavenhe Herodes, ná ángel de Dios joí ngain cottačhin are José tajijoa nttiha ngain Egipto, co ndačo ángel mé ngain José:

²⁰ —Dingattjen co sacjancoho xanxichjan conixin janné xan para ngain nontte Israel ixin ondavintteguenhe tti chojni que joinao narrogoenxon xanxichjan.

²¹ Cottimeja vingattjen José co sajoicao xanxichjan conixin janné xan para ngain nontte Israel.

²² Pero are conohe José ixin Arquelao tti jittetonha ngain Judea en lugar de Herodes, ndodé jehe Arquelao, José x̄aon para rrocji nttiha. Mexinxin jehe vitonhe ngain cottachin para sacjoi ngain regioen Galilea.

²³ Are jehe joiiji nttiha, jehe sajoiguehe ngain rajna Nazaret. Jihi conhe para joiconhe tti vinttendačo profeta que Jesús sinhi nazareno.

3

Juan ndache chojni ngagaha jna joajné Dios

(Mr. 1.1-8; Lc. 3.1-9, 15-17; Jn. 1.19-28)

¹ Ngain tiempo mé Juan, tti vancheguitte chojni, jói ngain regioen Judea, ngagaha jna tti jí joxon nchise para vandache chojni de ixin Dios,

² co vandačo ngain na:

—X̄o tenchehe ra jianha, incheha ra jamé. Ttentoixinhi ra vidá ra ixin tti ttetonha Dios ochian jói.

³ Jehe Juan jihi tti diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rrondačo:

“Nchehjian ra nttiha para ixin jehe tti chonda cain joachaxin; danttjehe ra ná nttiha nao.”

⁴ Lontoe Juan diconchjian de x̄ehe cocamello, co cinturoen de roa, co jehe vane ná tipo de coxoali que dinhi langosta, co tsjén cormena que jehe vaguittja ngagaha jna mé.

⁵ Vaquí chojni de ciudad de Jerusalén ngain Juan para vaquinhí na tti vandačo, co vaquí cainxin chojni de ngain nonttehe Judea co cai cain chojni que vintte ngain rajna que vintte chiaon de río Jordán.

⁶ Co are vaquendoenhe ñao na de cain tti jianha que vanchehe na, cottimeja Juan vancheguitte na ngain río Jordán.

⁷ Pero are Juan vicon que atto tsje xifariseo co xisaduceo cjoi xa ngain para rrojiguitte xa cai, jehe ndačo ngain xa:

—Jaha ra razé conché! ¿Quensen jointtanoha ra ixin nchao setanha ra tti castigo anto soji que jitonchian?

⁸ Chonda ra que sinchehe ra jian para que jamé sicon ni claro que jaha ra ocoentoxinhi ra vidá ra,

⁹ co ndacheha chó ra: “Ján na razé Abraham na”; ixin janha rrondattjo ra que hasta x̄o jihi Dios nchao sinchchjian x̄o chojni de razé Abraham.

¹⁰ Hacha ojí listo para tsonchínji nttá, co cain nttá que danjoha jian ttotchjoin rrochinji nttá mé co rroche ntta ngain x̄ohi.

¹¹ Ndoa que jai janha rrinttaguitte jaha ra conixin jinda, co mé jehó ná señal que ixin jaha ra ocoentoxinhi ra vidá ra; pero tti tsi después de janha, jehe sinttaguitte ra conixin Espíritu Santo co Espíritu mé tsiaho inchin x̄ohi para sincheroa almá ra inchin oro toroaxin ngain x̄ohi. Jehe mé chonda icha tsje joachaxin que janha, hasta que janha ni jiquininxinha na ni para tsjiá catté.

¹² Co jehe mé ochonda palé ngá rá para tsjendoaxin trigo para sachjehe trigo paja. Jehe tsenchjinha trigoe ngain nchiandoha, co paja tsjaga ngain ná x̄ohi que x̄onhi tiempo danga.

Are joiguitte Jesús

(Mr. 1.9-11; Lc. 3.21-22)

¹³ Co Jesús joixin de Galilea para cjoi ngain río Jordán, tti vehe Juan para que Juan joincheguitte Jesús.

¹⁴ Pero Juan x̄ohi para rrojincheguitte Jesús, co ndačo ngain Jesús:

—Jaha tti jiquininxin sincheguitte na janha; ¿quedonda janha sinttaguitte jaha?

¹⁵ Pero Jesús ndačo:

—Pero jaxon sonttoha na jamé ixin ján na jiquininxin sonttoho na inchin rinao Dios. Cottimeja Juan vitticaon.

¹⁶ Co are joexin joiguitte Jesús, vačhenguixin de jinda. Co rato mé ngajni xiré, co Jesús vicon Espíritu Santo de Dios que xincanji inchin ná conttoanajni ngataha Jesús.

¹⁷ Cottimeja coinhi na tté Dios de ngajni, que ndačo:

—Jehe jihi tti Xanhná que janha anto rinaho, co de ixin jehe Xan janha anto chahna.

4

Are inchínji joinao rrojincheyehé Jesús

(Mr. 1.12-13; Lc. 4.1-13)

¹ Cottimeja jehe Espiritu mé joicao Jesús para ngagaha jna tti jí joxon nchise para que inchínji rrojincheyehe Jesús.

² Nttiha vehe Jesús cuarenta nchanho co cuarenta ttie, co ngoixin tiempo mé jehe joineha. Cottimeja jehe venhe jintta.

³ Cottimeja inchínji conchienne ngain Jesús para rrojincheyehe, co ndacho ngain Jesús:

—Si ndoa jaha Xenhe Dios, ttonha que xo tehe rocjan xo niottja.

⁴ Pero Jesús ndacho:

—Tti jitaxin Palabré Dios ndacho: “Chojni sinttechonxin na jeoha de tti jine na, sino cai de cain palabra que Dios ndacho.”

⁵ Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha tti nihngo icha importante

⁶ Co nttiha ndacho inchínji ngain Jesús:

—Si ndoa jaha Xenhe Dios, daritsingaxin de nttihi hasta tti nontte, ixin ndacho ngain tti jitaxin Palabré Dios:

Dios tsetonhe ángel de jehe para senda jaha.

Cain ángel mé rrocacha conixin rá

para que xonhi tti tsonihi rottea de ixin xo.

⁷ Jesús ndacho:

—Cai ndacho ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

⁸ Cottimeja jehe inchínji sajoicao Jesús para ngataha ná jna anto noi. Co de nttiha cjoagoexin inchínji Jesús cainxin nación que jí ngoixin mundo co cain tti chjoin que jí ngain cain nación mé.

⁹ Co ndacho inchínji ngain Jesús:

—Janha rrochjaha jaha cain yá si jaha sarittoxin nttajochjiha co sinchesayana janha.

¹⁰ Cottimeja Jesús ndacho ngain inchínji:

—Sattjixin de nganji janha, Satanás, ixin ndacho ngain tti jitaxin Palabré Dios: “Nch-esayehe jehó Dios tti chonda joachaxin para ixin jaha, co jehó ngain jehe ditticaon jaha.”

¹¹ Cottimeja inchínji sacjoixin de ngain Jesús, co jói canxion ángel de Dios para joinchea-tendehe Jesús.

Jesús coexinhi xé ngain Galilea

(Mr. 1.14-15; Lc. 4.14-15)

¹² Are Jesús conohe que Juan jiaxinhi ngain cárcel, jehe sacjoi para nonttehe Galilea.

¹³ Pero jehe taveha ngain rajna Nazaret, sino que jehe sacjoi joiguehe ngain rajna Capernaum, co mé ná rajna que jí ngandehe lago que dinhi Galilea ngain regioen Zabulón co Neftalí.

¹⁴ Jamé joiconhe tti dindacho profeta Isaías:

¹⁵ Nonttehe Zabulón co nonttehe Neftalí que te ngaca jinda que dinhi Galilea toenxin río Jordán, nonttehe Galilea tti te chojni que jeha judío.

¹⁶ Tti chojni que vinte inchin ngain tti naxin xehe, jai jehe na inchin ná xohi joinchen-gasañehe na.

Co tti chojni que inchin ondavenhe pero jai co tti xechon na iná.

¹⁷ Desde are mé Jesús coexinhi ndache chojni de ixin Dios. Jehe vandacho ngain na:

—Ttontoxinhi ra de tti jianha que jaha ra tenchehe ra ixin Dios que ttjen ngajni otion tsetonha nganji ra.

Jesús nichjé nó xí que vatse copescado

(Mr. 1.16-20; Lc. 5.1-11)

¹⁸ Jesús mero jidatto ngandehe lago que dinhi Galilea are jehe vicon yó xí, co cayoi xí mé ichó xa. Ná xa vinhi xa Simón, co cai vinhi xa Pedro, co iná xa vinhi xa Andrés. Co cayoi xí mé vatse xa copescado, co rato mé tetjahngui xa nonchaha jinda.

¹⁹ Jesús ndacho ngain cayoi xí mé:

—Xacoi ra chjin na; jaha ra ttejo ra copescado pero jai janha sinttaoanha ra quexén tsjejo ra chojni para ixin Dios.

²⁰ Co rato mé cointtohe na nonchaha co sajoicao na Jesús.

²¹ Nchion icha ndaha Jesús vicon iyó xí, co cayoi xí mé ichó xa cai. Cayoi xí mé xenhe Zebedeo. Ná xa vinhi xa Jacobo co iná xa vinhi xa Juan. Cayoi xí jihhi tate xa conixin ndodé xa Zebedeo ngá ná barco tatetteyehe na nonchaha. Jesús vayé na,

²² co ngain rato mé cointtohe na ndodé na nttiha ngain barco mé co sarroé na Jesús.

*Jesús joinchecoehne tsje chojni de ixin Dios
(Lc. 6.17-19)*

²³ Jesús ngaria ngoixin nonttehe Galilea para joinchecoehne chojni de ixin Dios ngain cain nihngo que te nttiha. Jehé ndache na tti jian joajna de ixin quexén ttetonha Dios co jehé vanchexingamehe cain chojni que vinttechonda quexeho chin.

²⁴ Co hasta chojni de ngoixin regioen Siria conohe na tti jian que vanchehe Jesús co joiaho na ngain Jesús cain chojni que vinttechonda quexeho chin; tti vinttechonda dolor ngain cuerpoe, tti vinttechonda espíritu jianha, tti vinttechonda chin denda, co tti çhoha vaguinttequingui rioho cuerpoe. Co Jesús joinchexingamehe cain chojni mé.

²⁵ Co ngain tiempo mé tsje chojni de tsje parte rroé na Jesús tti jehé savacji; chojni de Galilea, de ngoi regioen Decápolis, de ngain Jerusalén, de Judea, co de toenixin río Jordán.

5

Tsje nichja Jesús ngain chojni are ngain jna

¹ Are Jesús vicon anto tsje chojni çatte ngain, jehé coani ngain ná jna para que jehé nchao ndache cain chojni mé de ixin Dios, co are jehé nttiha, cain chojni que vácao vintte na ngandanji jehé.

² Cottimeja jehé coexinhi ndache na janhi:

*Quexehe chojni tti chonda çhjoin vida
(Lc. 6.20-23)*

³ —Anto çhjoin para ixin tti chojni que çaxaon ixin rrongondehe na que Dios tsjenguijna na, ixin chojni mé tequininxin na ngajni tti ttetonha Dios.

⁴ 'Anto çhjoin para ixin tti chojni que techín de ixin anto tsje cosa jianha jí ngataha nontte jiji, ixin Dios sincheconsolá chojni mé.

⁵ 'Anto çhjoin para ixin tti chojni que dintteha orgulloso, ixin jehé na nisayé tti nontte que Dios ndaço sanjo.

⁶ 'Anto çhjoin para ixin tti chojni que anto rinao sinchehe inchin ttetonha Dios, ixin jehé Dios tsjenguijna chojni mé para sinchehe na jamé.

⁷ 'Anto çhjoin para ixin tti chojni que ttiacnoehe icha chojni, ixin Dios tsiacnoehe chojni mé.

⁸ 'Anto çhjoin para ixin tti chojni que ixonhi jianha teca ixin chojni mé sicon na Dios.

⁹ 'Anto çhjoin para ixin tti chojni que ttjenguijna icha chojni para tsetoha na, ixin Dios sincheguinhí cain chojni mé xenhe jehé Dios.

¹⁰ 'Anto çhjoin para ixin tti chojni que anto tanguí tonhe ixin jehé na tenchehe na inchin rinao Dios, ixin chojni mé tequininxin na ngajni tti ttetonha Dios.

¹¹ 'Co anto çhjoin para ixin jaha ra are chojni feo ndattjo ra na, co feo nchehe na nganji ra, co ndattjo ra na tsje cosa que jeha ndoa para rroningacoanxin ra na ixin jaha ra nichja ra joajnana janha.

¹² Masqui jamé tsonha ra, jaha ra çhjoin tonoha ra co dintte ra contento, ixin jaha ra sayehe ra jie premio ngajni. Ixin cai jañá feo joinchehe chojni ngain cain profeta que jói icha saho que jaha ra.

*Chojni que ditticaon Jesús inchin xijntta co inchin joadingasán para ngain mundo jiji
(Mr. 9.50; Lc. 14.34-35)*

¹³ 'Jaha ra inchin xijntta para ngain chojni ngataha nontte jiji. Pero si xijntta mé ndarroçjan simple que ijeha xijntta, ¿quexén nchao sinchegonda chojni? Xijntta mé ixonhi çé, jehé para singo ndaha co tsingachje chojni.

¹⁴ 'Co jaha ra inchin joadingasán para icha chojni de ngataha nontte jiji. Inchin ná ciudad que jí ngataha ná jna, cain chojni de cjin nchao siconxin na ciudad mé.

¹⁵ Ni ná lámpara are jinchengasán çhoha sehe ngaxinhi ná cajón ixin lámpara mé chonda que sehe noi para sinchengasene cain chojni que te ngain nchia.

¹⁶ Jamé jaha ra cai, nchehe ra jian para que tti jian que jaha ra sinchehe ra, mé inchin joadingasán para ngatto con cain chojni para que are jehé na sicon na tti jian que jaha ra sinchehe ra, jehé na sinchecoanxinhi na Ndojá ra que ttjen ngajni.

Jesús çjoagoe chojni quehe rroçho ley que vayé Moisés

¹⁷ Co Jesús ndaço cai:

—Çaxaonha jaha ra que janha joihi para jointtaxante ley que vayé Moisés ni cain tti ndaço cain profeta are saho; janha joiha para jointtaxante cain mé, janha joihi para jointdattjo ra tti mero ndoa quehe rroçho cain mé.

¹⁸ Janha rroundattjo ra ndoa que cain tiempo que sehe ngajni co nontte, ley mé rroxant-teha ni rioho ni ná letra sachjeha hasta tsoenja cain tti jitaxin ngain ley mé ixin cain mé chonda que tsonhe.

¹⁹ Mexinxin tti chojni que ditticaonha quexeho parte que ley jiji ttetonha, masqui parte mé antoha importante, co si chojni mé tsjagoe icha chojni para sinchehe na xajeho, Dios rrondačo que chojni mé antoha importante ngajni, tti ttetonha Dios. Pero tti chojni que ditticaon cain tti ttetonha ley jiji, co jehe ncheoenhe icha chojni xajeho inchin jehe nchehe, Dios rrondačo que ixin chojni mé anto importante na ngajni tti ttetonha Dios.

²⁰ Ixin janha rroundattjo ra, que si jaha ra sincheha ra icha jian que cain ximaestroe ley mé co tti nchehe cain xifariseo, jaha ra čhoha sintte ra ngajni tti ttetonha Dios.

*Are Jesús ndache chojni quehe tsonhe chojni que tsoñahe chó
(Lc. 12.57-59)*

²¹ Jaha ra coinhi ra tti vitonhe nindogoelitoa ra xančhjen janhi: “Dantsjeha ra vidé iná chojni, ixin quexeho tti santsjehe vidé iná chojni, tti tjaya chonda que soenhe juzgado.”

²² Pero janha rroundattjo ra que quexeho tti tsoñahe iná chojni, tti tsoñaó mé chonda que soenhe juzgado. Co quexeho tti rrondače feo iná chojni, tti rronichja feo mé soenhe juzgado de ngain tti juzgado que chonda icha tsje joachaxin nntihi ngataha nontte. Co tti ncheguinhí iná chojni, tonto, tti ndačo mé chonda peligro de tsji ngacjan xoi infierno.

²³ Mexinxin are jaha tsjiho ofrenda ngain alté Dios para sanjo ngain, co rato mé jaha rroaxaxaon que ixin iná chojni ningaonha jaha,

²⁴ nntiha ttinttohe ngaca altar tti jaha sanjo ngain Dios, co ttji ngain tti chojni que ningaonha co nchetsenhe ñao que itsoñaoha nganji ni jaha ngain jehe. Cottimeja cjan jaha para danjo tti jaha rridanjo ngain Dios.

²⁵ Si čhonja chojni sičo jie para ixin jaha, co tsjiho ngain juzgado, icha jian de ngatjao nntiha jaha nchetsenhe ñao chojni mé para que jehe sinttatjañaha cain tti rrica, para que jehe itsjioha ngain xijuez. Ixin si nahi, xijuez tsetonhe xa xipolicía para que tsiaxinha xa jaha.

²⁶ Co ndoa tti janha rroundattjo, que nntiha siaxinha hasta que tsjengaja hna cainxin tomi que jaha rrica.

Are Jesús ndache chojni que ixin jianha para ná xí sejoacaho xa iná nčhí

²⁷ Jaha ra ocoinhi ra ixin ley que vayé Moisés ttetonha janhi: “Dinttečhincoha ra iná nčhí que jeha nčhíčhiha ra.”

²⁸ Pero janha rroundattjo ra que quexeho ná xí tsiaconhe iná nčhí, xí mé rročo que inchin ojoinchehe xa tti jehe xa xaxaon xa ngain nčhí mé de ngain anšén xa.

²⁹ Mexinxin si jmacon sinttaaxaxaon para sinchehe jianha, ncheha cosa mé masqui hasta dantsjengui jmacon mé co danca ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

³⁰ Co si rá sinttaaxaxaon de sinchehe jianha, ncheha cosa mé masqui hasta tončhinji rá mé co danca ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

*Are Jesús ndačo de ixin tti chojni que dachjendehe chó
(Mt. 19.9; Mr. 10.11-12; Lc. 16.18)*

³¹ Cai ndačo ngain ley que vayé Moisés: “Tti rinao sachjendehe nčhíčhihi chonda que sinchechjienhe nča ná xón que setaxin que jehe ndoa ondavačhjenje nča para ngoixin vidé.”

³² Pero janha rroundattjo ra, que si ná xí sinao xa sachjendehe xa nčhíčhihi xa (co jeha ixin vittjixin xa nča tajjoacaho nča iná xí,) xixihi nča tti culpé ngattoxon con Dios co por ixin tti sinchehe jehe xa, nčhí sinchehe nča jianha cai. Co xí que jehe nča secáo nča después, sinchehe xa jianha cai ixin secáo xa nčhí mé.

Are Jesús ndache chojni ixin nchejuraha

³³ Cai ndačo Jesús:

—Cai jaha ra ocoinhi ra ixin vitonhe nindogoelitoa ra xančhjen janhi: “Ttinttoeha de nchehe tti jaha joincheprometé conixin ná juramento de ixin nombré Dios.”

³⁴ Pero janha rroundattjo ra que xonhi tiempo sinchejurá ra. Nchejuraha ra de ixin ngajni ixin nntiha tti ttjen Dios.

³⁵ Ni nchejuraha ra de ixin ngataha nontte ixin nntihi tti nchejogaxin rotté Dios. Ni nchejuraha ra de ixin Jerusalén ixin mé tti ciudad de Dios, tti Rey de cainxin cosa.

³⁶ Ni nchejuraha ra de ixin já ra ixin jaha ra čhoha sinchettie ra ni sincheroa ra ni ná xajá ra.

³⁷ Mexinxin icha jian jeha ndaĉho ra “ján” o “nahi” ixin si rrondaĉho ra icha, mé tsixin de ngain inchíji.

Are Jesús ndaĉho ixin tsjengueyexinha ni iná chojni que joinchehe jianha ngain ni (Lc. 6.29-30)

³⁸ Jaha ra ocoini ra quehe tteonha ley que vayé Moisés: “Tti tsonĉinga jmacon ná chojni, cai jeha chonda que rroĉinga jmacon. Co tti sanqué neno ná chojni, cai jeha chonda que setsinga neno.”

³⁹ Pero janha rrindattjo ra que ncheha ra jamé ngain tti chojni que sinchehe jamé nganji ra. Sino que, si ĉhonja chojni rroĉanguilha ra ná manazo ngá con ra, dittoaxin ra para rroĉanguilha ra iná manazo.

⁴⁰ Co si ĉhonja chojni siĉho jie para ixin jaha ra co sinao na santsjaha ra na camisá ra, jaha ra dittoaxin ra danjo ra hasta chamarrá ra cai.

⁴¹ Si ĉhonja chojni tsetonha que jaha ra tsjiho ra ná carga yó kilómetro, jaha ra dittoaxin ra ttjiho ra carga mé hasta nó kilómetro.

⁴² Co quexeho chojni que sanchiaha ra ná cosa, jaha ra chjehe ra; co ndaĉho ra nahi ngain chojni mé.

Are Jesús ndaĉho chonda que sinao ni chojni que ningaconhe ni (Lc. 6.27-28, 32-36)

⁴³ Cai jaha ra ocoini ra ixin ley que vayé Moisés janhi tteonha: “Rinao chojni amigoa co ningaconhe tti chojni que ningaconha jaha.”

⁴⁴ Pero janha rrindattjo ra que rinao ra tti chojni que ningaconha ra, co nichja ra jian de ixin tti chojni que nichja jianha de ixin jaha ra co nchehe ra jian ngain tti chojni que ningaconha ra, co nchetsenhe ra ñao Dios que jeha sinchehe jian ngain tti chojni que feo ndattjo ra co nchehe feo nganji ra.

⁴⁵ Jañá sinchehe ra para que sintte ra ndoa xenhe Ndo dá ra que ttjen ngajni. Ixin jeha Ndo mé tti roanha nchanho para nchengasañehe cain chojni, tti chojni que nchehe jian co tti chojni que nchehe jianha, co jeha Ndo tti roanha ĉhin para cainxin chojni cai, tti nchehe jian co tti nchehe jianha.

⁴⁶ Ixin si jaha ra rinao ra jeha tti chojni que jeha rinao ra jaha ra, xonhi premio sayehe ra ixin hasta tti chojni que chonxinha de ixin Dios cai nchehe jamé, inchin cain xicobrador de impuesto.

⁴⁷ Co si jeha amigoa ra rronichjehe ra, cai mé ¿quehe jian sinchehe ra? ixin hasta tti chojni que chonxinha de ixin Dios nchehe na jamé cai.

⁴⁸ Nchehe ra de que dintte ra chojni jian, jañá inchin Ndo dá ra que ttjen ngajni jeha Ndo jian Ndo.

6

Are Jesús ndaĉho ixin chonda ni que tsjenguijna ni chojni noa

¹ Nchehe ra tti jian jeoha are tatetsjehe icha chojni para que jeha na sicon ra na co rroĉaxaon na ixin jaha ra anto jian ra. Si jamé sinchehe ra, Ndo dá ra que ttjen ngajni xonhi tsjengaha ra Ndo hna.

² Mexinxin are jaha ra tsjenguijna ra chojni noa, ttequinha ra ngain cainxin chojni inchin nchehe canxion chojni are ngain nihngo Israel co ngá ntliha. Chojni mé ndaĉho ixin nchehe na jañá para ixin Dios, pero ndoaha; chojni mé nchehe na jañá para que icha chojni rronichja na jian de ixin chojni mé. Pero janha rrindattjo ra que Dios xonhi tsjenguehe hna chojni mé ixin ojoacha de tti jian que nichja icha chojni por ixin jeha.

³ Mexinxin jaha ra are tsjenguijna ra chojni noa, xonhi chojni ttequinhi ra, ni chojni icha amigoa ra ndacheha ra.

⁴ Rroĉho que ttjenguijna ra chojni mé, pero jimao. Co Ndo dá ra que ttjen ngajni sicon Ndo tti jaha ra sinchehe ra; co jeha Ndo tsjengaha ra Ndo hna.

Jesús cjoago quexén sinchecoanxinhí ni Dios (Lc. 11.2-4)

⁵ Co Jesús ndaĉho cai:

—Are jaha ra sinchecoanxinhí ra Dios, ncheha ra inchin nchehe tti chojni que ncheoxinhí na nchecoanxinhí na Dios tatengattjen na ngaxinhí nihngo co ngain esquiné ntliha, para que icha chojni sicon na. Chojni mé ndaĉho na ixin nchehe na jañá para ixin Dios, pero ndoaha. Janha rrindattjo ra que Dios tsjengueha hna chojni mé tti jeha na tenchehe na, ixin ochonda na tti sachá na.

⁶ Mexinxin are jaha ra sinchecoanxinhí ra Dios, dixinhí ra nchiandoi ra co ttejehe ra puerté nchia co nchecoanxinhí ra Dios Ndodá ra que ttjen nganji nttiha, jaho ra conixin jehe Ndo. Co Dios tti sicon tti jaha ra tenchehe ra, co jehe Ndo tsjengaha ra Ndo hna.

⁷ Are jaha ra sinchecoanxinhí ra Dios cjantaonha ra de nichja ra tti palabra que xonhi xé, inchin tti chojni que chonxinha de ixin Dios, ixin jehe na xaxaon na que Dios sinchehe caso cain tti jehe na tendaxho na ixin anto tsje tenichja na.

⁸ Mexinxin jaha ra ncheha ra inchin nchehe jehe na, ixin Ndodá ra que ttjen ngajni onoho Ndo quehe rrogondaha ra icha saho que jaha ra sanchiehe ra Ndo.

⁹ Mexinxin jaha ra nchecoanxinhí ra Ndo janhi:

Padre soixin que ttjen ngajni,
nombrea soixin jiquininxin tsosayehe.

¹⁰ Siquetonha nttihi soixin.

Co tsonhe inchin soixin rinao nttihi ngataha nontte, jañá inchin tonhe nttiha ngajni.

¹¹ Chjana ra jai tti sine na que rrogondana na.

¹² Nchetjañana ni ra tti jianha que jointtaha na, jañá inchin janha na jointtatañá na tti chojni que joinchehe jianha nganji na.

¹³ Nchegattoha ni ra tangui; tanxhandaha ni ra ngain tti jianha.

Ixin soixin tti tetonha co soixin tti chonda cainxin joachaxin co gloria para cainxin tiempo.
Amén.

¹⁴ Ixin si jaha ra nchetjañehe ra tti chojni que nchehe jianha nganji ra, Ndodá ra que ttjen ngajni sinttatañaha ra Ndo jaha ra cai.

¹⁵ Pero si jaha ra nchetjañehe ra chojni mé, Ndodá ra que ttjen ngajni cai xhoxa sinttatañaha ra Ndo cain tti jianha que jaha ra nchehe ra.

Are Jesús ndaxho quexén sinttecxáño ni

¹⁶ Co Jesús ndaxho cai:

—Are jaha ra sinttecxáño ra para ixin Dios, dinttechinha ra inchin tti chojni que ncheha inchin ndaxho. Chojni mé ndaxho na ixin tecxáño na para ixin Dios pero nahi, ixin chojni mé dinttechin na para que icha chojni dicon que ixin jehe na tecxáño na. Pero janha rrindattjo ra seguro que chojni mé Dios xonhi tsjenguehe na hna ixin ochonda na tti sacha na.

¹⁷ Pero jaha ra are sinttecxáño ra para ixin Dios, tontti ra jinda ngá con ra co nchejinji ra já ra jian,

¹⁸ para que icha chojni rroxaxaonha na que ixin jaha ra tecxáño ra para ixin Dios. Jeho Ndodá ra que ttjen nganji tsonohe Ndo, co jehe Ndo tsjengaha ra Ndo hna.

Cosa rentte que rrochonda na ngajni

(Lc. 12.33-34)

¹⁹ Cai ndaxho Jesús:

—Datseha ra tsje cosa nttihi ngataha nontte, nttihi tti ndattjehe cochí co nttihi tti cain cosa ndaditján, co nttihi tti jí tti chehe que tté cain cosa.

²⁰ Icha jian datse ra tsje cosa para ngajni, nttiha tti xonhi cochí jí para tsjehe cain cosa, ni cain cosa diha chjín, ni tti chehe coha nttiha para tsé.

²¹ Ixin ngain lugar tti jaha ra rrochonda ra cosa icha importante para ixin jaha ra, cai nttiha sehe joarrixaoan ra co ansean ra.

Jmacon ni, mé tti lamparé cuerpoe ni

(Lc. 11.34-36)

²² Cai ndaxho Jesús:

—Jmacon jí inchin ná lámpara ngain cuerpoa. Mexinxin si jmacon jian, cai ngoixin cuerpoa rrochonda joadingasán. Rrocho si joadingasán que Dios rroanha jí ngain ansean, jaha ná chojni jian.

²³ Pero si jmacon jianha, cai ngoixin cuerpoa jí ngain tti naxin xehe. Rrocho que si coha nganji tti joadingasán que Dios rroanha, jaha inchin chojni chejo ixin xhoxa dicon nttié Dios. ¡Co tti naxin xehe mé anto jianha para ixin jaha!

Chonda que icha sinao ni Dios que tomi

(Lc. 16.13)

²⁴ Xonhi chojni nchao sinchehe xé yó xinajni ngain nacoa tiempo, ixin icha sinao ná xinajni co rroningaconhe iná xinajni, o icha sitticaon ngain ná xinajni co ngain iná xa isincheha caso. Jañá cai xhoxa sinao ni tomi co sinao ni Dios ngain nacoa tiempo.

Dios jinda cain xenhe

(Lc. 12.22-31)

²⁵ Cai ndaxho Jesús:

—Co janha rrindattjo ra que taha ra joachjaon de ixin tti sintte ra co de ixin tti sihi ra para sinttehonxin ra, ni taha ra joachjaon de ixin lonto para sinttengaha ra ixin icha rentte vidé ni que tti jine ni, co icha rentte cuerpoe ni que lontoe ni. Ixin Dios chjá ra vida que techonxin ra, mexinxin jehe tti rrochjá ra cain cosa que rrogondaha ra ngain vida jiji.

²⁶ Tsjehe ra que cain conttoa que tjanganga va ngataonhe čhintto; jehe va xonhi ttenga va ngataon jngui, co jamé xonhi cosecha tsín va, ni ttENCHJIANHA va cosecha ngain ná nchia. Pero masqui jamé, Ndodá ra que ttjen ngain danjo Ndo tti jine cainxin coxigochjan mé. Co jaha ra seguro que icha rentte ra que cain coxigochjan mé.

²⁷ Co jaha ra masqui anto tsa ra joachjaon pero čhoja sahngui ra ni irioho metro icha de tti jininxin ra.

²⁸ '¿Quedonda jaha ra anto ta ra joachjaon de ixin lonto? xaxaon ra jian quexén dangui cain tsjo ngataon jngui que cain tsjo mé ncheha tsjo xa, ni tajinha tsjo čhjon.

²⁹ Co ni rey Salomón, que jehe anto čhjoin vaguítsá, pero xonhi tiempo jehe vetsá icha čhjoin que cain tsjo.

³⁰ Si Dios jańa nchetsá cain ca que jehó jai jí ca ngataon jngui co ndoe ondarroxema ca co rroche ca ngain xohi, mexinxin Dios sinchehe icha jian nganji jaha ra masqui xa ditticaonha ra jian ngain Dios.

³¹ Mexinxin taha ra joachjaon ni tendačhoja ra: “¿Quehe sontte na? o ¿quehe sonho na? o ¿quehe lonto sitoxianxin na?”

³² Ixin cain icha chojni cain jiji tti taxin na joachjaon, pero jaha ra chonda ra ná Ndodá ra que ttjen ngain co jehe Ndo onohé Ndo que jaha ra ján rrogondaha ra cain cosa jiji.

³³ Mexinxin cain tiempo ditticaon ra cain tti jehe Ndo ttetonha Ndo, co nchehe ra tti jehe Ndo rinao Ndo, co jamé sayehe ra cain cosa jiji.

³⁴ Co taha ra joachjaon de ixin quexén sinchehe ra ndoe, ixin ndoe tsiaho ojé problema. Nchanho co nchanho chonda problemé, pero jaha ra chonda ra confianza ngain Dios ixin jehe tti sinttaxaxaon ra quehe sinchehe ra.

7

Ncheha ra juzgado iná chojni

(Lc. 6.37-38, 41-42)

¹ Ncheha ra juzgado iná chojni para que Dios sincheha juzgado nganji ra.

² Ixin jehe sinttajuzgá jaha ra xajeho inchin jaha ra nchejuzguehe ra icha chojni, co jehe sinchehe nganji ra inchin nchehe jaha ra ngain icha chojni.

³ ¿Quexén nchao sicon ra tti anto nčhín caxineno que jingangui jmacon iná chojni, co diconha ra tti caxineno anto jie que jingangui jmacon ra jaha ra?

⁴ Si jaha ra jingangui ná caxineno anto jie ngangui jmacon ra, ¿quexén nchao rrondate ra iná chojni: “Tanchjanda na santsjenguiha caxineno que jingangui jmacon?”

⁵ Jaha ra tti chojni que ncheha tti ndačho! Saho dantsjengui ra tti caxineno anto jie que tengangui con ra, co jamé nchao sicon ra jian para santsjengui ra tti caxineno nčhín que jingangui jmacon iná chojni.

⁶ Ncheha ra sigue ndačho ra joajné Dios ngain tti chojni que anto čhintto inchin conia ixin joajna mé anto jian co jehe chojni mé puede rrocjancoa na nasoexon ra na. Ni ncheha ra sigue ndačho ra joajné Dios ngain tti chojni que deporsin nchexoxinhi nchehe jianha, ixin chojni mé te inchin cocochi co joajné Dios inchin perla que anto fino, co jehe na sincheha na caso, inchin are cocochi ttingachjexon va noa co jineha va.

Quexén sanchia cosa de ngain Dios

(Lc. 11.9-13; 6.31)

⁷ Danchia ra co Dios rrochjá ra. Ttjé ra co sinchí ra. Dinga ra puerta co puerta mé rroxiré.

⁸ Ixin tti chojni que danchia dayé; co tti chojni que ttjé, jehe dittja; co tti chojni que dinga puerta, xiré puerta mé para ixin jehe.

⁹ ¿Ixin apoco čonja de jaha ra nchao rrochjehe ra xanha ra ná xo are sanchiaha ra xan niottja?

¹⁰ ¿O apoco nchao rrochjehe ra xan nntaohe conché are sanchiaha ra xan nntaohe copescado?

¹¹ Jańa, si jaha ra que jeha jian ra noha ra danjo ra cosa jian ngain xanha ra, mexinxin Ndodá ra que ttjen ngain seguro rrochjá ra Ndo cosa jian jaha ra xo sanchiehe ra Ndo.

¹² Mexinxin cainxin tiempo nchehe ra ngain icha chojni inchin jaha ra rinao ra sinchehe jehe na nganji ra, ixin jamé ttetonha ley que vayé Moisés co cain tti dicjin cainxin profeta are saho.

Tti puerta jno

(Lc. 13.24)

¹³ Para tsji ra ngajni chonda que sixinxin ra de ngain tti puerta jno, ixin tti puerta ton co tti nttiha ton, mé tti sattjixin tsje chojni ngain infierno.

¹⁴ Pero tti puerta co tti nttiha que satsjixin chojni para ngajni, cayoi mé nojno, co tsjeha chojni chonxin puerta mé co nttiha mé.

Nttattochjoin datsoan ni ntta de ixin ttochjoín ntta

(Lc. 6.43-44)

¹⁵ Tjiho ra cuidado de ixin tti chojni mentiroso que ndačo na ixin jehe na nichja na de ixin Dios pero ndoaha. Jehe na ndačo na jaña de ngain rroha na pero de ngain ansén na jehe na jianha na inchin coxigo chintto ngagaha jna.

¹⁶ Jaha ra nchao satsoan ra chojni mé de ngain tti jehe na nchehe na ixin inchin nttanchaha čhoha sinchian ntta uva, ni canchaha čhoha sinchian ca higo,

¹⁷ jaña cai cain nttattochjoin jian danjo ntta ttochjoin jian, co tti nttattochjoin que xonhi xé danjo ntta ttochjoin que xonhi xé.

¹⁸ Nttattochjoin jian čhoha sanjo ntta ttochjoin que xonhi xé ni cai nttattochjoin que xonhi xé čhoha sanjo ntta ttochjoin jian.

¹⁹ Cain nttattochjoin que danjoha ttochjoin jian čhinji ntta mé co che ntta ngain xohi.

²⁰ Co jamé jaha ra rrochonxin ra chojni mé de ngain tti jehe na nchehe na.

Cainxinha chojni tsji na ngajni tti ttetonha Dios

(Lc. 13.25-27)

²¹ Cainxinha chojni que ndachjenji na janha: “Soixin, Soixin”, tsji na ngajni tti ttetonha Nnodana, sino que jehoi tti chojni que nchehe cain tti rinao Nnodana que ttjen ngajni.

²² Are tsí nchanho mé, tsje chojni rrondachjenji na janha: “Soixin, Soixin, janha na ndattjan na chojni de ixin soixin, co ngain nombrea venguixin na espíritu jianha de ngaxinhi cuerpo tsje chojni, co de ixin nombrea jointtaxin na tsje milagro.”

²³ Pero ngain nchanho mé janha rrondachjenji na: “Janha xonhi tiempo joatsoan jaha ra inchin chojnina. Sattjixin ra de nnganji janha, jaha ra xo joinchehe ra jianha.”

Tti nchia que jingattjen ngataha ttjao co tti nchia que jingattjen ngataha nchise

(Lc. 6.47-49; Mr. 1.22)

²⁴ Jaña mexinxin tti chojni que ditticaon na janha co nchehe tti janha ndačhan, chojni mé inchin ná xí que xaxaon jian para joinchechjian nchiandoha ngataha ttjao.

²⁵ Co are jói čhin, coyé jinda ngain río, co cjoa čhintto soji ngain nchia mé, pero nchia vetsingaha nchia ixin soji jingattjen nchia ngataha ttjao.

²⁶ Pero tti chojni que ttinhi tti janha ndačhan co ncheha jamé, chojni mé inchin tti ná xí que xonhi xé tti jehe xa xaxaon xa ixin dinchechjian xa nchiandoha xa ngataha nchise.

²⁷ Co are jói čhin, coyé jinda ngain río, co cjoa čhintto soji, nchia mé cjamangui nchia. Co mé anto tangui para ixin xí mé.

²⁸ Are Jesús joexin nichja cain jihi, cain chojni que tettinhi nttiha vinttegoan na admirado de ixin tti ndačo Jesús,

²⁹ ixin Jesús ndačo ngain na conixin anto tsje joachaxin, co jeha inchin cain ximaestro ley.

8

Jesús joinchexingamehe ná tti vechonda lepra

(Mr. 1.40-45; Lc. 5.12-16)

¹ Are Jesús vaniaxin de ngain jna mé, anto tsje chojni rroé.

² Co conchienne ná xí que veninxin chin dinhi lepra. Xí mé vettoxin nttajochjihi xa ngattoxon con Jesús co ndačo xa:

—Si rinao soixin, nchao nchexingamana de ixin chin que janha rrichonda.

³ Cottimeja Jesús catte xí mé co ndačo ngain xa:

—Ján, rinaho. Co jaxon oxingamaha jaha.

Co are Jesús ndačo yá jehe tti venihi mé xingamehe de ixin tti chin que jehe vechonda.

⁴ Co Jesús ndačo ngain tti xí mé:

—Tsjenxin, xonhi chojni ndache. Jehoi tti co tonchienne ngain xidána para que jehe xa sicon xa ixin jaha oxingamaha, co danjo para ixin Dios inchin ttetonha ley que vayé Moisés, para que cain chojni nttiha tsonohe na que jaha oxingamaha de ixin tti chin que joarichonda.

Jesús joinchexingamehe ná xanxi, xinchehe xé ná xicapitán romano

(Lc. 7.1-10)

⁵ Are joigaha Jesús rajna Capernaum, ná xisoldado capitán romano conchienne xa co joinchetsenhe xa ñao Jesús,

⁶ co ndaço xa:

—Nttatsanha ñao soixin nchexingamehe ná xinchehe xana ixin nihi xa. Tajitsinga xa ngain nchia co çhoha ttingui xa co cai anto jittín xa.

⁷ Jesús ndaço:

—Janha tsji sinttaxingamá xí mé.

⁸ Co xicapitán mé ndaço xa:

—Nttatsanha ñao soixin, janha ni jiquininxinha na para soixin sixinhi nchiania. Jeho rinaho janha que soixin ttetonha co xinchehe xana orroxingamehe xa.

⁹ Janha nona jamé ixin janha ditticanho cain tti ttetonna xichonda icha tsje joachaxin que janha, co cai janha chonda joachaxin de ttetoan cain xisoldadona. Are janha ndattjan ná de jehe xa que tsji xa quexeho parte, jehe xa ttji xa. Co are ndattjan xa que tsí xa, jehe xa ttí xa. Co are ttetoan ná de xinchehe xana de sinchehe xa quexeho xa, jehe xa nchehe xa xa mé.

¹⁰ Are Jesús coinhi jihi jehe goan admirado co ndaço ngain chojni que jidicao:

—Janha rrindattjo ra ndoa que cainxin rajna de Israel xonhi chojni vetan janha que anto jian ditticaon inchin xí jihi.

¹¹ Janha rrondattjo ra que tsje chojni de icha nación inchin xisoldado romano jihi tsji na siguintte na ngain Abraham, co Isaac co Jacob nttiha ngajni tti ttetonha Dios.

¹² Co tsje chojni Israel que tequininxin tsji nttiha, pero tsjiha na nttiha ixin Dios rrorroanha na ngain tti naxin xehe, nttiha tti puro rrotsjanga na, co hasta sinetaon neno na.

¹³ Cottimeja Jesús ndaço ngain xicapitán mé:

—Sattji nchiandoi, co tsonhe inchin jaha ditticaon.

Co xinchehe xé mé xingamehe xa ngain rato mé.

Jesús joinchexingamehe jannché Pedro

(Mr. 1.29-31; Lc. 4.38-39)

¹⁴ Jesús cjoí nchiandoha Pedro, co nttiha vicon Jesús jannché Pedro tajitsinga jan de ixin soa.

¹⁵ Jesús jeho tsehe rá jan co ondavaçhehe jan soa que veyá jan, co vingattjen jan para joincheatendehe jan na.

Jesús joinchexingamehe tsje chojni nihi

(Mr. 1.32-34; Lc. 4.40-41)

¹⁶ Co are ondaconaxin xehe, tsje chojni joiaohe na Jesús tsje chojni que chonda espíritu jianha, co jehe, conixin nacoa palabra que jehe nichja, vengui cain espíritu jianha mé. Co cai ngain rato mé jehe joinchexingamehe cainxin chojni nihi que conchienne ngain.

¹⁷ Jihi conhe para que joiconhe tti dindaço profeta Isaías are jehe dicjin: “Jehé mismo vayé chinha na co sajoicao tti anto ttin cuerpoa na.”

Tti chojni que joinao rrogacao Jesús

(Lc. 9.57-62)

¹⁸ Are Jesús vicon que anto tsje chojni xatte ngain, jehe coetonhe chojni que vacao para vatto na conixin jehe para toenxin lago.

¹⁹ Co ngain rato mé conchienne ná ximaestroe ley Israel ngain Jesús co ndaço xa:

—Maestro, janha rinaho sacjin na tti soixin sacji.

²⁰ Jesús ndaço:

—Cain condanixa chonda va cuevé va co cain conttoa chonda va caqué va; pero janha, tti Xi que joixin de ngajni, chondaha ni ttinó sariçhin.

²¹ Co iná de tti chojni que vacao Jesús ndaço:

—Janha ján sacjin na, pero chonna na hasta ndasinja ndodana para que janha tsjavá ndo.

²² Co Jesús ndaço:

—Chjin na co tançhjanda tti chojni que ditticaonha na janha tsjavá chó na.

Jesús tajoaquehe çhintto conixin olé lago

(Mr. 4.35-41; Lc. 8.22-25)

²³ Cottimeja Jesús conixin chojni que vacao coani na ná barco co sacjoixin na de nttiha.

²⁴ Co are ongataonhe jinda mé, cjoa ná çhintto anto soji que tsín olé jinda que hasta cjoanotaon barco mé. Co Jesús tajioa ngaxinhi barco hora mé.

²⁵ Cottimeja cain chojni que joicao cjoí na joinchexingamehe na Jesús co ndaço na ngain:

—Nttatsanha na ñao soixin, tançhjandaha ni ra ndasenne na ixin barco ndajixincanjini-gui jinda.

²⁶ Jesús ndačo ngain na:

—¿Quedonda anto Ñaon ra? ¡Jaha ra antoha jian ditticaon ra tti janha ndattjo ra!

Cottimeja vingattjen Jesús co nichjé čhintto conixin jinda, co ngain rato mé tavehe čhintto conixin jinda.

²⁷ Co cain chojni mé vinttegoan na admirado, co vinttendačo na:

—¿Quehe joachaxin chonda xí jiji que hasta čhintto co jinda ditticaon tti ndačo xa?

Xí de ngain nonttehe Gadara que vinttechonda espíritu jianha

(Mr. 5.1-20; Lc. 8.26-39)

²⁸ Are Jesús joiji toenxin lago mé ongain nonttehe Gadara, yó xí vinttegačhjexin xa de ngaxinhi cueva tti vaguittohe cuerpoe chojni que ndavaguenhe ngain tiempo mé. Co xí mé vintteconchienne xa ngain Jesús. Cayoi xí mé vinttechonda xa espíritu jianha ngaxinhi cuerpoe xa, co anto čhintto vintte xa que ni Ñonhi chojni nchao vagattoxin ngain lugar mé.

²⁹ Co vinttendačo xa sén:

—¿Quedonda joiji nganji na, jaha Jesús, Xenhe Dios? ¡Ña jaha tiempo para que jaha sincheguetan ni ra tangui!

³⁰ Co nonttiha chiaon rridinttene anto tsje cocochi.

³¹ Co cain espíritu jianha joinchetsenhe ñao Jesús co ndačo:

—Si senguixin na de ngaxinhi cayoi cuerpo tehe, nttatsanha na ñao tančjanda na sixinhi na ngaxinhi cocochi taha.

³² Cottimeja Jesús ndačo:

—Ján, diguixinhi ra nttiha remé.

Co cain espíritu jianha vačhjexin de ngaxinhi cayoi cuerpoe xí mé co savixinhi ngaxinhi cain cocochi mé. Cottimeja cain jehe va ndavinttecoloco va co coinga va xincanji va ngain ná lago nttiha, co nttiha joingui va jinda co nttiha ndavintteguenxin cainxin va ixin vintteconje va jinda.

³³ Co tti chojni que vaquingaria cain cocochi mé vintteñaxon na co coinga na cjoí na ngain rajna que jí icha chian para joindačo na tti conhe cain cocochi, co tti conhe ngain cayoi xí que vinttechonda espíritu jianha.

³⁴ Cottimeja cain chojni de ngain rajna mé vintteci na tti jí Jesús. Co are vicon na Jesús, jehe na joinchetsenhe na ñao Jesús que satsjixin de ngain nonttehe na.

9

Jesús joinchexingamehe ná xí que čhoha vacji

(Mr. 2.1-12; Lc. 5.17-26)

¹ Cottimeja Jesús coani barco iná co sacjoi para toenxin jinda ngain rajna Capernaum, rajné Jesús tiempo mé.

² Nttiha joicaohe na Jesús ná tti xí que čhoha vacji, tajtingsataha xa ná camilla. Are Jesús vicon que cain chojni que joicao tti nihi mé chonda seguro que Jesús sinchexingamehe jehe tti nihi mé, Jesús ndačo ngain tti nihi:

—Ñaonha, janha ojointtatjañaha cain tti jianha que jaha rrica.

³ Co cainxin ximaestroe ley Israel que te nttiha vintteñaxon xa: “Nchaoha tti jinichja xí jiji; Dios tsoñahe xa.”

⁴ Pero Jesús ovenohe tti teñaxon xí mé, co jehe ndačo ngain xa:

—¿Quedonda anto jianha tti jaha ra Ñaxaon ra?

⁵ ¿Quexhe tti icha tanguiha rročhjan: “Ovitjañaha jaha cain tti jianha que joinchehe”, o rrondačhjan: “Dingattjen co sattjixin rottea”?

⁶ Nchao remé, janha tsjagoha ra que janha, tti Xí que joixin de ngajni, chonda joachaxin nttihi ngataha nontte para nttatjañá chojni tti jianha que nchehe na.

Cottimeja ndačo Jesús ngain tti čhoha vacji mé:

—Dingattjen co tsinhi camillá co sattjixin rottea para nchiandoi.

⁷ Co ngain rato mé jehe tti čhoha vacji, vingattjen co sacjoi para nchiandoha.

⁸ Co cain chojni que te nttiha are vicon na milagro jiji, jehe na vintteñaxon na co ndačo na que ixin Dios jian ixin joanjo joachaxin mé ngain chojni.

Jesús nichjé Mateo

(Mr. 2.13-17; Lc. 5.27-32)

⁹ Cottimeja Jesús sacjoixin de nttiha, co ngatja nttiha Jesús vicon Mateo tají ngaca mesa tti jinchexin cobro cain impuesto. Co Jesús ndačo ngain:

—Ñacoi, chjin na.

Co ngain rato mé jehe Mateo vingattjen co sacjoi conixin Jesús.

¹⁰ Co después Jesús tajine ngain nchiandoha Mateo. Co nttiha conchienne tsje xicobrador de impuesto, co icha chojni que nchehe jianha, co cain nimé joine na ngain mesa conixin Jesús conixin cain chojni que jehe vacao.

¹¹ Pero canxion xifariseo vintteguicon xa jiji, co después vinttejanchiangui xa ngain tti chojni que vacao Jesús co vinttendačo xa:

—¿Quedonda ximaestrea ra jinecaho xa cain xicobrador de impuesto, co icha chojni que nchehe jianha?

¹² Jesús coinhi jiji, co jehe ndačo ngain xa:

—Chojni que niha, chojni mé rrongondeha xinchežoan, jeha tti chojni nihi, mé tti rrongondehe xinchežoan.

¹³ Sattji ra co diquinxin ra quehe rročo tti parte ngain Palabré Dios que jitaxin: “Janha rinaho que jaha ra tsiaconoehe ra chojni, co nahi ixin sonhe ra coxigo para tsín ra para ixin janha.” Mexinxin janha joiha para joinichjá chojni jian, sino que janha joihi para joinichjá chojni jianha para que tsentoxinhi na de tti jehe na tenchehe na.

Are joanchianguihi na Jesús ixin quedonda chojni jehe dinttecjaño na

(Mr. 2.18-22; Lc. 5.33-39)

¹⁴ Cottimeja chojni que vacao Juan, tti vancheguite chojni, conchienne na ngain Jesús co ndačo na:

—¿Quedonda janha na, conixin cain xifariseo anto dinttecjaño na para ixin Dios, co chojni que čhjiho jaha dinttecjaño na?

¹⁵ Jesús ndačo ngain na:

—¿Apoco cain chojni que ttji ngain ná vandango tti tottehe na nchao sinttecjaño na si xinovio řa ji xa ngayehe na? Pero, ján, tsi tiempo que xinovio satsjixin xa de ngain na, cottimeja jehe na sinttecjaño na.

¹⁶ Āonhi chojni tteyehe lonto nroa ngain rioho lonto nttaxí, ixin lonto nroa ndadixeha co ndattinchje lonto nttaxí, co tti diguichje icha tojje.

¹⁷ Ni cai řonhi chojni ttequia řan que jidatsoxinhi ngá ná roanřan nttaxí ixin řan mé anto daca tsončhintaon řan roanřan mé, co cayoi cosa mé ndasitján. Mexinxin řan que jidatsoxinhi siquia řan ngain ná roanřan nroa para que sitjanha cayoi cosa mé, ixin roanřan mé sichjeha co řan mé singoha řan. Jańa tti costumbre que jaha ra chonda ra jiha de acuerdo ngain tti janha rrindattjo ra.

Are xingamehe xannčhichjenhe Jairo conixin tti nčhi que catte lonttoe Jesús

(Mr. 5.21-43; Lc. 8.40-56)

¹⁸ Jesús řa jindačo cain palabra yá are joí ná xí que ttetonha ngain nihngo nttiha. Vettoxin nttajochjiji xa ngain Jesús co ndačo xa:

—Ná xannčhichjanhna jaxon joexin ndavenhe xan. Pero si soixin sihi co tsín rá gataha xan, jehe xan rrocjan rroxechon xan iná.

¹⁹ Jesús vingattjen co sajoicao xí mé conixin tti chojni que vacao.

²⁰ Co are ongatja nttiha conchienne ná nčhi que ovechonda tteyo nano que veguenguihi nčha jni. Jimao conchienne nčha toenixin Jesús co catte nčha ngandehe tti manta que jitsá,

²¹ ixin jehe nčha řaxaon nčha: “Conixin jeha rrocatte lonttoe Jesús, janha rroxingamana.”

²² Pero Jesús ngaria co jehe vicon nčhi mé, co ndačo ngain nčha:

—Āaonha, jaha oxingamaha ixin vitticaon.

Co desde ngain rato mé, nčhi mé ondaxingamehe nčha.

²³ Co después are Jesús joiji ngain nchiandoha xí que vaquetonha ngain nihngo, Jesús vicon que onttiha te ximusico para sasicjavá na xannčhichjan mé. Co icha chojni anto tetsjanga na.

²⁴ Jesús ndačo ngain na:

—Dačhjexin cain ra de nttihi, ixin xannčhichjan yá jeha ndadiguenhe xan, jeha tajjioa xan.

Cain chojni nttiha cjoanoa na Jesús ixin jehe ndačo jańá.

²⁵ Pero jehe coetonhe na que vačhjexin na de nttiha, cottimeja jehe joixinhi co tsehe rá xannčhichjan mé, co jehe xan vingattjen xan.

²⁶ Co ngoixin región mé anto daca conohe chojni de ixin tti milagro jian que joinchehe Jesús.

Jesús joinchexingamehe yó xí que vaguiconha

²⁷ Are Jesús sajoixin de nttiha, rroé yó xí que vaguiconha co vinttendačo xa sén:

—¡Ttiacnoana ni ra soixin, tti razé David co tti chonda joachaxin que vechonda rey David!

²⁸ Co are Jesús joixinhi nchian doha, jehe cayoi tti vaguiconha mé vintteconchienhe ngaca Jesús co jehe joanchianguihi cayoi xí mé:

—¿Aditticaon ra que janha nchao sinttañoán jmacon ra?

Cayoi xí mé ndačo xa:

—Ján ditticanho na que soixin nchao sincheñoanna ni ra.

²⁹ Cottimeja Jesús catte ngataha jmacon cayoi xí mé co ndačo:

—Tsonhe inchin jaha ra ditticaon ra.

³⁰ Co ngain rato mé ndaxingamehe jmacon cayoi xí mé. Cottimeja Jesús anto coetonhe xa co ndačo ngain xa:

—Xonhi chojni ttequinhi ra quehe conha ra.

³¹ Pero are sacjoixin xa de nttiha, jehe xa coexinhi xa coequín xa chojni ngoixin región mé tti joinchehe Jesús.

Jesús joincheñoenhe ná tti čhoča vanichja

³² Are cayoi xí mé tedachjexin xa de nttiha, canxion chojni joiaohe na Jesús iná xí que čhoča vanichja ixin vechonda ná espíritu jianha.

³³ Are Jesús joantsje espíritu jianha mé, jehe tti xí mé coexinhi nichja. Cain chojni que vicon nttiha vinttegoan na admirado co ndačo na:

—Ntthi Israel xonhi tiempo vocon na ná cosa inchin jihi.

³⁴ Pero xifariseo vinttendačo xa:

—Xí jihi nchao dengui xa espíritu jianha de ixin joachaxín Satanás ixin Satanás tti tetonhe cain espíritu jianha.

Jesús ttiaconoehē cain chojni

³⁵ Jesús vacji ngain cain ningoe cain rajna nttiha co ngain ningoe cain rajnanchjan para vandache chojni de ixin Dios. Jehe vandačo tti jian joajna de ixin quexén ttetonha Dios, co vanchexingamehe cain chojni que vinttechonda quexeho chin.

³⁶ Are Jesús vicon cain chojni jihi, jehe coiaconoehē na ixin jehe na chonda na joachjaon co ttedoan na desanimado inchin coleco que chondaha va tti tingaria va.

³⁷ Cottimeja jehe ndačo ngain tti chojni que vacao:

—Ján ndoa, que cosecha atto tsje pero ninchehe xa tsjeha na.

³⁸ Mexinxin ndache ra Xinajni que rrorroanha Xa icha ninchehe xa para que satse na cain cosecha jihi.

10

Jesús coinchiehe tti tteýo chojni que vacao

(Mr. 3.13-19; Lc. 6.12-16)

¹ Cottimeja Jesús vayé tti tteýo chojni que vacao co joanjo joachaxin ngain na de nchao sengui na espíritu jianha de ngain chojni, co de nchao sinchexingamehe na cain chojni que ninxin quexeho chin.

² Jihi nombré tti tteýo chojni que vacao Jesús: tti saho vinhi Simón, co cai vinhi Pedro; Andrés xanchó jehe Pedro; Jacobo conixin Juan xanchó jehe Jacobo, co cayoi nimé xenhe Zebedeo.

³ Co Felipe; Bartolomé; Tomás; Mateo, tti cobrador de impuesto; Jacobo, xitsihi Alfeo; Lebeo, que cai vinhi Tadeo;

⁴ Simón, jehe ná de tti partidoe chojni politico que vaquetocaho chojni romano; co Judas Iscariote, tti joindačo para tse na Jesús.

Jesús rroanha chojni que vacao para joinichja na de ixin Dios

(Mr. 6.7-13; Lc. 9.1-6)

⁵ Jesús coetonhe tti tteýo chojni jihi janhi:

—Ttjiha ra ngain región tti te chojni que jeha judío, ni ttjiha ra ngain nonttehe Samaria.

⁶ Ttji ra jeho ngain chojni judío ixin jehe na te na inchin coleco que diguičhoe.

⁷ Ttji ra co dindache ra chojni mé que oconchiaon tiempo para que Dios tsetonha ngain ansén jehe na.

⁸ Nchexingamehe ra chojni nihi, nchexechon ra chojni que ondadiguenhe, nchexingamehe ra tti chojni que techonda chin lepra, co dehngui ra espíritu jianha de ngain chojni. Jaha ra vittonha ra joachaxin jihi, mexinxin are sinchegonda ra joachaxin jihi ncheha ra cobro.

⁹ Ttjioha ra tomi; ni de oro ni de plata ni de cobre.

¹⁰ Ni ttjioha ra tti sintte ra ngatja nttiha. Co ttjioha ra icha lontto ni icha catte que jeho catte que jaha ra techjanga ra co jeho lontto que jaha ra tengaha ra, ni ttjioha ra nttacotto

ixin jaha ra chonda ra derecho de sayehe ra tti sintte ra co cain icha que sondaha ra de ngain tti chojni que tsji ra.

¹¹ 'Are saso ra ngain ná rajna o ngain ná rajnanchjan, ttjé ra nttiha ná chojni jian para dittoha ra nttiha ngain nchiandoha chojni mé hasta que jaha ra satsjixin ra de ngain rajna mé.

¹² Are saso ra ngain nchia mé chjehe ra na joajna co nchetsenhe ra ñao Dios que jehe sinchenchaon chojni mé.

¹³ Si chojni de nchia mé jian na, ján, Dios sinchenchaon na. Pero si jehe na jianha na, Dios sinttanchaon jaha ra en lugar de jehe na.

¹⁴ Co si ngain ná nchia rroçhoha na sayaha ra na ni sincheha na caso tti jaha ra rrondateha ra na, jaha ra dachjexin ra de ngain nchia mé o de ngain rajna mé co tontsjenga ra rottea ra para que sinttji cain jinche que teyá rottea ra nttiha. Jamé para ná señal ixin vitticaonha na jaha ra.

¹⁵ Janha rrindattjo ra seguro que are ngain tti nchanho que are Dios sinchejuzguehe cain chojni, rajna mé icha soji castigo sayé que tti castigo que vayé chojni ngain Sodoma co Gomorra.

Jesús ndache tti tteyó chojni ixin icha chojni feo sinchehe ngain na

¹⁶ 'Tsjenxin ra! Janha rrorroanha jaha ra inchin coleco ngayehe condanixa. Dittoaxinha ra para sinttayaha ra na inchin conché dittoexinha va para denhe va. Pero dintteha ra çhinto; sino que dintte ra inchin conttoanajni.

¹⁷ Pero ttjiho ra cuidado ixin rotse ra na co sinttachianha ra na ngain juzgado, co tsaxin ra na nttá ngaxinhi nihngo.

¹⁸ Co hasta tsjiho ra na ngain tsje xigobernador co ngain tsje rey de ixin causananxin janha. Co jamé jaha ra rrochonda ra oportunidad de rronichja ra ngain cain xí mé de ixin janha, co hasta rronichja ra ngain icha chojni que jaha judío.

¹⁹ Pero are rrotse ra na co tsjiho ra na ngain juzgado, jaha ra taha ra joachjaon de ixin queXén rrondateha ra nttiha, ni taha ra joachjaon de ixin quehe palabra sinchegonda ra, ixin are mé Dios rrorroanha palabra que jaha ra rronichja ra.

²⁰ Ixin jaha jaha ra tti rronichja ra, sino que Espíritu Santo que rrorroanha Ndojá ra que ttjen ngajni, mé tti rronichja.

²¹ 'Chojni siçho jie para ixin xanchó para nasoenxon na xan. Co sehe ndodaha que jehondo siçho ndo jie para nasenxon xenhe ndo. Co sehe chjan que rroningaconhe xan ndodé xan co janné xan co jehoná xan siçho xan jie para nasenxon nindoha xan.

²² Cainxin chojni ngoixin mundo rroningaconha ra na ixin causananxin janha. Pero quexeho ra xo sitticaon ni ra co sinchehe ra cain tti janha coetonha ra hasta are ndasenhe ra, jaha ra rrochonda ra iná vida naroaxin ngain Dios.

²³ Are chojni de ngain ná rajna feo sinchehe na nganji ra jaha ra sattjixin ra de nttiha co sattji ra ngain iná rajna. Janha rrindattjo ra seguro que ni xa tsjaha ra tsingaria ra ngain cainxin rajna de chojni Israel are janha, tti Xí que joixin de ngajni, orrocjan na sihi iná.

²⁴ 'Ni ná tti jitangui jeha icha nohe que ximaestroe, co ni ná tti nchehe xa jeha icha ttetonha que xinajni.

²⁵ Tti jitangui, çhoha tsangui icha que jeho tti nohe ximaestroe, co tti nchehe xa çhoha icha tsetonha que jeho inchin ttetonha xinajni. Jañá si janha tti inchin ndodá ra de ngain nchia co nchequinhi na na Beelzebú, que rroçho Satanás, seguro jehe na rronichja na icha feo de ixin jaha ra.

*Quensen jiquininxin rroxagoen ni
(Lc. 12.2-9)*

²⁶ 'Pero çagoenha ra ni ná chojni ixin anto daca tsononxin cain tti ndoa de ixin Dios co çonhi cosa jima que tsononxinha.

²⁷ Cain tti rrindattjo ra, nchenohe ra tsje chojni, co cain tti rrindattjo ra jimao, jaha ra nchenohe ra icha tsje chojni inchin rrocari na ná nchia co de nttiha rronichjaxin ra.

²⁸ Çagoenha ra tti chojni que natjayaxon ixin mé çhoha nasoenxon almé ni. Çagoenhe ra jeho Dios ixin jeho mé tti nchao nasoenxon cuerpoe ni co almé ni ngain infierno.

²⁹ '¿Quejanhi rentte yó conttoachjan? ¡Anto tsjeha tomi! Pero masqui jamé ni ná de jehe va denha va si Ndojá ra que ttjen ngajni danjoha joachaxin.

³⁰ Co jehe Ndo nohe Ndo hasta quejanhi çajá ra chonda ra.

³¹ Mexinxin jaha ra çaonha ra, ixin para Dios, jaha ra icha rentte ra que tsje conttoa.

*Tti chojni que ndaço ngattoxon con icha chojni ixin Jesús jian
(Lc. 12.8-9)*

³² Cain chojni que rrondačo ngattoxon con ica chojni que ixin janha jian na, cai janha rrondačjan ngattoxon con Nnodana que ttjen ngajni que ixin chojni mé jian cai.

³³ Pero tti chojni que ndačo ngattoxon con ica chojni que ixin janha jeha jian na, cai janha rrondačjan ngattoxon con Nnodana que ttjen ngajni que ixin chojni mé jeha jian cai.

Causexin Jesús chojni rrochjeya

(Lc. 12.51-53; 14.26-27)

³⁴ Xaxaonha ra que janha joihi ngataha nontte jihi para que cain chojni sinao chó ixin tsoenha jamé, sino que cainxin chojni rrochjeya na ixin janha joihi.

³⁵ Ixin ttoha chojni sitticaon na janha co ttoha na nahi, mexinxin ná xanxí co ndodé xan tsoñaöhe chó na co xannčí co janné xan tsoñaöhe chó na, co nchidainda co jannché ncha tsoñaöhe chó na.

³⁶ Jañá cada chojni rroningaonhe na jeha nindoha na.

³⁷ Chojni que rinao ndodé o janné ica que janha, chojni mé jiquininxinha soan chojnina, co tti chojni que rinao nchichjehe o xitsihi ica que janha, chojni mé jiquininxinha soan chojnina,

³⁸ co tti chojni que tsinha en peligro vidé na para ixin janha, chojni mé jiquininxinha soan chojnina.

³⁹ Tti ica rinao vidé, mé sinchetján vidé. Pero tti sinchetján vidé de ixin causananxin janha, mé rrochonda iná vida naraoxin.

Tti chojni que rroxenguehe hna

(Mr. 9.41)

⁴⁰ Tti chojni que jian sayaha jaha ra, chojni mé cai sayehna na janha, co tti chojni que sayehna janha, chojni mé cai sayé na jeha tti roanha na janha.

⁴¹ Co tti chojni que sayé ná profeta ixin profeta nichja joajna que dayé de ngain Dios, chojni mé Dios tsjenguehe hna inchin xenguehe hna ná profeta. Co tti sayé ná xi jian ixin xi mé jian xa, chojni mé Dios tsjenguehe hna xajeho inchin xenguehe hna ná chojni jian.

⁴² Co quexeho chojni que sanjo masqui ná vaso de jinda quin ngain quexeho chojni que ditticaon na janha jeha ixin ditticaon na janha, chojni mé Dios tsjenguehe hna cai.

11

Tti chojni que Juan rroanha

(Lc. 7.18-35)

¹ Are Jesús xexin ndache cain cosa jihi tti tteyó chojni que vacao, sacjoixin de nttiha para joindache ica chojni de ixin Dios ngain ica rajna que vintte ngain región mé.

² Juan, tti vancheguitte chojni, ovehe ngaxinhi cárcel tiempo mé pero jeha conohe cain tti jian que jinchehe Jesucristo. Cottimeja jeha rroanha yó chojni que vacao para joiganchianguihi na Jesús

³ ixin quensen jeha, co ndačo na ngain Jesús:

—¿Ajaha tti Cristo tti chonda que tsí, o xa rrochonda na que rrochoan na iná chojni?

⁴ Jesús ndačo:

—Ttji ra co dindache ra Juan tti jaha ra tedicon ra jaxon co tti jaha ra tettinhi ra.

⁵ Diquequinhi ra Juan ixin tti chojni que vaguiconha, jai onchao dicon, co ixin tti čhoha vacji, jai onchao čhji, co ixin oxingamehe tti chojni que veninxin tti chin que dinhi lepra, co ixin tti chojni que vaquinha, jai onchao ttinhi, co ixin tti chojni que ondavenhe, jai oxechon, co ixin tti chojni que xa vaquinha de ixin Dios, jai janha ndattjan.

⁶ Co anto čhjoin para ixin tti chojni que chonda seguro nganji na janha.

⁷ Are cayoi tti chojni mé sacjoi na, Jesús coexinhi ndache ica chojni que te nttiha de ixin Juan, tti vancheguitte chojni, co Jesús ndačo:

—Are cjoí ra ngagaha jna tti xonhi chojni te para joitsjehe ra Juan, ¿quehe xaxaon ra rroguicon ra jeha? ¿Axaxaon ra ixin joarrixaon seguroha inchin ntaxiji que nchequingui čhintto,

⁸ o ani ná xí que jingá lontto anto fino inchin ná rey? ¿Apoco chonxinha ra ixin tti chojni que jingá lontto anto fino, jeha na te na ngain nchia anto fino?

⁹ Mexinxin ¿quehe xaxaon ra rroguicon ra? ¿A ná profeté Dios? Ján ndoa que Juan ná profeté Dios, co jeha ica rentte que ná profeta.

¹⁰ Juan, mé tti rročo ngain tti jitaxin Palabré Dios: Icha saho que jaha tsji, janha rrorroanha ná tti sicao joajnana para que jeha mé sinchechjian nttiha para ixin jaha.

¹¹ Janha seguro rrindattjo ra que de cainxin chojni que concjixin ngataha nontte jihi hasta jai, ngattoxon con Dios xonhi chojni ica importante que jeha Juan. Pero masqui jamé, tti

chojni que icha importante de ngain tti parte que ttetonha Dios de ngain ansén chojni, chojni mé ʒa icha importante que Juan.

¹² Desde que Juan jói para joindache chojni de ixin Dios hasta jai, atto tsje chojni rinao na rrocayacoen na tti ttetonha Dios que ttjen ngajni, co chojni čhintto rinao na sinchexantte na tti ttetonha Dios.

¹³ Cain profeté Dios que jói co ley que vayé Moisés jinchenohe chojni de ixin que ʒén tsetonha Dios ngain ansén chojni hasta que jói Juan para joinchenohe chojni que ixin otoiñ tsí tiempo mé.

¹⁴ Co si jaha ra rinao ra sitticaon ra, jáñ, Juan mé tti profeta Elías que chonda que jói iná.
¹⁵ ʒo tsinxin ra, ttinhi ra jian.

¹⁶ ʒQuehe sinttacaninxin chojni de ngain tiempo jiji? Jehe na inchin tti xannchinnch-inchjan que tsoñtaon ngataon ndásin co toyaotte xan icha xancompañeroe xan:

¹⁷ “Janha na jointtachjian na són conixin ná nnta ʒo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.”

¹⁸ Rročo ixin jói Juan, tti vancheguitte chojni, co jehe vaguiha vino ni vajineha tsje. Co jaha ra ndačo ra que ixin jehe chonda ná espíritu jianha.

¹⁹ Cottimeja jóiñ janha, tti Xí que joixin de ngajni, que jinecaho chojni co dihi vino. Co jaha ra ndačo ra que ixin janha anto jine co anto dihi hasta coan na, co ixin janha amigoe cain chojni que tenchehe jianha, co xicobrador de impuesto. Pero tti ncheoenhe Dios chojni, mé anto jian ixin tti jian mé ʒago ngain tti nchehe chojni que ditticaon ngain jehe.

*Rajna que vintteguitticaonha
(Lc. 10.13-15)*

²⁰ Cottimeja Jesús coexinhi joinchesattehe chojni de cain rajna tti jehe joinchehe icha tsje milagro, ixin cain chojni mé ʒa coentoxinha na vidé na de tti jianha que tenchehe na. Mexinxin Jesús ndačo ngain na:

²¹ —¡Anto tangui tsonha jaha ra de ngain rajna Corazín, co cai jaha ra de ngain rajna Betsaida! Ixin tti cain milagro que janha jointtaha ngayaha ra, si cain milagro mé rroconhe ngayehe chojni de ngain ciudad de Tiro co ciudad de Sidón, cain chojni mé osé rroquentoxinhi na vidé na de tti jianha que vanchehe na. Co para rrocjago na que ixin jehe na orroquentoxinhi na vidé na, jehe na rroguintténgá na lontto ttie co rrocjinttjitte na nntesoguihi já na.

²² Pero jaxon janha rrindattjo ra que para ngain tti nchanho que Dios sinchejuzguehe cain chojni, jaha ra tti sayehe ra ná castigo icha soji que chojni ngain ciudad de Tiro co Sidón.

²³ Co jaha ra de ngain rajna Capernaum, ʒa ʒaxaon ra que ixin anto importante ra para ngain Dios? Jaha jamé ixin jaha ra chonda ra que tsji ra ngain infierno. Ixin tti cain milagro que janha jointtaha ngayaha ra, si mé rroconhe ngayehe chojni de ngain ciudad de Sodoma, cain chojni mé seguro rroquentoxinhi na vidé na co ciudad mé ʒa rroguiehe hasta jai.

²⁴ Pero janha rrindattjo ra que para ngain tti nchanho que Dios sinchejuzguehe cainxin chojni, jaha ra tti sayehe ra ná castigo icha soji que cain chojni de ngain regioen Sodoma.

*Are Jesús ndačo: “Sihi ra nganji co nchejogaha ra”
(Lc. 10.21-22)*

²⁵ Ngain rato mé Jesús ndačo:

—Padre soixin que joinchchjian ngajni co nontte, janha chjaha gracias soixin ixin soixin coema tti ndoa para ngain tti chojni que anto chonxin co anto sé coangui na, co cjoago tti ndoa mé ngain tti chojni que tsjeha chonxin.

²⁶ Jáñ, Padre, ixin soixin jañá rinao.

²⁷ Nnodana que ttjen ngajni chjana Ndo cain cosa. ʒonhi chojni chonxin cainxin de ixin Xenhe Ndo, sino que jehó jehe Ndo nohe Ndo de ixin Xenhe Ndo. Co ʒonhi chojni chonxin cainxin de ixin jehe Ndo, sino que jehó Xenhe Ndo conixin cain tti chojni que jehe Xan sinao Xan sinchenohe Xan de ixin jehe Ndo.

²⁸ ʒacoi ra nganji na, cain jaha ra ʒo atto conchjen ra de ngain ʒa co de joachjaon que techonda ra, co nganji na janha sinchejogaha ra.

²⁹ Dittoaxin ra ditticaon ra nchehe ra tti janha rritettonha ra co tangui ra cain tti janha rrinttacoanha ra, ixin janha jeha čhintto na, co anto nda ansenna, co jamé nchao sinchejogaha almá ra.

³⁰ Tti janha rritettonha ra tanguiha para jaha ra sitticaon ra sinchehe ra.

12

Chojni que vacao Jesús conchínji na trigo ngain nchanho que nchejogaha ni
(Mr. 2.23-28; Lc. 6.1-5)

¹ Ngain tiempo mé ngain ná nchanho que nchejogaha ni, Jesús conixin tti chojni que vacao vatto na ngain canxion jngui que dinga trigo. Co chojni mé venhe na jintta, mexinxin coexinhi na conchínji na canxion ninchjenhe trigo para joine na.

² Co canxion xifariseo vintteguicon xa mé, co vinttendácho xa ngain Jesús:

—Tsjenxin, chojni que chjiho tenchehe na xa co jiquininxinha sinchehe ni xa ngain tti nchanho que nchejogaha ni.

³ Pero Jesús ndácho ngain xa:

—¿Axa tsjeha ra tti jitaxin ngain Palabré Dios ixin quehe joinchehe David conixin cain xicompañeroe ná nchanho are vintteguenhe na jintta?

⁴ David conixin cain xicompañeroe mé joixinhi na tti nihngo icha importante co joine na tti niottja que jiquininxinha para rrojine na jehe na, sino que jehó xidána vequininxin vane xa niottja mé.

⁵ ¿O ani xa tsjeha ra tti jitaxin ley que vayé Moisés que ixin cain xidána de ngain nihngo icha importante xonhi tiempo nchejogaha xa ngain tti nchanho que nchejogaha ni, co mé jeha ná cosa jianha para ixin jehe xa?

⁶ Co janha rrindattjo ra que jí nganji ra jaxon ná tti icha importante que nihngo mé.

⁷ Jaha ra xa coinxinha ra tti ndácho Dios ngain tti jitaxin Palabré que ndácho: “Janha rinaho que jaha ra tsiaconoeha ra chojni, co nahi ixin sonhe ra coxigo para tsin ra para ixin janha.” Si jaha ra orroquinxin ra mé irronichjaha ra jianha de ixin chojni que ncheha ni ná cosa jianha.

⁸ Janha, tti Xí que joixin de ngaini, cai chonda joachaxin para tti nchanho que nchejogaha ni.

Ná xí que ndadixemadoho ná rá
(Mr. 3.1-6; Lc. 6.6-11)

⁹ Cottimeja Jesús sacjoixin de nttiha, co sajoixinhi iná nihngo.

¹⁰ Co ngaxinhi nttiha taji ná xí que ndadixemadoho ná ra, co xifariseo techonhe xa quehe cosa nchaoha rrojinchehe Jesús para rrocjanguihi xa. Mexinxin joanchiangui xa ngain co ndácho xa:

—¿Ají joachaxin para que sinchexingamehe ni chojni nihi mero ngain tti nchanho que nchejogaha ni?

¹¹ Jesús ndácho:

—Si ná de jaha ra chonda ra ná coleco, co si setsingá va ná pozo ngain tti nchanho que nchejogaha ni, ¿atsijha ra para sigantsjea ra va? ¡Seguro que ján!

¹² Nchao, janché ndachjenji ni ra, ¿ajeha anto icha rentte ná chojni que ná coleco? Mexinxin jeha jianha para que jehe ni sinchehe ni ná cosa jian ngain tti nchanho que nchejogaha ni.

¹³ Cottimeja ndácho Jesús ngain tti xí que dixemadoho rá:

—Ttinxe rá.

Co are jeha coinxe rá, ojian vitothe ra inchin ra jngo.

¹⁴ Cottimeja xifariseo mé vinttegachjexin xa de nttiha co coexinhi xa cjoao chó xa ixin que xén sinchehe xa para nasoexon xa Jesús.

Tti dindácho profeta Isaías de ixin Jesús

¹⁵ Are Jesús conohe cain mé, jehe sacjoixin de nttiha co anto tsje chojni rroé na Jesús. Co jehe joinchexingamehe cainxin chojni nihi que vetan.

¹⁶ Co jehe vaquetonhe na que rrondacheha na icha chojni ixin quensen jehe.

¹⁷ Jamé, para que joiconhe tti dicjin profeta Isaías que ndácho:

¹⁸ Yá chonda ra tti nchehe xana, tti janha coinchía, tti janha anto rinaho, co de ixin jehe, janha anto chahna.

Co sanjo Espíritu Santo ngain jehe,

co jehe tti rrondache cain chojni de cainxin nación quehe jiquininxin sinchehe na.

¹⁹ Jehé xonhi chojni tsetocaho, ni tsoyaotteha chojni, ni jehé rronichjaha soji ngain chojni ngá nttiha.

²⁰ Jehé sincheanimá tti chojni que anto tanguí tonhe na

co jion sincheoenhe chojni que ditticaon nchion, hasta que cainxin chojni sinchehe na jian inchin jehe tsetonha.

²¹ Co cainxin nación satsoan que ixin jehe tti ttjenguijna chojni.

Are ndacho chojni ixin Jesús chonda joachaxín Satanás

(Mr. 3.19-30; Lc. 11.14-23; 12.10)

²² Cottimeja joicaöhe na Jesús ná xí que choha vaguicon ni vanichja ixin vechonda xa ná espíritu jianha. Co Jesús joinchexingamehe xí mé para que jehe xa onchao vicon xa co onchao nichja xa.

²³ Cainxin chojni goan na admirado ngain rato mé, co vinttendacho na:

—Puede jiji tti razé David que rrochonda xajeho joachaxin que vechonda rey David.

²⁴ Pero are xifariseo vinttequinhi xa jiji, vinttendacho xa:

—Xí jiji dengui xa espíritu jianha pero de ixin joachaxín Satanás, tti rey de cain espíritu mé co tti dinhi Beelzebú cai.

²⁵ Jesús oconohe quehe tendacho xifariseo mé, mexinxin jehe ndacho ngain xa:

—Si chojni ngain ná nación chjea na para ttetocaho chó na, nación mé tsonchjenha sé, co si ná rajna o ná nindoha anto tteto na, cai tsonchjenha chojni mé sé.

²⁶ Jamé cai si Satanás dengui chó jeho, rrocho que jeho ttetocaho chó co joachaxín tsonchjenha sé, toin ndatsjexin.

²⁷ Mexinxin, si inchin ndacho ra jaha ra que janha dehngui espíritu jianha de ixin joachaxín Satanás, si jamé ¿quensen danjo joachaxin ngain chojnia ra para que jehe na dengui na espíritu jianha? Mexinxin jeho chojnia ra tjago que jaha ra jeha ndoa tti jaha ra xaxaon ra.

²⁸ Pero janha dehngui espíritu jianha de ixin joachaxín Espíritu Santo de Dios, co mé rrocho que tti ttetonha Dios ojí nganji ra.

²⁹ Ixin si ná chojni rinao santsjehe cosé iná xí tsanga de ngaxinhi nchiandoha xa, saho chonda que tsia xa.

³⁰ Tti chojni que nche xoxinha tti janha rrinttaha, chojni mé ningaonna janha, co tti chjiha nganji na janha para ttjejo na chojni, mé icha tonchjequé na.

³¹ Mexinxin janha rrindattjo ra que cain chojni nchao sitjañe na cain tti jianha que nchehe na co cain tti jianha que nichja na, pero si rronichja na jianha de ixin Espíritu Santo, Dios sinchetjañe na palabra mé.

³² Co quexeho tti rronichja palabra jianha de ixin janha, tti Xí que joixin de ngajni, nchao sitjañe chojni mé, pero tti chojni que rronichja palabra jianha de ixin Espíritu Santo, Dios xonhi tiempo sinchetjañe chojni mé, ni jaxon ni después que jehe ndasenhe.

Nttattochjoin datsoan ni ntta de ixin ttochjoin ntta

(Lc. 6.43-45)

³³ Si nttattochjoin jian ntta, cai ttochjoin que nchechjian ntta jian tto; co tti nttá xonhi xé, cai ttochjoin que nchechjian ntta xonhi xé tto. Mexinxin cada nttattochjoin datsoan ni ntta de ixin ttochjoin ntta.

³⁴ Jaha ra inchin xenhe conché! ¿Que xén nchao rronichja ra cosa jian si jaha ra jianha ra? Rroha ni nichja cain tti jí ngain ansén ni.

³⁵ Ná chojni jian jehe nichja cosa jian ixin tti jian jí ngain ansén; co ná chojni jianha jehe nichja cosa jianha ixin tti jianha mé jí ngain ansén.

³⁶ Co janha rrindattjo ra que are ngain tti nchanho que Dios sinchejuzguehe cainxin chojni, are mé cainxin na chonda que tsjenga na hna de ixin cain palabra que xonhi xé ndacho na.

³⁷ Ixin inchin rronichja jaha, jamé Dios sinchejuzgá nganji. Co are mé tsonoha si ján rrica o ni xonhi rrica.

Are chojni jianha joanchia na ná milagro

(Mr. 8.12; Lc. 11.29-32)

³⁸ Cottimeja canxion xifariseo co canxion ximaestroe ley Israel vinttendacho xa ngain Jesús:

—Maestro, janha na rinaho na sicon na que jaha sinchehe ná milagro.

³⁹ Jesús ndacho ngain xa:

—Chojni jianha que ditticaonha na Dios rinao na sicon na ná milagro, pero chojni mé Dios tsjagoeha na icha milagro que jeho inchin tti conhe profeta Jonás.

⁴⁰ Ixin jamé inchin Jonás vehé ní nchanho co ní ttie ngaxinhi tsehe copescado jie, jamé janha cai, tti Xí que joixin de ngajni, saríhi ngadoho nontte ní nchanho co ní ttie.

⁴¹ Cain chojni que vintte ngain ciudad de Nínive, jehe na singattjen na ngain tti nchanho are Dios sinchejuzguehe cainxin chojni para rrocho na jie para ixin cain chojni de ngain tiempo jiji, ixin jehe na coentoxinhi na vidé na are Jonás joindache na joajné Dios. Co nntihi nganji ra jaxon jí ná tti icha importante que Jonás, pero jaha ra choha ra ditticaon ra.

⁴² Cai tti reina que joixin de ngain nontte Sabá icha sur, singattjen ngain tti nchanho are Dios sinchejuzguehe cainxin chojni de ngain tiempo jiji para que reina mé rrocho jie para

ixin jehe na ixin jehe reina mé joixin anto cjin para joiquinhi tti venohe Salomón, co nttihi nganji ra jaxon jí ná tti icha importante que Salomón.

Tti espíritu jianha que cjan
(Lc. 11.24-26)

⁴³ Co Jesús ndačo cai:

—Are ná espíritu jianha dačhjexin de ngain cuerpoe ná chojni, espíritu mé sattji ngain tsje lugar xema para dicjé ttinó sinchejogaha, co are jehe idittjaha lugar mé, jehe řaxaon:

⁴⁴ “Janha rroçjan na ngain nchiania tti vačhjexin.” Co are jehe espíritu jianha mé cjan, dittja ngain cuerpoe chojni mé inchin ná nchia que řonhi chojni te, tti diganjo na jian, co cain roa ngaxinhi nchia mé.

⁴⁵ Cottimeja jehe espíritu jianha mé dirroé iyáto espíritu icha jianha que jehe para que dintte cain espíritu mé ngaxinhi cuerpoe chojni mé, co chojni mé cjan icha tangui tonhe que are saho. Co jamé tsonhe ngain chojni jianha tehe cai.

Janné Jesús co xanchó
(Mr. 3.31-35; Lc. 8.19-21)

⁴⁶ Jesús řa jinichja cain yá ngain chojni are joí janné conixin xanchó Jesús ixin joinao na rronichjé na Jesús, pero ndoja tavintte na ixin tsje chojni sinxinhi nchia tti jí Jesús.

⁴⁷ Ná chojni ndačo ngain Jesús:

—Janná co xanchó ndoja nttihi te na co rinao na rronichja na nganji.

⁴⁸ Pero Jesús ndačo ngain chojni mé:

—¿Quensen jannana, co quecá xanchian?

⁴⁹ Cottimeja jehe cjoago ngain chojni que vacao co ndačo:

—Chojni tehe tti inchin jannana co jehe na tti inchin xanchian,

⁵⁰ ixin quexeho chojni que nchehe inchin rinao Ndodana que ttjen ngajni, chojni mé tti xanchian co chojni mé tti jannana.

13

Ejemploe tti joiquenga trigo ngataon jngui
(Mr. 4.1-9; Lc. 8.4-8)

¹ Ngain nchanho mé Jesús vačhjexin de nchia mé co sacjoi para ngandehe lago.

² Pero anto daca xatte anto tsje chojni ngain jehe, mexinxin jehe coani ná barco para ngataonhe jinda mé co de nttiha ndachexin cain chojni mé de ixin Dios. Cain jehe na tavintte na ngandehe jinda mé.

³ Ngain rato mé jehe joinchegonda tsje ejemplo para joinchecoenhe na tsje cosa. Saho jehe ndačo:

—Ná xí cjoí xa joiquenga xa trigo ngataon jngui.

⁴ Co are coexinhi xa cjoa xa trigo ngataon jngui, canxion noanchjan de trigo vinttji ngá nttiha, co joí conttoa ndajoine va trigo mé.

⁵ Co icha noanchjan de trigo vinttji ngataha tti jí ttjao tti ttjinha jinche jí, co trigo mé anto daca řhinhi ixin tsjeha jinche řanotaon.

⁶ Pero are řhinhi nchanho, ndaxehntte catrigo mé, co ixin řonhi noehe ca vechonda ca, anto daca ndaxema ca.

⁷ Co icha noanchjan de trigo vinttji ngacjan canchaha, co canchaha mé icha daca vangui ca co coančjandaha ca trigo para vangui.

⁸ Pero icha noanchjan de trigo vinttji tti jí jian jinche, co mé joanjo jian cosecha. Canxion nihi trigo mé joanjo de cien noanchjan cada trigo, icanxin trigo joanjo de sesenta noanchjan, co icanxin trigo joanjo de treinta noanchjan, cada trigo.

⁹ Si jaha ra ttinxin ra, ttinhi ra jian.

Quedonda Jesús joinchegonda tsje ejemplo
(Mr. 4.10-12; Lc. 8.9-10)

¹⁰ Cottimeja tti chojni que vacao Jesús conchienenhe na ngain co ndačo na:

—¿Quedonda ndache chojni conixin ejemplo?

¹¹ Jesús ndačo ngain na:

—Jaha ra Dios ndačo para que tsonoha ra queřen tetonha jehe ngain ansén chojni, pero jehe na řchoha tsonohe na.

¹² Tti ttinxin, Dios sinchequinxin icha para que jehe icha tsinxin; pero tti řonhi ttinxin, Dios santsjehe hasta tti nchion que jehe ttinxin.

¹³ Mexinxin janha ndattjan na de ixin ejemplo ixin jehe na dicon na pero inchin rroguiconha na, co jehe na ttinhi na pero inchin rroquinha na ixin ttinxinha na tti jehe na ttinhi na.

¹⁴Jañá tti jehe na tenchehe na yá joiconhe tti dindaçho Dios ngain profeta Isaías are Isaías dicjin:

Jaha ra seguro tsinhi ra, pero tsinxinha ra;
sicon ra, pero satsoanha ra.

¹⁵Ixin ansean ra atto ndaconcha,
co ndatsjoan ra ttjenguijnaha ra para daca tsinxin ra,
co masqui tonoha ra que jmacon ra teẓangué, pero tteje,
para que rrochonxinha ra tti jaha ra dicon ra,
ni tsinxinha ra tti jaha ra ttinhi ra,
ni ansean ra tsinxinha,
ni rroẓaxaonha ra sihi ra nganji na janha para que janha tsjenguijna ra.

¹⁶Cottimeja Jesús cjan ndaçho ngain chojni que vacao:

—Pero janha ndaçhjan que anto çhjoin para ixin jaha ra ixin chonxin ra tti dicon ra, co ttinxin ra tti ttinhi ra de ngain ndatsjoan ra.

¹⁷Janha seguro rrindattjo ra que are icha saho tsje profeta co tsje chojni jian de ngain ansén joinao na rroguicon na cain tti jaha ra tedicon ra jaxon, pero jehe na iviconha na. Co cai joinao na rroquinhin na cain tti jaha ra tettinhi ra jaxon, pero jehe na icoinha na.

Jesús ndaçho quehe rroçho ejemploe tti joiquenga trigo
(Mr. 4.13-20; Lc. 8.11-15)

¹⁸Ttinhi ra quehe rroçho ejemploe tti joiquenga trigo ngataon jngui.

¹⁹Tti chojni que ttinhi tti joajna de ixin queẓén siquetonha Dios ngain ansén na, co jehe na ttinxinha na joajna mé, chojni mé inchin tti trigo que vinttji ngá nttiha. Co ttí inchinji co jehe ndanchetjanji na joajné Dios que vittohe ngain ansén na.

²⁰Co tti trigo que vinttji ngataha tti jí tjao, mé rroçho tti chojni que ttinhi joajné Dios co jehe na anto çhjoin tonoha na dayé na joajna mé.

²¹Pero inchin trigo mé chondaha tsje noehe seha tonçhjenhe trigo, jamé jehe chojni mé cai are tangui tonhe na co icha chojni feo nchehe ngain na ixin ditticaon na joajné Dios, cottimeja jehe na ndadoan na desanimado.

²²Co tti trigo que vinttji ngacjan canchaha, mé rroçho tti chojni que ttinhi joajné Dios, pero jehe na icha ẓaxaon na cain cosa que jí ngataha nontte jilhi co tomi, mé tti ncheyehe na, co cain mé tti ndanchetjañehe na joajné Dios co incheha na inchin ttetonha joajna jilhi.

²³Pero tti trigo que vinttji ngain tti jian jinche, mé rroçho tti chojni que ttinhi joajné Dios co ttinxin na, co jehe na inchin tti trigo que anto tsje noa joinchechjian. Canxion jehe na inchin tti trigo que joinchechjian cien noa ngain nacoa ninchjan, co icanxin na inchin tti trigo que joinchechjian sesenta co de treinta noa ngain nacoa ninchjan.

Ejemploe ca ẓonhi ẓé ngagaha trigo

²⁴Cottimeja Jesús ndaçho ngain na iná ejemplo jilhi:

—Rrondattjo ra queẓén ttetonha Dios que ttjen ngajni. Mé inchin ná xí que coenga jian trigo ngain jnguihi.

²⁵Pero ttie are cain chojni tatejoa na, cjoí ná chojni nttiha que ningaconhe jehe tti jnguihi mé co coenga anto tsje tsehe ca que ẓonhi ẓé ngain jngui mé, co sacjoi.

²⁶Are trigo mé vangui, ocoexinhin joinchechjian ninchjan, hasta are mé cononxin quehe clase de ca jí nttiha.

²⁷Cottimeja ninchehe ẓé tti jnguihi mé cjoí na joindaçho na ngain: “Si tti trigo que soixin coenga ngataon jngui cjoí joxon trigo jian, ẓquettinó joixin ca jilhi que ẓonhi ẓé?”

²⁸Tti jnguihi mé ndaçho ngain na: “çhonja chojni que ningaconna joinchehe jilhi.” Cottimeja ninchehe ẓa joanchiangui na co ndaçho na: “¿Arinao tsji na janha na sigantsjengui na cain ca mé?”

²⁹Pero tti jnguihi ndaçho ngain na: “Nahi, ixin are santsjengui ra ca mé, santsjengui ra trigo cai.

³⁰Icha jian tançhjanda ra ca sanguicaho ca trigo hasta are cosecha, cottimeja janha rrorroanha ninchehe ẓana para que saho santsjegaha na ca yá, co tsia na ca para rroche ca, cottimeja tsenchjinha na joxon trigo ngain nchiania.”

Ejemploe ná tsé que dinhi mostaza
(Mr. 4.30-32; Lc. 13.18-19)

³¹Cai ndaçho Jesús ngain na ejemplo jilhi:

—Tti ttetonha Dios ngain ansén chojni, mé inchin ná tsé de ca que dinhi mostaza que ná xí ttenga ngataon jnguihi xa.

³² Tsé mé anto icha nchinnchin tse que cainxin tsehe icha ca; pero qué tsé mé anto dangui ca hasta icha jie diji ca que cain icha ca. Co dangui ca inchin ná nttá jie que hasta conttoa nchechjian va caqué va ngagaha ramé ca mé.

Ejemplo levadura

(Lc. 13.20-21)

³³ Cai ndačo Jesús ngain na ejemplo jiji:

—Tti ttetonha Dios ngain ansén chojni, mé inchin levadura que ná chojni ttinttjecjan ngain hariné niottja para que nchegangui nchoho.

Quexén vanchegonda Jesús cain ejemplo

(Mr. 4.33-34)

³⁴ Jesús ndačo cain jiji ngain chojni de ixin ejemplo, co si jeha de ixin ejemplo, jeha xonhi vandačo ngain na.

³⁵ Jañá conhe para joiconhe tti dindačo Dios ngain profeta are jeha dicjin janhi:

Janha rronichja de ixin ejemplo;

janha rrondačjan cosa que vinttema desde que are nontte conchjian nontte.

Jesús ndačo quehe rročo ejemplo tti ca que činhi ngagaha trigo

³⁶ Jesús joanjo joajna ngain cain chojni mé, cottimeja jeha conixin chojni que vacao sacjan na para ngain tti nchia que vintte na are mé. Are ongain nchia mé cain chojni que vacao conchienne na co ndačo na ngain:

—Ndanchenji ni ra quehe rročo ejemplo tti ca que činhi ngagaha trigo ngataon jngui.

³⁷ Cottimeja Jesús ndačo:

—Tti ttenga jian trigo, mé janha, tti Xí que joixin de ngajni.

³⁸ Co jngui rročo mundo jiji. Co tti jian trigo, mé rročo tti cain chojni que chonda parte ngain tti ttetonha Dios, co tti ca que činhi ngagaha trigo, mé rročo tti cain chojni que nchehe inchin ttetonha inchínji.

³⁹ Co tti coenga ca, mé tti ningaconna, co mé rročo mero inchínji. Co cosecha rročo are ondatsjexin mundo. Co tti satse cosecha jiji, mé cain ángel de Dios.

⁴⁰ Jamé inchin ca que činhi ngagaha trigo xatse ca para che ca ngacjan xohi, cai jamé tsonhe chojni inchínji are ondatsjexin mundo jiji.

⁴¹ Janha, tti Xí que joixin de ngajni, rrorroanha tsje ángel para sigantsjeyexin de ngain chojni que ditticaon na janha tti cain chojni que nchehe icha chojni para nchehe na jianha, co cain chojni que nchehe jianha,

⁴² para siguinttjiate na ngacjan xohi. Nttiha tti rrotsjanga na co sinetaon neno na.

⁴³ Cottimeja cain tti chojni que nchehe inchin rinao Dios, chojni mé tsonguixima na inchin nchanho ngain lugar tti ttetonha Ndadá na que ttjen ngajni. ¡Si jaha ra ttinxin ra, ttinhi ra jian!

Ejemplo tti tesoro que jixavá

⁴⁴ Jesús ndačo iná ejemplo jiji:

—Tti ttetonha Dios ngain ansén chojni, mé inchin ná tesoro que jixavá ngataon ná jngui. Are ná xí dittja xa tesoro mé, cjan xa tjavá xa nttiha iná. Cottimeja anto ché xa sacjan xa nchiandoha xa, nchecji xa cainxin cosa que chonda xa co tteha xa jeha tti nontte que jixavá tesoro mé.

Ejemplo tti perla que anto rentte

⁴⁵ Co cai tti ttetonha Dios ngain ansén chojni, mé inchin tti perla que anto rentte. Co xitachji perla,

⁴⁶ are dittja xa perla mé, jeha xa ttji xa co nchecji xa cainxin cosa que chonda xa para ttenanxin xa perla mé.

Ejemplo ná nonchaha

⁴⁷ Co cai tti ttetonha Dios ngain ansén chojni, mé inchin ná nonchaha que tja na ngangui jinda co tse cain clase de copescado.

⁴⁸ Are ondacaon nonchaha mé de copescado, xitse va dantsjengui xa nonchaha mé hasta tti ngandehe jinda. Co nttiha ttinchiehe xa cain copescado; tti copescado jian ttenga xa va ngain ntača co copescado que xonhi xé jeha xa ttinttji xa va.

⁴⁹ Jamé tsonhe are ondatsjexin mundo jiji; tsí tsje ángel de Dios para santsjenda cain chojni que nchehe jianha de ngayehe chojni que nchehe jian.

⁵⁰ Co ángel mé rrorroanha cain chojni que nchehe jianha para ngacjan xohi, nttiha tti jeha na rrotsjanga na co sinetaon neno na.

Tti tesoro naroaxin co tti tesoro onttaxí

⁵¹ Cottimeja Jesús joanchiangui ngain chojni que vacao, co ndačo:

—¿Attinxin jaha ra cain jihí?

Jehe na vinttendačo na:

—Ján.

⁵² Cottimeja Jesús ndačo:

—Mexinxin cain jihí rročo que are ná ximaestroe ley Israel ditticaon xa tti janha ndačhan, jehe xa inchin ná chojni que diquenchjinha yó tesoro ngaxinhi nchiandoha co jehe nchao dantsje tesoro naroaxin co tesoro nttaxí. Ixin ximaestroe ley mé nchao nchecoehne xa chojni quehe ttonha ley mé co jai cai nchao ndache xa chojni tti ndačhan janha. Mexinxin rročo que chonda xa yó tesoro, tti nttaxí co tti naroaxin.

Jesús ngain Nazaret

(Mr. 6.1-6; Lc. 4.16-30)

⁵³ Are Jesús joexin ndačo cain ejemplo jihí, jehe sacjoixin de nttiha.

⁵⁴ Co sacjoi para Nazaret, tti jehe vanguixin. Nttiha coexinhi joinchecoehne chojni de ixin Dios ngain ningoe na, co cain chojni nttiha vagoan na admirado co ndačo na:

—¿Queǵén coanguixin xí jihí? Ixin anto nohe xa jai. ¿Queǵén nchao nchehe xa cain milagro jihí?

⁵⁵ Ixin xí jihí xitsihi tti carpintero co janné xa María, co xanchó xa Jacobo, co José, co Simón, co Judas.

⁵⁶ Co cai xanchó xa xannčí nttihi te xan ngain rajná na jihí. ¿Queǵén coanguixin xa cain tti nohe xa yá?

⁵⁷ Mexinxin jehe na čoha na joinchehe na caso tti ndačo Jesús. Pero Jesús ndačo ngain na:

—Cain chojni nchesayehne na ná profeta pero nahi profeta que ttixin de ngain řajeho rajné na o profeta que ttixin de ngain řajeho nindoha na.

⁵⁸ Co tsjeha milagro joinchehe Jesús nttiha ixin chojni nttiha vitticaonha na Jesús.

14

Queǵén ndavenhe Juan, tti vancheguitte chojni

(Mr. 6.14-29; Lc. 9.7-9)

¹ Ngain tiempo mé Herodes, tti vehe gobernador nttiha Galilea, jehe cai conohe tti vanchehe Jesús.

² Co jehe mé ndačo ngain chojni:

—Jehe xí yá, mé Juan, tti vancheguitte chojni, que xechon. Mexinxin chondaxin joachaxin de nchehe milagro yá.

³ Ixin Herodes tti coetonhe xisoldadoe para tse xa Juan co coia xa co joiquiaxinhi xa ngain cárcel. Herodes joinchehe jańá ixin causexin ná nčí que vinhi Herodías tti cjoi nchichihí ná xichó jehe Herodes que vinhi Felipe.

⁴ Juan vandačo ngain Herodes:

—Jianha ixin rricoho nčí yá.

⁵ Herodes desde are mé joinao narrogoenxon Juan, pero vařaoncoa ngain chojni ixin cainxin na vaguitticaon na que Juan vanichja joajné Dios que jehe vagayé.

⁶ Pero are quié Herodes, ná nchichjehe jehe Herodías joí nča co tte nča són ngattoxon con cain chojni que te ngain Herodes rato mé. Co Herodes anto joincheřoxinhi queǵén tte xannčí mé,

⁷ hasta que joinchejurá Herodes que jehe sanjo ngain xan quexeho ná cosa que jehe xan sanchia xan ngain jehe.

⁸ Co jehe xan ocoá xan consejo de ngain janné xan, mexinxin ndačo xan ngain Herodes:

—Čjana ngá na láto já Juan, tti ncheguitte chojni.

⁹ Co rey Herodes are coinhi jihí, jehe anto večhín, pero ixin jehe ondačo que seguro sanjo quexeho cosa que jehe xannčí mé sanchia xan, co ixin coinhi cain chojni que Tate ngain Herodes rato mé, mexinxin jehe coetonha que sayé xannčí mé tti jehe xan joanchia xan.

¹⁰ Herodes coetonha para joicončinjihí na já Juan ngain cárcel.

¹¹ Cottimeja joiaho na já Juan ngá ná láto, joanjo na ngain xannčí mé, co jehe xan joanjo xan ngain janné xan.

¹² Cottimeja vinttequí chojni que vacao Juan para sajoicao na cuerpoe Juan co joicjavá na. Cottimeja cjoi na para joinchenohe na Jesús.

Are Jesús joanjo joine naho mil xí

(Mr. 6.30-44; Lc. 9.10-17; Jn. 6.1-14)

¹³ Are Jesus conohe yá, jehe coani ná barco co sacjoi jeho ngain ná lugar tti xonhi chojni te. Pero chojni vicon na para ttinó sacjoi, co tsje chojni de ngain rajna nttiha rroé na conixin rotté na.

¹⁴ Mexinxin are Jesús joiji nttiha co vahjexin de barco mé, vicon anto tsje chojni sinchonhe nttiha, co jehe coiaconoehé na co joinchexingamehe cain chojni nihi que joicao na.

¹⁵ Co ixin ocoexinhi conaxin xehe, chojni que vacao Jesús conchienenhe na co ndacho na ngain jehe:

—Otsocjin co xonhi nchia jí ngain lugar jiji. Ndache cain chojni que onchao, para que jehe na sasintteci na ngain rajna para siquehna na tti sine na.

¹⁶ Jesús ndacho:

—Chondaha na que sasintteci na; danjo ra jaha ra tti sine na.

¹⁷ Jehe na ndacho na:

—Janha na nttihi xonhi chonda na, jeho naho niottja co yó copescado.

¹⁸ Jesús ndacho:

—Sicohna ra cain yá nttihi.

¹⁹ Cottimeja jehe coetonhe cainxin chojni para tavintte na ngataha ca ngataha nontte. Cottimeja jehe coá tti naho niottja ngá rá co tti yó copescado co tsjehe para ngajni, joanjo gracias ngain Dios co váña niottja mé co joanjo nio ngain chojni que jehe vacao para que jehe na conchjea na nio ngain cainxin chojni mé.

²⁰ Cainxin chojni mé joine na, co cojehe na jian, co después xa joinchecaon na tteyó nttaxa de pedazo que xexin joine na.

²¹ Tti chojni que joine niottja mé cjoí inchin naho mil xí, aparte nchí co icha xannchin-nchinchjan.

Jesús cjoixin rotté ngataonhe jinda

(Mr. 6.45-52; Jn. 6.16-21)

²² Cottimeja Jesús coetonhe tti chojni que vacao para coani na barco co satto na toenixin jinda mé icha saho que jehe ixin jehe xa vittohe nttiha ixin jidoan despedido de ngain cain chojni mé.

²³ Co después de goan despedido de ngain cain chojni mé, jeho coani ná jnanchjan para joinchecoanxinhi Dios. Co are ondaconttie Jesús nttiha tají jeho.

²⁴ Co barco que sajoicao tti chojni que vacao ojoi ji barco ngosine jinda mé. Co olé nda coexinhi cjoihni nganito barco mé ixin chintto anto soji joixin chintto de tti satettji na.

²⁵ Co are ochiaon vingasán Jesús conchienenhe ngain na jittjixin rotté ngataonhe jinda.

²⁶ Co are tti chojni que vacao vicon na que jehe jittjixin rotté ngataonhe jinda, jehe na vinttexaon na, co de joaxaon jehe na vinttecoyao na sén co ndacho na:

—¡Yá ná nttanchanha!

²⁷ Pero Jesús nichjé na co ndacho ngain na:

—¡Xaonha ra, ixin janha joihi!

²⁸ Cottimeja Pedro nichja ngain co ndacho:

—Si ndoa soixin, ttetonna tsjixin rottena ngataonhe jinda hasta tti ttjen soixin.

²⁹ Co Jesús ndacho ngain:

—Xacoi remé.

Cottimeja Pedro vanianxin de barco mé co coexinhi cjoixin rotté ngataonhe jinda para sarrocji ngain tti jí Jesús.

³⁰ Pero are jehe conohe ixin anto soji chintto, jehe xaon co ixin jehe coexinhi ndaxincan-jingui jinda, jehe ndacho sén:

—¡Tançhjangdaha na rroxincanjingui na jinda!

³¹ Ngain rato mé Jesús tsehe rá co ndacho ngain:

—¡Jaha tantoa ditticaon! ¿Quedonda joidoho joaxaon?

³² Co are cayoi jehe na coani na barco mé, otavehe chintto.

³³ Cottimeja nidiguittohe ngaxinhi barco mé vinttetoxin nttajochjiji na ngain Jesús, co vinttendacho na:

—Ján ndoa, soixin Xenhe Dios.

Jesús joinchexingamehe tsje chojni nihi ngain nonttehe Genesaret

(Mr. 6.53-56)

³⁴ Coattoa na jinda mé, co joiji na ngain nonttehe Genesaret.

³⁵ Are chojni de ngain lugar mé joatsoan na que jehe Jesús, jehe na joinchenohe na chojni de ngoixin región mé, co joiaho na cain chojni nihi ngain Jesús.

³⁶ Co vanchetsenhe na ñao Jesús ixin sanjo joachaxin ngain cain tti nihi mé de rrocate na masqui jehó riho ngandehe lonttoe, co cainxin chojni que cate lonttoe Jesús, xingamehe na de ixin tti chin que vinttechonda na.

15

Tti nchejianha chojni

(Mr: 7.1-23)

¹ Cottimeja vintteconchiehe ngain Jesús canxion xifariseo co canxion ximaestroe ley Israél que vinttequixin xa de ngain ciudad de Jerusalén, co joanchiangui xa ngain Jesús co ndaço xa:

² —¿Quedonda chojni que çhjiho ncheha na tti costumbre que coetonha nigoelitona xançhjen? Ixin jehe na tonttiha na jinda rá na tsje nttiha saho que sine na.

³ Pero Jesús joanchiangui ngain xa co ndaço:

—¿Quedonda jaha ra ncheha ra tti tettonha Dios co jehó nchehe ra inchin costumbre que jaha ra chonda ra?

⁴ Ixin Dios coetonha: “Ttjiho ra respeto ngain ndodá ra co ngain janná ra”, co “Tti rronichja jianha de ixin ndodé o janné, chojni mé jiquininxin nasenxon.”

⁵ Pero jaha ra ndaço ra que ná chojni nchao rrondache ndodé o janné: “Janha çhoha tsjenguijna soixin ixin cain cosa que janha chonda, ojoanjo ngain Dios.”

⁶ Co jaha ra ndaço ra que quexeho chojni que rrondaço jañá, irrochondaha na que tsjenguijna na ndodé na o janné na. Jañá jaha ra ncheha ra caso tti coetonha Dios co nchehe ra inchin costumbre que jaha ra chonda ra.

⁷ Jaha ra ncheha ra tti ndaço ra! Jian dindaço profeta Isaías de ixin jaha ra, are jehe dicjin:

⁸ Chojni tehe nchesayana na de ngain rroha na, pero de ngain ansén na ça icjin te na para sino na na janha.

⁹ Mexinxin çonhi çé masqui tenchecoanxinna na;

ixin tti jehe na tenchecoehne na chojni joxon tti tettonha xí nttihi ngataha nontte.

¹⁰ Cottimeja Jesús vayé cainxin chojni que vintte nttiha co ndaço ngain na:

—Ttini ra tti rrondattjo ra co ttinxin ra jian:

¹¹ Jeha tti jine co tti dihi chojni nchejianha na, sino que cain palabra jianha que daçhjexin de rroha na, mé tti nchejianha na.

¹² Cottimeja tti chojni que vacao Jesús conchienne na ngain co ndaço na:

—¿Anoaha soixin ixin xifariseo yá feo vintteconohe xa are vinttequinhi xa tti soixin ndaço?

¹³ Pero Jesús ndaço ngain na:

—Quexeho nttattochjoin que Ndodana que ttjen ngajni cjoengaha, nttá mé chonda que sachjenguinoa nnta.

¹⁴ Tançhjanda ra xa ncheha ra xa caso ixin jehe xa inchin tti diconha que dicaó iná tti diconha. Co jañá si ná tti diconha sicao iná tti diconha, cayoi chojni mé sinttjia na ngain ná toe.

¹⁵ Cottimeja Pedro ndaço ngain Jesús:

—Ndachjenji na quehe rroço ejemplo yá.

¹⁶ Jesús ndaço:

—¿Acai jaha ra ttinxinha ra?

¹⁷ ¿Attinxinha ra que cain tti jine ni sattji para ngaxinhi tsehe ni, cottimeja daçhjexin de ngain cuerpoe ni?

¹⁸ Pero tti palabra que daçhjexin de ngain rroha ni ttixin de ngain ansén ni, co palabra mé tti nchejianha ni.

¹⁹ Ixin de ngain ansén chojni ttixin cain cosa jianha que jehe na çaxaon na, co jehe na çaxaon na para santsjehe na vidé iná chojni, co jehe na dinttejoacaho na iná nçhí que jeha nçhichihi na, jehe na té na cosé iná chojni, jehe na nichja na ndoaha de ná cosa, co jehe na ncheçoxinhi na nichja na cuentoe iná chojni que jeha ndoa.

²⁰ Cain cosa yá tti nchejianha chojni, pero tti tonttiha na jinda tsje nttiha saho que sine na, jeha mé tti nchejianha na.

Ná nçhí de iná nacion que vitticaon nçha Jesús

(Mr: 7.24-30)

²¹ Jesús vaçhjexin de nttiha co sacjoi para regioen ciudad de Tiro co Sidón.

²² Co ná nçhí que joixin de ngain nacioen Canaán tiempo mé vehe nçha ngain región mé, co joi nçha ngain Jesús co ndaço nçha sén:

—jSoixin tti razé David, nttatsanha ñao ttiacoanoana na! Ná xanhna xannčí chonda xan ná espíritu jianha co anto tangui tonhe xan.

²³ Pero Jesús joincheha caso nčí mé. Cottimeja tti chojni que vacao joí na ngain co joinchetsenhe na ñao Jesús co ndačo na:

—Ndache nčí jiha satsji nča ixin atto sén jinichja nča jirroá na nča.

²⁴ Cottimeja ndačo Jesús ngain nča:

—Dios rroanha na janha pero jeha para ngain chojni de nacioen Israel que ndadiguitján inchin coleco.

²⁵ Pero nčí mé conchienne nča co vettoxin nttajochjihi nča ngain Jesús co ndačo nča:

—jNttatsanha ñao ttjenguijna na soixin!

²⁶ Jesús ndačo ngain nčí mé:

—Nchaoha jí si ná chojni santsjehe xenhe niottja para rrochjé conia nio.

²⁷ Pero jeha nčí mé ndačo nča:

—Ján ndoa, pero hasta conia nchao jine va tti nchoe niottja que dinttjixin de ngataha mesé nindoha va.

²⁸ Cottimeja Jesús ndačo ngain nčí mé:

—jJaha anto jian ditticaon! Tsonhe inchin jaha rinao.

Co ngain rato mé xenhe tti nčí mé ndaxingamehe xan.

Are Jesús joinchexingameje tsje chojni nihi

²⁹ Jesús sacjoixin de nttiha co vatto ngandehe lago de Galilea, cottimeja coani ngataha ná jna co tavehe nttiha.

³⁰ Tsje chojni joí ngain Jesús tti jeha tají, co joiaho na ngain Jesús tsje chojni nihi; tti rrengo, tti chejo, tti ttao, tti chonda rá que xonhi xé ra, co icha niníhi. Cain chojni mé coín na ngandaxinhi Jesús, co jeha joinchexingamehe cainxin na.

³¹ Co cainxin chojni que te nttiha goan na admirado are jeha na vicon na que tti chojni ttao onchao nichja, co tti vaquín rá ondaxingamehe, co tti rrengo onchao sacjoixin rotté, co tti chejo onchao vicon. Co cainxin chojni mé coexinhi na joinchecoanxinhi na Dios de chojni Israel.

Are Jesús joanjo joine nó mil xí

(Mr. 8.1-10)

³² Cottimeja Jesús vayé tti chojni que vacao co ndačo ngain na:

—Janha ttiacoaná cain chojni tehe ixin ochonda ní nchanho que te na nttihi nganji na, co xonhi chonda na para sine na. Janha rinaoha rrorroanha na para nchiandoha na si sineha na ixin puede ndatsončhjenxin na jintta ngatja nttiha.

³³ Cottimeja tti chojni que vacao Jesús ndačo na ngain:

—Pero ¿queén sonttó na tti sine na jeha na? Ixin anto tsje na, co nttihi ngain lugar jihi xonhi nchia jí.

³⁴ Jesús joanchiangui ngain jeha tti chojni que vacao co ndačo:

—¿Quejanhi niottja chonda ra?

Co jeha na ndačo na:

—Yáto niottja co nchion copescadochjan.

³⁵ Cottimeja Jesús coetonhe cain chojni mé que tasintte na ngataha nontte.

³⁶ Co jeha cóá tti yáto niottja mé co copescado co joanjo gracias ngain Dios. Cottimeja váña nio co copescado co joanjo ngain tti chojni que vacao, co jeha na conchjea na nio conixin copescado ngain cainxin chojni mé.

³⁷ Cainxin na joine na co cojehe na jian. Cottimeja xa joincheaon na yáto nntaxa de tti xexin joine na.

³⁸ Cain chojni que joine mé cjoí nó mil xí co icha nčí co chjan.

³⁹ Cottimeja Jesús goan despedido de ngain cainxin chojni mé, co joixinhi barco co sacjoi para regioen Magdala.

16

Xifariseo co xisaduceo joanchia xa ixin Jesús rrojinchehe ná milagro

(Mr. 8.11-13; Lc. 12.54-56)

¹ Xifariseo co xisaduceo cjoí xa vintteguitsjehe xa Jesús, co para que rroguicon xa que Jesús rrojinchehe ná cosa nchaoha, jeha xa ndačo xa ngain que jeha rrojinchehe ná señal de milagro que rroquixin de ngajni.

² Pero Jesús ndačo ngain xa:

—Are totsocjin jaha ra ndačo ra: “Anto čjoin tsí nchanho ndoe ixin ngajni jatse.”

³ Co are ndoyo ndačo ra: “Jai čhjoinha sehe nchanho ixin jatse ngajni co jáá ttjoi.” ¡Jaha ra ncheha ra tti ndačo ra! Jaha ra noha ra datsoenhe ra quexén sehe tiempo are tsjehe ra ngajni, pero noaha ra datsoenhe ra quehe rročo señal de ngain tiempo jiji.

⁴ Jaha ra chojni jianha de ngain tiempo jiji que ditticaonha ra co tedanchia ra ná señal de milagro. Pero xonhi icha señal sayehe ra que jehó inchin señal que conhe Jonás.

¡Jańá čo Jesús ngain xa, co cointtohe xa ntiha co jehé sacjoi.

Tti levaduré xifariseo

(Mr. 8.14-21)

⁵ Are tti chojni que vacao Jesús vatto na toenxin lago mé, jehé na tjañehe na de joicao na niottja para rrojine na.

⁶ Cottimeja Jesús ndačo ngain na:

—Tsjenxin ra, ttjiho ra cuidado de ixin levaduré xifariseo co levaduré xisaduceo.

⁷ Co tti chojni que vacao Jesús coexinhi na ndache chó na:

—Jańá ndattjo na na ixin ján na joicoha na niottja para sontte na.

⁸ Jesús conohe quehe tetjao na co jehé ndačo ngain na:

—¿Quedonda ndačo ra ixin chondaha ra niottja? ¡Jaha ra seguro que tantoa ditticaon ni ra!

⁹ ¿Axa ttinxinha ra, ni xaxaonha ra de tti naho niottja que janha conchjeyá tti naho mil xí, co ixin tsje nntaxa joincheaon ra de tti niottja que xexin joine na?

¹⁰ ¿Ani xaxaonha ra de tti yáto niottja que conchjeyá tti nó mil xí, co ixin tsje nntaxa joincheaon ra de tti niottja que xexin joine na?

¹¹ ¿Quexén xaxaonxin ra que janha rrindačhjan de ixin tti sintte ra are ndačhjan ixin tsjiho ra cuidado de ixin levaduré xifariseo, co levaduré xisaduceo?

¹² Cottimeja jehé na coinxin na que Jesús jeha jindache na ixin sicao na cuidado de ixin levaduré niottja, sino que tti tenchecoenhe xifariseo icha chojni co tti tenchecoenhe xisaduceo icha chojni.

Pedro ndačo que Jesús, mé tti Cristo

(Mr. 8.27-30; Lc. 9.18-21)

¹³ Are Jesús joiji ngain regioen Cesarea de Filipo, jehé joanchiangui ngain tti chojni que vacao co ndačo:

—¿Quehe ndačo chojni ixin quensen na janha, tti Xí que joixin de ngajni?

¹⁴ Jehé na ndačo na:

—Canxin chojni ndačo na que jaha Juan tti vancheguitte chojni, icanxin na ndačo na que jaha Elías, co icanxin na ndačo na que jaha Jeremías o iná profeta.

¹⁵ Cottimeja ndačo Jesús ngain tti chojni que vacao:

—Co jaha ra, ¿quehe ndačo ra ixin quensen na janha?

¹⁶ Cottimeja ndačo Simón Pedro:

—Soixin tti Cristo, tti Xenhe Dios que jichon.

¹⁷ Jesús ndačo ngain Pedro:

—Anto čhjoin para ixin jaha, Pedro, tti xenhe Jonás, ixin ni ná chojni ndattjoha yá, sino que Nnodana que ttjen ngajni tti ndattjo yá.

¹⁸ Co janha rrindattjo que jaha dinhi Pedro, co nombre jiji rročo xo. Co ngataha xo jiji sinttachjan ningona; co ni joachaxin infierno tsixinha ngain nihngo jiji.

¹⁹ Janha rrochjaha jaha cain joachaxin de tsinxin quehe rinao Dios ntiha ngajni; inchin janha rrochjaha jaha llave de ngajni. Co tti jaha tsiatte nntihi ngataha nontte, Dios ocoiate nntiha ngajni; co tti tsonxindanguehe jaha nntihi ngataha nontte, Dios oconxindanguehe mé nntiha ngajni.

²⁰ Cottimeja Jesús coetonhe jehé tti chojni que vacao que xonhi chojni rrondate na ixin jehé tti Cristo.

Jesús ndačo ixin jehé ndasenhe

(Mr. 8.31—9.1; Lc. 9.22-27)

²¹ Desde are mé Jesús coexinhi ndache jehé tti chojni que vacao que ixin jehé chonda que tsji para ciudad de Jerusalén co nntiha anto tangui tsonhe jehé ngain cain xittetonha ngain nihngo nntiha, co ngain cain xidána que vaquetonha ngain icha xidána, co ngain cain ximaestroey ley Israel. Co ndačo que cain xi mé nasoexon xa jehé, pero ngain nchanho ninxin jehé rroxechon.

²² Cottimeja jehé Pedro joantsjenda Jesús co coexinhi Pedro ndache Jesús:

—¡Nichjaha jamé ixin Dios sicao cuidado de ixin soixin que xonhi tiempo tsonha jiji!

²³ Pero Jesús ngaria co ndačo ngain Pedro:

—¡Sattjixin de nganji na, Satanás! ixin jaha rinao rrocayaconhna na janha. Jaha xaxaonha inchin xaxaon Dios, sino inchin xaxaon chojni que te ngataha nontte.

²⁴ Cottimeja Jesús ndačo ngain tti chojni que vacao:

—Si chonja de jaha ra rinao ra sacjin na, pero chonda ra que rrotjañaha ra cain tti chonda ra co masqui anto tangui tsonha ra co hasta nasenxon ra.

²⁵ Ixin tti rinao que vidé xonhi tsonhe, mé sinchetján vidé; pero tti sinchetján vidé de ixin causananxin janha, mé sechon para cainxin tiempo.

²⁶ Ixin xonhi xé que ná chojni sacha cainxin que jí ngain mundo jihi co ndasinchetján almé, zo quejanhi tsenanxin chojni almé?

²⁷ Ixin janha, tti Xí que joixin de ngajni, sihi iná conixin gloria que rrochjana Ndodana conixin cain angelna, cottimeja cada chojni tsjengá na hna inchin jehe na joinchehe na.

²⁸ Co atto seguro rrindattjo ra, que toha ra xo te ra nganji na jaixon, xa senha ra hasta que siconja ni ra janha, tti Xí que joixin de ngajni, rrocjan na sihi conixin joachaxin para siquetonha cain cosa.

17

Are vicon na Jesús anto ojé

(Mr. 9.2-13; Lc. 9.28-36)

¹ Vatto incjaon nchanho, cottimeja Jesús joicao Pedro co Jacobo co Juan, xanchó Jacobo, co Jesús cjo conixin jehe na ngataha ná jna anto noi,

² co nttiha vicon na Jesús anto ojé. Ngá con Jesús anto conguxian inchin tté nchanho, co lonttoe anto coroa lontto hasta conguxima lontto.

³ Co ngain rato mé jehe na vicon na Moisés co Elías, tatetjao na Jesús nttiha.

⁴ Cottimeja Pedro ndačo ngain Jesús:

—Soixin, ¡Atto nchao ixin janha na te na nttihi! Si rinao, janha na sinttachjian na ní nchiachjan: ná nchiachjan para ixin soixin, ná nchiachjan para ixin Moisés, co iná nchiachjan para ixin Elías.

⁵ Pedro xa jinichja jañá are joí ná ttjoi anto roa hasta jitonguxima ttjoi, co ttjoi mé ndacjoanotaon na, co de ngacjan ttjoi mé coinhi na tté Dios que ndačo:

—Jihi tti Xanhna que janha anto rinaho, co de ixin jehe Xan janha anto chahna. Ditticaon ra tti rrondačo Xan.

⁶ Cottimeja tti canio chojni que joicao Jesús nttiha are coinhi na yá, canio na vinttettoxin na co visé na ngataha nontte, co anto xaoon na.

⁷ Cottimeja Jesús conchienhe ngain na, cattede na co ndačo ngain na:

—Dingattjen ra, co xaonha ra.

⁸ Co are jehe na tsjehe na, ixonhi chojni vicon na, más que jeho Jesús.

⁹ Are tedania na de ngataha jna mé, Jesús coetonhe na co ndačo:

—Xonhi chojni ttequinhi ra tti jaha ra vicon ra, hasta que janha, tti Xí que joixin de ngajni, rroxechon na.

¹⁰ Cottimeja jehe tti canio chojni que joicao Jesús joanchiangui na ngain Jesús co ndačo na:

—¿Quedonda ndačo ximaestroey ley Israel ixin Elías chonda que tsí icha saho que jaha?

¹¹ Jesús ndačo ngain na:

—Ján ndoa que Elías tti tsí icha saho que janha co jehe tti siquentonxinhi vidé chojni para que nchao sayehna na janha.

¹² Pero janha rrindattjo ra que Elías ojoí co jehe na joatsoanha na, sino que joinchehe na ngain inchin jehe na joinao na. Jamé janha cai, tti Xí que joixin de nganji, tangui tsonna de ngain rá jehe na.

¹³ Cottimeja jehe tti canio chojni que joicao Jesús xaxaon na que Jesús jindačo de ixin Juan, tti vancheguitte chojni.

Jesús joinchexingamehe ná xanxí que vechonda chin denda

(Mr. 9.14-29; Lc. 9.37-43)

¹⁴ Are joihi na ngain tti vittohe icha chojni que vacao Jesús, nttiha anto tsje chojni sinchonhe na Jesús. Are conchienhe ná xí ngain Jesús co vettoxin nttajochjihí xa co ndačo xa:

¹⁵ —Nttatsanha ñao soixin, ttiaconoehé xanhna ixin chonda xan chin denda co anto tangui tonhe xan. Tsje nttiha detsingatte xan xohi o ngangui jinda.

¹⁶ Nttihi joiquinha xan ngain chojni que chjiho tehe, pero choha nchexingamehe na xan.

¹⁷ Jesús ndačo:

—¡Jaha ra chojni que ditticaonha ra co jianha ra! ¿Hasta quesa janha chonda que sarihi nganji ra? ¿Hasta quesa janha chonda que tsixinna nganji ra? Sicohna ra chjan yá nttihi.

¹⁸ Cottimeja Jesús joinchesattehe tti espíritu jianha que vechonda chjan mé, co venguixin espíritu mé de ngaxinhi cuerpoe xan. Co desde ngain rato mé jehe xan ndaxingamehe xan.

¹⁹ Cottimeja are jehó Jesús nntiha conixin chojni que vacao, jehe na joanchiangui na ngain co ndačo na:

—¿Quedonda janha na čhoha vehngui na espíritu jianha yá?

²⁰ Jesús ndačo ngain na:

—Ixín jaha ra antoha jian ditticaon ni ra janha. Co janha atto seguro rrindattjo ra que si tti ditticaon ra jixín rrogehe inchin ná tsehe ca dinhi mostaza, nchao rrondache ra jna jiha: “Sattjixin de nntihi co sattji iná lugar”, co jna yá satsjixin jna de tti jí jna. Xonhi cosa que čhoha sinchehe ra si ndoa ditticaon ra.

²¹ Pero clase de espíritu jianha yá jehó nchao dengui ni are nchecoanxinhí ni Dios co dinttecjáño ni saho.

Jesús ndačo iná ixín jehe ndasenhe

(Mr. 9.30-32; Lc. 9.43-45)

²² Ná nchanho are xa vintte na ngain regioen Galilea, Jesús ndache tti chojni que vacao ixín chojni sinchechienhe na jehe, tti Xí que joixín de ngajni, para ngain chojni jianha.

²³ Co ixín nasoenxon na jehe Jesús, pero ngain nchanho ninxin jehe rroxechon iná. Co chojni que vacao anto vinttečhín na are coinhi na yá.

Are Jesús cjoenga hna impuesto ngain nihngo

²⁴ Are Jesús conixin chojni que vacao joihi na ngain rajna Capernaum, tti xí que vanchehe cobro impuestoe nihngo cjoí xa ngain Pedro co joanchianguihi xa co ndačo xa:

—¿Attjenga hna ximaestroa ra impuesto para ixín nihngo?

²⁵ Pedro ndačo:

—Ján.

Cottimeja Pedro are cjoí ngaxinhí nchia para rrojindačo tti ndačo xicobrador, pero Jesús saho ndačo ngain jehe:

—Pedro, ¿quensen xaaxaon jaha nchehe cobro impuesto xittetonha ngataha nontte nntihi? ¿Achojni de ngain nacioen xa o ni chojni que ttixin cjin?

²⁶ Pedro ndačo:

—Tti chojni que ttixin cjin.

Jesús ndačo:

—Mexinxín chojni xa chondaha na que tsjenga na hna.

²⁷ Pero para que xonhi chojni sonttoñaon na, ttji jaha ngain lago, dancanguihi anzuelo co dantsjengui tti saho copescado que rrotse anzuelo. Co ngaxinhí rroha copescado mé sinchí ná tomi. Tomi mé sittja para tsjengaxín na hna impuestona janha co impuestoa jaha. Ttjihó tomi mé co ttjenga hna cain.

18

¿Quensen tti icha importante?

(Mr. 9.33-37; Lc. 9.46-48)

¹ Ngain rato mé chojni que vacao Jesús conchienenhe na ngain Jesús co ndačo na:

—¿Quensen icha importante ngajni?

² Cottimeja Jesús vayé ná xannchinchjan co coín xan ngayehe na,

³ co ndačo:

—Atto seguro rrindattjo ra que si jaha ra tsentoxinha ra vidá ra co rrocjan ra inchin xannchinnchinchjan, čhoha rrochonda ra parte ngain tti ttonha Dios.

⁴ Mexinxín quexeho chojni que jeha orgulloso co cjan inchin chjan jihí, chojni mé tti sehe icha importante nntiha ngajni.

⁵ Co tti chojni que sayé ná tti inchin xannchinchjan jihí ixín ditticaon na janha, cai chojni mé sayehna na janha.

Tti sinchenchehe ni cosa jianha

(Mr. 9.42-48; Lc. 17.1-2)

⁶ Quexeho chojni que sincheyehe ná chojni mé que xa antoha jian ditticaon na janha, icha jian sečhianito ná xočhín ngain ttosin chojni mé para rroxincanjingui ndachaon.

⁷ Atto nchaoha ixín jí cosa ngataha nontte nntihi que tenchenchehe chojni tti jianha. Cosa mé cainxin tiempo sehe nntihi, pero janto tangui tsonhe tti chojni que sincheyehe iná chojni para sinchehe jamé!

⁸ Mexinxín si ná rá o ná rottea sinttaxaxaon para sinchehe jianha, ncheha cosa mé, masqui hasta tončhinji rá o rottea co tja cjin, ixín icha jian rrochonda vida naroaxín

masqui coha ná rá o ná rottea, co nahi tsji conixin yoixin rá o yoixin rottea ngain infierno tti xonhi tiempo danga xohi.

⁹ Co si jmacon sinttaxaxaon para sinchehe jianha, ncheha cosa mé, masqui hasta dantsjengui jmacon co tja cjin, ixin icha jian rrochonda vida naroxin masqui nacoa jmacon, co nahi tsji conixin cayoxin jmacon ngain infierno tti xonhi tiempo danga xohi.

Ejemploe tti coleco dignitján

(Lc. 15.3-7)

¹⁰ Xaxaonha ra ixin chojni que xa antoha jian ditticaon na janha jeha importante na. Ixin janha rrindattjo ra que ngajni cain ángel que tenda jehe na, cainxin tiempo te ángel mé ngattoxon con Ndodana que ttjen ngajni.

¹¹ Ixin janha, tti Xí que joixin de ngajni, joihi para joicjenguijna tti chojni que otequin-ixin rrocji ngain infierno.

¹² Inchin si ná xí chonda xa cien coleco co ndasitján ná va, ¿quexén sinchehe xa? ¿Atsinttoeha xa tti noventa y nueve va ngagaha jna, co satsji xa sicjé xa coleco vitján?

¹³ Co si sittja xa va, seguro que icha rroché xa ngain coleco mé que ngain tti noventa y nueve coleco que vitjanha.

¹⁴ Jamé cai Ndodá na que ttjen ngajni rinaoha Ndo que sitján ni ná chojni que xa antoha jian ditticaon na janha.

Quexén sinchetjañehe ni chojni que ditticaon Jesús

(Lc. 17.3)

¹⁵ Si ná chojni que ditticaon na janha sinchehe ná cosa nchaoha nganji jaha, nichjehe jaho co jehe co ndache ixin jehe nchaoha joinchehe. Si jehe sinchehe caso tti jaha rrondache, nchao, ixin jaha ocjoenguijna jehe para que jehe rrochonda parte ngain tti ttonha Dios.

¹⁶ Pero si sincheha caso tti jaha rrondache, cottimeja ttjé ná o yó chojni para ttjiho dinichjehe ra jehe que tti joinchehe nchaoha jí, co jehe cayoi chojni mé sintte na de testigo de quehe rrondache chó ra.

¹⁷ Co si jehe xa sincheha caso masqui cjoihó cayoi chojni mé, cottimeja jaha dindache cain chojni ngain nihngo. Co si chojni mé xa sincheha caso tti rrondačo cain chojni ngain nihngo, cottimeja cain ra dantsjenda ra chojni mé inchin tti chojni que ditticaonha Dios o inchin ná chojni jianha.

¹⁸ Janha rrindattjo ra seguro que cain tti tsia ra nttihi ngataha nontte, Dios ocoia cosa mé nttiha ngajni. Co cain tti jaha ra tsonxindanguehe ra nttihi ngataha nontte, Dios oconxindanguehe cosa mé nttiha ngajni.

¹⁹ Cai rrindattjo ra que si yó de jaha ra sintte ra de acuerdo nttihi ngataha nontte de sanchia ra thonja are tenchecoanxinhi ra Ndodana que ttjen ngajni, seguro que jehe Ndo rrochjá ra Ndo.

²⁰ Ixin tti te yó o ní chojni que tenichja na conixin nombrena janha, janha nttiha rrihi ngayehe na.

²¹ Cottimeja Pedro cjoí joanchianguihi Jesús co ndačo:

—¿Quejanhi nttiha chonda janha que sinttatjañá ná tti sinchehe jianha nganji na janha? ¿Achonda que sinttatjañá hasta yáto nttiha?

²² Jesús ndačo ngain Pedro:

—Janha rrindattjoha que hasta yáto nttiha, sino que hasta yáto de tti setenta nttiha.

Ejemploe ná tti nchehe xa que choha joinchetjañehe ná xicompañeroe

²³ Mexinxin rrindattjo ra quexén tti ttonha Ndodana que ttjen ngajni. Mé inchin ná rey que joinchchjienhe cuenté cain ninchehe xé ixin quejanhi teca na cada na.

²⁴ Jehe mero coexinhí jinchehjian cuenta mé are joiaho na ngain rey mé ná tti nchehe xa que jica tsje millones.

²⁵ Pero ixin tti nchehe xa mé chondaha quehe tsjengaxin hna, mexinxin coetonha rey mé que rrojinchecji na tti nchehe xa mé ngain iná xinajni conixin chíhi co xenhe co cain cosa que jehe vechonda para rroxengaxin hna tti jehe jica ngain rey.

²⁶ Cottimeja jehe tti nchehe xa mé vettoxin nttajochjihi ngain rey co ndačo: “Nttatsanha ñao chonna na nchion co tsengaha hna cainxin tti rricaha.”

²⁷ Rey coiaconoehé tti nchehe xa mé co joinchetjañehe cain tomi que veca co coančjanda sacjoi.

²⁸ Pero are jehe tti nchehe xa mé vačhje para sacjoi, nttiha vetanxin iná tti nchehe xa, xicompañeroe. Co jehe mé veca nchion tomi ngain tti sajittji. Co jehe tti sajittji mé tse co tsenguihi ttosin xicompeñeroe co coejehe tté xa, co ndache chó: “¡Ttjengana hna tti rricana na!”

²⁹ Cottimeja jehe tti veca vettoxin nttajochjihi co ndačo: “Nttatsanha ñao chonna na, co tsjengaha hna cain tti rricaha.”

³⁰ Pero tti sajittji čhoaha, sino que sajoicao coiaxinhi ngain cárcel hasta que rrocjengaja hna tti jica.

³¹ Co are icha ninchehe řa vicon na jihi, anto vinttechín na co cjoí na joindačo na cain jihi ngain xinajní na, jehe tti rey mé.

³² Cottimeja jehe rey mé rroanha joajna para joixacoa tti cjoaya, co ndačo ngain: “¡Jaha ná ninchehe řa anto jianha! Janha jointtatjañaha jaha cain tti joaricana na ixin joinchetsena ñaho na.

³³ Jaha cai rrochonda que rroquiaconoehé xicompañeroa, jañá inchin janha coiaconoaha jaha.”

³⁴ Co jehe rey mé anto coñao co coetonha para que sayé castigo jehe tti nchehe řa mé hasta que tsjengaja hna cain tti jica.

³⁵ Co are ojoexin ndačo Jesús cain yá jehe ndačo:

—Cai jañá sinchehe Ndodana que ttjen ngajni nganji ra, si jaha ra sinchetjañeha ra icha chojni tti nchaoha que sinchehe na nganji ra.

19

Jesús ndačo de ixin xí que dachjendehe čhihi

(Mr. 10.1-12; Lc. 16.18)

¹ Después que Jesús ndačo cain cosa yá, jehe sacjoixn de Galilea co joiji ngain tti parte de region Judea que jí lado čhinxin nchanho de río Jordán.

² Anto tsje chojni rroé na Jesús, co nttiha jehe joinchexingamehe tsje chojni nihi.

³ Cottimeja canxion xifariseo vintteconchienne řa ngain Jesús para rrojinchenichja řa Jesús ná cosa nchaoha para que nchao rrocjanguihi řa. Joanchiangui řa ngain jehe co ndačo řa:

—¿Anchao ná ni sačhjenjehe ni čhihi ni de ixin quexeho cosa que jehe ni isincheřoxinha ni?

⁴ Jesús ndačo ngain řa:

—¿Atsjeha ra tti jítaxin Palabré Dios? Nttiha jítaxin ixin Dios tti joinchekhjian chojni are saho. Co jehe mé joinchekhjian xí co nčhí.

⁵ Cai jítaxin nttiha: “Mexinxin xí sačhjenjehe řa ndodé řa co janné řa para secaho řa jehó čhihi řa, co cayoixin na sintte na inchin nacoaxinxon chojni.”

⁶ Co jañá ijeha yó chojni, sino que nacoaxinxon chojni. Mexinxin xí čhoaha sačhjenjehe řa čhihi řa ixin Dios joinchekhjian cayoi jehe na nacoa chojni.

⁷ Cottimeja vinttendačo jehe řa:

—¿Quedonda diquetonha Moisés que nchao sanjo ni ngain nčha ná řón que jítaxin que jehe ni ondavčhjenjehe ni čhihi ni, co jamé ondatsinttohe ni nčha?

⁸ Jesús ndačo:

—Moisés ndačo jañá ixin jaha ra atto čha ansean ra, mexinxin jehe joanjo joachaxin yá de sačhjenjehe ra nčhičhiha ra, pero are icha saho jeha jañá coetonhe Dios.

⁹ Co janha rrindattjo ra, que tti dachjendehe nčhičhihi (co jeha de ixin vittjaxin nčha tajjjoacaho nčha iná xí), co jehe decaho iná nčhí, jehe nchehe jianha řajehó como si rrochonda yó nčhí. Co tti decaho ná nčhí que digachjendehe xixihi, cai chojni mé jianha nchehe, řajehó inchin rrochonda nčhičhihi iná xí.

¹⁰ Cottimeja chojni que vacao Jesús ndačo na ngain:

—Si jañá jí remé de ixin xí co nčhí, icha jian sinttecaoha chó ni.

¹¹ Jesús ndačo ngain na:

—Pero jeha cain chojni nchao sintte na jehó na, sino que jehó tti chojni que Dios ndačo para que sintte na jehó na.

¹² Jí tsje razón para que xí dinttecaoha řa nčhí. Te xí deporsín desde are toncjihí řa cuerpoe řa rinaoha nčhí, co icanxin xí čhoaha sinttecao řa nčhí ixin chojni joincheřoenhe řa ngain tti parte jima de cain xí, co icanxin xí rinaoha řa dinttecao řa nčhí ixin icha rinao řa nchehe řa inchin ttetonha Dios que ttjen ngajni. Co řo rinaoha ra sinttecoho ra nčhí ixin sinchehe ra inchin ttetonha Dios, nchao nchehe ra.

Jesús joinchenchaon xannchinnchinchjan

(Mr. 10.13-16; Lc. 18.15-17)

¹³ Cottimeja joiaohé na Jesús canxion xannchinnchinchjan para que Jesús rroquín rá ngataha já xan co sinchetsenhe ñao Dios ixin sinchenchaon xan. Pero chojni que vacao Jesús coexinhi na joinchesattehe na cain tti chojni que joicao cain chjan mé.

¹⁴ Pero Jesús ndačo ngain chojni que vacao:

—Tančhjanda ra que xannchinnchinchjan tsí xan nganji na janha, cayacoenra ra xan ixin ngajni tti tetonha Ndodana, nttiha para cain chojni inchin jehe xan.

¹⁵ Co Jesús coín rá ngataha cain xannchinnchinchjan mé co joinchetsenhe ñao Dios ixin sinchenchaon xan, cottimeja Jesús sacjoixin de nttiha.

Ná xanxí anto rico cjoao xan Jesús

(Mr. 10.17-31; Lc. 18.18-30)

¹⁶ Ná xanxí cjoí xan joitsjehe xan Jesús, co joanchiangui xan co ndačo xan:

—Maestro, soixin que anto jian, ¿quehe icha cosa jian chonda janha que sinttaha para que janha rrochonda iná vida naroaxin que xonhi tiempo tsjexin?

¹⁷ Jesús ndačo ngain xanxí mé:

—¿Quedonda ncheguinhí na janha jian? xonhi iná tti icha jian, jeho nacoaxinxon, co mé jehe Dios. Pero si jaha rinao rrochonda iná vida naroaxin, ditticaon co nchehe cain tti coetonha Dios.

¹⁸ Xanxí mé ndačo xan:

—¿Quecá?

Co Jesús ndačo ngain xan:

—Dantsjehe vidé iná chojni; xonhi nchí ncheyehe; xonhi cosé iná chojni ttehe; ndačoha cosa ndoaha de iná chojni;

¹⁹ ttjiho respeto ngain ndodá co ngain janná; co rinao cain chojni inchin rinao cuerpoa.

²⁰ Xanxí mé ndačo xan ngain Jesús:

—Cain yá rrinttaha desde are xa nchín na, ¿quehe xa ditján sinttaha?

²¹ Jesús ndačo ngain xan:

—Si jaha rinao sarihi chojni jian ndoa, ttji co nchecji cainxin tti chonda co tonchjejehe chojni noa tomi, cottimeja ngajni jaha rrochonda cosa icha rentte, cottimeja sihi para sacjin na tti sacji janha.

²² Pero are xanxí mé coinhi xan yá, anto vechín xan co sacjoi xan ixin anto rico vehe xan.

²³ Cottimeja Jesús ndačo ngain chojni que vacao:

—Atto seguro rrindattjo ra que atto tangui para que chojni rico rrochonda na parte ngain tti tetonha Ndodana que ttjen ngajni.

²⁴ Icha tanguiha para ná cocamello sattoxinhí va ttoechjenhe ná nttachiehe manta que para chojni rico rrochonda na parte ngain tti tetonha Dios.

²⁵ Are chojni que vacao Jesús coinhi na yá, anto vinttegoan na admirado co joanchianguihí chó na co ndačo na:

—¿Mexinxin quensen nchao rrochonda iná vida naroaxin remé?

²⁶ Jesús tavetsjehe ngain na co ndačo:

—Chojni nttihi choha sinchehe na jamé, pero Dios nchao sinchehe cainxin.

²⁷ Cottimeja Pedro ndačo ngain Jesús:

—Janha na cointtoa na cain tti joichonda na, para que jai nchao čhjin na nganji soixin. Mexinxin, ¿quehe rrochonda na janha na?

²⁸ Jesús ndačo ngain na:

—Atto seguro tti rrindattjo ra, que ngain tti tiempo que tsí, are cainxin rrocjan naroaxin, are mé janha, tti Xí que joixin de ngajni, sarihi ngain tti lugar que chonda gloria, co jaha ra que čhjin na jai cai sintte ra ngain tteyó lugar de joachaxin para que sinchejuzguehe ra tti tteyó grupoe chojni Israel.

²⁹ Co cain chojni que ttinttohe na nchiandoha na, o xanchó na, o ndodé na, o janné na, o čhihi na, o xenhe na, o jnguihi na para tenchehe na xa na janha, chojni mé sayé na cien nttiha icha tsje co cai sayé na iná vida naroaxin que xonhi tiempo tsjexin.

³⁰ Pero tsje chojni que jai xaaxaon na ixin jehe na anto importante na, pero are mé, xonhi rentte na. Co tsje chojni que jai xaaxaon na ixin jehe na jeha importante na, pero are mé jehe na nisintte icha importante.

20

Ejemplo ninchehe xa

¹ Cai ndačo Jesús:

—Tti tetonha Dios ngajni, mé inchin joinchehe ná xí que vechonda jie jngui. Xí mé vachje xa ndoyo para joicjé xa ninchehe xa para sinchehe na xa ngain nttauva.

² Jehe xí mé ndačo xa ngain na que tsjenguehe xa na hna tti jiquinxin dacha ni ngoi ná nchanho, co jehe na vittoexin na. Mexinxin jehe xa rroanha xa na para ngain jnguihi xa joinchehe na xa.

³ Cottimeja jehe xa vachje xa iná xa jidacao inchin las nueve co vittja xa icaxin chojni ngain ndásin que xonhi xa tenchehe.

⁴ Jehe xa ndaŋho xa ngain na: “Cai jaha ra tji ra dinchehe ra xana ngain jnguihna, co tsjengaha ra hna inchin jiquininxin.” Co chojni mé vinttecji na.

⁵ Cottimeja jehe xí mé vaŋhe xa iná inchin chonguíxin co cai iná inchin ní hora tsocjin, co joinchehe xa xajeho.

⁶ Co inchin naho hora tsocjin cjan vaŋhe xí mé iná para ngain ndásin, co vittja xa icanxin chojni que xonhi xa tenchehe na cai, co jehe xa ndaŋho xa ngain na: “¿Quedonda nttihi tate jaha ra ngoixin nchanho co xonhi xa tenchehe ra?”

⁷ Jehe na vinttendaŋho na: “Ixin xonhi chojni chjana na xa.” Cottimeja jehe xa ndaŋho xa ngain na: “Cai jaha ra tji ra dinchehe ra xana ngain jnguihna, co tsjengaha ra hna inchin jiquininxin.”

⁸ Co are ondaconttie, jehe xa ndaŋho xa ngain tti jinda xa mé: “Dayehe cain ninchehe xa co ttjenguehe na hna. Ttexinxin ngain tti chojni que joixinhi después, co ttjatin ngain tti nijoixinhi icha saho.”

⁹ Cottimeja vintteconchienne tti chojni que coexinhi joinchehe xa inchin naho hora tsocjin, co cada na xenguehe na hna lo de ngoixin nchanho.

¹⁰ Cottimeja are xenguehe hna tti chojni que joixinhi joinchehe xa icha saho, jehe na xaxaon na que rroxenguehe na hna icha tsje, pero cai xenguehe na hna jehó tti ná nchanho.

¹¹ Are xenguehe na hna tti nijoixinhi joinchehe xa icha saho, jehe na coexinhi na ndaŋho na ixin jianha joinchehe tti jnguihi.

¹² Jehe na ndaŋho na ngain xinajni mé: “Cain chojni tehe que joinchehe na xa jehó nacoa hora co cjoenguehe na hna xajeho que janha na que jointtaha na xa ngoixin nchanho ngandaohé soa.”

¹³ Pero jehe xinajni mé ndaŋho xa ngain ná na: “Amigo, janha xonhi ni ná cosa jianha rrinttaha nganji ra. ¿Açjoanha na ixin tsjengaha ra hna lo de ná nchanho?”

¹⁴ Jaxon dayehe tomia co sattji. Janha rinaho tsjengá chojni tehe hna xajeho inchin rrittjengaha ra hna jaha ra.

¹⁵ ¿Apoco janha chondaha derecho de sinttaha tti janha rinaho ngain tomina? ¿O ani jaha ra tonchjoaha ra ixin janha danjoncoa tomina?”

¹⁶ Mexinxin jihi rroŋho ixin tti chojni que jai xaxaon na ixin jehe na jeha importante na, pero are mé jehe na nisintte icha importante. Co tti chojni que jai xaxaon na ixin jehe na anto importante na, pero are mé xonhi tsorentte na. Ixin janha nichjá anto tsje chojni pero cainxinha na rinao na na janha.

Jesús cjan ndaŋho iná ixin jehe ndasenne

(Mr. 10.32-34; Lc. 18.31-34)

¹⁷ Are Jesús ojittji ngatja nttiha para Jerusalén, jehe joantsjenda tti tteyó chojni que vacao co ndaŋho ngain na:

¹⁸ —Jaha ra tedicon ra que jaxon satettjin na para Jerusalén. Nttiha janha, tti Xí que joixin de ngajni, sinchechienne na na ngain xidána que ttonha ngain icha xidána co ngain ximaestroé ley Israel, co nimé ni rrondaŋho que ixin janha nasenxon na.

¹⁹ Co sanjo na na janha ngain xí de ojé nontte para que nimé tsjanoo na na janha, co rroŋanguihna na cuarta de roa, co sinchecrucificá na na. Pero ngain nchanho ninxin janha rroxechon na.

Tti joanchia janné Jacobo co Juan

(Mr. 10.35-45)

²⁰ Cottimeja conchienne ngaca Jesús, janné Jacobo co Juan, cayoi nimé xenhe Zebedeo. Co jehe janné na conixin cayoi jehe na vintteconchienne na ngain Jesús. Co jehe jan vetoxin nttajochjihi jan ngain Jesús para joanchia jan ná joatotsenne ñao jan ngain Jesús.

²¹ Jesús ndaŋho ngain naníta mé:

—¿Quehe rinao?

Naníta ndaŋho:

—Ttonha soixin que are soixin tsetonha cainxin cosa, ná de xanhna tehe sehe lado jian de soixin co iná xan sehe xan ngain lado cjon de soixin.

²² Pero Jesús ndaŋho ngain Jacobo co Juan:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenne ra inchin janha ndasenne na?

Jehe na vinttendaŋho na:

—Ján nchao.

²³ Jesús ndaŋho ngain na:

—Ján ndoa que jaha ra tangui tsonha ra, co senhe ra inchin janha senhe na, pero de tti sintte ra lado jian na co lado cjon na, jeha janha tti danjo joachaxin mé, sino que Ndodana Ndo nohe quensen sintte nttiha.

²⁴ Co are tti itte chojni que vacao Jesús coinhi na yá, coñao na ngain Jacobo co Juan.

²⁵ Pero Jesús vayé na, co ndaço ngain na:

—Jaha ra noha ra que cain xí que tetonha ngain nación, ttetonha xa inchin rinao xa, co cai icha xí que chonda joachaxin nttiha anto ttetonha xa ngain chojni.

²⁶ Pero jeha jamé tsonhe ngayaha jaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni.

²⁷ Co quexeho de jaha ra xo rinao ra icha tsetonha ra, pero cai chonda que sintte ra inchin esclavo para icha chojni.

²⁸ Janhi inchin janha, tti Xí que joixin de ngain, joiha para que chojni tsjenguijna na janha, sino que janha joihi para joicjenguijna chojni co para que janha sanjo vidana para tsjenga hna tti teca tsje chojni.

Jesús joinchexingamehe yó tti chejo

(Mr. 10.46-52; Lc. 18.35-43)

²⁹ Are Jesús conixin tti tteyó chojni que vacao vaçhjin na de ciudad de Jericó, anto tsje chojni rroé Jesús.

³⁰ Ngandehe nttiha mé tate yó tti xí chejo, co are vinttequinhi xa que Jesús jidatto nttiha, jehe xa ndaço xa sén:

—¡Soixin, razé David, ttiaconoana ni ra janha na!

³¹ Cain chojni que tettji nttiha joinchesattehe na cayoi xí mé para que rrotenco xa, pero jehe xa icha coyao xa co ndaço xa:

—¡Soixin, razé David, ttiaconoana ni ra janha na!

³² Cottimeja Jesús tavengattjen, co vayé cayoi tti chejo mé co joanchiangui ngain co ndaço:

—¿Quehe rinao ra sinttaha janha nganji ra?

³³ Cayoi tti chejo mé vinttendaço:

—Janha na rinaho na sicon na.

³⁴ Cottimeja Jesús coiaconoehé cayoi xí mé co cattehe jmacon xa. Co ngain rato mé cayoi tti chejo mé onchao vicon, co cayoi sacjoi conixin Jesús.

21

Jesús joigaha ciudad de Jerusalén

(Mr. 11.1-11; Lc. 19.28-40; Jn. 12.12-19)

¹ Are joihi na ngain rajna Betfagé, chiaon ngaca Jerusalén, co ngaca tti jnanchjan que dinhi Ntaolivo, Jesús rroanha yó de tti chojni que vacao.

² Co ndaço ngain na:

—Ttji ra ngain rajnanchjan jimé. Yá sinchí ra ná colochó jithoa va co nttiha jí colochochjenhe va. Toxindanguehe ra va co sicohna ra cayoi va nttihi.

³ Co si çhonia chojni rrondattjo ra çhonia, jaha ra ndache ra que ximaestroa ra rrongondehe xa va co toin sicán ra va iná.

⁴ Jihi conhe para que joiconhe tti dindaço profeta are diquentaxin janhi:

⁵ Ndache ra ciudad de Jerusalén:

“Tsjenxin, tti Rey de jaha jói nganji, co jehe jói inchin ná chojni que jeha importante, co jitaha ná colochó, que mé colochochjan nchín, xenhe ná colochó que otame va.”

⁶ Cottimeja cayoi chojni mé sacjoi na co joinchehe na inchin coetonha Jesús.

⁷ Joiaho na colochó mé conixin xenhe va, co manta que tetsá na cjoajinhí na colochochjan para Jesús vetaha va.

⁸ Co tti anto tsje chojni que joichonhe na Jesús, ttoha na coingo na ngá nttiha tti manta que tetsá na, co icanxin na conçhinji na ramé nttá para coingo na ngá nttiha.

⁹ Co cain chojni que tetaon nttiha co cain chojni que terroé coexinhí na ndaço na:

—¡Gloria para ixin xí jihi ixin jehe xa razé rey David co chonda xa joachaxin que vechonda rey David! ¡Anto jian jehe tti jói conixin nombré Dios! ¡Gloria ngain Dios!

¹⁰ Are Jesús joixinhí ciudad de Jerusalén, cainxin chojni que tte nttiha çatte na ngain ixin anto ché na, co tsje na joanchiangui na co ndaço na:

—¿Quensen jihi?

¹¹ Co icha chojni ndaço na:

—Jihi tti profeta que dinhi Jesús, tti joixin de ngain rajna Nazaret ngain nonttehe Galilea.

Jesús joincheroa nihngo icha importante

(Mr. 11.15-19; Lc. 19.45-48; Jn. 2.13-22)

¹² Después Jesús joixinhi patioe nihngo icha importante para ixin Dios, co nttiha vengui cain chojni que tettehna co tenchechi. Conjamangui cain mesé tti chojni que tedasinguix-inhi icha chojni tomi para rrochondaxin na suelto, co conjamangui nntaxintaoen cain nitenchechi contoanajni.

¹³ Co ndaço ngain na:

—Ngain tti jitaxin Palabré Dios jindaço: “Nchiania sehe nchia para sincheoanxinna na janha”, pero jaha ra ndadinchechjian ra nchia ná lugar tti xatte xichehe.

¹⁴ Co nttiha ngain nihngo mé canxion tti chejo co canxion tti rrengo conchienne na ngain Jesús, co Jesús joinchexingamehe cain chojni mé.

¹⁵ Pero xidána que vaquetonha ngain cain icha xidána co ximaestroe ley Israel are vintteguicon xa cain milagro que jehe Jesús jinchehe co are vinttequinhi xa quexén cain chjan ngaxinhi nihngo ndaço xan sén: “¡Gloria para ixin xí jili ixin jehe xa razé rey David co chonda xa joachaxin que vechonda rey David!” Are vinttequinhi xa yá vinttegoñao xa

¹⁶ co vinttendaço xa ngain Jesús:

—¿Arrittinhi tti tendaço chjan taha?

Co Jesús ndaço ngain xa:

—Ján, rrittian. Pero jaha ra çaña tsjeha ra ngain tti jitaxin Palabré Dios? Nttiha jitaxin de ixin jili ixin ndaço janhi:

Dios joincheoenhe cain chjan hasta xan nandá toncjilhi para nchesayehe xan jehe jian.

¹⁷ Cottimeja jehe xa nttiha vintteguittohe xa co Jesús sacjoixin de ngain ciudad de Jerusalén co sacjoi para ngain rajna Betania co nttiha vattoxin ttie mé.

Are Jesús nichja ngain nttahigo que xonhi ttochjoin jiyá

(Mr. 11.12-14, 20-26)

¹⁸ Ndoexin dacao are Jesús cjan para ngain Jerusalén iná, jehe venhe jintta.

¹⁹ Ngandehe nttiha mé Jesús vicon ná nttahigo co jehe conchienne ngain nnta, pero xonhi ttochjoin vittja ngain nnta, jehó qué nnta chonda nnta. Cottimeja Jesús ndaço ngain nnta:

—¡Xonhi tiempo jaha rrocjan sinchechjian ttochjoin!

Co ngain rato mé ndaxema nttahigo mé.

²⁰ Are chojni que vacao Jesús vicon na yá, vinttegoan na admirado, co joanchiangui na ngain Jesús co ndaço na:

—¿Quexén ndaxemanxin nttahigo yá anto daca?

²¹ Jesús ndaço ngain na:

—Atto seguro tti rrindattjo ra que si seguro ditticaon ra co xaxaonha ra que ixin çhoaha tsonhe, jeoha sinchehe ra jili, tti janha jointtaha ngain nttahigo yá, sino que jaha ra nchao rrondache ra jna jiha: “Sattjixin de yá co digaritsiahngui ndachaon”, co jamé tsonhe.

²² Co cain tti sanchia ra ngain Dios, co si ditticaon ra que sayehe ra, ján sayehe ra.

Tti joachaxin que chonda Jesús

(Mr. 11.27-33; Lc. 20.1-8)

²³ Cottimeja Jesús joixinhi ngaxinhi tti nihngo icha importante, co are jehe jindache cain chojni nttiha de ixin Dios, conchienne ngain jehe canxion xidána que vaquetonha ngain cain icha xidána conixin icanxin xittetonha ngain nihngo mé, co vinttejanchiangui xa ngain Jesús co ndaço xa:

—¿Quehe joachaxin chonda jaha para nchehe cain cosa jili? ¿Quensen chjá joachaxin jili?

²⁴ Jesús ndaço ngain xa:

—Janha cai sanchianguiha ra ná cosa jaha ra, co si jaha ra rrondachjenji ni ra tti janha sanchianguiha ra, cottimeja janha rrondattjo ra quexehe joachaxin nttaxin janha cain cosa jili.

²⁵ ¿Quensen rroanha Juan para joincheguite chojni? ¿A Dios, o ani chojni?

Cottimeja coexinhi xa joanchianguihi chó xa co ndaço xa:

—Si rrondaço na que Dios tti rroanha Juan, xí jili nchao rrondattjo na xa: “¿Quedonda vitticaonha ra remé?”

²⁶ Co si rrondaço na que chojni tti rroanha Juan, pero ján na xagoen na chojni ixin cainxin chojni ditticaon na que Juan vanichja joajna que vagayé de ngain Dios.

²⁷ Co mexinxin vinttendaçoxin xa ngain Jesús:

—Nonaha na.

Cottimeja Jesús ndaço ngain xa:

—Mexinxin ni janha rrondattjoha ra cai quexehe joachaxin nttaxin janha cain cosa jili.

Ejemploe tti yó xanxí

²⁸ Jesús ndaço ngain xa:

—¿Queñén ñaxaon ra de ixin ejemplo jiji? Ná xí vechonda xa yó xenhe xa xanxí, co ndache xa xansaho: “Ttji jai dinchehe ña ngain nttauva.”

²⁹ Co jehe xan ndaño xan: “Rinaoha tsji.” Pero después ñaxaon xan ojé co ján, cjoí xan joinchehe xan ña.

³⁰ Cottimeja tti xí mé joitsjehe xanyoxin co ndaño xa ñajeho ngain xan mé, co xan mé ndaño xan: “Ján tsji.” Pero jehe xan cjoíha xan.

³¹ ¿Quexehe de cayoi xan joinchehe xan inchin joinao ndodé xan?

Jehe xa vinttendaño xa:

—Xansaho.

Cottimeja Jesús ndaño ngain xa:

—Atto seguro tti rrindatjo ra, que cain xicobrador de impuesto, co cain nñhí que vanchecji cuerpoe ngain icha xí, nimé ni icha saho rrochonda parte ngain tti ttetonha Dios que jaha ra.

³² Ixin Juan, tti vancheguite chojni, jehe joí para joindattjo ra queñén chonda ra que sintte ra ngain vidá ra, co jaha ra vitticaonha ra tti ndaño jehe Juan. Pero xicobrador de impuesto co nñhí que vanchecji cuerpoe ngain icha xí, cain nimé vitticaon na tti ndaño Juan. Pero jaha ra masqui vicon ra jamé, coentoxinha ra vidá ra para rroguitticaon ra tti ndaño Juan.

Ejemploe ninchehe xa jianha
(Mr. 12.1-12; Lc. 20.9-19)

³³ Ttinhi ra iná ejemplo jiji: Ná tti vechonda jie jngui ngoixin jngui cjoenga nttauva co ngoixin jngui coendanji cerco, co joinchechjian ná tanque tti vagueninxin na ttouva, co joinchechjian ná torre para siconxin tti senda ngoixin jngui de nttattochjoin mé.

‘Cottimeja tti xí mé joanjo xa nttattochjoin media ngain canxion tti nchehe ña co jehe xa sacjoi xa cjin.

³⁴ Co are ojojí tiempo de cosecha, jehe xí mé rroanha xa canxion ninchehe xé xa ngain tti nicoá nttattochjoin media para joiganchia na tti parte de cosecha que jiquininxin sayé xinajni mé.

³⁵ Pero jehe tti nicoá nttattochjoin media tse na jehe tti ninchehe xé xinajni mé; ná coaxin na nttá, ná nagoenxon na, co iná coaxin na ño.

³⁶ Jehe xinajni mé cjan rroanha icha tsje ninchehe xé iná para joiganchia na tti parte de cosecha que jiquininxin sayé xinajni. Pero jehe tti nicoá nttattochjoin mé media, cjoaya na iná, co joinchehe na ñajeho inchin joinchehe na ngain tti nicjoi icha saho.

³⁷ Ultimo jehe xinajni mé rroanha xenhe xanxí, ixin jehe ñaxaon: “Chonda na que sicao na respeto ngain xanhna.”

³⁸ Pero are vicon tti nicoá nttattochjoin media que joiji xenhe jehe xinajni, jehe na ndache chó na: “Jihi tti sayé ngoi nontte jiji de nttattochjoin. Nasoenxon na jehe para que ján na sittoá na ngoixin jngui de nttattochjoin.”

³⁹ Co jamé joinchehe na; tse na xan, joantsjegaxin na xan de ngain nttattochjoin mé co nagoenxon na xan.

⁴⁰ Cottimeja Jesús joanchiangui ngain xa co ndaño:

—Are tsí tti jnguihí mé, ¿quehe sinchehe ngain tti nicoá nttattochjoin mé media?

⁴¹ Jehe xa vinttendaño xa:

—Jehe xinajni mé sincheniha xa para nasoenxon xa cain tti nchehe ña jianha que cóa nttattochjoin media co jehe sanjo nttattochjoin media ngain ojé chojni, que sanjo na ngain jian tiempo tti parte de cosecha que jiquininxin sayé xinajni.

⁴² Cottimeja Jesús ndaño ngain xa:

—¿Añonhi tiempo tsjehe ra jaha ra tti jitaxin Palabréd Dios? Ndaño janhi:

Tti ño que joinchegondaha xittette nchia, pero ño mé tti ño joiguehe esquiné nchia.

Co jiji joinchehe Dios,

co para ixin ján na cosa jiji anto çhjoin.

⁴³ Mexinxin janha ndattjo ra que jaha ra sañjaha ra parte ngain tti ttetonha Dios, co sayé tti chojni que sinchehe inchin jiquininxin ngain tti ttetonha Dios.

⁴⁴ Co para tti ño que rrindattjo ra, quexeho chojni que tsonntenguixin ño jiji, tsonchjian pedazo cuerpoe na. Co si ño jiji setsinga ño ngataha quexeho chojni, rrocjan cuerpoe chojni mé polvo.

⁴⁵ Are cain xidána que vaquetonha ngain icha xidána co cain xifariseo vinttequinhi xa cain ejemplo que ndaño Jesús, coinxin xa que ixin jinichja de ixin jehe xa.

⁴⁶ Mexinxin joinao xa are mé rrotse xa Jesús, pero ña joincheha xa ixin ñagoen xa chojni que te nttiha ixin cain chojni vaguitticaon na que Jesús vanichja palabréd Dios.

22

Ejemplo tti quiai are tottehe na

¹ Jesús coexinhi nda'cho iná ngain na de ixin ejemplo, co nda'cho:

²—Tti tettonha Dios ngajni, mé inchin joinchehe ná rey que coín ná vandango are cottehe xitsihi.

³ Jehe rey mé coetonhe cain xinchehe xé para joidache xa cain chojni que ovintteinvitado para sijine na ngain vandango mé, pero cain chojni mé 'choha na cjoí na.

⁴ Jehe rey mé cjan rroanha icha ninchehe xé, co nda'cho ngain na: “Ndache ra cain chojni que ote invitado que otsí na sine na ixin onchao jí comida. Ndache ra na ixin janha ocoetonha para venhe coxinttaha co cain coxigo que janha jointtanttao, co cainxin onchao jí. Ndache ra na que tsí na ngain vandango jiji.”

⁵ Pero cain tti chojni que ovintte invitado 'choha na cjoí na. Ná de jehe na sacjoi na ngataon jnguihi na, co iná na ngain negocioe na,

⁶ co icanxin na tse na jehe ninchehe xé rey mé, co feo joinchehe na ngain na hasta nagoenxon na na.

⁷ Cottimeja rey mé anto coña, co rroanha cain xisoldadoe para nagoenxon xa cain jehe tti chojni que cjoaya co cjoaga xa rajné na.

⁸ Cottimeja nda'cho rey mé ngain ninchehe xé: “Vandango onchao jí, pero cain chojni que jointtainvitá rrojine na tequininxinha na para rroquí na.

⁹ Jai tji ngain cain nttiha yeye co ndache ra cain chojni que setan ra que tsí na sine na.”

¹⁰ Cain ninchehe xé rey mé vachje na ngain cain nttiha, co joatse na cain chojni que vetan na, tti jian co tti jianha; co jamé hasta caon nchia mé de chojni.

¹¹ Cottimeja jehe rey mé joixinhi para joitsjehe cain chojni que tejine, co jehe vicon nttiha ná xí, pero diguioxinha xa inchin ná chojni que tji ngain ná vandango.

¹² Jehe rey nda'cho ngain tti xí mé: “Amigo, ¿quedonda joixinxin jaha nttihi que ditoxinha para ngain vandango jiji?” Pero jehe tti mé tencoa.

¹³ Cottimeja rey mé nda'cho ngain tti nitedayá láto ngain mesa: “Ttia ra xí yá de rotté xa co de rá xa co diganca ra xa ndoja ngain tti naxin xehe tti rrotsjanga xa co sinetaon neno xa.”

¹⁴ Ixin janha nichjá anto tsje chojni, pero cainxinha na rinao na na janha.

Tti rroxenga hna ngain impuesto

(Mr. 12.13-17; Lc. 20.20-26)

¹⁵ Cottimeja xifariseo savintteci xa, co vinttecjao chó xa quexén sinchehe xa para sinchenichja xa Jesús ná cosa nchaoha para mé tsjanguixin xa Jesús.

¹⁶ Mexinxin rroanha xa canxion chojni xa, conixin canxion chojni Herodes para joida'cho na ngain Jesús:

—Maestro, janha na nona na que soixin nda'cho tti ndoa, co soixin ndoa ncheoenhe chojni de ixin Dios, co ncheha caso tti nichja icha chojni ixin soixin ncheha juzgado chojni rico ojé que chojni noa.

¹⁷ Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

¹⁸ Pero Jesús oconohe de tti jianha que jehe xa te'axaon xa de ixin jehe, co jehe nda'cho ngain xa:

—¡Jaha ra xo ncheha ra tti nda'cho ra! ¿Quedonda rinao ra sincheyana ra?

¹⁹ Tjagohna ra ná tomi que ttjengaxin ra hna impuesto.

Co jehe na cjoagoe na Jesús ná tomi de plata que vanchegonda chojni tiempo mé.

²⁰ Are vicon Jesús tomi mé joanchiangui ngain na co nda'cho:

—¿Quensen con jinganito jiji, co quensen nombré jitaxin jiji?

²¹ Jehe xa vinttenda'cho xa:

—Con xiemperador co nombré xa.

Cottimeja Jesús nda'cho ngain xa:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

²² Are vinttequinhi xa jiji, jehe xa vinttegoan xa admirado; co nttiha cointtohe xa Jesús co jehe xa savintteci xa.

Canxion chojni joanchiangui quexén tti rroxechon ni

(Mr. 12.18-27; Lc. 20.27-40)

²³ Ngain nchanho mé canxion xisaduceo cjoí xa para joitsjehe xa Jesús. Xisaduceo vaguitticaon xa que chojni que ndadenhe irroxechonha na; mexinxin joanchiangui xa ngain Jesús co nda'cho xa:

²⁴ —Maestro, ley que vayé Moisés jitaxin que si ná xí que jicao xa çhihi xa ndasenhe xa co çonhi chjan tsinttohe xa, chonda que ná xanchó xa xanxí secáo nçhiganha mé co rrochonda na chjan para que chjan mé sehe xan inchin xenhe tti ndavenhe.

²⁵ Ntthi ngayehna janha na vintte yáto xanxí, cain xanchó xan. Xansaho vecáo xan çhihi xan pero ndavenhe xan, co ixin çonhi chjan cointtohe xan, nçhiganha mé vecáo nça xanchó tti ndavenhe, xanyoxin.

²⁶ Çajeho jamé conhe ngain xanyoxin cai, co después vecáo nça xanninxin, pero çajeho jamé conhe, co hasta vecáo nça tti xanyatoxin co çonhi chjan joichonda nça.

²⁷ Co después de cain mé, cai jehe nça ndavenhe nça.

²⁸ Mexinxin ndachjenji ni ra, are rroxechon cain ni yá, çquexehe de tti yáto xanchó mé sehe mero xixihi jehe nçhí mé ixin cain xan vinttecao xan çajeho nçhí mé?

²⁹ Jesús ndaço:

—Jaha ra noaha ra quehe tendaçho ra ixin noaha ra tti jitaxin ngain Palabré Dios, ni noaha ra tti joachaxin que chonda Dios.

³⁰ Ixin cain chojni que ondavenhe, are rroxechon na, isinttecaocho chó na de xí co ni de nçhí, ixin are mé sintte na inchin cain ángel de Dios que te ngajni.

³¹ Pero de tti jaha ra danchiangui na ra de ixin tti chojni que ndadenhe, çatsjeha jaha ra tti jindattjo ra Dios mismo? Jehe dindaço janhi:

³² “Janha tti Dios de Abraham co Isaac co Jacob.” Dios jeha Dios de tti nindadiguenhe, sino que Dios de chojni que techon.

³³ Cain chojni que te ntthi, are vinttequinhi na yá, cain na vinttegoan na admirado de ixin tti nichja Jesús.

Tti icha importante que ttetonha Dios

(Mr. 12.28-34)

³⁴ Are xifariseo conohe xa que Jesús ndajoinchetencao xisaduceo, jehe xifariseo çatte xa ngain Jesús.

³⁵ Co ná de jehe xa que vehe xa maestroe ley Israel joinao xa rrojinchenichja xa Jesús ná cosa nçhaoa; mexinxin joanchiangui xa ngain Jesús co ndaço xa:

³⁶ —Maestro, çquexehe tti icha importante que ttetonha Dios sinchehe ni?

³⁷ Jesús ndaço:

—“Rinao Dios, ngain ansean, conixin ngain almá, conixin ngain joarrixaoan.”

³⁸ Jihi tti icha importante, co tti saho que ttetonha Dios sinchehe ni.

³⁹ Co tti yoxin chiaon çajeho ixin ndaço: “Rinao cain chojni inchin rinao cuerpoa.”

⁴⁰ Jehe cayoi cosa yá tti icha importante de ngain ley que vayé Moisés co de cain tti ndaço cain profeté Dios.

Tti dindaço David de ixin Jesucristo

(Mr. 12.35-37; Lc. 20.41-44)

⁴¹ Are cain xifariseo çate xa ntthi,

⁴² Jesús joanchiangui ngain xa co ndaço:

—Çquehe çaxaon ra de ixin Cristo? Çquensen mé?

Jehe xa vinttendaço xa:

—Mé tsixin de ngain razé rey David.

⁴³ Cottimeja ndaço Jesús:

—Mexinxin çquedonda Espiritu Santo joinchenichja David, co David joincheguinhi Cristo, soixin? Ixin David dindaço:

⁴⁴ Tti Ttetonha cainxin cosa ndaço ngain tti Ttetonna janha:

“Darihi ngain lado jian na

hasta que janha sinttagacha jaha de ngain cain tti ningaonha.”

⁴⁵ Mexinxin, çquexén que Cristo jehe ná xanntí David si jehe David mismo ndaço que Cristo tti ttetonha ngain jehe?

⁴⁶ Co ni ná xa ixonhi ndaço xa ngain Jesús, co desde ngain nçanho mé ni ná xa ixonhi joanchianguihi xa Jesús.

23

Jesús joinchesattehe xifariseo co ximaestroe ley

(Mr. 12.38-40; Lc. 11.37-54; 20.45-47)

¹ Cottimeja Jesús ndaço ngain cain chojni que te ntthi co ngain chojni que vacao:

² —Cain ximaestroe ley Israel co cain xifariseo chonda xa joachaxin de nchecoehne xa chojni cain tti coetonha ley que vayé Moisés.

³ Mexinxin jaha ra ditticaoon ra co nchehe ra cain tti rrondattjo ra xa, pero ncheha ra inchin jehe xa tenchehe xa ixin jehe xa dinttendaço xa ná cosa co dinttenchehe xa ojé.

⁴ Ndache xa chojni que sinchehe na tti anto tangui que jehe xa ttetonha xa, que ni jehe xa choha ni rinaoha xa nchehe xa cain mé.

⁵ Jehe xa nchehe xa cosa jian pero jeha para que icha chojni dicon, co para xaxaon na que jehe xa anto jian xa. Co jehe xa ttianito xa nttattjen xa co rá xa cajachjan de roa tti jingá rioho xón que jitaxin canxion parte de Palabré Dios, co dintténgá xa lontto icha jinjini que icha chojni.

⁶ Co anto ncheoxoxinhi xa ttji xa ngain vandango co dintte xa ngain tti lugar icha importante. Co are dinttecji xa ngain nihngo dintte xa ngain ntaxintaon icha importante.

⁷ Co are rridintte xa ngain nnttiha, rinao xa que chojni sanjo na joajna ngain xa conixin anto tsje respeto, co sinchequinhi na xa maestro.

⁸ Pero jaha ra dittoaxinha ra que chojni sinttaguinhi ra na maestro, ixin cain jaha ra inchin chó ra cainxin ra co chonda ra jeha nacoaxinxon Maestro, que mé Cristo.

⁹ Co nntihi ngataha nontte ni ná chojni nchequinha ra padre, ixin chonda ra jeha nacoaxinxon Ndodá ra que ttjen ngajni.

¹⁰ Ni dittoaxinha ra que chojni rronhattjo ra na ixin jaha ra anto importante ra ixin Cristo jeha mé tti icha importante para ixin jaha ra.

¹¹ Tti chojni que ttjenguijna icha chojni, mé tti icha importante de cain jaha ra.

¹² Ixin tti chojni que tonohé ixin jehe tti anto importante, mé settixin nttajochjihi nganji ra co tti chojni que jai tonohé que jehe jeha importante, chojni mé tti sehe icha importante.

¹³ ¡Pobre de jaha ra, ximaestroé ley co jaha ra chojni fariseo, xo ncheha ra tti ndaço ra! Ixin jaha ra tecayacoenhe ra chojni para que jehe na choha rrochonda na parte ngain tti ttetonha Dios que ttjen ngajni. Ni jaha ra mismo rinaoha ra rrochonda na parte ngain tti ttetonha Dios, ni tanchjandaha ra icha chojni para rrochonda na parte nntiha.

¹⁴ ¡Pobre de jaha ra, ximaestroé ley co jaha ra chojni fariseo, xo ncheha ra tti ndaço ra! Ixin jaha ra dantsjehe ra nchiandoha nchiganha ixin ittixinha ncha ttjenga ncha hna contribución, cottimeja para que xonhi chojni rroxaxaon tti jaha ra tenchehe ra, anto sé ncheoanxinhi ra Dios. Mexinxin jaha ra sayehe ra icha jie castigo que icha chojni.

¹⁵ ¡Pobre de jaha ra, xo tenchecanttjen ra chojni fariseo, xo ncheha ra tti ndaço ra! Ixin jaha ra anto ttingaria ra para que ttjé ra chojni que sitticaon xajeha inchin jaha ra co are odinchí ra chojni mé, masqui jeha nacoa, jaha ra nchenchehe ra chojni mé cosa que jiquininxinha para que jehe icha jiquininxin tsji ngain infierno que jaha ra mismo.

¹⁶ ¡Pobre de jaha ra, xo tenchecanttjen ra icha chojni que noeha. Ixin ndaço ra que are ná chojni ndaço sinchehe ná cosa, co sinchejurá de ixin ningoe Dios, juramento mé xonhi xé; pero si sinchejurá de ixin tti oro que jixinhi nihngo, juramento mé nchoe jian.

¹⁷ ¡Jaha ra tonto ra co chejo ra! ¿Quexehé tti icha importante, aoro o nihngo que jinchejian oro mé?

¹⁸ Co cai ndaço ra que are ná chojni ndaço sinchehe ná cosa, co sinchejurá de ixin altar que jixinhi nihngo, juramento mé xonhi xé; pero si sinchejurá de ixin cain tti jí ngataha altar, juramento mé ján jian.

¹⁹ ¡Jaha ra tonto ra co chejo ra! ¿Quexehé tti icha importante, a tti jí ngataha altar o jehe altar que jinchejian cain cosa mé?

²⁰ Ixin tti chojni que nchejurá de ixin altar, chojni mé jinchejurahe de ixin jeha altar, sino que de ixin cain cosa que jí ngataha.

²¹ Co tti chojni que nchejurá de ixin nihngo, chojni mé jinchejurahe de ixin jeha nihngo, sino que cai de ixin Dios que jí ngaxinhi nntiha.

²² Cai tti chojni que nchejurá de ixin ngajni, chojni mé cai jinchejurá de ixin tti jitaha Dios co cai de ixin jehe Dios mismo, ixin jehe tti jí nntiha.

²³ ¡Pobre de jaha ra, ximaestroé ley co jaha ra chojni fariseo, xo ncheha ra tti ndaço ra! Jaha ra danjo ra para ixin Dios tti ttexin parte de ca inchin cañanchoni, co de anís, co de comino, pero ncheha ra tti icha importante de cain tti coetonha Dios, inchin de tti sinchehe ra jian ngain vidá ra, co tti tsiaconoehé ra icha chojni, co tti sitticaon ra jian de ixin Dios. Cain yá tti chonda ra que sinchehe ra cain nchanho, co cai nchehe ra sigue danjo ra tti ttexin parte de ca mé.

²⁴ ¡Jaha ra tenchecanttjen ra icha chojni que noeha! ¡Jaha ra nchecanguinhi ra ná coxisenchjan de ngain vasoa ra pero dinga ra nchejo ná cocamello!

²⁵ ¡Pobre de jaha ra, ximaestroé ley co jaha ra chojni fariseo, xo ncheha ra tti ndaço ra! Jaha ra inchin vaso co láto que chojni ncheroa de ngama, pero de ngaxinhi ansean ra anto ttjoaha ra ixin xa teca ra de cain cosa que diquehe ra co de puro rinao ra que jaha ra rrochonda ra cainxin cosa.

²⁶ Jaha ra xo fariseo chejo. Saho ncheroa ra ansean ra co jamé cai tsoroa ngama ra, inchin nchehe ra ngain vaso co láto.

²⁷ ‘Pobre de jaha ra, ximaestroey ley co jaha ra chojni fariseo, xo ncheha ra tti ndaço ra! Ixin jaha ra inchin cueva tti texinhi cuerpoe chojni que ndadiguenhe ixin cueva mé çhjoin te ixin diguingaxin nttésó ndojaxin, pero ngaxinxin tecaon de loroe chojni co cain cosa que ttjoaha.

²⁸ Jamé te ra jaha ra; de ndojaxin xago ra ixin jian ra ngain chojni, pero de ngaxinhi ansean ra tecaon ra de cosa jianha.

²⁹ ‘Pobre de jaha ra ximaestroey ley co jaha ra chojni fariseo, xo ncheha ra tti ndaço ra! Ixin jaha ra nchechjian ra monumento anto çhjoin ngataha tti texavá cuerpoe cain profeta que ndavenhe are saho co nchetsonji ra monumentoe cain tti chojni que cjoí jian.

³⁰ Cottimeja ndaço ra: “Si janha na rroguinttechon na ngain tti tiempo que vinttechon nindogoelitoa na xanchjen, janha na rrocjenguijnaha na na para narrogoenxon na cain profeta que goen jehe na.”

³¹ Conixin yá jaha ra mismo datsoan ra que jaha ra xanntí tti chojni que nagoenxon cain profeta que venhe.

³² ¡janché jaha ra nchejexin ra tti coexinxin joinchehe nindogoelitoa ra xanchjen!

³³ ‘Jaha ra te ra inchin conché, co inchin razé conché ra! Jaha ra chonda ra que tsji ra ngain infierno.

³⁴ Mexinxin janha rrorroanha profeta nganji ra, co xí que Espíritu Santo joinchenohe, co xí que sinttacoanha ra de ixin Dios. Pero jaha ra nasoenxon ra na co sinchecrucificá ra canxion na co icanxin na rroçanguihí ra na nttá o tton ngaxinhi nihngo, co rrorroehe ra na de rajna co rajna ngoi tti jehe na sacji na para feo sinchehe ra ngain na.

³⁵ Mexinxin jaha ra tti teca ra vidé cainxin chojni jian que vintteguenhe, desde Abel, tti cjoí xí jian para ngain Dios, hasta Zacarías, xenhe Berequías tti nindogoelitoa ra nagoenxon na ngain lugar entre nihngo co altar.

³⁶ Atto seguro tti janha rrindattjo ra, que cain chojni judío que techon jai, nijihí, niteca cain yá.

Jesús tsjanga por ixin Jerusalén

(Lc. 13.34-35)

³⁷ Cottimeja ndaço Jesús iná:

—¡Chojni de Jerusalén, jaha ra que nadoenxon ra profeté Dios co xanguihí ra xo tti chojni que ttiaho joajna que Dios rroanha nganji ra; anto tsje nttiha janha joinaho rrogatse ra inchin ná cochia datse va xenhe va nganguihi nenehe va, pero jaha ra joinaoha ra!

³⁸ Tsjexin ra; nchiandoi ra ndasittohe nchia jeho nchia,

³⁹ ixin janha rrindattjo ra que irrocjanha ra sicon ni ra janha hasta que tsija tti tiempo que jaha ra rrondaço ra: “Anto jian tti joí de ngain nombré Dios.”

24

Jesús ndaço que nihngo icha importante rroxantte

(Mr. 13.1-2; Lc. 21.5-6)

¹ Jesús vaçhjexin de nihngo icha importante co sajittji are chojni que vacao conchiennehe na ngain co ndaço na ixin rrotsjehe Jesús ngoixin nihngo mé.

² Pero Jesús ndaço ngain na:

—¿Adicon jaha ra cain yá? Atto seguro tti rrindattjo ra que yá sittoeha ni ná xo ngataha iná xo; cainxin rroxantte.

Quehe tsonhe icha saho que mundo ndatsjexin

(Mr. 13.3-23; Lc. 21.7-24; 17.22-24)

³ Cottimeja savintteçji na ngain tti jnanchjan que dinhi Nttaolivo, co are Jesús tavehe nttiha, chojni que vacao conchiennehe na co joindaço na ngain jimaó:

—Rinaho na que rrondachjenji ni ra quesa tsonhe yá, ¿Quehe señal rroçago are soixin rrocjan sihi iná, co are ondatsjexin mundo jihí?

⁴ Cottimeja Jesús ndaço ngain na:

—Ttjihí ra cuidado que xonhi chojni sinttayaha ra.

⁵ Ixin atto tsje chojni tsí co sinchegonda na nombrena rrondaço na: “Janha tti Cristo na”; co sincheyehe na tsje chojni.

⁶ Jaha ra tsinhi ra que sehe guerra nttihi co ngain icha lugar, pero xaonha ra ixin jamé chonda que tsonhe; pero xa jaha tti nchanho que ndatsjexin mundo.

⁷ Ixin ná nación tsetocaho iná nación, co ná región tsetocaho iná región. Co ngain tsje parte de nontte sehe jintta, co chin, co tsingui nontte.

⁸ Cain yá nandá tsexinxin tsonhe tti anto tangui que tsonhe chojni.

⁹ 'Cottimeja sinttachienhe ra na jaha ra ngain chojni que ningaconha ra para feo sinchehe na nganji ra, co nasoenxon na jaha ra, co ngoixin mundo rroningaconha ra chojni ixin ditticaon ni ra janha.

¹⁰ Ngain tiempo mé tsje chojni isincheha na sigue sitticaon na nganji na janha co rroningaconhe chó na co jeha na sinchechienhe chó na ngain tti ningaconna janha.

¹¹ Are mé tsononxin tsje tti rronichja cosa ndoaha, co jeha na rrondačo na que jeha na tenichja na joajné Dios, co sincheyehe na tsje chojni.

¹² Co anto tsje cosa jianha sehe, que hasta tsje chojni isinaoha chó na.

¹³ Pero tti chojni que sinchehe sigue sitticaon na janha hasta ndasenhe, chojni mé rrochonda iná vida nroaxin.

¹⁴ Co tti jian joajna de que^{xén} ttetonha Dios, jiji tsonohe chojni ngoixin mundo para que chojni ngain cainxin nación tsonohe na tti jian joajna jiji. Are tsjexin cain yá, cottimeja ndasitján mundo jiji.

¹⁵ Profeta Daniel diquentaxin de ixin tti cosa que icha jianha de cainxin cosa. Co are jaha ra sicon ra que cosa mé siguehe ngain tti lugar santo de ngain nihngo icha importante, (tti tsjehe xón jiji chonda que tsinxin),

¹⁶ cottimeja tti chojni que te Judea rrochonda na que satsinga na ngagaha jna.

¹⁷ Co tti sintte ngataha techoe nchiandoha, are jeha sania, rrochjeha tiempo para sicao cosé de ngaxinhi nchia ixin anto daca satsinga.

¹⁸ Co tti sintte ngataon jngui, chondaha que rrocjan ni para sirroé lonttoe ngain nchiandoha.

¹⁹ ¡Pobre de cain nchí que sintteyá chjan co cain nchí que rrochonda chjan que tetai ngain nchanho mé!

²⁰ Nchetsenhe ra ñao Dios que jaha ra rrochondaha ra que satsinga ra mero ngain tiempoe quín, ni ngain tti nchanho que nchejogaha ni,

²¹ Ixin are mé anto tangui tsonhe, que xa xonhi tiempo tonhe jamé ni desde are coexinhi vehe nontte jiji, ni tsonhe después.

²² Co si Dios rrojinchenchinha tiempo mé, xonhi chojni rroxeha, pero Dios sinchenchín tiempo mé ixin jeha anto rinao cain tti chojni que jeha coinchiehe.

²³ 'Si are mé chonja chojni rronhattjo ra: "Ntthi jí Cristo", o "Nojiha jí", jaha ra ditticaonha ra.

²⁴ Ixin are mé tsí tsje chojni que sincheyehe tsje chojni ixin rrondačo na que jeha na ni Cristo co tsí chojni que rrondačo ixin jeha na dayé na joajné Dios. Co sinchehe na tsje señal co milagro para sincheyexin na tsje chojni, co si nchao hasta tti chojni que Dios mismo coinchiehe sincheyehe na.

²⁵ Janha ondattjo ra cain yá desde jaxon.

²⁶ Mexinxin si rronhattjo ra na: "Cristo cjan jói co jeha jí ngagaha jna tti xonhi chojni jí", jaha ra tjiha ra ditsjehe ra nttiha, o si rronhattjo ra na: "Cristo nttihi jí ngaxinhi ná cuarto", jaha ra ditticaonha ra.

²⁷ Ixin janha, tti Xí que joixin de ngajni, are sihi iná, janha tsononxin na inchin are tongúxin anto daca dattoa xohi ngajni desde tti chinxin nchanho hasta tti diataonxin nchanho.

²⁸ Co tti sarihi janha, nttiha rroxatte cain chojnina.

Quexén tsi tti Xí que joixin de ngajni

(Mr. 13.24-37; Lc. 21.25-33; 17.26-30, 34-36)

²⁹ Ntthi tsjexin satto cain tti nchanho que anto tangui mé, cottimeja nchanho isinchen-gasanha nchaon, co conittjao co conotse sinttjixin va de ngajni, co hasta cainxin cosa que jí ngajni, rroxanga.

³⁰ Cottimeja sicononxin ngajni señal de janha, tti Xí que joixin de ngajni, co ngain cainxin rajna de ngoixin mundo rrotsjanga chojni, co sicon na na janha, tti Xí que joixin de ngajni, sihi are mé ngacjan ttjoi de ngajni conixin anto tsje joachaxin co gloria.

³¹ Co janha rrorroanha cain angelna para que are tsoyao trompeta, jeha satse cainxin chojni que janha coinchiá de cainxin parte de ngoixin mundo.

³² Tangui ra ejemploe ntaahigo: Are xesan ramé nnta co chinhi qué nnta, jaha ra onoha ra que ojoiconchian tiempoe chin.

³³ Xajeho jamé cai, are jaha ra sicon ra que cain cosa yá tsexinhi tsonhe, jaha ra onoha ra que janha ochiaon rrocjan na sihi iná.

³⁴ Atto seguro tti rrrindattjo ra que cain yá tsonhe icha saho que generación jiji sitján.

³⁵ Ngajni co nontte ndasitján, pero tti janha ndachjan sitjanha ixin chonda que tsonhe cain tti ndachjan.

³⁶ Pero nchanho co hora que tsonhe mé, ni ná chojni noeha, ni cain ángel que te ngajni, ni janha tti Xenhe Dios nonaha. Jeho Dios Ndodá na tti nohe quesa co quehe hora.

³⁷ Jañá inchin conhe ngain tiempoe Noé cai jamé tsonhe are sihi janha, tti Xí que joixin de ngajni.

³⁸ Ngain tiempo mé are icha saho que vitjanxin na jinda, cain chojni vanchehe sigue vanchehe na inchin costumbré na; vajine na co vaguihi na, vacottehe na co vaganjo na nchichehe na para vacottehe ncha. Jañá hasta ngain tti nchanho que Noé joixinhi para ngaxinhi tti arca que jehe joinchechjian.

³⁹ Co coinxinha na que ixin ndarroguitján mundo hasta que joí jinda co ndagoen cainxin na. Jamé tsonhe cai are sihi janha, tti Xí que joixin de ngajni.

⁴⁰ Ngain rato mé si yó xí tenchehe xa ngataon jngui, ná rrochonda iná vida nroaxin co ná nahi.

⁴¹ Co si yó nchí tedaho, ná ncha sayá ncha co iná ncha nahi.

⁴² Jaha ra cain nchanho dintte ra listo ixin noaha ra quesa sihi janha tti chonda cain joachaxin.

⁴³ Pero tttetixin ñao ra jihi, que si xinajní ná nchia rroconohe xa quehe hora rroquí xichehe are ttie, xinajni rroquejoaha xa; jehe xa rroguenda xa nchiandoha xa para rrocanchjandaha xa xichehe rroguixinhi xa rroqué xa.

⁴⁴ Mexinxin jaha ra cai dintte ra listo ixin noaha ra quesa janha, tti Xí que joixin de ngajni, sihi iná.

Ná tti nchehe xa jian co ná tti nchehe xa jianha

(Lc. 12.41-48)

⁴⁵ Tti nchehe xa que ditticaon nchehe cain tti ditonhe co chonxin tti jian; xinajni chonda xa confianza ngain chojni mé para que jehe dittoehe icha ninchehe xé xa para danjo jine na hora que denhe na jintta.

⁴⁶ Anto chjoin para ixin jehe tti nchehe xa si jehe jinchehe cain tti vitonhe are tsí xinajní.

⁴⁷ Atto seguro tti rrindattjo ra, que xinajní rrochjé xa joachaxin para que jehe senda cainxin cosa que jehe xa chonda xa.

⁴⁸ Pero si tti nchehe xa mé jianha, co rrořaxaon que xinajní tsiha xa toin,

⁴⁹ co si jehe tsexinhi sinchesattehe icha ninchehe xé xa, co sehe sinecaho co sicaho cain tti dicoan,

⁵⁰ pero cottimeja xinajní tsí xa ngain ná nchanho que ni jehe rrořaxaonha, co ngain ná hora que ni jehe noeha.

⁵¹ Co rrochjé xa ná castigo anto tangui, que řajeho inchin castigo que sayé cain chojni que ncheha na tti jehe na ndačo na. Cottimeja nttiha jehe rrotsjanga co sinetaon neno.

25

Ejemploe tti tte xannchí

¹ Cai ndačo Jesús:

—Jihi ná ejemploe queřen ttetonha Dios que ttjen ngajni. Mé inchin ná xanxí que tsoettehe. Co tte xannchí vintteji xan ngain vandango mé co joicao xan lámpara de aceite para joichoexin xan xinovio ngatja nttiha.

² Naho de jehe xan lista xan co naho xan řaxaonha xan jian.

³ Tti xan řaxaonha jian joicaoha xan icha aceite para rroquequia xan lamparé xan iná.

⁴ Co tti xan lista joicao xan icanxin řořao de aciete aparte de lamparé xan.

⁵ Co ixin xinovio dacaha joí xa, cain xannchí mé tse xan cottačhin co tavinttejoa xan.

⁶ Cottimeja inchin ngosine ttie, coinhi xan coyao ná tti ndačo: “¡Ojo! xinovio, dačhe ra dichoexin ra xa ngatja nttiha!”

⁷ Cain xannchí mé vintteguingattjen xan, para vinttenchegacaon xan lamparé xan.

⁸ Cottimeja tti xan naho que řaxaonha jian vinttendačo xan ngain tti xan naho que vintte lista: “Chjana ni ra nchion aceite ixin lamparana na ndatedanga lampara.”

⁹ Pero tti xan naho que vintte lista vinttendačo xan: “Nahi, ixin sittjaha aceite para ixin janha na co jaha ra. Icha jian ttji ra tti tochji aceite, co nttiha ttehna ra aceite para ixin jaha ra.”

¹⁰ Pero are tti naho xannchí mé joiqehna xan aceite, xinovio ojoí xa. Co cain tti xannchí que tedacaon lamparé joixincaho xan xinovio ngaxinhi nchia tti jí vandango co coejé na puerta.

¹¹ Cottimeja vinttequí tti inaho xannchí co vinttendačo xan: “Nttatsanha ra ñao danttjena ni ra puerta.”

¹² Pero xinovio ndačo xa: “Chonxinha quensen jaha ra.”

¹³ Cottimeja Jesús ndačo:

—Dintte ra listo cain nchanho ixin noaha ra quesa ni quehe hora rrocjan na sihi janha, tti Xí que joixin de ngajni.

Ejemploe tomi

¹⁴ 'Jihi iná ejemploe quexén ttetonha Dios que ttjen ngajni. Mé inchin na xinajni que sajittji para ngain iná nación. Pero icha saho que jehe xa sacjoi xa, vayé xa cain ninchehe xé xa co ndačo xa ngain na: "Nttihi cada ra tsinttoaha ra tomina."

¹⁵ 'Ngain ná de jehe na joanjo xa inchin naho mil de tomi mé, co ngain iná na joanjo xa inchin yó mil, co ngain iná na inchin ná mil. Cada na vayé na tomi inchin jehe na nohe na nchenchehe na tomi xa. Cottimeja jehe xinajni mé sacjoi xa cjin.

¹⁶ Tti nchehe xa que vayé tti naho mil de tomi mé, jehe joinchegonda tomi mé co joacha iná naho mil.

¹⁷ Co jamé joinchehe tti vayé tti yó mil, co joacha iná yó mil.

¹⁸ Pero tti vayé ná mil, mé ngue co cjoavá tomí xinajni.

¹⁹ 'Vatto tsje tiempo, cottimeja cjan xinajni cain ninchehe xa mé para joitse xa cuenta ngain na.

²⁰ Saho conchienne tti vayé naho mil, co joanjo iná naho mil, co ndačo ngain xa: "Chjana naho mil, co nttihi dayehe iná naho mil que joacha janha."

²¹ Xinajni mé ndačo xa ngain: "Atto nchao jí; jaha ná ninchehe xa atto jian co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. Xacoi dixinhi nchiania para rrochaha conixin janha."

²² Cottimeja conchienne tti nchehe xa que vayé tti yó mil, co ndačo: "Chjana yó mil, co nttihi dayehe iná yó mil que joacha janha."

²³ Xinajni ndačo xa ngain: "Atto nchao jí; jaha ná ninchehe xa atto jian, co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rrochjaha icha tsje. Xacoi dixinhi nchiania para rrochaha conixin janha."

²⁴ Pero are conchienne tti nchehe xa que vayé tti mil, ndačo ngain xinajni: "Janha nona que soixin anto soji ansean que dantsjehe chojni tti soixin danjoha co jamé tsinhi cosecha tti soixin ttengahá.

²⁵ Mexinxin janha xaon na nganji co joiquema tomia, joicjavá tomi. Pero nttihi dayehe tti tomia que chjana."

²⁶ Xinajni ndačo xa: "Jaha ná ninchehe xa jianha, co atto saha. Si onoha que janha dantsjá chojni tti janha danjoha, co jamé janha tsinhi cosecha tti janha coengahá,

²⁷ mexinxin icha jian si jaha rrojicán tomina ngain ná banco, co are janha rrocjan na rrojiji, rrogayá tomina conixin tti rrogacha tomi."

²⁸ Co ndačo xa ngain nite nttiha: "Dantsjehe ra xa tti mil que jichonda xa co danjo ra ngain tti jichonda tte mil.

²⁹ Ixin tti chonda, sayé icha, co rrochonda hasta rroxehé. Co tti xonhi chonda, sachjehe hasta cain tti chonda masqui tsjeha chonda.

³⁰ Co tti nchehe xa que xonhi xé jiji, dehngui ra ndoja tti naxin xehé, nttiha tti rrotsjanga jehe co sinetaon neno."

Quexén soenhe juzgado cain nación

³¹ Janha, tti Xí que joixin de ngajni, are janha sihi inchin ná Rey, conixin cain angelna, are mé sarihi ngain lugar de joachaxin.

³² Chojni de cainxin nación rroxatte na ngattoxon con, co janha santsjenda na cada na inchin tti ttingaria coleco dantsjenda coleco de ngayehe cottentso.

³³ Janha tsin coleco lado jian na co cottentso lado cjon na.

³⁴ Cottimeja janha, tti Rey na, rronhattjan tti chojni que te lado jian na: "Xacoi ra, jaha ra xo ojointtanchaon ra Nnodana, co dayehe ra tti lugar que jichjian para ixin jaha ra desde que are Nnodana joinchegjian Ndo nontte.

³⁵ Ixin janha venhe na jintta, co jaha ra chjana ra tti joine; co venhe na jinda co jaha ra chjana ra tti vihi; janha vacji inchin chojni de ojé nontte co jaha ra chjana ra nchia tti janha joarihi.

³⁶ Janha xonhi lontto joarichonda, co jaha ra chjana ra lontto que joaringaha; janha conina co jaha ra joasotsjena ra; janha viaxinna ngain cárcel, co jaha ra joasotsjena ra."

³⁷ Cottimeja tti chojni jian rrondačo na: "¿Quesa vicon na que soixin venhe jintta, co janha na ján chjana ra tti jointte? ¿O quesa vicon na que soixin venhe jinda co janha na ján chjana ra tti vihi?

³⁸ ¿O quesa vicon na que soixin vacji inchin chojni de ojé nontte, co janha na ján chjana ra nchia tti joarihi? ¿O quesa joarichondaha lontto co janha na ján chjana ra lontto?

³⁹ ¿O quesa vicon na janha na que soixin coniha o joarihi ngaxinhi cárcel co janha na ján joasotsjaha ra soixin?"

⁴⁰ Co janha tti Rey na rrondaçhjan: “Atto seguro tti rrindattjo ra que cain tti jian que joichehe ra ngain chojni tehe que ditticaon na, masqui chojni mé anto importanteha na, pero rroçho ixin nganji na janha tti joinchehe ra mé.”

⁴¹ ‘Cottimeja janha tti Rey na rrondattjan tti chojni que te lado cjon na: “Sattjixin ra de nganji na janha, jaha ra chojni jianha. Sattji ra ngain infierno tti xonhi tiempo danga xohi, que mé conchjian para ixin inchínji conixin cain ángel de jehe.

⁴² Ixin janha venhe na jintta co jaha ra chjanaha ra tti joine; venhe na jinda co chjanaha ra tti vihi.

⁴³ Janha vacji inchin chojni de ojé nontte, co jaha ra chjanaha ra nchia tti joarihi. Janha ivechondaha lonttona, co jaha ra chjanaha ra lonto. Janha conina, cottimeja viaxinna ngain cárcel, co jaha ra joasotsjenaha ra.”

⁴⁴ Cottimeja jehe na rrondaço na: “¿Quesa vicon na que soixin venhe jintta o venhe jinda, o inchin chojni de ojé nontte, o quesa vicon na que soixin ijoarichondaha lontoa, o quesa que soixin coniha, o viaxinha ngain cárcel co janha na cjoengujnaha ra soixin?”

⁴⁵ Co janha tti Rey na rrondattjan na: “Atto seguro tti rrindattjo ra que cada nttiha que choha ra cjoengujna ra chojni tehe que ditticaon na janha masqui chojni mé anto importanteha na, ngain rato mé rroçho ixin jaha ra cjoengujnaha ni ra janha.”

⁴⁶ Cottimeja cain chojni jiji satsji na ngain infierno tti xonhi tiempo danga xohi, co tti chojni jian satsji na tti rrochonda na iná vidé na naroaxin que xonhi tiempo tsjexin.

26

Quexén xaxaon na para tse na Jesús

(Mr. 14.1-2; Lc. 22.1-2; Jn. 11.45-53)

¹ Are Jesús joexin ndaço cain yá, jehe ndaço ngain chojni que vacao:

² —Inchin jaha ra onoha ra, nttihi yó nchanho tsí tti quiai dinhi pascua co janha, tti Xí que joixin de ngajni, jehe na rrondaço na para rrotse na na co sinchecrucificá na na.

³ Cai ngain xajeho nchanho mé cain xidána que ttetonha ngain icha xidána co cain ximaestroey ley Israel co cain xittetonha ngain nihngo, cain chojni mé xatte na ngain patioe palacioe Caifás, tti dána icha importante.

⁴ Nttiha cjoaoxin na de ixin quexén sinchehe na para que sincheyehe na Jesús para rrotse na co nasoenxon na.

⁵ Pero vinttendaço na:

—Sonttoha na ngain mero nchanho de quiai para que tsoñaoha chojni.

Ná nchí cointtjitte aceite cuerpoe Jesús

(Mr. 14.3-9; Jn. 12.1-8)

⁶ Ngain tiempo mé Jesús vehe ngain rajna Betania ngain nchiandoha Simón tti vanchequinhi na Leproso.

⁷ Co nttiha, are tene na ngain mesa conchienne ná nchí que joicao ná xoçao de joxon marmol hasta jiche de aceite que anto xajni co anto rentte. Jehe ncha cointtjitte ncha aceite mé ngataha já Jesús.

⁸ Are chojni que vacao Jesús vicon na yá, coñaon na co coexinhi na ndaço na:

—¿Quedonda coxincoa aceite yá?

⁹ Nchao rrococchi aceite yá conixin tsje tomi para rrocjengujnanxin na chojni noa.

¹⁰ Jesús coinhi mé, co jehe ndaço ngain na:

—¿Quedonda jañá teço ra ixin nchí jiji? Tti jehe ncha joinchehe ncha nganji na janha; jiji ná cosa jian.

¹¹ Ixin chojni noa cain tiempo sintte na ngayaha ra, pero janha cainxinha tiempo sarihi ngayaha ra.

¹² Tti joinchehe nchí jiji, are jehe ncha cointtjitte ncha aceite cuerpona, jehe ncha ocoinga na ncha yá para are rroçavá na.

¹³ Atto seguro tti janha rrindattjo ra que cain tti rrondaço na tti jian joajna jiji ngoixin mundo, cai rrondaço na tti joinchehe nchí jiji para rroçaxaonxin na ncha.

Judas ndaço para rrotse na Jesús

(Mr. 14.10-11; Lc. 22.3-6)

¹⁴ Cottimeja ná de tti tteyó chojni que vacao Jesús, mé vinhi Judas Iscariote, cjo para joicjao canxion xidána que vaquetonha ngain icha xidána,

¹⁵ co ndaço ngain xa:

—¿Quejanhi tomi rrochjana ra si janha rrondattjo ra quexén sinchehe ra para rrotse ra Jesús?

Cottimeja jehe xa cjoenguehe xa hna treinta tomi de plata.

¹⁶ Co desde ngain rato mé Judas cjoé quexén sinchechienhe Jesús ngá rá xidána mé.

Are joinecaho Jesús tti tteýo chojni que vacao

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Saho nchanho de tti quiai que jine na niottja que chondaha levadura, tti tteýo chojni que vacao Jesús conchienne na ngain jehe co joanchiangui na co ndaço na:

—¿Quettinó sinttachjianxin na tti sintte soixin para ngain quiai pascua?

¹⁸ Jesús ndaço ngain na:

—Tji ra ngain Jerusalén ngain nchiandoha tti xí que jaha ra onoha ra co ndache ra que janha ndačjan que ochian jói tiempo para janha ndasenne na co ngain nchiandoha jehe sinttasayaxin janha tti quiai pascua conixin chojnina que čhjinha.

¹⁹ Chojni mé vitticaon na joinchehe na inchin coetonha Jesús, co nttiha joinchechjianxin na cain tti joine na ngain tti quiai pascua.

²⁰ Ngain ttie mé Jesús joinecaho tti tteýo chojni que vacao.

²¹ Co are cain na tatene na, jehe ndaço ngain na:

—Atto seguro rrindattjo ra que ná de jaha ra rrondache chojni quečén para rrotse na na janha.

²² Cottimeja cain jehe na anto vinttečín na co coexinhi na, ná na co ná na joanchiangui na ngain Jesús co ndaço na:

—¿Apoco janha?

²³ Co Jesús ndaço ngain na:

—Ná tti rrinequinha janha ngain lato jiji, mé tti rrondache chojni quečén para rrotse na na.

²⁴ Ján ndoa janha, tti Xí que joixin de ngaini, senhe na inchin ndaço ngain tti jitaxin Palabré Dios, pero anto tangui tsonhe tti rrondache chojni quečén para rrotse na na. Icha jian para ixin jehe si rroconcijha.

²⁵ Cottimeja nichja Judas, tti ndache chojni quečén para rrotse na Jesús, co jehe ndaço ngain Jesús:

—Maestro, ¿apoco janha?

Jesús ndaço ngain:

—Ján, jaha.

²⁶ Are tejjine na, Jesús cóá niottja co joanjo gracias ngain Dios, co váña nio. Cottimeja joanjo nio ngain chojni que vacao, co ndaço ngain na:

—Jintte ra, jiji rročo cuerpona janha.

²⁷ Cottimeja cóá tti vaso de vino, co joanjo gracias ngain Dios. Cottimeja joanjo ngain na co ndaço:

—Dihi ra cainxin ra jaha ra vino jiji,

²⁸ ixin jiji tti rročo jnina janha que sinchese gurá tti trato naroaxin. Co jnina singo jni para rroxengaxin hna tti jianha que nchehe tsje chojni.

²⁹ Pero rrindattjo ra que janha irroccjanha na sihi vineo uva hasta tti nchanho que janha conixin jaha ra sonho na tti vino naroaxin ngain lugar tti ttetonha Ndadana ngaini.

Jesús ndaço que Pedro rrondaço ixin jehe chonxinha Jesús

(Mr. 14.26-31; Lc. 22.31-34; Jn. 13.36-38)

³⁰ Co vinttetsje na ná himno, cottimeja savintteccji na ngain jnanchjan que dinhi Nttaalivo.

³¹ Cottimeja Jesús ndaço ngain na:

—Janha tti cain jaha ra sinttechinhi ra de ixin janha ngain ttie jiji, ixin ndaço ngain tti jitaxin Palabré Dios: “Dios nasoenxon tti ttingaria coleco, co cain coleco rrochjequé va.”

³² Pero después que janha rroxechon na, janha saho tsji Galilea que jaha ra.

³³ Cottimeja Pedro ndaço ngain Jesús:

—Masqui cainxin na sinttečín na de ixin soixin, pero janha nahi.

³⁴ Cottimeja ndaço Jesús:

—Janha rrindattjo seguro que ngain ttie jiji, saho que rrotsje conttaxichia, jaha orondaço ninxin nttiha que chonxinha na.

³⁵ Pedro ndaço:

—Masqui rrochonda que senxin na tti soixin senxin, pero rrondačjanha ixin chonxinha soixin.

Co cain ni icha ndaço na řajeho cai.

Are Jesús joichetsenne ñao Dios ngain Getsemaní

(Mr. 14.32-42; Lc. 22.39-46)

³⁶ Cottimeja Jesús conixin tti chojni que vacao joiji na ngain ná lugar dinhi Getsemaní, co nttiha Jesús ndaço ngain na:

—Nttihi dintte ra co chonna ra ixin janha sinttatsán ñao Dios.

³⁷ Co Jesús sajoicao Pedro co cayoi xenhe Zebedeo, co jehe coexinhi conohe ná joachjaon anto soji ngain almé.

³⁸ Cottimeja jehe ndaço:

—Janha tonona ngain almana ná joachjaon anto soji que hasta rinaho ndasenhe na. Dittoha jaha ra nttihi nganji na janha, co dinttechinha ra.

³⁹ Cottimeja Jesús sacjoi nchion icha cjin co nttiha vecjantaha nontte, co joinchetsenhe ñao Dios, co ndaço:

—Padre, si nchao, tançhjandaha na que janha sattoha ngain tti anto tangui que tsonna; pero tsoenha inchin janha rinaho, sino que tsonhe inchin soixin rinao.

⁴⁰ Cottimeja cjan para ngain tti ní chojni que joicao, pero are jehe joihi nttiha, jehe na oatejoa na. Co jehe ndaço ngain Pedro:

—¿Acoixianha ra tavinttetsjehe ra ni ná hora para rroguinttenda ni ra?

⁴¹ Tadinttetsjehe ra co nchetsenhe ra ñao Dios, para que xonhi cosa jianha sinttatjanji ra. Ndoa que espirítua ra anto rinao sintte jian, pero cuerpoa ra sojiaha.

⁴² Yoxin nttiha jehe cjan para joinchetsenhe ñao Dios iná co ndaço:

—Padre, si çhoaha para que soixin tsançhjandaha na janha satto ngain tti anto tangui jihi, que tsonhe inchin soixin rinao remé.

⁴³ Cottimeja jehe cjan co jehe na tatejoa na iná ixin jmacon na icoixinha de anto cottaçhin.

⁴⁴ Jesús nttiha cointtohe na co jehe sacjan para joinchetsenhe ñao Dios ninxin nttiha, co ndaço xajeho.

⁴⁵ Cottimeja cjan ngain tti vittohe jehe tti ní chojni que joicao, co ndaço ngain na:

—Janché dintteçhin ra co nchejogaha ra. Hora ojoí que janha, tti Xí que joixin de ngajni, sinchechienhe na na ngá rá chojni jianha.

⁴⁶ Dingattjen ra sachjin na; ojoí tti ndaço queçén para rrotse na na janha.

Are tse na Jesús

(Mr. 14.43-50; Lc. 22.47-53; Jn. 18.2-11)

⁴⁷ Jesús xa jindaço jañá are ojoí Judas, ná de tti tteyo chojni que vacao Jesús. Judas joiaho anto tsje chojni que teyá na espada co nttá. Xidána que vaquetonha ngain icha xidána co xittetonha ngain nihngo, xí mé rroanha cain chojni mé.

⁴⁸ Judas, tti joindache xa queçén para tse na Jesús, mé dindaço ngain cain chojni que joiaho:

—Tti janha tsetoxin para rrochjaha joajna, jehe mé. Tse ra co sattjiho ra.

⁴⁹ Cottimeja jehe Judas conchienenhe ngain Jesús co ndaço:

—¡Deo, Maestro!

Co coetoxin.

⁵⁰ Jesús ndaço ngain Judas:

—Amigo, ¿quedonda joihi nttihi?

Cottimeja cain nicjoi conchienenhe na co tse na Jesús co sajoicao na.

⁵¹ Ngain rato mé, ná de tti tteyo chojni que vacao Jesús joantsje espadé co conçhinjihi ndatsjoen ná xinchehe xé xidána icha importante.

⁵² Cottimeja ndaço Jesús ngain:

—Ttençhinha espadá lugué espada. Ixin cain chojni que tjayaxin conixin espada, conixin espada senxin cai.

⁵³ ¿Anoaha que janha nchao rrondattjan Ndodana co jehe Ndo jaxon rrorroanna Ndo icha que setenta mil ángel?

⁵⁴ Pero si jamé rroconhe, ¿queçén para tsonhe tti ndaço ngain tti jitaxin Palabré Dios, que mé chonda que siconhe?

⁵⁵ Cottimeja Jesús ndaço ngain cain chojni que cjo:

—¿Ajoihí jaha ra conixin espada co nttá para joitse ni ra como si janha rrocji ná xichehe? Cain nchanho vatto janha vagarihi ngayaha ra ngain nihngo icha importante para vantacoanha ra de ixin Dios co xonhi tiempo tse ni ra.

⁵⁶ Pero cain jihi tsonhe para que siconhe cain tti dindaço cain profeta ngain tti jitaxin Palabré Dios.

Cottimeja cain tti chojni que vacao Jesús ndacointtohe na jeho Jesús nttiha co jehe na sacoinga na.

Are Jesús ngain juzgadoe nihngo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Cain nijoitse Jesús sajoicao na para ngain nchiandoha Caifás, mé vehe xidána icha importante, co nttiha tti dixatte cain ximaestroey ley co cain xittetonha ngain nihngo.

⁵⁸ Co Pedro ta tti cjin jirroexin hasta joiyi ngain patioe nchiandoha jehe Caifás. Ntitiha joixinhi Pedro co tavehe ngayehe xipolicía que te ntiha para vicon quehe joinchehe ni icha ngain Jesús.

⁵⁹ Cain xidána que vaquetonha ngain icha xidána, co cain xittetonha ngain nihngo, co cain xittetonha ngain juzgadoe nihngo cjoé xa quehe sinchecaxin xa Jesús, masqui ndoaha joinchehe Jesús ná cosa jianha, jeha para ttjé xa para nasoenxon xa Jesús.

⁶⁰ Pero xonhi cosa vittja xa masqui anto tsje chojni conchienne para ndaço na cosa ndoaha de ixin quehe joinchehe Jesús. Cottimeja vintteconchienne yó chojni testigo que nichja cosa ndoaha.

⁶¹ Chojni mé ndaço na:

—Xí jihi ndaço xa: “Janha nchao tsonxante ningoe Dios, co rrocjan na sinttachjian nihngo iná ngain nincoa nchanho.”

⁶² Cottimeja vingattjen xidána icha importante co ndaço xa ngain Jesús:

—¿Axonhi nichja jaha? ¿Andoa tti ndaço chojni tehe o ni nahi?

⁶³ Pero Jesús tencoa. Cottimeja ndaço xidána icha importante mé:

—Conixin joachaxin nombré Dios que jichon, janha rritetonha jaha que rrondachjenji na ndoa. Ndachjenji na si jaha tti Cristo, Xenhe Dios.

⁶⁴ Jesús ndaço:

—Ján, janha inchin jaha ndaço. Co cai rrondattjo ra jaha ra que sicon ni ra janha, tti Xí que joixin de ngajni, sarihi ngain lado jian de Dios que chonda cainxin joachaxin, co sicon ni ra sihi ngacjan ttjoi de ngajni.

⁶⁵ Cottimeja jehe xidána icha importante coinchje xa lonttoe xa para ná señal que jehe xa anto coñao xa co ndaço xa:

—Xí jihi nichja xa jianha para ixin Dios. ¿Quehe rrogondá na icha testigo? Jaha ra coinhi ra tti jianha que ndaço xa.

⁶⁶ ¿Quehe xaxaon ra?

Cain na ndaço na:

—Jiquininxin xa senhe xa.

⁶⁷ Cottimeja canxion na cjoatjo na nttatté na ngá con Jesús co xanguí na tton. Icanxin na xanguí na manazo ngá con Jesús.

⁶⁸ Co ndaço na ngain:

—Jaha que Cristo, jdatsoenhe quensen goen!

Pedro ndaço que jehe chonxinha Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ De cain mé Pedro tají ndoja ngain patio, co conchienne ngain jehe ná nchimozé xidána icha importante co ndaço ncha:

—Jaha cai vacjiho Jesús, tti joixin nonttehe Galilea.

⁷⁰ Pero ngattoxon con cain nite ntiha, Pedro ndaço:

—Nonaha de quehe rrindachjenji na.

⁷¹ Pedro are jehe sajittji ngain puerté patio are vicon iná nchimozé xidána mé, ndaço ncha ngain nite ntiha:

—Xí jiha cai vacao xa Jesús, tti rajné Nazaret.

⁷² Pedro joinchejurá co ndaço:

—Janha chonxinha xí yá.

⁷³ Nchion después cain nite ntiha conchienne na ngain Pedro co ndaço na ngain:

—Ján ndoa, jaha cai ná de tti chojni Jesús ixin datsoan ni hasta de quexén nichja.

⁷⁴ Cottimeja Pedro joanchia ná castigo ngain Dios para ixin jehe ixin joinchejurá ngain Dios co ndaço:

—Dios nchao nasoenxon na janha si ndoaha tti rrindaçhjan que janha chonxinha xí yá.

Co ngain rato mé tsje ná conttaxichia.

⁷⁵ Cottimeja Pedro xaxaon tti ndaço Jesús ngain jehe: “Saho que conttaxichia rrotsje va, jaha orrondaço ninxin ntiha que ixin chonxinha na.” Cottimeja Pedro vachjexin de ntiha co anto tsjanga.

27

Are joicao na Jesús ngain Pilato

(Mr. 15.1; Lc. 23.1-2; Jn. 18.28-32)

¹ Are ovingasán cain xidána que vaquetonha ngain icha xidána co cain xittetonha ngain ningoe chojni judío cjoao na ixin quexén sinchehe na para nasoenxon na Jesús.

² Cottimeja coia na Jesús co joicao na ngain Poncio Pilato, tti vehe xigobernador.

Are ndavenhe Judas

³ Judas, tti joindache xidána para tse na Jesús, are jehe conohe que nasoenxon na Jesús, jehe xaxaon que jianha joinchehe co anto feo conohe, co cjan cjoí ngain xidána que vaquetonha ngain icha xidána co xittetonha ngain nihngo para joiconcjan tti treinta tomi de plata,

⁴ co ndaço ngain xa:

—Janha jianha joitttaha ixin joindattjo ra quexén para tse ra ná xí que xonhi jica para que nasoenxon ra xa.

Pero jehe xa vinttendaço xa ngain Judas:

—Pero mé, ¿janha na quehe ndosenna na? ¡Yá problemá jaha!

⁵ Cottimeja Judas cjoa tomi mé ngaxinhi nihngo nttiha, co sacjoi para joiquenttedonguihi ttosin ná jino jeha para ndavenhe.

⁶ Jehe xidána que vaquetonha ngain icha xidána joatse xa tomi mé co ndaço xa:

—Choha tsín na tomi jiji ngain cajé tti tomi que danjo chojni ixin tomi jiji xengaxin hna jni.

⁷ Cottimeja cjoao chó xa para que conixin tomi mé coenanxin xa tti nontte que dinhi Nonttehe tti Nchechjian Chi para que nttiha sehe ná lugar tti tsjavá na chojni que ttixin de iná nación.

⁸ Mexinxin jngui mé dinhi hasta jai, Jngui de Jni.

⁹ Jamé joiconhe tti dindaço profeta Jeremías: “Coá na tti treinta tomi de plata, (tti tomi que chojni Israel cjoenga hna para ixin jehe).

¹⁰ Conixin tomi mé coenanxin na tti jnguihi tti nchechjian chi, co jamé conhe inchin coettona Dios.”

Jesús ngain Pilato

(Mr. 15.2-5; Lc. 23.3-5; Jn. 18.33-38)

¹¹ Joicao na Jesús ngain xigobernador que vinhi xa Pilato, co jehe xa joanchianguihi xa Jesús co ndaço xa:

—¿Ajaha tti Rey de chojni judío?

Jesús ndaço ngain xa:

—Ján janha jañá inchin jaha ndaço.

¹² Co are cain xidána que vaquetonha ngain icha xidána, co cain xittetonha ngain nihngo tenichja xa tti jeha ndoa de ixin Jesús, jehe xonhi ndaço.

¹³ Cottimeja Pilato ndaço ngain Jesús:

—¿Atinha cain tti tendaço na de ixin jaha?

¹⁴ Pero Jesús xonhi ndaço ngain Pilato; co jamé jehe xigobernador Pilato goan xa admirado co inoeha xa quehe rrojinchehe xa ngain rato mé.

Are ndaço na ixin Jesús chonda que ndasenhe

(Mr. 15.6-20; Lc. 23.13-25; Jn. 18.38—19.16)

¹⁵ Nchao remé, ngain cain quiai mé xigobernador vechonda xa costumbre de vacançhanda xa ná de tti teaxinhi para savacj. Jehe xa vacançhanda xa quexeho de tti chojni que vaquinchiehe jehe na.

¹⁶ Ngain tiempo mé nttiha vehe ngaxinhi cárcel ná tti vinhi Barrabás, co tsje chojni chonxin jehe mé.

¹⁷ Co are cainxin chojni xatte na nttiha, Pilato joanchiangui ngain na co ndaço:

—¿Quensen rinao ra tsançhanda janha para que jehe satsji; a Barrabás o ani Jesús, tti dinhi Cristo?

¹⁸ Jamé ndaço Pilato ixin oconohe que cain xidána conchjoehe xa ngain Jesús ixin jehe cainxin jian vanchehe, mexinxin joinchechienxin xa Jesús nttiha.

¹⁹ Ngain rato mé are Pilato tajitaha nttaxintaon tti vanchejuzguexin chojni, nçhiçhihi rroenhe nçha ná joajna que dindaço nçha: “Dixintteha jaha ngain xí jian yá ixin are tte, janha atto feo coxinanxin de ixin jehe xa.”

²⁰ Pero cain xidána que vaquetonha ngain icha xidána co xittetonha ngain nihngo ndache xa cain chojni que rrondaço na ixin Barrabás tti sachjexin cárcel, co ixin Jesús chonda que senhe.

²¹ Jehe Pilato joanchiangui ngain na iná, co ndaço:

—¿Quexeha de cayoi xí tti rinao ra tsançhanda para que jehe satsji?

Co cain jehe na vinttendaço na:

—Barrabás.

²² Pilato joanchiangui ngain na iná co ndaço:

—¿Co quehe sinttaha janha conixin Jesús, tti dinhi Cristo?

Cain na ndaço na:

—¡Nchecrucificá!

²³ Cottimeja Pilato ndaĉho ngain na:

—¿Quehe cosa jianha joinchehe?

Pero jehe na cjan na ndaĉho na sén iná:

—¡Nchecrucificá!

²⁴ Are Pilato vicon que ĉhoha na para que Jesús sarrocji, sino que cain na anto tedeñoa na, Pilato coetonha para que joí jinda, co contti rá ngattoxon con cainxin chojni nttiha, co ndaĉho ngain na:

—Janha űonhi sarica ixin ndasenhe xí jihi, ixin jehe xa űonhi cosa jianha joinchehe xa. Jaha ra tti sintteca ra yá.

²⁵ Co cainxin chojni ndaĉho na:

—¡Janha na conixin xanhna na, mé tti sintteca na ixin ndasenhe xí yá!

²⁶ Cottimeja Pilato joantsje Barrabás para coanchjanda sacjoi, co coetonha para que vicaon Jesús. Cottimeja Pilato joanjo Jesús para que goan crucificado.

²⁷ Cottimeja xisoldadoe jehe Pilato joicao xa Jesús ngain palacio, co űatte cainxin xisoldado ngandanji Jesús.

²⁸ Cottimeja joantsjehe xa lontoe Jesús co joinchetsá xa ná lontto jatse.

²⁹ Co joinchecjinga xa Jesús ná corona de joxon nttanchaha, co joinchetse xa ná nttá ngain rá lado jian. Cottimeja vinttetoxin nttajochjihi xa ngatto con Jesús, co cjoanoa xa co ndaĉho xa ngain:

—¡Viva tti Rey de chojni judío!

³⁰ Cai cjoatjo xa nttaté xa, co coá xa tti nttá que joinchetse xa Jesús para űanguí xa nttá já Jesús.

³¹ Cottimeja are joexin cjoanoa xa jañá, joantsjehe xa tti lontto jatse que joinchetsá xa co coengaha xa lonttoe. Cottimeja sajoicao xa para joinchecrucificá xa.

Are joinchecrucificá xa Jesús

(Mr. 15.21-32; Lc. 23.26-43; Jn. 19.17-27)

³² Co are tedachjecaouxin xa Jesús de nttiha, vetan xa ná xí que vinhi Simón que joixin de ngain ciudad de Cirene; co joinchecame xa crue Jesús.

³³ Co jamé joijicaho xa Jesús conixin Simón ngain ná lugar que dinhi Gólgota que rroĉho Lugué Nttalorojá Chojni.

³⁴ Nttiha chjexin xa Jesús ná vino que jittecjan ná cosa anto tsja. Pero are Jesús joincheprobá vino mé, jehe ĉhoha vihi.

³⁵ Co are ojoinchecrucificá xa Jesús, cain xisoldado mé joantsje xa suerte de lonttoe Jesús, para jamé chjejehe xa lontto mé. Jañá conhe para joiconhe tti dindaĉho profeta: “Joantsje na suerte para chjejehe na lonttona.”

³⁶ Cottimeja tavintte xa nttiha para vinttenda xa.

³⁷ Co nganito cruz icha noi que já Jesús coín xa ná letra que ndaĉho quedonda chonda que ndavenhe. Co letra mé ndaĉho: “Xí jihi Jesús, tti Rey de chojni judío.”

³⁸ Cai yó xichehe goan xa crucificado conixin Jesús, ná xa vehe crue xa lado cjon Jesús, co iná xa lado jian de Jesús.

³⁹ Co cain nivatto nttiha cjoanoa na Jesús co coenttjoinga rroha na.

⁴⁰ Co ndaĉho na ngain Jesús:

—Jaha que rrojinchexantte nihngo icha importante co nincoa nchanho ttjexinxin nchecjhian nihngo iná, daniánxin de cruz jaho, si ndoa jaha Xenhe Dios.

⁴¹ Jamé cai cjoanoa cain xidána que vaquetonha ngain icha xidána, ximaestroe ley Israel, co xifariseo conixin cain xittetonha ngain nihngo, co ndache chó xa:

⁴² —Jehe nchao cjoenguijna icha chojni, pero jehe ĉhoha tsjenguijna cuerpoe jehe mismo. Si ndoa jehe tti Rey para ixin ján na, socon na sanianxin de ngain cruz yá para que sotticaon na jehe.

⁴³ Jehe chonda confianza ngain Dios, mexinxin jai socon na si Dios tsanchjandaha para senhe, si ndoa Dios anto rinao jehe ixin jehe ndattjo na que jehe tti Xenhe Dios.

⁴⁴ Jamé ndaĉho chojni hasta tti cayoi xichehe que vintte crucificado nttiha ngaca jehe cjoanoa xa Jesús cai.

Are ndavenhe Jesús

(Mr. 15.33-41; Lc. 23.44-49; Jn. 19.28-30)

⁴⁵ Cottimeja ngoixin ngataha nontte ndaconaxin xehe desde ngosine nchanho hasta ní hora tsocjin.

⁴⁶ Co inchin ní hora tsocjin Jesús coyao soji co ndaĉho:

—Elí, Elí ¿lama sabactani? —que rroĉho: Diona, Diona, ¿quedonda ndacointtona na janho?

⁴⁷ Canxion de tti xite nttiha coinhi xa mé co ndaĉho xa:

—Xí jihi jidayé xa tti profeta Elías.

⁴⁸ Ngain rato mé ná tti xite nttiha coinga xa joiroé xa ná esponja. (Cosa mé datse jinda inchin chjon algodon.) Co jehe xa xanguí xa esponja mé ná vino anto san inchin vinagre co coencjin xa con ná nttá. Cottimeja tsín xa noi ngaca rroha Jesús para que jehe rroguíhi.

⁴⁹ Pero xi icha ndačo xa:

—Tančhanda, socon na aco ndoa tsí Elías para tsjenguijna.

⁵⁰ Jesús cjan coyao soji iná, co ndavenhe.

⁵¹ Ngain rato mé tti manta que vettoa ngaxinhi tti nihngo icha importante, hasta yó vichjenga manta mé de noi hasta tti nontte. Co coingui nontte hasta ttjao vichjenga.

⁵² Co tsje lugar tti xavá chojni xiré co tsje chojni que vaguitticaon na Dios, co ndavenhe na, are mé xechon na.

⁵³ Cottimeja vachje cain chojni jihi de ngain tti xavá na, co después de xechon Jesús vintteci na ngain ciudad de Jerusalén. Nttiha anto tsje chojni vicon jehe cain chojni mé que xechon.

⁵⁴ Are jehe xicapítan conixin cain xisoldadoe xa que tenda Jesús nttiha vintteguicon xa que coingui nontte co conaxin xehe co icha cosa que conhe, anto vinttexaon xa co vinttendačo xa:

—Ján ndoa que xí jihi Xenhe Dios.

⁵⁵ Co cjinha de ngain cruz nttiha tate canxion nchí que vacji conixin Jesús desde ngain Galilea co vagayaconhe ncha Jesús.

⁵⁶ Nttiha vehe María Magdalena, co María tti janné Jacobo co José, co janné cain xenhe Zebedeo.

Are Jesús xavá

(Mr. 15.42-47; Lc. 23.50-56; Jn. 19.38-42)

⁵⁷ Are coexinhi conaxin xehe, jói ná xí anto rico que vinhi xa José, xí mé rajné xa Arimatea, co jehe xa cai vitticaon xa Jesús.

⁵⁸ Jehe José mé cjoí joitsjehe Pilato para joanchiehe joachaxin de sasicao cuerpoe Jesús. Cottimeja Pilato coetonha que sanjo xa cuerpoe Jesús.

⁵⁹ José joinchegania cuerpoe Jesús co coensiha ná manta anto roa.

⁶⁰ Co joicán cuerpo ngain tti cueva que jehe José joincheghian ngadoho ná ttjao para ixin jehe José o quexeho de nindoja que ndarroguenhe icha saho. Cottimeja jehe coejé cueva mé conixin ná xo jie co sacjoi.

⁶¹ Co nttiha tají María Magdalena, co tti iná María tate na ngandanguí jehe cueva mé.

Tti venda lugar tti xavá Jesús

⁶² Ngain nchanho yoxin, rročo sábadó, cain xidána que vaquetonha ngain icha xidána co cain xifariseo vintteci xa joitsjehe xa Pilato,

⁶³ co vinttendačo xa ngain:

—Janha na xaxanho na que tti xí ndavenhe que vanichja cosa ndoaha, jehe ndačo are xa vechon que ngain nchanho ninxin jehe rroxechon.

⁶⁴ Mexinxin janha na rinaho na que soixin rroanha canxion xisoldado para sinttenda xa tti jehe jíxavá hasta tti ngain nchanho ninxin para que chojni que vacao tsjiha na ngain ttie co siqué na cuerpoe. Cottimeja rrondache na icha chojni que ixin jehe xechon. Co si jamé rrondačo na, icha feo tsonhe que are saho.

⁶⁵ Pilato ndačo ngain xa:

—Yá chonda ra canxion xisoldado. Jaha ra ttji ra co jian ttejehe ra cueva tti jíxavá.

⁶⁶ Cottimeja savintteci na conixin xisoldado co coln na ná señal ngain tti xo que jíjé cueva mé para que sicon na sí xo mé tsingui xo. Co nttiha cointtohe na xisoldado para vinttenda xa.

28

Are xechon Jesús

(Mr. 16.1-8; Lc. 24.1-12; Jn. 20.1-10)

¹ Are vatto tti nchanho que nchejogaha ni, co ojidingasán tti saho nchanho de semana, María Magdalena co tti iná María cjoí na joitsjehe na tti xavá Jesús.

² Ngain rato mé coingui nontte anto soji. Are mé ná ángel de Dios xincanjinxin de ngajni co joi ngain cueva mé. Jehe vinttjia tti xo que jíjé puerté cueva co tavehe ngataha xo mé.

³ Ángel mé anto jitonguixima inchin tti xohi que xincanjinxin de ngajni, co lonttoe anto roa lontto inchin chintta que jí ngataha jnanchaha.

⁴ Are tti xisoldado que tenda nttiha vicon xa mé, anto vinttexaon xa hasta ndavinttjia xa de joaxaon, xá ndavintteguenhe xa.

⁵ Cottimeja ángel mé ndačo ngain jehe yó nchí que vintteci:

—Xaonha ra. Janha nona que tettjé ra Jesús, tti joinchecrucificá na.

⁶ Jehe coha nttihi ixin jehe oxechon inchin jehe ndaço. Ꞥacoi ra sitysjehe ra tti lugar que jehe na coín na.

⁷ Jaicoa ttji ra co dindache ra tti chojni que vacao: “Jehe ndavenhe pero jai jehe oxechon co jehe tsji Galilea icha saho que jaha ra. Nttiha siconxin ra.” Jeho yá tti chonda janha que joindattjo ra.

⁸ Cottimeja jehe nčí mé jaicoa savinttecjixin ncha de nttiha. Jehe ncha vintteꞤaon ncha co Ꞥajeho tiempo anto vintteché ncha cai. Co coinga ncha joindache ncha tti chojni que vacao Jesús.

⁹ Co are jehe ncha tettinga ncha, Jesús conchienne ngain ncha co joanjo joajna ngain ncha. Jehe ncha vintteconchienne ncha ngain Jesús co vinttettoxin nttajochjiji ncha co cjóa ncha rotté Jesús co joinchesayehe ncha.

¹⁰ Co jehe ndaço ngain ncha:

—Ꞥaonha ra. Ttji ra dindache ra chojnina que jehe na chonda na que tsji na Galilea co nttiha siconxin na na janha.

Tti coequin xisoldado que vinttenda tti Ꞥavá Jesús

¹¹ Are nčí mé savintteguicao ncha joajna mé, canxion xisoldado que vinttenda lugar tti Ꞥavá Jesús vinttecji xa joindache xa xidána que vaquetonha ngain icha xidána cain tti conhe.

¹² Co xí mé jaicoa joindache xa cain xittetonha ngain nihngo para que cjoao chó xa queꞤén sinttenchehe xa. Cottimeja vintteganjo xa anto tsje tomi ngain tti xisoldado que vinttenda lugar tti Ꞥavá Jesús,

¹³ co vinttendaço xa ngain xisoldado mé:

—Jaha ra ndaço ra que are jaha ra tateçhin ra ttie, cjoi tti chojni que vacao Jesús co coé na cuerpoe.

¹⁴ Co si xigobernador tsonohe xa jiji, janha na sicjao na xa co jaha ra Ꞥonhi tsonha ra.

¹⁵ Cottimeja cain xisoldado mé vittoexin xa vinttegayé xa tomi mé, co vinttecji xa co vinttendaço xa inchin vitonhe xa. Co jamé ttequin chojni judío hasta jai.

Tti coetonhe Jesús nirepresentaté jehe

(Mr. 16.14-18; Lc. 24.36-49; Jn. 20.19-23)

¹⁶ Jamé tti ttejngo chojni que vacao Jesús savinttecji na para Galilea ngain tti jna que Jesús coetonhe na.

¹⁷ Co are vintteguicon na Jesús, jehe na joinchesayehe na Jesús, masqui ittoha na Ꞥa vitticaonha na ixin jehe Jesús.

¹⁸ Cottimeja Jesús conchienne ngain na co ndaço:

—Janha ovayá cainxin joachaxin de ngajni co de nttihi ngataha nontte.

¹⁹ Jai jaha ra ttji ra ngain chojni de cainxin nación co ndache ra na que sitticaon na na janha co sintte na chojnina, co ncheguitte ra na conixin joachaxín nombré Ndodana co joachaxín nombrena janha tti Xenhe Ndo conixin joachaxín nombré Espíritu Santo,

²⁰ co nchecoehne ra na sitticaon na sinchehe na cainxin tti janha coetonha ra. Co noha ra que janha rrihi nganji ra cainxin nchanho hasta are tsjexin mundo. Amén.

Tti Jian Joajné Jesucristo Que Dicjin Marcos

Juan ndache chojni ngagaha jna joajné Dios

(Mt. 3.1-12; Lc. 3.1-9, 15-17; Jn. 1.19-28)

¹ Janhi coexinxin joajné Jesucristo, Xenhe Dios.

² Profeta Isaías dicjin janhi:

Ndaçho Dios ngain Xenhe: Tsjexin, saho rrorroanha ná tti sicao joajnana para sinchekhjian nttiha para ixin jaha.

³ Co tsinhi na ná tté chojni que tsoyaoxin ngagaha jna que rrondaçho:

“Nchekhjian ra ná nttiha para ixin jehe tti chonda cain joachaxin; danttjehe ra ná nttiha nao.”

⁴ Cottimeja, ndoa, jañá jói Juan ngagaha jna, vancheguitte chojni. Co vandaçho ngain na ixin chonda na que tsentoxinhi na cain cosa jianha que tenchehe na co siguutte na. Co jamé Dios sinchetjañehe na cain cosa jianha que joinchehe na.

⁵ Mexinxin vacji cainxin chojni que vintte nonttehe Judea co chojni que vintte ngain ciudad de Jerusalén para vaquinhí na quehe vandaçho Juan. Co are jehe na vaquendoenhe ñao na cainxin cosa jianha que vanchehe na, cottimeja Juan vancheguittexin na ngain río Jordán.

⁶ Lonttoe Juan diconchjian de joxon xehe cocamello, co cinturoen de joxon roa. Co tti vane Juan joxon coxoali co tsjén cormena que vagoan ngagaha jna.

⁷ Co Juan vandaçho ngain chojni:

—Después de janha tsí iná chojni que chonda anto tsje icha joachaxin que janha. Co janha jaquininxinha na ni para sisehe para tsonxindangá corrié catté.

⁸ Janha nntaguittexin jaha ra conixin jinda; pero jehe sinttaguittexin ra conixin Espíritu Santo.

Are joiguitte Jesús

(Mt. 3.13-17; Lc. 3.21-22)

⁹ Co tiempo mé Jesús vaçhjexin de ngain rajna Nazaret jí ngain nonttehe Galilea para sacjoi ngain Juan. Co Juan joincheguitte Jesús ngain río Jordán.

¹⁰ Co are Jesús vaçhjenguixin de jinda, vicon que ngajni xiré, co Espíritu Santo de Dios xincanji xá ná conttoanajni ngataha Jesús.

¹¹ Co rato mé coinhi na tté Dios que nichjixin de ngajni co ndaçho:

—Jaha tti Xanhna que janha anto rinaho; co de ixin jaha, janha anto chahna.

Satanás rrojináo rrojincheyehe Jesús

(Mt. 4.1-11; Lc. 4.1-13)

¹² Cottimeja Espíritu Santo de Dios sajoicao Jesús para ngagaha jna tti xonhi chojni jí.

¹³ Co nttiha ngagaha jna tti vintte tsje coxigo çhintto, vehe Jesús cuarenta nchanho. Cottimeja Satanás cjoí ixin joináo rrojincheyehe Jesús para rrojinchehe cosa jianha, pero coixinha joincheyehe. Cottimeja jói ángel de Dios para joincheatendehe Jesús.

Jesús coexinhi xé ngain Galilea

(Mt. 4.12-17; Lc. 4.14-15)

¹⁴ Después que coiaxinhi na Juan ngain cárcel, Jesús cjoí para nonttehe Galilea, co joindaçho tti jian joajna de quexén ttetonha Dios.

¹⁵ Vandaçho Jesús ngain chojni:

—Ojóí tiempo que Dios siquetonha daca ngataha nontte. Ttentoixinhi ra cain cosa jianha que tenchehe ra co ditticaon ra tti joajna que danjo iná vida naroaxin.

Jesús nichjé nó xí que vatse copescado

(Mt. 4.18-22; Lc. 5.1-11)

¹⁶ Are Jesús jittji ngandehe lago de Galilea, Jesús vicon Simón co xanchó Simón xan Andrés. Cayoi nimé copescado vatse na, co rato mé tatetjahngui na nonchaha jinda.

¹⁷ Co Jesús ndaçho ngain na:

—Xácoi ra rroehna ra; jaha ra tse ra copescado, pero janha tsjagoha ra quexén satse ra chojni para ixin Dios.

¹⁸ Co rato mé cointtohe na nonché na co sacjoi na conixin Jesús.

¹⁹ Cjinha joiiji na are Jesús vicon Jacobo co Juan, cayoi nimé xenhe Zebedeo. Tate na ngá ná barco tetteyehe na nonché na.

²⁰ Co rato mé Jesús vayé cayoi jehe na, co jehe na nttiha cointtohe na ndodé na Zebedeo ngain barco mé conixin ninchehe xé, co cayoi jehe na sacjoi na conixin Jesús.

Ná xí que vechonda espíritu jianha

(Lc. 4.31-37)

²¹ Cottimeja joihi na ngain rajna Capernaum. Co Jesús vixinhi nihngo nttiha para joinchecoenhe chojni Israel ngain nchanho que nchejogaha na.

²² Co cain nivaquinhí tti vanichja Jesús vagoan na admirado ixin Jesús vanichja inchin ná chojni que chonda anto tsje joachaxin co jeha inchin vanichja ximaestroey ley Israel.

²³ Co ngain ningoe rajna mé vehe ná xí que vechonda xa espíritu jianha co coyaotte xa Jesús co ndaço xa:

²⁴ —¿Quehe sinchehe nganjí janha na, jaha Jesús de Nazaret? ¿Ajaha joihi para santsjena ra joachaxin que chonda na? Janha chonxin jaha co nona ixin jaha tti anto jian de ngain Dios.

²⁵ Cottimeja Jesús joinchesattehe espíritu jianha mé co ndaço:

—Tencoá jaha espíritu jianha, co sattjixin de ngain xí yá.

²⁶ Co are espíritu jianha vaçhjexin de ngain tti xí mé, jehe espíritu jianha joincheguenda jehe xa, co yao soji co sacjoixin de ngain tti xí mé.

²⁷ Co cainxin chojni que te nttiha xaoon na co joanchianguihi chó na co ndaço na:

—¿Quehe jihí? Ojé cosa jitjagoa na xí jihí. ¡Xí jihí chonda xa joachaxin hasta ttetonhe xa espíritu jianha, co espíritu jianha ditticaon tti ndaço xa!

²⁸ Co cainxin rajna que te ngain nonttehe Galilea anto daca conohe na quehe vanchehe Jesús.

Jesús joinchexingamehe jannché Simón Pedro

(Mt. 8.14-15; Lc. 4.38-39)

²⁹ Cottimeja Jesús vaçhjexin de nihngo mé. Co jehe Jesús, conixin Jacobo co Juan sacjoi na para nchiandoha Simón co Andrés.

³⁰ Co tiempo mé jannché Simón Pedro venihi jan ixin soa. Co ndaço na ngain Jesús ixin venihi naníta mé.

³¹ Cottimeja Jesús conchienhe, co tsehe rá naníta mé co joinchengattjen. Co toin rato mé xingamehe co ixonhi soa veyá. Co jehe naníta mé joincheatendehe na.

Jesús joinchexingamehe anto tsje chojni nihi

(Mt. 8.16-17; Lc. 4.40-41)

³² Co are viataon nchanho co conaxin xehe, joicaöhe na Jesús cainxin chojni venihi co cainxin chojni que vechonda espíritu jianha tiempo mé.

³³ Co cainxin chojni ngain rajna mé xatte na ngandanguí nchia tti vehe Jesús.

³⁴ Jesús joinchexingamehe anto tsje chojni que vechonda ojeje chin. Co chojni que vechonda espíritu jianha Jesús joantsjexin espíritu mé de ngain na. Pero Jesús joanjoha joachaxin para nichja cain espíritu jianha ixin cain espíritu jianha ovenohe quensen jehe Jesús.

Jesús nichjé chojni ngain Galilea de ixin Dios

(Lc. 4.42-44)

³⁵ Co are ochian jidingasán, Jesús vingattjen co vaçhjexin de ngain rajna mé para sacjoi ngain iná lugar tti xonhi chojni vintte co nttiha joinchecoanxinxin Dios.

³⁶ Cottimeja Simón co icha chojni que vacao Jesús joicjé na.

³⁷ Co are vittja na Jesús, ndaço na ngain:

—Cainxin chojni tedanchiangui na jaha.

³⁸ Pero Jesús ndaço:

—Ján, pero sachjin na ngain icanxin rajna chian para que janha rronichja nttiha cai tti joajné Dios que janha joiquinha, porque para ixin mé joihi janha nttihi.

³⁹ Jamé vacji Jesús ngain cainxin nihngo que vintte ngain nonttehe Galilea para ndache na de ixin Dios co para vaguenguixin espíritu jianha de ngain chojni.

Jesús joinchexingamehe ná xí que vechonda lepra

(Mt. 8.1-4; Lc. 5.12-16)

⁴⁰ Ná tattíta veninxin chin lepra conchienhe ngain Jesús, co tattíta mé vettoxin nnta-jochjihí co ndaço ngain Jesús:

—Si jaha rinao, nchao sinchexingamana de chin que rrichonda.

⁴¹ Jesús coiaconoehé, mexinxin cattede conixin rá co ndaço:

—Ján, rinaho. Xingamaha.

⁴² Co are Jesús joexin ndaço yá, tattíta mé ndavaçhjehe chin lepra que vechonda, co ixonhi chin vechonda.

⁴³ Cottimeja Jesús coetonhe sacjoi, co ndaço:

⁴⁴ —Pero xonhi chojni ndache, jehó tji ngain xidána para que jehe xa sicon xa que jaha ixonhi chin chonda. Co danjo cosa ngain Dios inchin coetonhe Moisés para que cainxin chojni tsonohe na ixin jaha oxingamaha.

⁴⁵ Pero tattíta mé sacjoi, co coequín chojni cainxin tti jehe conhe. Mexinxin Jesús íchoha vařago ngain rajna. Co vacji jehó ngain lugar tti xonhi chojni vintte. Pero masqui jamé, vacji tsje chojni de cainxin rajna ngain tti vehe Jesús.

2

Jesús joinchexingamehe ná xí que choha vacji

(Mt. 9.1-8; Lc. 5.17-26)

¹ Vatto canxion nchanho cottimeja Jesús cjan cjoi ngain rajna Capernaum. Co chojni conohe ttinó mero vehe Jesús nttiha.

² Anto daca řatte anto tsje chojni ngain Jesús que ni vittjaha nchia vixinhi na co hasta tti ndoja vixin na. Co nttiha Jesús ndache na joajné Dios.

³ Cottimeja nó tti xí tetsengui iná xí que choha vacji; vintteguicao xa ngain Jesús.

⁴ Pero choha vatto na para tti jí Jesús, ixin anto tsje chojni te ngandanguí nchia mé. Mexinxin cjoásó na ngataha nchia co vinttjian na rioho techoe nchia co nttiha joinchexincanjinxin na tti nihi mé conixin ná jino ngain camillé para ngain lugar tti jí Jesús.

⁵ Co are Jesús vicon queřén joinchehe na, jehe conohe ixin jehe na vitticaon na que jehe chonda joachaxin. Co Jesús ndačo ngain tti nihi mé:

—Ojointsatjañaha jaha cain tti jianha joinchehe.

⁶ Co nttiha tate canxion ximaestroey ley Israel, co řaxaon xa:

⁷ “¿Quedonda jañá jinichja xí yá? Ixin ndačo xa nchao nchehe xa cosa que jehó Dios nchao nchehe. Xonhi quensen nchao nchetjañehe chojni tti jianha que nchehe na; jehó Dios tti nchao nchetjañehe na.”

⁸ Pero Jesús oconohe tti řaxaon ximaestro mé, co ndačo ngain xa:

—¿Quedonda jañá řaxaon jaha ra?

⁹ ¿Quexehe tti icha tanguiha, rrondattjan ná tti nihi: “Ovitjañaha jaha cain tti jianha joinchehe”, o rrondattjan: “Dingattjen, co tsinhi camillá co sattjixin rottea”?

¹⁰ Co tsjagoha ra cai ixin janha tti Xí que joixin de ngajni chonda joachaxin ngataha nontte nttihi para ntatjañá chojni tti jianha que nchehe na.

Cottimeja ndačo Jesús ngain tti nihi mé:

¹¹ —Jaha rrondattjo, dingattjen, co tsinhi camillá co sattji para nchiandoi.

¹² Co rato mé vingattjen tti nihi mé, co coame camillé, co vařhhexin de nttiha are tatetsjehe ni icha. Co rato mé cainxin chojni que vintte nttiha goan na admirado co joinchesayehe na Dios ixin jehe anto jian co chonda cainxin joachaxin. Co ndache chó na:

—Xonhi nttiha vocon na ná cosa janhi.

Jesús nichjé Leví

(Mt. 9.9-13; Lc. 5.27-32)

¹³ Cottimeja Jesús cjoi ngandehe lago de Galilea iná, co are conchiennehe tsje chojni ngain Jesús, jehe joinchecoenehe na de ixin Dios.

¹⁴ Co are Jesús sacjoixin de ngandehe lago mé co vatto ngandanguí ná caseté cobro, Jesús vicon nttiha tají ná tattíta vinhi Leví jinchehe cobro nttiha, co ndodé vinhi Alfeo. Jesús ndačo ngain jehe Leví:

—Řacoi nganji co rroehna na.

Co Leví vingattjen co sacjoi conixin Jesús.

¹⁵ Co después are Jesús tajine ngaxinhi nchiandoha Leví, conchiennehe anto tsje xicobrador co icha chojni que vanchehe cosa jianha. Cain chojni mé jinecaho na Jesús conixin cain chojni que vacao ixin anto tsje chojni varroé.

¹⁶ Co cai cjoi canxion ximaestroey ley co ícanxin xifariseo ngain nchiandoha Leví. Cain chojni mé vicon ixin Jesús jine conixin tsje chojni que nchehe cosa jianha, co ndačo cain xí mé ngain chojni que vacao Jesús:

—¿Quedonda ximaestro ra jinecaho xa co dicaho xa xicobrador co icha chojni que nchehe cosa jianha?

¹⁷ Are Jesús coinhi yá ndačo:

—Chojni que niha, chojni mé rrongondeha xincheřoan, jehó tti chojni nihi, mé tti rrongondehe xincheřoan. Mexinxin janha joiha para joinichjá chojni jian, sino que janha joihi para joinichjá chojni que tenchehe jianha.

Are joanchianguihi na Jesús ixin quedonda chojni jehe dinttecañaha na

(Mt. 9.14-17; Lc. 5.33-39)

¹⁸ Nchanho mé chojni que vacao Juan co chojni que vacao xifariseo vinttecjáño na. Co icanxin chojni cjoy na ngain Jesús co joanchianguihi na co ndaço na:

—¿Quedonda chojni que xicao Juan co chojni que xicao xifariseo dinttecjáño na pero chojni que çhjiho jaha nahi?

¹⁹ Jesús ndaço:

—¿Acaso cain chojni que ttji ngain ná vandango tti tottehe na nchao sinttecjáño na are ça nttiha jí xinovio ngain na? Nahi, jehe na çhoha sinttecjáño na si ça jí xinovio ngain na.

²⁰ Pero are tsí nchanho que xinovio satsjixin de ngain na, cottimeja jehe na chonda que sinttecjáño na.

²¹ Co Jesús ndaço iyó ejemplo:

—Çonhi chojni teyehe rioho lonto naroa ngain ná lonto nttaxi ixin lonto naroa ndadixehe co ndattinchje lonto nttaxi, co tti diguichje icha tojie.

²² Co cai çanttjao are jidatsoxinhi çan, çhoha siquia çan ngá ná roançan onttaxi ixin tsonçhintaon çan roa mé, co ndasitján çanttjao co ndasitján roançan. Mexinxin çanttjao are jidatsoxinhi çan, chonda que siquia çan ngá ná roançan nroaxin para dacaha tsonçhintaon çan roançan mé. Jañá tti costumbre que jaha ra chonda ra jiha de acuerdo ngain tti janha rrindattjo ra.

Chojni que vacao Jesús conchinji na trigo ngain nchanho que nchejogaha ni
(Mt. 12.1-8; Lc. 6.1-5)

²³ Ná nchanho que nchejogaha ni, Jesús conixin chojni que vacao vatto na ngain canxion jngui tti diguinga trigo, co chojni que vacao Jesús conchinji na canxion ninchjan de trigo para joine na.

²⁴ Co canxion xifariseo vicon xa queçén tenchehe na. Mexinxin ndaço xa ngain Jesús:

—Tsjexin, ¿quedonda chojni que çhjiho nchehe ça jai que jiquininxinha nchehe chojni ça, ixin jai nchanho para nchejogaha cain chojni?

²⁵ Co Jesús ndaço:

—¿Aça tsjeha ra tti jitaxin de ixin queçén joinchehe David conixin cain xicompañeroe are vechondaha na tomi co venhe na jintta?

²⁶ Are mé Abiatar vehe xidána icha importante, co David joixinhi ngaxinhi nchiandoha Dios co joine niottja que vehe ngataha altar, co jeho xidána jiquininxin para jine niottja mé. Co David çhjé chojni que vacao nio cai co joine na nio.

²⁷ Cai ndaço Jesús ngain xa:

—Nchanho que nchejogaha chojni jí nchanho para ixin chojni co jeha chojni te para ixin jehe nchanho mé.

²⁸ Mexinxin cai janha, tti Xí que joixin de ngajni, chonda joachaxin para ngain nchanho que nchejogaha ni.

3

Ná xí que ndadixemadoho ná rá
(Mt. 12.9-14; Lc. 6.6-11)

¹ Iná nchanho Jesús cjoy ngaxinhi ná nihngo iná. Co nttiha tají ná xí que ndadixemadoho ná rá.

² Co nttiha tetsaya canxion xifariseo para sicon xa aco sinchexingamehe xí mé ngain nchanho que nchejogaha ni, para jamé rrochonda quehe rroçjanguixin xa Jesús.

³ Cottimeja ndaço Jesús ngain tti xí que ndadixemadoho ná rá:

—Dingattjen co darihi nttimé ngosine.

⁴ Cottimeja joanchiangui Jesús ngain xicanxin co ndaço:

—¿Quehe jiquininxin sinchehe ni ngain nchanho que nchejogaha ni? ¿Asinchehe ni jian o sinchehe ni jianha? ¿Atsançhjangandaha ni ndasenhe ná chojni, o ani nasoenxon ní?

Co cain xa tencoa xa.

⁵ Cottimeja Jesús goñao co tsjehe ngain xa co anto vechín ixin vicon que jehe xa joinaoha xa coixin xa de ixin Dios. Co ndaço Jesús ngain tti venihi:

—Ttinxe rá.

Co jehe tti xí mé coinxe rá co ndaxingamehe ra.

⁶ Cottimeja cain xifariseo sacjoi xa co coexinhi xa cjoao xa chojni que vacao Herodes ixin queçén sinchehe na para nasoenxon na Jesús.

Are anto tsje chojni çatte ngandehe lago

⁷ Cottimeja Jesús sacjoixin de nttiha conixin cainxin chojni que vacao co sacjoi na para ngandehe lago de Galilea co anto tsje chojni Galilea rroé na.

⁸ Co chojni joixin de nontte dinhi Judea, de ciudad de Jerusalén co de ngain iná nontte dinhi Idumea. Icha chojni joixin lado chinxin nchanho de río Jordán. Icha na joixin na de ngain ciudad de Tiro co Sidón. Co icha na joixin na de icha rajna. Cainxin chojni mé cjoí na joitsjehe na Jesús ixin jehe na conohe na de ixin cainxin cosa jian que vanchehe Jesús.

⁹ Mexinxin Jesús ndache chojni que vacao ixin cjoé na ná barco para sengá ngataonhe jinda are rroʒatte tsje chojni para sixintjaha chó na ngaca Jesús.

¹⁰ Ixin anto tsje chojni venihi joinchexingamehe Jesús, mexinxin cainxin ninihi vaʒattetja na Jesús para vacatte na.

¹¹ Co are chojni que vechonda espíritu jianha vaguicon Jesús, vaguettoxin nttajochjihí co vandačo sén:

—¡Jaha tti Xenhe Dios!

¹² Pero Jesús vaquetonhe ixin rrondačoha quensen jehe Jesús.

Jesús coinchiehe tti tteyó chojni que vacao

(Mt. 10.1-4; Lc. 6.12-16)

¹³ Cottimeja Jesús coaní ná jna, co nttiha jehe vayé chojni que jehe joinao coinchiehe co jehe na conchienne na ngain jehe.

¹⁴ Co jehe coinchiehe tteyó chojni para sacao co para rrorroanha na icanxin rajna para rronichja na joajné Dios.

¹⁵ Co joanjo joachaxin ngain na para sinchexingamehe na chojni nihi co para senguixin na espíritu jianha de ngain chojni.

¹⁶ Co janhi vinhi tti tteyó chojni mé. Ná vinhi Simón, co Jesús joincheguini jehe Pedro cai;

¹⁷ co Jacobo conixin Juan xanchó jehe Jacobo, co cayoi nimé xenhe Zebedeo co cayoi nimé Jesús joincheguini na Boanerges ixin anto chintto vintte na;

¹⁸ co icha chojni vinhi Andrés; Felipe; Bartolomé; Mateo; Tomás; co iná tti vinhi Jacobo cai, pero mé xenhe Alfeo; co Tadeo; co Simón, jehe ná de tti partidoe chojni político que vaquetocaho chojni romano;

¹⁹ co Judas Iscariote, tti joindačo para tse na Jesús.

Are ndačo chojni ixin Jesús chonda joachaxín Satanás

(Mt. 12.22-32; Lc. 11.14-23; 12.10)

Cottimeja Jesús sacjoi ngain nchia tti vehe conixin cain chojni que vacao.

²⁰ Co nttiha anto tsje chojni ʒatte iná co ʒonhi tiempo vechonda Jesús ni para joine conixin cain chojni que vacao.

²¹ Co are conohe nriparienté Jesús ixin quehe vanchehe, jehe na cjoí na para sarrojicaó na Jesús ixin ʒaxaon na que Jesús ndajoinchetján sentidoe.

²² Cai canxion ximaestroé ley que joixin de ciudad de Jerusalén ndačo xa:

—Xí jihí chonda xa Beelzebú, tti ttetonha ngain cain espíritu jianha, ixin jehe xa nchao ttetonha xa co dengui xa espíritu jianha.

²³ Cottimeja Jesús vayé cain chojni mé co ndačo ná ejemplo ngain na:

—¿Satanás queʒén sengui ʒajeho Satanás?

²⁴ Co si ná gobierno chjea para tsetocaho chó, gobierno mé ʒocho tsonchjenhe sé

²⁵ co si ná nindoha ngain nchia atto tteto na, cai tsonchjenha.

²⁶ Co cai Satanás si tseto jeho, cai tsonchjenha sé. Chonda que ndatsjexin.

²⁷ ʒonhi quensen sixinhi ngaxinhi nchiandoha ná xí que anto tsanga para santsjehe cosé xa que chonda xa ngaxinhi nchiandoha xa si tsiaha xa saho. Solo jamé para nchao sasicaó cosé xa que jí ngaxinhi nchiandoha xa.

²⁸ 'Anto ndoa tti rronhattjo ra: Cain chojni nchao sitjañehe cainxin cosa jianha que nchehe na co cainxin tti jianha que nichja na.

²⁹ Pero chojni que nichja jianha ixin Espíritu Santo, chojni mé nchoe sitjañeha, co cainxin tiempo sintteca na tti jianha mé.

³⁰ Jañá ndačo Jesús ngain na ixin jehe na ndačo na ixin Jesús vechonda espíritu jianha.

Janné Jesús co xanchó

(Mt. 12.46-50; Lc. 8.19-21)

³¹ Cottimeja cjoí janné Jesús conixin xanchó pero ʒocho joixinhi na nchia ixin anto tsje chojni te ngain Jesús. Mexinxin tavintte na ndoja co coetonha na que rroquí ngain na.

³² Co chojni que tate ngaca Jesús ndačo na ngain:

—Janná co xanchó ndoja nttihi te na, co rinao na rronichjaha na jaha.

³³ Co Jesús ndačo:

—¿Quensen jannana, co quecá xanchian?

³⁴ Cottimeja Jesús tsjehe ngayehe cain nite ngandanji jehe co ndačo:

—Cain chojni tehe tti inchin jannana co jehe na tti inchin xanchian,
 35 ixin quexeho chojni que nchehe inchin rinao Dios, mé tti xanchian co mé tti jannana.

4

Ejemplo tti joiquenga trigo ngataon jngui
 (Mt. 13.1-9; Lc. 8.4-8)

¹ Iná nchanho Jesús coexinhi cjoagoe chojni de ixin Dios ngandehe lago de Galilea, co xatte anto tsje chojni ngain Jesús nttiha. Mexinxin Jesús vengá ná barco que vehe nttiha ngataonhe jinda. Co cainxin chojni vittohe na ngandehe jinda.

² Cottimeja Jesús cjoagoe na anto tsje cosa de ixin ejemplo co cai ndačo janhi ngain na:

³ —Ttinhí ra tí rrondačhjan janha. Ná xí cjoí xa joiquenga xa trigo ngataon jngui.

⁴ Pero are jitja xa trigo ngataon jngui ttoha noanchjan de trigo vinttji ngá nttiha co jói conttoa co ndajoin va trigo mé.

⁵ Co icha noanchjan de trigo vinttji ngataha tti jí ttjao tti ttjinha jinche jí. Co trigo mé anto dca čhinhi ixin ttjinha jinche xanotaon.

⁶ Pero nchanho toin ndajoinchexema catrigo mé ixin tsjeha noehe ca vechonda ca.

⁷ Co icha noanchjan de trigo vinttji ngagaha canchaha. Co canchaha icha dca vangui ca co coančhjangaha ca trigo vangui, co cain catrigo mé xonhi joinchchjan ca.

⁸ Pero icha noanchjan de trigo vinttji tti jian jinche, co trigo mé nchoe joanjo noa. Canxion nihi trigo mé joinchchjan de treinta noanchjan cada ninchjan, co icanxin trigo joinchchjan hasta sesenta noanchjan cada ninchjan, co icanxin trigo joinchchjan hasta cien noanchjan cada ninchjan.

⁹ Co ndačo Jesús ngain na cai:

—Xo nchao ttinxin ra, ttinhí ra jian.

Quedonda Jesús joinchegonda tsje ejemplo
 (Mt. 13.10-17; Lc. 8.9-10)

¹⁰ Cottimeja are sacjoi cainxin chojni co jehó Jesús conixin tti tteyó chojni que vacao co icanxin ni xa vittohe nttiha, joanchiangui na ngain Jesús ixin quehe rročo ejemplo mé.

¹¹ Co Jesús ndačo ngain na:

—Jaha ra Dios ndačo ixin tsonoha ra tti jima de ixin quexén ttetonha jehe. Pero janha nichja ngain chojni que čhjoaha na jehó de ixin ejemplo.

¹² Jamé para que masqui dicon na tti nttaha pero inchin rroguiconha na, co masqui ttinhí na tti ndačhjan pero ttinxinha na, co para tsentoxinha vidé na ni sitjañeha na cain cosa jianha que nchehe na.

Jesús ndačo quehe rročo ejemplo tti joiquenga trigo
 (Mt. 13.18-23; Lc. 8.11-15)

¹³ Ndačo Jesús ngain na cai:

—¿Attinxinha jaha ra quehe rročo ejemplo jiji? ¿Mexinxin quexén tsinxin jaha ra icha ejemplo que janha rrondačhjan?

¹⁴ Tti coenga trigo, mé inchin tti ndačo joajné Dios ngain icha chojni.

¹⁵ Canxion chojni inchin tti trigo que vetsinga ngá nttiha, rročo ixin ttinhí na joajné Dios, pero Satanás tí co ndanchetjañeha na palabra que coinhí na.

¹⁶ Icanxin chojni inchin tti trigo que vetsinga ngataha tti jí ttjao ixin are ttinhí na joajné Dios, anto čhjoin tonohé na dayé na joajna mé.

¹⁷ Pero inchin trigo que chondaha tsje noehe seha tončhjenhe trigo, jamé jehe chojni mé cai; cottimeja are tangui tonhe na co icha chojni feo nchehe ngain na ixin dtticaon na joajné Dios, jehe na ndadoan na desanimado.

¹⁸ Co icanxin chojni inchin tti trigo que vinttji ngagaha canchaha. Rročo que jehe na ttinhí na joajné Dios

¹⁹ pero icha xaxaon na cain problema que jehe na chonda na nttihi ngataha nontte, co tomí ncheyehe na para icha ncheoxinhi na cosa que jí ngataha nontte. Co cain yá ndanchetjanji joajna mé, co incheha na inchin ttetonha joajna jiji.

²⁰ Pero te icanxin chojni que ttinhí na joajné Dios co dayé na ngain ansén na co nchehe na inchin ttetonha joajna mé. Co cain chojni mé inchin tti trigo que vinttji tti jian jinche co joanjo tsje noatrigo. Canxion chojni mé inchin tti trigo que joinchchjan de treinta noa ngain nacoa ninchjan, co icanxin na inchin tti trigo que joinchchjan de sesenta co de cien noatrigo ngain nacoa ninchjan.

Ejemplo lámpara
 (Lc. 8.16-18)

²¹ Cai ndačo Jesús:

—¿Apoco ná chojni sinchegacaon ná lámpara cottimeja tsema lámpara mé ngaxinhi ná cajón o ngangui saoen? Nahi, chonda que tsín lámpara ngataha ná cosa noi para nchao sinchegasán ngaxinhi nchia.

²² Xonhi cosa jima que tsononxinha, co xonhi cosa jima que texaxaon ni ngain ansén ni que chojni tsonoeha; cain cosa chonda que tsononxin cosa.

²³ Jaha ra que ttinxin ra, ttinhi ra jian.

²⁴ Cai ndacho Jesús:

—Ttjiho ra cuidado tti tsinhi ra. Inchin medida que jaha ra dattechoaxin ra, Dios jamé sattechoha jaha ra cai. Co Dios rrochjá ra icha, jaha ra xo ttinxin ra.

²⁵ Ixin chojni que chonda, Dios tsjengujina na para rrochonda na icha, pero chojni que xonhi chonda, Dios santsjehe cainxin tti jehe na chonda na masqui tsjeha chonda na.

Ejemplo de quexén dangui jino

²⁶ Ndacho Jesús cai:

—Tti ttetonha Dios inchin noa que ttenga chojni ngataon jngui.

²⁷ Chojni tenga co sacjan dinttejoa, cottimeja dingattjen co jamé datto ttie co datto nchanho. Co noa chintaoon noa co chinhi jino pero tti jnguihi noeha quexén dangui jino mé.

²⁸ Ixin nontte nchegangui jino mé. Saho chinhi chán jino cottimeja ntté, cottimeja noa.

²⁹ Co are ocha noa mé ngain ní co ndaxema ní jian, ovittja tiempo para tsanda na ní mé.

Ejemplo ná tsé que dinhi mostaza

(Mt. 13.31-32; Lc. 13.18-19)

³⁰ Cai ndacho Jesús:

—¿Quehe cosa nchao sinttacaninxin tti ttetonha Dios?

³¹ Mé inchin ná tsé icha nchin de cainxin tsehe ca co tsé mé dinhi mostaza.

³² Pero are dinga tsé mé, dangui qué tse icha que cainxin ca hasta conttoa nchao nchejogaha va ngagaha ntté ca mé.

Quexén vanchegonda Jesús cain ejemplo

(Mt. 13.34-35)

³³ Jañá vacjago Jesús joajné Dios conixin tsje ejemplo inchin cain ejemplo yá, hasta tti, chojni nchao coinxin jian.

³⁴ Jesús jehó nichjé chojni de ixin ejemplo, pero después, vandache chojni que vacao tti rrocho cainxin ejemplo yá.

Jesús tajoaquehe chintto conixin olé lago

(Mt. 8.23-27; Lc. 8.22-25)

³⁵ Nchanho mé are ndaconttie, Jesús ndache chojni que vacao:

—Sachjin na toenxin lago jiji.

³⁶ Cottimeja nttiha cointtohe na cainxin chojni co sajoicao na Jesús ngá barco tti vengá. Co rroé icanxin barco cai.

³⁷ Co joi ná chintto anto soji ngataon jinda; anto soji coeto nda co viquia nda barco tti jidicao Jesús.

³⁸ Co are mé Jesús tajicjon ná almohada tajijoa ngá barco ngain ná lugar noton barco, co chojni que vacao Jesús joinchexingamehe na co ndacho na ngain jehe:

—¡Maestro! ¿Andosanha ixin ndatexincanjingui na jinda?

³⁹ Cottimeja vingattjen Jesús, co joinchesattehe chintto co jinda co ndacho ngain:

—¡Tencoal! ¡Co tadaríhi ndacoa!

Co rato mé tavehe chintto ndacoa co tavehe jinda ndacoa.

⁴⁰ Cottimeja ndacho Jesús ngain chojni que vacao:

—¿Quedonda anto xaon ra? ¿Quedonda xa chondaha ra confianza ngain Dios?

⁴¹ Pero jehe na anto xaon na, co jehó na ndache chó na:

—¿Quensen jiji que hasta chintto co jinda ditticaon tti jehe ndacho?

5

Tti xí de ngain nonttehe Gadara que vechonda espíritu jianha

(Mt. 8.28-34; Lc. 8.26-39)

¹ Joi na toenxin lago mé, ngain nonttehe Gadara.

² Co are Jesús vachjexin de ngá barco, joi ngain Jesús ná xí que vechonda espíritu jianha.

³ Xí mé vehe ngaxinhi tti vařanguindehe na chojni que ndavaguenhe tiempo mé. Co xonhi chojni coixinhi coia xa masqui conixin cadena.

⁴ Tsje nttiha are icha saho chojni xa vaquixinhi na vaquixian na xa cadena rotté xa co rá xa, pero cainxin tiempo jehe xa vaconchintaon xa cadena co vagaña xa cadena. Co ixonhi chojni vaquixinhi ngain xa.

⁵ Co cain tti vacji xa ngagaha jna co ngaxinhi tti vaẁanguindehe na chojni que ndavaguenhe puro vacoyao xa tte co nchanho, co vanchenihi nntaohé xa conixin xo.

⁶ Pero are vicon xa Jesús ẁa cjon, jehe xa coinga xa joí xa ngain Jesús co vettoxin nntajochjihí xa ngattoxon con Jesús;

⁷ co ndaço xa sén:

—¿Quedonda dixinte nganji, jaha Jesús, Xenhe Dios que ttjen ngaini? Conixin nombré Dios nntatsanha ñao que ncheguetanha na tangui janha.

⁸ Ndaço jañá ixin Jesús ojindaço ngain:

—¡Jaha espíritu jianha, sattjixin de ngain xí jihí!

⁹ Co Jesús joanchiangui co ndaço:

—¿Queẁén dinhi jaha?

Co jehe espíritu jianha ndaço:

—Janha dinhi na Legión ixin janha na anto tsje na.

¹⁰ Co espíritu jianha anto joinchetsenhe ñao Jesús ixin senguixinha de ngain región mé.

¹¹ Co ixin nttiha vintte anto tsje cocochi vajinea va chiaon rotté ná jna,

¹² mexinxin cain espíritu jianha joinchetsenhe ñao Jesús co ndaço:

—Roanha ni ra ngain cocochi taha co tançhanda ni ra sixinhi na ngaxinhi va.

¹³ Cottimeja Jesús joanjo joachaxin, co cain espíritu jianha mé vaçhjexin de ngaxinhi xí mé, co sajoixinhi ngaxinhi cocochi. Nttiha vintte inchin yó mil cocochi, co cainxin cocochi mé ndavinttecoloco va co coinga va xincanji va ngain lago co nttiha joingui va jinda co ndavintteguenxin cainxin va ixin vintteconhe va jinda.

¹⁴ Cottimeja cain chojni que vaquingaria cocochi mé ẁaon na co coinga na joiquequín na chojni ngagaha rajna co icha chojni que vintte ngataon jngui. Co cjoí chojni mé joitsjehe na quehe conhe.

¹⁵ Co are joiji na tti jí Jesús, vicon na tti xí que vechonda tsje espíritu jianha ojingá xa lonttoe xa co tají xa ndacoa. Co jehe na are vicon na mé, anto ẁaon na.

¹⁶ Co cain chojni que vicon coequin na queẁén conhe tti xí que vechonda tsje espíritu jianha co queẁén conhe cain cocochi.

¹⁷ Cottimeja cain na coexinhi na joinchetsenhe na ñao Jesús que satsjixin de ngain nonttehe na.

¹⁸ Are Jesús coani barco, tti xí que vechonda tsje espíritu jianha joinchetsenhe ñao Jesús ixin rrocji ngain Jesús cai.

¹⁹ Pero Jesús çhoha, co ndaço:

—Sattji para nchiandoi co diquequinhi cain ni ichó cainxin tti joinchehe Dios nganji, co queẁén coiaconoaha.

²⁰ Cottimeja tti xí mé sacjoi co joiquequín chojni que vintte regioen Decápolis cainxin tti joinchehe Jesús ngain jehe. Co cainxin chojni que coinhi, goan na admirado.

*Are xingamehe xannçhichjenhe Jairo conixin ná nçhí que catte lonttoe Jesús
(Mt. 9.18-26; Lc. 8.40-56)*

²¹ Co are Jesús cjan toenxin lago iná conixin barco, cjoí anto tsje chojni ngain Jesús, co jehe nttiha tavehe ngandehe jinda.

²² Cottimeja joí ná xí que vaquetonha xa ngain nihngo nttiha, co vinhi xa Jairo. Are Jairo joí, vettoxin nntajochjihí ngain Jesús,

²³ co anto joinchetsenhe ñao Jesús co ndaço:

—Xannçhichjanhna ndajidenhe xan. Nntatsanha ñao, çhjin na co ttín rá ngataha xan para rroxingamehe xan co sechon xan icha.

²⁴ Cottimeja sajoicao xí mé Jesús. Pero anto tsje chojni cjoí cai co anto conttedo na ngaca Jesús.

²⁵ Co ngacjén chojni mé vehe ná nçhí que venihi nçha; ovechonda tteyó nano que veguenguíhi nçha jni.

²⁶ Co anto tsje ngain xincheẁaon cjoí nçha pero ẁonhi ẁaon vittja. Ojoexin joinchexinhi nçha cainxin tti vechonda nçha, pero icha co icha venihi nçha.

²⁷ Co are coinhi nçha ixin Jesús vanchexingamehe tsje chojni, conchienenhe nçha ngacjén chojni co jimao catte nçha lonttoe Jesús,

²⁸ ixin vaẁaxaon nçha co vandaço nçha: “Si rrocatte masqui jeho lonttoe Jesús, janha rroxingamana.”

²⁹ Co are nçhí mé catte nçha lonttoe Jesús, rato mé tavehe jni que jehe nçha vechonda nçha. Co conohe nçha ngain cuerpoe nçha ixin ondaxingamehe.

³⁰ Cottimeja Jesús conohe ixin ná chojni ojoinchegonda joachaxin que chonda Jesús. Mexinxin ngaria Jesús co tsjehe ngayehe chojni co joanchiangui co ndaço:

—¿Quensen catte lonttona?

³¹ Cottimeja chojni que vacao Jesús ndaço na:

—Soixin dicon que anto tsje chojni tonttedo na ngaca soixin, mexinxin quedonda soixin danchiangui: “¿Quensen catte?”

³² Pero Jesús tsjehe ngayehe na para rroguicon quensen catte lonttoe.

³³ Cottimeja nchi mé onohe quehe conhe, co jiçanga ncha de ixin joaçao cjoí ncha vettoxin nttajochijhi ncha ngain Jesús, co ndaço ncha ixin quehe joinchehe ncha.

³⁴ Cottimeja Jesús ndaço ngain nchi mé:

—Jaha oxingamaha ixin vitticaon na. Sattji contenta ixin irrocjanha tsoniha de ixin chin que jaha joarichonda.

³⁵ Xa jinichja Jesús jañá are joí canxion chojni de ngain nchiandoha Jairo co ndaço na ngain Jairo:

—Xanha ondavenhe xan. Inchemolestaha ximaestro.

³⁶ Pero Jesús joincheha caso tti ndaço na, co ndaço Jesús ngain Jairo:

—Xaonha; jehó ditticaon na janha.

³⁷ Co sajoicao Jairo Jesús ngain nchiandoha pero Jesús çhoja joicao tsje chojni, jehó Pedro, Jacobo co Juan xanchó Jacobo.

³⁸ Co are joiji na ngain nchiandoha Jairo, cainxin chojni que te nttiha anto tetsjanga na co tetoyao na.

³⁹ Jesús joixinhi co ndaço ngain na:

—¿Quedonda anto toyao jaha ra co tsjanga ra? Xannçhichjan ndavenha xan, jehó tajihoa xan.

⁴⁰ Pero jehe na cjoanoa na Jesús. Cottimeja Jesús ndache cain chojni mé que vaçhjexin na de nchia. Co jehó Jesús conixin ndodé xannçhichjan co janné xan conixin tti ní chojni que joicao Jesús joixinhi na tti jí xannçhichjan mé.

⁴¹ Co Jesús tsehe rá xan co ndaço ngain xan:

—Talita, cumi —que rroço: Xannchi, janha rrondattjo, dingattjen.

⁴² Co rato mé, jehe xannçhichjan mé, que vechonda tteyo nano, vingattjen xan co nchao sacjoixin rotté xan. Co cain chojni nttiha anto goan na admirado.

⁴³ Pero Jesús anto coetonhe na ixin çonhi chojni rrondache na de ixin tti joinchehe Jesús. Co ndaço Jesús cai ixin rrochje na xannçhichjan mé sine xan.

6

Jesús ngain Nazaret

(Mt. 13.53-58; Lc. 4.16-30)

¹ Cottimeja Jesús conixin chojni que vacao sacjoixin na de nttiha co sacjoí na para Nazaret, rajné Jesús.

² Co are joí nchanho para nchejogaha chojni Israel, Jesús coexinhi cjoagoe na de ixin Dios ngaxinhi nihngo. Co tsje chojni tti coinhi quehe nichja Jesús goan na admirado co ndaço na:

—¿Ttinó coanguixin xí yá cainxin cosa yá? ¿Queçén xí yá anto jian chonxin de ixin Dios, co queçén nchehe xa anto tsje milagro?

³ Xí yá tti carpintero, xenhe María co xanchó xa Jacobo, José, Judas co Simón; co cai cain xanchó xa xannchi nttihi te xan ngain rajná na.

Mexinxin çhoja na joinchehe na caso tti ndaço Jesús.

⁴ Pero Jesús ndaço ngain na:

—Cainxin chojni nchesayehe ná profeta, pero nahi profeta que ttixin de ngain çajeho rajné na ni profeta que ttixin de ngain çajeho familié na ni de ngain çajeho nindoha na.

⁵ Mexinxin Jesús çhojaha joinchexingamehe tsje chojni nttiha. Pero Jesús catte nchion chojni nttiha co jehe na xingamehe na.

⁶ Co Jesús goan admirado ixin chojni nttiha çhoja na vitticaon na ngain jehe. Cottimeja Jesús coingaria icanxin rajna que te chiaon para joicjagoe chojni de ixin Dios.

Jesús rroanha chojni que vacao para joinichja na de ixin Dios

(Mt. 10.5-15; Lc. 9.1-6)

⁷ Cottimeja nichja ngain tti tteyo chojni que vacao co rroanha yó co yó na ngain icha rajna para joinichja na de ixin Dios. Co jehe Jesús joanjo joachaxin ngain na cai para sengui na espíritu jianha que te ngain chojni.

⁸ Co coetonha ngain na cai que çonhi sicao na ngoixin tti satsji na, ni ná bolsa, ni niottja, ni tomí. Jehó sicao na nttacotto para tsjixin na are tsonçhjen na co

⁹ catte corriente tsjanga na co sinttengá na nanacoa camisa, çhoha sinttengá na yoyó camisa.

¹⁰ Co ndaço Jesús ngain na cai:

—Are saso ra ná nchiandoha na co jehe na rrondaço na ixin nchao tasintte ra nttiha, jaha ra tadintte ra nttiha hasta que satsjixin ra de ngain rajna mé.

¹¹ Co si çhonja rajna sinaoha na sayaha ra na ni sinaoha na tsinhi na tti rronichja ra, dathjexin ra de nttiha co tontsjenga ra jinche que jiyá cattea ra. Jamé para ná señal ixin vitticaonha ra na. Co ndattjo ra que are tsí nchanho que Dios sinchejusguehe cainxin chojni, are mé, seguro que chojni que vintte ngain ciudad Sodoma co Gomorra icha sojiha castigo sayé que cain chojni ngain rajna tti rroçhoha sayaha ra.

¹² Cottimeja savintteçji chojni que vacao Jesús ngain tsje rajna co ndache na cain chojni ixin chonda na que tsentoxinhi vidé na.

¹³ Co cai venguixin na tsje espíritu jianha de ngaxinhi cuerpoe chojni, co coinga na aceite ngataha já tsje chojni nihi, co jamé joinchexingamehe na na.

Are ndavenhe Juan, tti vancheguitte chojni

(Mt. 14.1-12; Lc. 9.7-9)

¹⁴ Are ngoixin mundo venohe quehe vanchehe Jesús, cai rey Herodes conohe co ndaço: —Juan tti vancheguitte chojni cjan xechon, mexinxin chonda cain joachaxin yá.

¹⁵ Co icanxin chojni vandaço:

—Mé tti profeta Elías.

Co icanxin chojni vandaço:

—Mé ná profeta inchin cain profeta que vacji are saho.

¹⁶ Pero are Herodes coinhi cain yá, jehe ndaço:

—Jehe seguro Juan, tti janha coetonha para çhinji já, co jai xechon.

¹⁷ Are saho Herodes coetonha para joicao na Juan viaxinhi co coia na conixin cadena ngaxinhi cárcel ixin ná naníta vinhi Herodías ndaço jamé. Jehe Herodías cjoí çhihi Felipe, xanchó jehe Herodes, pero Herodes joantsjehe xanchó çhihi xan para vecaho jehe Herodes.

¹⁸ Co are mé Juan ndaço ngain Herodes:

—Jianha ixin jaha rricoho çhihi xanchó.

¹⁹ Mexinxin jehe Herodías anto goñaon ngain Juan ixin ndaço Juan jañá, co joinao narrogoenxon Juan. Pero çhoha joinchehe mé

²⁰ ixin Herodes venohe que Juan anto jian ngain ansén co vaguitticaon ngain Dios. Mexinxin vaçaon Herodes para narrogoenxon Juan, co coançhandaha Herodes Herodías para cjoaya ngain Juan. Co masqui Herodes antoha jian vaquinxin tti vandaço Juan, pero jehe jáñ vajinao vaquini.

²¹ Pero are quié Herodes, Herodías nchao coetonha para ndavenhe Juan. Ixin are mé Herodes vechonda ná vandango. Co jehe joanjo joine tsje xí que vaquetonha ngain region Galilea, co tsje xí que vaquetonha ngain xisoldado, co icha chojni importante nttiha.

²² Co ná xannçhi xenhe Herodías joixinhi xan co tte xan ngaxinhi nchia tti tenexin cainxin chojni mé. Herodes co icha chojni que tenecaho nttiha anto joincheçoxinhi na ixin queçén tte xannçhi mé. Mexinxin Herodes ndaço ngain xannçhi mé:

—¿Quehe cosa rinao? Danchiana co janha rrochjaha.

²³ Co jehe Herodes ndaço co joinchejurá ixin sanjo quexeho cosa sanchia xannçhi mé masqui hasta ngosinexin región que jehe vaquetonha.

²⁴ Jehe xan vachje xan co ndaço xan ngain janné xan:

—¿Quehe sanchiá rey?

Co janné xan ndaço:

—Danchiehe rey já Juan tti ncheguitte chojni.

²⁵ Co jaicoa cjan xan joixinhi xan tti jí rey co ndaço xan ngain:

—Janha rinaho que jai rrochjana já Juan ngá ná láto.

²⁶ Cottimeja rey anto vechín. Pero ixin jehe ojoinchejurá ixin sanjo tti sanchia xan, co ixin coinhi cain chojni que te ngain, mexinxin jehe joinaoha ndache xannçhi mé nahi.

²⁷ Co rato mé coetonhe Herodes ná xisoldado para joiroé xa já Juan.

²⁸ Cjoí xisoldado mé ngain cárcel tti jiaxinhi Juan co conçhinjihi xa já co ngá ná láto joiaoxin xa co joanjo xa ngain xannçhi, co jehe xan joanjo xan ngain janné xan.

²⁹ Co are cain chojni que vacao Juan conohe na quehe conhe, joi na co sajoicao na cuerpoe para joicjavá na cuerpoe.

Are Jesús joanjo joine naho mil xí

(Mt. 14.13-21; Lc. 9.10-17; Jn. 6.1-14)

³⁰ Are nirepresentanté Jesús joixin na de ngain cain rajna tti sacjoi na, cjan na para ngain Jesús, co ndačo na quehe joinchehe na, co quehe cjoagoe na chojni ngoixin tti cjoi na.

³¹ Cottimeja Jesús ndačo ngain na:

—Ķacoi ra, chjin na dinttojogaha na ná lugar tti ųonhi chojni jí.

Jesús ndačo jańá ixin vacji co vacjan anto tsje chojni ngain na, co ni tiempo vechondaha na para vane na.

³² Cottimeja jehó Jesús conixin nirepresentanté sacjoi na ngá barco para iná lugar tti ųonhi chojni vintte.

³³ Pero anto tsje chojni vicon are sacjoi co joatsoan na Jesús. Mexinxin anto tsje chojni de tsje rajna coinga na joichonhe na nttiha co icha saho joiiji cain jehe na que Jesús.

³⁴ Co are Jesús vačhjexin de ngá barco, vicon anto tsje chojni nttiha iná, co Jesús coiaconoehe na ixin jehe na sín na nttiha ųá coleco que ųonhi chojni ttingaria. Co Jesús coexinhí joinchecoenhe na nttiha tsje cosa de ixin Dios.

³⁵ Co are ocotsocjin chojni que vacao Jesús joí na ngain co ndačo na:

—Otsocjin co nttihi ųonhi nchiandoha chojni te.

³⁶ Ttetonhe cain chojni satsji na tti jí nchia o rajna icha chian para siquehna na tti sine na, ixin ųonhi chonda na.

³⁷ Co Jesús ndačo:

—Jaha ra danjo ra tti sine na.

Co jehe na ndačo na:

—¿Queńén janha na tsji na siquehna na niottja para sine cainxin chojni yá? Ixin tomi que sitte cain niottja que sine cain chojni yá inchin tsjexin tomi que dacha ná ninchehe ųa yáto conittjao.

³⁸ Co Jesús ndačo ngain na:

—¿Quejanhi niottja chonda ra? Sattji ra ditsjehe ra.

Co are jehe na conohe na quejanhi niottja techonda na, joí na co ndačo na ngain Jesús:

—Jí naho niottja co yó copescado.

³⁹ Cottimeja Jesús coetonhe cainxin chojni para tavintte na grupochjan co grupochjan ngataha cachji.

⁴⁰ Co tavintte na de cien na co de cincuenta na ngataha cachji.

⁴¹ Cottimeja Jesús coá tti naho niottja co tti yó copescado co tsjehe para noi co chjé gracias ngain Dios. Cottimeja váńa niottja co copescado co chjé chojni que vacao para conchjeyehé na cainxin chojni.

⁴² Co cainxin chojni joine na co cojehe na jian.

⁴³ Cottimeja ųa joinchecaon na tteyó ntača de tti xexin joine na, de niottja co copescado.

⁴⁴ Co jehó xí que joine niottja mé cjoi naho mil xa.

Jesús cjoixin rotté ngataonhe jinda

(Mt. 14.22-27; Jn. 6.16-21)

⁴⁵ Cottimeja Jesús coetonhe chojni que vacao para coani na barco co coattoa na lago para sacjoi na ngain rajna Betsaida icha saho que jehe. Co Jesús vittohe nttiha para jindache chojni que onchao sasinttecji na.

⁴⁶ Co are cainxin chojni sacjoi, Jesús sacjoi para ngagaha ná jna para joinchecoanxinxin Dios.

⁴⁷ Co are ondaconttie, barco ojoiiji ngosine jinda, co vé jehó Jesús vittohe nttiha.

⁴⁸ Co Jesús vicon ixin anto tanguí tedeca na barco ixin čhintto anto soji joixin čhintto de tti satetji na. Co ndoyo mé Jesús coingachjetaha jinda co sacjoi hasta tti ngain na co jehe joinchehe inchin rrogatto nao.

⁴⁹ Pero are jehe na vicon na Jesús sajittji conixin rotté ngataonhe jinda, jehe na ųaxaon na ixin mé ná nttanchanha, co coyao na

⁵⁰ ixin cainxin na vicon na co anto ųaon na. Pero Jesús nichja ngain na co ndačo:

—Ķaonha ra, janha joihi.

⁵¹ Co coani barco tti tengá na, co rato mé tavehe čhintto. Jehe na anto ųaon na co anto goan na admirado

⁵² ixin ųa coinxinha na quehe rročo tti joinchehe Jesús conixin niottja. Ixin ųa cha ansén na.

Jesús joinchexingamehe tsje chojni nihi ngain nonttehe Genesaret

(Mt. 14.34-36)

⁵³ Coattoa na lago mé co joiiji na nonttehe Genesaret. Co nttiha coenčoah na barco ngandehe jinda.

⁵⁴ Co are vaniáxin na de barco, chojni que te nttiha anto daca joatsoan na Jesús.

⁵⁵ Co anto daca joinchenohe chó na ngoixin región nttiha. Co cainxin lugar tti sacjoi Jesús, joicao na ninihi conixin camilla ngain Jesús.

⁵⁶ Co ngoixin tti vacji Jesús ngain colonia o ngain ranchería o ngagaha rajna, chojni vaquín na ninihi ngá nttiha co vanchetsenhe na fiao Jesús ixin sittoexin que ninihi rrotse na masqui rioho ngandehe lonttoe Jesús. Co cainxin chojni que tse lonttoe Jesús xingamehe na.

7

Tti nchejianha chojni (Mt. 15.1-20)

¹ Co conchienne canxion xifariseo ngain Jesús conixin icanxin ximaestroe ley Israel que joixin de ngain ciudad de Jerusalén.

² Chojni mé vicon ixin canxion chojni que vacao Jesús vaconttiha na jinda rá na tsje nttiha are vane na inchin ttetonha costumbré na. Mexinxin xifariseo co ximaestroe ley feo nichja xa de ixin chojni que vacao Jesús.

³ (Jamé ixin cain xifariseo co icha chojni Israel anto vaguitticaon na co vanchehe na costumbré cain ndogoelitoe na xanchjen are icha saho. Rrocho que cainxin tiempo vacontti na jinda rá na tsje nttiha saho de vane na.

⁴ Co are vaquixin na ndásin co si vaconttiha na jinda rá na tsje nttiha saho, vajineha na. Cai vechonda na tsje costumbre icha, inchin quexén vacjén na taza co chi co traste de chia co saoen na.)

⁵ Cottimeja joanchiangui na ngain Jesús co ndacho na:

—¿Quedonda chojni que çhjiho ditticaonha na costumbré ndogoelitoa na xanchjen? Ixin jehe na tonttiha na jinda tsje nttiha saho que jine na.

⁶ Cottimeja Jesús ndacho ngain na:

—Jaha ra chojni que ncheha inchin ndacho! Mexinxin nchao diquentaxin Isaías janhi de ixin jaha ra:

Chojni tehe nchesayana na conixin rroha na, pero ngain ansén na xa icjin te na para sino na na janha.

⁷ Mexinxin xonhi xé masqui tenchecoanxinna na

ixin tti jehe na tenchecoenhe na chojni joxon tti ttetonha xí nttihi ngataha nontte.

⁸ Jihi ndoa de ixin jaha ra ixin jaha ra itticaonha ra tti ttetonha Dios sino que nchehe ra inchin ndacho costumbré ndogoelitoa ra xanchjen. Rrocho costumbre de quexén ttjén ra vaso co chi co icha costumbre inchin mé.

⁹ Co Jesús ndacho ngain na cai:

—Jaha ra coín ra ná lado tti ttetonha Dios para nchao nchehe ra inchin ndacho costumbrea ra.

¹⁰ Ixin ley que vayé Moisés ndacho: “Ttjiho ra respeto ngain ndodá ra co ngain janná ra”, co “Tti rronichja jianha ngain ndodé o ngain janné, chojni mé jiquininxin ndasenhe.”

¹¹ Pero jaha ra ndacho ra ixin ná chojni nchao rronache ndodé o janné: “Janha çhoha tsjenguijna soixin ixin cain tti janha chonda, mé Corbán” (co jihi rrocho ixin jehe ojoanjo cain mé ngain Dios).

¹² Co si ná chojni ndacho jañá, jaha ra itanchjandaha ra para tsjenguijna ndodé o janné.

¹³ Co jañá jaha ra incheha ra caso tti ttetonha Dios, sino que jehi nchehe ra inchin costumbre que vayehe ra de ngain ndogoelitoa ra co tti jaha ra nchecoenhe ra xanha ra jai. Co nchehe ra icha cosa jianha inchin jihi cai.

¹⁴ Cottimeja Jesús nichjé cainxin chojni iná co ndacho ngain na:

—Ttinhí ra jian cainxin tti janha rrondaçhjan co ttinxin ra.

¹⁵ Jehi tti jine chojni nchejianha na. Tti ttixin ansén chojni, mé tti nchejianha chojni.

¹⁶ Jaha ra que ttinxin ra, ttinhí ra jian.

¹⁷ Cottimeja Jesús cjan sajoixinhi nchia, co are Jesús ngaxinhi nchia, chojni que vacao Jesús joanchiangui na ngain jehe ixin quehe rrocho ejemplo mé.

¹⁸ Co Jesús ndacho ngain na:

—¿Acai jaha ra ttinxinha ra? ¿Attinxinha ra que jehi tti jine chojni nchejianha na?

¹⁹ Tti jine chojni ttjiha ngaxinhi ansén. Cain mé sattji ngaxinhi tsehe, cottimeja chonda que daçhje.

Jañá rrocho que chojni nchao jine cain cosa.

²⁰ Co ndacho Jesús cai:

—Tti ttixin de ngain ansén chojni, mé tti nchejianha na.

²¹ Ixin de ngaxinhi ansén na daçhjexin cosa jianha que jehe na xaxaon na: jehe na xaxaon na para sincheyehe na çhihi iná tattíta, co para nasoexon na chojni,

²² Co para tsé na cosé iná chojni. Co ixin jianha xaxaon na, cai jehe na rinao na rrochonda na cosé icha chojni, co nchehe na cosa jianha, co ncheyehe na icha chojni, co tosoeha na para nchehe na tti jianha, co chjoehe na, co nichja na ndoaha de icha chojni, co anto orgulloso na, co ncheha na jian ngain icha chojni.

²³ Cainxin cosa jianha yá ttixin de ngaxinhi ansén na co nchejianha na.

Ná nchí de iná nación que vitticaon ncha Jesús

(Mt. 15.21-28)

²⁴ Cottimeja sacjoixin Jesús de nttiha co sacjoi ngain region tti te ciudad de Tiro co Sidón. Co are Jesús joiji nttiha vittja ná nchia para vittohe. Pero joinaoha ixin rroconohe chojni ttinó vehe jehe. Pero masqui jamé, chojni conohe na ttinó vehe Jesús.

²⁵ Co ngain región mé vehe ná xannché que vechonda xan espíritu jianha. Co anto daca conohe janné xan ixin nttiha vehe Jesús. Co cjoí naníta mé tti vehe Jesús co vettoxin nttajochjihí ngain Jesús.

²⁶ Naníta mé jeha judía, jehe joixin iná nación dinhi Sirofenicia. Pero joinchetsenhe ñao Jesús ixin Jesús santsjexin espíritu jianha de ngain xenhe naníta mé.

²⁷ Pero Jesús ndacho ngain naníta mé:

—Tajanda que saho tsjenguijna chojni judío que mé chojní Dios. Ixin nchaoaha jí si ná ndodaha santsjehe ndo xenhe ndo niottja para rrochjé ndo conia nio.

²⁸ Cottimeja naníta mé ndacho ngain Jesús:

—Ján, ndoa, pero conia que te nganguí mesa nchao jine va tti nchoe niottja que ttintjngui chjan.

²⁹ Cottimeja ndacho Jesús:

—Ján, nchao ndacho jaha. Onchao sattji jaxon ixin espíritu jianha osacjoixin de ngain xanha.

³⁰ Co are naníta mé joiji nchiandoha, vittja xenhe ngataha saon tají xan co espíritu jianha que vechonda xan icoha; osadicjixin de ngain xan.

Jesús joinchexingamehe ná tti choha vanichja ni choha vaquinhi

³¹ Cottimeja Jesús sacjoixin de ngain región tti jí ciudad de Tiro co vatto ngain ciudad de Sidón co tti rajna que te region Decápolis, hasta que joiji ngain lago de Galilea.

³² Co nttiha joiaoha na Jesús ná xí que choha vaquinhi co choha vanichja. Co joinchetsenhe na ñao Jesús ixin tsín rá ngataha xí mé, para rroxingamehe.

³³ Cottimeja Jesús vačhjendacaho xí mé de ngayehe chojni, co xandoho dedoe ngadoho ndatsjoen xa co chjé nttatté dedoe co cattehe neje xa.

³⁴ Cottimeja tsjehe Jesús para ngajni, co váva soji co ndache xa:

—¡Efata! —que rrocho: ¡Xirehe!

³⁵ Co xiré ndatsjoen xa co onchao coinhi xa co onchao nichja xa jian.

³⁶ Co Jesús coetonhe cain chojni nttiha ixin rrondačhoha na quehe joinchehe Jesús. Pero masqui Jesús anto vaquetonhe na ixin rrondačhoha na, jehe na icha vaquequin na.

³⁷ Co chojni mé anto vagoan na admirado co vandačo na:

—¡Cainxin nchao nchehe! Ixin hasta chojni que ttinha, jehe nchao nchequinhi co chojni que choha nichja, jehe nchao nchenichja.

8

Are Jesús joanjo joine nó mil chojni

(Mt. 15.32-39)

¹ Co tiempo mé xatte anto tsje chojni ngain Jesús iná co vechondaha na tti vane na nttiha. Mexinxin Jesús nichjé chojni que vacao co ndačo ngain na:

² —Janha nchenina chojni tehe, ixin ochonda ní nchanho te na nttihi nganji na co xonhi chonda na para sine na.

³ Si rronhattjan na ixin satsji na para nchiandoha na co sineha na icha saho, ndatsončhjenxin na jintta co ndatsonttiehe na ngatja nttiha, ixin canxion na joixin na cjin.

⁴ Co chojni que vacao Jesús ndačo na:

—¿Pero quexén rrochjé na cain chojni yá sine na? Nttihi xonhi jí.

⁵ Jesús joanchiangui ngain na co ndačo:

—¿Quejanhi niottja chonda jaha ra?

Co jehe na ndačo na:

—Yáto niottja.

⁶ Cottimeja Jesús coetonhe cainxin chojni tavintte na ngataha nontte. Cottimeja cóá tti yáto niottja mé co chjé gracias ngain Dios. Cottimeja váña Jesús nio co chjé chojni que vacao nio para que jehe na conchjea na nio ngain icha chojni.

⁷ Cai vechonda na icanxin copescadochjan, co Jesús chjé gracias ngain Dios co chjé chojni que vacao para que jehe na conchjeyehe na chojni para joine na.

⁸ Cainxin na joine na co cojehe na jian. Cottimeja xa joinchecaon na yáto nntaça de tti xexin joine na.

⁹ Co cain chojni que joine mé, chian nó mil chojni. Cottimeja Jesús goan despedido de ngain cain chojni mé,

¹⁰ co jehe conixin chojni que vacao vinttengá na barco co sacjoi na para nonttehe Dalmanuta.

Xifariseo joanchia xa ixin Jesús rrojinchehe ná milagro

(Mt. 16.1-4; Lc. 12.54-56)

¹¹ Co are joiji na nttiha, conchienne canxion xifariseo ngain Jesús co joinchediscutihi xa Jesús. Co ndaço xa ixin Jesús rrojinchehe ná cosa para rrocjago ixin joachaxin que jehe chonda joixin de ngajni.

¹² Cottimeja Jesús váva soji co ndaço:

—¿Quedonda chojni que techon jai rinao sicon ná señal de milagro? Janha seguro rrondaçhjan que ni ná señal tsjagoaha na.

¹³ Cottimeja nttiha cointtohe xa co Jesús cjan vengá barco co sacjoi conixin chojni que vacao para toenxin lago.

Levaduré xifariseo

(Mt. 16.5-12)

¹⁴ Co chojni que vacao Jesús ndatjañehe na joicaoha na niottja para rrojine na. Co are ongá barco jeha nacoa niottja techonda na.

¹⁵ Cottimeja Jesús coetonhe na co ndaço:

—Tjiho ra cuidado de ixin levaduré xifariseo, co levaduré Herodes.

¹⁶ Co cain chojni que vacao Jesús ndache chó na:

—Jehe ndaço jañá ixin xonhi niottja chonda na.

¹⁷ Pero Jesús chonxin quehe ndache chó na co ndaço ngain na:

—¿Quedonda tendaço ra ixin xonhi niottja chonda ra? ¿Aça ttinxinha ra, ni xa noaha ra? ¿Achonda ra ansean ra anto cha?

¹⁸ Masqui dicon ra co ttinhi ra, pero xa ttinxinha ra. ¿Açoha xaxaon ra de ixin tti naho niottja?

¹⁹ Are janha váña tti naho niottja para joine tti naho mil xí, ¿quejanhi nntaça joinchecaon ra de tti xexin joine na?

Cottimeja chojni que vacao Jesús ndaço na:

—Tteyó nntaça.

²⁰ Cottimeja ndaço Jesús iná:

—Co are janha váña tti yáto niottja para joine tti nó mil chojni, ¿quejanhi nntaça joinchecaon ra de tti xexin joine na?

Co chojni que vacao Jesús ndaço na:

—Yáto nntaça.

²¹ Cottimeja Jesús ndaço ngain na:

—¿Aco xa ttinxinha ra ni xa noaha ra tti janha ndattjo ra?

Jesús ngain rajna Betsaida joinchexingamehe ná tti vaguiconha

²² Cottimeja joiji na ngain rajna Betsaida. Co canxion chojni nttiha joiaho na ngain Jesús ná xí que çhoha vaguicon. Co joinchetsenhe na ñao Jesús para rrocatte co rrojinchexingamehe.

²³ Mexinxin Jesús tsehe rá xí mé co sajoicao para ngandehe rajna mé. Co nttiha Jesús cjoatjo nttatté ngain jmacon xa co vaquehe rá ngataha xa, co joanchianguihi xa si aonchao dicon xa.

²⁴ Co jehe xa tsjehe xa co ndaço xa:

—Dicon canxion xí satettji co xí yá inchin canxion nntá.

²⁵ Cottimeja vaquehe rá Jesús ngain jmacon xa iná. Co rato mé jehe xa tsjehe xa jian co jmacon xa ndaxingamehe. Co xí mé onchao vicon cain cosa jian.

²⁶ Cottimeja Jesús coetonhe xa para sacjoi xa nchiandoha xa, co ndache xa:

—Tjiha ngagaha rajna co xonhi chojni ndache ixin quehe conha.

Pedro ndaço que ixin Jesús, mé tti Cristo

(Mt. 16.13-20; Lc. 9.18-21)

²⁷ Cottimeja Jesús conixin chojni que vacao sacjoi na para ngain rajna que te ngain nonttehe Cesarea de Filipino. Co are tettji na ngatja nttiha Jesús joanchiangui ngain chojni que vacao co ndaço:

—¿Quehe ndaŋho chojni ixin quensen na janha?

²⁸ Co jehe na ndaŋho na:

—Canxion chojni ndaŋho ixin jaha Juan, tti vancheguitte chojni, co icanxin na ndaŋho na ixin jaha profeta Elías, co icanxin na ndaŋho na ixin jaha iná de tti profeta que vacji are saho.

²⁹ Cottimeja joanchiangui Jesús ngain chojni que vacao co ndaŋho:

—Co jaha ra, ¿quehe ndaŋho ra ixin quensen na janha?

Cottimeja ndaŋho Pedro ngain Jesús:

—Soixin tti Cristo. —co Cristo rroŋho: tti Dios Coinchiehe.

³⁰ Pero Jesús coetonhe na ixin xonhi chojni rrondache na jiji.

Jesús ndaŋho ixin jehe ndasenhe

(Mt. 16.21-28; Lc. 9.22-27)

³¹ Cottimeja Jesús coexinhi ndaŋho ngain chojni que vacao ixin jehe, tti Xí que joixin de ngajni, chonda que anto tangui tsonhe. Co cain xittetonha ngain nihngo co cain xidána que ttetonha ngain icha xidána co cain ximaestroe ley anto rroningaconhe na. Co cain chojni mé nasoexon na jehe pero nchanho ninxin jehe rroxechon.

³² Cain yá nao ndaŋho Jesús. Cottimeja Pedro joantsjenda Jesús para joinchesattehe Jesús.

³³ Pero Jesús ngaria co tsjehe ngain chojni que vacao, co joinchesattehe Pedro co ndaŋho Jesús:

—¡Sattjixin de nganji na janha, Satanás! Jaha xaxaonha inchin xaxaon Dios, sino que jaha jeho xaxaon inchin xaxaon chojni.

³⁴ Cottimeja Jesús nichjé chojni que vacao co icha chojni cai co ndaŋho ngain na:

—Si ŋhonja chojni rinao sacjinha na, pero chonda que rroiñañehe cain tti jeho jehe rinao co sacjinha masqui anto tangui tsonhe co hasta nasenxon.

³⁵ Ixin tti rinao que xonhi tsonhe vidé, mé sinchetján vidé. Pero tti sinchetján vidé de ixin causananxin janha o de ixin causexin tti jian joajna que janha joiquian, mé sechon para cainxin tiempo.

³⁶ Ixin xonhi xé masqui ná chojni sacha cainxin cosa ngataha nontte, si ndasinchetján almé.

³⁷ Ixin ¿quejanhi tsenanxin chojni almé are jehe ndasinchetján?

³⁸ Ixin si ŋhonja chojni tiempo jai tosoé de nichja jian de ixin janha co de ixin joajnana, cai janha, tti Xí que joixin de ngajni, tsosoahna de ixin chojni mé are sihi conixin ángel co gloria que rrochjana Ndodana que jí ngajni.

9

¹ Cai ndaŋho Jesús ngain na:

—Ndoa tti rrondattjo ra, que canxion ra xo te ra ntíhi senha ra hasta que siconja ra quexén siquetonha Dios ntíhi conixin joachaxin que jehe chonda.

Are vicon na Jesús anto ojé

(Mt. 17.1-13; Lc. 9.28-36)

² Vatto incjaon nchanho, cottimeja Jesús sajoicao Pedro, Jacobo co Juan ngagaha ná jna anto noi. Co ntíhi canio njoicao Jesús vicon na Jesús anto ojé.

³ Co lonttoe conguxima lontto co ndacoroa lontto inchin ŋhintta ngataha jnanchaha. Co xonhi chojni ntíhi ngataha nontte nchao rrocjén lontto co rroinjheroa lontto jamé.

⁴ Co ntíhi vicon na Elías co Moisés cjoao Jesús.

⁵ Cottimeja Pedro ndaŋho ngain Jesús:

—Maestro, anto nchao ixin janha na te na ntíhi. Sinttachjian na ní nchiachjan ntíhi: ná para ixin soixin, ná para ixin Moisés, co iná nchiachjan para ixin Elías.

⁶ Jañá ŋho Pedro ixin jehe noeha quehe rronichja ixin jehe co tti yó xicompañeroe anto xaoon na are vicon na jamé.

⁷ Cottimeja joi ná ttjoi co ndavittohe na ngacjan ttjoi mé. Co de ngagaha ttjoi mé coinhi na tté Dios que ndaŋho:

—Jihi tti Xanhna que anto rinaho. Ditticaon ra tti rrondattjo ra Xan.

⁸ Co rato mé ixonhi vicon na masqui tsjehe na ngoixin ngandanji na. Jeho Jesús vicon na tajingattjen ntíhi, pero Elías co Moisés iviconha na.

⁹ Co are texincanji na de jna mé, Jesús coetonhe canio na ixin xonhi chojni rrondache na tti vicon na, hasta que jehe, tti Xí que joixin de ngajni, rrocjan rroxechon de ngacjén tti nindadiguenhe.

¹⁰ Mexinxin xonhi chojni ndache na tti vicon na. Pero anto vandache chó na jeho na de ixin quehe rroŋho tti rroxechon de ngacjén tti nindadiguenhe.

¹¹ Cottimeja joanchianguihi na Jesús co ndaŋho na:

—¿Quedonda nda'cho cain ximaestroe ley ixin Elías tti tsí saho que jaha?

¹² Jesús nda'cho ngain na:

—Ján ndoa que Elías tti tsí icha saho que janha co jehe siquentoxinhi vidé chojni para que nchao sayehna na janha. ¿Co quehe nda'cho ngain tti jitaxin PalabrÉ Dios de ixin janha, tti Xí que joixin de ngajni? Nda'cho nttiha ixin chonda que anto tangui tsonna, co ixin tsje chojni tsjanao na ixin sitticaonnaha na.

¹³ Pero janha rronhattjo ra que Elías ojoí. Co chojni joinchehe na feo ngain ixin joinchehe na inchin joinao na ngain jehe inchin jitaxin ngain PalabrÉ Dios.

Jesús joinchexingamehe ná xanxichjan que vechonda espíritu jianha

(Mt. 17.14-21; Lc. 9.37-43)

¹⁴ Co are jói na ngain tti vittohe icha chojni que vacao Jesús, vicon na anto tsje chojni te ngandanji tti nueve chojni que vittohe nttiha. Co cai nttiha te canxion ximaestroe ley co tenchediscutihi xa tti nueve chojni que vittohe nttiha.

¹⁵ Co are vicon cain chojni ixin joiji Jesús, cain na anto goan na admirado co coinga na cjoí na ngain Jesús para chjé na joajna.

¹⁶ Co Jesús joanchiangui ngain tti nueve chojni co nda'cho:

—¿Quehe tetjao ra ximaestroe ley yá?

¹⁷ Co ná de tti chojni que ote nttiha nda'cho:

—Maestro, nttihi joiquinha xanhna nganji ixin chonda xan ná espíritu jianha que ndajoinchettapo xan.

¹⁸ Cain tti tsexin xan espíritu jihi jehe danca xan ngataha nontte, co hasta ttoxo ttixin rroha xan co netaon neno xan. Cain yá tonhe xan co mexinxin xonhi fuerza chonda xan. Ojointsatsán ñao chojni que chjiho tehe ixin rroguengi na espíritu jihi de ngain xanhna pero coixinha na.

¹⁹ Jesús nda'cho:

—¿Quedonda chojni jai choha ditticaon? ¿Hasta quesá janha chonda que sarihi nganji ra? ¿Co hasta quesá janha chonda que tsixinna nganji ra? Sicó ra chjan mé nttihi.

²⁰ Cottimeja joiaho na chjan mé ngain Jesús. Pero are espíritu jianha vicon Jesús, joincheguetan xan tangui co joanca xan ngataha nontte. Co conchindoha xan co joixin ttoxo rroha xan.

²¹ Cottimeja Jesús joanchianguihi ndodé xan co nda'cho:

—¿Quejanhi tiempo tonhe xan janhi?

Co ndodé xan nda'cho ndo:

—Desde xa nchin xan.

²² Co anto tsje nttiha dancatte espíritu jianha xan xohi co dancangui xan jinda, para rrogoen xan. Si nchao, nttatsaha ñao, ttiaconoana na co nchexingamena xanhna.

²³ Co nda'cho Jesús:

—Ján, si jaha mismo nchao ditticaon, ixin chojni que ditticaon nchao nchehe cainxin cosa.

²⁴ Cottimeja jehe ndodé xannihi mé nda'cho ndo sén:

—Ján, ditticanho nchin; ttjenguijna na para sitticanho icha.

²⁵ Co are vicon Jesús conchienne anto tsje chojni, Jesús joinchesattehe espíritu jianha que vehe ngain chjan mé co nda'cho:

—Espíritu jianha, jaha tti rrinchettapo co rrinchecoxo chjan jihi, jaxon janha rritettonha que da'chjexin de yá. Ttinttohe chjan jihi co icjanha ngain xan.

²⁶ Co jehe espíritu jianha mé coyao, co joincheguenda xan co joanca xan ngataha nontte iná co vachjexin de ngain xan. Cottimeja jehe xan ndavenhe xan nchin, hasta tsje chojni que te nttiha nda'cho ixin ondavenhe xan.

²⁷ Pero Jesús tsehe rá xan co joinchengattjen xan co jehe xan vingattjen xan.

²⁸ Cottimeja Jesús conixin chojni que vacao joixinhi na ngain ná nchia. Co are jehó jehe conixin chojni que vacao, jehe na joanchiangui na ngain Jesús co nda'cho na:

—¿Quedonda janha na choha vengui na espíritu jianha yá?

²⁹ Co Jesús nda'cho:

—Ixin espíritu inchin mé dengui ni jehó are nchecoanxinhi ni Dios co dinttecháño ni saho.

Jesús nda'cho iná ixin jehe ndasenhe

(Mt. 17.22-23; Lc. 9.43-45)

³⁰ Co are Jesús sacjoixin de nttiha conixin chojni que vacao, vatto na ngain regioen Galilea. Pero Jesús joinao que xonhi chojni conohe ttinó vehe Jesús,

³¹ para jehe vechonda tiempo para vacjagoe chojni que vacao. Co vanda'cho ngain na ixin chojni sinchecienhe na jehe, tti Xí que joixin de ngajni, para ngain chojni jianha, co icha chojni nasoenxon na jehe. Pero ní nchanho después de ndasenhe, jehe rroxechon.

³² Pero chojni que vacao coinxinha na tti ndaĉho Jesus ngain na, co aoncoa na para joanchiangui na ngain Jesus ixin quehe rroĉho palabra me.

Quensen tti icha importante?

(Mt. 18.1-5; Lc. 9.46-48)

³³ Cottimeja joiĵi na ngain rajna Capernaum co are ojoixinhi ngain nchia tti vintte na, Jesus joanchianguihi chojni que vacao co ndaĉho:

—Quehe tedanchianguihi cho ra are joiĵi na ngatja nttiĵa?

³⁴ Pero jehe na tenco na ixin are jo na ngatja nttiĵa, joanchianguihi cho jeha na ixin quensen de jehe na tti icha importante.

³⁵ Cottimeja Jesus tavehe co niche tti tteyo chojni que vacao co ndaĉho ngain na:

—Si chonja chojni rinao sehe tti icha importante, pero me chonda que sehe tti icha importante co tti icha tsjenguiĵna cainxin icha chojni.

³⁶ Cottimeja Jesus tsehe r n chjan co sajoicao xan ngaye na, cottimeja coa xan co ndaĉho ngain na:

³⁷ —Chojni que saye n chjan inchin chjan jiĵi ixin ditticao na janĵa, chojni me jaa saye na janĵa, co jeoha janĵa tti saye na, cai saye na tti rroanĵa na janĵa.

Chojni que ningacoanĵa na, chojni me j nganĵi na

(Lc. 9.49-50; Mt. 10.42)

³⁸ Cottimeja ndaĉho Juan ngain Jesus:

—Maestro, janĵa na vicon na n xi que vanchegonda xa joachaxin de nombrea para vaguenguixin xa espritu jianĵa, pero janĵa na ndattjan na xa ixin isincheĵa xa jaa ixin chjiĵa xa nganĵi na.

³⁹ Co Jesus ndaĉho:

—Cayacoenĵa ra chojni me. Ixin cain chojni que nchehe milagro conixin joachaxin de nombrena, chojni me choĵa rronichja jianĵa de ixin janĵa.

⁴⁰ Ixin chojni que ningacoanĵa na, chojni me jan rinao na.

⁴¹ Rrondattjo ra que Dios seguro tsenguehe hna cain chojni que rrocha jaha ra masqui n vaso de jinda jeha ixin jaha ra ditticao ra ixin janĵa tti Cristo.

Tti sinchenchehe ni cosa jianĵa

(Mt. 18.6-9; Lc. 17.1-2)

⁴² Co Jesus ndaĉho cai:

—Quexeho chojni que sincheyehe ina chojni que a antoĵa jian ditticao na janĵa para sinchehe cosa jianĵa, icha jian seĉhianito n oĉhin ngain ttosin chojni me para rroxincanjingui ndachaon.

⁴³ Co si n r sinttaaxaon para sinchehe jianĵa, ncheĵa cosa me masqui hasta tonĉhinĵi r. Ixin icha jian tsji conixin nacoa r ngain Dios, co naha tsji conixin cayoixin r ngain infierno tti onĵi tiempo nchao danga ohi.

⁴⁴ Co nttiĵa onĵi tiempo ditan cotsindo co onĵi tiempo danga ohi.

⁴⁵ Co si n rottea sinttaaxaon para sinchehe jianĵa, ncheĵa cosa me, masqui hasta tonĉhinĵi rottea. Ixin icha jian tsji conixin nacoa rottea ngain Dios co naha tsji conixin cayoixin rottea ngain infierno tti onĵi tiempo nchao danga ohi.

⁴⁶ Co nttiĵa onĵi tiempo ditan cotsindo, co onĵi tiempo danga ohi.

⁴⁷ Co si n jmacon sinttaaxaon para sinchehe jianĵa, ncheĵa cosa me, masqui hasta dantsjengui jmacon. Ixin icha jian tsji conixin nacoa jmacon ngain Dios co naha tsji conixin cayoixin jmacon ngain infierno,

⁴⁸ tti onĵi tiempo ditan cotsindo co onĵi tiempo danga ohi.

⁴⁹ Chojni che na xijntta ngain nttao que danjo na ngain Dios para ncheĵni na nttao icha. Co jai Dios che chojni cain cosa tangui para sicon si saĉĵe na jian o ni nahi. Mexinxin cosa tangui inchin xijntta are saho ixin cosa tangui ncheĉhjoin chojni icha para ixin Dios.

⁵⁰ Xijntta jian, pero si xijntta rrocjan xijntta simple, chojni iĉhoĵa sinchegonda xijntta ina. Mexinxin dintte ra chojni que ocoĵian, rroĉho chojni que chonda xijntta. Co dintte ra ĉhjoin, co doaoha cho ra, sino que rinao cho ra ĉhjoin.

10

Jesus ndaĉho de ixin xi que daĉĵendehe chiĵi

(Mt. 19.1-12; Lc. 16.18)

¹ Jesus vaĉĵexin de ngain rajna Capernaum, co sacjoĵi para ngain regioen Judea co ngain region que ji toenxin ro Jordan. Nttiĵa cjan atte chojni ngain Jesus ina, co jehe joinchecoenĵe chojni nttiĵa inchin jehe vanchehe ngain cain lugar.

² Cottimeja conchienne canxion xifariseo ngain Jesús para rrojinchenichja xa Jesús ná cosa nchaoa para que nchao rrocjanguihí xa. Co joanchianguihí xa Jesús ixin anchao ná xí sachjendehe xa chíhi xa.

³ Cottimeja Jesús ndačo ngain xa:

—¿Quehe coetonha ley que vayé Moisés?

⁴ Cottimeja jehe xa ndačo xa:

—Ley ndačo ixin nchao para ná xí sinchechjian xa ná xón dinhi acta para sachjendexin xa chíhi xa, co ndatsinttohe xa ncha.

⁵ Cottimeja ndačo Jesús ngain xa:

—Ley que vayé Moisés coetonha jaña ixin jaha ra atto cha ansean ra.

⁶ Pero are saho Dios joinchechjian cainxin cosa; co ndačo ngain Palabré Dios janhi: “Dios joinchechjian chojni xí co nchí.”

⁷ “Mexinxin xí dačjendehe xa ndodé xa co janné xa para decao xa jecho chíhi xa.

⁸ Co cayoxin chojni mé dintte na inchin nacoaxinxon chojni.” Jaña ijeha yó chojni, jecho nacoa chojni.

⁹ Mexinxin chojni choha santsjendehe cosa que Dios joinchechjian inchin nacoa.

¹⁰ Cottimeja are sacjan na ngain nchia, chojni que vacao Jesús joanchiangui na ngain jehe ixin cosa yá.

¹¹ Co Jesús ndačo ngain na:

—Si ná xí sachjendehe xa chíhi xa co secoa xa iná nchí, anto jianha sinchehe xí mé ngain chíhi xa nchisaho. Ixin rrocho que xí mé jicao xa yó nchí.

¹² Co si ná nchí sachjendehe ncha xixihí ncha co secoa ncha iná xí, cai nchí mé jianha sinchehe ncha ngain xixihí ncha xisaho. Ixin rrocho que nchí mé jicao ncha yó xí.

Jesús joinchenchaon xannchinnchinchjan

(Mt. 19.13-15; Lc. 18.15-17)

¹³ Cottimeja joiaho na xannchinnchinchjenhe na ngain Jesús para catte xan conixin rá. Pero chojni que vacao Jesús joinchesatthe na cain chojni que joicao cain chjan mé.

¹⁴ Co are Jesús vicon yá, goña co ndačo:

—Tančjanda ra xannchinnchinchjan tsí xan nganji; cayacoenha ra xan. Ixin tti ttonha Dios, nttiha para cain chojni inchin jehe xan.

¹⁵ Janha seguro rrondatto ra que tti chojni que sitticaonha tti ttonha Dios inchin ná xannchinchjan dittaicon xan tti ttonhe xan nindoha xan, chojni mé xonhi tiempo rrochonda parte ngain tti ttonha Dios.

¹⁶ Cottimeja Jesús cjóa xannchinnchinchjan mé, co vaquehe rá ngataha xan co joinchet-senhe ñao Dios ixin sinchenchaon xan.

Ná xanxí rico cjoao xan Jesús

(Mt. 19.16-30; Lc. 18.18-30)

¹⁷ Ná nchanho are Jesús sajittji ngatja nttiha, ná xanxí coinga xan joí xan vettoxin nntajochjihí xan ngain Jesús co ndačo xan:

—Maestro, soixin que anto jian, ¿quehe chonda que sinttaha janha para nchao rrochonda iná vida naroaxin que xonhi tiempo tsjexin?

¹⁸ Jesús ndačo:

—¿Quedonda ncheguinhí na janha jian? xonhi iná tti icha jian, jecho nacoaxinxon, co mé jehe Dios.

¹⁹ Jaha ochonxin tti coetonha Dios inchin: “Ncheyeha chíhi iná tattíta, dantsjeha vidé iná chojni, tteha cosé iná chojni, nichjaha cosa que ndoaha de iná chojni, ncheyeha icha chojni, co ttjihí respeto ngain ndodá co ngain janná.”

²⁰ Cottimeja xanxí mé ndačo xan:

—Maestro, cain yá ojointtaha de xa nchín na.

²¹ Are Jesús tsjehe, jehe joinao xanxí mé co ndačo ngain xan:

—Jecho nacoa cosa ditján sinchehe. Ttji co nchecji cainxin tti chonda co nchettonhe chojni noa tomi. Cottimeja nttiha ngajni jaha rrochonda cosa icha rentte. Cottimeja sihi co sacjan na tti janha sacji masqui anto tanguí tsonha hasta ndasenhe.

²² Pero are coinhi xan cain yá, anto vechín xan sacjoi xan ixin jehe xan anto rico vehe xan.

²³ Cottimeja Jesús tsjehe ngayé chojni que vacao co ndačo ngain na:

—Atto tanguí para ná chojni que chonda anto tsje cosa rrochonda parte ngain tti ttonha Dios.

²⁴ Co chojni que vacao Jesús goan na admirado de ixin tti nichja Jesús. Pero Jesús cjan ndačo ngain na iná:

—Chojni que chonda confianza que ixin tomi tsjenguijna na, janto tangui para jehe na rrochonda na parte ngain tti ttetonha Dios!

²⁵ Icha tanguiha sattoxinhi ná cocamello ná ttoechjenhe nttachiehe manta que para ná chojni rico rrochonda parte ngain tti ttetonha Dios.

²⁶ Co are coinhi na yá, icha goan na admirado co joanchianguihi chó jeha na co ndačo na:

—¿Mexinxin quensen nchao rrochonda iná vida naroaxin remé?

²⁷ Jesús tsjehe ngain na co ndačo:

—Chojni čhoha sinchehe jamé, pero Dios nchao sinchehe yá, ixin para Dios xonhi cosa tangui.

²⁸ Cottimeja Pedro ndačo ngain Jesús:

—Janha na cointtoa na cainxin tti vechonda na para čhi na nganji soixin.

²⁹ Jesús ndačo:

—Janha seguro rronhattjo ra ixin quexeho chojni que ttinttohe nchiandoha, o xanchó, o ndodé, o janné, o čhihi, o xenhe, o nonttehe de ixin causanaxin janha co de ixin causexin joajna que danjo vida naroaxin,

³⁰ chojni mé sayé cien nttiha icha tsje ngain tiempo jiji inchin nchiandoha, co xanchó, co ndodé, co janné, co xenhe, co nonttehe, masqui tsje chojni rroningaconhe. Co ngain nchanho que tsí sayé vida naroaxin que xonhi tiempo tsjexin.

³¹ Pero tsje chojni que jai xaxaon na ixin anto importante na, are mé, xonhi tsorentte na. Co tsje chojni que jai xaxaon na ixin jehe na jeha importante na, pero are mé jehe na nisinte icha importante.

Jesús cjan ndačo iná ixin jehe ndasenhe

(Mt. 20.17-19; Lc. 18.31-34)

³² Jesús conixin tsje chojni que vacao tettji na ngatja nttiha para Jerusalén; Jesús jitaon nttiha, co chojni que vacao Jesús terroé na. Co jehe na anto tedoan na admirado, co terroé na pero conixin joaxaon. Co Jesús ngaria co vačhendacaho tti tteyo chojni que vacao de ngayé icha chojni para ndache na quehe tsonhe jehe.

³³ Co ndačo Jesús ngain na:

—Inchin jaha ra tedicon ra, jaxon satettjin na para Jerusalén. Nttiha janha, tti Xí que joixin de ngaini, sinchechienhe na na ngain xidána que ttetonha ngain icha xidána co ngain ximaestro ley Israel, co nimé ni rrondačo que ixin janha nasenxon na. Co sanjo na na janha ngain xí de ojé nontte,

³⁴ co jehe xa tsjanao na xa janha, co rrožanguihna na cuarta de roa, co tsjatjo na xa nttatté xa co nasoenxon na xa. Pero ngain nchanho ninxin janha rroxechon na.

Tti joanchia Jacobo co Juan

(Mt. 20.20-28)

³⁵ Cottimeja Jacobo co Juan, cayoi xenhe Zebedeo, conchienenhe na ngain Jesús co ndačo na:

—Maestro, ná joatotsenhe ñaho na sanchia na nganji.

³⁶ Cottimeja Jesús ndačo:

—¿Quehe rinao ra?

³⁷ Co jehe na ndačo na:

—Nttatsanha ra ñao are soixin sayé joachaxin de tsetonha cainxin cosa, que janha na sintte na nganji, ná na lado jian, co ná na lado cjon.

³⁸ Cottimeja Jesús ndačo ngain na:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenhe ra inchin janha ndasenhe na?

³⁹ Co jehe na ndačo na:

—Ján, nchao.

Co Jesús ndačo ngain na:

—Ján, ndoa, anto tangui tsonha ra, co senhe ra inchin janha senhe na.

⁴⁰ Pero jeha janha tti danjo joachaxin ixin quensen sehe lado jian na co quensen sehe lado cjon na. Jeha Ndodana tti danjo joachaxin mé ngain quexeho chojni que jehe ochonxin.

⁴¹ Are coinhi tti itte chojni que vacao Jesús ixin quehe joanchia Jacobo co Juan, anto goñao na nganji cayoi.

⁴² Pero Jesús nichjé na co ndačo ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cain icha xí que chonda joachaxin nttiha anto ttetonha xa ngain chojni.

⁴³ Pero jeha jamé tsonhe ngayaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni.

⁴⁴ Co quexeho de jaha ra xo rinao ra sintte ra icha importante, pero jehe mé cai chonda que sehe inchin esclavo para ngain icha chojni.

⁴⁵ Ixin janha, tti Xí que joixin de ngajni, joiha para que chojni sinchehe xana, sino que janha joihi para joicjenguijna chojni co para sanjo vidana para tsjenga hna tti teca tsje chojni.

Jesús joinchexingamehe Bartimeo, tti vaguiconha
(Mt. 20.29-34; Lc. 18.35-43)

⁴⁶ Cottimeja Jesús conixin chojni que vacao joihi na ngain ciudad de Jericó. Co are Jesús conixin chojni que vacao co anto tsje icha chojni vachjegaxin na de ciudad mé, vicon na ngandehe nttiha taji ná xí vaganchiagaha ixin vaguiconha. Co tattíta mé vinhi Bartimeo, xenhe ná tti vinhi Timeo.

⁴⁷ Co are conohe que ochian jidiji Jesús que joixin Nazaret, jehe tti vaguiconha mé coexinhi ndacho sén:

—¡Jesús, tti razé David, ttiaconoana na janha!

⁴⁸ Anto tsje chojni joinchestehe na ixin rrotencoa, pero jehe ndacho icha sén:

—¡Soixin, razé David, ttiaconoana na janha!

⁴⁹ Cottimeja Jesús tavengattjen co ndacho:

—Dayehe ra xí yá.

Cottimeja jehe na vayé na xa co ndacho na:

—Taha joachjaon co dingattjen ixin Jesús jidayaha jaha.

⁵⁰ Cottimeja jehe tti vaguiconha mé nttihao vanca tti jitsá co vingattjen daca co conchienne ngain Jesús.

⁵¹ Cottimeja ndacho Jesús ngain:

—¿Quehe rinao sinttaha nganji?

Jehe tti vaguiconha ndacho:

—Maestro, janha rinaho sicon.

⁵² Co Jesús ndacho:

—Oxingamehe con ixin vitticaon nganji janha. Co onchao sattji nchiandoi.

Co rato mé jehe tti vaguiconha mé onchao vicon co rroé Jesús tti sacjoi Jesús.

11

Jesús joigaha ciudad de Jerusalén

(Mt. 21.1-11; Lc. 19.28-40; Jn. 12.12-19)

¹ Después joihi na ngandehe rajna Betfagé co rajna Betania que te chian Jerusalén co nttiha tavinte na rotté jnanchjan dinhi Ntaolivo. Nttiha Jesús coetonhe yó chojni que vacao jehe

² co ndacho ngain na:

—Tji ra ngain rajnanchjan taha. Yá sinchí ra ná colochó jichoa co xa xonhi chojni diguetaha va. Tonxindanguehe ra va co sicó ra va.

Co si chonja chojni sanchianguiha ra ixin quedonda jañá tenchehe ra, ndache ra na ixin ximaestroa ra rrogondehe xa va; cottimeja sicán ra va.

⁴ Cottimeja sacjoi cayoi chojni mé co vittja na colochó tajiçhoa va ngain ná puerté nchia ngaxin nttiha, co conxindanguehe na va.

⁵ Co icanxin chojni que te nttiha ndacho na:

—¿Quehe tenchehe ra yá? ¿Quedonda tonxindanguehe ra colochó yá?

⁶ Co cayoi na ndacho na inchin ondacho Jesús ngain na. Co chojni que te nttiha coanchjanda na na sacjoi na conixin colochó.

⁷ Cottimeja joicaa na colochó mé ngain Jesús co cjoanjihí na va tti tetsá na co Jesús vetaha va.

⁸ Co anto tsje chojni coingo na ngá nttiha tti tetsá na co icanxin na coingo na ramanchjenhe nttá para conchjian chaho tti coingachje colochóhe Jesús.

⁹ Co chojni que vitaonhe Jesús nttiha co chojni que rroé Jesús, cainxin na ndacho na sén:
—¡Gloria ngain Dios! Co anto jian tti joí conixin nombré Dios.

¹⁰ ¡Co anto jian tti siquetonha inchin coetonha David ndogolitoa na xanchjen! ¡Gloria ngain Dios!

¹¹ Jañá joigaha Jesús ngain ciudad de Jerusalén co joixinhi nihngo icha importante nttiha. Co are joexin tsjehe Jesús cainxin cosa nttiha, sacjan Jesús para ngain rajna dinhi Betania conixin tti tteyó chojni que vacao, ixin ondacotsocjin.

Jesús nichja ngain nttahigo que xonhi ttochjoin jiyá
(Mt. 21.18-19)

¹² Nchanho yoxin are vachjexin na de Betania, Jesús venhe jintta.

¹³ Co de cjin viconxin Jesús ná nttahigo que jiyá ntta ca co Jesús joitsjehe ntta ixin ayá ntta ttohigo. Pero vittjaha Jesús ni ná tto ixin xa jeha tiempoe tto.

¹⁴ Cottimeja Jesús ndačo ngain nttahigo mé:

—Xonhi chojni rrocjan sine ttochjoian iná.

Co coinhi cain chojni que vacao Jesús.

Jesús joincheroa nihngo icha importante

(Mt. 21.12-17; Lc. 19.45-48; Jn. 2.13-22)

¹⁵ Cottimeja jói na Jerusalén iná. Co are Jesús joixinhi patioe nihngo icha importante, coexinhi joantsjexin de nttiha cain chojni que tenchecji co tettehna cosa nttiha. Jesús concjamangui mesé cain tti dedasinguixinhi icha chojni tomi para rrochondaxin na suelto, co concjamangui nttaxitaoen cain tti tenchecji conttoanajni.

¹⁶ Co ixonhi chojni coančhanda Jesús para coattoa na patioe nihngo mé conixin cosé na.

¹⁷ Co Jesús joinchecoenhe na co ndačo ngain cain na:

—Jitaxin ngain Palabré Dios: “Nchiania sehe nchia para sinchecoanxinna na janha chojni de ngoixin mundo.” Pero jaha ra ndadinchekhjian ra nchia ná lugar tti xatte tti chehe.

¹⁸ Co cain xidána que ttetonha ngain icha xidána co cain ximaestroey ley coinhi xa quehe ndačo Jesús, co joincheoxinha xa. Mexinxin coexinhi xa cjoé xa quexén sinchehe xa para nasoenxon xa Jesús. Pero vaxaon xa ixin cainxin chojni tiempo mé joincheoxinhi na cainxin tti cjoago Jesús.

¹⁹ Co are ondaconaxin xehe, Jesús sacjoixin de ngain ciudad mé.

Nttahigo que ndadixema

(Mt. 21.20-22)

²⁰ Co ndoexin dacao vatto na tti jí nttahigo que Jesús nichjé. Co vicon na ondadixema ngoixin ntta.

²¹ Cottimeja Pedro xaxaon quehe ndačo Jesús co ndache Jesús:

—Maestro, tsjexin, nttahigo que nichjehe, ondadixema ntta.

²² Co Jesús ndačo:

—Ditticaon ra seguro ngain Dios.

²³ Co seguro rrondattjo ra ixin quexeho chojni que rrondache jna jimé: “Sattjixin de yá, co digaritsiahngui ndachaon”, co si chojni mé seguro ditticaon que Dios sinchehe jamé, seguro que jamé tsonhe.

²⁴ Mexinxin ndattjo ra que are sanchia ra ná cosa ngain Dios, ditticaon ra seguro que ovayehe ra co seguro jamé tsonhe.

²⁵ Co are tenchecoanxinhi ra Dios, si čhonja chojni toñaohé ra, nchetjañehe ra. Jamé cai Ndo dá ra que jí ngajni sinttatjañaha ra Ndo cain cosa jianha que nchehe ra.

²⁶ Pero si jaha ra sinchetjañaha ra chojni mé, cai Ndo dá ra que jí ngajni čhoha sinttatjañaha ra Ndo cain cosa jianha que nchehe ra.

Tti joachaxin que chonda Jesús

(Mt. 21.23-27; Lc. 20.1-8)

²⁷ Cottimeja joiji na Jerusalén. Co cjoí na ngain nihngo icha importante. Co are Jesús tarridehe nttiha ngain nihngo, conchienne ngain Jesús canxion xidána que vaquetonha ngain icha xidána co canxion ximaestroey ley co icanxin xí que ttetonha ngain nihngo.

²⁸ Co ndačo xa ngain Jesús:

—¿Quehe joachaxin chonda jaha para nchehe cain cosa jihi? ¿Quensen chjá joachaxin jihi?

²⁹ Co Jesús ndačo:

—Cai janha sanchianguiha ra ná cosa, co si rrondachjenji ni ra tti janha sanchianguiha ra, cai janha rrondattjo ra quehe joachaxin nttaxin janha cain cosa jihi.

³⁰ Ndachjenji ni ra: ¿Quensen rroanha Juan para joincheguitte chojni? ¿A Dios o ani chojni?

³¹ Cottimeja coexinhi xa joanchianguihi chó jeha xa co ndache chó xa:

—¿Quehe rrondačo na? Si rrondačo na ixin Dios rroanha, jeha rrondattjo na: “¿Quedonda vitticaonha ra tti ndačo Juan remé?”

³² ¿O apoco rrondačo na ixin chojni rroanha?

Ixin vačagoen na chojni ixin cainxin chojni vitticaon ixin Juan vanichja joajna que vagayé de ngain Dios.

³³ Mexinxin ndačo na ngain Jesús:

—Nonaha na.

Cottimeja ndačo Jesús ngain na:

—Mexinxin janha cai rrondattjoha ra quexeho joachaxin nttaxin cain cosa jihi.

12

*Ejemplo ninchehe xa jianha**(Mt. 21.33-46; Lc. 20.9-19)*

¹ Cottimeja Jesús coexinhi ndache na ixin ejemplo co ndaço:

—Vehe ná xí que cjoenga xa ná jngui de nttauva co joinchekhjian xa cerco ngoixin ngan-dehe jngui mé, co joinchekhjian xa ná lugar tti vagueninxin na ttouva, co joinchekhjian xa ná torre para vaguiconxin xa ngoixin ngataon jnguihi xa.

² Co después joanjo xa nttattochjoin media ngain canxion tti nchehe xa co jehe xa sacjoi xa cjin.

³ Co are ojoí tiempoe cosecha, jehe xa rroanha xa ná ninchehe xé xa para joiganchia tti parte de cosecha que jiquininxin sayé tti xinajni mé.

⁴ Pero tti nicoá nttattochjoin media tse na tti nchehe xé xinajni mé, goen na co vengui na co xonhi chjé na.

⁵ Cottimeja xinajni mé rroanha xa iná tti nchehe xé xa, pero cai mé coaxin na xo, conchintaonhe na já co nichja na feo ngain.

⁶ Cottimeja rroanha xinajni mé iná tti nchehe xé xa, pero mé nagoenxon na. Cottimeja xinajni mé rroanha xa tsje tti nchehe xé xa, pero canxion na vicaon na co icanxin na nagoenxon na na.

⁷ Co jeha nacoa xenhe xa vechonda xa co anto vajinao xa xan co jeha xan mé vittohe ngain xa. Co rroanha xa xenhe xa mé cai ixin xaxaon xa: “Chonda na que sicao na respeto ngain xanhna.”

⁸ Pero jehe tti nicoá nttattochjoin media cjoao na co ndaço na: “Jihi tti sayé ngoixin jngui jiji de herencia. Nadoenxon na co ján na ndasittoa na cain.”

⁹ Mexinxin tse na xan, co nagoenxon na xan co joantsjegaxin na cuerpoe xan de ngain jngui de nttauva.

¹⁰ Cottimeja Jesús ndaço:

—¿Quehe sinchehe xinajni mé? Tsí xa co nasoenxon xa jehe tti nicoá nttattochjoin media, co sanjo xa jnguihi xa ngain ojé chojni.

¹¹ ¿Axa chonxinha ra tti ndaço ngain tti jitaxin Palabréd Dios? Ntiha ndaço: Tti xo que joinchegondaha xittette nchia, pero xo mé tti xo joiguehe icha importante.

¹² Co jiji joinchehe Dios, co para ixin ján na cosa jiji anto chjoin.

¹³ Cottimeja cain na joinao na rrotse na Jesús co rroquiaxinhi na, ixin jehe na nohe na que ejemplo jiji jinichja de ixin jehe na. Pero ixin vařagoen na cain chojni, mexinxin nttiha cointtohe na Jesús, co jehe na sacjoi na.

*Ti rroxenga hna ngain impuesto**(Mt. 22.15-22; Lc. 20.20-26)*

¹⁴ Cottimeja rroanha na ngain Jesús canxion xifariseo co icanxin chojni que vacao Herodes, para rrojinchénichja na Jesús cosa ndoaha para nchao rrocjanguihi na Jesús.

¹⁵ Co chojni mé joí na ngain Jesús co ndaço na:

—Maestro, janha na nona na que soixin nichja tti ndoa co ncheha caso tti ndaço icha chojni, ixin soixin ncheha juzgado chojni rico ojé que chojni noa, sino que ncheoenhe jian cain chojni de ixin nttié Dios. Mexinxin ndachjenjí ni ra: ¿Anchao jí tsjengá na hna impuesto ngain xiemperador o ni nahí? ¿Atsjengá na xa hna o ni tsjengaha na xa hna?

¹⁶ Pero Jesús oconohe de tti jianha que jehe xa teřaxaon xa, co Jesús ndaço ngain xa:

—¿Quedonda jaha ra rinao ra sincheyana ra? Sicocha na ná tomi para janha sicon.

¹⁷ Co jehe na joicaohé na Jesús ná tomi co are vicon Jesús tomi mé, ndaço ngain na:

—¿Quensen con jinganito tomi jiji co quensen nombré jitaxin nganito nttihi?

Co jehe na ndaço na:

—Con xiemperador co nombré xa.

¹⁸ Cottimeja ndaço Jesús ngain na:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

Co goan na admirado ixin jañá cho Jesús.

*Canxion chojni joanchiangui queXén rroxechon ni**(Mt. 22.23-33; Lc. 20.27-40)*

¹⁹ Cottimeja cjoí canxion xisaduceo ngain Jesús. Xí mé vaguitticaon xa ixin cain tti ndadénhe irroxechonha. Co ndaço xa ngain Jesús:

²⁰ —Maestro, Moisés diquinttoena na ná ley que ndaço: si ná xí ndasénhe co tsinttohe xa chíhi xa, co xonhi chjan tsinttohe xa, mexinxin chonda que ná xanchó xa xanxí secáo

nchiganha mé para rrochonda na chjan para que xan mé sintte xan xá rrocji xenhe tti ndavenhe.

²⁰ Nchao remé; vintte yáto xanxí chó xan. Xansaho vecao xan chihi xan, pero ndavenhe xan co xonhi chjan cointtohe xan.

²¹ Co xanyoxin vecao xan jehe nchiganha mé, pero cai ndavenhe xan co xonhi chjan cointtohe xan. Co xajeho conhe conixin xanninxin.

²² Co jamé tti yáto xanxí mé vinttecao xan jehó nchiganha mé, co ni ná xan cointtoeha xan chjan hasta ndavenhe cain xan. Cottimeja ndavenhe nchiganha mé cai.

²³ Mexinxin are rroxechon na, co rrocjan sinttechon xan, ¿quexehe de tti yáto xan mé sehe mero xixihi jehe nchí mé, ixin cain xan vinttecao xan nchí mé?

²⁴ Cottimeja Jesús ndaço:

—Jaha ra nchaoha jí tti tenichja ra ixin chonxinha ra tti jitaxin ngain Palabré Dios co chonxinha ra joachaxin que chonda Dios.

²⁵ Are rroxechon cain chojni que ondavenhe, nttiha ni tsotteha na, ni sanjoha na xenhe na para tsottehe xan ixin sintte na inchin ángel que te noi.

²⁶ Pero de tti jaha ra danchianguina ra de ixin tti chojni que ndadenhe, ¿atsjeha jaha ra libroe Moisés de ixin quexén Dios nichjé Moisés de ngagaha tti canchaha que jiche? Nttiha ndaço janhi: “Janha tti Dios de Abraham co Isaac co Jacob.”

²⁷ Mexinxin Dios jeha Dios de nindadiguenhe, sino que Dios de chojni que techon, co para ixin Dios cainxin chojni techon na. Mexinxin jaha ra nchaoha jí tti tenichja ra.

Tti icha importante que ttetonha Dios

(Mt. 22.34-40)

²⁸ Cottimeja ná ximaestro ley que coinhi xa are Jesús cjoao xisaduceo ximaestro mé conchienne ngain Jesús. Co ixin joatsoan xa que ixin Jesús nchao ndajoinchetenco xisaduceo, mexinxin joanchianguihi xa Jesús co ndaço xa:

—¿Quexehe tti icha importante que ttetonha Dios sinchehe ni?

²⁹ Co Jesús ndaço:

—Tti icha importante de cainxin ndaço janhi: “Ttinhí ra jian jaha ra chojni Israel, nacoaxinxon Dios jí co jehó mé tti chonda cain joachaxin co jehó mé tti Dios de ján na.

³⁰ Rinao ra Dios mé conixin ansean ra, conixin almá ra, conixin joarrixaoan ra co cainxin fuerza que jaha ra chonda ra.” Jihí tti mandamiento icha importante para sinchehe chojni.

³¹ Co iná mandamiento chian xajeho ixin ndaço: “Rinao ra cainxin chojni inchin rinao ra cuerpoa ra.” Co xonhi icha mandamiento icha importante para sinchehe chojni, jehó cayoi mandamiento yá.

³² Co ximaestro ley ndaço xa:

—Ján, nchao tti ndaço, Maestro, ixin ján, ndoa tti ndaço. Jí jehó nacoaxinxon Dios co xonhi iná dios jí, jehó jehe.

³³ Co para ná chojni rinao Dios conixin ansén, conixin cain joarrixaoen, conixin almé, co cainxin fuerza que chonda, co para rinao cainxin chojni inchin jehe rinao cuerpoe; cain cosa jihí icha jian ndoa, que cain coxigo que tjaga ni ngataha xohi para ixin Dios, co icha jian que coxigo que doen ni para danjo ni ngain Dios.

³⁴ Are Jesús coinhi ixin cain tti ndaço xí mé nchao jí, jehe ndaço ngain xa:

—Jaha ochian rrihi para rrochonda parte ngain tti ttetonha Dios.

Cottimeja cain chojni ndaxaon na para joanchianguihi na Jesús icha cosa.

Tti dindaço David de ixin Jesucristo

(Mt. 22.41-46; Lc. 20.41-44)

³⁵ Ná nchanho are Jesús tajinchecoeha chojni ngain nihngo icha importante, jehe ndaço:

—¿Quedonda ndaço ximaestro ley ixin Cristo ná xanntí David?

³⁶ Ixin Espíritu Santo joinchenichja David co ndaço:

Tti Ttetonha cainxin cosa ndaço ngain tti Ttetonna janha:

“Darihi ngaca lado jian na

hasta janha sinttagacha jaha ngain cain tti ningaonha.”

³⁷ Pero ¿quexén que Cristo jehe ná xanntí David, si David mismo ndaço ixin Cristo tti Ttetonha ngain jehe?

Co tti tsje chojni que te nttiha anto ché na coinhi na cain tti nichja Jesús.

Jesús joinchesattehe ximaestro ley

(Mt. 23.1-36; Lc. 11.37-54; 20.45-47)

³⁸ Co Jesús ndaço are jinchecoeha na:

—Tjiho ra cuidado de ncheha ra inchin nchehe ximaestroe ley ixin jehe xa ncheᵑoxinhi xa ᵑhji xa conixin lonnto icha jinjini, co rinao xa que chojni sanjo na joajna ngain xa conixin anto tsje respeto are ngain nttiha,

³⁹ Co are ngaxinhi nihngo, jehe xa ttjé xa tti xintaon icha importante para dinttetaha xa, co are ttji xa dijine xa, jehe xa rinao xa tti icha jian lugar ngain mesa.

⁴⁰ Cai jehe xa dantsjehe xa nᵑhiganha nchiandoha nᵑha ixin ittixinha nᵑha ttjenga nᵑha hna contribución. Co para ᵑonhi chojni rroᵑaxaon ixin jehe xa jianha nchehe xa, jehe xa ncheoanxinhi xa Dios anto sé. Mexinxin cain ximaestro mé sayé xa anto soji castigo.

Tomí que joanjo ná nᵑhiganha noa
(Lc. 21.1-4)

⁴¹ Ná nchanho Jesús tají ngaxinhi nihngo icha importante chian ngaca cain cajé alcancia. Tajitsjehe Jesús are chojni tettintohe na tomi nttiha. Co tsje chojni rico cointtohe na anto tsje tomi.

⁴² Co are mé jói ná nᵑhiganha co noa nᵑha, co cointtohe nᵑha ngain ná caja mé yó centavochjan que anto rentteha.

⁴³ Cottimeja Jesús vayé chojni que vacao co ndaᵑho ngain na:

—Janha ndoa tti rrondattjo ra, que nᵑhiganha noa jihi joanjo nᵑha icha tsje que cain chojni que tettenga tomi cain caja.

⁴⁴ Ixin cain chojni danjo na jecho tti xehe na. Pero nᵑhí noa jihi vanjo nᵑha cain tomi que jehe nᵑha jichonda nᵑha.

13

Jesús ndaᵑho ixin rroxante nihngo icha importante
(Mt. 24.1-2; Lc. 21.5-6)

¹ Co are Jesús vachjexin de nihngo icha importante, ná de tti chojni que vacao ndaᵑho ngain jehe:

—¡Maestro, tsjexin anto yeye ᵑo tehe co anto yeye nchia co anto ᵑhjoin diconchjian nchia!

² Co Jesús ndaᵑho:

—¿Adicon cain nchia yeye yá? Pero yá sittoeha ni ná ᵑo ngataha iná ᵑo; cainxin rroxante.

Quehe tsonhe icha saho que mundo ndatsjexin
(Mt. 24.3-28; Lc. 21.7-24; 17.22-24)

³ Cottimeja savinttecji na ngain jnanchjan que dinhi Nttaolivo, que jí chian de nihngo mé. Co are Jesús tají nttiha, Pedro, Jacobo, Juan, co Andrés ndaᵑho na ngain Jesús:

⁴ —Rinaho na que rrondachjenji ni ra quesa tsonhe cain cosa yá. ¿Quehe seᵑal sehe are cain cosa yá siconhe?

⁵ Cottimeja Jesús ndaᵑho:

—Tjiho ra cuidado que ᵑonhi chojni sinttayaha ra.

⁶ Ixin anto tsje chojni tsi co sinchegonda na nombrena co rrondaᵑho na: “Janha tti Cristo na”; co sinchehe na tsje chojni.

⁷ Co are jaha ra tsinhi ra ixin jí guerra chian co cjin, jaha ra ᵑaonha ra ixin jamé chonda que tsonhe. Pero ᵑa jaha tiempo para ndatsjexin mundo.

⁸ Ixin ná nación tsetocaho iná nación. Co ná region tsetocaho iná región. Co tsingui nontte tsje lugar, co tsje chojni senxin jintta co chojni tsetocaho chó na. Are cain cosa jihi tsonhe nandá tsexinhi tsonhe tti anto tangui que tsonhe chojni.

⁹ Pero jaha ra tjiho ra cuidado ixin rrotse ra na co sinttachianha ra na ngain xittetonha icha. Co soen ra na ngaxinhi nihngo. Co chonda que jaha ra tsonchienne ra ngain tsje xigobernador co tsje xirey de ixin causanaxin janha. Cain jihi rrochondaxin ra oportunidad de rronichja ra ngain cain jehe xa de ixin janha.

¹⁰ Ixin icha saho que mundo ndatsjexin chonda que tsonohe chojni de cainxin nación ngoixin mundo tti joajna que danjo iná vida nroaxin.

¹¹ Co are rrotse ra na co sinttachianha ra na ngain xittetonha icha, taha ra joachjaon de ixin quehe rrondaᵑho ra ngain xa, co ni ᵑaxaonha ra de ixin mé. Jeho rrondaᵑho ra tti Dios rrondattjo ra rato mé ixin jaha jaha ra tti rronichja ra, sino que Espíritu Santo tti sinttanichja ra.

¹² Co tsje chojni sinchechienne xanchó na ngá rá niningaconhe xan co rrondaᵑho na para nasenxon xan. Co te nindoha chjan que sinchechienne xenhe na ngá rá niningaconhe xan, co te chjan que sinchechienne nindoha xan ngá rá niningaconhe na para que jehe na nasoexon na na.

¹³ Co cainxin chojni rroningaconha ra de ixin causanaxin na janha. Pero chojni que cainxin tiempo sitticaon jian nganji na janha, chojni mé rrochonda iná vida nroaxin.

¹⁴ Co profeta Daniel dicjin co ndačo de ixin ná cosa icha jianha de cainxin cosa co anto nchejianha icha cosa. Co are sicon ra cosa jianha mé ngain nihngo icha importante tti jiquininxinha sehe jehe mé —tti tsjehe xón jiji, chonda que tsinxin—, are mé chojni que te Judea chonda que satsinga na para ngagaha jna.

¹⁵ Co chojni que sintte ngataha techoe nchiandoha, are jehe sania, que sixinha ngaxinhi nchiandoha para sirroé cosé que jí ngaxinhi nchia co jaca satsinga.

¹⁶ Co chojni que sintte ngataon jngui, que rrocjanha ni para sirroé lonttoe ngain nchiandoha, sino que jaca satsinga.

¹⁷ ¡Anto tangui para ixin nchí que sintteyá chjan nchanho mé o nchí que rrochonda chjan que xa tetai!

¹⁸ Nchetsenhe ra ñao Dios que jaha ra rrochondaha ra que satsinga ra mero ngain tiempoe quin

¹⁹ ixin ngain nchanho mé icha tangui tsonhe chojni, que xa xonhi tiempo tonhe jamé ni desde que Dios joinchechjian mundo, ni tsonhe después.

²⁰ Co si Dios sinchenchinha tiempo mé, xonhi chojni rroxehé. Pero Dios sinchenchín tiempo mé ixin jehe rinao chojni que coinchiehe.

²¹ “Co si chonja chojni rrondattjo ra: “Tsjexin ra nttihi jí Cristo”, o “Tsjexin ra nojiha jí”, pero jaha ra ditticaonha ra.

²² Ixin tsí anto tsje tti sincheyehe chojni ixin rrondačo na que jehe tti Cristo co rrondačo na ixin jehe na dayé na joajna de ngain Dios. Co sinchehe na tsje señal co milagro para sincheyehe na tsje chojni, co si nchao hasta tti chojni que Dios mismo coinchiehe, sincheyehe na.

²³ Pero jaha ra xaxaon ra que ixin janha ondattjo ra jai cain de ixin nchanho mé.

Quexén tsi tti Xí que joixin de ngajni

(Mt. 24.29-35, 42-44; Lc. 21.25-36)

²⁴ Co Jesús ndačo cai:

—Pero después de tiempo tangui mé, nchanho isinchegasanha, co conittjao isanjoha va chíxo.

²⁵ Conotse sinttjixin va de ngajni, co hasta cain cosa que jí ngajni rroxanga.

²⁶ Cottimeja sicon na na janha, tti Xí que joixin de ngajni, sihi ngacjan ttjoi conixin anto tsje joachaxin co gloria.

²⁷ Cottimeja rrorroanha cain angelna para tsji sicjejo cain chojni que janha coinchiá de cainxin parte de ngoixin mundo co de ngajni.

²⁸ Tangui ra ejemploe nttahigo: Are xesan ramé ntta co chinhi qué ntta, jaha ra onoha ra ixin ochian tsí tiempoe chin.

²⁹ Co xajeho jamé cai, are jaha ra sicon ra tsonhe cain cosa yá, jaha ra noha ra ixin ochian sihi janha iná, ongandanguí puerta sihi.

³⁰ Co seguro rrondattjo ra que cainxin cosa yá tsonhe icha saho que cain chojni de generación jiji ndasenehe.

³¹ Ngajni co nontte ndasitján, pero palabrana sitjanha; chonda que tsonhe cain tti janha ndačhan.

³² Pero nchanho co hora que tsonhe mé ni ná chojni noeha, ni cain ángel que te noi noeha, ni janha, tti Xenhe Dios, nonaha. Jeho Dios Ndodá na tti nohe.

³³ Mexinxin jaha ra dintte ra listo co nchecoanxinhi ra Dios, ixin noaha ra quesa tsí hora mé.

³⁴ Jamé inchin ná xí que satsji cjin co tsinttohe xa nchiandoha xa. Pero icha saho que satsji xa, ttetonhe xa cain ninchehe xé xa ixin sinttenda na jehe nchia mé. Co ndache xa cada na quehe xa sinchehe na, co ttetonha xa ngain xiportero ixin senda xa jian.

³⁵ Mexinxin jaha ra dintte ra listo ixin jaha ra inchin tti nivittoenda nchia mé. Venoeha na quesa rrocjan xinajni na; ¿atsí xa are tsocjin, o atsi xa are ttie, o tsí xa are ndoyo, o atsi xa are osingasán?

³⁶ Co nchaoha si are sihi janha, jaha ra sintteha ra listo.

³⁷ Tti ndattjo ra jeoha para ixin jaha ra, ndačhan para ixin cainxin chojni: ¡Dintte ra listo!

14

Are vinttecjao na quexén sinchehe na para rrotse na Jesús

(Mt. 26.1-5; Lc. 22.1-2; Jn. 11.45-53)

¹ Vitján yó nchanho para tti quiai dinhi pascua are jine na niottja que chondaha levadura. Co are mé cain xidána que vaquetonha ngain icha xidána co cain ximaestroe ley cjoé xa quexén sinchehe xa para rrojincheyehe xa Jesús co rrotse xa co nasoenxon xa.

² Pero ndačo xa:

—Sonttoha na are mero quiai ixin cain chojni seguro tsoñaoa na na co tsetocoho na na.

Nhí que cointjtite aceite cuerpo Jesús

(Mt. 26.6-13; Jn. 12.1-8)

³ Ná nchanho ngain rajna Betania Jesús tajine ngaxinhi nchiandoha Simón tti veninxin chin lepra. Co are jehe tají ngain mesa, joixinhi ná nhí que joicao ná xoꝑao de marmol jíche de aceite que anto xajni que diconchjian joxon ca dinhi nardo co aceite mé anto rentte. Conдай ncha xo mé co cointjtitaha ncha cain aceite mé ngataha já Jesús.

⁴ Co canxion de tti nite nttiha goñao na co ndache chó na jecho na:

—¿Quedonda coxinoa aceite yá?

⁵ Nchao rrococchi aceite yá co anto tsje tomi rroguite, inchin tsjexin dacha ná tti nchehe xa ngoixin ná nano. Co tomi mé nchao rrocjenguijna chojni noa.

Co joinchesattehe na tti nhí mé.

⁶ Pero Jesús ndacho ngain na:

—Tanchjanda ra nhí yá. ¿Quedonda nchesattehe ra? Jehe ncha joinchehe ncha ná cosa jian nganji na janha.

⁷ Chojni noa cainxin tiempo sintte na ngayaha ra, co nchao tsjenguijna ra na are jaha ra sinao ra. Pero janha cainxinha tiempo sarihi nganji ra.

⁸ Nhí jiji joinchehe ncha tti nchao conohe ncha joinchehe ncha. Ochjé ncha cuerpona aceite para rroꝑavá na.

⁹ Co seguro rrondattjo ra que ngoixin mundo tti rronichja na tti joajna que danjo iná vida naroxin, cai rronichja na ixin quehe joinchehe nhí jiji nganji na janha, para rroꝑaxaon na de ixin jehe ncha.

Judas ndacho para rrotse na Jesús

(Mt. 26.14-16; Lc. 22.3-6)

¹⁰ Cottimeja Judas Iscariote, jehe ná de tti tteyó chojni que vacao Jesús, cjoí ngain canxion xidána que vaquetonha ngain icha xidána, para cjoao chó na quexén jehe Judas sanjo Jesús ngain xa.

¹¹ Co are jehe xa coinhi xa ixin quehe joindacho ngain xa anto ché xa, co ndacho xa ngain ixin sanjo xa tomi. Cottimeja Judas coexinhi xaxaon ixin quexén sinchehe para sinchechienhe Jesús ngain xa.

Are joincaho Jesús tti tteyó chojni que vacao

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Ngain saho nchaoen quiai que jine na niottja que chondaha levadura, nchanho mé doen na coleco. Co chojni que vacao Jesús joanchianguihi na co ndacho na ngain:

—¿Ttinó rinao sinttachjianxin na tti sintte soixin ngain quiai pascua?

¹³ Cottimeja Jesús coetonhe yó chojni que vacao co ndacho ngain na:

—Tji ra ngain ciudad de Jerusalén, co nttiha setan ra ná xí que jidicao ná nhíxa de jinda. Sattjiho ra xí mé.

¹⁴ Co tti nchia sixinhi xa, nttiha ndache ra tti ndoha mé: “Tti Maestro ndacho: ¿Ttinó jí cuarto tti sinexin ngain quiai pascua conixin cain chojni que dicao?” Jañá choache ra tti ndoha mé.

¹⁵ Cottimeja jehe tti ndoha mé tsjagoha ra ná cuarto jie ngain piso yoxin que onchao jí. Nttiha nchechjianxin ra tti sontte na.

¹⁶ Cottimeja cayoi chojni mé sacjoi na para ngain ciudad co vittja na cain inchin Jesús ndacho ngain na. Co nttiha joinchechjianxin na tti joine na ngain quiai pascua.

¹⁷ Co are ondacontie Jesús co tti tteyó chojni que vacao xatte na para joincaho na.

¹⁸ Co are tene na, Jesús ndacho ngain na:

—Janha seguro rrondattjo ra que ná de jaha ra xo tentte ra nganji na jaxon rrondache ra chojni quexén para rrotse na na janha.

¹⁹ Cottimeja cain jehe na tavinttechín na co coexinhi na joanchianguihi na Jesús ná na co ná na, co ndacho na:

—¿Apoco janha?

Co cai iná ndacho:

—¿Apoco janha?

²⁰ Co Jesús ndacho:

—Ná de tti tteyó jaha ra que tejintte ra ngain láto jiji conixin janha.

²¹ Janha, tti Xí que joixin de ngajni, chonda que ndasenne na inchin jitaxin ngain Palabré Dios, pero anto tangui tsonhe tti xí que rrondache chojni quexén para rrotse na na; icha jian si jehe rrogoanha.

²² Co are tene na, Jesús coá niottja co chjé gracias ngain Dios, cottimeja váña nio, co joanjo ngain cain na co ndaço:

—Jintte ra. Jihí rrotho cuerpona.

²³ Cottimeja coá Jesús vaso co chjé gracias ngain Dios, co joanjo ngain na cai, co cain na vihi na nchinnchin.

²⁴ Co ndaço ngain na:

—Jihí rrotho jnina que nchese gurá tti trato nroaxin co sinttji jnina para tsjenguijna tsje chojni.

²⁵ Co seguro rronhattjo ra que janha isiha tti danjo ttouva hasta tsí tti nchanho que janha sihi tti vino nroaxin ngain lugar tti ttonha Dios.

Jesús ndaço que Pedro rrondaço ixin jehe chonxinha Jesús

(Mt. 26.30-35; Lc. 22.31-34; Jn. 13.36-38)

²⁶ Are vinttetsje na ná himno, cottimeja sacjoi na ngain jnanchjan que dinhi Nttaolivo.

²⁷ Cottimeja Jesús ndaço ngain na:

—Cain jaha ra sinttechinhi ra de ixin janha ngain ttie jihí, ixin jitaxin ngain Palabré Dios: “Janha, tti Dios, nasoexon tti ttingaria coleco, co cain coleco ndarrochjequé va.”

²⁸ Pero después que janha rroxechon na, cottimeja janha saho tsji Galilea que jaha ra.

²⁹ Cottimeja Pedro ndaço ngain Jesús:

—Masqui cain jehe na sinttechin na de ixin soixin, pero janha nahi.

³⁰ Cottimeja Jesús ndaço ngain:

—Janha seguro rronhattjo que ngain ttie jihí saho que conttaxichia rrotsje va yoxin nttiha, jaha orrondaço ninxin nttiha ixin chonxinha na janha.

³¹ Pero Pedro xa ndaço ngain Jesús:

—Masqui rrochonda que senhe na conixin jaha, pero janha rrondaçhjanha ixin chonxinha.

Cai cain ni icha ndaço na xajeho.

Jesús joinchetsenhe ñao Dios ngain Getsemaní

(Mt. 26.36-46; Lc. 22.39-46)

³² Cottimeja joiji na ngain ná lugar dinhi Getsemaní, co Jesús ndaço ngain na:

—Tadintte ra nttihi are janha sinttatsán ñao Dios.

³³ Co sajoicao jehó Pedro, Jacobo co Juan. Co Jesús coexinhí conohe ná joaxaon anto soji co cai conohe anto jie joachjaon que joinchenihí ansén.

³⁴ Co ndaço ngain canio nijoicao:

—Janha tonona ngain ansenna ná joachjaon anto soji hasta rinaho ndasenhe na. Jaha ra dittoha ra nttihi, co dinttechinha ra.

³⁵ Cottimeja Jesús sacjoi nchion cjín de ngain na, co vejantaha ngataha nontte. Co joinchetsenhe ñao Dios que si nchao jehe rrogattoha ngain tiempo que jitonchian are jehe anto tangui tsonhe.

³⁶ Co are jinchetsenhe ñao Dios, ndaço:

—Padre, soixin nchao nchehe cainxin cosa. Mexinxin si nchao, tançhjangaha na janha satto ngain tti anto tangui que tsonna. Pero tsoenha inchin janha rinaho, sino que tsonhe inchin soixin rinao.

³⁷ Cottimeja cjan Jesús ngain tti vittohe canio chojni que vacao, pero otatejoa canio na. Co ndaço ngain Simón Pedro:

—Simón, ¿aotarrichin? ¿Acoixianha tajoaritsjehe ni ná hora?

³⁸ Tadinttetsjehe ra co nchetsenhe ra ñao Dios para que conhi cosa jianha sinttatjanji ra. Ndoa, espirítua ra anto rinao sintte jian, pero cuerpoa ra sojiha.

³⁹ Cottimeja cjan Jesús sacjoi para joinchetsenhe ñao Dios iná, co ndaço xajeho.

⁴⁰ Co are cjan jói ngain na jehe na otatejoa na iná ixin icoixinha con na de anto cottachin. Co are xingamehe na ni inoencoia na quehe rrondaço na ngain Jesús.

⁴¹ Cottimeja ninxin nttiha Jesús sacjoi para joinchetsenhe ñao Dios iná, co are cjan ngain na, ndaço:

—Janché dinttechin ra co nchejogaha ra ixin onchao; hora ojoi are janha, tti Xí que joixin de ngajni, chonda que tsonchian ngá rá chojni jianha.

⁴² Dingattjen ra, nttimé jói tti ndaço quexén para rrotse na na janha.

Are tse na Jesús

(Mt. 26.47-56; Lc. 22.47-53; Jn. 18.2-11)

⁴³ Are Jesús xa jinichja ngain tti ní chojni mé, jói Judas, ná de tti tteyó chojni que vacao Jesús, co joicao Judas anto tsje xí que teyá espada co nttá. Xidána que vaquetonha ngain icha xidána, ximaestroey ley co xittetonha ngain nihngo, xí mé rroanha xa cain chojni mé.

⁴⁴ Judas, tti joindacho quexén para tse na Jesús, odindacho ngain na ixin quexehe señal sinchehe ngain Jesús para jehe na nohe na quensen Jesús, co ndacho:

—Tti janha tsetoxin para rrochjaha joajna, jehe mé. Tse ra co sattjiho ra co ttjiho ra cuidado jian que satsingaha.

⁴⁵ Co are ojoí, jehe conchienne ngain Jesús co ndacho:

—Maestro, Maestro.

Co coetoxin Jesús.

⁴⁶ Cottimeja tse na Jesús para sajoicao na.

⁴⁷ Pero ná de tti vintte nttiha joantsje espadé co conchinjihi na ndatsjoen ná xinchehe xé xidána icha importante.

⁴⁸ Cottimeja Jesús ndacho ngain cain chojni que joi:

—¿Quedonda jaha ra joihi ra conixin espada co nttá para rrotse ni ra janha como si janha rrocji ná tti chehe?

⁴⁹ Anto tsje nchanho joarihi janha ngayaha ra ngain nihngo icha importante para jointtaoanha ra, co xonhi tiempo tse ni ra. Pero janhi tsonhe, para tsonhe inchin jitaxin ngain Palabré Dios.

⁵⁰ Cottimeja cain chojni que vacao Jesús cointtohe na jeho, co jehe na sacoiinga na.

Ná xanxí que sacoiinga

⁵¹ Co cai nttiha ná xanxí vetsá xan jeho ná lontto roa. Co tse na xan.

⁵² Pero vachjenga xan lontto mé co sacoiinga xan ttoलोcho xan.

Jesús ngain juzgadoe nihngo

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Cottimeja sajoicao na Jesús ngain xidána icha importante. Co xatte cainxin xidána que vaquetonha ngain icha xidána co cain xittetonha ngain nihngo, co cain ximaestroe ley.

⁵⁴ Co Pedro ta tti cjin jirroexin hasta joihi ngain patioe nchiandoha xidána icha importante, co nttiha tavehe xixohe ngain xohi, jehe conixin xipolicíe nihngo icha importante.

⁵⁵ Cain xidána que vaquetonha ngain icha xidána, co cain xí que vechonda joachaxin ngain juzgadoe nihngo, cain xí mé cjoé xa quexén sinchecaxin xa Jesús para nasoenxon xa Jesús. Pero choha vittjehe xa Jesús ni ná cosa jianha.

⁵⁶ Co tsje na joinchecaxin na Jesús, pero xonhi chojni nichja xajeho inchin nichja iná chojni para joinchese gurá chó na.

⁵⁷ Cottimeja canxion na vingattjen na co joinchecaxin na Jesús co ndacho na:

⁵⁸ —Janha na coian na ndacho xí yá ixin jehe tsonxantte nihngo icha importante jiji que dinchexjian chojni, co nincoa nchanho jehe xa sinchexjian xa iná nihngo que jeha chojni nchexjian.

⁵⁹ Pero masqui ndacho na jañá, xa nichjaha na mero xajeho.

⁶⁰ Cottimeja xidána icha importante vingattjen xa ngayé cainxin na, co joanchiangui xa ngain Jesús co ndacho xa:

—¿Axonhi rrondacho jaha? ¿Quehe rrocho cain tti jinichja chojni tehe de ixin jaha?

⁶¹ Pero Jesús xonhi nichja. Co jehe xa cjan xa joanchianguihi xa iná co ndacho xa:

—¿Ajaha tti Cristo, Xenhe Dios que anto jian?

⁶² Co Jesús ndacho:

—Ján, janha. Co sicon ni ra janha, tti Xí que joixin de ngajni, sarihi ngain lado jian de Dios, tti chonda cainxin joachaxin. Co cai sicon ni ra are rrocjan na sihi ngacjan ttjoi.

⁶³ Cottimeja jehe xidána icha importante mé goñao xa. Mexinxin coinchje xa lonttoe xa, co ndacho xa:

—¿Quedonda tsje na icha chojni de testigo?

⁶⁴ Jaha ra ocoini ra quexén nichja xa jianha de ixin Dios. ¿Quehe xaxaon ra?

Co cainxin na ndacho na ixin Jesús jiquininxin ndasenne.

⁶⁵ Cottimeja canxion na coexinhi na cointttjite na nttatté na, co coejehe na con Jesús, co xanguí na manazo, co ndache na:

—Si jaha ná profeta, ndacho quexehe tti goen.

Co cain xipolicíe nihngo icha importante cai xanguí xa Jesús manazo.

Pedro ndacho ixin jehe chonxinha Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Are Pedro tají nonnte ngain patioe nchiandoha xidána icha importante, vatto ná nchimozé xidána mé.

⁶⁷ Co are vicon ncha Pedro tajixixohe ngandehé xohi, jehe ncha tavengattjen ncha, tsjehe ncha co ndacho ncha ngain:

—Jaha cai vacjiho Jesús, tti joixin de Nazaret.

⁶⁸ Co Pedro ndaŕho ixin ndoaha ngain nŕha co ndaŕho:

—Janha chonxinha xí yá, ni nonaha de quehe rrinichja jaha.

Cottimeja sacjoi para ngain puerté patio mé. Co rato mé tsje ná conttaxichia.

⁶⁹ Co nŕhimoza mé cjan nŕha vicon nŕha iná, co coexinhi ndaŕho nŕha ngain nite nttiha:

—Xí jiha ná xivacao Jesús.

⁷⁰ Pero Pedro cjan ndaŕho ixin ndoaha. Cottimeja icanxin nite nttiha ndaŕho na ngain Pedro:

—Jaha seguro ná chojni que vacao Jesús, ixin jaha cai joixin regioen Galilea. Co inchin nichja chojni de Galilea, jamé nichja jaha.

⁷¹ Cottimeja Pedro jehó joanchia ná castigo ngain Dios para ixin jehe ixin joinchejurá ngain Dios co ndaŕho:

—Janha chonxinha xí yá que jaha ra tendachjenji ni ra.

⁷² Co rato mé tsje conttaxichia yoxin nttiha. Cottimeja Pedro xaxaon tti ndaŕho Jesús: “Icha saho que conttaxichia rrotsje va yoxin nttiha, jaha orrondaŕho ninxin nttiha ixin chonxinha na janha.” Co are jehe xaxaon yá, jehe vehe tsjanga.

15

Jesús ngain Pilato

(Mt. 27.1-2, 11-14; Lc. 23.1-5; Jn. 18.28-38)

¹ Co are vingasán, xatte cain xidána que vaquetonha ngain icha xidána, co cain xittetonha ngain nihngo, co cain ximaestroe ley, co cain xivechonda joachaxin ngain juzgadoe nihngo. Co cainxin chojni mé coia na Jesús co joicao na ngain xigobernador Pilato.

² Cottimeja Pilato joanchianguihi Jesús, co ndaŕho:

—¿Ajaha tti Rey de chojni judío?

Co Jesús ndaŕho:

—Ján, jañá inchin jaha ndaŕho.

³ Co cain xidána que vaquetonha ngain icha dána cjoanguihi xa Jesús anto tsje cosa.

⁴ Cottimeja Pilato cjan joanchianguihi Jesús iná, co ndaŕho:

—¿Quedonda xonhi nichja jaha? Tsjexin quejanhi cosa tjanguiha na.

⁵ Pero Jesús xonhi ndaŕho. Co Pilato inoeha quehe rroxaxaon de ixin jehe Jesús.

Are ndaŕho na ixin Jesús chonda que ndasenhe

(Mt. 27.15-31; Lc. 23.13-25; Jn. 18.38—19.16)

⁶ Co ngain cada quiai pascua, Pilato vechonda costumbre de vacanŕhjanda ná de tti teaxinhi. Quexeho de tti chojni que vaquinchiehe jehe na, Pilato vacanŕhjanda vagaŕhje.

⁷ Co tiempo mé, veaxinhi ná tti vinhi Barrabás. Jehe co icanxin na vintteaxinhi ixin goen na canxion chojni are vaquetocaho na gobierno romano.

⁸ Co tsje chojni xatte co ndache na Pilato ixin tsanŕhjanda ná de tti teaxinhi, inchin vanchehe na cada quiai mé.

⁹ Co Pilato ndaŕho ngain na:

—¿Arinao ra tsanŕhjanda tti jaha ra ncheguini ra Rey de chojni judío?

¹⁰ Jañá cho ixin jehe ovenohe ixin xidána que vaquetonha ngain icha xidána conchjoehe xa ngain Jesús ixin jehe cainxin cosa jian vanchehe. Mexinxin joinchechienxin xa Jesús nttiha.

¹¹ Pero cain jehe xa ndache xa cain chojni ixin icha jian rrondaŕho na ixin saŕhje Barrabás.

¹² Cottimeja Pilato ndaŕho ngain na:

—¿Quehe rinao ra sinttaha janha ngain tti jaha ra ncheguini ra Rey de chojni judío?

¹³ Cottimeja cain jehe na coyao na, co ndaŕho na:

—¡Nchecrucificá!

¹⁴ Co Pilato ndaŕho ngain na:

—Pero ¿quedonda? ¿Quexehé cosa jianha joinchehe?

Pero cainxin na cjan na ndaŕho na sén:

—¡Nchecrucificá!

¹⁵ Co ixin Pilato joinao vittohe jian ngain chojni, mexinxin coanŕhjanda Barrabás sacjoi. Co are joexin coetonha para vicaon Jesús, cottimeja coanŕhjanda xisoldado para joinchecrucificá xa.

¹⁶ Cottimeja xisoldado sajicoa xa Jesús ngain patioe nchiandoha Pilato co nttiha vayé xa cainxin icha xisoldado cai.

¹⁷ Co coentsá xa Jesús ná lontto morado inchin lonttoe rey, co joinchecjinga xa Jesús ná corona de joxon nchaha.

¹⁸ Cottimeja coexinhi xa cjoanoa xa Jesús, co ndaŕho xa sén:

—¡Viva tti Rey de chojni judío!

¹⁹ Co xanguí xa nttá já Jesús, co cjoatjo xa nttatté xa, co vettoxin nttajochjihli xa ngain Jesús inchin rrojinchesayehe xa.

²⁰ Co are joexin joinchehe xa cain yá para cjoanoa xa Jesús, cottimeja joantsjehe xa tti lontto morado coentsá xa, co cjan xa joinchengá xa lonttoe Jesús. Cottimeja sajoicao xa Jesús para joinchecrucificá xa.

Are joinchecrucificá na Jesús

(Mt. 27.32-44; Lc. 23.26-43; Jn. 19.17-27)

²¹ Ná xí que vinhi Simón joixin ngain ciudad de Cirene. Co xí mé cjoí ndodé Alejandro co Rufo. Co are vatto nttiha, xisoldado joinchecame xa crué Jesús.

²² Joicao xa Jesús ngain ná lugar dinhi Gólgota, que mé rrocho Lugué Nttalorojá Chojni.

²³ Co joanjo xa ngain Jesús vino que jittecjan ndé ná ca dinhi mirra ixin rroguíhi. Pero Jesús viha vino mé.

²⁴ Cottimeja joinchecrucificá na Jesús, co joantsje na suerte para chjehe na lonttoe Jesús.

²⁵ Las nueve ndoyo joinchecrucificá na Jesús.

²⁶ Co coentaxin na ná xón ixin quedonda joinchecrucificá na, co xón mé vetaxin: “Tti Rey de chojni judío.” Co coenganito na xón mé já cruz.

²⁷ Co joinchecrucificá na yó tti chehe ngaca Jesús, ná vehe lado jian Jesús, co iná vehe lado cjon Jesús.

²⁸ Jañá conhe inchin jitaxin ngain Palabré Dios tti ndacho: “Nasoenxon na jehe inchin nadoenxon na chojni jianha.”

²⁹ Co cain nijoitsjehe ixin quexén jí Jesús nganito cruz coenttjoinga rroha na co cjoanoa na Jesús co ndacho na ngain:

—Jaha ndacho ixin sinchexante nihngo icha importante co nincoa nchanho otsjaha sinchekhjian nihngo mé iná.

³⁰ Mexinxin jaxon daniaxin de nganito cruz yá jaho para senha.

³¹ Cai canxion xidána que vaquetonha ngain icha xidána, co ximaestroey ley cjoanoa xa Jesús, co ndache chó jecho xa:

—Jehe nchao cjoenguijna icha chojni, pero čhoha tsjenguijna cuerpoey jehe mismo.

³² Si jehe tti Cristo, Rey de chojni Israel, socon na saniaxin jaxon de nganito cruz, cottimeja, ján, sotticaon na.

Co hasta cayoi tti xite nganito cruz nttiha cjoanoa xa Jesús.

Are ndavenhe Jesús

(Mt. 27.45-56; Lc. 23.44-49; Jn. 19.28-30)

³³ Are ngosine nchanho, ndaconaxin xehe ngoixin región mé, co conchjenhe tti naxin xehe mé hasta ní hora tsocjin.

³⁴ Co hora mé Jesús coyao soji, co ndacho:

—Eloi, Eloi, ¿lama sabactani? —que rrocho: Diona, Diona, ¿quedonda ndacointtona na janha?

³⁵ Co canxion nite nttiha coinhi na nichja Jesús pero coinxinha na quehe ndacho Jesús, co ndache chó na:

—Ttinhí ra, jidayé Elías.

³⁶ Cottimeja ná de jehe na coinga co coá ná cosa dinhi esponja. (Cosa mé datse jinda inchin chjon algodón.) Co jehe joinchetjao cosa mé conixin vino que anto san. Co coincjin ná nttá co tsín noi nganito cruz para Jesús rrocajindoe, co chojni mé ndacho ngain ni icha:

—Chonhe ra. Socon na aco tsí Elías para sinchegania.

³⁷ Cottimeja Jesús coyao soji, co ndavenhe.

³⁸ Co rato mé tti manta vettoa ngaxinhi nihngo icha importante vichjenga manta de noi hasta nontte.

³⁹ Co are xicapitán que jingattjen nttiha ngain Jesús vicon xa quexén coyao Jesús co quexén ndavenhe, ndacho xa:

—Seguro xí jihí Xenhe Dios.

⁴⁰ Co cai tsjehe canxion nchí masqui de cjin. Co ngacjén cain nchí mé, nttiha vehe Salomé co María Magdalena, co iná María tti cjoí janné José co Jacobo tti icha nchín.

⁴¹ Icha saho are Jesús vehe ngain nonttehe Galilea, canio nchí mé vangaria conixin jehe co vagayaconhe ncha Jesús. Cai icha nchí jói conixin Jesús ngain Jerusalén. Co are jehe nganito cruz, nttiha vintte cainxin nchí mé cai.

Are Jesús xavá

(Mt. 27.57-61; Lc. 23.50-56; Jn. 19.38-42)

⁴² Omerocoa naxin xehe, co ixin nchanho mé víspera de tti nchanho para joinchejogaha na ngain quiai pascua, rrocho ixin nchanho are ndavenhe Jesús nchanho para joinchechjian na cain tti joine na ndoexin are joinchejogaha na;

⁴³ mexinxin jaicoa joí ná tattíta vinhi José de rajna Arimatea. Jehe vechonda tsje joachaxin ngain juzgadoe nihngo Israel. Cai jehe anto joinao joí tti tiempo que Dios ttetonha. Co tattíta mé xaonha joixinhi tti jí Pilato co joanchiehe cuerpoe Jesús.

⁴⁴ Pilato anto goan admirado ixin ondavenhe Jesús co rroanha xicapitán para joanchian-guihi xa.

⁴⁵ Co are xicapitán ndacho xa ixin ndoa ondavenhe Jesús, Pilato joanjo joachaxin para sajoicao José cuerpoe Jesús.

⁴⁶ Cottimeja José coehna ná manta fino, roa manta, co joinchegania cuerpoe Jesús co coensiha manta mé. Cottimeja coín cuerpoe Jesús ngain ná cueva naroaxin que odingue na ngadoho ná ttjao nttiha, co coejé conixin ná xo jie.

⁴⁷ María Magdalena co María janné José vicon na ttinó vittohe cuerpoe Jesús.

16

Are xechon Jesús

(Mt. 28.1-10; Lc. 24.1-12; Jn. 20.1-10)

¹ Co are vatto nchanho para joinchejogaha na, Salomé co María Magdalena, co iná María janné Jacobo sajoicao na ná xoan que diquehna na co anto chjoin xajni xoan mé inchin perfume para rrochjé na cuerpoe Jesús.

² Co are chihinhi nchanho domingo, tti saho nchanho de semana, sacjoi na ngain tti vittohe cuerpoe Jesús.

³ Co ndache chó na ngatja nttiha:

—¿Pero quensen tsoxınca xo jie que jijé cueva yá?

⁴ Pero are joiji na nttiha vicon na ixin tti xo jie que vijé cueva icoha xo nttiha, oje jí xo.

⁵ Co joixinhi na ngaxinhi cueva mé. Co nttiha vicon na ná xanxí tají xan lado jian, co lonttoe xan roa lontto, co hasta tti nontte jicaxin lontto. Co jehe na xaon na.

⁶ Co jehe xanxí mé ndacho xan ngain na:

—Xaonha ra. Onona ixin ttjé ra Jesús de Nazaret, tti joinchecrucificá na. Pero jehe oxechon co icoha nttihi. Tsjexin ra tti coín na cuerpoe.

⁷ Mexinxin ttji ra ngain chojni que vacao Jesús, co ngain Pedro cai, co ndache ra na: “Jesús icha saho tsji Galilea que jaha ra. Co nttiha siconxin ra jehe inchin jehe ndattjo ra.”

⁸ Cottimeja canio nchí mé coinga ncha vathjexin ncha de cueva mé co vintteXanga ncha ixin anto vintteXaon ncha. Co xonhi chojni ndache ncha ixin vintteXaoncoa ncha.

Are Jesús Xago ngain María Magdalena

(Jn. 20.11-18)

⁹ Co después que Jesús xechon ngain saho nchanho de semana, jehe Xago ngain María Magdalena, tti vechonda yáto espíritu jianha hasta que Jesús joinchexingamehe sé tiempo icha saho.

¹⁰ Cottimeja jehe María mé sacjoi joindache cain nivacao Jesús ixin Jesús xechon. Jehe nivacao Jesús anto vinttechín na co vatsjanga na are mé ixin Jesús ndavenhe.

¹¹ Co are coinhi na tti ndacho María vitticaonha na palabré jehe.

Jesús Xago ngain yó chojni que vacao

(Lc. 24.13-35)

¹² Co después de jilhi, Jesús Xago ngain yó de tti chojni que vacao are satettji na ngatja nttiha. Co cayoi chojni mé vicon na Jesús inchin oje chojni.

¹³ Cottimeja are cayoi chojni mé vatsoan ixin jehe mé Jesús, cjan na co ndache na tti icha chojni que vacao Jesús, pero jehe na, ni icha, Xa vitticaonha na.

Tti coetonhe Jesús nirepresentanté jehe

(Mt. 28.16-20; Lc. 24.36-49; Jn. 20.19-23)

¹⁴ Co icha después Jesús Xago ngain cainxin tti ttejngo chojni que vacao are tatene na. Co joinchesattehe na ixin vitticaonha na co ixin cha ansén na ixin vitticaonha na tti ndacho chojni que vicon Jesús dixechon.

¹⁵ Cottimeja ndacho Jesús ngain na:

—Ttji ra ngoixin mundo co ndache ra cainxin chojni tti joajna que danjo iná vida naroaxin.

¹⁶ Chojni que sitticaon co siguitte, rrochonda iná vida naroaxin. Pero chojni que sitticaonha, mé Dios sinchecondená chojni mé.

¹⁷ Co janhi sinchehe chojni que sitticaon na janha: Jehe sinchegonda joachaxin de nombrena para senguixin espíritu jianha, co rronichja ojé idioma que ni jehe tsinxinha.

¹⁸ Si rrotse ná conché, xonhi tsonhe masqui conché mé sinehe va jehe. Co si sihi ná cosa que ndadoen chojni, pero jehe xonhi tsonhe. Co saquehe rá ngataha chojni nihi co sinchetsenhe ñao Dios conixin joachaxin de nombrena co jehe tti nihi rroxingamehe.

Are Jesús saccoajín para ngajni

(Lc. 24.50-53)

¹⁹ Co are Jesús, tti chonda cain joachaxin, joexin ndačho cain cosa yá ngain na, jehe saccoajín para ngajni, co joiguehe ngain Dios lado jian.

²⁰ Co chojni Jesús sacjoi na cainxin lugar co ndache na chojni joajna que danjo iná vida naroaxin. Co jehe Jesús vacjenguujna na ngoixin tti vacji na. Co cai jehe vanchesegurá cain tti vandačho na ixin chjé na joachaxin para vanchehe na señal de milagro. Amén.

Tti Jian Joajné Jesucristo Que Dicjin Lucas

Quedonda Lucas dicjin joajna jihi

¹ Tsje chojni cjin historié Jesucristo inchin jehe conhe co jehe joinchehe ngataha nontte jihi.

² Jehe na cjin na inchin joinchecoanna na tti chojni que vicon cain tti joinchehe Jesús desde are nacoexinxon co cjoengujna na Jesús para ndache na chojni tti jian joajna que joixin de ngain Dios.

³ Janha cai joanchiangui jian de ixin cain tti joinchehe Jesús desde coexinxin xé, co janha xaxanho que jian jí para que janha rrocjin na cain cosa jihi inchin conhe para ixin jaha Teófilo, ixin jaha tti compañerona que anto jian,

⁴ para que jaha jian rrochonxin tti ndoa que jointtacoanha jehe na.

Ná ángel de Dios joindacho ixin tsoncjihí Juan, tti vancheguitte chojni

⁵ Are Herodes vehe rey de ngain Judea, are mé vehe ná xidána que vinhi Zacarías. Jehe vehe ngain grupoe xidána que vinhi Abías. Co çhihi Zacarías vinhi nçha Elisabet. Co cayoi jehe na cjoí na de razé Aarón, tti cjoí saho xidána.

⁶ Jehe Zacarías conixin çhihi, Dios ndaço ixin jian na co jehe na vaguitticaon na cain tti coetonha Dios co jañá xonhi chojni vanichja que ixin jehe na jianha vancheha na.

⁷ Pero jehe na xonhi çhjan vinttechonda na, ixin Elisabet deporsín xonhi çhjan vancheconcjihí, co cayoi jehe na anto ojonchjan vintte na.

⁸ Ngain ná tiempo grupoe Zacarías joinchehe tocado joinchehe xa de dána ngaxinhi ningoe Dios,

⁹ ixin jamé costumbre vinttechonda cain xidána ngain tiempo mé, mexinxin ngain sorteo vittotaon Zacarías para que jehe joixinhi ngaxinhi ningoe Dios para joicjaga tsjoca.

¹⁰ Ngoi rato que jiche tsjoca ngaxinhi nihngo, ndoja cain chojni joinchecoanxinhi na Dios.

¹¹ Co ngain rato mé Zacarías vicon ná ángel de Dios tajingattjen lado jian de ngain altar tti jichexin tsjoca.

¹² Are jehe vicon ángel mé, jehe ni inoeha quehe sinchehe ixin anto xaon.

¹³ Pero ángel mé ndaço ngain Zacarías:

—Zacarías xaonha, ixin Dios coinhi tti jaha joinchetsenhe ñao, mexinxin çhiha Elisabet sincheconcjihí ná çhjan que jaha sincheguinhí xan Juan.

¹⁴ Co jaha anto rrochaha co anto çhjoin saríhi ngain vidá, co tsje chojni rroché na ixin tsoncjihí çhjan mé.

¹⁵ Ixin xanha mé sehe xan xí importante para ixin Dios. Çhjan mé siha xan vino ni cosa que coanxin chojni, co rrochonda xan anto tsje joachaxín Espíritu Santo desde icha saho que tsoncjihí xan.

¹⁶ Co de ixin tti jehe xan sinchehe xan, tsje chojni de ngain nación Israel rrocjan na sincheyehe na Dios de jehe na tti chonda cain joachaxín.

¹⁷ Jehe Juan jihí tti saho tsí que Cristo, co rrochonda çajeho espíritu co çajeho joachaxin que vechonda profeta Elías, para rronndache chojni quexén jehe na sinao na xenhe na, co para que tti chojni que ditticaonha Dios tsanguí na sitticaon na Dios. Jamé para que chojni nchao sayé na Cristo are jehe tsí.

¹⁸ Zacarías joanchiangui ngain ángel mé co ndaço:

—¿Quexén rrochondaxin seguro janha de ixin jihí? Ixin janha atto daçhí na co cai çihna.

¹⁹ Ángel mé ndaço:

—Janha Gabriel na, co rrinttaha cain tti ttetonha Dios. Jehe tti coetonna para joindattjo tti jian joajna jihí.

²⁰ Pero jai ixin jaha vitticaonha tti janha ndattjo, jaha tsottapo; çhoja rronichja hasta que tsoncjija xanha. Co jihí siconhe ngain mero tiempoe.

²¹ Co ngoi rato mé, cain chojni nttiha techonhe na jehe Zacarías ndoja, co vinttegoan na admirado ixin Zacarías anto conçhjenhe ngaxinhi nihngo.

²² Co are jehe vachje, içhoha nichja ngain na; cottimeja xaxaon na que Dios cjoagoe ná cosa ngaxinhi ningoe Dios. Co jehe nichja ngain na conixin joxon seña ixin ndacottapo.

²³ Are joexin cain nchanho de xé Zacarías ngain nihngo icha importante, Zacarías sacjoi para nchiandoha.

²⁴ Después de cain yá, çhihi jehe Zacarías oveyá nçha çhjan, co de jamé vehe nçha, ivachjexinha nçha de nchiandoha nçha naho conittjao, co xaxaon nçha:

²⁵ “Dios joanjo joachaxin para que janha rriyá çhjan jai para que chojni itsjanoha na na.”

Ná ángel joinda'cho ixin tsoncjihi Jesús

²⁶ Vittjaxon incjaon conittjao, Dios rroanha jehe ángel Gabriel ngain regioen Galilea ngain ná rajna que dinhi Nazaret,

²⁷ para joitsjehe ná xann'chí que vinhi María. Xann'chí mé virgen xan co ovechonda xan compromiso de rrocottehe xan ná xí que vinhi José, razé rey David.

²⁸ Angel mé joixinhi tti nchia que jixinhi xann'chí mé, co nda'cho ngain xan:

—Janha joichjaha joajna jaha ixin Dios anto rinao jaha! Dios jí nganji jaha; Dios icha jointtanchaon jaha de cainxin n'chí.

²⁹ Pero are xann'chí mé vicon xan jehe ángel mé co coinhi xan tti nichja ángel mé, jehe xan goan xan admirado co inoeha xan ixin quedonda jamé nda'cho ángel ngain xan.

³⁰ Cottimeja ángel mé nda'cho:

—María, xaonha, ixin Dios anto rinao jaha.

³¹ Jai jaha sariyaha ná chjan co are osincheconcjihi xan, jaha sinchequinhi xan JESÚS.

³² Chjan mé anto importante sehe xan ngain Dios, co sinhi xan Xenhe Dios que ttjen ngajni, co jehe Dios rrochjé xan joachaxin de sehe xan rey inchin ndogoolitoe xan xan'chjen que vinhi David are saho.

³³ Jamé para que jehe xan tsetonha xan ngain nación Israel para cainxin tiempo, co tti jehe xan tsetonha xan xonhi tiempo tsjexin.

³⁴ Cottimeja María joanchiangui ngain ángel mé co nda'cho:

—¿Que'én tsonhe jihi, ixin janha xonhi xí rriquinha?

³⁵ Angel nda'cho ngain María:

—Espíritu Santo tsí nganji jaha co joachaxin Dios que ttjen ngajni sisiandanji jaha inchin ná ttjoi. Mexinxin tti chjan que jaha sincheconcjihi, sehe xan jian ngattoxon con Dios co sinhi xan Xenhe Dios.

³⁶ Cai n'chprimá, Elisabet, sincheconcjihi n'cha ná chjan cai masqui onachichjan n'cha, mexinxin tti n'chí que nda'cho chojni que 'choha ncheconcjihi chjan, jai jehe n'cha ochonda n'cha incjaon conittjao que jiyá n'cha xenhe n'cha.

³⁷ Para ixin Dios xonhi cosa tangui.

³⁸ Cottimeja María nda'cho:

—Janha ditticanho cainxin tti ttetonha Dios; co mexinxin Dios nchao sinchehe nganji na janha inchin jaha ndachjenji na.

Conixin jehó yá, ángel mé sacjoi.

María cjoí joitsjehe Elisabet

³⁹ Ngain tiempo mé María toin cjoí joitsjehe jehe Elisabet que vehe ngain ná rajna ngagaha jna ngain nonttehe Judea.

⁴⁰ Co are María joiji nttiha jehe joixinhi nchiandoha Zacarías co chjé joajna jehe Elisabet.

⁴¹ Are Elisabet coinhi joajné María, chjan que veyá Elisabet coingui xan ngaxinhi tsehe, co ngain rato mé Espíritu Santo joí conixin anto tsje joachaxin ngain jehe Elisabet.

⁴² Cottimeja Elisabet nda'cho s'én ngain María:

—Dios jointtanchaon jaha icha que cainxin n'chí, co joinchenchaon xanha que rriyaha.

⁴³ ¿Quensen na janha para que joitsjena jaha janné tti Dios que chonda cain joachaxin nganji na janha?

⁴⁴ Ixin are janha coian joajná jaha, xanhna que rriyá, coingui xan ngaxinhi tsehe na ixin ché xan.

⁴⁵ Antó chjoin para ixin jaha ixin vitticaon ixin siconha inchin nda'cho Dios.

⁴⁶ Cottimeja nda'cho María:

Almana ncheoanxinhi Dios.

⁴⁷ Co ansenna ché ngain Dios, tti chjana vida nroaxin.

⁴⁸ Ixin Dios xa'xaon de ixin janha, tti rrihi inchin ná ninchehe xa para ixin jehe, co jai pa ndaha chojni rronda'cho na ixin anto chjoin vidana.

⁴⁹ Ixin Dios, tti chonda cain joachaxin, jian nganji na janha; tsosayehe nombré jehe.

⁵⁰ Jehe cainxin tiempo tsiaconoehe cain chojni que xaon ngain jehe.

⁵¹ Jehe joinchehe cosa anto importante;

co joacha ngain tti chojni que tonohé orgulloso ngain ans'én.

⁵² Tti chojni que chonda tsje joachaxin jehe joinchenontte de ngain joachaxin, co tti chojni que xonhi joachaxin chonda, jehe Dios chjé na importancia.

⁵³ Tti chojni noa jehe chjé na cosa jian, co tti chojni rico jehe cointtohe na te'xoaxon rá na.

⁵⁴ Jehe cjoenguijna nación Israel ixin mé ninchehe xé jehe; jehe tjañeha de ttiaconoehe chojni mé,

⁵⁵ ixin jamé ndaŕho jehe ngain ndogoelitoa na xanŕhjen Abraham conixin cain xenhe ndo para cainxin tiempo.

⁵⁶ Co nttiha tavehe María ngain Elisabet inchin ní conittjao, cottimeja sacjan para nchiandoha.

Are concijhi Juan, tti vancheguitte chojni

⁵⁷ Después ovittja tiempo que Elisabet chonda que joincheconcjihi chjan, co jehe joincheconcjihi ná xanxí.

⁵⁸ Cain nivecinoe co nifamilié cjoí na joichjé na joajna ixin conohe na que Dios anto jian ngain Elisabet.

⁵⁹ Vittja jni nchanho, joichjé na xanxichjan mé tti xohe que dinhi circuncisión, co joaino na rroguinhi xan Zacarías inchin vinhi ndodé xan.

⁶⁰ Pero janné xan ndaŕho jan:

—Nahi. Xanhna chonda que sinhi xan Juan.

⁶¹ Co jehe na ndaŕhao na ngain Elisabet:

—¿Quedonda? Xonhi nindoi dinhi jañá.

⁶² Cottimeja joanchiangui na conixin seña ngain ndodé xanxichjan mé para conohe na que xén rinao jehe ndo sinhi xan.

⁶³ Jehe ndodé xan joanchia ndo rioho tabla para coentaxin ndo, co nttiha jehe ndo cjin ndo: “Jehe xan sinhi xan Juan.” Co cainxin nite nttiha vinttegoan na admirado de ixin nombre yá.

⁶⁴ Ngain rato mé Zacarías cjan nichja iná, co coexinhi joinchecoanxinhi Dios.

⁶⁵ Conixin jilhi, cain nivecinoe vinttegoan na admirado, co ngoixin región mé de ngagaha jna de Judea vaquequin chojni de ixin quehe conhe.

⁶⁶ Cain chojni que vaconohe jilhi, vaŕaxaon na ixin quedonda jañá conhe co vajanchianguihi chó na co vandaŕho na:

—¿Quehe siguehe chjan yá?

Ixin ndoa Dios joinchenciaon xan.

Tti joinchecoanxin Zacarías

⁶⁷ Espíritu Santo joí conixin joachaxin ngain Zacarías, ndodé xanxichjan mé, co Zacarías nichja tti palabra que Dios joanjo ngain co ndaŕho:

⁶⁸ Cainxin chojni jiquininxin sinchecoanxinhi na Dios de Israel, tti chonda cain joachaxin, ixin jehe joí nganji na ján na xo chojní jehe co joichjá na iná vida naraa.

⁶⁹ Jehe chjá na ná chojni que chonda tsje joachaxin que danjo iná vida naraa, co chojni jilhi joixin de ngayé razé David, tti cjoí jian ninchehe xa para ixin Dios.

⁷⁰ Ixin Dios jehe jañá ndaŕho ngain profeta, co jehe profeta joindaŕho nganji ján na, desde ngain tiempo are saho:

⁷¹ que ixin Dios tsjengujna na para ngain chojni que ningacoan na co ngain chojni que rinaoha na,

⁷² co joindaŕho profeta cai ixin Dios coiaconohe nindogoelitoa na xanŕhjen, co ixin jehe Dios xonhi tiempo rrotjañehe tti trato jian que jehe joinchechjian ngain na.

⁷³ Janhi tti ndaŕho Dios conixin juramento que sinchehe ngain ndogoelitoa na xanŕhjen Abraham:

⁷⁴ que ixin jehe tsanŕhchandaha na ján na para ngain tti chojni que ningacoan na, para que rroxaonha na sinttosayehe na jehe,

⁷⁵ co sontte na chojni jian para sontte na chojní Dios cainxin nchanho que ján na sonttechon na.

⁷⁶ Co jaha, xanxichjanhna, jaha sinhi profeté Dios que ttjen ngajni, ixin jaha tti tsji icha saho que Cristo para rrondache chojni que xén tsentoxinhi na vidé na, jamé jaha sinchechjian ná nttiha nao para ixin Cristo.

⁷⁷ Co jaha tti sinchenohe chojni Israel que tti jianha que jehe na tenchehe na nchao sitjañehe na,

co jamé Dios nchao rrochjé na iná vida naraa.

⁷⁸ Ixin Dios de ján na, jehe anto rinao na co anto ttiaconoá na,

co jehe rroanha tti joadingasán de ngajni para sinchegasenhe cain chojni;

⁷⁹ para que sinchengasenhe tti chojni que te ngain tti naxin xehe ixin chojni mé rroŕho que jehe na ondavenhe na,

co para que tsjagoa na que xén sonao na cain chojni.

⁸⁰ Co xanxichjan mé vangui xan co cada nchanho icha cosoji xan de ngain Espíritu Santo. Co cainxin tiempo mé jehe xan vehe xan ngagaha jna tti xonhi chojni jí hasta que jehe xan coexinhi xan joinchecoenhe xan chojni Israel.

2

*Are concijhi Jesús
(Mt. 1.18-25)*

¹ Chiaon tiempo are concijhi Juan, xiempérador vinhi Augusto César, co jehe xa coetonha xa que cjoinhi ná censo para vinttetaxin cainxin chojni de ngoixin nonttehe chojni romano.

² Jihi tti saho censo que cjoinhi are Cirenio vehe gobernador ngain Siria.

³ Cainxin chojni que vintteha ngain rajné chonda que cjoin na ngain rajné na para vinttetaxin na.

⁴ Mexinxin José vaçhjexin de rajna Nazaret ngain regioen Galilea, co sacjoi para ngain regioen Judea ngain rajna Belén, tti diconcixin David, ixin José razé David.

⁵ José cjoin para Belén para joiguetaxin jehe conixin María, tti ovehe de novia ngain José para tsottehe. Co are mé María oveyá chjan.

⁶ Co are jehe na nttiha ngain Belén, ovittja tiempo que María sincheconcijhi chjan mé.

⁷ Nttiha joincheconcixin María tti saho xenhe, co jehe coensiha xan lonttochjenhe xan, co coenjoa xan nttiha ngá tti cajón que jinea coxintá ixin xonhi cuarto vittja na ngain ni ná mesón nttiha.

Are ángel joinchenohe tti tettingaria coleco

⁸ Nttiha chian rajna Belén canxion xí que vaquingaria coleco vittoecaho xa colecoe xa nttiha ngataon jngui ngain ttie mé.

⁹ Co de repente jehe xa vicon xa join ná ángel de Dios ngain xa, co chíxo de Dios que jehe joiaho joinchengasán ngoixin ngandanji xa; co jehe xa anto vintteñaon xa.

¹⁰ Pero ángel mé ndaço ngain xa:

—Xaonha ra ixin janha joiquian ná jian joajna nganji ra, que are tsinhi icha chojni anto rroché na cainxin na.

¹¹ Co mé rroço ixin jai ngain rajné David concijhi ná tti rroçjá ra iná vida naroxin, co jehe mé CRISTO, tti chonda cainxin joachaxin.

¹² Co jihi ná señal para que jaha ra sigatsoan ra chjan mé: jaha ra sinchí ra chjan jihi jisía xan lonttochjenhe xan co tajijoa xan ngá cajón tti jinea coxintá.

¹³ Co ngain rato mé, nttiha ngaca ángel mé cononxin anto tsje icha ángel que joinxin de ngajni, co tenchecoanxinhi Dios tendaço:

¹⁴ ¡Nttosayehe na Dios que ttjen ngajni,

co ngataha nontte cain tti chojni que jehe Dios coinchiehe, que jehe na sinao chó na!

¹⁵ Cottimeja are cain ángel mé sacjoi para ngajni, jehe nitettingaria coleco ndache chó na:

—Chjin na para Belén, ditsjehe na tti conhe jihi, tti joindattjo na Dios.

¹⁶ Toin vintteçji na ndoa co nttiha vittjaxin na María co José, co vintteguicon na xannchinchjan tajijoa xa ngá cajón tti jinea coxintá.

¹⁷ Are jehe na vintteguicon na xannchinchjan, jehe na coequin na cain tti ndaço ángel ngain na de ixin jehe chjan mé.

¹⁸ Co cainxin chojni que coinhi tti jehe na ndaço na vinttegoan chojni mé admirado.

¹⁹ Pero María cain cosa jihi coenchjinha ngain ansén, co anto vaçaxaon de ixin cain cosa jihi.

²⁰ Jehe nitettingaria coleco sacjan na tti cointtohe na coe na, co joinchecoanxinhi na co joinchesayehe na Dios de ixin tti coinhi na de ngain ángel co ixin vicon na xannchinchjan jamé inchin ndaço ángel ngain na.

Are María co José joinchechienhe na Jesús ngain nihngo icha importante

²¹ Are vittja Jesús jni nchanho de concijhi, chjé na tti xohe que dinhi circuncisión co joincheguinhí na JESÚS, jamé inchin coetonha ángel ngain María icha saho que rogueyá chjan mé.

²² Co are xette nchanho para María cosoji inchin ttetonha ley que vaye Moisés, jehe co José sajoicao na xanxichjan mé ngain nihngo icha importante que jí ngain ciudad de Jerusalén para coequininxin na xan ngain Dios.

²³ Jehe na joinchehe na jañá ixin ngain ley de Dios jitaxin: “Xanxí que saho sincheconcijhi ná nchí, xan mé para ixin Dios.”

²⁴ Mexinxin María co José vintteçji na ngain nihngo icha importante para joicán na ngain altar inchin ttetonha ley de Dios; nntaohé yó coquin o yó coxentta.

²⁵ Ngain tiempo mé nttiha Jerusalén vehe ná xí que vinhi Simeón. Mé vehe ná xí anto jian de ngain ansén, co jehe vanchesayehe Dios, co vachonhe tti nchanho are Dios tsjenguijna chojni ngain nación Israel sachá na ngain chojni romano. Espíritu Santo vehe ngain Simeón,

²⁶ Co Espíritu Santo mé joinchenohe que jehe Simeón senha hasta que jehe sicon Cristo tsí, tti rrorroanha Dios.

²⁷ Jehe Simeón jiji cjoí ngain nihngo mé ixin jamé coetonha Espíritu Santo. Co are María co José joiicaho na Jesús nttiha para joinchehe na inchin ttonha ley de Dios,

²⁸ are mé Simeón cjóa xanxichjan Jesús ngá rá co joinchecoanxinhí Dios co ndaço:

²⁹ Janché, soixin onchao tançhanda na senhe na, ixin janché ovicon janha tti soixin ndachjenji na.

³⁰ Janha oviconxin con tti joí para tsjenguijna na janha na,

³¹ que soixin rroanha ngattoxon con cain chojni.

³² Jehe chojni jiji tti joadingasán que sinchengasenhe chojni de ichta nación, co de ixin jehe tsosayexin chojni Israel, chojnia soixin.

³³ José co María, janné Jesús, vinttegoan na admirado de ixin tti ndaço Simeón de ixin jehe Jesús.

³⁴ Cottimeja Simeón joinchetsenhe ñao Dios que sinchenchaon Jesús conixin María co José co ndaço ngain María, janné Jesús:

—Tsjexinxin, de ixin xanxichjan jiji Dios sinchecastigá tsje chojni Israel co ichta na Dios rrochjé na iná vida nroaxin de ixin tti sinchehe xan. Co jehe xan ná señal que joxin de ngain Dios que anto tsje chojni sitticaonha na jehe xan.

³⁵ Co jamé rroçago tti çaxaon cada chojni ngain ansén na. Pero para jaha, cain jiji inchin ná espada que sattodoho almá, ixin anto joachjaon rrochonda.

³⁶ Nttiha vehe ná nçhí cai que vagayé nçha joajna de ngain Dios, co vinhi nçha Ana. Co mé nçhichjehe ná tti vinhi Fanuel, de ngain grupoe Aser de chojni Israel. Nçhí mé atto onaçhichjan vehe nçha are mé. Co atto ça chjan nçha are dicottehe nçha, co vecao nçha xixihi nçha jehó yáto nano.

³⁷ Co are ngain tiempo mé ovechonda ochenta y cuatro nano de ndavenhe xixihi nçha. Jehe nçha vagachjexinha nçha de ngaxinhí nihngo mé, ixin de ttie co de nchanho vanchesayehe nçha Dios; vagueçáño nçha co vanchecoanxinhí nçha Dios.

³⁸ Co ngain rato mé conchienne jehe Ana co después de joanjo gracias ngain Dios de ixin Jesús, coexinhí ndache cain chojni de ixin Jesús, tti chojni que techonhe tti nchanho are Dios tsjenguijna chojni Israel para sacha na ngain chojni romano.

Are María co José sacjancaho na Jesús para Nazaret

³⁹ Are joexin joinchehe na cain tti ttonha ley de Dios, çjan na ngain Nazaret, rajné na, ngain regioen Galilea.

⁴⁰ Co Jesús ichta vangui, co ichta cosoji, co ichta venohe jian, co Dios anto joinchenchaon.

Are Jesús cjoí ngaxinhí nihngo ichta importante

⁴¹ José co María, janné Jesús, cain nano vacji na ngain ciudad Jerusalén para ixin tti quiai dinhi pascua.

⁴² Are Jesús joinchexette tteyo nano, jehe co José, co María, janné, canio na cjoí na Jerusalén inchin costumbré na ngain quiai mé.

⁴³ Co are ojoexin quiai mé, jehe na sacjan na co Jesús ndadiguitohe nttiha Jerusalén, co José co María venoeha na.

⁴⁴ Jehe na çaxaon na que puede Jesús nttiha joí ngayé chojni, co jamé sacjoi na ngoixin nchanho mé. Pero are ondaconaxin xehe, jehe na cjoé na Jesús ngayé ichta ni ichó co niamigoe na,

⁴⁵ co vittjaha na Jesús. Cottimeja sacjan na para Jerusalén iná para cjoé na Jesús nttiha.

⁴⁶ Vatto ní nchanho, cottimeja vittja na Jesús tají ngaxinhí nihngo ichta importante, ngayé ximaestro ley tajittinhí tti tendaço xa co jehe danchianguí ngain xa ichta cosa de Dios.

⁴⁷ Cain chojni que coinhi tti ndaço jehe vinttegoan na admirado ixin tti nichja jehe jian jí, co de cain pregunta que joanchiangui xa ngain, jehe nçhao ndaço cain.

⁴⁸ Are José co María vicon na mé, vinttegoan na admirado, co janné ndaço jan ngain jehe:

—Hijo, ¿quedonda jañá joinchehe nganji na janha na? Ndodá conixin janha tettjé ra jaha co anto çaon na.

⁴⁹ Cottimeja Jesús ndaço:

—¿Quedonda ttjé ni ra? ¿Anoaha ra que janha chonda que sarihi ngain nihngo para ixin asunto de Ndodana?

⁵⁰ Pero jehe na coinxinha na tti ndaço Jesús ngain na.

⁵¹ Cottimeja Jesús conixin José co María sacjan na para Nazaret, co Jesús anto vanchehe sigue vaguitticaon ngain cayoi na. Co María, janné Jesús, cain jiji coenchjinha jan ngain ansén jan.

⁵² Co de cain tiempo mé Jesús icha vangui de ngain cuerpoe co de ngain joarrixaoen, co Dios, conixin cain chojni que chonxin jehe Jesús anto jinao na jehe.

3

Are Juan ndache chojni ngagaha jna joajné Dios

(Mt. 3.1-12; Mr. 1.1-8; Jn. 1.19-28)

¹ Vittjaxon quince nanó de jittetonha xiemperador Tiberio César, are mé Poncio Pilato vehe gobernador ngain Judea, co Herodes vehe gobernador ngain Galilea, co xanchó Herodes que vinhi Felipe vehe gobernador ngain región que dinhi Iturea co ngain región que dinhi Traconite, co Lisaniás vehe gobernador ngain regioen Abilinia.

² Co are mé ná tti vinhi Anás co iná tti vinhi Caifás nimé ni vintte xidána icha importante. Ngain tiempo mé, de ngagaha jna tti xonhi chojni te, Dios nichja ngain Juan, xenhe Zacarías,

³ co Juan vaçhje cjoí ngain cain lugar de ngandehe río Jordán para ndache chojni ixin chonda na que tsentoxinhi na vidé na co siguutte na, para que cainxin tti jianha que nchehe na Dios sinchetjañehe na.

⁴ Cain jihi conhe inchin diquentaxin profeta Isaías janhi: Tsinih na ná tté chojni que tsoyaoxin de ngagaha jna co rrondaço: “Nchechjan ra nttiha para ixin jehe tti chonda cain joachaxin; danttjehe ra ná nttiha nao.

⁵ Cain tsaga singattea tsaga, co cain jna co jnanchjan tsonataonxin; cain nttiha que jeha nao, tsonao nttiha, co cain nttiha que jeha nataonxin, tsonataonxin nttiha.

⁶ Cottimeja cainxin chojni sicon na tti rroanha Dios para tsjenguijna jehe na.”

⁷ Are chojni vaconchienne na para que Juan rrojincheguite na, jehe vandáço ngain na: —Jaha ra xenhe conché ra! ¿Quensen jointtanoha jaha ra ixin nchao setanha ra tti castigo anto soji que jitonchian?

⁸ Saho nchehe ra jian para que jamé sicon icha chojni que ján ndoa coentoxinhi ra vidá ra co ndacheha chó ra: “Ján na razé Abraham na; mexinxin Dios tsjenguijna na”, ixin janha rrondatto ra que hasta xo jihi Dios nchao sinchechjan xo chojni de razé Abraham.

⁹ Ojí listo hacha para tsonchinji nttá, co cain nttá que danjoha jian ttochjoin rrochinji nnta co rroche nnta ngain xohi.

¹⁰ Cottimeja cain chojni mé joanchiangui na ngain Juan co ndáço na:

—Mexinxin, ¿quehe chonda na que sinttaha na remé?

¹¹ Juan ndáço ngain na:

—Xo chonda ra yó camisa chonda ra que sanjo ra ná camisa ngain tti chondaha ni ná camisa. Co xo chonda ra tti jintte ra, jinttecoho ra tti chojni que chondaha.

¹² Nttiha vintteconchienne canxion xicobrador de impuesto cai para que joiguutte xa, co joanchiangui xa ngain Juan co ndáço xa:

—Maestro, ¿quehe chonda na que sinttaha na janha na?

¹³ Co Juan ndáço ngain xa:

—Ncheha ra cobro icha de tti ttetonha ley.

¹⁴ Cai canxion xisoldado joanchianguihi xa Juan co ndáço xa:

—Co janha na, ¿quehe chonda na que sinttaha na?

Juan ndáço ngain xa:

—Dantsjeha ra tomí chojni afuerza, ni tjanguiha ra cosa que jehe na xonhi joinchehe na; jaha ra dintte ra contento conixin tti tomí que jaha ra tedacha ra.

¹⁵ Cain chojni mé anto jinao na conohe na ixin quensen Juan ixin xaxaon na que puede Juan jehe mé tti Cristo.

¹⁶ Pero Juan ndache cainxin na:

—Janha ndoa ntaguittexin chojni conixin jinda, pero toin tsí iná xí que sinttaguittexin ra conixin Espíritu Santo co Espíritu mé tsiaho xá xohi para sincheroa almá ra xá tonhe oro toroaxin ngain xohi. Co xí mé chonda xa anto icha tsje joachaxin que janha, ixin janha ni jiquininxinha na ni tsonxindangá corrié catté xa.

¹⁷ Xí mé ojiyá xa palé xa, para tsjendoaxin xa trigo, co para saçhjehe trigo paja. Sasicao xa cain trigo ngain nchiandoha xa, pero cain paja tsjaga xa ngain ná xohi que xonhi tiempo danga xoi.

¹⁸ Conixin jihi, co icanxin consejo, vandachexin Juan chojni tti jian joajna.

¹⁹ Co después, Juan joinchesattehe xigobernador Herodes ixin vecao xa jeho nchicoñadé xa que vinhi Herodías, mé cjoí çihhi Felipe, xichó jehe Herodes, co jehe Juan joinchesattehe Herodes de ixin icha cosa jianha cai que joinchehe Herodes.

²⁰ Pero Herodes vitticaonha. Co en lugar de rroguitticaon, joinchehe iná cosa jianha ixin jehe coiaxinhi Juan ngain cárcel.

Are joiguitte Jesús

(Mt. 3.13-17; Mr. 1.9-11)

²¹ Saho de viaxinhi Juan, ngain ná nchanho are Juan jincheguitte anto tsje chojni, cai Jesús cjoí para que Juan joincheguitte jehe. Co después que joiguitte Jesús, are jehe joinchecoanxinhi Dios, ngajni xiré

²² co Espíritu Santo xincanji Xá ná conttoanajni ngataha Jesús co vicon na, co coinhi na tté Dios de ngajni que ndačo:

—Jaha tti Xanhna que janha anto rinaho, co de ixin jaha janha anto chahna.

Cain nindogoelito xanchjen de Jesús

(Mt. 1.1-17)

²³ Jesús vechonda inchin treinta nano are jehe coexinhi ndache chojni de ixin Dios. Cain chojni Xaxaon na ixin jehe cjoí xenhe José. Jehe José mé cjoí chjan de Elí,

²⁴ co Elí cjoí chjan de Matat, co Matat cjoí chjan de Leví, co Leví cjoí chjan de Melqui, co Melqui cjoí chjan de Jana, co Jana cjoí chjan de José.

²⁵ José cjoí chjan de Matatías, co Matatías cjoí chjan de Amós, co Amós cjoí chjan de Nahum, co Nahum cjoí chjan de Esli, co Esli cjoí chjan de Nagai,

²⁶ Nagai cjoí chjan de Maat, co Maat cjoí chjan de Matatías, co Matatías cjoí chjan de Semei, co Semei cjoí chjan de José, co José cjoí chjan de Judá.

²⁷ Judá cjoí chjan de Joana, co Joana cjoí chjan de Resa, co Resa cjoí chjan de Zorobabel, co Zorobabel cjoí chjan de Salatiel, co Salatiel cjoí chjan de Neri.

²⁸ Neri cjoí chjan de Melqui, co Melqui cjoí chjan de Adi, co Adi cjoí chjan de Cosam, co Cosam cjoí chjan de Elmodam, co Elmodam cjoí chjan de Er.

²⁹ Er cjoí chjan de Josué, co Josué cjoí chjan de Eliezer, co Eliezer cjoí chjan de Jorim, co Jorim cjoí chjan de Matat.

³⁰ Matat cjoí chjan de Leví, co Leví cjoí chjan de Simeón, co Simeón cjoí chjan de Judá, co Judá cjoí chjan de José, co José cjoí chjan de Jonán, co Jonán cjoí chjan de Eliaquim.

³¹ Eliaquim cjoí chjan de Melea, co Melea cjoí chjan de Mainán, co Mainán cjoí chjan de Matata, co Matata cjoí chjan de Natán.

³² Natán cjoí chjan de David, co David cjoí chjan de Isaí, co Isaí cjoí chjan de Obed, co Obed cjoí chjan de Booz, co Booz cjoí chjan de Salmón, co Salmón cjoí chjan de Naasón.

³³ Naasón cjoí chjan de Aminadab, co Aminadab cjoí chjan de Aram, co Aram cjoí chjan de Esrom, co Esrom cjoí chjan de Fares, co Fares cjoí chjan de Judá.

³⁴ Judá cjoí chjan de Jacob, co Jacob cjoí chjan de Isaac, co Isaac cjoí chjan de Abraham, co Abraham cjoí chjan de Taré, co Taré cjoí chjan de Nacor.

³⁵ Nacor cjoí chjan de Serug, co Serug cjoí chjan de Ragau, co Ragau cjoí chjan de Peleg, co Peleg cjoí chjan de Heber, co Heber cjoí chjan de Sala.

³⁶ Sala cjoí chjan de Cainán, co Cainán cjoí chjan de Arfaxad, co Arfaxad cjoí chjan de Sem, co Sem cjoí chjan de Noé, co Noé cjoí chjan de Lamec.

³⁷ Lamec cjoí chjan de Matusalén, co Matusalén cjoí chjan de Enoc, co Enoc cjoí chjan de Jared, co Jared cjoí chjan de Mahalaleel, co Mahalaleel cjoí chjan de Cainán.

³⁸ Cainán cjoí chjan de Enós, co Enós cjoí chjan de Set, co Set cjoí chjan de Adán, co Adán cjoí chjan de Dios.

4

Are inchínji joinao rrojinchejehe Jesús

(Mt. 4.1-11; Mr. 1.12-13)

¹ Espíritu Santo vittohe ngain Jesús, co joinchegayé Jesús anto tsje joachaxin. Are jehe cjanxin de río Jordán Espíritu mé joicao Jesús para ngagaha jna tti xonhi chojni te.

² Ntíha vehe Jesús cuarenta nchanho, co inchínji joaquehe prueba ngain Jesús. Jesús xonhi joine de cainxin nchanho mé, co después Jesús venhe jintta.

³ Cottimeja inchínji ndačo ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

⁴ Jesús ndačo:

—Ngain tti jitaxin Palabré Dios ndačo: “Chojni techonxin jeoha de tti jine na sino que cai de cain palabra que Dios ndačo.”

⁵ Cottimeja inchínji sajoicao Jesús ngataha ná jna anto noi. Co de ntíha anto daca cjoagoexin inchínji Jesús cainxin nación que jí ngoixin mundo.

⁶ Co inchínji ndačo ngain Jesús:

—Janha rrochjaha jaha cainxin joachaxin de tsetonhe cain nación yá, co cainxin cosa çhjoin que jí ngain nación yá. Ixin janha vayá cainxin yá, co janha rrochjaha cain yá tti chojni que janha rinaho rrochjaha.

⁷ Si jaha sarittoxin nttajochjiha co sinchesayana janha, cain yá cosá jaha.

⁸ Pero Jesús ndaço ngain inchínji:

—Sattjixin de nganji na janha, Satanás, ixin ndaço ngain tti jitaxin Palabré Dios: “Nchesayehe jehó Dios tti chonda joachaxin para ixin jaha co jehó jehe tti ditticaon jaha.”

⁹ Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha techoe nihngo icha importante. Co ndaço ngain Jesús:

—Si ndoa jaha Xenhe Dios, daritsingaxin de nttihi hasta tti nontte;

¹⁰ ixin ngain tti jitaxin Palabré Dios ndaço:

Dios tsetonhe ángel de jehe para senda jaha.

¹¹ Cain ángel mé rrocacha conixin rá,

para que çonhi tti tsonihi rottea de ixin ço.

¹² Jesús ndaço ngain inchínji:

—Cai ndaço ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

¹³ Co jañá are inchínji çoha joincheyehe Jesús, jehe sacjoixin de ngain Jesús para ná tiempo.

Jesús coexinxin xé ngain Galilea

(Mt. 4.12-17; Mr. 1.14-15)

¹⁴ Jesús çjan para Galilea conixin anto tsje joachaxín Espíritu Santo, co cainxin chojni de ngain región mé vanichja na de ixin tti jian que vanchehe Jesús.

¹⁵ Jehe vancheoene chojni de ixin Dios ngain cain nihngo de cain lugar nttiha, co cainxin chojni nttiha joinchesayehe na Jesús.

Jesús ngain Nazaret

(Mt. 13.53-58; Mr. 6.1-6)

¹⁶ Cottimeja, Jesús çjoi para Nazaret, tti rajna vanguixin jehe. Ngain nchanho que nchejo-gaha ni, Jesús çjoi ngaxinhi nihngo nttiha inchin costumbré jehe, co nttiha vingattjen para tsjehe tti çón que jitaxin Palabré Dios.

¹⁷ Jehe na çhjé na Jesús tti libro que dicjin profeta Isaías, co are jehe conxiré libro mé vittja tti jitaxin janhi:

¹⁸ Espíritu Santo de Dios jí nganji na janha,

ixin Dios çhjana çxa de ndaçhjan tti jian joajna ngain chojni que inchin ondadiguenhe espíritu;

Dios rroanha na janha para sinttaxingamá tti chojni que tedetan tangui ngain ansén,

co para rrochjaha libertad tti chojni que teaxinhi,

co para rrochjaha jmacon tti chojni que diconha;

co para de ixin janha tti chojni que detan tangui ngain icha chojni isetanha na tangui mé;

¹⁹ co para que rrondattjan chojni que ojoí tiempo que Dios tsjenguijna na.

²⁰ Cottimeja Jesús coejé libro mé, co joanjo libro ngain tti vacjenguijna chojni ngain servicio, co jehe tavehe. Co ixin cainxin chojni nttiha anto çhoan na de ixin Jesús,

²¹ jehe coexinhi nichja co ndaço:

—Jai mismo joiconhe ngattoxon con ra tti jitaxin jili.

²² Cain chojni nttiha nichja na jian de ixin Jesús, co vinttegoan na admirado de ixin tti palabra çhjoin que ndaço Jesús ngain na. Co jehó na joanchianguihi chó na co ndaço na:

—¿Ajeha jili tti xitsihi José?

²³ Jesús ndaço ngain na:

—Seguro que jaha ra rrondachjenji ni ra janhi: “Jaha que danjo çhoan, toçhoanha jaho”; co rrondachjenji ni ra cai: “Tti coian na joinchehe jaha ngain rajna Capernaum, nchehe nttihi ngain rajná cai para sicon na janha na.”

²⁴ Cottimeja joinchehe sigue nichja, co ndaço:

—Rrondattjo ra ndoa que ni ná profeta sitticaonha chojni de ngain rajné.

²⁵ Janha rrindattjo ra seguro que vintte tsje nçhiganha ngain nacioen Israel ngain tiempo profeta Elías, are joiha çhin ní nano co rioho co anto vehe jinta ngoixin nación.

²⁶ Pero Dios rroanha Elías para joicjenguijna ni ná nçhiganha que vintte Israel, sino que jehe çjoi para joicjenguijna ná nçhiganha que vehe ngain Sarepta, çhiao ciudad de Sidón.

²⁷ Cai vintte ngain Israel tsje chojni que vintteninxin çhin lepra ngain tiempo profeta Eliseo. Pero Eliseo joinchexingameha ni ná de jehe na, sino que jehe joinchexingamehe Naamán de ngain nonttehe Siria.

²⁸ Cain nite ngaxinhi nihngo nttiha are vinttequinhi na cain cosa yá, anto vinttegoñao na.

²⁹ Vingattjen na co vantsjexin na Jesús de nttiha, co joicao na hasta tti con jna nttiha, ngain tti jna diconchjian ciudad mé, para rrocjxin na Jesús desde nttiha.

³⁰ Pero are orrocja na Jesús, jehe jion vatto ngayehe na co sacjoi.

Ná xí que vechonda espíritu jianha

(Mr. 1.21-28)

³¹ Cottimeja Jesús cjan para Capernaum, ngain nonttehe Galilea co nttiha cada nchanho que nchejogaha ni, jehe vacji ngain nihngo nttiha para vandache chojni de ixin Dios.

³² Chojni nttiha vaguinttegoan na admirado de ixin tti vandačo Jesús ixin vanichja conixin palabra de joachaxin.

³³ Ná nchanho ngain nihngo nttiha dicij ná xí que vechonda xa espíritu jianha ngaxinhi cuerpoe xa, co espíritu mé coyao co ndačo:

³⁴ —Sattjixin de nganji na jaha Jesús de Nazaret. ¿Ajoihí jaha para santsjena ra joachaxin que chonda na? Janha chonxin jaha co nona que jaha tti icha jian de ngain Dios.

³⁵ Jesús ndačo ngain espíritu jianha mé:

—¡Tencoá, co sattjixin de ngain xí yá!

Cottimeja jehe espíritu jianha joanca tti xí mé ngataha nontte ngattoxon con jehe na, co vačhjexin de ngaxinhi cuerpoe xí mé, co ųonhi tti conihí cuerpoe xa.

³⁶ Cainxin chojni que vicon nttiha ųaon na, co vinttendache chó na:

—¿Quehe chonda palabré xí jihí? Ixin ttetonha xa conixin anto joachaxin ngain espíritu jianha que jehe satsji co espíritu mé jamé sattji.

³⁷ Co cain rajna de ngoixin region mé conohe chojni tti jian que vanchehe Jesús.

Jesús joinchexingamehe jannché Simón Pedro

(Mt. 8.14-15; Mr. 1.29-31)

³⁸ Cottimeja Jesús vačhjexin de nihngo nttiha co sacjoi para nchiandoha Simón Pedro. Are mé jannché Pedro jinihi jan ixin ná soa anto soji, mexinxin joinchetsenhe na ñao Jesús para joinchexingamehe naníta mé.

³⁹ Jesús joisé para ngain naníta mé, co nichjayé soa mé, co ngain rato mé ndavachje soa mé, co naníta mé jaicoa vingattjen co joincheatendehe na.

Jesús joinchexingamehe tsje ninihí

(Mt. 8.16-17; Mr. 1.32-34)

⁴⁰ Are viataon nchanho mé, cain chojni que vinttechonda ninihí que vintteninxin de tsje chin, joiaho na cain chojni mé para ngain Jesús; co jehe coín rá ngataha cada na, co jamé Jesús joinchexingamehe cain na.

⁴¹ Tsje de jehe ninihí mé vinttechonda na espíritu jianha co are vačhjexin espíritu mé de ngaxinhi cuerpoe na, coyao co ndačo:

—Jaha tti Xenhe Dios.

Pero Jesús joinchesattehe espíritu jianha mé co Jesús coančhjandaha espíritu mé para nichja espíritu icha ixin vinttenohe que Jesús jehe tti Cristo.

Jesús nichjé chojni ngain Galilea de ixin Dios

(Mr. 1.35-39)

⁴² Are ovingasán ngain nchanho iná, Jesús vačhjexin de ngain ciudad co sacjoi ngain ná lugar tti xonhi chojni te. Pero chojni cjoé na Jesús hasta que vittja na tti jí, co joinchetsenhe na ñao Jesús ixin tarroquehe nttiha Capernaum ngain na.

⁴³ Pero jehe ndačo ngain na:

—Janha chonda que sindattjan chojni ngain icanxin lugar ixin ojoí tiempo are Dios tsetonha ngain ansén na ixin para mé rroanxin na Dios janha.

⁴⁴ Co jañá vacji Jesús ngain cain nihngo ngoixin regioen Galilea para vandache chojni de ixin Dios.

5

Are Jesús joinchehe milagro para que jehe na tse na copescado

(Mt. 4.18-22; Mr. 1.16-20)

¹ Ná nttiha, Jesús tají ngandehé lago que dinhi Genesaret, co nttiha ųatte anto tsje chojni que hasta conttedoguehe Jesús ixin cain na joinao na coinhi na joajné Dios.

² Co Jesús vicon nttiha tate yó barco ngandehé jinda que ųonhi chojni teringa rato mé ixin xí que tse copescado ovanía xa de barco mé co tatettjén xa nonchaha.

³ Cottimeja Jesús joixinhi ná de tti yó barco mé, co barco mé barcoe Simón Pedro, co Jesús ndačo ngain Pedro que sinchengaxinton barco de ngandehé nda. Cottimeja nttiha tavetaha Jesús ngataha barco co de nttiha ndachexin Jesús cain chojni que te ngandehé jinda de ixin Dios.

⁴ Are joexin nichja Jesús, jehe ndačo ngain Simón Pedro:

—Tjiho barco ngain jinda tti icha nihnga, co nttiha dancahngui ra nonchá ra para rrotse ra copescado.

⁵ Pedro ndačo ngain Jesús:

—Maestro, ngoixin ttié jointtaha na xa co xonhi copescado tse na; pero jaxon soixin rritettona, mexinxin janha sigancahngui nonchaha iná ngain jinda.

⁶ Are jamé joinchehe na, ndoa anto tsje copescado tse na que hasta ocoexinhi chintaon nonchaha.

⁷ Cottimeja joinchehe na seña xicompañeroe na que teringa ngain barco jngo para que joinchecienhe na barco mé para cjoenguijna chó na. Co cayoi barco joinchecaon na de copescado que hasta joinao sarroxincajingui barco jinda.

⁸ Are vicon Simón Pedro jihi, jehe vettoxin nttajochjihi ngain Jesús co ndačo:

—Nttatsanha ñao sattjixin soixin de nganji na janha ixin janha anto tsje cosa jianha jointtaha.

⁹ Simón Pedro ndačo jañá ixin jehe anto xaon conixin cain chojni que te ngain, ixin anto tsje copescado tse na.

¹⁰ Cai Jacobo co Juan, cayoi xenhe Zebedeo, tti xicompañeroe Pedro, anto vinttexaon xa cai. Pero Jesús ndačo ngain Pedro:

—Xaonha jaha ixin jai pa ndaha en lugar de copescado, jaha satse chojni para ixin Dios.

¹¹ Cottimeja are joinchecienhe na barco ngandehe ndachaon, vintteganía na co nttiha cointtohe na cainxin cosé na co savinttecji na conixin Jesús.

*Jesús joinchexingamehe ná tti vechonda lepra
(Mt. 8.1-4; Mr. 1.40-45)*

¹² Are Jesús vehe ngain ná rajna nttiha, conchienhe ná xí ngain Jesús. Xí mé vechonda xa chin lepra. Co are vicon xa Jesús, jehe xa vettoxin nttajochjihi xa co visé xa hasta tti ngataha nontte co joinchetsenhe xa ñao Jesús co ndačo xa:

—Si soixin rinao, nchao sinchexingamana de chin que rrichonda.

¹³ Cottimeja Jesús catte xí mé co ndačo ngain xa:

—Ján rinaho; xingamaha.

Co ngain rato mé ndavitján tti chin lepra que vechonda xí mé.

¹⁴ Cottimeja Jesús coetonhe xí mé que xonhi chojni rrondate xa. Jesús ndačo ngain xí mé:

—Jeho tji ngain xidána para que jehe xa sicon xa que jaha ixonhi chin chonda co danjo cosa ngain Dios inchin ttetonha ley que vayé Moisés para que cainxin chojni tsonohe na ixin jaha ixonhi chin chonda.

¹⁵ Pero nchanho co nchanho icha tsje chojni vaconohe de ixin tti jian que vanchehe Jesús. Co anto tsje chojni vaaxatte ngain para vaquinhí na de ixin Dios, co para que Jesús vanchexingamehe na de quexeho chin que vinttechonda na.

¹⁶ Pero Jesús tsje nttiha vagachjenda savacjii ngain lugar tti xonhi chojni te, co nttiha jehe vanchecoanxinhi Dios.

*Jesús joinchexingamehe ná tti choha vacji
(Mt. 9.1-8; Mr. 2.1-12)*

¹⁷ Ná nchanho Jesús tajindache tsje chojni de ixin Dios, co no nttiha tate canxion xifariseo co canxion ximaestroey ley que vinttequixin de cainxin rajna de ngain regioen Galilea co de ngain regioen Judea co de ngain ciudad de Jerusalén. Co are mé Jesús cjoago que joachaxín Dios jí ngain jehe ixin joinchexingamehe tsje chojni nihi.

¹⁸ Are mé, vinttequí canxion xí que vinttequiaoxin xa camilla ná tti choha vacji, co joinao chojni mé rroxanxinhi na jehe tti nihi mé ngaxinhi nchia tti jí Jesús co rroquin na nttiha ngattoxon con Jesús.

¹⁹ Pero choha vixinhi na ixin anto tsje chojni te ngandanguí nchia mé. Cottimeja coani na ngataha techoe nchia co vinttjian na canxion teja, para que nttiha joinchexincanjinxin na tti nihi conixin camilla ngayehe chojni para vehe ngattoxon con Jesús.

²⁰ Are Jesús vicon que cain xí mé chonda xa seguro que Jesús sinchexingamehe jehe tti nihi mé, Jesús ndačo ngain tti nihi:

—Cain tti jianha que jaha joinchehe, janha ojointtatjañaha.

²¹ Cottimeja cain ximaestroey ley que te nttiha, co xifariseo vintteaxaon xa: “¿Quensen xí jihi, que nchaoha jinichja xa para ixin Dios? xonhi chojni nchao sinchetjañehe iná chojni tti jianha que nchehe na, jecho Dios tti nchao sinchehe mé.”

²² Pero Jesús ovenohe tti teaxaon xa co ndačo ngain xa:

—¿Quedonda xaxaon ra jañá?

²³ ¿Quexehe tti icha tanguiha rrondattjan ná tti nihi: “Tti jianha que jaha joinchehe janha ojointsatjañaha”, o rrondattjan: “Dingattjen co sattji”?

²⁴ Nchao jí remé, janha tsjagoha jaha ra que janha, tti Xí que joixin de ngajni, chonda joachaxin nttihi ngataha nontte para nttatjañá chojni tti jianha que nchehe na.

Cottimeja Jesús cjan ngain tti nihi mé co ndačo:

—Janha rrindattjo jaha que dingattjen, co tsinhi camillá co sattji para nchiandoi.

²⁵ Ngain rato mé jehe tti čhoha vacji mé vingattjen ngattoxon con cain chojni nttiha, co tsín camillé tti vetsingataha co sacjoi para nchiandoha. Co ngoixin sacjoi jehe joinchecoanxinhi Dios.

²⁶ Cain chojni que te nttiha vinttegoan na admirado co cain na joinchecoanxinhi na Dios cai, co hasta teñaon na ndačo na:

—Jai gocon na cosa čhjoin que ni ná nchanho goconha na jiji.

Jesús nichjé Leví

(Mt. 9.9-13; Mr. 2.13-17)

²⁷ Después de cain jiji Jesús vachjexin de nttiha, co jehe vicon ná xicobrador de impuesto que vinhi Leví. Jehe xi mé tají xa ngain mesa tti xengaxin hna impuesto, co Jesús ndačo ngain xí mé:

—Ķacoi chjin na.

²⁸ Cottimeja jehe Leví, ngain rato mé vingattjen co nttiha cointtohe cain, co sarroé Jesús.

²⁹ Después Leví coín ná fiesta jie ngain nchiandoha para ixin Jesús, co nttiha joincaho na tsje xicobrador de impuesto ngain nacoa mesa co icha chojni cai.

³⁰ Pero tsje xifariseo co ximaestroe ley coexinhi xa nichja xa feo ngain tti chojni que vacao Jesús, ndačo xa ngain na:

—¿Quedonda jinttecoho ra co dicoho ra xicobrador de impuesto co icha chojni que nchehe jianha?

³¹ Jesús ndačo ngain xa:

—Chojni que niha, chojni mé rrogondeha xincheñoan, jeho tti chojni nihi, mé tti rrogondehe xincheñoan.

³² Janha joiha para joinichjá tti chojni que tenchehe jian, sino que chojni que tenchehe jianha para que jehe na tsentoxinhi na vidé na para isincheha na cosa jianha.

Are joanchianguihi na Jesús ixin quedonda chojni jehe dinttecjaño na

(Mt. 9.14-17; Mr. 2.18-22)

³³ Cottimeja jehe xa joanchianguihi xa Jesús co ndačo xa:

—¿Quedonda chojni que xicao Juan co chojni xifariseo anto dinttecjaño na co anto nchecoanxinhi na Dios, pero chojni que čhjiho jaha cainxin nchanho jine na co dihi na?

³⁴ Jesús ndačo ngain xa:

—¿Apoco jaha ra nchao sinchecjáño ra tti chojni que rrondache ra siji ngain ná vandango tti tottehe na are xinovio řa jí xa ngain na?

³⁵ Pero tsí rato que chojni sasicao na xinovio, cottimeja jehe na sinttecjaño na.

³⁶ Cai ndačo Jesús ejemplo jiji ngain xa:

—Ķonhi chojni ttinchje rioho lonto naroa para tteyehe lonto nttaxichjan. Si ná chojni sinchehe jamé, jehe ndasinchetján lonto naroa; co deporsín rioho lonto naroa čhjoinha dicon ni ngain lonto nttaxichjan.

³⁷ Cai čhoha siquia ná řan que jidatsoxinhi ngá roanřan nttaxí, ixin si jamé tsonhe, tti řan que jidatsoxinhi tsonchintaon řan roanřan, co řan co roanřan cayoixin ndasitján.

³⁸ Mexinxin řan que jidatsoxinhi chonda que siquia řan ngá roanřan naroaxin, co jamé cayoi cosa xonhi tsonhe.

³⁹ Co řonhi chojni que dihi řantsja, cottimeja sincheřoxinhi sihi řan que dica tsjen, ixin ndačo na: “řantsja, řan mé tti icha jian.” Jañá tti costumbre que jaha ra chonda ra jiha de acuerdo ngain tti janha rrindattjo ra.

6

Chojni que vacao Jesús cončhinji na trigo ngain nchanho que nchejogaha ni

(Mt. 12.1-8; Mr. 2.23-28)

¹ Ná nchanho que nchejogaha ni, Jesús co tti chojni que vacao vatto na canxion jngui que diguinga trigo, co chojni que vacao Jesús cončhinji na canxion ninchjan de trigo, co ngá rá na joincheroaxin na trigo co joine na noanchjan.

² Co canxion xifariseo joanchiangui xa ngain na co ndačo xa:

—¿Quedonda jaha ra nchehe ra ná řa que jiquinxinha sinchehe ni ngain tti nchanho que nchejogaha ni?

³ Cottimeja Jesús ndačo ngain xa:

—¿Adiconha jaha ra tti jitaxin ngain Palabré Dios de ixin quexén joinchehe David, jehe conixin cain xicompañeroe ngain ná nchanho are anto vintteguenhe na jintta?

⁴ David conixin cain xicompañeroe joixinhi na nihngo icha importante co David cóa tti niottja que joixin ngataha alté Dios co joine nio, co joanjo nio ngain cain xicompañeroe que joica. Co niottja mé jehó xidána jiquininxin vane xa nio.

⁵ Cai ndačo Jesús ngain xa:

—Janha, tti Xí que joixin de ngajni, chonda joachaxin cai para tti nchanho que nchejogaha ni.

Tti xí que ndadixemadoho ná rá

(Mt. 12.9-14; Mr. 3.1-6)

⁶ Iná nchanho que nchejogaha ni, Jesús joixinhi iná nihngo co coexinhi joinchecoenhe chojni de ixin Dios. Co nttiha tají ná xí que ndadixemadoho ná rá xa, ra jian.

⁷ Co ximaestroey ley, co xifariseo tatetsayehe xa Jesús para sicon xa asinhexingamehe xí mé ngain nchanho que nchejogaha ni, para jamé rrochonda xa quehe rrocjanguixin xa Jesús.

⁸ Pero Jesús ovenohe quehe teřaxaon ximaestroey ley co xifariseo, co jehe ndache tti xí que ndadixemadoho ná rá:

—Dingattjen co darihi ngosine.

Tti xí vingattjen co cjoí vengattjen ngosine.

⁹ Cottimeja Jesús ndačo ngain ximaestroey ley co xifariseo:

—Janha sanchianguiha ra ná cosa: ¿Quehe jiquininxin sinchehe ni ngain nchanho que nchejogaha ni; asinchehe ni jian, o asinchehe ni tti jianha? ¿Atsančhjandaha ni chojni ndasenhe, o ani nasoenxon ni?

¹⁰ Cottimeja Jesús tsjehe ngain nite ngandanji jehe, co ndačo ngain tti xí mé:

—Tinxé rá.

Co tti xí coinxe rá, co ngain rato mé iřonhi chin vechonda rá tti xí mé; ondaxingamehe.

¹¹ Pero xicanxin anto vinttegořao xa co coexinhi xa joanchianguihi chó xa ixin quehe sinchehe xa ngain Jesús.

Jesús coinchiehe tti tteyó chojni que vacao

(Mt. 10.1-4; Mr. 3.13-19)

¹² Ná nchanho ngain tiempo mé Jesús sacjoi ngagaha ná jna para joinchecoanxinhi Dios, co ngoixin ttie mé Jesús joinchecoanxinhi Dios.

¹³ Are vingasán, jehe vayé cain chojni que vacao, co coinchiehe tteyó de jehe na, tti ni jehe joincheguinhí representanté jehe.

¹⁴ Co nombré na cada na janhi: “Simón, tti jehe Jesús joincheguinhí Pedro; Andrés xanchó Simón; Jacobo co Juan, Felipe co Bartolomé,

¹⁵ Mateo co Tomás, Jacobo, tti xenhe Alfeo; Simón jehe ná de tti partidoe chojni político que vaquetocaho chojni romano;

¹⁶ Judas tti xanchó Jacobo; co Judas Iscariot tti joindačo para tse na Jesús.

Are Jesús cjoagoe tsje chojni de ixin Dios

(Mt. 4.23-25)

¹⁷ Jesús xincanjinxin de ngagaha jna conixin tti tteyó chojni co tavintte na ngataon ná nguí, jehe conixin chojni. Co řatte anto tsje chojni de ngoi región de Judea co de ciudad de Jerusalén co de ngoixin ngandehé ndachaon ngain región ciudad de Tiro co Sidón. Cain chojni mé conchienhe na para joiquinhi na tti nichja Jesús de ixin Dios co para joixingamehe na de ixin quexeho chin que techonda na.

¹⁸ Tti nivinttechonda espíritu jianha ngaxinhi cuerpoey, cai xingamehe na.

¹⁹ Cain chojni joinao na catte na Jesús, ixin jehe vanchexingamehe cain chojni conixin joachaxín Dios que jehe chonda.

Quensen tti čjjoin sehe ngain vidé co quensen tangui tsonhe

(Mt. 5.1-12)

²⁰ Cottimeja Jesús tsjehe tti chojni que vacao co ndačo ngain na:

—Anto čjjoin para ixin jaha ra řo noa ra ixin jiquininxin ra ngajni tti ttetonha Dios.

²¹ 'Anto čjjoin para ixin jaha ra řo denhe ra jintta jai, ixin después jaha ra tsojaha ra.

'Anto čjjoin para ixin jaha ra řo tsjanga ra jai, ixin después jaha ra tsjano ra.

²² 'Anto čjjoin para ixin jaha ra are chojni tsořao nganji ra co are sengui ra na, co are rronichja na feo nganji ra, co are rronichja na jianha de ixin jaha ra ixin jaha ra chojnina janha, tti Xí que joixin de ngajni.

²³ Are tsonha ra jamé jaha ra chaha ra co anto t'join tonoha ra, ixin ngajni rrochonda ra ná cosa anto jian, ixin cain chojni que sinchehe jamé nganji ra, jamé joinchehe nigoelitoe na xančhjen ngain cain profeta que jói are saho.

²⁴ Pero anto tangui tsonha jaha ra xó chonda ra tsje, ixin jaha ra ochaha ra nttihi ngataha nontte.

²⁵ 'Anto tangui tsonha jaha ra xó jai chonda ra tsje para sintte ra, ixin después jaha ra senhe ra jintta.

'Anto tangui tsonha jaha ra xó tjano ra jai, ixin después jaha ra rrotsjanga ra de joachjaon.

²⁶ 'Anto tangui tsonha jaha ra are cain chojni rronichja na jian de ixin jaha ra ixin jañá cain nigoelitoe na xančhjen vanchesayehe na tti chojni que jeha ndoa profeté Dios.

Jesús ndačo chonda que sinao ni chojni que ningaconhe ni

(Mt. 5.38-48; 7.12)

²⁷ 'Nganji ra xó tetinna ra janha rroundattjo ra: Rinao ra tti chojni que ningaconha ra, nchehe ra jian ngain tti chojni que toñao nganji ra,

²⁸ nchetsenhe ra ñao Dios ixin jehe sinchenchaon tti chojni que nichja jianha de ixin jaha ra, co nchetsenhe ra ñao Dios para ixin tti chojni que nichja feo nganji ra.

²⁹ Si chonja chojni rrořanguiha ná manazo ngá con, dittoaxin que rrořanguiha iná manazo. Si chonja tti santsjaha chamarrá, danjo cai hasta camisá.

³⁰ Co quexeho chojni que sanchiaha ná cosa jaha chjehe; co are santsjaha na cosá, idanchieha na cosa mé iná.

³¹ Nchehe ra ngain chojni inchin jaha ra rinao ra sinchehe jehe na nganji ra.

³² 'Si jaha ra rinao ra jehó tti chojni que rinao jaha ra, ¿quehe jian tenchehe ra? Ixin hasta tti chojni que nchehe jianha, jehe na nchehe na jañá cai.

³³ Co si jehó nchehe ra jian ngain tti chojni que nchehe jian nganji ra, cai ¿quehe jian tenchehe ra? Ixin cai tti chojni que nchehe jianha nchehe na jamé cai.

³⁴ O si nhecjen ra tomi jehó tti chojni que nchao tsjengaha ra hna, cai jeha jian tenchehe ra, ixin hasta tti chojni que nchehe jianha nhecjen tomi ngain icha chojni que nchehe jianha, ixin chonda na seguro que tsjenguehe chó na hna.

³⁵ Jaha ra chonda ra que rinao ra chojni que ningaconha ra, co chonda ra que sinchehe ra jian ngain na, co nhecjen ra na cosá ra, co xaxaonha ra ixin sacha ra chonja cosa. Co jamé ngajni nttiha rroxengaxin ra hna icha jian, co jaha ra sintte ra xenhe Dios que ttjen ngajni, ixin Dios jehe cai danjo cain cosa ngain tti chojni jianha co tti ni xonhi tiempo chje gracias.

³⁶ Ttiaconoeha ra icha chojni, jañá inchin Ndodá na que ttjen ngajni ttiaconoeha Ndo cain chojni.

Ncheha ra juzgado iná chojni

(Mt. 7.1-5)

³⁷ 'Ncheha ra juzgado iná chojni, para que Dios sincheha juzgado nganji ra. Ncheha ra condenado iná chojni para que Dios sinttaha ra condenado jaha ra. Nchetjañehe ra cain chojni, para que jamé Dios sinttatjañaha jaha ra cai.

³⁸ Chjehe ra tti chojni que rrogondehe, co Dios rrochjá ra tti rrogonaha ra. Dios rrochjá ra ngain bolsá ra ná medida jian, que tsonttedo jian, tsontsjenga ra jian co rrocaon jian. Ixin inchin medida que jaha ra dattechoaxin ra, Dios jamé sattechoha ra cai.

³⁹ Jesús ndačo ejemplo jihí ngain na:

— ¿Apoco ná tti chejo nchao sicao noxon nttiha iná tti chejo? Seguro que cayoxin chojni mé sinttjian ngain ná ttoe.

⁴⁰ Ni ná tti jitangui jeha icha nohe que ximaestroe, masqui are tsjexin tsangui jehe sehe inchin ximaestroe.

⁴¹ ¿Quedonda ttjiho cuidado de ixin tti anto nchín caxineno que jingangui jmacon iná chojni co ttjioha cuidado de ixin tti ntá jie que jingangui jmacon jaha?

⁴² Si jaha diconha tti ntá jie que jingangui jmacon, ¿quedonda ndačo ngain iná chojni ixin jehe sittoexin para que jaha santsjenguihi caxineno nchín que jingangui jmacon jehe? ¡Jaha ná chojni jianha que ncheyaxon! Saho dantsjengui tti ntá jie que jingangui jmacon para que jamé nchao sicon jian para santsjengui caxineno nchín que jingangui jmacon iná chojni.

Nttattochjoin datsoan ni nnta de ixin ttochjoín nnta

(Mt. 7.17-20; 12.33-35)

⁴³ Xonhi nttattochjoin jian que sinchechjian nnta ttochjoin que xonhi xé, ni nttattochjoin que xonhi xé sinchechjian nnta ttochjoin jian.

⁴⁴ Naná nttattochjoin datsoan ni ntta de ixin ttochjoin que nchechjian ntta. Nttanchaha nchechjianha ntta higo, ni canchaha nchechjianha ca uva.

⁴⁵ Tti chojni jian, jehe nichja cosa jian ixin tti jian jí ngain ansén; co tti chojni jianha, jehe nichja cosa jianha ixin tti jianha jí ngain ansén. Mexinxin cain tti jí ngain ansén chojni, mé tti nichja rroha.

Tti nchia que jingattjen ngataha ttjao co tti nchia que jingattjen ngataha jinhexonda (Mt. 7.24-27)

⁴⁶ 'Jaha ra, ¿quedonda ndacho ra ixin janha ttetonha nganji ra co ncheha ra tti janha ndattjo ra?

⁴⁷ Tti chojni que tsí nganji janha, co jehe na tsinhi na tti rrondattjan na co sitticaon na,

⁴⁸ chojni mé inchin ná xí que ngue anto nihnga para que cjoenga xa basé nchiandoha xa ngataha ná ttjao. Are coyé jinda ngain río, soji vinqué nda nchia mé, pero choha coingui nchia mé ixin soji jixenga nchia ngataha ttjao.

⁴⁹ Pero tti chojni que ttinhi tti janha ndachjan co ditticaonha na na, chojni mé inchin tti joinchechjian nchiandoha ngatacoa jinhexonda ni cjoavaha ttjarioho. Co are coyé jinda ngain río, soji vinqué nda nchia mé, co ndacjamangui nchia. Jamé ndaxantte ngoixin nchia mé.

7

Jesús joinchexingamehe ná xinchehe xé ná xicapitán romano (Mt. 8.5-13)

¹ Are Jesús joexin ndache chojni cain jihi, jehe sacjan para rajna Capernaum.

² Nttiha vehe ná xicapitán romano vechonda xa ná tti nchehe xé xa que jehe xa anto vajinao xa, co jehe tti nchehe xa mé ondajidenhe.

³ Are xicapitán mé coinhi xa de ixin Jesús, jehe xa rroanha xa canxion nijudío que vinttechonda joachaxin ngain ningoe na para joinchetsenhe na ñao Jesús para que jehe rrocji rrojinchexingamehe tti nchehe xé xa mé.

⁴ Cain nimé conchienhe na ngain Jesús co coexinhi na anto joinchetsenhe na ñao co vinttendacho na ngain:

—Xicapitán jihi jiquininxin que soixin tsjenguijna xa,

⁵ ixin jehe xa anto rinao na xa ján na xo judío na, co jehe xa mismo cjoenga xa hna para conchjian ná ningona na.

⁶ Cottimeja joicao na Jesús. Pero are ochian joihi na ngain nchiandoha xicapitán mé, jehe xa coetonhe xa canxion xiamigoe xa para joindacho xa ngain Jesús:

—Idoanha molestado soixin, ixin xicapitán ndacho xa que jehe xa jiquininxinha xa para soixin sixinhi nchiandoha xa.

⁷ Mexinxin jehe xa ni joiha xa para joichoanxin xa ngatja nttiha. Jehe xa rinao xa que jehó ttetonha soixin para tti nchehe xé xa orroxingamehe.

⁸ Jehe xa nohe xa jamé ixin jehe xa mismo chonda que ditticaon xa ngain tti icha ttetonha de jehe xa, cai jehe xa chonda xa joachaxin de ttetonha xa ngain cain xisoldadoe xa. Are jehe xa ttetonhe xa ná de jehe xisoldado que tsji xa quexeho parte, jehe xa ttji xa. Co are jehe xa ttetonha xa que tsí xa, jehe xa ttí xa. Co are ttetonhe xinchehe xé xa que sinchehe xa quexeho xa jehe xa nchehe xa xa.

⁹ Are Jesús coinhi jihi, jehe goan admirado de ixin jehe xa co ngaria tsjehe ngain chojni que terroé, co ndacho ngain na:

—Ndoa, ni de ngacjan cainxin chojni judío viconha janha ná chojni que anto ditticaon inchin xicapitán jihi.

¹⁰ Are cain xiamigoe xicapitán mé cjan xa nchia, vintteguicon xa jehe tti nchehe xa mé odixingamehe; ixonhi chin jichonda.

Jesús joinchexechon xanxichjenhe ná nchiganha

¹¹ Después de cain jihi, Jesús sacjoi para ngain ná rajna dinhi Nain conixin chojni que vacao co tsje icha chojni cai.

¹² Are ojójji na chian ngain rajna mé, jehe vicon que tedicjavá na ná chojni ndadiguenhe que mé tti nacoaxinxon xanxichjenhe naníta janné xan, co jehe naníta mé, ganha. Antó tsje chojni de ngain rajna mé tedicao jehe naníta para tedicjavá na xenhe.

¹³ Are Jesús vicon naníta, jehe coiaconoehé co ndacho ngain:

—Itsjangaha.

¹⁴ Cottimeja Jesús conchienhe co catte cajón, co tti chojni que tedicao cajón tavinttengattjen na. Co Jesús ndache tti ndadiguenhe:

—Janha rrondattjo jaha: ¡Dingattjen!

¹⁵ Cottimeja jehe tti ndadiguenhe xendoa vengá chinttihi co ocoexinhi nichja, co jamé Jesús joanjo xanxi mé ngain janné xan.

¹⁶ Are chojni vicon na jihi, cainxin na anto xaon na co coexinhi na joinchecoanxinhi na Dios co ndaço na:

—Ná profeta anto importante ngattoxon con Dios cononxin ngayá na.

Cai ndaço na:

—Dios joí para joicjenguijna chojni jehe.

¹⁷ Co ngoixin regioen Judea co icha región que te ngandanji regioen Judea conohe chojni ixin quehe joinchehe Jesús.

Tti chojni que rroanha Juan

(Mt. 11.2-19)

¹⁸ Juan, tti vanheguitte chojni, conohe cain jihi ixin chojni que vacao coequín na jehe. Cottimeja jehe vayé yó de jehe na,

¹⁹ co jehe rroanha na para ngain Jesús para joiganchianguihi na Jesús si ndoa jehe tti Cristo tti chonda que tsí, o ni chonda que rrochonhe na iná.

²⁰ Tti chojni que rroanha Juan vintteconchienne na ngain Jesús, co ndaço na ngain:

—Juan coetonna na para joiganchiangui na nganji jaha si ndoa jaha tti Cristo tti chonda que tsí, o ni xa chonda na que rrochoan na iná.

²¹ Ngain rato que jehe na joiji na, Jesús joinchexingamehe anto tsje chojni que vinttechonda ojejé chin, co tti vinttechonda espíritu jianha, co cai chjé jmacon tsje chojni chejo.

²² Mexinxin Jesús ndaço ngain chojni que rroanha Juan:

—Ttji ra co dindache ra Juan tti jaha ra vicon ra co tti jaha ra coinhi ra. Ttequinhi ra ixin tti chojni chejo, jai onchao dicon na, co tti chojni rrengo, jai onchao çhi na, co tti chojni que vinttechonda chin lepra, jai ixonhi chin mé techonda na, co tti chojni que vaquinha, jai onchao ttinhi na, co tti chojni que ondavenhe, jai xechon na, co tti chojni que inchin ndadiguenhe de ngain espiritue, jai ocoinhi na ixin Dios rrochjé na iná vida naroaxin.

²³ Co anto çhjoin para ixin tti chojni que sitticaon nganji na janha cain tiempo.

²⁴ Are savintteceji tti chojni que rroanha Juan, Jesús coexinhi ndache cain chojni que vittohe nttiha de ixin Juan, co ndaço:

—Are cjoí ra ngagaha jna tti xonhi chojni te para joitsjehe ra Juan, ¿quehe xaaxaon ra rroguicon ra ngain jehe? ¿Axaaxaon ra ixin joarrixaoen seguroha inchin ná nttaxiji que nchequingui çhintto?

²⁵ Si jeha jamé, ¿quehe xaaxaon ra rroguicon ra? ¿Aná xí que jingá lonto anto rentte? ¡Nahi, jeha jamé! Jaha ra chonxin ra ixin tti chojni que tengá lonto rentte, mé te ngain nchiandoha rey, chojni mé teha ngagaha jna.

²⁶ Mexinxin ¿quehe tipo de chojni xaaxaon ra rroguicon ra? ¿Ani ná profeta de Dios? ¡Ján ndoa, co xí mé icha rentte que ná profeta!

²⁷ Juan, mé tti jindaçhoxin ngain tti jitaxin Palabrê Dios:

Icha saho que jaha tsji, janha rrorroanha ná tti sicao joajnana,

para que jehe mé sinchechjian nttiha para ixin jaha.

²⁸ Janha rrindattjo ra que de cainxin chojni xonhi iná profeta icha importante joí que jeha Juan tti ncheguitte chojni; pero masqui jamé, tti chojni que icha importanteha ngain tti parte que ttetonha Dios ngain ansén chojni, mé tti icha importante que Juan.

²⁹ Are coinhi na jihi, cain chojni co cain xicobrador de impuesto que joiguitte ngain Juan joatsoan na que Dios nchehe cain cosa inchin jiquininxin.

³⁰ Pero xifariseo co ximaestroey ley que çhoaha xa para que Juan rrojincheguitte xa, joinaoha xa tti jian que ndaço Dios rrojinchehe ngain xa.

³¹ Co Jesús ndaço:

—¿Quehe sittacanaxin chojni de ngain tiempo jihi? ¿Quexén te joarrixaoen na?

³² Joarrixaoen na te inchin joarrixaoen xannchininchjian que dintte xan sontoaon xan ngain ndásin, co toyaotte xan icha xan amigoe xan co ndaço xan: “Janha na jointtachjian na sôn conixin ná nttaxo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.”

³³ Ixin Juan, tti ncheguitte chojni joí, co jehe jineha tsje ni diha vino, co jaha ra ndaço ra ixin jehe chonda ná espíritu jianha.

³⁴ Cottimeja joíhi janha, tti Xí que joixin de ngajni, que jine co dihi vino, pero jaha ra ndaço ra ixin janha anto jine co anto dihi hasta coan na co ixin janha amigoe cain chojni que nchehe jianha, co cain xicobrador de impuesto.

³⁵ Pero tti nohe Dios, mé jian ixin chojni que Dios nchequinxin nchehe na jian.

Are Jesús ngain nchiandoha Simón, tti cjoí ná xifariseo

³⁶ Ná de xifariseo ndache xa Jesús ixin joiijine ngain nchiandoha xa co jehe Jesús cjoí ngain nchiandoha xa, co are ontliha, jehe vehe ngain mesa.

³⁷ Co nttiha ngain rajna mé vehe ná nchí que vanchehe ncha jianha; co are conohe ncha ixin Jesús cjoí joiijine ngain nchiandoha xifariseo mé, jehe ncha cjoí ncha conixin ná xoꝑao de marmol jiche de aceite xajni.

³⁸ Co jói ncha toenxin rotté Jesús, vettoxin nttajochjihi ncha co tsjanga ncha. Mexinxin vinttjitte ndacon ncha rotté Jesús. Cottimeja jehe ncha joinchexemanxin ncha rotté Jesús conixin xajá ncha co coetoxin ncha rotté Jesús. Cottimeja coinga ncha aceite xajni rotté Jesús.

³⁹ Are xifariseo mé vicon xa cain jihi, jehe xa xaxaon xa: “Si xí jihi rrocji xa ná profeta ndoa, jehe xa rroconohe xa quensen jicatte xa, co quehe clase de nchí yá; rroconohe xa ixin nchí yá anto tsje cosa jianha nchehe ncha.”

⁴⁰ Cottimeja Jesús ndačo ngain xifariseo mé:

—Simón, janha chonda ná cosa que rroundattjo jaha.

Xifariseo mé ndačo xa:

—Ndachjenji na, Maestro.

⁴¹ Jesús ndačo:

—Vehe yó tti xí vintteca tomi ngain ná tti vacjadoa tomi. Ná de tti xí mé veca naho ciento de tomi, co tti iná veca cincuenta.

⁴² Pero ixin xonhi tomi vinttechonda cayoi tti xí mé, jehe tti cjoadoa tomi, joinchetjañehe cayoi tti xí mé tti tomi que jehe vintteca. Jai ndachjenji na jaha, ¿quexehe de cayoi tti xí mé icha sinao jehe tti vanjo tomi mé?

⁴³ Simón mé ndačo ngain Jesús:

—Janha xaxanho que tti xí que vitjañehe icha tsje tomi.

Jesús ndačo:

—Ndoa tti ndačo.

⁴⁴ Cottimeja Jesús tsjehe ngain nchí mé co ndačo ngain Simón:

—¿Adicon jaha nchí jihi? Janha joixinhi nchiandoi, co jaha chjanaha jinda para cjoenxin rottena; pero nchí jihi cjoenna ncha rottena conixin ndacon ncha, co joinchexemanxin ncha conixin xajá ncha.

⁴⁵ Jaha coetoxinha na de joajna, pero jehe ncha, desde que janha joixinhi nchiandoi coexinhi ncha coetoxin ncha rottena hasta jaxon.

⁴⁶ Jaha coingaha na aceite ngataha jana; pero jehe ncha cointtjitte ncha aceite xajni ngain rottena.

⁴⁷ Mexinxin janha ndattjo que ixin jehe ncha anto rinao na ncha janha, co mé xago que tti anto tsje jianha que jehe ncha joinchehe ncha jai ovitjañehe ncha; pero tti chojni que tsjeha jianha vitjañehe, cai tjago que antoha rinao na janha.

⁴⁸ Cottimeja ndačo Jesús ngain tti nchí mé:

—Cain tti jianha que joinchehe ovitjañaha.

⁴⁹ Co cain chojni que te ngain mesa nttiha conixin Jesús coexinhi na ndache chó na:

—¿Quensen xí jihi, que hasta nchao nchetjañehe xa tti jianha que nchehe chojni?

⁵⁰ Pero Jesús ndačo ngain tti nchí:

—Jaha ochonda vida nroaxin ixin vitticaon na janha; mexinxin sattji contenta.

8

Cain nchí que vacjenguijna Jesús

¹ Después de cain jihi, Jesús vangaria ngain tsje rajna conixin tsje rajnanchjan para joiindache chojni de ixin Dios co ixin Dios otsetonha ngain ansén na. Co vacao tti tteyo nirepresentanté jehe.

² Co nttiha vacao canxion nchí cai que jehe venguixin espíritu jianha de ngaxinhi cuerpoe ncha co vinttjian cain chin que vinttechonda cada ncha. Co de cain nchí mé, nttiha vehe María Magdalena tti vahjexin yáto espíritu jianha de ngain cuerpoe.

³ Co cai nttiha vehe Juana, nchíchíhi ná tattita vinhi Chuza tti vaquetonha ngain nchiandoha Herodes; co cai nttiha vehe Susana co icha nchí que vacjenguijna ncha Jesús conixin tti jehe ncha vachonda ncha, jehe conixin tti chojni que vacao.

Ejemploe tti joiquenga trigo ngataon jngui

(Mt. 13.1-9; Mr. 4.1-9)

⁴ Tsje chojni de ngain tsje rajna cjoí na para joitsjehe na Jesús, co are oxatte tsje chojni ngain Jesús, jehe nichjé na de ixin ejemplo; co ndačo ngain na:

⁵—Ná xí cjoí xa joiquenga xa trigo ngataon jngui. Are jehe xa coexinhi xa cjoa xa trigo ngataon jngui, canxion noanchjan de trigo vinttji ngá nttiha, co are vatto chojni, ngachje na trigo mé. Co cai conttoa vittja va trigo mé co ndajoine va noanchjan mé.

⁶Co ittoha noanchjan de trigo vinttji ngataha tti jí ttjao, co are trigo mé čhinhi, anto daca ndaxema ixin žonhi tjao vechonda ttjao.

⁷Co ittoha noanchjan de trigo vinttji ngacjan canchaha co canchaha čhinhi ca co icha daca vangui ca; icoančjandaha ca trigo vangui trigo.

⁸Peró icha noanchjan de trigo vinttji noa tti jí jian jinche. Co are vangui trigo mé joanjo jian cosecha, ixin de ná noanchjan de trigo que vetsinga joinchchjan hasta cien noanchjan.

Are Jesús jindačo cain jiji, jehe nichja soji ngain na, co ndačo:

—Si jaha ra ttinxin ra, ttinhi ra jian.

Quedonda Jesús joinchegonda tsje ejemplo

(Mt. 13.10-17; Mr. 4.10-12)

⁹Cottimeja tti chojni que vacao Jesús joanchianguihi na Jesús ixin quehe rročo ejemplo jiji.

¹⁰Jehe ndačo ngain na:

—Jaha ra, Dios nttanoha ra tti jima de ixin quežén Dios tsetonha ngain ansén chojni; pero are janha nichjá icha chojni, nichjá na de ixin ejemplo para que are sicon na, sittohe na inchin rroguiconha na, co are tsinhi na, jehe na tsinxinha na.

Jesús ndačo quehe rročo ejemplo tti joiquenga trigo

(Mt. 13.18-23; Mr. 4.13-20)

¹¹Jiji tti rročo ejemplo tti joiquenga trigo: Tti trigo rročo joajné Dios:

¹²co tti trigo que vinttji ngá nttiha, mé rročo tti chojni que ttinhi joajné Dios, pero tti inchinji co ndanchetjanji na de ngain ansén na tti joajna que coini na para que sitticaonha na co rrochondaha na iná vida naroaxin.

¹³Co tti trigo que vinttji ngataha tti jí ttjao, mé rročo tti chojni que are ttinhi na joajné Dios, jehe na anto čjoi tonoho na dayé na joajna mé, pero ixin palabra mé techondaha na tsje noehe ngain ansén na, ditticaon na jehó nchion, co are Dios daquehe prueba ngain na, jehe na incheha na tti ttetonha Dios.

¹⁴Co tti trigo que vinttji ngagaha canchaha, mé rročo tti chojni que ttinhi na joajné Dios, pero jehe na ncheha na caso. Jehe na nchehe na sigue inchin te na ngain vidé na, co icha žaxaon na ngain problemé na, co ngain cosé na, co ngain cosa čjoi que jí nttihi ngataha nontte. Cain cosa jiji tančjandaha na para ditticaon na joajné Dios, co jamé chojni mé idanguiha na de ngain espiritue na.

¹⁵Peró tti trigo que vinttji ngain jinche jian, mé tti chojni jian de ngain ansén, co anto rinao na ttinhi na co nchehe na caso joajné Dios. Co jamé ditticaon na cainxin tiempo, co jehe na anto dangui na de ngain espiritue na ixin ttenchjinha na palabré Dios.

Ejemplo lámpara

(Mr. 4.21-25)

¹⁶žonhi chojni sinchegacaon ná lámpara cottimeja jehe tsjanotaon lámpara o rrožangui lámpara ngangui saoen, sino que chojni mé chonda que saquehe lámpara ngataha ná cosa noi para que cain chojni que sixinhi nchia mé nchao sicon na joadingasán.

¹⁷žonhi cosa jima que tsononxinha, co žonhi cosa jima que težaxaon ni ngain ansén ni que chojni tsonoeha; cain cosa chonda que tsononxin cosa.

¹⁸Mexinxin jaha ra ttinhi ra jian; ixin tti chojni que chonda, Dios tsjenguijna para que rrochonda icha, pero tti chojni que žonhi chonda, Dios santsjehe hasta tti jehe žaxaon que ochonda.

Janné Jesús co xanchó

(Mt. 12.46-50; Mr. 3.31-35)

¹⁹Cottimeja janné Jesús conixin canxion xanchó Jesús joihi na tti jí Jesús, pero čhoča conchienne na hasta tti ngaca Jesús ixin anto tsje chojni te nttiha.

²⁰Cottimeja ná chojni viquetonhe Jesús:

—Janná conixin xanchó nttimé ndoja te na, co rinao na rronichjaha na jaha.

²¹Peró Jesús ndačo:

—Cain tti chojni que ttinhi quehe ndačo joajné Dios co nchehe na inchin ndačo joajna jiji, cain chojni mé inchin jannana co xanchian.

Jesús tajoaquehe čhintto conixin olé lago

(Mt. 8.23-27; Mr. 4.35-41)

²² Ná nchanho Jesús conixin tti chojni que vacao joixinhi na ngaxinhi ná barco, co nttiha jehe ndaço ngain na:

—Sachjin na toenxin lago jihi.

Co sajcoi na.

²³ Co are jehe na tatetaonhe na jinda, Jesús tavejoa ngaxinhi barco. Co are de repente cjoa ná ðhintto anto soji, que hasta ocoexinhi viquia jinda ngá barco, co ojinao sarroxin-canjingui barco jinda.

²⁴ Cottimeja vinttecji tti chojni que vacao Jesús para joinchexingamehe na Jesús, co ndaço na ngain:

—¡Maestro! ¡Maestro! ¡Ndatexincanjingui na jinda!

Cottimeja vingattjen Jesús co jehe coetonhe ðhintto co olé lago que tasehe, co cayoi cosa mé jaicoa tavehe; icjoaha ðhintto co icjoinha olé lago.

²⁵ Cottimeja jehe ndaço ngain tti chojni que vacao:

—¿Quedonda jaha ra chondaha ra confianza nganji na?

Pero jehe na anto vintteñaon na, co vinttegoan na admirado, co vintteganchianguihi chó na, naná na, co ndaço na:

—¿Quensen xí jihi, que jehe xa ttetonhe xa ðhintto co jinda, co tonhe inchin jehe xa ndaço xa?

Tti xí de ngain nontte Gadara que vechonda espíritu jianha

(Mt. 8.28-34; Mr. 5.1-20)

²⁶ Cottimeja joihi na ngain nontte Gadara que jí toenxin lago mé, ðhica Galilea.

²⁷ Are Jesús vanianxin de barco mé conchienne ngain jehe ná xí de ngain ná rajna de ngain nontte Gadara. Anto sé xí jihi chonda xa tsje espíritu jianha. xonhi lontto vengá xa, ní jeha ngain ná nchia vehe xa, sino que jehe xa vehe xa nganguinihi tti vacjavá chó chojni que ndavaguenhe.

²⁸ Are jehe xí mé vicon xa Jesús, jehe xa vettoxin nttajochjihí xa ngain Jesús co espíritu jianha joinchecoyao xa co joinchenichja xa co ndaço xa:

—¿Quedonda dixintte nganji na, jaha Jesús, Xenhe Dios que ttjen ngaini? Nttatsanha ñao que nheguetanha na tangui janha.

²⁹ Jehe xí mé ndaço xa jaña ixin Jesús ojittetonhe espíritu jianha que sachjexin de ngain xí mé. Otsje nttiha espíritu jianha tse xa. Co masqui chojni vaquiáxin na xa conixin cadena de rá xa co de rotté xa para vagueñoa xa; pero are espíritu jianha vatse xa, jehe xa vaconñinttaon xa cadena co espíritu jianha savanchequinga xa para ngá tsaga o ngagaha jna tti xonhi chojni te.

³⁰ Jesús joanchianguihi xí mé:

—¿Queén dinhi jaha?

Co jehe xa ndaço xa:

—Janha dinhi na Legión.

Jehe xa ndaço xa jaña ixin anto tsje espíritu jianha vehe ngaxinhi cuerpoe xa.

³¹ Co cain espíritu mé ndache Jesús ixin rinaoha tsji infierno co joinchetsenhe ñao Jesús que jehe rrorroanha para ngain infierno.

³² Co ixin nttiha chian tene tsje cocochi ngain ná jnanchjan, cain espíritu jianha mé joinchetsenhe ñao Jesús ixin jehe tsanñjanda cain espíritu mé sixinhi ngaxinhi cain cocochi mé. Co Jesús joanjo joachaxin.

³³ Cottimeja cain espíritu jianha mé vachjexin de ngaxinhi cuerpoe xí jihi co savintteguixinhi ngaxinhi cocochi. Co cain cocochi jihi savinttecanttjenhngui va jinda, co nttiha ndavintteguenxin cainxin va ixin vinttejonhe va jinda.

³⁴ Cain tti chojni que vaquingaria cocochi, are jehe na vicon na cocochi tecjonhe va jinda, jehe na anto ðaon na co coinga na joindache na chojni ngain rajna co cai nite nchiandoha ngataon jngui.

³⁵ Co cain chojni mé cjoi na joitsjehe na quehe conhe nttiha. Co are joihi na tti jí Jesús, vicon na nttiha tají tti xí que vachjexin cain espíritu jianha de ngaxinhi cuerpoe; tají xa ðhica rotté Jesús, co ojingá xa lonttoe xa, co joarrixaoen xa ondacoa jí; co cain chojni mé vintteñaon na.

³⁶ Co cain chojni que vicon quehe conhe nttiha ndaço na queén xingamehe tti xí que vechonda espíritu jianha.

³⁷ Mexinxin cainxin chojni de ngain regioen Gadara joinchetsenhe na ñao Jesús ixin jehe satsjixin de nttiha, ixin jehe na anto vintteñaon na. Mexinxin Jesús coani barco co sajcoi.

³⁸ Tti xí que vachjexin cain espíritu jianha de ngain cuerpoe joinchetsenhe xa ñao Jesús para que Jesús rroganjo joachaxin sarrojicao xa ngain jehe, pero Jesús coetonhe xí mé que sittohe xa, co ndaço ngain xa:

³⁹ —Cjan para nchiandoi, co ttequinhi cain chojni cain tti joinchehe Dios nganji.
Co tti xí mé sacjoi co coequin cain chojni ngoixin rajna tti joinchehe Jesús ngain jehe.

*Are xingamehe xannñichjenhe Jairo, conixin ná nchí que catte lonttoe Jesús
(Mt. 9.18-26; Mr. 5.21-43)*

⁴⁰ Are Jesús cjan para toenxin lago mé, cain chojni que te nttiha anto ché na ixin joiiji Jesús, ixin cainxin na techonhe na Jesús.

⁴¹ Cottimeja jói ná xí que vinhi Jairo, xí mé vaquetonha xa ngain nihngo nttiha. Xí jihi vettoxin nttajochjihi xa ngain Jesús co joinchetsenhe xa fiao ixin jehe rrocji nchiandoha xa

⁴² ixin jehe xí mé vechonda xa nacoaxinxon xannñichjenhe xa que vechonda xan tteyó nano. Co are mé ondajindenhe xannñichjenhe xa. Are Jesús sacjoi nchiandoha Jairo conixin jehe Jairo, rroé anto tsje chojni que hasta anto conttedo na ngaca Jesús.

⁴³ Co de ngacjén cain chojni mé nttiha conchienenhe ná nchí que venihi ncha tteyó nano. Jehe ncha veguenguihi ncha jni, co jehe nchí mé ojeohe ncha joinchexinhi ncha de ngain xincheñoan cainxin tti vechonda ncha, pero ni ná xincheñoan choha joinchexingameha xa ncha.

⁴⁴ Jehe nchí mé conchienenhe ncha ngaca Jesús notonxin co catte ncha rioho ngandehe lonttoe Jesús que jitsá. Co rato mé tavehe tti jni que venguihi ncha.

⁴⁵ Cottimeja Jesús joanchiangui co ndaço:

—¿Quensen catte na?

Pero ixin cain chojni ndaço na xonhi quensen, mexinxin Pedro conixin cain xicompañeroe ndaço xa:

—Maestro, cain chojni tonttedo na ngaca soixin, co tonxinca na de ná lado co iná lado, mexinxin ¿quedonda soixin xa danchiangui quensen catte?

⁴⁶ Pero Jesús ndaço:

—Jí ná chojni que catte na, ixin janha conona que jointtaxingamá ná chojni conixin joachaxin que janha chonda.

⁴⁷ Nchí mé are conohe ncha ixin conohe Jesús, jehe ncha conchienenhe ncha jixanga ncha de joaxaon, co vettoxin nttajochjihi ncha ngaca rotté Jesús. Co ngattoxon con cain chojni nttiha ndaço ncha ngain Jesús ixin quedonda jehe ncha catte ncha co quexén ngain rato mé ndacoñoenhe ncha.

⁴⁸ Cottimeja Jesús ndaço ngain ncha:

—Jaha coñoanha ixin vitticaon na. Jai sattji contenta.

⁴⁹ Xa jinichja Jesús yá, are ojoí ná chojni de ngain nchiandoha Jairo, tti vaquetonha ngain nihngo nttiha; co ndaço chojni mé ngain Jairo:

—Xannñichjanha ondavene xan; inchemolestaha ximaestro.

⁵⁰ Pero are Jesús coinhi yá, jehe ndaço ngain Jairo:

—Jaha xaonha; jeho ditticaon na janha, co xanha rroxingamehe xan.

⁵¹ Are joiiji na nchiandoha Jairo, Jesús coanñjandaha vixinhi ni ná chojni, jeho jehe, Pedro, Jacobo, Juan, co jehe ndodé xannñichjan conixin janné xan.

⁵² Cain chojni que te nttiha tetsjanga na co tetaxin na xan joachjaon. Pero Jesús ndaço ngain na:

—Tsjangaha ra; xannñichjan ndadiguenha xan; sino que tajihoa xan.

⁵³ Pero jehe na cjoanoa na Jesús ixin ndaço jañá, ixin cain na venohe na que xannñichjan ondavenhe xan.

⁵⁴ Cottimeja Jesús tsehe rachjenhe xannñichjan co ndaço sén ngain xan:

—Jaha xannñichjan, dingattjen.

⁵⁵ Co jehe xannñichjan xechon xan iná, co ngain rato mé jehe xan vingattjen xan. Co Jesús coetonha rrochjé na xan sine xan.

⁵⁶ Nindoha xannñichjan anto vinttegoan na admirado, pero Jesús coetonhe na ixin xonhi chojni rronache na tti joinchehe jehe.

9

*Are Jesús rroanha tti tteyó chojni que vacao
(Mt. 10.5-15; Mr. 6.7-13)*

¹ Jesús nichjé tti tteyó chojni que vacao, co jehe joanjo joachaxin ngain na para que jehe na nchao senguixin na cain clase de espíritu jianha de ngaxinhi cuerpoe chojni, co para sinchexingamehe na chojni nihi de ixin chin que chonda.

² Jehe rroanha na para joindache na chojni ixin Dios osiquetonha ngain ansén na, co para joinchexingamehe na chojni nihi.

³ Jehe ndaço ngain na:

—Xonhi ttjiho ra de tti sondaha ra ngatja nttiha, ni nttacotto, ni bolsa ni niottja, ni tomi. Ttjiho ra jeho nacoa camisa que tengaha ra co ttjioha ra yó camisa.

⁴ Cada rajna que saso ra dittoha ra jeho nacoa nchia hasta que satsjixin ra de ngain rajna mé.

⁵ Si thonja rajna sinaoha na tsinhi na tti jian joajna que jaha ra tsjiho ra jaha ra sattjixin ra de nttiha, co tontsjenga ra jinche que yá rottea ra, mé ná señal que vitticaonha na jaha ra.

⁶ Jamé sacjoi cain chojni mé, cjoi na ná co ná rajna, joindache na chojni tti jian joajna co joinchexingamehe na chojni nihi.

Are ndavenhe Juan, tti vanheguitte chojni

(Mt. 14.1-12; Mr. 6.14-29)

⁷ Are xigobnador Herodes conohe xa cain tti jian que vanchehe Jesús, jehe xa anto xaon xa, ni inoeha xa quehe xaaxaon xa ixin canxion chojni ndačo na que mé Juan, tti vanheguitte chojni, co jai xechon.

⁸ Icanxin na vandačo na ixin Jesús, jehe tti profeta Elías que cononxin iná, co icanxin na vandačo na que ixin Jesús ná de tti profeta que jói are icha saho co jai xechon.

⁹ Pero Herodes ndačo:

—Janha mismo coetonha činji já Juan, tti vanheguitte chojni. Mexinxin ¿quensen xí jihi que chojni ttequin na anto tsje cosa jian que jehe xa rridinchehe xa?

Co Herodes anto cjoé quexén para que jehe rroguicon Jesús.

Are Jesús joanjo joine naho mil xí

(Mt. 14.13-21; Mr. 6.30-44; Jn. 6.1-14)

¹⁰ Are tti tteyó chojni que rroanha Jesús cjanxin na de tti joindačo na tti jian joajna, jehe na ndačo na ngain Jesús tti jehe na joinchehe na. Cottimeja Jesús sajoicao na ngain ná lugar tti xonhi chojni te, chian ngain rajna Betsaida.

¹¹ Pero are conohe icha chojni ixin ttinó sacjoi Jesús, jehe na rroé na co jehe nichjé cain na, co ndačo ngain na ixin quexén siquetonha Dios ngain ansén na, co joinchexingamehe cain ninihi.

¹² Co are ondacotsocjin, conchienne tti tteyó chojni que vacao Jesús, co ndačo na ngain:

—Ndache cain chojni que satsji na, para sasinchejogaha na co siquehna na tti sine na ngain rajna o nchia que te chian, ixin nttihi tti te na xonhi ji.

¹³ Pero Jesús ndačo ngain na:

—Jaha ra danjo ra tti sine na.

Jehe na vinttendačo na:

—Janha na xonhi chonda na, jeho naho niottja co yó copescado, o ¿apoco janha na siquehna na tti sine cainxin chojni jihi?

¹⁴ Ixin cain chojni mé, jeho xí inchin naho mil xa. Pero Jesús ndačo ngain tti chojni que vacao:

—Ndache ra na tasintte na de cincuenta na cada grupochjan.

¹⁵ Co jamé joinchehe na; tavintte na cainxin na.

¹⁶ Cottimeja Jesús cóa tti naho niottja mé co tti yó copescado. Co jehe tsjehe para ngaini, joanjo gracias ngain Dios de ixin niottja mé conixin copescado, co después de váña niottja, jehe joanjo nio ngain tti chojni que vacao, para que jehe na conchjejehe na cainxin chojni mé jehe niottja conixin copescado.

¹⁷ Cainxin chojni mé joine na co cojehe na jian, co después xa joinchecaon na tteyó ntaxa de ixin tti niottja rioho que xexin joine na.

Pedro ndačo que ixin Jesús, mé tti Cristo

(Mt. 16.13-19; Mr. 8.27-29)

¹⁸ Ná nchanho are Jesús jinchecoanxinhí Dios, co jeho tti chojni que vacao nttiha tate na ngain, jehe joanchiangui ngain na co ndačo:

—¿Quehe ndačo chojni ixin quensen na janha?

¹⁹ Jehe na vinttendačo na:

—Canxion na ndačo na que ixin soixin Juan, tti vanheguitte chojni; icanxin na ndačo na que ixin soixin tti profeta Elías; co icanxin na ndačo na que ixin soixin ná de tti profeta que vaci are saho.

²⁰ Cottimeja Jesús joanchiangui ngain jehe na, co ndačo:

—Co jaha ra ¿quehe ndačo ra ixin quensen na janha?

Co Pedro ndačo ngain Jesús:

—Soixin tti Cristo que joixin de ngain Dios.

Are Jesús nda'cho ixin jehe ndasenhe

(Mt. 16.20-28; Mr. 8.30-9.1)

²¹ Pero Jesús anto coetonhe na ixin xonhi chojni rrondate na.

²² Cottimeja Jesús nda'cho ngain tti chojni que vacao:

—Janha, tti Xí que joixin de ngajni, chonda que anto tsje cosa tangui tsonna, co cain xittetonha ngain nihngo, co cain xidána que ttetonha ngain icha xidána, conixin cain ximaestroey ley Israel, sinaoha na xa. Co nasoenxon na xa, pero ngain nchanho ninxin janha rroxechon na.

²³ Después jehe nda'cho ngain cain chojni que te nttiha:

—Si çhonja chojni rinao sitticaon na janha, pero chonda que rrotjañehe tti jehe icha rinao para sitticaon na janha cainxin nchanho, masqui tangui tsonhe co hasta puede nasenxon de ixin causananxin janha.

²⁴ Ixin tti chojni que rinao xonhi tsonhe vidé, mé ndasinçhetján vidé; pero tti chojni que sinçhetján vidé de ixin causananxin janha, chojni mé rrochonda iná vida naroaxin.

²⁵ Ixin xonhi xé que ná chojni sacha cainxin cosa que jí ngain mundo jihi co ndasitján jehe mismo.

²⁶ Ixin tti chojni que tosoé de ixin janha co de ixin palabrana, cai janha, tti Xí que joixin de ngajni, tsooahna de ixin jehe chojni mé are janha sihi inchin ná Rey conixin cain gloria que chonda Nodana co que chonda cain ángel que te ngain Ndo.

²⁷ Atto seguro tti rrindattjo ra, que çhonja de jaha ra xo te ra nttihi jai, xa senha ra hasta que siconja ra que Dios siquetonha ngain ansén chojni.

Are vicon na Jesús anto ojé

(Mt. 17.1-8; Mr. 9.2-8)

²⁸ Inchin jni nchanho después de Jesús nda'cho cain jihi, jehe coani ná jna para joincheoanxinhi Dios co joicao Pedro, Jacobo co Juan.

²⁹ Co are Jesús jincheoanxinhi Dios, ngá con Jesús ndavitoxinhi co lonttoe ndacjan lontto anto roa co hasta jidaquima lontto.

³⁰ Cottimeja cononxin yó xí que tatetjao xa Jesús, co cayoi xí mé, ná Moisés co iná Elías.

³¹ Co ngoixin ngandanji na vehe ná joadingasán anto çhjoin. Co cjoao na ixin quexén ndasenhe Jesús ngain Jerusalén, co ixin anto tangui ndasenhe.

³² Masqui Pedro co tti cayoi xicompañeroe anto çhjé na cottachin, pero jehe na tavint-tetsjehe na co vicon na gloria que chonda Jesús, co vicon na tti yó xí canxin que jói ngain Jesús.

³³ Are cayoi xí mé saconcin xa de ngain Jesús, cottimeja Pedro nda'cho ngain Jesús:

—Maestro, atto nçhao ixin te na janha na nttihi, janha na sinttachjian na ní nchiachjan; ná para ixin soixin, ná para ixin Moisés, co iná nchiachjan para ixin Elías.

Pero Pedro noeha quehe nda'cho ngain rato mé.

³⁴ Co Pedro xa jinichja jañá are jói ná ttjoi ngain na co jehe na ndavittohe na ngacjan ttjoi mé. Pedro co cayoi xicompañeroe vintteçhaon ixin ndavittohe na ngacjan ttjoi mé.

³⁵ Cottimeja de ngacjan ttjoi mé coinxin na tté Dios que nda'cho:

—Yá tti Xanhna que anto rinaho. Ditticaon ra tti rrondate ra Xan.

³⁶ Después que nichja Dios jañá, vicon na que Jesús jehoj táji nttiha. Jehe na vinttetenco na, co xonhi chojni coequín na tti jehe na vicon na.

Jesús joinchexingamehe ná xanxichjan que vechonda espíritu jianha

(Mt. 17.14-21; Mr. 9.14-29)

³⁷ Ndoexin are vanianxin na de ngain jna mé, anto tsje chojni joichoexin na Jesús ngatja nttiha.

³⁸ De ngayé cain chojni mé, ná xí nichja xa sén co nda'cho xa ngain Jesús:

—Maestro, nttatsanha ñao, tsjehe xanxichjanhna ixin jehoj xan jihi chonda.

³⁹ Ná espíritu jianha tse xan co nchecoyao xan, co tadetsinga xan xá ndadenhe xan co hasta ttoçhjo ttixin rroha xan. Anto ncheguetan xan tangui co xonhi rato tachjanda xan para tadehe xan çhjoin.

⁴⁰ Janha ojointtatsán ñao chojnia que çhjiho ixin rrogantsje na espíritu jianha yá, pero coixinha na.

⁴¹ Jesús nda'cho:

—Jaha ra xo chojni que ditticaonha ra co jianha ra! ¿Hasta tti quesa chonda que sarihi nganji ra co tsixinna nganji ra? Sicozna xanha nttihi.

⁴² Pero are jehe xanxichjan mé jitonchienhe xan ngain Jesús, espíritu jianha mé joincheguenda xan, co joanca xan ngataha nontte. Pero Jesús joinchesatthe espíritu jianha mé, co jehe joinchexingamehe xanxichjan co joanjo xan ngain ndodé xan.

⁴³ Co cainxin chojni que te nttiha anto vinttegoan na admirado de ixin tti anto tsje joachaxin que chonda Dios.

Jesús ndačo iná ixin jehe ndasenhe
(Mt. 17.22-23; Mr. 9.30-32)

Are cain chojni mé xa teřaxaon na de ixin tti jian que joinchehe Jesús, jehe ndačo ngain tti chojni que vacao:

⁴⁴ —Ttinhí ra jian tti janha rronhattjo ra, co tjañaha ra que janha, tti Xí que joixin de ngajni, sinchechienhe na na ngain xí jianha.

⁴⁵ Pero tti chojni que vacao vaquinxinha na tti jehe vandačo ngain na, ixin xa řonhi joachaxin vinttechonda na para coinxin na. Co jehe na řaoncoa na para joanchianguihi na Jesús ixin quehe rročo tti jehe ndačo.

¿Quensen tti icha importante?
(Mt. 18.1-5; Mr. 9.33-37)

⁴⁶ Cottimeja tti chojni que vacao Jesús, coexinhi na cjoao chó na ixin quensen de jehe na tti icha importante,

⁴⁷ pero Jesús conohe quehe tendache chó na. Cottimeja jehe cjóa ná xanxichjan co joaquehe xan ngaca jehe,

⁴⁸ co ndačo ngain jehe na:

—Tti chojni que sayé ná chjan inchin xanxichjan jihi conixin nombrena ixin ditticaon na janha; chojni mé sayehna janha cai. Co tti chojni que sayehna janha, cai sayé tti rroanha na janha. ¿Arinao ra tsonoha ra quensen icha importante? Tti rrojan icha importante na ngayaha ra, mé tti sehe icha importante ngattoxon con na janha.

Tti chojni que ningacoanha na, chojni mé jí nganji na
(Mr. 9.38-40)

⁴⁹ Cottimeja Juan ndačo ngain Jesús:

—Maestro, janha na vicon na ná tti jidengui espíritu jianha conixin joachaxín nombrea; co janha na ndattjan na que isincheha jamé, ixin jehe řhjiha nganji na.

⁵⁰ Pero Jesús ndačo:

—Cayacoenha ra chojni mé, ixin tti chojni que ningacoanha na, jehe jí nganji na.

Jesús joinchesattehe Jacobo co Juan

⁵¹ Are ojoiconchiaon tiempo que Jesús sacojín para ngajni, jehe řaonha para sacjoi ngain Jerusalén.

⁵² Jehe rroanha canxion chojni que joicao joajné icha saho, co chojni mé cjoí na ngain ná rajna ngain regioen Samaria para joicjé na ná nchia tti sintte jehe na conixin Jesús.

⁵³ Pero chojni samaritano mé řhoha na joanjo na joachaxin nttiha ixin chonxin na que chojni Jesús conixin jehe satettji na para Jerusalén.

⁵⁴ Are Jacobo co Juan conohe que ixin nisamaritano řhoha na danjo na joachaxin, jehe ndačo ngain Jesús:

—¿Arinao soixin que tsetonha na janha na que rroxincanji řohi de ngajni, para soen cain chojni yá inchin joinchehe profeta Elías?

⁵⁵ Cottimeja Jesús ngaria tsjehe na, co joinchesattehe na, ndačo:

—Jaha ra noaha ra quehe clase de espíritu chonda ra.

⁵⁶ Ixin janha, tti Xí que joixin de ngajni, joiha para nasoenxon chojni, sino que para rrochjaha na vida nroaxin.

Cottimeja sacjoi na para ngain iná rajna.

Tti chojni que joinao rrogacao Jesús
(Mt. 8.19-22)

⁵⁷ Are tettji na ngatja nttiha, ná xí ndačo xa ngain Jesús:

—Janha rinaho sacjin na cain lugar tti soixin sacji.

⁵⁸ Jesús ndačo ngain tti xí mé:

—Cain condaniřa chonda va cuevé va, co cain conttoa chonda va caqué va, pero janha, tti Xí que joixin de ngajni, chondaha ni ttinó sariřhin.

⁵⁹ Jesús ndačo ngain iná tti xí:

—Jaha chjin na.

Pero tti xí mé ndačo:

—Nttatsanha řiao, chonna na saho ndasenja ndodana para que janha tsjavá ndo.

⁶⁰ Jesús ndačo:

—Tanřhanda tti chojni que chondaha vida nroaxin tsjavá chó na; pero jaha ttji co dindache chojni ixin Dios osiquetonha ngain ansén na.

⁶¹ Cottimeja iná tti xí ndačo ngain Jesús:

—Janha rinaho satsjin na, pero saho chonna na tsji sinttanoa ninchiania.

⁶² Pero Jesús ndaicho:

—Tti jitse ningue, cottimeja tsjehe para noton, chojni mé xonhi xé para ngain tti ttetonha Dios.

10

Are Jesús rroanha tti setenta chojni

¹ Después de cain jihi, Jesús coinchiehe isetenta chojni, co jehe saho rroanha de yó na co yó na ngain cain rajna co icha lugar chian nttiha tti jehe chonda que cjoí después.

² Co ndaicho ngain na:

—Atto seguro tti rrondattjo ra, que coseché Dios atto tsje, pero ninchehe xa tsjehe na. Mexinxin nchetsenhe ra ñao Xinajni para que jehe rrorroanha icha ninchehe xa para tsjejo na cain cosecha jihi.

³ Ttji ra jai jaha ra co xaxaon ra que janha rroanha ra inchin coleco ngayé condanixa.

⁴ Ttjioha ra bolsa, ni tomi, ni icha catte que jecho tti ca jaha ra techjanga ra. Co tadinttengattjenha ra para chjehe ra chojni joajna ngatja nttiha, ixin jamé sinchetjangui ra tiempo.

⁵ Are saso ra ngain ná nchia, saho danjo ra joajna co ndaicho ra: “Que chojni de ngain nchia jihi tsonhe chjoin ngain ansén.”

⁶ Co si ngain nchia mé te chojni jian, ján, chojni mé tequininxin tti joajna que jaha ra sanjo ra; pero si nahi, joajná ra mé sarrocjan nganji ra.

⁷ Are saso ra ngain ná rajna, dittoha ra jecho ngain nacoa nchia co jintte ra co dihi ra tti rrochjá ra na de ngain nchia mé. Ixin tti nchehe xa jiquininxin rroxenguehe hna. Chondaha ra que sittoha ra ojeje nchia.

⁸ Are saso ra ngain ná rajna tti chojni ján sayaha ra, jintte ra cain tti rrochjá ra na.

⁹ Nchexingamehe ra chojni nihi que te ngain rajna mé, co ndache ra na: “Ochian jói tiempo para Dios siquetonha ngain ansean ra.”

¹⁰ Pero si saso ra ngain ná rajna tti rrochhocho chojni sayaha ra na, jaha ra dačhje ra para ngá nttiha co ndaicho ra:

¹¹ “Hasta tti jinche de ngain rajná ra jihi que tse rottena na, tsontsjenga na para ná señal que jaha ra vitticaonha ra joajna que joiquianha ra. Pero xaxaon ra que tti ttetonha Dios ochian joi nganji ra.”

¹² Janha rrindattjo ra seguro, que para ngain nchanho que Dios sinchejuzguehe cainxin chojni, are mé chojni de ngain rajna que vitticaonha na joajné Dios icha soji castigo sayé na que tti castigo que vayé chojni de ngain ciudad de Sodoma.

Rajna que vintteguitticaonha

(Mt. 11.20-24)

¹³ ¡Anto tangui tsonha jaha ra chojni de ngain rajna Corazín! ¡Co anto tangui tsonha jaha ra, chojni de ngain rajna Betsaida! Ixin si cain milagro que jointtaha ngayaha ra rroconhe ngayé chojni de ngain ciudad de Tiro co Sidón, seguro que chojni mé osé rroquentoxinhi na vidé na de tti jianha que vanchehe na. Co para rrocjago na ixin jehe na orroquentoxinhi na vidé na, rroquinttengá na lonnto ttie co rroguinga na nntesoguihi.

¹⁴ Pero ngain tti nchanho que Dios sinchejuzguehe cainxin chojni, are mé jaha ra sayehe ra castigo icha soji que chojni de ngain Tiro co Sidón.

¹⁵ Co jaha ra de ngain rajna Capernaum, ¿A xaxaon ra que jaha ra tsji ra para ngajni? Nahi, jeha jamé, ixin jaha ra tsjixin já ra ngain infierno.

¹⁶ Jesús xa ndaicho ngain chojni:

—Tti chojni que sitticaon tti rrondaicho jaha ra, cai sitticaon na na janha. Co tti chojni que sitticaonha tti rrondaicho ra, cai chojni mé sitticaonha na na janha. Co tti chojni que sitticaonha na janha, cai sitticaonha na tti rroanha na janha.

Are cjan tti setenta chojni

¹⁷ Cottimeja sacjoi tti setenta chojni co después cjan na anto contento, co ndaicho na:

—Hasta cain espíritu jianha vitticaon joinchehe tti ndačhjan na are nichja na conixin joachaxin nombrea soixin.

¹⁸ Jesús ndaicho ngain na:

—Ján, ixin janha vicon que xén vetsingaxin Satanás de ngajni inchin ná rayo.

¹⁹ Janha chjaha ra joachaxin para tsingachje ra conché conixin conttanchia, co para tsixinha ra ngain tti jianha, co xonhi tsonha ra.

²⁰ Pero tonoaha ra chjoin ixin espíritu jianha ditticaon co nchehe tti ndaicho ra, sino que ixin nombrea ra ojitaxin ngajni.

*Ndodaha conixin Xenhe Ndo**(Mt. 11.25-27; 13.16-17)*

²¹ Ngain rato mé, Jesús anto ché de ixin Espíritu Santo, co jehe ndačo:

—Janha rrinttacoanxinha soixin, que joinchechjian nontte co joinchechjian ngajni, ixin tti chojni que chonda confianza nganji soixin inchin nchinnchinchjan chonda confianza ngain ndodé, soixin cjoagohe chojni mé tti soixin coemehe tti chojni que anto nohe co tti chojni que anto ttinxin. Ján, Padre, jañá joinchehe soixin ixin jañá rinao.

²² 'Ndodana Ndo chjana joachaxin para tettonha cainxin cosa. Xonhi chojni nohe quensen tti Xenhe jehe Ndo, sino que jehe Ndo mismo nohe Ndo quensen mé. Co Xonhi chojni nohe quensen jehe Ndo, sino que jehe Xenhe Ndo, tti Xan nohe, conixin cain tti chojni que jehe Xan sino Xan sinchegatsoan Xan jehe Ndo.

²³ Cottimeja Jesús tsjehe ngain chojni que vacao co ndačo ngain jeho na:

—Anto čhjoin para ixin tti chojni que tedicon tti jaha ra tedicon ra jai,

²⁴ ixin tsje profeta co tsje rey joinao na rroguicon na jihí, tti jaha ra tedicon ra, pero jehe na viconha na. Co jehe na joinao na rroquinhí na tti jaha ra tttetinhí ra jai, pero coinha na.

Ejemplo ná chojni jian de ngain Samaria

²⁵ Cottimeja ná ximaestro le Israel cjoí xa joitsjehe xa Jesús jeho para joincheyehe xa Jesús, co joanchiangui xa ngain co ndačo xa:

—Maestro, ¿quehe sinttaha janha para rrochonda iná vida naroaxin?

²⁶ Jesús ndačo ngain xa:

—¿Quehe jítaxin ngain ley que vayé Moisés? ¿Quexén čho ley mé?

²⁷ Jehe ximaestro le mé ndačo xa:

—Ngain ley mé jindačo: “Rinao Dios conixin ngoi ansean, conixin ngain almá, conixin ngoi fuerzá, conixin ngoi joarrixaoan; co rinao cainxin nivecinoa inchin rinao cuerpoa jaha.”

²⁸ Cottimeja Jesús ndačo ngain xa:

—Nchao jí tti jaha ndačo. Si jaha sinchehe cain yá, ján rrochonda iná vida naroaxin.

²⁹ Pero ximaestro le mé joinao xa rroguittohe xa jian ngattoxon con Jesús de ixin tti ndačo xa, mexinxin joanchiangui xa ngain Jesús co ndačo xa:

—Pero, ¿quensen vecinona?

³⁰ Cottimeja ndačo Jesús ngain xa:

—Ná xí joixin xa de Jerusalén para sajittji xa ngain rajna Jericó, co ngatja nnttiha cayacoen xa canxion xichehe, co cain xichehe mé coehe xa jehe tti xí mé cainxin tomí co hasta lonttoe que jingá, co anto goen xa jehe tti xí mé, hasta merocoa narrogoenxon xa. Cottimeja savinttecji xa.

³¹ Co nchion después nnttiha vatto ná xidána judío, pero are jehe xa vicon xa que nnttiha tajtsinga tti xí mé, jehe xidána mé vatto ojé lado.

³² Cai nnttiha vatto ná chojni razé Leví, pero are jehe vicon tti xí que tajtsinga nnttiha, cai vatto ojé lado.

³³ Pero nchion después nnttiha vatto ná xí samaritano, co are jehe xa vicon xa tti xí judío que tajtsinga ngandehe nnttiha mé, jehe xa coiaconoehé xa.

³⁴ Cottimeja jehe xa conchiennehe xa ngaca tti xí mé, co joinchehoenhe xa cain tti diconihi ngain cuerpoe conixin aceite co vino, co coensia xa jian. Cottimeja jehe xa joinchetaha xa colohohe xa co sajoicao xa ngain ná nchia, co nnttiha jehe xa venda xa.

³⁵ Co ndoexin are jehe xí mé sacjoi xa, joantsje xa yó tomí que anto rentte co joanjo xa ngain tti nchiandoha mé, co ndačo xa ngain: “Darinda xí jihí, co si jaha sinchexinhí icha tomí ixin jehe xa, janha tsjengaha hna are rrocjan na.”

³⁶ Mexinxin ndachjenji na ¿quexehé de tti ní xí mé tti joinchehe inchin ná nivecinoe tti xí que nihí?

³⁷ Ximaestro le ndačo xa:

—Tti xí que coiaconoehé jehe tti nihí mé.

Cottimeja Jesús ndačo ngain xa:

—Janché, jaha cai ttji co nchehe jamé.

Are Jesús ngain nchiandoha Marta co María

³⁸ Jesús joinchehe sigue sacjoi, co joiji ngain ná rajna nchín, co nnttiha ná nchí que vinhi Marta joanjo ncha nchiandoha ncha tti vitttohe Jesús.

³⁹ Jehe Marta vechonda ná xanchó que vinhi María, co are mé, jehe María tavehe čhica rotté Jesús para que coinhi quehe ndačo Jesús.

⁴⁰ Pero Marta anto jidoan purado de jinchechjian comida, ixin jeho jinchehe xa, mexinxin conchiennehe co ndačo ngain Jesús:

—¿Aḡaxaonha que ixin xanchian ttinttona xan janho rrinttaha cain ḡa jiji? Ndache xan que tsjenguijna na xan.

⁴¹ Pero Jesús ndaḡo ngain Marta:

—Marta, Marta, jaha anto ḡaxaon de ixin cain cosa yá,

⁴² pero ji jeha nacoa cosa que anto importante. Co María ocoinchiehe tti cosa icha importante mé, co ḡonhi chojni santsjehe cosa mé.

11

Are Jesús cjoago queḡén sinchecoanxinhi ni Dios

(Mt. 6.9-15; 7.7-11)

¹ Ná nchanho Jesús jinchecoanxinhi Dios ngain ná lugar, co are joexin joinchecoanxinhi Dios, ná de tti chojni que vacao ndaḡo ngain:

—Nchecoanna ni ra sinttacoanxian na Dios, jañá inchin Juan, tti vancheguitte chojni, joinchecoenhe chojni que vacao.

² Jesús ndaḡo:

—Are sinchecoanxinhi ra Dios, ndaḡo ra:

Padre soixin que ttjen ngajni,
nombrea soixin jiquininxin tsosayehe.

Siquetonha nntihi soixin.

Co tsonhe inchin soixin rinao nntihi ngataha nontte, jañá inchin tonhe nntiha ngajni.

³ Chjana ra jai tti sine na que rrogondana na.

⁴ Nchetjañana ni ra tti jianha que jointtaha na, ixin janha na cai nttatjañá na tti chojni que nchehe jianha nganji na.

Nchegattoha ni ra tangui: tanchjandaha ni ra ngain tti jianha.

⁵ Cai ndaḡo Jesús ngain na:

—Tsín na ná ejemplo, que ná de jaha ra chonda ra ná xiamigoa ra, co ngosine ttie siji xa nchiandoi ra co rrondattjo ra xa: “Amigo, nchecjen na ní niottja,

⁶ ixin ná xiamigona nandá joixin xa viaje, co joiji xa nchiania co janha ḡonhi chonda que rrochjaha xa.”

⁷ Co si jaha ra rrondaḡo ra desde ngaxinhi nchiandoi ra: “Nchemolestaha na; ocoejá puerta co otarriḡhinquinha xanhna ngataha cama; ḡhoha singattjen para rrochjaha tti jaha rinao.”

⁸ Pero si xiamigoa ra mé sinchehe xa sigue rronichjaha ra xa jaha ra singattjen ra co rrochjehe ra xa tti jehe xa rinao xa pero ijeha ixin amigo ra, sino que jaha ra sanjo ra mé para que isincheha xa sigue sinttamolestá ra xa icha.

⁹ Mexinxin janha rrindattjo ra: Danchia ra co Dios rrochjá ra; ttjé ra co sinchí ra; dinga ra puerta, co puerta mé rroxiré puerta.

¹⁰ Ixin tti danchia, jehe dayé; co tti ttjé, jehe dittja; co tti dinga puerta, puerta xiré puerta para ixin jehe.

¹¹ ¿Apoco ḡhonja de jaha ra que ochonda ra xanha ra anchao rrochjehe ra xan ná ḡo are sanchiaha ra xan niottja? ¿O arrochjehe ra xan nntaohé conché are jehe xan sanchia ra xan nntaohé copescado?

¹² ¿O arrochjehe ra xan ná conttanchia are sanchiaha ra xan joja?

¹³ Mexinxin si jaha ra masqui chojni jianha ra pero noha ra danjo ra cosa jian ngain xanha ra, ¡mé Ndo! na que ttjen ngajni xijanjoha Ndo Espíritu Santo ngain tti chojni que sanchia ngain Ndo!

Are ndaḡo chojni ixin Jesús chonda joachaxín inchínji

(Mt. 12.22-30; Mr. 3.19-27)

¹⁴ Ná nchanho Jesús vengui ná espíritu jianha de ngaxinhi cuerpoe ná xí que ndadicot-tapo xa de ixin jehe espíritu mé; co are espíritu jianha ovaḡhjejin de ngaxinhi cuerpoe xa, jehe xa onchao nichja xa. Tsje chojni que te nntiha vinttegoan na admirado de ixin tti joinchehe Jesús.

¹⁵ Pero icanxin na ndaḡo na:

—Xí jiji dengui xa espíritu jianha de ixin joachaxín Satanás, tti cai dinhi Beelzebú, tti ttonha ngain cain espíritu jianha.

¹⁶ Co icanxin na para rrojincheyehe na Jesús, joanchiehe na que ixin jehe rrojinchehe ná milagro que ttixin de ngajni.

¹⁷ Pero jehe ovenohe quehe teḡaxaon na, co jehe ndaḡo ngain na:

—Quexeho gobierno que chjéa para ttetocaho chó, gobierno mé toin ndattjexin, co si ná nindoha ngain ná nchia, si atto tteto na, cai toin ndachjequé na.

¹⁸ Jañá cai, si Satanás tseto jehó, ¿que xén tsonchjenhe joachaxin que jehe chonda? Jihi ndachjan janha, ixin jaha ra ndačo ra que janha dehngui espíritu jianha de ixin joachaxin Satanás.

¹⁹ Pero si janha jamé na, ¿quensen chjé chojnia ra joachaxin para dengui na espíritu jianha? Mexinxin jehó na tjago na que ndoaha tti te xaxaon ra.

²⁰ Pero janha dehngui espíritu jianha de ixin joachaxin Dios, co jihi rročo que tti ttetonha Dios ochian jói nganji ra.

²¹ Are ná xí tsanga jinda xa nchiandoha xa conixin tsje espada co lanza, are mé cain cosé xa que jichonda xa jí seguro.

²² Pero si tsí iná xí icha tsanga que jehe xa co tsixinha xa ngain xí mé, ndasantsjehe xa cain espadé xa co lanzé xa que chonda xa, cottimeja nchao sasicaó xa cosé xí mé que jichjan.

²³ Tti chojni que rinaoha na janha, chojni mé ningaonna janha; co tti chojni que ttenchjanha tti janha rrindačjan, chojni mé ttingo na palabrana inchin chojni que ttingo caxineno.

Tti espíritu jianha que cjan
(Mt. 12.43-45)

²⁴ Are ná espíritu jianha dačjexin de ngain cuerpoe ná chojni, espíritu jihi sattji ngain lugar xema dijé ná lugar tti jehe sinchejogaha. Co are idiraha lugar mé, jehe xaxaon: “Janha sarročjan na ngain nchiania tti vačjexin.”

²⁵ Are espíritu mé cjan, jehe dittja cuerpoe chojni mé inchin ná nchia que diganjo na čhjoin, co čhjoin diconchjan ngaxinhi nchia mé.

²⁶ Cottimeja espíritu jianha mé dirroé iyáto espíritu icha jianha que jehe espíritu mé, co cain espíritu mé sadixinhi ngaxinhi cuerpoe chojni mé para tadintte cai. Co después, chojni mé icha tangui tonhe que are saho.

Quensen tonhe čhjoin ngain vidé

²⁷ Are Jesús jindačo cain cosa jihi, ná nčí nttiha ngayé chojni ndačo ncha sén:

—¡Anto čhjoin para ixin tti nčí que jointtacončija co jointtagangui!

²⁸ Pero Jesús ndačo:

—¡Icha čhjoin para ixin tti chojni que ttinhi tti ndačo Dios co ditticaon na!

Are chojni jianha joanchia na ná milagro
(Mt. 12.38-42; Mr. 8.12)

²⁹ Chojni joinchehe na sigue xatte na ngandanji Jesús, co jehe coexinhi nichja co ndačo: —Cain chojni ngain tiempo jihi, jehe na jianha na co danchia na sicon na ná señal de milagro; pero xonhi icha señal sicon na que jehó tti señal que vattohe profeta Jonás.

³⁰ Ixin jañá inchin Jonás cjoí ná señal para ixin chojni que vintte ngain ciudad de Nínive, jamé janha cai, tti Xí que joixin de ngajni, janha ná señal para ixin chojni de ngain tiempo que te na jai.

³¹ Are chojni de tiempo jihi soenhe na juzgado, tti reina que joixin de ngain nontte Sabá icha sur singattjen co jehe reina mé rročo jie para ixin chojni jihi ixin jehe reina mé joixin anto cjin para joiquinhi tti venohe Salomón, co nttihi jí nganji ra ná tti icha importante que Salomón pero xonhi chojni nchehe caso.

³² Co chojni que vintte ngain ciudad de Nínive singattjen na ngain tti nchanho que Dios sinchejuzguehe cain chojni, para rročo na jie para ixin chojni de tiempo jihi ixin cain chojni de ngain Nínive coentoxinhi na vidé na are Jonás joindache na joajné Dios, co nttihi jí ná tti icha importante que Jonás pero xonhi chojni nchehe caso.

Jmacon ni, mé tti lamparé cuerpoe ni
(Mt. 5.15; 6.22-23)

³³ Xonhi chojni nchengasán ná lámpara para ttema lámpara ni para daquehe ngaxinhi ná cajón, sino que dehe lámpara noi para que cain chojni que dixinhi nchia dingasenhe na.

³⁴ Jmacon ni inchin ná lámpara para ngain cuerpoe ni. Mexinxin si jmacon jaha jian, cai ngoixin cuerpoa chonda joadingasán. Rročo si joadingasán que Dios rroanha jí ngain ansean, jaha chojni jian. Pero si jmacon jianha, cai ngoixin cuerpoa jí ngain tti naxin xehe.

³⁵ Ttjiho cuidado para que tti joadingasán que rrichonda rročjanha inchin tti naxin xehe.

³⁶ Ixin si ngoixin cuerpoa jichonda joadingasán, ni rioho de ngain cuerpoa jichondaha ni rioho tti naxin xehe; cain cosa jaha sicon jian xajeho inchin are ná lámpara jinttangasañaha conixin xoi.

Are Jesús joinchesattehe xifariseo co ximaestroey ley
(Mt. 23.1-36; Mr. 12.38-40; Lc. 20.45-47)

³⁷ Are Jesús joexin ndačo cain yá, ná xifariseo ndache xa Jesús ixin sinecaho xa ngain nchiandoha xa. Jesús cjoí nchiandoha xa co joixinhi vehe ngain mesa.

³⁸ Jehe xifariseo mé goan xa admirado ixin vicon xa que Jesús vehe joine co conttiha jinda tsje nttiha inchin costumbré icha chojni judío.

³⁹ Pero Jesús ndačo ngain xa:

—Jaha ra xifariseo ra inchin vaso co láto que chojni ncheroa de ngama, pero de ngaxinhi ansean ra tecao ra de cain cosa jianha ixin ttehe ra cosé chojni co nchehe ra icha cosa jianha.

⁴⁰ ¡Jaha ra tonto ra! ¿Anoaha ra que Dios tti joinchechjian ngama ra, cai joinchechjian ngaxinxin ra?

⁴¹ Are danjo ra tomi ngain chojni noa, cai danjo ra de ngain ansean ra, co jamé tsoroa almá ra.

⁴² ¡Anto tangui tsonha ra jaha ra xifariseo! Ixin jaha ra danjo ra ngain Dios tti ttexin parte de ca que dinhi menta, co de caruda, co de icha clase de ca, pero ncheha ra caso de tti jian que nchehe ra ngain vidá ra co rinaoha ra Dios. Co jiji tti chonda ra que sinchehe ra co cai nchehe ra sigue danjo ra tti ttexin parte de cain ca mé.

⁴³ ¡Anto tangui tsonha ra, jaha ra xifariseo! Jaha ra ntaḁoxinha ra dayehe ra nttaxintaon icha importante ngaxinhi nihngo, co ntaḁoxinha ra dayehe ra joajna conixin anto respeto are ngatja nttiha.

⁴⁴ ¡Anto tangui tsonha ra jaha ra ximaestroe ley co jaha ra xifariseo, ḁo ncheha ra inchin ndačo ra! Ixin jaha ra te ra ḁá sepultura que idiconha ni co chojni datto na ngataha nttiha pero noeha na ixin nttiha jixavá cosa dirrenga.

⁴⁵ Cottimeja ná ximaestroe ley, ndačo xa ngain Jesús:

—Maestro, are soixin ndačo yá, rrinichja feo de ixin janha na cai.

⁴⁶ Pero Jesús ndačo:

—¡Cai jaha ra anto tangui tsonha ra jaha ra ḁo maestroe ley! Ixin jaha ra tti ttetonhe ra icha chojni que sinchehe na para ixin Dios cosa anto tangui, co mé ná carga anto ye para ixin jehe na ixin ttixinha na nchehe na cain mé, co jaha ra ttjenguijnaha ra na para sinchehe na cain tti jaha ra ttetonha ra.

⁴⁷ ¡Anto tangui tsonha ra jaha ra! Ixin jaha ra nchechjian ra monumento anto ḁjoin ngataha tti teḁavá cuerpoe cain profeta que nindogoelitoa ra ḁanḁhjen nagoenxon na are saho.

⁴⁸ Conixin yá jaha ra tjago ra, que ntaḁoxinha ra tti joinchehe nindogoelitoa ra ḁanḁhjen, ixin jehe na vinttegoen na profeta are saho co jaha ra nchechjian ra ḁjoin ngataha tti teḁavá cuerpoe profeta.

⁴⁹ Mexinxin Dios ixin jehe anto jian nohe, mexinxin ndačo: “Rrorroanha ra profetana co representantena nganji ra, co jaha ra nasoenxon ra ḁhonja de jehe na co ittoha na feo sinchehe ra ngain na.”

⁵⁰ Mexinxin chojni de ngain tiempo jiji jehe na niteca vidé cain profeta que vintteguenhe desde are nontte conchjian hasta jai;

⁵¹ rročo desde are ndavenhe Abel hasta are joiguenhe Zacarías, tti goenxin na ngain lugar entre altar co lugar santísimo. Yá tti rrindattjoxin ra janha, que chojni de ngain tiempo jiji tti teca na cain yá.

⁵² ¡Anto tangui tsonha ra jaha ra, ḁo maestroe ley! Ixin jaha ra chonda ra tti ḁón que jitaxin cain tti ttetonha Dios. Pero jaha ra mismo rinaoha ra ttinxin ra, ni tanḁhchandaha ra icha chojni que rinao tsinxin ḁón mé.

⁵³ Are Jesús ndačo cain cosa jiji ngain xa, ximaestroe ley co xifariseo anto vinttegoñao xa ngain Jesús, cottimeja joanchianguihi xa Jesús anto tsje pregunta,

⁵⁴ para que rroguiconxin xa si jehe rrinichja ná cosa ndoaha, para que jehe xa nchao rrocjanguihi xa Jesús.

12

Jesús cjoagoe chojni ixin cainxin cosa, masqui jimao, pero tsononxin

¹ Ngain rato mé, ḁatte anto tsje miles de chojni nttiha que hasta conxinha chó na soji. Co Jesús coexinhi ndačo saho ngain tti chojni que vacao:

—Ttjiho ra cuidado de ixin levaduré xifariseo, rročo tti jeha ndoa que jehe xa ndačo xa.

² Ixin ḁonhi ná cosa que ttema chojni que tsononxinha, co ḁonhi ná cosa jimao que tsononxinha.

³ Mexinxin, cain tti jaha ra nichja ra are naxin xehe, tsononxin are osingasán; co cain tti jaha ra nichja ra jimao are puerté nchia tajjé, pero cai tsononxinin desde noi ngataha nchiandoi ra.

Quensen jiquinixin rroxagoen ni
(Mt. 10.28-31)

⁴ Nganji jaha ra, xiamigona ra, janha rrindattjo ra que chondaha ra que rroxagonhe ra tti chojni que natjayaxon ngain cuerpoe ni, ixin chojni mé choha nasoenxon almé ni.

⁵ Pero janha rroundattjo ra quensen tti chonda que rroxagonhe ra: xagonhe ra jehó Dios, ixin jehó jehe tti nchao nasoenxon cuerpoa ra co rrorroanha almá ra para ngain infierno. Ján seguro que xagonhe ra jehe Dios.

⁶ ¿Quejanhi rentte naho conttoachjan? Jehó yó tomichjan que anto rentteha. Pero Dios tjañeha ni ná de jehe va.

⁷ Ixin Dios, jehe nohe hasta quejanhi xajá ra chonda ra. Mexinxin jaha ra xaonha ra, ixin jaha ra icha rentte ra que tsje conttoachjan.

Tti chojni que ndačo ngattoxon con icha chojni ixin Jesús jian
(Mt. 10.32-33; 12.32; 10.19-20)

⁸ Janha rroundattjo ra que quexeho chojni que rroundačo nttihi ngataha nontte ixin amigoe na janha, cai jahna, tti Xí que joixin de ngajni, rroundachjan ngattoxon con cain ángel de Dios que ixin jehe na amigona na cai.

⁹ Pero tti chojni que rroundačo ngattoxon con icha chojni que ixin jehe chonxinha de ixin janha, cai janha rroundachjan ngattoxon con cain ángel de Dios que ixin chonxinha jehe mé.

¹⁰ Co quexeho chojni rronichja jianha de ixin janha, tti Xí que joixin de ngajni, nchao sitjañehe chojni mé; pero tti chojni que rronichja jianha de ixin Espíritu Santo, xonhi tiempo sitjañehe chojni mé.

¹¹ Are tsjiho ra na ngain nihngo, o ngain xijuez, o ngain icha xittetonha, taha ra joachjaon de ixin quexén rroundačo ra ngain xa de ixin tti joinchehe ra, co taha ra joachjaon de ixin quexén rronichja ra,

¹² Ixin are sinqué momento que jaha ra rronichja ra, Espíritu Santo tti sinttaxaxaon ra quehe rroundačo ra.

Tti rico que xaxaon cosa que xonhi xé

¹³ De ngayé cain chojni nttiha, ná chojni ndačo ngain Jesús:

—Maestro, ndache xanchian que rrochjana xan tti partena que jiquinixin na de herencia.

¹⁴ Pero Jesús ndačo:

—¿Quensen coín na janha de juez ngain cosa yá?

¹⁵ Cai ndačo Jesús:

—Tjiho ra cuidado que antoha sinao ra tomi, ixin vidé chojni tsixinha de ixin tti tsje tomi que rrochonda ni.

¹⁶ Cottimeja Jesús ndache na ejemplo jihi:

—Vehe ná xí rico, co ngoixin jnguihi xa anto goan noa.

¹⁷ Cottimeja tti rico mé vehe xaxaon: “¿Quexén sinttaha janha? Chondaha ttinó tsenchjianxin cain cosechana.”

¹⁸ Ngain rato mé jehe xaxaon: “Onona quexén sinttaha. Sinttaxantte granerona que chonda para sinttachjian iná granero icha jie, co nttiha tsenchjinha cainxin cosechana, co cainxin cosa que janha chonda.”

¹⁹ Cottimeja rroundattjan almana: Alma, jaha ochonda anto tsje cosa jichjian para anto tsje nano. Jai nchejogaha, jintte co dihi, co chaha.”

²⁰ Pero Dios ndačo ngain xí mé: “Jaha tonto. Ngain ttie jihi senhe jaha; co cain tti coenchjinha, ¿para ixin quensen?”

²¹ Jañá tonhe tti chojni que anto datse tomi co icha cosa que jehe dondehe, pero que xonhi chonda para ngain Dios.

Dios jinda cain xenhe
(Mt. 6.25-34)

²² Despues ndačo Jesús ngain chojni que vacao:

—Janha rroundattjo ra que taha ra joachjaon de ixin tti sintte ra para sinttechonxin ra, ni de ixin lontto que sinttetsí ra.

²³ Vidé ni icha rentte que tti jine ni, co cuerpoe ni icha rentte que lonttoe ni.

²⁴ Tsjehe ra conttaha, que co mé ni xonhi ttenga va, ni xonhi cosecha datsín va, ni chondaha va graneroe va, pero ixinha mé, Dios chjé va tti jine va. ¡Co para ixin Dios jaha ra icha rentte ra que conttoa!

²⁵ Co ¿Apoco ná de jaha ra, ixin anto ta ra joachjaon, anchao sahgui ra irioho metro icha de tti jininxin ra?

²⁶ Mexinxin si çhohe nchehe ra cosa tanguiha ¿quedonda ta ra joachjaon de ngain cosa tanguí?

²⁷ Xaxaon ra jian quexén dangui cain tsjo ngataon jngui, cain tsjo mé ncheha tsjo xa ni tajinha tsjo çhjon. Co janha rrondattjo ra que ni rey Salomón, que jehe anto çhjoin vaguitsá, pero xonhi tiempo vetsá inchin ná de jehe tsjo jiji.

²⁸ Si Dios jañá nchetsá cain ca que jecho jai jí ngataon jngui co ndoe ondarroche ca ngain xohi, ¡mé jaha ra xichjaha ra Dios cain tti rrogondaha ra, masqui jaha ra xa antoha jian ditticaon ra ngain Dios!

²⁹ Mexinxin, taha ra joachjaon de ixin quehe sintte ra ni de quehe sihi ra.

³⁰ Ixin chojni de ngain mundo jiji ta na joachjaon de ixin cain cosa yá; pero jaha ra chonda ra ná Ndodá ra ngajni, que jehe Ndo onoho Ndo que jaha ra rrogondaha ra cain cosa yá.

³¹ Pero cain tiempo ditticaon ra cain tti ttetonha Ndo, co jamé sayehe ra cain cosa jiji.

Cosa rentte que rrochonda na ngajni

(Mt. 6.19-21)

³² Xaonha ra jaha ra xo inchin colecona, ixin masqui tsjeha ra pero Ndodá na que ttjen ngajni, jehe Ndo rinao Ndo rrochjá ra Ndo tti jehe Ndo ttetonha Ndo ngajni.

³³ Nchecji ra cain cosa que chonda ra co ttjenguijna ra tti chojni que rrogondehe; jañá nchechjian ra bolsé tomi que xonhi tiempo sichje, rroçho que ngajni rrochonda ra cosa icha rentte co cosa mé xonhi tiempo tsjexin, ixin nntiha xichehe sijiha xa ni cochí sinchexantteha.

³⁴ Ixin ngain lugar tti jaha ra rrochonda ra cosá ra icha importante para ixin jaha ra, cai nntiha sehe ansean ra.

Chonda que sontte na listo

³⁵ Dintte ra listo, co ttjiho ra cuidado que lampará ra que sacaon cain tiempo.

³⁶ Dintte ra inchin ninchehe xa que techonhe na xinajni na tsixin xa de ngain tti cotehe. Ixin ninchehe xa mé dintte na listo para tsonxiré na puerfé nchia are singa xa puerta.

³⁷ Anto çhjoin para ixin tti ninchehe xa que are tsí xinajni na, jehe na tatetsjehe na; atto seguro tti janha rrindattjo ra, que mismo xinajni mé tsaoxin xa cinturoen xa jian co tsintte xa na ngain mesa. Co jehe xa tsequia xa comida que sine na.

³⁸ Masqui jehe xinajni mé tsí xa ngosine ttie o are ndoyo, co ninchehe xé xa tatetsjehe na, anto çhjoin para ixin ninchehe xa mé.

³⁹ Xaxaon ra cosa jiji, que si xinajni ná nchia rroconohe xa quehe hora rroquí xichehe are ttie, xinajni mé rrogejoaha xa para rrocançhchandaha xa xichehe rroguixinhi xa rroqué xa.

⁴⁰ Jaha ra cai dintte ra listo; ixin janha, tti Xí que joixin de ngajni, sihi iná are jaha ra ni rroçaxaonha ra ixin sihi.

Ná tti ninchehe xa jian, co ná tti ninchehe xa jianha

(Mt. 24.45-51)

⁴¹ Cottimeja Pedro joanchiangui ngain Jesús co ndaçho:

—¿Acoín ejemplo jiji para ixin janho na, ani para ixin cainxin chojni?

⁴² Jesús ndaçho:

—Xaxaon ra quensen tti nchehe xa que ditticaon jian co ttinxin jian tti jiquininxin sinchehe. Mé tti nchehe xa que xinajni rrochjé xa xa de rrochjé tti sine cain ninchehe xé xinajni mé.

⁴³ Anto çhjoin para ixin tti nchehe xa que are tsí xinajni, jehe jinchehe inchin vitonhe.

⁴⁴ Ndoa tti rrondattjo ra que xinajni mé rrondaçho xa ngain tti nchehe xa mé que jehe senda cain cosa que chonda xa.

⁴⁵ Pero si tti nchehe xa mé sinchesattehe xinchehe xé xinajni mé conixin nçhimozé xa, co sehe sine co sihi co rrocoan;

⁴⁶ cottimeja xinajni tsí xa ngain ná nchanho co ngain ná hora que ni jehe noeha, co sinchecastigá xa anto soji inchin tti castigo que sayé cain chojni que ditticaonha Dios.

⁴⁷ Tti nchehe xa que onoho quehe rinao xinajni, pero rinaoha nchehe mé co ncheha inchin tti ttetonha xa, tti nchehe xa mé anto soji sicaon.

⁴⁸ Pero tti nchehe xa que noeha quehe rinao xinajni, co nchehe cosa que jiquininxin castigo, nchehe xa mé icha sojiha sicaon. Tti chojni que dayé icha tsje, rroçanchiehe icha tsje, ixin jehe chonda icha responsabilidad.

Causexin Jesús chjeyaxin chojni
(Mt. 10.34-36)

⁴⁹ Janha joihi inchin ná xohi ngataha nontte para sinttaxante tti xonhi xé co sinttajian tti jian para ixin Dios. ¡Co janha rrojinaho que orrogacaon xohi mé!

⁵⁰ Chonda que atto tangui tsonna, co mé inchin janha siguittexin na ngain cosa tangui. Co janha anto feo tonona hasta tsoenja cain jihi.

⁵¹ Jaha ra puede xaxaon ra que ixin janha joihi para que chojni sicon chó na contento ngataha nontte jihi. Janha rrindattjo ra que nahi, ixin chojni toñahe chó na jai ixin joihi janha.

⁵² De jai pa ndaha naho chojni ngain ná nchia rrochjeya na de ixin causananxin janha; ní na sitticaon na na janha, co yó na sitticaonha na na; o yó na sitticaon na na janha, co ní na sitticaonha na na.

⁵³ Ixin de causananxin janha, ná ndodaha rroningaconhe ndo xenhe ndo, co ná chjan rroningaconhe xan ndodé xan. Ná jannaha rroningaconhe jan nchichjehe jan, co xannchí rroningaconhe xan janné xan. Ná jannchaha rroningaconhe jan nchideindehe jan, co nchideinda rroningaconhe ncha jannché ncha.

Quexén jí tiempo
(Mt. 16.1-4; Mr. 8.11-13)

⁵⁴ Cai ndacho Jesús ngain chojni:

—Are jaha ra dicon ra que ttjoi chinxin ttjoi tti diataonxin nchanho, jaha ra ndacho ra que ixin otsí chin, co jamé ndoa tonhe.

⁵⁵ Co are tjaxin chintto no sur, jaha ra ndacho ra que sania soa, co ndoa jamé tonhe.

⁵⁶ ¡Jaha ra ncheha ra tti ndacho ra! Jaha ra noha ra datsoenhe ra quehe tsonhe de ngajni co ngataha nontte, ¿co quedonda choha datsoan ra tti tsonhe ngain tiempo que te ra jai?

Tsjehe ra quexén nchehe ra para itsoñaoha ra ngain tti chojni que ningaoncha ra
(Mt. 5.25-26)

⁵⁷ ¿Quedonda ttinchieha ra jaha ra mismo cain cosa jian?

⁵⁸ Si ná chojni sícho jie para ixin jaha co tsjiho jaha ngain xijuez, icha jian de ngatjao nntiha tjao chó ra de ixin quexén tsonhe para que jehe itsjioha ngain xijuez. Ixin si nahi, xijuez rrondache xa xipolícía para tsiaxinha xa.

⁵⁹ Co janha rrindattjo que choha sachjexin de nntiha hasta que jaha tsengaja hna cainxin tomi que jaha rrica.

13

Chonda ra que tsentoxinhi ra vidá ra

¹ Ngain rato mé nntiha vintteconchienen canxion chojni ngain Jesús co coequín na ixin Pilato nagoenxon canxion xí de ngain regioen Galilea mero ngain rato que jehe xa tedoen xa coxigo para tedanjo xa ngain Dios. Co nntiha vinttji jni xí mé, tti vinttji jni coxigo.

² Co Jesús ndacho ngain tti chojni que tettequín mé:

—¿Aaxaon jaha ra que jamé vintteconhe xí tehe ixin icha jianha jehe xa que cain chojni ngain nacioen xa?

³ Janha rrindattjo ra que jeha jamé. Co si jaha ra tsentoxinha ra vidá ra, cain ra ndasitján almá ra.

⁴ ¿O ani xaxaon jaha ra que tti dieciocho chojni que ndavenhe are vetsingatja na tti torre de Siloé, ani nimé icha jianha na que cain chojni que vintte Jerusalén?

⁵ Janha rrindattjo ra que jeha jamé. Co si jaha ra tsentoxinha ra vidá ra, cainxin ra ndasitján almá ra.

Ejemploe tti nntahigo que danjoha ttochjoin

⁶ Cottimeja Jesús coín na ejemplo jihi:

—Ná xí vechonda xa ná nntahigo ngataon jnguihi xa co cjoí xa joitsjehe xa si vanjo nnta ttochjoin, pero xonhi ttochjoin vittja xa ngagaha nnta.

⁷ Cottimeja ndacho xa ngain tti xí que jinda jngui mé: “Tsjeixinxin, janha oní nano ttjiji dicje ttochjoin ngain nntá jihi, co ni ná nntiha dittjaha ttochjoin ngain nnta. Tonchinji nnta: ¿quedonda xa sehe nnta ngataha jnguihna co xonhi ttochjoin danjo nnta?”

⁸ Pero tti xí que jinda jngui mé ndacho: “Soixin, xa ttinttohe nnta iná nano jihi. Janha sinttandanguía nnta jinche co tsingonguía nnta abono.

⁹ Conixin jamé puede osanjo nnta ttochjoin, pero si nahi, cottimeja tonchinji nnta.”

Are Jesús joinchexingamehe ná nchí ngain tti nchanho que nchejogaha ni

¹⁰ Ná nntiha, ngain tti nchanho que nchejogaha ni, Jesús tajinchecoenhe chojni de ixin Dios ngain ná nihngo.

¹¹ Co nttiha vehe ná nčí que venihi ncha ovechonda dieciocho nano. Ná espíritu jianha ndadinchechatto ncha, co jehe ncha ichoha vaxendoa ncha.

¹² Co are Jesús vicon nčí jihi, jehe ndačo ngain ncha:

—Jaha oxingamaha de ixin tti chin que joarichonda.

¹³ Cottimeja jehe coín rá ngataha nčí mé, co ngain rato mé jehe ncha xendoa ncha co coexinhi ncha joincheoanxinhí ncha Dios.

¹⁴ Pero xittetonha ngain nihngo mé coñao xa ixin Jesús joinchexingamehe nčí mé mero ngain tti nchanho que nchejogaha ni. Mexinxin jehe xí mé ndačo xa ngain cain chojni que te nttiha:

—Semana chonda incjaon nchanho tti jiquinxin doan xa; ngain nchanho mé sihi ra para que tsoxoanha ra co nahi ngain nchanho que nchejogaha ni.

¹⁵ Cottimeja Jesús ndačo ngain xí mé:

—Jaha ra ncheha ra tti ndačo ra, ixin çhonja de jaha ra, çatonxindangueha ra coxinttaha ra o colochoha ra para ttijho ra va diguihi va jinda nchanho que nchejogaha ni?

¹⁶ Co nčí jihi que jehe ncha razé Abraham ncha, co Satanás diguia ncha conixin chin jihi ochonda dieciocho nano, çapoco janha chondaha que tsonxindangá ncha de ixin chin yá ngain nchanho que nchejogaha ni?

¹⁷ Are Jesús ndačo jihi, cainxin chojni que ningaconhe anto cosoé na; co icha chojni anto ché na are vauicon na milagro anto importante que Jesús vanchehe.

Ejemploe ná tsé que dinhi mostaza

(Mt. 13.31-32; Mr. 4.30-32)

¹⁸ Cottimeja ndačo Jesús:

—¿Quehe cosa nchao sinttacinxin tti ttetonha Dios?

¹⁹ Mé inchin tsehe ná ca que dinhi mostaza que tengá ná xí ngain jnguihi xa. Co ca mé dangui ca inchin ná nttá jie, que hasta conttoa que tjanganga nchechjan va caqué va ngagaha rama.

Ejemploe levadura

(Mt. 13.33)

²⁰ Cai ndačo Jesús:

—¿Quehe cosa nchao sinttacinxin tti ttetonha Dios?

²¹ Mé inchin levadura que ta ngain hariné niottja co nchehe xa hasta nchegátjoe nchoho.

Tti puerta jno

(Mt. 7.13-14, 21-23)

²² Are sacjan Jesús para Jerusalén, jehe joinchecoehne chojni de ixin Dios ngain rajna co ngain rajnanchjan que vatto.

²³ Co vehe ná chojni que joanchiangui ngain Jesús co ndačo:

—¿Ajeho nchion chojni tti rrochonda iná vida naroaxin?

Co Jesús ndačo:

²⁴ —Nchehe ra de que dixinxin ra ngain puerta jno, ixin rrindattjo ra que tsje chojni sinao na sixinxin na nttiha pero çhoha.

²⁵ Co are tti nchiandoha singattjen co tsejé puerta, cottimeja jaha ra ço sittoha ra ndoja, singa ra puerta co rrondačo ra: “Soixin, danttjena ni ra puerta.” Pero jehe rrondačo: “Janha nonaha quettinó joixin jaha ra.”

²⁶ Cottimeja jaha ra tsixinhi ra rrondačo ra: “Janha na tti joine na co vihi na nganji soixin, co soixin tti joinchecoanna ra de ixin Dios ngá nttiha de ngain rajnana na.”

²⁷ Pero jehe rrondačo nganji ra: “Janha otendattjo ra que nonaha tinó joixin ra. Sattjixin ra de nganji na, ço nchehe ra jianha.”

²⁸ Nttiha jaha ra rrotsjanga ra co sinttetaon neno ra are sicon ra que Abraham, Isaac, Jacob, conixin cain profeta tate na ngain tti ttetonha Dios, co jaha ra Dios tsanchjandaha ra para sintte ra nttiha.

²⁹ Ixin are mé tsixin chojni de cainxin parte de nontte; de ngain tti çinxin nchanho, co de ngain tti diataonxin nchanho, co de ngain norte co de ngain sur para sintte na sine na ngain mesa de ngain lugar que ttetonha Dios.

³⁰ Are mé tsje chojni que jai jaha importante na, pero are mé jehe na nisintte icha importante; co cain chojni que jai tonohe na ixin anto importante, are mé jehe na jaha importante na.

Jesús tsjanga por ixin Jerusalén

(Mt. 23.37-39)

³¹ Ngain nchanho mé vintteci canxion xifariseo co vinttendačo xa ngain Jesús:

—Sattjixin de nttihi, ixin rey Herodes rinao nasoexon soixin.

³² Pero Jesús ndacho ngain xa:

—Tji ra co ndache ra xí mañoso mé, que jai co ndoe sinttaha sigue senguixin espíritu jianha de ngaxinhi cuerpoe chojni, co sinttaxingamá chojni nihi, co rejngui otsjena xana.

³³ Pero janha chonda que sinttaha sigue ntiana jai co ndoe co rejngui, ixin cain profeta denxin de ngain Jerusalén.

³⁴ ¡Jaha ciudad de Jerusalén, jaha tti nadoenxon cain profeta co taxin xo tti chojni que ttiaho joajné Dios que jehe rroanha nganji! ¡Janha anto tsje ntitiha joinaho rrogatse chojnia inchin cochia datse va xenhe va ngangui nenehe va, pero jaha čhoha!

³⁵ Mexinxin tsjexin ra; nchiandoi ra ndasittohe nchia; co rrondattjo ra que irrocjanha ra sicon ni ra hasta que tsjija nchanho que are jaha ra rrondačo ra: “Anto jian tti joí de ngain nombré Dios.”

14

Are Jesús joinchexingamehe ná xí que veninxin chicjan

¹ Ná nchanho que nchejogaha ni, Jesús cjoí joijine ngain nchiandoha ná xittetonha ngain xifariseo, co are mé icha xifariseo tatetsayehe xa Jesús.

² Cai ngattoxon con Jesús tají ná xí que veninxin xa de chicjan.

³ Cottimeja Jesús joanchiangui ngain ximaestroe ley conixin ngain xifariseo:

—¿Ají joachaxin sinchexingamehe ni ná chojni nihi ngain nchanho que nchejogaha ni o ani nahí?

⁴ Pero jehe xa tavinttetencoa xa. Cottimeja Jesús catte tti nihi mé, joinchexingamehe co ndačo ngain ixin satsji jehe tti nihi mé.

⁵ Co ndačo Jesús ngain xifariseo:

—¿Quexehe de jaha ra, si ná colochoha ra o ná coxinttaha ra setsingá va ná pozo, asantsjeha ra va rato mé masqui nchanho que nchejogaha ni?

⁶ Co cain jehe xa čhoha ndačo xa ni ná palabra ngain Jesús.

Chojni que ttji tti tottehe na

⁷ Are vicon Jesús ixin cainxin chojni que cjoí ngain tti cottehe na puro ttinchieho na nttaxintaon icha importante ngain mesa, jehe ndache na janhi:

⁸ —Are ná chojni rrondattjo que tsji ngain ná quiai tti tsottehe na, dariha ngain lugar importante, ixin puede siji iná chojni icha importante que jaha.

⁹ Co tti ndattjo para cjoí jaha conixin jehe tti icha importante mé, nchao siji co rrondattjo jaha: “Danjo lugar que rrichonda ngain iná chojni jihi.” Cottimeja jaha chonda que satsjixin de ntitiha conixin joasoaxin para sigarihi ngain tti nttaxintaon icha importanteha.

¹⁰ Mexinxin, are ná chojni rrondattjo que jaha tsji ná quiai, jaha darihi tti lugar icha importanteha, para que are tsí tti ndattjo ixin jaha cjoí ngain quiai mé, jehe nchao rrondattjo: “Amigo, jaha datto ngain iná lugar icha importante.” Jamé jaha tsosayaha ngattoxon con cain chojni que te ngain mesa ntitiha.

¹¹ Ixin tti chojni que xaxaon ixin jehe anto importante, chojni mé tsonohe ixin jehe xonhi rentte; co tti chojni que xaxaon ixin jehe xonhi rentte, chojni mé icha tsorentte.

¹² Cai ndačo Jesús ngain tti xí que coetonhe Jesús para que Jesús cjoí ngain quiai mé:

—Jaha are tsín ná vandango ttetoenha jeha xiamígoa, ni jeoha xanchó, ni jeoha nipari-entea, ni jeoha nivecinoa que chonda tsje tomi, ixin cain chojni jihi nchao tsín na iná vandango na co tsetonha na jaha para que tsji sinttecho na co jamé jehe na otsoncjañaha na tti jehe na joine na ngain vandangoa.

¹³ Mexinxin are jaha tsín ná vandango, cai ttetonhe chojni noa, co tti chojni que čhoha ttingui, co tti chojni rrengo, co tti chojni chejo.

¹⁴ Co jamé Dios sinttanchaon jaha, ixin are rroxechon cain chojni que joinchehe jian, Dios tsjengaha hna jaha ixin jaha joanjo joine tti chojni que čhoha tsjengaha hna jaha.

Ejemploe tti sena que Dios sanjo ngajni

¹⁵ Are vinttequinhi na jihi ná de tti nite ngain mesa ndačo ngain Jesús:

—Anto čhjoin para ixin tti chojni que sine niottja ntitiha ngain lugar tti ttetonha Dios.

¹⁶ Cottimeja Jesús ndačo ngain chojni mé:

—Ná xí coín xa ná vandango anto jie, co coetonha xa para joiguitonhe anto tsje chojni para rrocji na rrojine na.

¹⁷ Co are ocainxin vehe listo, xí mé rroanha xa ná tti nchehe xé xa para joiquetonhe cain chojni mé ixin onchao jí cain cosa, onchao tsí na para sijine na.

¹⁸ Pero cain chojni mé coexinhi na ndačo na ixin čhoha tsji na. Tti saho ndačo: “Najoexincoa coehna ná nontte, co chonda que tsji sítsjá nontte mé; janha nttatsanha ñao que nchetjañaha na ixin tsjinha na.”

¹⁹ Iná ndaicho: “Janha ocoehna naho yunta de coxintá, co tsji para sicon si nchao tsaon va; mexinxin nttatsanha ñao nchetjañana na ixin tsjinha na.”

²⁰ Co iná ndaicho: “Janha najoexincoa cottena, co mexinxin ñoha tsjin na.”

²¹ Are tti nchehe ña mé cjan, ndaicho cain jiji ngain xinajni. Cottimeja jehe xinajni mé coñao xa co ndaicho xa ngain jehe tti nchehe ña mé: “Jaicoa ttji ngain cain nttiha yeye co ngain nttiha nchinchin de ngain ciudad jiji co sicohna nttihi chojni noa co tti ñoha ttingui, co tti rrengo, co tti chejo.”

²² Nchion después jehe tti nchehe ña mé ndaicho: “Ojointaha inchin soixin coetonna, co ján ña jí icha lugar.”

²³ Jehe xinajni mé ndaicho xa ngain tti nchehe ñe xa: “Ttji ngá nttiha yeye co ngain nttiha nchinchin de ngandehe ciudad jiji co ndache icha chojni que tsí na, para que rrocaon nchiana.

²⁴ Ixin janha rinaoha sixinhi ni ná de tti chojni que janha coetoan rroquí icha saho para rrojine na.”

Tti tangui que tonhe ni are ditticaon ni Jesucristo

²⁵ Anto tsje chojni rroé na Jesús; co jehe ngaria co ndaicho ngain na:

²⁶ —Si ñhonia ra rinao ra sitticaon ni ra janha para cainxin tiempo, chonda ra que icha sinao ni ra janha que ndodá ra, o janná ra, o ñhiha ra, o xanha ra, o xanchó ra, co cai hasta icha que vidá ra. Tti chojni que sincheha jamé ñoha sehe chojnina.

²⁷ Jañá tti chojni que sanjoha vidé de ixin causananxin janha, chojni mé ñoha sehe chojnina.

²⁸ Si ñhonia de jaha ra sinao ra sinchehjian ra ná nchia anto noi, ¿apoco jeha saho rroñaxaon ra quejanhi tomi tsonchjianxin nchia mé, para que tsonoha ra achonda ra cain tomi para tsjexinxin tsonchjian nchia mé?

²⁹ Ixin si nahi, puede jeha coín ra base co ndajoexin tomia ra co ijoexinha joinchehjian ra nchia mé. Cottimeja cain chojni que sicon tsexinhi na tsjanoa ra na jaha ra,

³⁰ co jehe ni mé rrondaicho: “Xí jiha coexinxin xa joinchehjian xa nchia co joeha xa.”

³¹ O si ñhonia rey chonda que rroñanguí guerra ngain iná rey, ¿apoco jeha saho rroñaxaon si nchao conixin tte mil soldado rrochoenxin tti iná rey que tsiaho veinte mil soldado?

³² Co si rey mé tsonohe que tsixinha, jehe rrorroanha canxion chojni para que sicao na joajna ngain tti iná rey are jehe jói ña icjion para que itsetoha.

³³ Jañá, cai si ñhonia de jaha ra tsinttoeha ra cain tti chonda ra, ñoha sintte ra chojnina.

Are xijntta ndarroccjan simple

(Mt. 5.13; Mr. 9.50)

³⁴ Xijntta jehe jian, pero si ndarroccjan simple, ¿queñén rrocjan sonda iná?

³⁵ Mé iñonhi ñe ni para jinche ni para ngain montoe abono, sino que mé dingo jañao. Jaha ra xo tinxin ra, ttinhi ra jian.

15

Ejemplo tti coleco que diguitján

(Mt. 18.10-14)

¹ Cain xicobrador de impuesto co xí que nchehe cosa jianha vintteconchienne xa ngaca Jesús para vinttequinhi xa tti jindaicho Jesús,

² co mexinxin xifariseo co ximaestroey ley feo nichja xa de ixin Jesús, co ndaicho xa:

—Xí jiji nchehe xa caso cain chojni que ncheha jian co jinecaho xa na.

³ Cottimeja Jesús coinhi xa ejemplo jiji:

⁴ —¿Quehehe de jaha ra, si chonda ra cien coleco, co sinchetján ra ná va, atsinttoeha ra tti noventa y nueve va ngataon jngui co tsji ra sicjé ra tti co ndavitján, hasta que sinchija ra va?

⁵ Co are dinchí ra va, jaha ra chaha ra co tame ra va ngataha nttachán ra

⁶ co are daso ra nchiandoi ra, datse ra xiamigoa ra co nivecinoa ra co ndache ra na: “Jai sontte na contento ixin ovittja tti coleco que jointtatján.”

⁷ Janha rrindattjo ra, que ñajeha jañá ngajni cai, Dios conixin cain ángel icha ché ngain ná chojni que jinchehe jianha are jehe ttentoxinhi vidé, que ngain tti noventa y nueve chojni jian que chojni mé rrondeha na tsentoxinhi na vidé na.

Ejemplo tti tomi que ditján

⁸ Co cai iná ejemplo. Ná nñhi chonda tte tomi de plata co joinchetján ñha ná tomi mé. ¿Quehe nchehe ñha? Jehe ñha nchegacaon ñha ná lámpara para ttjexin ñha tomi mé ngoixin ngaxinhi nchia co danjo ñha ngoixin ngaxinhi nchia hasta que dittja ñha tomi mé.

⁹ Co are dittja ncha tomi mé, jehe ncha dirroé ncha cain nchiamigué ncha conixin cain nchiveciné ncha co ndacho ncha ngain cain nchí mé: “Janché sontte na contento ixin janha ovittja tti tomi que jointttaján.”

¹⁰ Janha rrindattjo ra que xajeho jamé ngajni cai ixin ché cain ángel de Dios are ná chojni que jinchehe jianha ttetonxinhi vidé.

Ejemploe tti ná chjan que sacjoixin de ngain nindoha

¹¹ Jesús ndacho cai:

—Ná xí vechonda xa yó xenhe xa xanxí,

¹² co tti xan icha nchín ndacho xan ngain ndodé xan: “Padre, chjana tti herencia que jiquininxin na janha.” Cottimeja jehe ndo conchjejehe ndo cayoi chjan mé herencié xan.

¹³ Tsjeha nchanho después, jehe tti xan icha nchín mé joinchecji xan tti nontte que vittoehe xan. Cottimeja conixin tomi mé sacjoixin xan cjin ngain iná nación; nttiha joinchexinxin xan cain tomi xan de ngain nchí co de ngain icha cosa jianha.

¹⁴ Co are ondajoehe xan cain tomi mé, anto ndacochjonga tti joine na ngain nación mé, co jehe xan anto vaguenhe xan jintta.

¹⁵ Cottimeja sajoiganchia xan xa ngain ná xinajni de ngain nación mé, co xinajni mé joanjo xa xa. Coetonhe xa jehe xan sajoiquingaria xan cocochi ngataon jnguihi xa.

¹⁶ Co jehe xan anto vaguenhe xan jintta, hasta que jehe xan joinao xan rrojine xan ná tipo de raja que dinhi algarroba que vajine cocochi, pero xonhi chojni vachjé xan cosa mé.

¹⁷ Cottimeja xaxaon xan co ndacho xan: “¡Anto tsje ninchehe xa chonda ndodana! ¡Co jehe na chonda na tti jine na hasta xehe, co nttihi janha ndasenxin na jintta!

¹⁸ Icha jian janha sarrocjan na tti jí ndodana co rrondattjan ndo: Padre, janha jianha jointtaha ngain Dios co nganji soixin.

¹⁹ Janha ijiquininxinha na sinhi na xanha soixin; jeh dayehna na inchin ná de ninchehe xá.”

²⁰ Co jamé joinchehe xan; coá xan nttiha para sacjan xan ngain nchiandoha ndodé xan.

Xa icjion joihi xan vicon ndodé xan que jitonchienhe xan, jehe ndo coiaconoehé ndo xan. Co coinga ndo cjoí ndo vichoexin ndo xan ngatja nttiha co cjóa ndo xan co coetoxin ndo xan.

²¹ Cottimeja jehe xan ndacho xan ngain ndodé xan: “Padre, janha jianha jointtaha ngain Dios co nganji soixin; janha ijiquininxinha na sinhi na xanha soixin.”

²² Pero jehe ndodé xan ndacho ndo ngain ninchehe xé ndo: “Jaca sicohna ra tti lonto icha jian co ttentoxinna ra xanhna jiji; co cai ttengaha ra ná cochianingo dedoe xan, co nchecjanga ra xan jian tteroa.

²³ Sícó ra tti coxinttachjan que jointtanttao co doehne ra va. ¡Sontte na co sontte na contento!

²⁴ Ixin xanhna jiji ondavenhe xan de ngattoxon con na, co jai cjan xechon xan. Ondavitján xan co xa cjan na jonttó na xan.” Co coexinhi na joinchechjian na comida para joine na.

²⁵ Co are mé tti xansaho ngataon jngui jí xan. Co are ocjan xan co joí xan chiaon nchia, coinhi xan són co coinhi xan ixin tette na.

²⁶ Cottimeja vayé xan ná de tti ninchehe xa que te nttiha para joanchianguihi xan quehe jí nttiha.

²⁷ Jehe tti nchehe xa mé ndacho: “Joí xanchó, co ndodá coetonha ndo venhe tti coxinttachjan que cjonttao ixin joí xanchó co xonhi tti nihi xan.”

²⁸ Pero tti xansaho mé coñao xan, co ixin choha xan vixinhi xan nchia, jehe ndodé xan chonda ndo que vachje ndo para joinchetsenhe ndo ñao xan ixin rroguixinhi xan nchia.

²⁹ Co jehe xan ndacho xan ngain ndodé xan: “Soixin noha quejanhi nano janha rrinttaha xa nganji, co cainxin tiempo janha vitticanho cain tti ttetonna na, pero soixin xonhi tiempo chjaha ni ná cochivatochjan para rrogonhe rrojinequinha xiamigona.

³⁰ Pero jai joí xanha jiji, que joinchexincoa xan tomia de ngain nchí que nchecji cuerpoe, co jai soixin gonhe para ixin jehe xan tti coxinttachjan jitjonttao.”

³¹ Cottimeja ndodaha mé ndacho ndo ngain xan: “Hijo, jaha cainxin tiempo rrihi nganji na, co cainxin cosa que chonda janha, mé cosá jaha.

³² Pero jai atto jiquininxin tsín ná vandango co sontte na contento, ixin xanchó que inchin ondavenhe xan, pero para ixin ján na jai cjan xechon xan. Co jehe xan ondavitján xan, pero para ixin ján na jai jonttó na xan.”

16

Ejemploe ná xivaquetonha ngain ná rancho

¹ Jesús ndacho cai ngain tti chojni que vacao:

—Vehe ná xí rico que vechonda xa ná xivaquetonha ngain ranchoe xa pero cjoí na joindache na xinajni mé que ixin xinchehe xa mé jinchexincoa xa tomí xinajni.

² Cottimeja xinajni mé vayé xa jehe tti nchehe xa mé co ndache xa: “¿Aco ndoa tti joindachjenji na chojni de ixin jaha que ixin rritena na? Ndachjenji na quexén jí cuenta co quejanhi xa jaha joexin, ixin jaha isincheha sigue tsetonha ngain xana.”

³ Cottimeja tti vaquetonha mé xaxaon: “¿Quexén sinttaha jai ixin xinajnina irrochjanaha xa xa sinttaha? Janha itsangaha na para sinttaha xa ngataon jngui, co chjana joasoaxin para sanchiagaha.

⁴ Onona quexén sinttaha para rrochonda amigo tti sayehna ngain nchiandoha are janha ixonhi xa rrochonda.”

⁵ Cottimeja tti vaquetonha mé vayé cada chojni que teca ngain xinajni. Ngain tti saho joanchianguihi: “¿Jaha, quejanhi rrica ngain xinajnina?”

⁶ Co jehe ndaço: “Janha rrica ngain xa cien barril de aceite de oliva.” Jehe tti vaquetonha mé ndaço: “Ntíhi jí nota tti jitaxin. Ttinchje co jaca nchechjian iná nota jehó de cincuenta barril.”

⁷ Después, jehe tti vaquetonha mé joanchiangui ngain iná de tti jica ngain xinajni mé: “Co jaha, ¿quejanhi rrica ngain xinajnina?” Co jehe ndaço: “Cien medida de trigo.” Cottimeja jehe tti vaquetonha mé ndaço: “Ntíhi jí nota tti jitaxin. Jaha ttinchje co jaca nchechjian iná nota que setaxin jehó ochenta medida.”

⁸ Co jehe xinajni mé joatsoan xa que jehe tti vaquetonha ngain xé xa mé atto listo vehe para xaxaon quexén joinchehe. Ixin chojni que ditticaonha ngain Dios icha daca para nchehe na cosa jianha, co chojni que ditticaon ngain Dios icha yao para nchehe na cosa jian.

⁹ Janha rritetonha ra, que ttjenguijna ra icha chojni conixin tomia ra para que chojni mé sinte amigó ra. Co are ondatsjexin tomia ra ntíhi ngataha nontte sehe quensen sayaha ra ntíhi ngajni.

¹⁰ Tti chojni que dicao cuidado are tsjeha chonda, cai sicaó cuidado are rrochonda tsje; co tti chojni que dicaoha cuidado are tsjeha chonda, cai sicaoha cuidado are rrochonda tsje.

¹¹ Mexinxin si jaha ra ttjioha ra cuidado ngain tti tomí que jaha ra chonda ra ngataha nontte jianha jíhi, ¿quensen rrochonda confianza nganji ra para sayehe ra tti icha rentte que jí ngajni?

¹² Si jaha ra ttjioha ra cuidado ngain cosé iná chojni, Dios rrochjaha ra cosa que jíquininxin ra.

¹³ Xonhi ninchehe xa nchao sinchehe xé yó xinajni ngain nacoa tiempo, ixin icha sinoa ná xinajni co rroningaconhe iná xinajni, o icha sitticaon ngain ná xinajni co ngain iná xa isincheha caso. Jañá cai çhóha sinoa ní tomí co sinoa ní Dios ngain nacoa tiempo.

¹⁴ Xifariseo anto vaquiaconhe xa tomí, co jehe xa tatetinhí xa cain jíhi, co cjoanoa xa Jesús.

¹⁵ Cottimeja Jesús ndaço ngain xa:

—Jaha ra para ngattoxon con chojni nchehe ra que ixin atto jian ra, pero Dios chonxin ngain ansean ra. Ixin tti tonóhe chojni que anto importante cosa que jehe chonda, Dios ncheha caso ngain cosa mé.

Ley que vayé Moisés co tti ttetonha Dios

¹⁶ Hasta ngain tiempo que Juan, tti vancheguite chojni, joindache chojni de ixin Dios, ley que vayé Moisés conixin cain tti dindaço cain profeté Dios vechonda joachaxin para vaquetonhe chojni. Desde ngain tiempo mé para ndahi nchenohe na chojni tti jian joajna de ixin quexén ttetonha Dios ngain ansén chojni. Co tsje chojni anto rinao na rrochonda na parte ngain tti ttetonha Dios.

¹⁷ Pero masqui jamé icha tanguíha sitján ngajni co nontte, que tsoenha inchin jitaxin cainxin ngain ley mé.

Jesús ndaço de ixin xí que dachjendehe chihi

(Mt. 19.1-12; Mr. 10.1-12)

¹⁸ Si ná xí sachjendehe xa nchíchihi xa co secoa xa iná nchí, xí mé jianha sinchehe xa ixin xí mé inchin xí que jicao ná nchí que jeha nchíchihi xa. Co tti xí que después decao ná nchí que digachjendehe ncha xixíhi ncha, xí mé cai jianha nchehe xa ixin jehe inchin xí que joantsjehe iná xí nchíchihi xa.

Tti xí rico conixin Lázaro

¹⁹ Vehe ná xí rico que vaguengá xa joxon lontto rentte, co cain nchanho vaquín xa jie vandango.

²⁰ Cai vehe ná xí noa que vinhi Lázaro que vechonda xa anto tton ngain cuerpoe xa co tavaguehe xa ngandangú nchiandoha jehe xirrico mé,

²¹ ixin jehe xinoa jiji joinao xa rrojine xa tti vaxexin vane jehe xirrico mé. Co hasta conia vaonchienhe para vagoni va tton que vechonda xa ngain cuerpoe xa.

²² Ná nchanho tti xinoa mé ndavenhe co ángel de Dios sajoicao para joiguehe ngain tti jí Abraham ngain tti lugar tti ttji cain chojni jian. Cai tti rico mé ndavenhe co cjoavá na.

²³ Co are tti rico mé vetan tangui ngain infierno, jehe tsjehe para noi, co de cjin viconxin Abraham conixin Lázaro.

²⁴ Cottimeja jehe tti rico mé coyao co ndačo: “Padre Abraham, nttatsanha ñao ttiaconoana na janha, co rroanha Lázaro para que sinchetjao masqui jehó con dedoe conixin jinda, co tsí sinchetjao neje na janha, ixin anto tangui tonna ngatte xohi jiji.”

²⁵ Pero Abraham ndačo ngain tti rico mé: “Hijo, xaxaon que jaha anto jian joarihi ngoi tiempo que jaha joarichon ngataha nontte, co Lázaro anto tangui conhe are jehe vechon nttiha. Jai jehe dayé consuelo nttihi co jaha rridetan tangui jaxon.

²⁶ Co cai jí ná saga anto nihnga ngayá na janha na co jaha ra. Mexinxin tti chojni que te nttihi que rinao siji para tti te ra, čhoha siji; co tti chojni que te yá čhoha tsí na nttihi tti te janha na.”

²⁷ Cottimeja ndačo tti rico mé: “Mexinxin padre Abraham, nttatsanha ñao que rroanha Lázaro para ngain nchiandoha ndodana

²⁸ tti te naho xanchian xanxí, para que sinchenohe xan quexén sinchehe xan para que jamé jehe xan tsiha xan nttihi ngain lugar jiji tti detan ni tangui.”

²⁹ Pero Abraham ndačo ngain tti rico mé: “Xanchó chonda xan tti xón tti jitaxin tti dicjin Moisés co tti dicjin cain profeta. Si jehe xan sinchehe xan caso tti ndačo xón mé, jehe xan sijiha xa yá tti rrihi jaha.”

³⁰ Jehe tti rico mé ndačo: “Ján, padre Abraham, pero si ná chojni que ondavenhe co rrocjan tsji siquetonhe xan, ján jehe xan tsentoxinhi xan vidé xan.”

³¹ Pero Abraham ndačo ngain: “Si rinaoha xan sinchehe xan caso tti diquetonha Moisés, co tti dindačo cain profeta, cai sitticaonha xan are sicon xan ná tti ondavenhe rroxechon iná.”

17

*Tti sinchenchehe ni cosa jianha
(Mt. 18.6-7, 21-22; Mr. 9.42)*

¹ Jesús ndačo ngain tti chojni que vacao:

—Ngataha nontte jiji cain tiempo sehe cosa que sinchenchehe chojni tti jianha, pero anto tangui tsonhe tti chojni que sinchehe iná chojni para sinchehe jamé!

² Icha jian si chojni mé rroguetianito ná xóchin ttosin co rroguetsingangui ndachaon, que sinchecanttjen chojni tehe ngain cosa jianha.

³ Ttjiho ra cuidado jaha ra.

’Si ná chojni que ditticaon nganji na janha sinchehe jianha nganji jaha, nchesattehe; co si tsentoxinhi vidé, nchetjañehe.

⁴ Masqui chojni mé yáto nttiha sinchehe jianha nganji jaha ngain nacoa nchanho, co yáto nttiha tsí sindattjo: “Irrocjanha na sinttaha jamé”, jaha chonda que sinchetjañehe.

Tti joachaxin que chonda chojni que ditticaon Dios

⁵ Co cain representanté Jesucristo ndačo na ngain Jesús:

—Tjenguijna ni ra para que sitticanho na icha nganji.

⁶ Cottimeja Jesús ndačo ngain na:

—Si tti ditticaon ra jixin rroguehe inchin ná tsehe ca dinhi mostaza, jaha ra nchao rrondache ra nttasicómoro jiha: “Jaha dačhenguixin de yá, co sadixenga ngangui ndachaon”, co nttá yá rrojincehe nttá jamé.

Tti jiquininxin nchehe ná tti nchehe xa

⁷ ’Si ná de jaha ra chonda ra ná tti nchehe xa co ttixin de ngataon jngui después de joigüea yunta o joiquingaria coleco ngoixin nchanho, çapoco ndache ra: “xacoí darihi jintte”?

⁸ Nahi, jaha ra ndačhoha ra jamé, sino que ndache ra tti nchehe xa mé: “Nchechjianna tti sine, co darihi listo sicohna cain tti sinaho are janha rrine co rridihi. Cottimeja jaha nchao sintte co sihi.”

⁹ ¿Co apoco jaha ra ndačo ra ngain tti nchehe xa mé: “Dio rrotsjengaha hna”? Nahi, ixin jehe jehó joiñchehe tti jaha coetonhe jehe.

¹⁰ Jamé jaha ra cai, are tsjexin sinchehe ra cain tti ttetonha Dios, chonda ra que rrondačo ra: “Ján na ninchehe xa que xonhi rentte, ixin jointtoho na jeho tti jiquinixin sonttoho na.”

Are Jesús joinchexingamehe tte chojni que vinttechonda lepra

¹¹ Are Jesús joinchehe sigue viajé para Jerusalén, jehe vatto ngain regioen Samaria co Galilea.

¹² Are joiji na chiaon ngain ná rajna, ngandehé rajna mé te tte xí que teninxin chin lepra co joichoexin xa Jesús ngatja nttiha pero xa icjin de jehe tavinttengattjen xa

¹³ co vinttendačo xa sén:

— ¡Jesús, Maestro, ttiaconoana ni ra janha na!

¹⁴ Are Jesús vicon cain xí mé jehe ndačo ngain xa:

— Sattji ra co dicjagohe ra xidána que ixonhi chin chonda ra.

Co are satettji xí mé, chínhi xa ndavitján chin.

¹⁵ Cottimeja ná de jehe xa are vicon xa que ixonhi chin jichonda xa, sacjan xa co coyao xa co joinchecoanxinhi xa Dios.

¹⁶ Co vettoxin nttajochjihi xa ngain Jesús, co visé xa hasta tti ngataha nontte, para que joanjo xa gracias ngain Jesús. Co xí mé Samaria nonttehe xa.

¹⁷ Cottimeja ndačo Jesús:

— ¿Apoco jeha tte xí que xingamehe xa de ixin chinhi xa? ¿Quettinó te tti icha xí?

¹⁸ ¿Ajeho xí jihi que joixin iná nontte tti cjan para joinchecoanxinhi Dios?

¹⁹ Cottimeja ndačo Jesús ngain xí mé:

— Dingattjen co sattji; jaha ondaxingamaha ixin vitticaonna.

Quehe tsonhe icha saho que tsí tti Xí que joixin de ngajni

(Mt. 24.23-28, 36-41)

²⁰ Cain xifariseo joanchiangui xa ngain Jesús ixin quesa tsí tti ttetonha Dios, co Jesús ndačo ngain xa:

— Are tsí tti ttetonha Dios, mé jeha cosa que nchao sicon ni.

²¹ čhoja rrondačo ni: “Nttihi jí”, o “Nojiha jí”, ixin tti ttetonha Dios ojí ngayaha ra.

²² Cottimeja ndačo ngain tti chojni que vacao:

— Tsí tiempo are jaha ra sinao ra que janha, tti Xí que joixin de ngajni, sarihi nganji ra masqui nacoa nchanho, pero janha ichoja sarihi nganji ra.

²³ Co masqui rrondattjo ra chojni que nttihi rrihi janha o nojiha rrihi, pero jaha ra dittaona ra tti jehe na rrondačo na, ni ttjiha ra tti jehe na rrondačo na.

²⁴ Ixin jañá inchin dicen ni xoi rayo de ná lado hasta iná lado de ngajni, jamé tsonhe ngain mero nchanho que janha, tti Xí que joixin de ngajni, sihi iná.

²⁵ Pero saho chonda que anto tangui tsonna co chojni de ngain tiempo jihi rrondačo na ixin janha xonhi rentte na.

²⁶ Inchin conhe ngain tiempo que vechon Noé, jamé tsonhe cai are janha, tti Xí que joixin de ngajni, sihi iná.

²⁷ Ngain tiempo que Noé vechon, xonhi chojni vitticaon ixin toin ndasitján mundo, mexinxin vanchehe na sigue vane na co vaguihi na co vacottehe na co vaganjo na xenhe na xannčí para vacottehe xan hasta ngain tti nchanho que Noé vixinhi arca co joí jinda para ndagoen cainxin chojni.

²⁸ Jamé conhe cai ngain tiempoe Lot. Are mé cain chojni vanchehe na sigue vajine na co vaguihi na, vaquehna na co vanhecji na, vanchehe na xa ngataon jngui co vanchechjian na nchia.

²⁹ Pero are Lot vačhjexin de ngain ciudad de Sodoma, vingoxin xohi co azufre de ngajni, co ndagoen cainxin chojni nttiha.

³⁰ Jamé sinchehe chojni sigue de rrožaxaonha na de ixin Dios are janha, tti Xí que joixin de ngajni, sihi iná.

³¹ Ngain nchanho mé si čhonja chojni sintte ngataha nchia noi, co chonda cosé ngaxinhi nchia mé, ni rrochjeha tiempo para sania sicá cosé. Co si čhonja chojni sintte ngataon jngui, rrochjeha na tiempo para rrocjan na nchiandoha na.

³² Xaxaon ra quehe conhe čihi Lot.

³³ Tti chojni que rinao xonhi tsonhe vidé, mé ndasinchetján vidé, pero tti chojni que sinchetján vidé, mé rrochonda iná vida nara.

³⁴ Janha rrindattjo ra, que ngain tte mé, si yó chojni tejoa ngataha nacoa saon, ná rrochonda iná vida naraoxin co ná nahi.

³⁵ Co ngain rato mé, si yó nčí tedaho nča, ná nča sayá nča co iná nča nahi.

³⁶ Co si yó xí tenchehe xa xa ngataon jngui, ná xa ján sayá xa co iná xa nahi.

³⁷ Are chojni coinhi jihi, joanchiangui na ngain Jesús co ndačo na:

—¿Quettinó tsoenxin cain jihí?
 Co Jesús ndaicho:
 —Tti sarihi janha, nttiha rroñatte chojnina.

18

Ejemplo tti ná nchiganha co ná xijuez jianha

¹ Jesús ndache tti chojni que vacao ná ejemplo para joinchecoehne na ixin chonda na que sinchetsenhe na ñao Dios cain tiempo co chondaha na que soan na desanimado.

² Jehé ndaicho ngain na:

—Ngain ná rajna vehe ná xijuez que vechondaha xa respeto ngain Dios, ni ndosenha xa de icha chojni.

³ Ngain rajna mé vehe ná nchiganha cai que vacji ncha ngain xijuez jihí para vaganchia ncha jie para ixin tti chojni que vaquetocaho ncha.

⁴ Anto sé co xijuez jihí čhoħa xa joinchehe xa jie ngain nchí mé, pero después řaxaon xa: “Masqui janha chondaha respeto ngain Dios ni ndosennaha de icha chojni,

⁵ pero ixin nchiganha jihí nchehe ncha sigue nchemolestá na ncha, janha tsjenguijna ncha para que isincheha ncha sigue tsi ncha co ndatsjehe ncha pacienciana.”

⁶ Co Jesús ndaicho:

—Jihí tti ndaicho xijuez jianha.

⁷ Co řapoco Dios tsjenguijnaha cain tti chojni que jehe coinciehe que nchetsenhe na ñao jehe de nchanho co de ttie? řApoco jehe tsončhenhe para tsjenguijna na?

⁸ Janha rrindattjo ra ixin jehe tsončhenhe de tsjenguijna cain chojni mé. Pero are janha, tti Xi que joixin de ngajni, sihi iná, řaħa sittja chojni que ditticaon na janha nttihi ngataha nontte?

Ejemplo xifariseo co xicobrador de impuesto

⁹ Jesús ndaicho iná ejemplo para ixin tti chojni que tonohe ixin jehó tti anto jian, co řaxaon na ixin icha chojni řonhi rentte. Jesús ndaicho:

¹⁰ —Yó xí cjoí xa ngain nihngo icha importante para joinchecoanxinhi xa Dios. Ná xa fariseo xa, co iná xa cobrador de impuesto xa.

¹¹ Xifariseo mé tavengattjen xa joinchecoanxinhi xa Dios, co ndaicho xa janhi: “Oh Dios, janha chjaha gracias ixin janha jeha inchin canxion chojni que jehe na chehe na, co nchehe na icha cosa jianha, co chonda na tsje nchí, co janha ni jeha inchin xicobrador de impuesto jihí.

¹² Janha tocjáño na yó nttiha ngain semana, co janha danjo para ixin soixin ná tti ttexin parte de cain tti janha dacha.”

¹³ Pero xicobrador de impuesto vittohe xa cjinxin, co jehe xa ninchin tsinha con xa para rrotsjehe xa ngajni, sino que řanguí xa tton pechoe xa co ndaicho xa: “¡Oh Dios, nttatsanha ñao ttiaconoana na ixin janha anto jianha jointtaha!”

¹⁴ Cottimeja Jesús ndaicho:

—Janha rrindattjo ra que are xicobrador de impuesto jihí sacjan xa nchiandoha xa, Dios ojoinetjañehe xa cain tti jianha que jehe xa joinchehe xa, pero xifariseo nahi. Ixin tti chojni que tonohe que jehó tti icha jian, pero ngain tti nchanho que Dios sinchejuzguehe cain chojni, chojni mé řonhi rentte na, co tti chojni que jai tonohe que jehe řonhi rentte, are mé Dios sinchesayehe chojni mé.

Jesús joinchenchaon xannchinnchinchjan

(Mt. 19.13-15; Mr. 10.13-16)

¹⁵ Cai tsje chojni vaquiaho na xannchinnchinchjenhe na ngain Jesús para que vacatte xan, pero are tti chojni que vacao Jesús vicon na jihí, coexinhi na joinchesattehe na tti chojni que vaquiaho xannchinnchinchjan mé.

¹⁶ Pero Jesús ndache xannchinnchinchjan mé ixin icha tsonchienhe xan ngain co Jesús ndaicho ngain chojni que vacao:

—Tanchjanda ra que xannchinnchinchjan tsí xan nganji na janha, co cayacoehna ra xan ixin tti tteonha Dios, mé para ixin tti chojni inchin jehe xannchinnchinchjan.

¹⁷ Atto ndoa tti rrindattjo ra que tti chojni que sitticaonha tti tteonha Dios inchin ná xannchinchjan ditticaon xan tti tteonhe xan nindoha xan, chojni mé řonhi tiempo rrochonda parte ngain tti tteonha Dios.

Ná xí rico cjoao xa Jesús

(Mt. 19.16-30; Mr. 10.17-31)

¹⁸ Ná xí importante para ngain chojni judío joanchiangui xa ngain Jesús co ndaicho xa:

—Maestro, soixin que anto jian, ¿quehe icha sinttaha janha para rrochonda iná vida naroaxin que ñonhi tiempo tsjexin?

¹⁹ Jesús ndaño ngain xa:

—¿Quedonda ndaño jaha que janha jian na? ñonhi iná tti jian, jeha nacoaxinxon, co mé Dios.

²⁰ Jaha onoha cain mandamiento de Dios que ndaño: “Ncheyeha çhihi iná chojni, dantsjeha vidé iná chojni, tteha cosé iná chojni, nichjaha cosa ndoaha de iná chojni, co ttjiho respeto ngain ndodá co ngain janná.”

²¹ Jehé tti xí mé ndaño:

—Cain yá janha rrinttaha desde are ña nchín na.

²² Are coinhi Jesús jiji, jehé ndaño ngain xa:

—Jaha ña nchetján sinchehe nacoa cosa. Nchecji cain tti chonda co tonchjeyehé chojni noa tomi; jamé ngajni jaha rrochonda cosa icha rentte. Cottimeja sihi para sacjin na tti janha sacji.

²³ Pero are xí mé coinhi xa jiji, anto vechín xa ixin anto rico vehe xa.

²⁴ Are vicon Jesús ixin anto vechín xa jehé ndaño:

—¡Atto tangui para que chojni rico rrochonda na parte ngain tti tettonha Dios!

²⁵ Icha tanguilha para ixin ná cocamello sattoxinhi va ttoechjenhe ná nttachiehe manta que para chojni rico rrochonda na parte ngain tti tettonha Dios.

²⁶ Co cain tti nicoinhi jiji ndaño na:

—Mexinxin, ¿quensen nchao rrochonda iná vida naroaxin remé?

²⁷ Jesús ndaño ngain xa:

—Tti çhoha sinchehe chojni, Dios nchao sinchehe.

²⁸ Pedro ndaño ngain Jesús:

—Janha na cointtoa na cain tti joichonda na para que jai çhjin na soixin.

²⁹ Cottimeja Jesús ndaño:

—Atto ndoa tti rrindattjo ra que quexeho chojni que ttinttohe nchiandoha, o ndodé, o janné, o xanchó, o çhihi, o xenhe para sindache icha chojni de ixin queçén tettonha Dios ngain ansén ni,

³⁰ chojni mé ngataha nontte nttihi sayé na anto icha tsje cosa, co ngain mundo que tsí sayé na vida naroaxin que ñonhi tiempo tsjexin.

Jesús çjan ndaño iná ixin jehé ndasenhe

(Mt. 20.17-19; Mr. 10.32-34)

³¹ Jesús joantsjenda tti tteyó chojni que vacao co ndaño ngain na:

—Jai jaha ra onoha ra que satettjin na para Jerusalén. Nttiha tti tsoexin cainxin tti dindacho cain profeta de ixin janha, tti Xí que joixin de ngajni.

³² Chojni nttiha sanjo na na janha ngain chojni que jeha judío co jehé na tsjanao na na, co feo rronichja na de ixin janha, co tsjatjo na na nttatté na.

³³ Sicaon na janha co después nasoenxon na na. Pero ngain nchanho ninxin janha rroxechon na.

³⁴ Jehé tti tteyó chojni que vacao Jesús ñonhi coinxin na de ixin jiji, ni venoeha na de ixin tti ndaño Jesús, ixin para ixin jehé na jiji ná cosa que çhoha coinxin na.

Are Jesús joinchexingamehe ná tti xí que çhoha vaguicon de ngain Jericó

(Mt. 20.29-34; Mr. 10.46-52)

³⁵ Are Jesús coinxin tti chojni que vacao ochiaon tediji na ciudad de Jericó, ná tti xí que çhoha vaguicon tají ngandehé nttiha jidanchiagaha.

³⁶ Are jehé xa coinhi xa que nttiha tedatto tsje chojni, joanchiangui xa ixin quehe conhe.

³⁷ Icha chojni ndache xa na que ixin Jesús de Nazaret jidatto nonttiha.

³⁸ Cottimeja jehé xa ndaño xa sén:

—¡Jesús, tti razé David, co tti chonda joachaxin que vechonda rey David, ttiacoanoa na janha!

³⁹ Tti chojni que tetaon nttiha joinchesattehe xa para que rrotencia xa, pero jehé xa ndaño xa icha sén:

—¡Soixin, tti razé David, co tti chonda joachaxin que vechonda rey David, ttiacoanoa na janha!

⁴⁰ Cottimeja Jesús tavengattjen co coetonha para que joiaho na ngain Jesús jehé tti vaguiconha mé. Co are ojoí ngaca Jesús, jehé Jesús joanchiangui ngain jehé tti vaguiconha mé co ndaño:

⁴¹ —¿Quehe rinao sinttaha janha nganji?

Jehé tti vaguiconha mé ndaño:

—Janha rinaho que nchao sicon.

42 Jesús ndaço:

—jân, jaha onchao dicon! Jaha oxingamaha ixin vitticaon na janha.

43 Ngain rato mé jehe tti vaguiconha mé onchao vicon, co sarroé tti sacjoi Jesús, co joincheoanxinhi Dios. Co cain chojni que vicon jiji cai joincheoanxinhi na Dios.

19

Are Jesús vetan Zaqueo

1 Cottimeja Jesús conixin chojni que vacao ojoigaha na ciudad de Jericó co vattogaha na ciudad mé.

2 Co nttiha vehe ná xí rico vinhi Zaqueo. Xí mé vaquetonha ngain cain xicobrador de impuesto,

3 co jehe Zaqueo joinao joatsoan Jesús. Pero çhoaha vicon Zaqueo Jesús ixin anto tsje chojni tettji ngaca Jesús co Zaqueo atto nchín vehe.

4 Cottimeja jehe Zaqueo coinga vitaon nttiha, co para que nchao vicon Jesús, jehe Zaqueo coani ngagaha ná ntá dinhi sicómoro chiaon de tti vatto Jesús.

5 Are Jesús vatto nnttiha, jehe tsjehe para noi tti jí Zaqueo co ndaço:

—Zaqueo, jaicoa danianxin de yá ixin jai janha chonda que sittona nchiandoi.

6 Cottimeja Zaqueo jaicoa vanianxin de nttiha co anto ché ixin Jesús cjoí nchiandoha.

7 Are icha chojni vicon na jiji, cain na coexinhi na nichja na feo de ixin Jesús, co ndaço na que ixin Jesús cjoí joiguittohe ngain nchiandoha ná xí que jinchehe jianha.

8 Cottimeja Zaqueo vingattjen co ndaço ngain Jesús:

—Tsjexinxin, soixin, janha rrochjaha chojni noa ngosinenxin de cainxin cosa que janha rrichonda. Co si çhonja chojni jointtayá para coehe tomí, janha tsoncjañá chojni mé nó nttiha icha tsje que tti janha coehe.

9 Jesús ndaço ngain Zaqueo:

—Jai Dios rroanha iná vida naroa ngain xí de nchia jiji. Co jehe xa razé Abraham xa cai.

10 Ixin janha, tti Xí que joixin de ngajni, joihi para joicjé co joichjaha vida naroa tti chojni que ondavitján de ngain cosa jianha.

Ejemploe tti tte tomí que anto rentte

11 Are chojni xa tettinhi na Jesús jindaço cain cosa jiji, jehe ndaço ná ejemplo ngain na ixin jehe ochiaon jidiji ngain Jerusalén, co jehe na çaxaon na que are Jesús siji nttiha, Dios rroquexinhi rroquetonha nttihi ngataha nontte de ixin jehe Jesús.

12 Mexinxin jehe ndaço ngain na:

—Vehe ná xí importante que sacjoi xa cjin ngain iná nación para joigayé xa joachaxin de sehe xa rey ngain nonttehe xa, co después cjan xa ngain nonttehe xa.

13 Saho de sacjoixin xa de ngain nonttehe xa jehe xa vayé xa tte de ninchehe xé xa para joanjo xa ngain cada na naná tomí que anto rentte, co ndaço xa ngain na: “Nchehe ra negocio conixin tomí jiji hasta que janha rrocjan na sihi.”

14 Pero chojni de ngain nonttehe xa nttiha vacoñao na ngain xa, co rroanha na chojni para joaicoa na joajna jiji: “Rinaoha na que xí jiji sehe xa rey para ixin janha na.”

15 Pero jehe xa vayé xa joachaxin de vehe xa rey, co cjan xa para nonttehe xa. Co are jehe xa ongain nonttehe xa, vayé xa tti tte chojni que joinchegayé xa tomí para conohe xa quejanhi joacha na cada na.

16 Tti saho conchienne co ndaço: “Tti ná tomia que soixin chjana joacha tomí, itte tomí.”

17 Jehe rey mé ndaço: “Atto nchao jí; jaha atto jian ná ninchehe xa. Jaha cjoí jian ninchehe xa de ngain tti tomí que chjaha masqui tsjehe, mexinxin jai janha rrochjaha joachaxin de tsetonhe tte rajna.”

18 Cottimeja conchienne iná co ndaço: “Tti ná tomia que soixin chjana joacha tomí, inaho tomí.”

19 Cai ngain chojni jiji ndaço rey mé: “Jaha tsetonhe naho rajna.”

20 Cottimeja conchienne iná co ndaço: “Nttihi jí tomia que chjana soixin. Janha coenchjinha tomí ngá ná paníto

19 ixin janha çagonha soixin ixin soixin ná xí que atto soji de ngain ansén, que dantsjehe chojni tti soixin danjoha, co jamé tsinhi cosecha de tti soixin ttengaha.”

22 Cottimeja rey mé ndaço: “Jaha jianha ninchehe xa ixin jaho ndaço que ixin janha soji ansenna. Si onoha que janha soji na de ngain ansenna, co ixin dantsjá chojni tti janha danjoha co jamé janha tjejo cosecha de tti janha ttengaha,

23 mexinxin ¿quedonda joicanha jaha tomina ngain ná banco para que janha rrogayá tomina conixin tti rrogacha tomí are janha rrocjan na nchiania?”

24 Co ndaço rey mé ngain tti chojni que te nttiha: “Dantsjehe ra xa tomí co danjo ra tomí ngain xí que chonda tte tomí.”

²⁵ Co jehe na ndaĉho na: “Pero chojni mé ochonda tti tte torni.”

²⁶ Rey mé ndaĉho: “Janha rrondattjo ra que tti chojni que ochonda, sayé icha, pero tti chojni que xonhi chonda sachjehe hasta tti nchion que chonda.

²⁷ Co cain tti chojni que ningaconna, que mé joinaoha na para que janha rrogarihi rey ngain na, sicohna ra na nttihi co nadoenxon ra na ngattoxon con janha.”

Are Jesús joigaha ciudad de Jerusalén
(Mt. 21.1-11; Mr. 11.1-11; Jn. 12.12-19)

²⁸ Después de ndaĉho Jesús cain jihi, jehe joinchehe sigue sacjoi para Jerusalén.

²⁹ Are ochian joihi na ngain rajna Betfagé co Betania, chiaon ngain tti jnanchjan que dinhi Nttaolivo, Jesús rroanha yó de tti chojni que vacao,

³⁰ co jehe ndaĉho ngain tti yó chojni mé:

—Ttji ra ngain rajnanchjan que jí chiaon jiha, co are saso ra nttiha sinchí ra ná colochochjan jíchoa va nttiha que xa xonhi chojni diguinttetaha va. Tonxindanguehe ra va co sicó ra va.

³¹ Co si ĉhonia chojni sanchianguiha ra ixin quedonda tetonxindanguehe ra va, jaha ra ndaĉho ra que janha, tti chonda cain joachaxin, rrogondana va.

³² Jamé, savintteĉji cayoi chojni mé, co jamé conhe inchin ndaĉho Jesús.

³³ Co are otetoxindanguehe na colochochjan mé, nicolochohe joanchiangui na co ndaĉho na:

—¿Quedonda tetonxindanguehe ra colochochjan yá?

³⁴ Tti yó chojni mé ndaĉho na:

—Ixin ximaestrona na sondehe xa va.

³⁵ Jamé sajoicao na va hasta tti ngain Jesús, co nttiha jehe na cjoajinhi na va tti manta que tetsá na co joinchetaha na Jesús jehe colochochjan mé.

³⁶ Are Jesús conchian para ngagaha ciudad de Jerusalén, chojni coingo na tti manta que tetsá na para coingachjetaha colochochjan mé.

³⁷ Co are ochian tediji na para sania na tti jnanchjan de Nttaolivo, cain chojni que terroé nttiha que vitticaon na Jesús, coexinhi na coyao na ixin anto ché na co joinchecoanxinhi na Dios de ixin anto tsje milagro vicon na joinchehe Jesús.

³⁸ Co ndaĉho na:

—¡Anto jian tti Rey que joí conixin nombré Dios! ¡Anto ĉhjoin tonohe cain ángel ngajni!
¡Gloria ngain Dios!

³⁹ Cottimeja canxion xifariseo que te nttiha ngayé chojni mé vinttendaĉho xa ngain Jesús:

—Maestro, nchesattehe chojnia tehe.

⁴⁰ Pero Jesús ndaĉho ngain xa:

—Janha rrondattjo ra que si chojni tehe rrotenco a na, xo tsoyao xo.

⁴¹ Are Jesús joihi chiaon de Jerusalén, are jehe vicon ciudad mé jehe tsjangaxin ciudad mé,

⁴² co ndaĉho ngain:

—¡Si chojni de nganji jaha rroquinxin na jai jehe tti joichjaha na tti ĉhjoin de ngain ansén na! Pero jai, mé tavema, co ĉhoha tsinxin na.

⁴³ Tsí nchanho que nganjo tangui para ixin chojnia. Are mé chojni que ningaconhe na sinchechjan na ttjarioho ngoixin ngandanji jaha, ciudad Jerusalén, co ngoixin ngandanji jaha sinttendanji na, co cain lado sixinttixin na ngain chojnia para soen na na.

⁴⁴ Co chojni que ningaconhe chojnia sacha ngain chojnia. Nasoenxon na cain chojni que te nganji, co tsinttoeha na nganji jaha ni ná xo ngataha iná xo. Jamé tsonhe ixin chojnia joincheha na caso tti rato que Dios joí joitsjehe na.

Are Jesús joincheroa nihngo icha importante
(Mt. 21.12-17; Mr. 11.15-19; Jn. 2.13-22)

⁴⁵ Cottimeja joixinhi Jesús nihngo icha importante co venguixin de nttiha cain chojni que tencheĉji co tettehna.

⁴⁶ Co ndaĉho ngain na:

—Ngain tti jitaxin Palabré Dios ndaĉho: “Nchiania para sinchecoanxinhi na Dios.” Pero jaha ra ndadinchechjan ra nchia cueva tti xatte tti chehe.

⁴⁷ Cain nchanho que Jesús vehe ngain Jerusalén, ngaxinhi nihngo mé vanchecoanxin chojni de ixin Dios. Pero cain xidána que vaquetonha ngain icha xidána, co cain ximaestroe ley, co cain xivaquetonha ngain ciudad mé cjoé xa quexén sinchehe xa para nasoenxon xa Jesús.

⁴⁸ Pero ĉhoha joinchehe xa jamé ixin cainxin chojni tatettinhi na tti jinichja Jesús.

20

*Tti joachaxin que chonda Jesús
(Mt. 21.23-27; Mr. 11.27-33)*

¹ Ná nchanho Jesús taji ngaxinhi nihngo icha importante para jinchecoenhe chojni de ixin Dios, co jindache na tti jian joajna are vintteguiji canxion xidána que vaquetonha ngain icha xidána, canxion ximaestroe ley, co canxion xí que chonda joachaxin ngain nihngo mé.

² Co vinttendačo xa ngain Jesús:

—Ndachjenji ni ra quehe joachaxin chonda jaha para nchehe cain cosa jiji. ¿Quensen chjá joachaxin jiji?

³ Cottimeja ndačo Jesús ngain xa:

—Janha cai sanchianguiha ra ná cosa. Co rrondachjenji ni ra:

⁴ ¿Quensen rroanha Juan para joincheguitte chojni? ¿A Dios o ani chojni?

⁵ Pero coexinhi xa joanchianguihi chó xa co ndačo xa:

—¿Quehe rrondačo na? Si rrondačo na que Dios tti rroanha Juan, jehe rrondattjo na: “¿Quedonda vitticaonha ra remé?”

⁶ Co si rrondačo na que chojni tti rroanha Juan, cainxin chojni nasoenxon na ján na de ixin xo ixin jehe na chonda na seguro que Juan vanichja joajna que vagayé de ngain Dios.

⁷ Co jehe xa vinttendačo xa ixin noeha xa quensen rroanha Juan para joincheguitte chojni.

⁸ Cottimeja ndačo Jesús ngain xa:

—Cai janha rrondattjoha ra quehe joachaxin nttaxin janha cain cosa jiji.

*Ejemplo ninchehe xa jianha
(Mt. 21.33-44; Mr. 12.1-11)*

⁹ Cottimeja coexinhi Jesús nichjé chojni, co ndačo ngain na ejemplo jiji:

—Vehe ná xí que cjoenga xa ná jngui de nttauva co después joanjo xa nttattochjoin media ngain canxion tti nchehe xa co jehe xa sacjoixin xa de nttiha para tsje tiempo.

¹⁰ Co are ojoí tiempo de cosecha, jehe xa rroanha xa ná tti nchehe xé xa para joiganchia tti parte de cosecha que jiquininxin sayé tti xinajni mé. Pero jehe tti nicoá nttattochjoin media mé coaxin na tti nchehe xa mé nttá co vengui na co xonhi chjé na.

¹¹ Cottimeja xinajni mé rroanha xa iná tti nchehe xé xa pero cai tti nicoá nttattochjoin media nichja na feo ngain tti nchehe xa mé co coaxin na nttá co vengui na co xonhi chjé na.

¹² Xinajni mé cjan xa rroanha xa iná tti nchehe xa, pero cai joinchenihi na tti nchehe xa mé co vengui na co xonhi chjé na.

¹³ Cottimeja xinajni mé ndačo xa: “¿Quehe sinttaha? Janha rrorroanha tti xanhna que janha anto rinaho. Are jehe na sicon na xanhna jiji puede rrochonda na respeto ngain xan.”

¹⁴ Pero are jehe na vicon na xan, ndache chó na: “Xan jiji xan sayé ngoi nontte jiji inchin herencia, mexinxin nasoenxon na xan para que ján na sittoá na cain.”

¹⁵ Cottimeja joantsjegaxin na xan de nttauva mé co nagoenxon na xan.

Cottimeja joanchiangui Jesús ngain chojni co ndačo:

—¿Quehe sinchehe xinajni mé ngain tti chojni que vittoehe jnguihi xa?

¹⁶ Jehe xa tsí xa co nasoenxon xa chojni mé co sanjo xa jnguihi xa ngain ojé chojni.

Are vinttequinhi chojni jiji, vinttendačo na:

—¡Que Dios sanjoha joachaxin yá!

¹⁷ Pero Jesús tsjehe ngain jehe na co ndačo:

—Mexinxin, ¿quehe rročo tti jitaxin ngain Palabré Dios? Nttiha ndačo:

Tti xo que joinchegondaha xittette nchia,

xo mé tti xo joiguehe icha importante.

¹⁸ Quexeho chojni que tsonntenguixin xo jiji, tsonchjain pedazo cuerpo na. Co si xo jiji setsinga xo ngataha ná chojni, chojni mé rrocjan cuerpo polvo.

*Tti rroxenga hna ngain impuesto
(Mt. 21.45-46; 22.15-22; Mr. 12.12-17)*

¹⁹ Cainxin xidána que vaquetonha ngain icha xidána co ximaestroe ley nttiha joinao xa rrotse xa Jesús ngain rato mé ixin coixin xa que ixin ejemplo jiji rročo de ixin jehe xa. Pero xagoen xa cain chojni.

²⁰ Mexinxin rroanha xa canxion xí que tsaya ngain Jesús co xí mé vanchehe xa que ixin jehe xa anto jian xa para que rrojinchenichja xa Jesús ná cosa nchaoha para nchao rrocjanguihi xa Jesús ngain xigobernador.

²¹ Mexinxin joanchiangui xa ngain Jesús co ndačo xa:

—Maestro, janha na nona na que soixin nichja co nchecoene chojni tti ndoa, co ncheha juzgado chojni rico ojé que chojni noa, sino que soixin ndoa nchecoene na de ixin tti rinao Dios.

²² Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

²³ Pero Jesús oconohe de tti jianha que jehe xa teḡaxaon xa de ixin jehe, co jehe ndaḡo ngain xa:

—¿Quedonda rinao ra sincheyana ni ra?

²⁴ Tjagohna ni ra ná tomi. ¿Quensen con jinganito jihi, co quensen nombré jitaxin jihi?

Jehe xa vinttendaḡo xa:

—Con xiemperador co nombré xa.

²⁵ Cottimeja ndaḡo Jesús ngain xa:

—Mexinxin chjehe ra xiemperador tti jiquininxin xa, co danjo ra ngain Dios tti jiquininxin sayé jehe.

²⁶ Co jamé ḡoha joinchenichja xa Jesús ni ná cosa nchaoha; sino que vinttegoan xa admirado de ixin tti ndaḡo jehe co jamé ndavinttetencoaxa.

Canxion chojni joanchiangui quexén rroxechon ni

(Mt. 22.23-33; Mr. 12.18-27)

²⁷ Después de cain jihi canxion xisaduceo vintteci xa ngain Jesús. Xisaduceo vaguitticaon xa que chojni que ndadenhe irroxechonha na; mexinxin ndaḡo xa ngain Jesús:

²⁸ —Maestro, ley que vayé Moisés jitaxin que si ná ní ndadenhe xa co sittohe ḡihi xa co si ḡonhi chjan joichonda na, xichó xindavenhe chonda xa que secoa xa jehe nḡiganha mé co rrochonda na chjan para que chjan mé sehe xan inchin xenhe tti ndavenhe.

²⁹ Nchao remé; vintte yáto xí, chó xa. Xisaho vecao xa nḡiḡihi xa pero ndavenhe xa co ḡonhi chjan cointtohe xa.

³⁰ Xiyoxin vecao xa jehe nḡiganha mé, pero cai ndavenhe xa co ḡonhi chjan cointtohe xa ngain nḡiganha mé.

³¹ Cottimeja xininxin vecao xa jehe nḡiganha mé pero ḡajeho jamé conhe xa. Co jamé hasta tti yatoxin xa ndavenhe xa cai co ḡonhi chjan cointtohe xa ngain nḡiganha mé.

³² Co después ndavenhe nḡiganha mé cai.

³³ Mexinxin are rroxechon na, ¿Quexhe de tti yáto xí mé sehe mero xixihi jehe nḡi mé, ixin cain xa vinttecao xa nḡi mé?

³⁴ Cottimeja ndaḡo Jesús ngain xa:

—Ngain mundo jihi, xí co nḡi tottehe na.

³⁵ Pero tti chojni que tequininxin tsji para ngajni co rroxechonxin na de tti ndavenhe na, nttiha ni tsotteha na, ni sanjoha na xenhe na para tsottehe xan

³⁶ Ixin nttiha iḡoha ndasenha na. Are mé sintte na inchin ángel de Dios co sintte na xenhe Dios ixin Dios tti sinchexechon na.

³⁷ Hasta ngain tti parte que coentaxin Moisés ixin vicon ḡohi ngagaha canchaha, jehe mismo jointtanao na que ixin chojni que ndadenhe rroxechon na. Nttiha ndaḡo que Dios, Dios de Abraham, co Isaac, co Jacob.

³⁸ Pero Dios jeha Dios de nindadiguenhe, sino que Dios de tti nitechon. Co mé rroḡo que para ixin Dios cain chojni techon na.

³⁹ Cottimeja cainxin ximaestroey vinttendaḡo xa:

—Nchao ndaḡo, Maestro.

⁴⁰ Co icjanha xa joanchiangui xa icha ngain Jesús.

Tti dindaḡo David de ixin Jesucristo

(Mt. 22.41-46; Mr. 12.35-37)

⁴¹ Jesús ndaḡo ngain na:

—¿Quexén ndaḡoxin chojni que ixin Cristo ná xanntí David?

⁴² Ixin David mismo dindaḡo janhi ngain libroe Salmo:

Tti Ttetonha cainxin cosa ndaḡo ngain tti Ttetonna janha:

“Darihi ngain lado jian na,

⁴³ hasta que janha sinttagacha jaha de ngain cain tti ningaconha.”

⁴⁴ ¿Pero quexén que Cristo jehe ná xanntí David, si David mismo ndaḡo ixin Cristo tti Ttetonha ngain jehe?

Are Jesús joinchesattehe ximaestroey ley

(Mt. 23.1-36; Mr. 12.38-40; Lc. 11.37-54)

⁴⁵ Cainxin chojni nttiha tatetini na are Jesús ndaḡo janhi ngain tti chojni que vacao:

⁴⁶ —Ttjiho ra cuidado de ncheha ra inchin nchehe ximaestroey ley ixin jehe xa ncheḡoxinhi xa ḡji xa conixin loncto icha jinjini, co rinao xa que chojni sanjo na joajna

ngain xa conixin anto tsje respeto are ngain ndásin, co are ngaxinhi nihngo jehe xa ttjé xa tti nttaxintaon icha importante para dinttetaha xa, co are ttji xa dijine xa jehe xa rinao xa tti icha jian lugar ngain mesa.

⁴⁷ Cai dantsjehe xa nchiganha nchiandoha ncha ixin ittixinha ncha ttjenga ncha hna contribución, co para xonhi chojni rroaxaon tti jianha que nchehe xa, jehe xa nchecoanxini xa Dios anto sé. Cain jehe xa xisayé icha soji castigo.

21

Tomí que joanjo ná nchiganha noa

(Mr. 12.41-44)

¹ Ngain nihngo icha importante nttiha vicon Jesús quexén tettinttohe cain chojni rico tomí ngá cajé alcanza.

² Cai vicon Jesús ná nchiganha noa que vancá ncha nttiha yó centavochjan.

³ Co ndačo Jesús:

—Janha ndoa tti rroundattjo ra que nchiganha noa jiji joanjo ncha icha tsje que cain chojni.

⁴ Ixin cain chojni danjo na tti xehe na, pero jehe ncha, masqui noa ncha, joanjo ncha cainxin tomí que jehe ncha jichonda ncha.

Jesús ndačo que rroxantte nihngo icha importante

(Mt. 24.1-2; Mr. 13.1-2)

⁵ Canxion de tti chojni que vacao Jesús tetjao na de ixin nihngo icha importante co ixin anto chjoin xo que diconchjian nihngo mé co de icha cosa que chojni diganjo na para ixin nihngo. Cottimeja Jesús ndačo ngain na:

⁶ —Tsí nchanho que cain tti jaha ra tedicon ra yá rroxantte, co ni ná xo sittoeha ngataha iná xo.

Tti tsonhe icha saho que mundo ndatsjexin

(Mt. 24.3-28; Mr. 13.3-23)

⁷ Cottimeja joanchianguihi na Jesús co ndačo na:

—Maestro, ¿quesa siconhe jiji? ¿Quehe señal rroxago ixin cain cosa jiji osiconhe?

⁸ Jesús ndačo:

—Ttjiho ra cuidado que xonhi chojni sinttayaha ra. Ixin atto tsje chojni tsí co sinchegonda na nombrena rrondačo na: “Janha tti Cristo na”, co “Jai mero tiempo que mundo ndatsjexin.” Pero jaha ra ditticaonha ra mé.

⁹ Co are tsinhi ra ixin jí guerra co ixin tettetocaho chojni gobiernoe na, jaha ra xaonha ra ixin jiji chonda que tsonhe saho, pero xa jaha tiempo para ondatsjexin mundo.

¹⁰ Jesús joinchehe sigue ndačo ngain na:

—Ná nación tsetocaho iná nación, co ná región tsetocaho iná región.

¹¹ Tsje parte tsingui nontte anto soji, co sehe jintta co chin ngain tsje parte, co ngajni sicon ni cosa que sinchexaon ni, co anto tsje señal importante sicon ni.

¹² Pero saho de cain jiji, chojni rrotse ra na jaha ra co feo sinchehe na nganji ra. Tsjiho ra na para que soan ra juzgado ngain nihngo, co tsiaxinha ra na ngain cárcel co tsjiho ra na ngain rey co ngain xigobernador de ixin causananxin janha.

¹³ Cain jiji rrochondaxin ra oportunidad de rronchija ra de ixin janha.

¹⁴ Co are tsonha ra mé, xaaxaonha ra icha saho de ixin quexén rrondačo ra ngain cain tti tsjiho ra na.

¹⁵ Ixin janha tti rrochjaha ra palabra jian que rrondačo ra co sinttanoha ra jian, para que ni ná chojni que ningaonha ra tsixinha na nganji ra, sino que jehe na sitticaon na tti jaha ra rrondačo ra.

¹⁶ Pero jaha ra hasta jehó ndodá ra, xanchó ra, niparientea ra, co xiamigoa ra; chojni mé sinttachianha ra na ngá rá ningaonha ra. Co nasoxon na chonja de jaha ra,

¹⁷ co ngoixin mundo rroningaonha ra chojni de ixin causananxin janha.

¹⁸ Pero masqui jamé, sitjanha ni ná xajá ra ixin vidá ra sehe seguro ngain Dios.

¹⁹ Si cainxin tiempo jaha ra seguro sitticaon ni ra, rrochonda ra iná vida naraoxin.

²⁰ Are sicon ra que ciudad de Jerusalén ngoixin sixindanji xisoldado, jaha ra onoha ra que are mé orroxantte.

²¹ Mexinxin are mé tti chojni que te Judea rrochonda na que satsinga na para ngagaha jna. Co tti nite ngain ciudad de Jerusalén rrochonda na que satsingaxin na de nttiha. Co tti nisintte ngataon jngui are mé, rrochjeha na tiempo para rrocjan na ngain ciudad mé.

²² Ixin nchanho mé nchanho de castigo, are tsonhe cain tti jitaxin ngain Palabré Dios.

²³ ¡Anto tangui para ixin tti nchí que sintteyá chjan ngain nchanho mé o tti rrochonda chjan que xa tetai xan! Ixin are mé atto tangui tsonhe chojni nttihi ngataha nontte, co mé ná castigo anto soji para ixin nación Israel jihi.

²⁴ Are mé čhonja chojni nasoenxon na ngain guerra co icha de chojni mé rrotse na na co tsia na na co jamé sacao na na ngoixin región. Co chojni de iná nación sinchehe na inchin sinao na ngain ciudad de Jerusalén hasta que tsjexin tti tiempo que sayé na joachaxin de sinchehe na jamé.

*Quexén tsí tti Xí que joixin de ngajni
(Mt. 24.29-35, 42-44; Mr. 13.24-37)*

²⁵ Cottimeja sehe señal ngain nchanho co ngain conittjao co ngain conotse. Co nttihi ngataha nontte cainxin chojni rroxaon na ixin anto soji sařoin ndachaon ixin anto soji rrocjamanguiaton chó nda.

²⁶ Chojni ndatsonttiehe na de ixin joaxaon are rrořaxaon na ixin quehe siconhe ngain mundo jihi, ixin hasta cainxin cosa que jí ngajni rrořanga.

²⁷ Cottimeja sicon na na janha, tti Xí que joixin de ngajni, sihi are mé ngacjan ná ttjoi conixin joachaxin co gloria.

²⁸ Are tsexinhi tsonhe cain cosa jihi, jaha ra řo řa sinttechon ra, doan ra animado co tsjehe ra para ngajni ixin are mé janha atto toin sihi para tsjenguijna ra co isetanha ra cain cosa tangui mé.

²⁹ Cai ndačho Jesús ngain na ejemplo jihi:

—Āaxaon ra ngain nttahigo, o quexeho nttá.

³⁰ Are sicon ra que očinhi cachjenhe nttá, jaha ra mismo onoha ra que ojoiconchian tiempo čhin.

³¹ Jamé cai are sicon ra que tsonhe cain cosa jihi, jaha ra onoha ra que osiconchian tiempo are siquetonha Dios nttihi ngataha nontte.

³² Janha ndoa tti rrindattjo ra que cain jihi tsonhe saho que ndasenhe chojni de ngain generación jihi.

³³ Masqui ngajni co nontte ndatsjexin, pero tti janha ndačhjan chonda que tsonhe.

³⁴ Ttjiho ra cuidado que tsosojiha ansean ra de ixin vicio, inchin tti rrocoan ra co cain problema de ngain vida jihi, para que ngain nchanho mé rrořaonha ra

³⁵ inchin are coxigo řaon va are ngain trampa que anto daca dijé, ixin jaňá tsí nchanho mé ngain cainxin chojni ngoixin mundo.

³⁶ Mexinxin jaha ra dintte ra listo, co cainxin tiempo nchecoanxinhi ra Dios para que řonhi tsonha ra de ngain cain cosa que siconhe, co para que are mé nchao tsonchienhe ra nganji na janha, tti Xí que joixin de ngajni.

³⁷ Ngain tiempo jihi, are nchanho, Jesús vanchecoenhe chojni de ixin Dios ngain nihngo icha importante, co are ttie jehe savacji para vaguittohe ngagaha tti jnanchjan que dinhi Nttaolivo.

³⁸ Co cada nchanho ndoyo vaconchienhe chojni ngain nihngo mé para vaquinhi na tti vandačho Jesús.

22

*Are cjoao na quexén sinchehe na para rrotse na Jesús
(Mt. 26.1-5, 14-16; Mr. 14.1-2, 10-11; Jn. 11.45-53)*

¹ Co are Jesús xa tají nttiha ngain Jerusalén, oçhiaon joí tti quiai que jine na niottja que chondaha levadura, co mé tti quiai que dinhi pascua.

² Ngain tiempo mé merocoa cain chojni anto vancheřoxinhi na tti vandačho Jesús. Mexinxin cain xidána que vaquetonha ngain icha xidána, co cain ximaestroey ley vařaon xa ngain cain chojni mé para que jehe xa nasoenxon xa Jesús; mexinxin jehe xa vacjé xa quexén sinchehe xa para tsjaya xa co chojni tsoňaoha na.

³ Cottimeja Satanás joixinhi ngain ansén Judas Iscariote, jehe ná de tti tteyó chojni que vacao Jesús.

⁴ Co Judas jihi cjoí joitsjehe xidána que vaquetonha ngain icha xidána, co xipoliciey nihngo icha importante, para cjoao xa de ixin quexén jehe tsjago ttinó jí Jesús para sitse xa.

⁵ Cain jehe xa anto vintteché xa co ndačho xa ixin sanjo xa tomi ngain jehe Judas.

⁶ Co Judas vittoexin co ocoexinhi řaxaon ixin quexén sinchehe para que sinchechienhe Jesús ngá rá xa are řonhi chojni sintte ngain Jesús.

*Are joinecaho Jesús tti tteyó chojni que vacao
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

⁷ Are joí tti nchanho de quiai que dinhi pascua are vagoen na coleco para vaganjo na ngain Dios.

⁸ Ngain nchanho mé Jesús rroanha Pedro co Juan co jehe ndaço ngain na:

—Tji ra dinchechjian ra tti sontte na ngain quiai pascua jiji.

⁹ Jehe na ndaço na ngain Jesús:

—¿Ttinó rinao sinttachjianxin na?

¹⁰ Jesús ndaço ngain na:

—Are jaha ra sigaha ra ciudad jiji, setan ra ná xí que jidicao ná nchíxa de jinda. Roehe ra xí mé hasta tti ngain nchia que jehe xa sixinhi xa

¹¹ co ndache ra tti nchiandoha nttiha: “Ximaestro ndaço xa nganji: ¿Quettinó jí tti cuarto que jehe xa sinenxin xa ngain quiai pascua conixin tti tteyó chojni que xicao xa?

¹² Cottimeja jehe tti ndoha mé tsjagoha ra ná cuarto jie ngain píso yoxin que ojé listo. Nttiha nchechjianxin ra tti sontte na.

¹³ Cayoi chojni mé savintteci na co vittja na cain inchin ndaço Jesús. Co nttiha joinchechjianxin na tti joinecaho na Jesús ngain quiai pascua.

¹⁴ Are ovittja hora para joine na, Jesús conixin tti tteyó representanté vintte na ngain mesa.

¹⁵ Cottimeja Jesús ndaço ngain na:

—Janha anto joinaho joine conixin jaha ra ngain quiai pascua jiji saho que janha ndasenhe na!

¹⁶ Janha rrindattjo ra seguro que rrocjanha na sinttasayá quiai pascua hasta que cain tti rroço quiai jiji tsoenja ngain tti ttetonha Dios.

¹⁷ Cottimeja coá ná vaso de vino co joanjo gracias ngain Dios, co ndaço ngain na:

—Dihi ra jiji co tonchjeyehe chó ra,

¹⁸ ixin janha irrocjanha na sihi vino hasta que tsija tti ttetonha Dios.

¹⁹ Después coá niottja co joanjo gracias ngain Dios, cottimeja váña nio co joanjo nio ngain jehe na co ndaço:

—Jihi rroço cuerpona janha que rroxanjo para ndasenhe para tsjenguijna ra. Cain tiempo nchehe ra janhi para rroxaxaonxin ni ra.

²⁰ Cai jamé joinchehe conixin vaso de vino are ojoexin joine na co ndaço:

—Vaso jiji rroço tti trato naroxin que jnina sinchese gurá. Co jnina mé singo jni para que tsjenguijna ra.

²¹ Pero jaxon rá tti xí que rrondache chojni quexén para rrotse na na janha, rá xí mé nttihi jí ngataha mesa conixin rana janha.

²² Janha chonda que senhe na inchin jiquinixin, pero janto tangui tsonhe tti rrondache chojni quexén para rrotse na na!

²³ Cottimeja tti tteyó chojni que vacao Jesús coexinhi na joanchianguihi chó na ixin quexehe tti rrondache chojni quexén para rrotse na Jesús.

Are joinchediscutí na ixin quensen sehe icha importante

²⁴ Cottimeja joinchediscutí na ixin quexehe de jehe na tti sehe icha importante ngain tti ttetonha Dios.

²⁵ Pero Jesús ndaço ngain na:

—Ngain mundo jiji, cain rey de cain nación, jehe ttetonha inchin jehe rinao, co cain xí que chonda cargo de ngain cain nación, dinhi xa xí que nchehe jian.

²⁶ Pero jaha ra chondaha ra que sintte ra jamé, ixin tti sehe icha importante ngayaha ra, pero mé chonda que sehe inchin tti icha nchín. Co tti tsetonha ngayaha ra, mé tti chonda que icha tsjenguijna ra.

²⁷ Ndachjenji ni ra, ¿quensen icha importante, a tti dehe jine ngain mesa, o ani tti nchehe xa que dicenhe jehe tti jine ngain mesa? Seguro jehe tti jí ngain mesa, mé tti icha importante. Pero janha rrihi nttihi ngayaha ra inchin ná tti nchehe xa.

²⁸ Jaha ra tti vintte ra cainxin tiempo nganji na janha are janha vetan tangui.

²⁹ Mexinxin janha rrichjaha ra ná joachaxin para que jaha ra tsetonha ra, jañá inchin joachaxin que chjana Ndodana janha,

³⁰ para que sintte ra co sihi ra ngain mesana nttiha tti janha ttetonha, co sintte ra ngain lugar de joachaxin para sinchejuzguehe ra tti tteyó grupoe chojni Israel.

Jesús ndaço que Pedro rrondaço ixin jehe chonxinha Jesús

(Mt. 26.31-35; Mr. 14.27-31; Jn. 13.36-38)

³¹ Ndaço Jesús cai:

—Simón, Simón, tsjenxin; Satanás danchia joachaxin para que tsontsjenga ra jaha ra como si rroçji ra trigo.

³² Pero janha rrinttatsán ñao Dios para ixin jaha, para que xonhi tiempo rrotjañaha tti jaha ditticaon. Co jaha are sachjaha joaxaon, ttjenguijna icha chojni que ditticaon para que sitticaon na jian cainxin tiempo.

³³ Simón Pedro ndaicho ngain Jesús:

—Janha rinaho tsji cain lugar conixin soixin, masqui siaxinna conixin soixin o hasta tti senxin soixin cai janha nttiha senxin na.

³⁴ Jesús ndaicho ngain Pedro:

—Pedro, janha rrindattjo que jai mismo icha saho que rrotsje conttaxichia, jaha or-rondaicho ninxin nttiha que chonxinha na.

Are ojoí tiempo que Jesús tangui conhe

³⁵ Cottimeja Jesús joanchiangui ngain tti chojni que vacao co ndaicho:

—Are janha coetonha ra para joindache ra chojni de ixin Dios, co ixin cjoioha ra ni bolsa, ni tomi, ni catte, ¿achonja gondaha ra?

Jehe na ndaicho na:

—Nahi, xonhi.

³⁶ Cottimeja ndaicho Jesús ngain na:

—Co jai jaha jamé, xo chonda ra bolsa, ttjiho ra, co cai tomi; co xo chondaha ra espada nchecji ra chamarrá ra para ttenanxin ra espada.

³⁷ Ixin janha rrindattjo ra que chonda que siconna janha inchin jitaxin Palabré Dios: “Jehe venhe inchin chojni que nchehe jianha.” Ixin cain tti jitaxin de ixin janha chonda que tsonhe.

³⁸ Cottimeja jehe na vinttendaicho na:

—Ntthi ji yó espada.

Co Jesús ndaicho:

—Conixin yao.

Are Jesús joinchetsenhe ñao Dios ngain Getsemaní

(Mt. 26.36-46; Mr. 14.32-42)

³⁹ Cottimeja vaçhje Jesús co inchin costumbre que jehe vanchehe, jehe sacjoi para ngagaha tti jnanchjan de Nttaolivo, co rroé tti chojni que vacao.

⁴⁰ Co are ojoiji na nttiha, jehe ndaicho ngain na:

—Nchetsenhe ra ñao Dios para que sitaha ra de sinchehe ra cosa jianha.

⁴¹ Cottimeja Jesús sacjoi nchion cjin de ngain na, inchin cjinxin ttixinhi ni de tja ni ná xo, co nttiha vettoxin nttajochjihi para joinchetsenhe ñao Dios.

⁴² Co jehe ndaicho:

—Padre, si rinao, tançhjandaha na para que janha sattoha ngain tti anto tangui que tsonna, pero tsoenha inchin janha rinaho, sino que tsonhe inchin soixin rinao.

⁴³ Cottimeja joicononxin ná ángel de Dios ngain Jesús para que joinchesoji espiritue Jesús.

⁴⁴ Co ixin jehe icha tangui conohe ngain ansén, jehe icha jian joinchetsenhe ñao Dios co ndachjín cjan inchin jni, co yeye gota vinttji ngataha nontte.

⁴⁵ Co are joexin joinchetsenhe ñao Dios, vingattjen co cjoí ngain tti chojni que vacao; co jehe na otatejoa na ixin icoixinha na de joachjaon.

⁴⁶ Cottimeja jehe ndaicho ngain na:

—¿Quedonda tateçhin ra? Dingattjen ra, co nchetsenhe ra ñao Dios para que sitaha ra de sinchehe ra cosa jianha.

Are tse na Jesús

(Mt. 26.47-56; Mr. 14.43-50; Jn. 18.2-11)

⁴⁷ Jesús xa jinichja jañá are ojoí anto tsje chojni. Tti vinhi Judas, jehe ná de tti tteyó chojni que vacao Jesús, jehe mé tti jitaon nttiha de cainxin chojni mé, co are ojoí, jehe conchienne ngaca Jesús para coetoxin.

⁴⁸ Cottimeja Jesús ndaicho ngain Judas:

—Judas ¿acoetoxin na para cjoago ixin janha tti Xí que joixin de ngajni?

⁴⁹ Co tti icha chojni que vacao Jesús, are vicon na jñhi, ndaicho na ngain Jesús:

—¿Atsjaya na conixin espada?

⁵⁰ Co ná de chojni mé joinchenihi ná xinchehe xé xidána icha importante, ixin conçhinjihi ná ndatsjoen xa lado jian xa.

⁵¹ Pero Jesús ndaicho ngain tti chojni que vacao:

—Tançhjanda ra xa; conixin yao.

Cottimeja Jesús catte ndatsjoen xi mé co ndatsexin.

⁵² Cottimeja ndaĉho Jesus ngain cain xidana que vaquetonha ngain icha xidana, conixin ngain xipolicie nihngo icha importante, co ngain cain xittetonha ngain nihngo me, tti xicjoi para sajoicao xa Jesus:

— Ajoihni ra joiroehna ni ra conixin espada co ntta inchin janha rrocji na tti chehe?

⁵³ Cain nchanho are janha joarihi nganji ra ngain nihngo icha importante, jaha ra onhi tiempo joihao ra rrotse ni ra. Pero jai hora jihi tti mero hora para sinchehe ra jihi, ixin Satanas tti jichonda joachaxin jaxon.

Pedro ndaĉho ixin jehe chonxinha Jesus

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Cottimeja tse na Jesus, co sajoicao na para ngain nchiandoha xidana icha importante. Co Pedro cjinxin jirroexin.

⁵⁵ Nttiha ngain patioe nchia me cjoaga na na ohi co nttiha tavittendanji na ohi me para xixohe na. Co cai Pedro nttiha tavehe ngaye na.

⁵⁶ Cottimeja na nhimoze xidana me, are vicon ncha que Pedro tajixiohe ngandehne ohi nttiha tavetsjehe ncha jian co ndaĉho ncha:

— Cai xi jihi vacao xa Jesus.

⁵⁷ Pero Pedro ohoa ndaĉho ndoa, co jehe ndaĉho:

— Janha chonxinha xi me.

⁵⁸ Nchion despues vicon na xi, co xi me ndaĉho xa ngain:

— Jaha cai na de chojni Jesus.

Pero Pedro ndaĉho:

— Nahi, janha jeha chojni jehe.

⁵⁹ Inchin na hora despues ina xi a cjan xa ndaĉho xa:

— Jan ndoa xi jihi vacao xa Jesus, ixin jehe xa cai Galilea regioen xa.

⁶⁰ Cottimeja Pedro ndaĉho:

— Janha nonaha de quehe rrinichja jaha.

Ngain rato me are Pedro a jinichja jame, otsje na conttaxichia.

⁶¹ Cottimeja Jesus ngaria co tsjehe ngain Pedro, cottimeja Pedro axaon ixin Jesus ondaĉho: “Saho que conttaxichia rrotsje va jai, jaha orrondaĉho ninxin nttiha que chonxinha na janha.”

⁶² Cottimeja Pedro vaĉhjexin de nttiha co anto tsjanga.

Are cjoanoa xa Jesus

(Mt. 26.67-68; Mr. 14.65)

⁶³ Xisoldado que tenda Jesus cjoanoa xa co angui xa ntta.

⁶⁴ Jehe xa coejehe xa con Jesus co angui xa tton nga con co ndaĉho xa ngain:

— Datsoenhe quensen goen!

⁶⁵ Co ndaĉho xa icha cosa feo ngain.

Are Jesus ngain juzgadoe nihngo

(Mt. 26.59-66; Mr. 14.55-64; Jn. 18.19-24)

⁶⁶ Co are ovingasan atte cain xittetonha ngain nihngo, cain xidana que vaquetonha ngain icha xidana, co cain ximaestroe ley para sajoicao xa Jesus ngain juzgadoe nihngo. Nttiha joanchianguihin xa Jesus, co ndaĉho xa:

⁶⁷ — Nttihi ndachjenji ni ra, ajaha tti Cristo?

Jehe ndaĉho ngain xa:

— Si rrondattjo ra que jan, sitticaonnaha ra.

⁶⁸ Co si sanchianguiha ra na cosa, jaha ra rrondachjenjiha ni ra, ni tsanchjandaha ni ra satsji.

⁶⁹ Pero desde jai, janha, tti Xi que joixin de ngajni, osarihi ngain lado jian de Dios que chonda cainxin joachaxin.

⁷⁰ Cottimeja cainxin xa joanchianguihi xa Jesus co ndaĉho xa:

— Mexinxin, ajaha tti Xenhe Dios?

Jesus ndaĉho:

— Jan, janha inchin ndaĉho jaha ra mismo.

⁷¹ Cottimeja vinttendaĉho xa:

— Quedonda tsje na icha chojni de testigo? Jan na mismo coinhi na tti jianha que ndaĉho xi jihi.

23

Jesus ngain Pilato

(Mt. 27.1-2, 11-14; Mr. 15.1-5; Jn. 18.28-38)

¹ Cottimeja cainxin xa vingattjen xa co sajoicao xa Jesús ngain Pilato.

² Nttiha coexinhí xa nichja xa tti jeha ndoa de ixin Jesús, co ndaço xa:

—Janha na vicon na que xí jiji jinchequeto xa chojnina na. Co ndaço xa que janha na chondaha na que tsjenga na hna impuesto ngain xiemperador romano, co cai ndaço xa que jehe xa tti Cristo, co mé rrocho que jehe xa ná rey.

³ Cottimeja Pilato joanchiangui ngain Jesús:

—¿Ajaha tti Rey de chojni judío?

Jesús ndaço:

—Ján janha, jañá inchin jaha ndaço.

⁴ Cottimeja Pilato ndaço ngain xidána que vaquetonha ngain icha xidána, co ngain cain chojni que joinchechienhe Jesús nttiha:

—Janha xonhi cosa jianha dittjá xí jiji.

⁵ Pero cain jehe xa icha coyao xa co ndaço xa:

—Jehe xa joincheyehe xa chojni ngoixin Judea de ixin tti jehe xa nichja xa. Coexinxin xa ngain Galilea, co jái ontthi jinchehe xa jamé.

Jesús ngain Herodes

⁶ Are Pilato coinhi jiji, jehe joanchiangui ngain xa si Jesús joixin de ngain Galilea.

⁷ Co are vinttendaço xa que ján, Pilato sarroanha Jesús para ngain Herodes ixin mé tti vehe gobernador de ngain Galilea tiempo mé, co ngain conittjao mé nttiha vehe Herodes ngain ciudad de Jerusalén.

⁸ Are Herodes vicon Jesús, jehe anto ché ixin anto sé jehe jixaxaon sicon Jesús ixin jehe coinhi vanichja chojni de ixin tti jian que vanchehe Jesús. Co jehe Herodes joinao rroguicon ná milagro que rrojinchehe Jesús.

⁹ Herodes anto tsje joanchiangui ngain Jesús pero Jesús xonhi ndaço.

¹⁰ Cai nttiha conchienenhe tsje xidána que vaquetonha ngain icha xidána co tsje ximaestroe ley para ndaço xa tsje cosa ndoaha de ixin Jesús ixin anto coñoa xa.

¹¹ Cottimeja Herodes conixin cain xisoldadoe xaxaon xa que Jesús xonhi rentte, co para cjoanoa xa Jesús, joinchengá xa lontto çhjoin inchin lonttoe rey. Cottimeja Herodes rroanha Jesús para ngain Pilato iná.

¹² Ngain nchanho mé Pilato co Herodes vinttegoan amigo. Icha saho jehe na vaninga-conhe chó na.

Are ndaço na ixin Jesús chonda que ndasenhe

(Mt. 27.15-26; Mr. 15.6-15; Jn. 18.39—19.16)

¹³ Cottimeja Pilato vayé cain xidána que vaquetonha ngain icha xidána co cain xí que vechonda joachaxin ngain chojni judío, conixin icha chojni,

¹⁴ co ndaço ngain na:

—Jaha ra joicohna ra xí jiji, co ndaço ra ixin jinchequeto xa chojni, pero janha joanchianguia xa ngattoxon con ra, co ovicon ra que janha xonhi vittjá xa que ixin jehe xa jinchehe xa ná cosa jianha inchin jaha ra tjanguilhi ra xa.

¹⁵ Cai Herodes sarroanna xí jiji iná, ixin jehe xa xonhi cosa jianha jica xa. Ovicon ra que xí jiji xonhi jianha dinchehe xa para que sequininxin ndasenhe xa.

¹⁶ Janha tsetonha soan xa castigado, cottimeja tsanchjanda xa satsji xa.

¹⁷ Ngain quiai mé, Pilato vechonda costumbre de tançhjanda ná de tti tteaxinhí para sattji para que chojni judío icha vaché na.

¹⁸ Pero cainxin na coexinhí na coyao na co ndaço na:

—¡Dantsje xí yá para siguenhe xa co tançhjanda Barrabás satsji!

¹⁹ Co Barrabás jiji coiaxinhí na ngain cárcel ixin jehe joinchequeto chojni ngain ciudad de Jerusalén co ixin jehe nagoenxon chojni.

²⁰ Pilato joinao rrocanchjanda Jesús, mexinxin jehe cjan ndaço ngain na iná,

²¹ pero jehe na icha vinttecoyao na sén co ndaço na:

—¡Nchecrucificá xa! ¡Nchecrucificá xa!

²² Ninxin nttiha ndaço Pilato ngain na:

—Mexinxin, çquehe cosa jianha joinchehe xí jiji? Janha xonhi cosa jianha dittjá xa para que sequininxin senhe xa. Janha tsetonha que soan xa castigado, cottimeja tsanchjanda xa satsji xa.

²³ Pero jehe na vittoexinha na, co icha coyao na co joanchia na que ixin Pilato sinchecrucificá Jesús. Co anto vinttecoyao na jehe na conixin cain xidána que vaquetonha ngain icha xidána hasta que conhe inchin tti jehe na joinao na.

²⁴ Pilato joinchehe inchin jehe na joinao na,

²⁵ co jamé jehe coachjanda sacjoi jehe tti vehe ngaxinhi cárcel ixin joinchequeto chojni co nagoenxon chojni. Co jehe Pilato joanjo Jesús ngain na para que jehe na joinchehe na inchin joinao na ngain Jesús.

Are joinchecrucificá na Jesús

(Mt. 27.32-44; Mr. 15.21-32; Jn. 19.17-27)

²⁶ Are osatedicao xisoldado romano Jesús para joinchecrucificá xa, vetan xa ná xí de Cirene que vinhi Simón. Jehe Simón rato mé joigaha ciudad de Jerusalén. Co jehe xa tse xa Simón mé co joinchecha xa crue Jesús co joincherroé xa Jesús.

²⁷ Co terroé anto tsje chojni, co tsje nchí que tetsjanga ncha co tetoyao ncha de ixin joachjaoen Jesús.

²⁸ Pero Jesús tsjehe ngain cain nchí mé co ndacho:

—Jaha ra xo nchí ra de ngain Jerusalén, tsjangaxinha ni ra janha, sino que de ixin jaha ra misma, co de ixin xanha ra.

²⁹ Ixin ojtonchiaon nchanho que chojni rrondacho na: “Anto chjoin para ixin tti nchí que choha rrochonda ncha chjan, tti nchí que xonhi chjan joincheconcjihi, ni joinchecai.”

³⁰ Co are mé chojni tsexinhi na rrondacho na ngain tsje jna: “Dinttji ra ngataha janha na”; co rrondacho na ngain tsje jnanchjan: “Ttema ni ra.”

³¹ Ixin si janha inchin ná nttá que jichon co janhi nchehe na nganji na janha, ¿mé quehe sinchehe na nganji jaha ra, que jaha ra inchin tti nttaxema?

³² Cai nttiha tedicao xa yó xichehe para joigoen xa xichehe mé conixin Jesús.

³³ Are ojoiji na ngain tti lugar que dinhi Nttalorojá Chojni, nttiha joinchecrucificá xa Jesús conixin jehe tti yó xichehe: ná xa ngain lado jian de Jesús, co iná xa ngain lado cjon.

³⁴ Co are otenchecrucificá xa Jesús jehe ndacho:

—Padre, nchetjañehe xí tehe ixin noeha xa quehe tenchehe xa.

Co cain xisoldado mé joantsje xa suerte para chjeyehe xa lontoe Jesús.

³⁵ Co tsje chojni cjoi na nttiha para vicon na, co cai cjoi tsje xí que vinttechonda joachaxin ngain chojni judío; cain xí mé cjoanoa xa Jesús co ndacho na:

—Jehe nchao cjoengujna icha chojni, pero jai si ndoa jehe tti Cristo tti Dios coinciehe, socon na sanianxin de nganito cruz yá.

³⁶ Cai cain xisoldado nttiha cjoanoa xa Jesús; vintteconchienne xa ngain cruz co joanjo xa vino san para vihi Jesús,

³⁷ co ndacho xa ngain:

—Si jaha tti Rey de chojni judío, danianxin de nganito cruz jaho.

³⁸ Co nttiha já cruz que vengano Jesús vehe ná xón que vetaxin ixin nguigoa griego, latín, co hebreo que ndacho: “Xí jihí tti Rey de chojni judío.”

³⁹ Ná de tti xichehe que tenganito cruz nttiha, ndacho xa feo ngain Jesús:

—Si jaha tti Cristo, danianxin de nganito cruz co nchegania ni ra janha na cai.

⁴⁰ Pero tti xí iná joinchesattehe xa xicompañeroe xa co ndacho xa:

—¿Añagoenha Dios, jaha que rridatto ngain xajeho castigo?

⁴¹ Ján na jí razón que tedotan na tangui jihí ixin tettjenga na hna tti jianha que jointtoho na, pero xí jihí xonhi cosa jianha joinchehe xa.

⁴² Cottimeja ndacho xí mé ngain Jesús:

—Jesús, xaxaon na janha are soixin tsexinhi tsetonha.

⁴³ Jesús ndacho:

—Janha seguro rrindattjo que desde jai jaha osarihi conixin janha nttiha ngajni.

Are ndavenhe Jesús

(Mt. 27.45-56; Mr. 15.33-41; Jn. 19.28-30)

⁴⁴ Are inchin ngosine nchanho, cottimeja ndaconaxin xehe ngoixin ngataha nontte nttiha, co mé conchjenhe hasta ní hora tsoctjin.

⁴⁵ Nchanho ndaconaxin xehe, co tti manta que vettoa ngaxinhi tti nihngo icha importante ndavichjenga ngosinenxin manta.

⁴⁶ Cottimeja Jesús coyao co ndacho:

—Padre, ngá rá tsín espirituna.

Co are jehe joexin ndacho jihí, jehe ndavenhe.

⁴⁷ Are vicon xicapitán romano ixin quexén conhe, jehe xa xaon xa ngain Dios co ndacho xa:

—Ján, ndoa xí jihí xonhi jianha jica xa ngattoxon con Dios.

⁴⁸ Cain chojni que te nttiha, are vicon na cain mé, savinttectji na co xanguí na pechoe na tton ixin anto coá na joachjaoen.

⁴⁹ Co cain niamigoe Jesús, co cain nchí que joixin desde Galilea para vacao ncha, cjinxin tavintte na para vicon na cain cosa jihí.

*Are xavá Jesús**(Mt. 27.57-61; Mr. 15.42-47; Jn. 19.38-42)*

⁵⁰ Vehe ná xí jian de ngain ansén xa que vinhi xa José, co rajné xa Arimatea ngain regioen Judea. Xí mé ná xijuez ngain juzgadoe nihngo.

⁵¹ José jiji cai jichonhe tiempo are Dios siquetonha ngataha nontte. Co jehe coñao de ixin tti joinchehe icha xijuez ngain Jesús.

⁵² Mexinxin jehe cjoy joitsjehe Pilato para joiganchiehe joachaxin ixin jehe sasicao cuerpoe Jesús.

⁵³ Co después de joincheganianxin cuerpoe Jesús de nganito cruz, jehe coensiha cuerpoe Jesús ná manta roa co joiquín cuerpo ngain ná cueva que odingue na ngadoho ná ttjao tti xa xonhi chojni dixavá.

⁵⁴ Mé cjoy tsocjin víspera de ngain tti nchanho que nchejogaha na.

⁵⁵ Tti cain nchí que joixin desde Galilea conixin Jesús cjoy ncha vintteguitsjehe ncha cueva mé, para vicon ncha quexén vittohe cuerpoe Jesús.

⁵⁶ Co are sacjan ncha para nchiandoha ncha, joinchexjian ncha perfume co pomada para cuerpoe Jesús; cottimeja ngain tti nchanho que nchejogaha na, jehe ncha vinttenchejogaha ncha cai inchin ttetonha ley que vayé Moisés.

24*Are xechon Jesús**(Mt. 28.1-10; Mr. 16.1-8; Jn. 20.1-10)*

¹ Domingo, saho nchanho de semana, ndoyo, cain nchí mé cjan ncha ngain sepultura joicao ncha tti cain perfume que cointtecjan ncha, co icha nchí joicao chó ncha.

² Are vintteguiji ncha nttiha, vicon ncha tti xo que vejé sepultura mé ijiha xo nttiha.

³ Co jehe ncha vintteguixinhi ncha sepultura mé pero ivittjaha ncha cuerpoe Jesús.

⁴ Anto vinttexaon ncha co ni inoeha ncha quehe sinchehe ncha, are vicon ncha yó xí tatengattjen xa ngaca ncha tengá xa lontto tedaquima.

⁵ Co ixin jehe ncha anto vinttexaon ncha vintteguisé ncha hasta tti ngataha nontte, co jehe cayoi xí mé vinttendacho xa ngain ncha:

—¿Quedonda jaha ra tettjé ra ngain sepultura tti jichon jai?

⁶ Jehe icoha nttihi ixin jehe xechon. Xaxaon ra quexén ndattjo ra are jehe xa vehe ngain Galilea.

⁷ Jehe ndacho que jehe, tti Xí que joixin de ngajni, chonda que sinchechienhe na ngá rá chojni jianha, co jehe na sinchecrucificá na, pero ngain nchanho ninxin jehe rroxechon.

⁸ Cottimeja xaxaon cain nchí mé tti ndacho Jesús,

⁹ co después de cjanxin ncha de ngain sepultura, coequin ncha cain jiji ngain tti ttejngo chojni que vacao Jesús, co ngain icha chojni cai.

¹⁰ Co tti cain nchí que joicao joajna jiji ngain tti ttejngo chojni que vacao Jesús, cjoy María Magdalena, co Juana co iná María, janné Jacobo, co icanxin nchí.

¹¹ Pero tti chojni que vacao Jesús vitticaonha na tti ndacho cain nchí mé.

¹² Pero masqui jamé xaxaon cain na, Pedro vachje co coinga cjoy ngain sepultura. Co are jehe tsjehe ngaxinhi sepultura, jehe vicon tti manta roa que vesia cuerpoe Jesús tají manta ná lado. Cottimeja sacjan para tti nchia co anto goan admirado de ixin quehe diconhe.

*Tti conhe are ngatja nttiha para Emaús**(Mr. 16.12-13)*

¹³ Ngain xajeho nchanho mé, yó de chojni que vitticaon Jesús satettji na ngain ná rajna dinhi Emaús, inchin ttejngo kilometro cjinxin de Jerusalén.

¹⁴ Tetjao na de ixin cain tti conhe Jesús.

¹⁵ Co are jehe na tetjao na mé, Jesús mismo conchienenhe ngaca na co sacjoy conixin jehe na.

¹⁶ Pero masqui vicon na que nttiha jittji Jesús, jehe na joatsoanha na, ixin inchin ná cosa cayacoen jmacon na para joatsoanha na Jesús dada.

¹⁷ Cottimeja Jesús joanchiangui ngain na co ndacho:

—¿Quehe tetjao ra jaxon que satettji ra ngain nttiha jiji? ¿Quedonda techinhi ra?

¹⁸ Ná de jehe na que vinhi Cleofas ndacho:

—Ngoixin mundo nohe chojni tti coenxin Jerusalén ngain nchanho tehe. ¿Apoco jaha masqui joixin nttiha noaha quehe conhe?

¹⁹ Cottimeja Jesús ndacho:

—¿Quehe conhe?

Co jehe na ndacho na:

—De ixin tti conhe Jesús de Nazaret, que jehe cjoí ná profeta jian ngattoxon con Dios co ngattoxon con cainxin chojni. Co jehe joichonda anto tsje joachaxin de ngain tti vanchehe co de ngain tti jehe vanichja.

²⁰ Co de ixin quexén cain xidána que ttonhe icha xidána co cain xittetonha nganji na joinchechienhe xa ngain chojni romano para goenxin na nganito cruz.

²¹ Janha na vaʒaxanho na que jehe tti rrochjé libertad chojni de ngain nación Israel. Co jai ochonda ní nchanho que jehe ndavenhe.

²² Masqui canxion nchí que cai vacao jehe conixin janha na, nchí mé joincheʒaon na ncha ixin vintteci ncha ndoyo ngain sepulturé jehe,

²³ co ixin vittjaha ncha cuerpoe Jesús, cjan ncha ngain tti nchia que vintte na co ndachjenji na ncha que ixin vintteguicon ncha yó ángel que ndačo ngain ncha que ixin Jesús jichon jai.

²⁴ Cottimeja canxion de nicompañerona na cjoí na ngain sepultura co vicon na nttiha jamé inchin ndačo nchí que vintteci saho, pero Jesús viconha na.

²⁵ Cottimeja Jesús ndačo ngain cayoi xí mé:

—¡Atto ttinxinha ra jaha ra, co anto tetonchjanha ra para sitticaon ra cain tti dindačo profeta!

²⁶ ¿Apoco Cristo chondaha que rroconhe cain tti tangui jihi icha saho que vayé cain joachaxin que jiquininxin?

²⁷ Cottimeja jehe coexinhi ndache na quehe rročo cain texto de ngain tti jitaxin Palabré Dios tti jinichja de ixin jehe Jesús; coexinxin de ngain libroe Moisés, co joinchehe sigue ngain libro que dicjin cain profeta.

²⁸ Are joiji na ngain tti rajna que tettji na, Jesús joinchehe que jehe rrojinchehe sigue nttié.

²⁹ Pero jehe na joinchetsenhe na ñao que sittohe ngain na, co ndačo na:

—Dittoha nttihi nganji na, ixin ondajitonaxin xehe.

Cottimeja Jesús joixinhi nchia mé para vittohe nttiha ngain na.

³⁰ Co are jehe otavehe ngain na ngain mesa có niottja co joanjo gracias ngain Dios, cottimeja jehe conchinji nio co joanjo nio ngain na.

³¹ Ngain rato mé, Dios vinttjian tti tecayacoen jmacon na, co jehe na joatsoan na que jehe Jesús; pero jehe anto daca ndavitján de ngattoxon con na.

³² Co ndache chó na:

—¿Ajeha conohe ansean na anto chjoin are jehe nichja nganji na ngatja nttiha co jindattjo na de ixin tti jitaxin Palabré Dios?

³³ Cottimeja jehe na ixonhi chonhe na, sino que jaicoa có na nttiha co sacjan na para Jerusalén. Nttiha vittjaxin na tti tteingo chojni que vacao Jesús tate na cain na conixin icha nicompañeroe na.

³⁴ Co jehe na ndačo na ngain tti yó xí que joí:

—Ján, ndoa dixechon Jesús, ixin Pedro vicon.

³⁵ Cottimeja tti yó xí que nandá joí ndačo xa tti conhe ngatja nttiha, co quexén joatsoan xa Jesús are jehe conchinji niottja.

Are Jesús ʒago ngain chojni que vacao

(Mt. 28.16-20; Mr. 16.14-18; Jn. 20.19-23)

³⁶ ʒa tetjao na de ixin jihi, are ʒago Jesús, joiguengattjen ngayé na co joanjo joajna ngain na co ndačo:

—Dayehe ra tti chjoin que tsonohe ansean ra.

³⁷ Jehe na anto vintteʒaon na co ʒaxaon na ngain rato mé que jehe na tedicon na espiritue ná nindadiguenhe.

³⁸ Pero Jesús ndačo ngain na:

—¿Quedonda anto teʒaon ra? ¿Quedonda ʒa chondaha ra seguro ngain ansean ra de ixin janha?

³⁹ Tsjexin ra ngain rana co ngain rotena tti joinchenina na. Catte ni ra si rinao ra, co sicon ra que ján, janha. Ná espíritu chondaha nntao ni nntaloro inchin jaha ra tedicon ra que janha rrichonda jaxon.

⁴⁰ Are jehe ndačo jihi, jehe cjoago ngain na rá co rotté tti dijidoho clavo are ngainito cruz.

⁴¹ Pero ixin anto ché na co cai ʒaon na hasta jehe na ʒa choha vitticaon na ixin jehe mero nttiha, mexinxin Jesús ndačo ngain na:

—¿Achonda ra nttihi tti sine ní?

⁴² Cottimeja jehe na chjé na Jesús rioho copescado dichjan co rioho niottja de tsjén cormena.

⁴³ Co jehe tse mé co joine nttiha ngattoxon con na.

⁴⁴ Cottimeja ndačo ngain na:

—Tti janha conná, mé tti joindattjo ra are janha xa joarihi nganji ra, que chonda que joiconhe cain tti jitaxin de ixin janha ngain ley que vayé Moisés co ngain cain libro que dicjin cain profeta co ngain salmo.

⁴⁵ Cottimeja jehe joinchequinxin na tti jitaxin ngain Palabré Dios,

⁴⁶ co ndačo ngain na:

—Janhi jitaxin ngain Palabré Dios que Cristo chonda que ndasenhe, co nchanho ninxin jehe chonda que rroxechon.

⁴⁷ Co de ixin nombré jehe icha chojni chonda que sinchenohe na chojni de cainxin nación ixin chonda na que tsentoxinhi na vidé na para que cain tti jianha que tenchehe na nchao sitjañehe na. Co tsexinxin tsonohe chojni jamé desde ngain Jerusalén.

⁴⁸ Jaha ra tti testigo ra de cain cosa jiji.

⁴⁹ Co tsjexin ra, janha rrorroanha nganji ra Espíritu Santo tti ndačo Ntodana sanjo Ndo nganji ra. Pero tadintte ra nttihi ngain ciudad de Jerusalén hasta que sayeja ra tti joachaxin mé que tsixin de noi.

Are Jesús sacojín para ngajni

(Mr. 16.19-20)

⁵⁰ Cottimeja Jesús savačhjecaouxin na de ngagaha ciudad co sacjoi na hasta rajna Betania, co nttiha jehe tsín rá noi para joinchençaon na.

⁵¹ Co are jehe mero jinchençaon na, jehe sacjoixin de ngayé na, co sacojín para ngajni.

⁵² Jehe na, después de joinchecoanxinhi na Jesús, sacjan na para Jerusalén, co anto ché na.

⁵³ Co cainxin tiempo jehe na vintte na ngain nihngo icha importante para vanchecoanxinhi na Dios. Amén.

Tti Jian Joajné Jesucristo Que Dicjin Juan

Tti Palabra que Dios nichja conchjian ná xí

¹ Are cainxin coexinhi vehe, ovehe Xenhe Dios tti dinhi Palabra que Dios nichja, co jehe mé vehe ngain Dios, co jehe ján Dios.

² Are mé jehe ovehe ngain Dios.

³ Co de ixin jehe mé, Dios joinchekhjian cainxin cosa; xonhi cosa que jí que jeha Dios joinchekhjian de ixin jehe mé.

⁴ Co jehe mé tti danjo vida, co are chojni ditticaon ngain jehe mé, vida jiji inchin joadingasán para ixin cain chojni.

⁵ Co joadingasán jiji jinchengasán ngain tti jí naxin xehe, co tti naxin xehe ttixinha ncheganga jehe joadingasán mé.

⁶ Co Dios coinchiehe ná xí que vinhi Juan.

⁷ Co xí mé vehe xa ná testigo para nichja xa de ixin jehe joadingasán mé para que cain chojni rroguitticaon na de ixin jehe tti nichja xí mé.

⁸ Juan jeha jehe tti joadingasán, jehe jeho ná testigo que jói para nichja ndoa de ixin joadingasán mé.

⁹ Tti mero joadingasán que nchengasenhe cain chojni, ojittí ngataha nontte ngain tiempo mé.

¹⁰ Co jehe Xenhe Dios, tti dinhi Palabra que Dios nichja, vehe ngataha nontte, co masqui jehe joinchekhjian nontte, chojni ngataha nontte joatsoanha na jehe.

¹¹ Jehe jói ngain nacioen pero chojni de nacioen vayeha na.

¹² Pero ixinha mé, icanxin chojni vayé na jehe co vitticaon na. Co ngain chojni jiji jehe joanjo joachaxin de dinhi na xenhe Dios.

¹³ Co jehe na jeha inchin xenhe ná ndodaha de ngataha nontte nntihi que doan inchin cain chojni, co jeha ixin ná xí jinao ná nchí, o ixin ná xí jinao concjilhi xenhe; jehe na jeha jamé na, jehe na mero xenhe Dios ixin Dios ndačo jañá.

¹⁴ Co jehe Xenhe Dios, tti dinhi Palabra que Dios nichja, conchjian ná xí co vehe ngayá na, co jehe anto rinao cainxin chojni, co jehe chonxin cainxin tti ndoa. Co janha na vicon na tti joachaxin que jehe chonda ixin jehe tti nacoaxinxon Xenhe Ndodá na que ttjen ngajni.

¹⁵ Juan nichja jian de ixin jehe xí mé, co ndačo:

—Xí jiji tti janha vandačhan are ndačhan que jehe tti tsí después de janha, mé tti icha importante que janha ixin ovehe icha saho que janha.

¹⁶ Jehe chonda cainxin tti jian co cain ján na dayé na tti jian mé cada nchanho ixin jehe nntanchaon na.

¹⁷ Tti ley de Dios vayé na de ixin Moisés, pero tti rinao na cain chojni co tti ndoa, cayoi mé ttixin de ngain Jesucristo.

¹⁸ Xonhi tiempo ná chojni vicon Dios. Pero tti nacoaxinxon Xenhe Dios que jí ngain jehe chonxin Xan jian ngain jehe, co Xan mé Xan jointtagatsoan na de ixin Dios.

Tti ndačo Juan que vancheguite chojni

(Mt. 3.11-12; Mr. 1.7-8; Lc. 3.15-17)

¹⁹ Chojni judío que vinttechonda joachaxin ngain Jerusalén rroanha na canxion dána co canxion xí que vinttechonda xa xa ngain nihngo icha importante. Rroanha na chojni mé ngain Juan, tti vancheguite chojni, para joanchianguihi na ixin quensen jehe.

²⁰ Co jehe ndačo claro:

—Janha jeha Cristo na tti Dios rroanha.

²¹ Cottimeja cjan na joanchianguihi na:

—¿Quensen jaha remé? ¿Ajaha tti profeté Dios dinhi Elías?

Co Juan ndačo:

—Nahi, jeha janha.

Cottimeja joanchianguihi na:

—¿Quexén remé? ¿Ajaha tti profeté Dios que Moisés ndačo que tsí?

Co Juan ndačo:

—Nahi.

²² Cottimeja ndache na:

—¿Quensen jaha remé? Ixin chonda na que rronattjan na tti chojni que rroanha na nntihi tti rrondačo jaha. ¿Quehe rrondachjenji ni ra ixin quensen jaha remé?

²³ Juan ndačo:

—Profeta Isaías nichja de ixin janha are jehe ndačo que tsinhi ra tté ná chojni que toyaoxin de ngagaha jna que rrondačo: “Danttjehe ra ná nttiha nao para ixin jehe tti chonda cain joachaxin.”

²⁴ Co chojni mé xifariseo rroanha na para joanchianguihi na Juan cain mé.

²⁵ Co jehe na ndačo na ngain:

—Mexinxin, si jaha tti Cristo que Dios rrorroanha, ni jaha Elías, ni jaha tti profeté Dios, ¿quedonda ncheguitte chojni?

²⁶ Juan ndačo:

—Janha nttaguitte chojni conixin jinda, pero de ngayá ján na xo judío na jí ná chojni que chonxinha ra.

²⁷ Chojni mé tsí después de janha masqui jehe icha importante que janha. Co janha jiquininxinha na ni siguiera tsonxindangá corrié catté.

²⁸ Cain jihi conhe ngain tti lugar que dinhi Betábara, que jí lado čhinxin nchanho de río Jordán, tti vancheguittexin Juan chojni.

Jesús cjoí inchin coleco para ixin Dios

²⁹ Ndoexin Juan vicon Jesús jitonchienhe ngain jehe, co Juan ndačo:

—Tsjenxin ra, xí jihi inchin tti coleco que xanjo para ngain Dios ixin jehe xa sanjo xa cuerpoe xa inchin ná coleco para tsjenga xa hna cain cosa jianha que nchehe chojni ngataha nontte.

³⁰ Janha nichja de ixin jehe xa are ndačhjan: “Después de janha, tsí iná xí co jehe xa icha importante xa que janha ixin ovehe xa icha saho que janha.”

³¹ Janha mismo venonaha quexehe xí mé, pero janha joihi para jointtaguitte chojni conixin jinda para que chojni judío satsoan na jehe xí jihi.

³² Cai ndačo Juan:

—Janha vicon Espíritu Santo xincanjinxin de ngajni inchin ná conttoanajni, co vittohe ngataha jehe xí jihi.

³³ Hasta ngain nchanho mé, janha xa venonaha quensen jehe xa, pero Dios, tti coetonna para jointtaguitte chojni conixin jinda, jehe ndachjenji na: “Are sicon Espíritu Santo rroxincanji co sittohe ngataha ná xí, xí mé tti sincheguittexin chojni conixin Espíritu Santo.”

³⁴ Janha ovicon xí mé, co janha ná testigo na de ixin jehe xí mé que jehe xa ndoa tti Xenhe Dios.

Tti saho chojni que vacao Jesús

³⁵ Ndoexin nttiha vehe Juan iná conixin yó xí que vacao.

³⁶ Co are vicon Juan vatto Jesús, ndačo Juan:

—Tsjenxin ra, yá tti inchin coleco que xanjo para ngain Dios.

³⁷ Tti yó xí que vacao Juan coinhi xa tti ndačo, co sarroé xa Jesús.

³⁸ Cottimeja Jesús tsjehe tti joixin, co vicon ixin terroé cayoi xí mé, co ndačo ngain xa:

—¿Quehe tettjé ra?

Jehe xa vinttendačo xa:

—Maestro, ¿quettinó rrihi?

³⁹ Jesús ndačo:

—Xacoi ra sitsjehe ra.

Cottimeja vintteci cayoi xí mé para vintteguicon xa quettinó vehe Jesús co ngoixin rato mé nttiha tavintte xa ngain Jesús hasta ndajoexin nchanho mé ixin hora mé cjoí inchin nó hora tsocjin.

⁴⁰ Ná de jehe tti yó xí que vinttequinhi tti ndačo Juan co sarroé xa Jesús, ná de jehe xa vinhi xa Andrés, co mé cjoí xanchó Simón Pedro.

⁴¹ Andrés ixonhi chonhe, jehe sacjoi joicjé Simón, xanchó jehe Andrés, co ndačo ngain Simón:

—Vittja na tti Mesías.

Co Mesías rročo Cristo tti Dios rroanha.

⁴² Cottimeja Andrés joicao Simón tti jí Jesús, co are Jesús vicon Simón, ndačo ngain:

—Jaha dinhi Simón, xitsihi Jonás, pero jai jaha sinhi Cefas.

Co Cefas rročo xajeho Pedro ixin nguigoa griego; co cayoi nombre yá rročo xo.

Jesús vayé Felipe co Natanael

⁴³ Ndoexin Jesús xaxaon para que jehe cjoí ngain nonttehe Galilea, pero icha saho jehe vetan Felipe, co ndačo Jesús ngain:

—Xacoi chjin na.

⁴⁴ Co Felipe mé joixin de ngain rajna Betsaida, xajeho rajné Andrés co Pedro.

⁴⁵ Cottimeja cjoí Felipe joicjé Natanael, co nda'cho ngain:

—Janha na vicon na tti xí que dicjin Moisés de ixin xí mé ngain libroe ley, co dicjin cainxin profeta de ixin xí mé cai. Jehé Jesús, xitsihi José, rajné Nazaret.

⁴⁶ Nda'cho Natanael:

—¿Apoco nchao sachjexin ná xí jian de ngain Nazaret?

Felipe nda'cho:

—Xacoi sitsjehe.

⁴⁷ Are Jesús vicon que Natanael jitonchienhe, Jesús nda'cho:

—Ntíhi joí ná xí mero chojni Israel co xí jíhi xonhi chojni ncheyehe xa.

⁴⁸ Cottimeja Natanael joanchiangui co nda'cho:

—¿Quexén chonxinxin na?

Co Jesús nda'cho:

—Janha vicon jaha are jaha tarrihi ngangui nttahigo icha saho que Felipe rrogayaha.

⁴⁹ Cottimeja Natanael nda'cho:

—Maestro, jaha tti Xenhe Dios; jaha tti Rey de Israel.

⁵⁰ Jesús nda'cho:

—¿Avitticaon na jehó ixin ndattjo vicon jaha tarringahngui nttahigo? Jaha sicon cosa icha jian que jíhi.

⁵¹ Cai nda'cho Jesús:

—Rrindattjo ra ndoa que jaha ra sicon ra ngajni jixangué co ángel de Dios tsajinhi co rroxincanji ngataha na janha, tti Xí que joixin de ngajni.

2

Are cottehe yó chojni ngain Caná de Galilea

¹ Ní nchanho después vehe ná quiai para yó chojni que cottehe ngain rajna Caná ngain regioen Galilea. Janné Jesús nttiha vehe jan,

² co ndache na Jesús ixin jehé cjoí ngain quiai mé, jehé conixin chojni que vacao.

³ Co are jehé na te nttiha, ndajoexin vino, mexinxin janné Jesús nda'cho jan ngain:

—Ichondaha na vino.

⁴ Pero Jesús nda'cho:

—Soixin, ¿quedonda ndachjenji na janha yá? Tiempo xa ttiha para janha tsjenguijna chojni.

⁵ Pero jehé janné Jesús nda'cho jan ngain chojni que tedanjo jehé vino mé:

—Nchehe ra cain tti jehé rrondattjo ra.

⁶ Nttiha vintte incjaon nchíxa de xo, tti vanchegonda chojni judío para vaconttixin na jinda rá na tsje nttiha inchin costumbré jehé na. Co cada nchíxa mé vaguiquia inchin ochenta o cien litro de jinda.

⁷ Jesús nda'cho ngain chojni que tettequia vino:

—Nche'che ra cain nchíxa tehe de jinda.

Co jehé na hasta joinche'chetaonca na cain nchíxa mé,

⁸ cottimeja Jesús nda'cho ngain na:

—Janché, dantsje ra nchin nda co ttiohe ra niencargado.

Co jamé joinchehe na.

⁹ Co jinda mé ondadicjan nda vino co jehé noeha ttinó joixin vino mé, jehó cain chojni que cointtjecjan vino mé vinttenohe na ixin jehé na joantsje na jehó jinda. Co tti encargado vayé xinovio

¹⁰ co nda'cho ngain xa:

—Cainxin chojni saho danjo na tti vino icha jian, co are cain chojni que díhi, atto ovíhi na, cottimeja díhi na tti vino corriente. ¡Pero jaha díquenchjinha tti vino icha jian hasta jaxon!

¹¹ Jíhi tti joinchehe Jesús ngain Caná de Galilea co jíhi tti saho milagro que jehé joinchehe co milagro mé xagoxin ixin jehé Jesús chonda anto tsje joachaxin. Co cain chojni que vacao Jesús vitticaon na ngain jehé.

¹² Después de jíhi, jehé Jesús co janné, co xanchó conixin cain chojni que vacao jehé Jesús sacjoi na para ngain rajna Capernaum, co nttiha vintte na canxion nchanho.

Jesús joincheroa nihngo icha importante

(Mt. 21.12-13; Mr. 11.15-18; Lc. 19.45-46)

¹³ Ixin ojoiconchian tti quiai dinhi pascua para ixin cain chojni judío, Jesús sacjoi para ngain ciudad de Jerusalén.

¹⁴ Nttiha ngain patioe nihngo icha importante vittja Jesús chojni que tenchecji coxinttá, coleco, co conttoa, co chojni que tate ngain puestoe tti dasinguixinxin na tomi para chojni vachonda na suelto.

¹⁵ Are Jesús vicon jiji, joinchecjian ná cuarta de jino, co joantsjexin cain chojni mé de nttiha, jehe na conixin colecoe na, co coxinttehe na. Co tti chojni que tedasinguixin tomi, joanqué tomi na ngataha nontte co cjoa mesa ndaha.

¹⁶ Co Jesús nichja ngain cain chojni que tenchecji conttoa co ndačo:

—¡Dantsjexin ra cain jiji de nttihi! ¡Nchecjianha ra ngain nchiandoha Ndodana ná ndásin!

¹⁷ Cottimeja tti chojni que vacao Jesús xaxaon na ixin ndačo ngain tti jitaxin Palabré Dios: “Janha anto toñaonxin nchiandoi.”

¹⁸ Cottimeja chojni judío que vinttechonda joachaxin joanchiangui na ngain Jesús co ndačo na:

—¿Quehe señal tsjagohna ni ra para que janha na rrochonxin na seguro que jaha chonda joachaxín Dios para nchehe jiji?

¹⁹ Jesús ndačo:

—Tonxantte ra nihngo icha importante jiji, co nincoa nchanho janha sinttachjian nihngo iná.

²⁰ Cottimeja chojni mé ndačo na:

—Cuarenta y seis nano conchjenhe chojni para joinchecjianxin na nihngo icha importante jiji. ¿Co apoco jaha nchao sinchecjian nihngo nincoa nchanho?

²¹ Pero tti nihngo que Jesús nichja, nichja de ixin mero cuerpoe jehe.

²² Mexinxin are Jesús xechon de tti jehe ndavenhe, cain chojni que vacao jehe xaxaon na de ixin jiji tti jehe ndačo, co vitticaon na tti ndačo ngain tti jitaxin Palabré Dios, co cai vitticaon na tti ndačo Jesús ngain na.

Jesús chonxin quehe xaxaon cain chojni

²³ Are Jesús vehe ngain Jerusalén ngain quiai que dinhi pascua, atto tsje chojni vitticaon na jehe are vicon na tsje milagro que jehe joinchehe.

²⁴ Pero Jesús vechondaha confianza ngain na ixin jehe ovechonxin ngain ansén cain na.

²⁵ Jehe gondeha ni ná chojni que rrondache de ixin icha chojni ixin jehe mismo venohe quehe xaxaon cain chojni.

3

Are Jesús nichja ngain Nicodemo

¹ Vehe ná xifariseo vinhi Nicodemo, mé cjoí ná xí importante ngayé chojni judío.

² Nicodemo jiji ná ttie cjoí para joitsjehe Jesús co ndačo:

—Maestro, nona na que Dios rroanha jaha para sinchecoanna ni ra, ixin xonhi chojni nchao sinchehe tsje cosa inchin jaha rrinchehe si Dios coha ngain chojni mé.

³ Cottimeja ndačo Jesús:

—Janha rrindattjo ndoa, que xonhi chojni nchao rrochonda parte ngain tti ttetonha Dios si jehe tsoncjihá iná.

⁴ Nicodemo ndačo:

—Pero ¿queén ná xí ojje rrocjan tsoncjihá iná? ¿Apoco nchao rrocjan xa ngaxinhí tsehe janné xa para rrocjan xa tsoncjihá iná?

⁵ Co Jesús ndačo:

—Janha rrindattjo ndoa, que tti chojni que tsoncjixinha de ixin jinda co de ixin Espiritu Santo choha sehe ngain parte tti ttetonha Dios.

⁶ Tti toncjixin de ngain chojni, jehe jichjon jehó de ngain cuerpoe, co tti otocnjihá de ixin Espiritu Santo, jehe ojchjon de ngain espiritue.

⁷ Xaonha que rrindattjo: “Cainxin chojni chonda na que tsoncjihá na iná.”

⁸ Chintto danotte ttinó jehe rinao, co jaha ttinhí ruido que nchecjian chintto, pero noaha de ttinó ttixin chintto co ni ttinó sattji chintto. Jañá cai chojni choha ttinxin na quexén chojni toncjihá de ixin Espiritu Santo.

⁹ Cottimeja, Nicodemo cjan joanchiangui iná:

—¿Queén nchao tsonhe jiji?

¹⁰ Jesús ndačo:

—Jaha, que ná jian maestroe ley de Dios para chojni Israel, ¿axa noaha cain cosa jiji?

¹¹ Janha rrindattjo ndoa, que janha na nichja na de lo que tti nona na co janha na nichja na de lo que tti vicon na, pero jaha ra ditticaonha ra tti ndattjo ra janha na.

¹² Si ditticaonnaha ni ra are rrinichjaha ra de ixin cosa ngataha nontte jiji, ¿quexén sitticaon ra si rronichjaha ra de ixin cosa que jí ngajni?

¹³ Xonhi chojni coajinhí para ngajni, sino janha, tti Xí que joixin de ngajni, co janha rrihi nttiha.

¹⁴ Co jañá inchin Moisés joinchechjian ná conché de chia co coenganito conché mé nttá ngagaha jna, cai janha, tti Xí que joixin de ngajni, chonda que saringanito ná nttá

¹⁵ para que cainxin chojni que ditticaon nganji na janha, chojni mé tsjiha na ngain infierno, sino que rrochonda na iná vida naroaxin que Xonhi tiempo tsjexin.

QueXén Dios rinao cainxin chojni

¹⁶ Dios anto rinao cainxin chojni ngataha nontte, mexinxin joanjo tti nacoaxinxon Xenhe para que cainxin chojni que ditticaon ngain jehe Xan tsjiha na ngain infierno, sino que rrochonda na iná vida naroaxin que Xonhi tiempo tsjexin.

¹⁷ Dios jeha rroanha Xenhe ngataha nontte para sinchecastigá Xan chojni; Dios rroanha Xenhe para tsjenguijna Xan cain chojni para rrochondaha na castigo de cainxin cosa jianha que nchehe na.

¹⁸ Tti chojni que ditticaon ngain Xenhe Dios, chojni mé rrochondaha na castigo, pero tti chojni que ditticaonha, mé Dios ondacho ixin sinchecastigá na ixin ditticaonha na tti nacoaxinxon Xenhe Dios.

¹⁹ Dios sinchecastigá tti chojni que ditticaonha Jesucristo ixin are Jesucristo joí ngataha nontte, jehe joí inchin joadingasán, co jehe na icha joincheXoxinhí na tti naxin xehe ixin vanchehe na cosa jianha.

²⁰ Cain chojni que nchehe jianha ningaconhe na joadingasán co tonchiena na ngain tti jí joadingasán para que tsononxinha tti jianha que tenchehe na.

²¹ Pero chojni que tenchehe jian, chojni mé tonchienhe na ngain tti jí joadingasán para que sicon icha chojni que jehe na tenchehe na inchin rinao Dios.

Juan, tti vancheguite chojni, cjan nichja de ixin Jesús

²² Después de cain jilhi, Jesús cjoí conixin tti chojni que vacao para ngain nonttehe Judea, co vintte na canxion tiempo nttiha. Co joincheguite na chojni nttiha.

²³ Cai tiempo mé, Juan joincheguite chojni ngain ná rajna que dinhi Enón, chian ngain rajna Salim ixin nttiha vehe atto yé jinda co chojni vaquí na co vajiguite na.

²⁴ Jilhi conhe icha saho que are Juan coiaxinhí na ngain cárcel.

²⁵ Cottimeja canxion chojni que vacao Juan joinchediscutí na ngain canxion chojni judío de ixin queXén icha jian ncheguite na chojni para toroaxin na de tti jianha que nchehe na.

²⁶ Mexinxin cjoí na co joindache na Juan:

—Maestro, ¿axaxaon tti vehe nganji are jaha joarihi lado chinxin nchanho de río Jordán, tti jaha ndachjenji ni ra? Jai jehe mé jincheguite chojni co cainxin na teditticaon na jehe.

²⁷ Cottimeja Juan ndacho:

—Ni ná chojni choha rrochonda joachaxin si Dios rrochjeha.

²⁸ Jaha ra mismo coinna ra are ndachjan claro que janha jeha tti Cristo que Dios rroanha, pero janha tti chojni que joihí icha saho de jehe.

²⁹ Are chojni tottehe na, tti chonda xannovia, mé tti novio, co tti amigoe xinovio jí nttiha co atto ché are ttinhí nichja xinovio. Jañá janha jai cai anto chahna are chojni cjoí na ngain Jesús.

³⁰ Jehe chonda que icha co icha importante sehe, co janha chonda que sarihi icha co icha menos importante.

Juan nichja de ixin tti ttixin de ngajni

³¹ Juan ndacho cai:

—Tti ttixin de ngajni chonda icha tsje joachaxin de cainxin. Co tti ttixin de ngataha nontte jehe de ngataha nontte, co nichja de ixin cosa de ngataha nontte. Pero tti ttixin de ngajni, jehe chonda joachaxin ngain cainxin cosa,

³² co nichja de ixin tti jehe vicon co tti jehe coinhí, pero Xonhi chojni ditticaon tti jehe ndacho.

³³ Pero si choan ni ditticaon, jañá Xago ixin jehe ditticaon que Dios ndacho tti ndoa.

³⁴ Jehe tti Dios rroanha nichja palabré Dios, ixin Dios danjo Espíritu Santo ngain jehe hasta tti ichoha.

³⁵ Ndo dé rinao Ndo jehe, co chjé Ndo cainxin joachaxin.

³⁶ Chojni que ditticaon Xenhe Ndo chonda na iná vida naroaxin que Xonhi tiempo tsjexin. Pero tti rinaoha ditticaon Xenhe Ndo, rrochondaha vida mé, co sayé tti anto soji castigoe Dios.

¹ Cottimeja xifariseo coinhi na que Jesús vechonda icha tsje chojni que vaguitticaon co icha tsje chojni vancheguite que Juan.

² Pero jeha Jesús tti vancheguite chojni; jeha tti chojni que vacao Jesús tti vancheguite na.

³ Co are Jesús conohe jiji, jeha vahjexin de Judea para sacjan ngain Galilea.

⁴ Co ngain viajé chonda que vatto ngain regioen Samaria.

⁵ Co nttiha joiji ngain ná rajna que vinhi Sicar, chian ngain nontte que Jacob joanjo ngain xenhe, xan vinhi José, anto tsje nano icha saho.

⁶ Co nttiha vehe tti pozo que vancheguini na pozoe Jacob. Jesús oconhjen jói, mexinxin tavetanda ngandehe pozo nttiha. Co hora mé inchin ngosine nchanho.

⁷⁻⁸ Co cain chojni que vacao Jesús savintteji na ngain rajna para joiquehna na cosa que sine na. Co hora mé ná nchí de Samaria jói ncha ngain pozo mé para joica ncha jinda, co Jesús ndacho ngain ncha:

—Chjana nchin jinda sihi.

⁹ Cottimeja jeha tti nchí samaritana mé ndacho ncha ngain Jesús:

—Jaha ná chojni judío. ¿quedonda danchiana jinda janha, que janha samaritana na? (Jeha ncha ndacho ncha jamé ixin chojni judío choha na nichjé na chojni samaritano.)

¹⁰ Cottimeja Jesús ndacho:

—Si rroconoha jaha tti danjo Dios co quensen tti jidanchiaha jinda, seguro que jaha rroganchiana jinda janha, co janha rrochjaha jaha jinda que danjo vida.

¹¹ Tti nchí mé ndacho:

—Soixin, ni chondaha tti santsjexin jinda co pozo atto nihnga. ¿De ttinó rrochjananxin jinda que danjo vida?

¹² Ndogoelitona na xanchjen que vinhi Jacob cointtoena na pozo jiji, tti jeha ndo mismo vaguihi ndo jinda nttihi, co nttihi vaguihi cain xenhe ndo jinda co cain coxigoe ndo. ¿Apoco jaha icha que jeha ndo?

¹³ Jesús ndacho:

—Cain chojni que dihi jinda jiji rrocjan rrondacho sihi na jinda iná;

¹⁴ pero tti chojni que sihi tti jinda que janha danjo, ixonhi tiempo rrocjan rrondacho sihi na jinda mé iná, ixin tti jinda que janha danjo rrochinhi jinda mé inchin ná manantial ngaxinhi cuerpoe chojni que sihi nda para sanjo nda iná vida naroaxin que xonhi tiempo tsjexin ngain chojni que dihi jinda mé.

¹⁵ Cottimeja ndacho jeha tti nchí mé:

—Soixin, chjana jinda yá janha, para que janha irrocjanha rrondacho sihi jinda iná, ni irrochondaha que sihi nttihi ngain pozo jiji para sigantsje jinda.

¹⁶ Jesús ndacho:

—Ttji digayehe xixiha, cottimeja sihi nttihi iná.

¹⁷ Jeha tti nchí ndacho:

—Janha chondaha xixihna.

Cottimeja ndacho Jesús:

—Jaha chonda razón ixin ndacho que chondaha xixiha

¹⁸ ixin jaha ojoaricoho naho xí, co tti naho xí mé cjoí mero xixiha, pero tti xí que chonda jai jeha xixiha. Mexinxin jaha ndacho tti ndoa de ixin jiji.

¹⁹ Tti nchí mé are coinhi jiji ndacho:

—Soixin, janha ttianxin que soixin ná profeté Dios.

²⁰ Nigoelitona na xanchjen samaritano jinchesayehe na Dios ngataha jna jiha, pero jaha ra xo chojni judío ndacho ra que ngain Jerusalén, nttiha tti jiquininxin sinttasayaxin na Dios.

²¹ Jesús ndacho:

—Ditticaon tti rrindattjo, que tsí nchanho que jaha ra sinchesayehe ra Ndadá na pero irrochondaha ra que tsji ra ngain jna yá ni ngain Jerusalén.

²² Jaha ra xo samaritano ra noaha ra de ixin quensen nchesayehe ra, pero janha na nona na de ixin quensen nttasayá na ixin tti chojni que tsjenguijna icha chojni para rrochondaha na castigo de cain cosa jianha que nchehe na, jeha chojni mé joixin de ngain chojni judío.

²³ Pero tsí nchanho para que tti chojni que ndoa nchesayehe na Ndadá na pero sinchehe na conixin ansén na jian co inchin jeha Ndo rinao Ndo, co jai ojoí nchanho mé. Ixin Ndadá na rinao Ndo que jañá sinchehe tti chojni que nchesayehe Ndo.

²⁴ Dios jeha espíritu, co tti chojni que nchesayehe Ndo chonda na que sinchehe na conixin ansén na jian co inchin jeha Ndo rinao Ndo.

²⁵ Tti nchí mé ndacho:

—Janha nona que tsí tti Cristo que Dios rroanha, co are jeha tsí, jeha rrondachjenji na cainxin.

²⁶ Jesús ndaicho:

—Janha tti Cristo na, tti jinichja nganji jaha.

²⁷ Co rato mé vinttequí tti chojni que vacao Jesús, co jehe na vinttegoan na admirado ixin Jesús tajitjao ná nchi. Pero ni ná na joinaoha na joanchianguihi na Jesús ixin quehe rinao nchi mé o de quehe jitjao Jesús ncha.

²⁸ Cottimeja tti nchi mé nttiha cointtohe nchižehe co sacjoi para ngagaha rajna para joindache chojni:

²⁹ —Xacoi ra sitsjehe ra ná xí que ndachjenji na janha cainxin tti janha jointtaha. ¿Ajeha jehe xi jiji tti Cristo que Dios rroanha?

³⁰ Cottimeja tsje chojni vinttegačhjexin na de rajna mé para vinttecji na tti jí Jesús.

³¹ Co are nchi mé jindache ncha chojni ngain rajné ncha, chojni que vacao Jesús joinchetsenhe na ñao jehe Jesús co ndaicho na:

—Maestro, jintte.

³² Pero Jesús ndaicho:

—Janha chonda tti jine que jaha ra chonxinha ra.

³³ Co tti chojni que vacao Jesús coexinhí na joanchianguihi chó na jeha na co ndaicho na:

—¿Ani choan chojni joiaohé tti joine?

³⁴ Pero Jesús ndaicho:

—Are janha nttaha inchin rinao jehe tti rroanha na, co tsjena xé jehe, jiji inchin tti jine janha.

³⁵ Jaha ra ndaicho ra: “Xa ditján nó conittjao para cosecha”, pero janha ndattjo ra: tsjehe ra; tsje chojni tti nganji na. Co cain nimé inchin trigo que odicha co onchao jí para tsjejo ni.

³⁶ Tti nchehe xa joí tsje chojni mé, jehe inchin ninchehe Xana ngain cosechana que datse chojni para rrochonda na iná vida naroaxin que xonhi tiempo tsjexin. Mexinxin tti ttenga co tti tsín cosecha ché na nataonxin.

³⁷ Ixin ndoa tti ndaicho dicho: “Jé tti ttenga co jé tti tsín cosecha.”

³⁸ Janha rroanha jaha ra para joitsinhí ra cosecha tti xonhi xa joinchehe ra jaha ra. Jañá jé ni joinchehe xa, co jaha ra tsjejo ra cosecha.

³⁹ Tsje chojni ngain jehe rajna mé de ngain Samaria vitticaon na Jesús, jeha ixin tti ndaicho tti nchi jiha are ndaicho ncha: “Jehe ndachjenji na cainxin tti jointtaha janha.”

⁴⁰ Mexinxin are joí tsje chojni samaritano, jehe na joinchetsenhe na ñao Jesús ixin tarrogehe ngain na. Co Jesús vittohe ngain na nttiha yó nchanho,

⁴¹ co icha tsje na vitticaon na are coinhi na tti ndaicho Jesús.

⁴² Cottimeja jehe na ndache na jehe tti nchi mé:

—Jai ditticanho na, co jeoha ixin tti jaha ndachjenji ni ra, cai ixin janha na mismo coian na tti nichja jehe, co nona na que ndoa jehe tti Cristo que Dios rroanha para que tsjenguijna cain chojni ngoixin mundo para rrochondaha na castigo de cain cosa jianha que nchehe na.

Jesús joinchexingamehe ná xenhe ná xiempleadoe gobierno

⁴³ Yó nchanho vatto, cottimeja Jesús vachjexin de jehe rajna ngain regioen Samaria co joinchehe sigue viajé para ngain nonttehe Galilea.

⁴⁴ Co ndaicho Jesús: “Chojni nchesayeha na ná profeté Dios que joixin de ngain Xajeha rajné na.”

⁴⁵ Are joiji Jesús ngain Galilea, chojni nttiha vayé na Jesús jian ixin cai dinttecji na tti quiai dinhi pascua ngain Jerusalén co nttiha vintteguicon na cain tti joinchehe Jesús ngain quiai mé.

⁴⁶ Cottimeja Jesús cjan para ngain rajna Caná ngain Galilea, tti cjoncjamangaxin Jesús jinda vino. Co nttiha vehe ná xí vechonda jie joachaxin ngain gobiernoe rey. Co xí mé vechonda xa ná xenhe xa que venihi ngain rajna Capernaum.

⁴⁷ Co are xí mé conohe xa que Jesús ojoixin de Judea co joí ngain Galilea, xí mé cjoí xa, joitsjehe xa, co joinchetsenhe xa ñao Jesús ixin tsji ngain nchiandoha xa para sinchexingamehe xenhe xa de chin que chonda xa ixin ovehe de ndarroguenhe xan.

⁴⁸ Cottimeja Jesús ndaicho ngain xí mé:

—Jaha ra ditticaonha ra si diconha ra canxion señal co milagro.

⁴⁹ Pero tti xí mé ndaicho:

—Soixin, daca Xacoi, ante que ndasenhe xanhna.

⁵⁰ Cottimeja ndaicho Jesús:

—Sacjan ngain nchiandoi; xanha oxingamehe xan.

Tti xí mé vitticaon tti ndaicho Jesús, co sacjoi xa.

⁵¹ Co are ochian jidiji xa nchiandoha xa, vachje ninchehe xé xa para joichoexin na xa ngatja nttiha, co ndaicho na ngain xa:

—Xanha oxingamehe xan.

⁵² Cottimeja jehe xa joanchiangui xa ngain na ixin quehe hora coexinhi xingamehe xenhe xa de ixin tti chin que veyá xan, co jehe na ndačo na:

—Jna, ná hora después de ngosine nchanho ndavačjehe xan soa.

⁵³ Cottimeja jehe xa xaxaon xa que hora mé ndačo Jesús ngain xa: “Xanha oxingamehe xan”; co jehe xa conixin cain nindoha xa vitticaon na Jesús.

⁵⁴ Jihi tti yoxin milagro que joinchehe Jesús are jehe cjanxin de ngain Judea para jói ngain Galilea.

5

Jesús joinchexingamehe ná xí que choha vacji ngain rajna Betesda

¹ Después de jihi, chojni judío joinchexjian na ná quiai; co Jesús cjan ngain ciudad de Jerusalén.

² Ngain ciudad mé, chian ngain tti puerta que dinhi “Puerté Coleco” nttiha jí ná ttoe que jiria jinda que ngain nguigoa hebreo dinhi ttoe mé Betesda. Co ngain ttoe mé jí naho portal.

³ Nttiha tetsinga tsje chojni nihi ngataha nontte. Nttiha te chojni tti čhoha dicon, co tti čhoha tti, co tti čhoha ttingui; co cain chojni mé techonhe na nttiha hasta que jinda mé tsinguitjen nda.

⁴ Ixin te rato que nttiha vaxincanji ná ángel ngain ttoe mé co vanchenguitjen jinda, co tti nihi que saho vajingui jinda mé, jehe ndavaxingamehe de quexeho chin que jehe vechonda.

⁵ Co nttiha vehe ná xí que ovechonda treinta y ocho nano de venihi xa.

⁶ Are Jesús vicon que xí mé tajitsinga xa nttiha, jehe ovenohe ixin anto sé venihi xa. Mexinxin ndačo ngain xa:

—¿Arinao rroxingamaha?

⁷ Co jehe tti nihi mé ndačo:

—Soixin, janha chondaha quensen rroxangui na jinda are tsinguitjen nda. Cada nttiha que janha rinaho sihngui nda, ojé ni dingui nda icha saho.

⁸ Jesús ndačo:

—Dingattjen, co tsinhi caniaha co sattjixin de nttihi.

⁹ Co rato mé jehe xí mé ndaxingamehe xa co tsín xa caniehe xa co coexinhi xa sacjoixin rotté xa. Pero ixin nchanho mé, mero nchanho para vanchejogaha na,

¹⁰ chojni judío que vinttechonda joachaxin ndačo na ngain jehe tti xí que xingamehe:

—Jai nchanho que ncheha ni xa, mexinxin jianha para que jaha tsame caniaha.

¹¹ Tti xí mé ndačo:

—Tti joinchexingamana ndachjenji na: “Tsinhi caniaha co sattji.”

¹² Cottimeja joanchiangui jehe na co ndačo na:

—¿Quexehe tti ndattjo: “Tsinhi caniaha co sattji”?

¹³ Pero tti xí mé venoeha quensen joinchexingamehe ixin Jesús sacjoi ngayehe tti anto tsje chojni que te nttiha.

¹⁴ Después Jesús vetanxin tti xí mé ngain nihngo icha importante, co ndačo Jesús ngain xa:

—Tsjenxin, jai jaha oxingamaha, mexinxin cjanha nchehe cosa jianha para que rrocjanha tsonha icha tangui.

¹⁵ Cottimeja tti xí mé sacjoi co joindačo ngain chojni judío que vinttechonda joachaxin ixin Jesús tti joinchexingamehe jehe.

¹⁶ Mexinxin chojni mé joiningaonhe na Jesús co joinao na narrogoenxon na are maho ixin vanchehe Jesús jañá ngain nchanho que jiquininxinha nchehe ni xa.

¹⁷ Pero Jesús ndačo ngain na:

—Ndodana cainxin tiempo jinchehe Ndo xa, co janha cai rrinttaha xajeho xa mé.

¹⁸ Mexinxin chojni mé icha joinao na narrogoenxon na Jesús, jeoha ixin vancheha Jesús caso ley tti nchanho que jiquininxinha nchehe ni xa, cai joinao na narrogoenxon na Jesús ixin jehe vandačo ixin jehe inchin Dios are jehe ndačo ixin Dios tti Ndoché jehe.

Tti joachaxin que chonda Xenhe Dios

¹⁹ Cottimeja Jesús ndačo ngain na:

—Ndoa tti rrindattjo ra que janha, tti Xenhe Dios, čhoha sinttaha ni ná cosa inchin janho sinaho, jecho nttaha tti dicon nchehe Ndođana. Cainxin tti nchehe Ndođana, cai janha, tti Xenhe Ndo, sinttaha.

²⁰ Ndođana rinao na Ndo co tjangohna Ndo cain tti jehe Ndo nchehe Ndo; co tsjago Ndo nganji na cosa que chonda icha joachaxin que hasta jaha ra soan ra admirado.

²¹ Co jañá inchin Ndodana nchexingamehe Ndo chojni que ondavenhe co chjé Ndo vida, cai janha, tti Xenhe Ndo, danjo vida ngain chojni que rinaho sayé vida mé.

²² Co Ndodana xonhi chojni nchejuzguehe Ndo, ixin chjana Ndo janha, tti Xenhe Ndo, cainxin joachaxin para que janha sinttajuzgá cain chojni,

²³ para que cainxin chojni sinchesayana na janha, tti Xenhe Ndo, inchin nchesayehe na jehe Ndo. Tti chojni que nchesayanaha janha, tti Xenhe Ndo, cai nchesayehe na jehe Ndodana que rroanha na janha.

²⁴ Janha rrindattjo ra ndoa: Tti chojni que nchehe caso tti janha rrindaçhjan, co ditticaon chojni mé ngain jehe tti rroanha na janha, chojni mé chonda na iná vida naroaxin que xonhi tiempo tsjexin, co jehe na rrochondaha na castigo ixin ovattohe na tti ndadenhe ni co te na ngain tti techon ni.

²⁵ Janha rrindattjo ra ndoa que tsí nchanho are chojni que inchin ondavenhe tsinhi na ttana janha, tti Xenhe Dios, co chojni que sitticaon tti ndaçhjan rrochonda na iná vida naroaxin, co jehe nchanho mé ojoí nchaon jai.

²⁶ Ndodana chonda Ndo joachaxin para danjo Ndo iná vida naroaxin jehe Ndo mismo, co cai chjana Ndo joachaxin mé janha, tti Xenhe Ndo, para que janha cai sanjo vida mé.

²⁷ Co chjana Ndo joachaxin para que janha sinttajuzgá chojni ixin janha tti Xí que joixin de ngajni.

²⁸ Jaha ra doanha ra admirado de ixin jili ixin tsí nchanho que cain chojni que ondavenhe tsinhi na ttana,

²⁹ co sachjenguixin na de tti teçavá na. Co tti nijoinchehe jian rroxechon na para rrochonda na iná vida naroaxin, pero tti nijoinchehe jianha rroxechon na para rrochonda na castigo.

Quexén chojni nchao rrochonxin ixin Jesús tti Xenhe Dios

³⁰ Janha çhoha sinttaha ni ná cosa inchin janho rinaho. Janha nttaha juzgado inchin ttetonna Ndodana co cain tti nttaha, mé jian ixin çaxaonha sinttaha inchin janha rinaho, sino que janha nttaha joxon inchin rinao Ndodana que rroanha na.

³¹ Si janho rrondaçhjan ixin janha anto jian na, palabra mé xonhi xé si coha icha chojni tti rrondaçho jian de ixin janha.

³² Pero Ndodana cai nohe Ndo jian tti janha nttaha, co janha nona que tti ndaçho Ndo de ixin janha, ján rentte.

³³ Co jaha ra rroanha ra chojni para joanchianguihi na Juan co ndoa tti jehe ndattjo ra de ixin janha.

³⁴ Pero janha gondanaha para que chojni rronichja jian de ixin janha; janha jeho ndaçhjan jili para que jaha ra nchao sitticaon ra tti ndaçhjan para rrochonda ra iná vida naroaxin.

³⁵ Juan, jehe vehe inchin ná lámpara que vanchengasán. Co jaha ra joinao ra co chaha ra de ixin jehe joadingasán mé, pero seha.

³⁶ Juan vanichja jian de ixin janha, pero jai cain tti rinao Ndodana, mé tti janha rrinttaha ngayaha ra co mé tti tjagoha ra icha jian ixin ndoa que Ndodana tti rroanha na.

³⁷ Cai Ndodana que rroanha na janha, jehe Ndo ndaçho Ndo que cain tti ndaçhjan ndoa. Pero jaha ra xonhi tiempo coinhi ra tté Ndo ni diconha ra Ndo.

³⁸ Co joajné Ndo joixinha ngain ansean ra ixin ditticaonha ra nganji na, tti jehe Ndo mismo rroanha Ndo.

³⁹ Jaha ra tetangui ra tti libro que jitaxin Palabré Ndo conixin anto tsje ciudadano, ixin rinao ra sinchí ra nttiha quexén rrochonda ra iná vida naroaxin que xonhi tiempo tsjexin, co jehe libro mé tti nichja de ixin janha.

⁴⁰ Pero jaha ra rinaoha ra ditticaon ra nganji na para que sayehe ra vida mé.

⁴¹ Janha rinaoha que chojni sinchesayana.

⁴² Janha chonxin jaha ra co nona que jaha ra rinaoha ra Dios.

⁴³ Janha joihi ixin Ndodana rroanha na co jaha ra rinaoha ni ra, pero si jecoa iná chojni rroquí para rrojindattjo ra tti jeho çaxaon, chojni mé, nchoe, rrojinao ra.

⁴⁴ Jaha ra çhoha ditticaon ra nganji na ixin jaha ra joho rinao ra icha chojni sinttasayaha ra co rinaoha ra sinttasayaha ra tti nacoaxinxon Dios.

⁴⁵ Jaha ra çaxaonha ra ixin janha tsjanguiha ra ngattoxon con Ndodana. Janha nahi, ixin ley que vayé Moisés, mé tti tsjanguiha ra masqui jaha ra çaxaon ra ixin ley mé sinttaroa ra ngattoxon con Dios.

⁴⁶ Ixin si jaha ra rroguitticaon ra tti ndaçho Moisés, cai rroguitticaon ni ra janha ixin Moisés dicjin de ixin janha.

⁴⁷ Pero jaha ra ditticaonha ra tti jehe dicjin, mexinxin ¿quexén sitticaon ra tti janha rrindattjo ra?

6

*Are Jesús joanjo tti joine naho mil xi
(Mt. 14.13-21; Mr. 6.30-44; Lc. 9.10-17)*

¹ Después de cain jihu, Jesús sacjoi para toenxin lago de Galilea, que xajeho lago mé tti dinhi Tiberias.

² Anto tsje chojni varroé Jesús ixin vaguicon na que Jesús vanchehe tsje milagro are vaguicon na que Jesús vanchexingamehe chojni nihi.

³ Cottimeja Jesús co cain tti chojni que vacao coani na ná jna co tavintte na nttiha nchion.

⁴ Co jamé conhe chian ngain tiempoe tti quiai dinhi pascua.

⁵ Co are Jesús vicon ixin anto tsje chojni terroé, Jesús ndacho ngain Felipe:

—¿Quettinó siquehna na tti sine cainxin chojni jihu?

⁶ Pero jehe ndacho jañá para viconxin quehe rrondacho Felipe ixin Jesús ovenohe jian quehe sinchehe.

⁷ Cottimeja Felipe ndacho:

—Cain tomi que dacha ná tti nchehe xa yáto conittjao xa sittjaha tomi mé para sinanxin cain niottja que sine cain chojni yá.

⁸ Cottimeja Andrés, xanchó Simón Pedro co cai jehe ná de tti chojni que vacao Jesús; jehe Andrés ndacho ngain Jesús:

⁹ —Ntihu ji ná xanxichjan que chonda naho niottja de cebada co yó copescado, pero ¿que xén sittjaxin jihu para cainxin chojni yá?

¹⁰ Cottimeja ndacho Jesús:

—Ndache ra cainxin na que tasintte na ngataha nontte.

Anto cachji vehe ngain lugar mé, co tavintte cain nimé. Co jeho xí vintte naho mil xa.

¹¹ Cottimeja Jesús cóá tti naho niottja mé ngain rá, co joanjo gracias ngain Dios. Cottimeja Jesús joanjo niottja mé ngain tti chojni que vacao, co jehe chojni mé conchjea na niottja mé ngain chojni que Tate nttiha. Co cai jamé joinchehe Jesús ngain copescado co chojni que vacao Jesús conchjea na ngain chojni cain tti joinao na.

¹² Co are ojoexin joine na co ndacojehe na, Jesús ndacho ngain chojni que vacao:

—Datse ra cain pedazo de niottja que xehe para que xonhi sitján.

¹³ Jehe na joatse na nio rioho mé, co joincheaca na tteyó ntaxa de ixin tti pedazo que xexin joine na de tti naho niottja de cebada.

¹⁴ Cottimeja cain chojni mé are vicon na tti milagro jihu que Jesús joinchehe ndacho na:

—Ndoa jehe jihu tti profeté Dios que chonda que tsí ngataha nontte.

¹⁵ Pero Jesús conohe ixin cain chojni mé joinao na sarrojicaio na Jesús masqui jehe rrochoha para que jehe na rrojincheguinhi na Jesús rey de jehe na. Mexinxin sacjoi Jesús hasta tti con jna para que nchao tavehe jeho.

*Jesús cjoixin rotté ngataonhe jinda
(Mt. 14.22-27; Mr. 6.45-52)*

¹⁶ Co are ondacontie cain tti chojni que vacao Jesús xincanji na para ngain lago,

¹⁷ co joixinhi na ngain ná barco co coexinhi na coattoa na lago mé para joihi na ngain Capernaum. Co rato mé ondaconaxin xehe co Jesús xa cjanha.

¹⁸ Cottimeja coexinhi cjoa ná chintto soji, co jinda anto soji cjamanguitaon chó nda.

¹⁹ Co are osacjoi na inchin naho o incjaon kilómetro de ngadehe nda, jehe na vicon na que Jesús jitonchienhe ngain barco mé; conixin rotté jittjixin ngataonhe nda, co cain jehe na vinttexaon na.

²⁰ Pero jehe ndacho ngain na:

—¡Janha joihi, xaonha ra!

²¹ Cottimeja jehe na ixaonha na co chonhe na Jesús para que jehe coani barco cai. Co rato mé ojoihi na ngain tti nontte que jehe na tettji na.

Are chojni cjoé na Jesús

²² Ndoexin tti chojni que ndavittohe toenxin ndachaon tti sacjoixin Jesús conixin tti chojni que vacao, vintteguicon na que cain chojni que vacao Jesús savicaio na jeho tti nacoa barco que vehe nttiha, co vintteguicon na que Jesús cjoiha ngain chojni mé.

²³ Pero de cain yá, icanxin barco joixin de ngain ciudad de Tiberias co cjoi chiaon ngain lugar tti joinenxin na niottja después que Jesús joanjo gracias.

²⁴ Mexinxin are vintteguicon cain chojni mé ixin iveha Jesús nttiha ni cain chojni que vacao jehe icoha na nttiha, cain chojni mé vixinhi na barco mé co sacjoi na para rajna Capernaum para joicjé na Jesús.

Jesús tti niottja que danjo vida que xonhi tiempo tsjexin

²⁵ Are cain chojni mé vintteguiji na toenixin lago mé, nttiha viconxin na Jesús iná co joanchianguihi na co ndačo na:

—Maestro, ¿quesa joihi nttihi?

²⁶ Pero Jesús ndačo ngain na:

—Janha rrindattjo ra ndoa que jaha ra ttjé ni ra ixin jointte ra hasta cojaha ra co jeha ixin jaha ra coinxin ra quehe rročo tti milagro que janha jointtaha.

²⁷ Ncheha ra xa para ixin comida que ndattjexin, nchehe ra xa para ixin tti comida que ttjexinha co rrochjá ra iná vida naroaxin que xonhi tiempo tsjexin. Co janha, tti Xí que joixin de ngajni, rrochjaha ra tti comida mé ixin Dios Nnodana chjana joachaxin mé.

²⁸ Cottimeja jehe na joanchiangui na co ndačo na:

—¿Quehe chonda na que sinttaha na para que sinttaha na inchin Dios rinao?

²⁹ Co Jesús ndačo:

—Dios rinao que jaha ra ditticaon ra nganji na janha, tti jehe rroanha.

³⁰ Cottimeja jehe na joanchianguihi na Jesús co ndačo na ngain:

—¿Quehe señal nchao sinchehe jaha para que janha na sicon na co sitticanho na jaha? ¿Quehe cosa nchehe jaha?

³¹ Nindogoeliona na xančhjen joine na maná ngagaha jna inchin ndačo tti libro que jitaxin Palabré Dios: “Dios joanjo niottja de ngajni para joine na.”

³² Jesús ndačo:

—Janha rrindattjo ra ndoa que jeha Moisés tti joanjo niottja de ngajni ngain jehe na; Nnodana danjo tti mero nio que ndoa joixin de ngajni.

³³ Ixin tti niottja que Dios danjo, mé tti jehe joinchexincanjxin de ngajni para danjo ngain chojni iná vida naroaxin que xonhi tiempo tsjexin.

³⁴ Cottimeja vinttendačo jehe na:

—Soixin, chjana ra niottja yá cainxin nchanho.

³⁵ Co Jesús ndačo ngain na:

—Janha tti niottja que danjo vida. Tti chojni que tsí nganji co sitticaon nganji na janha, chojni mé xonhi tiempo senhe na jintta ni senhe na jinda.

³⁶ Pero inchin ondattjo ra, jaha ra ditticaonha ra masqui ovicon ni ra.

³⁷ Cainxin chojni que chjana Nnodana, tsí na nganji na janha, co cain chojni que sattí nganji na, janha sayá na,

³⁸ ixin janha joixin de ngajni pero jeha para sinttaha inchin janho rinaho, sino para sinttaha inchin rinao jehe tti rroanha na nttihi.

³⁹ Co janhi rinao Nnodana que rroanha na janha nttihi; que janha sinttatjanha ni ná chojni que jehe Ndo chjana Ndo, sino que janha sinttaxechon chojni mé de ngain tti ndadenhe ni ngain tti nchanho are ndatsjexin mundo.

⁴⁰ Co Nnodana que rroanha na rinao Ndo que cain chojni que dicen na janha, tti Xenhe Dios, co ditticaon nganji na, nimé chonda na iná vida naroaxin que xonhi tiempo tsjexin. Co janha sinttaxechon na ngain tti nchanho are tsjexin mundo.

⁴¹ Are Jesús joixin nichja jañá, chojni judío coexinhí na nichja na feo de ixin jehe Jesús ixin jehe ndačo: “Janha tti niottja que joixin de ngajni.”

⁴² Co ndačo na:

—¿Ajeha jilhi Jesús, tti xitsihi José? Ján na chonxin na ndodé co janné. ¿Quexén jehe nchao ndačo ixin jehe joixin de ngajni?

⁴³ Cottimeja Jesús ndačo ngain na:

—Nichjaha ra feo.

⁴⁴ xonhi chojni nchao tsí nganji na si tsiaoha na Nnodana que rroanha na, co janha sinttaxechon chojni mé ngain tti nchanho are ndatsjexin mundo.

⁴⁵ Ngain libroe profeté Dios ndačo janhi: “Dios sinchecoenhe cain chojni.” Jañá cain chojni que coinhí tti ndačo Nnodana co coanguí na tti ndačo Ndo, chojni mé tsí nganji na janha.

⁴⁶ Jeha ixin chonja chojni vicon Nnodana; xonhi chojni vicon Ndo; tti vicon Ndo, mé jeha tti joixin de ngain Ndo.

⁴⁷ Janha rrindattjo ra ndoa que tti chojni que ditticaon nganji na, chojni mé chonda iná vida naroaxin que xonhi tiempo tsjexin.

⁴⁸ Janha tti niottja que danjo iná vida naroaxin.

⁴⁹ Nindogoelitoa ra xančhjen joine na maná ngagaha jna, pero masqui joine na mé, jehe na ndavenhe na;

⁵⁰ pero janha nichja de ixin tti niottja que joixin de ngajni que are ná chojni jine niottja jilhi, chojni mé senha almé.

⁵¹ Janha mismo jehe tti niottja que danjo vida que joixin de ngajni. Tti chojni que jine nio, chojni mé rrochonda iná vida naroaxin que xonhi tiempo tsjexin. Tti niottja que janha

sanjo, mé rrocho cuerpona. Janha sanjo cuerpona para que cainxin chojni ngoixin mundo rrochonda na iná vida naroaxin que xonhi tiempo tsjexin.

⁵² Cottimeja chojni judío coexinhi vitticaonha chó na co vinttendaço na:

—¿Que xén nchao chojni jihi rrochjá na cuerpoe sontte na?

⁵³ Jesús ndaço ngain na:

—Janha rrindattjo ra ndoa que si jaha ra sintteha ra cuerpona janha, tti Xí que joixin de ngajni, co siha ra jnina, jaha ra rrochondaha ra iná vida naroaxin que xonhi tiempo tsjexin.

⁵⁴ Tti chojni que sine cuerpona co sihi jnina, chojni mé chonda iná vida naroaxin que xonhi tiempo tsjexin, co janha sinttaxechon chojni mé ngain tti nchanho are ndatsjexin mundo.

⁵⁵ Cuerpona, mé tti ndoa comida; co jnina, mé tti ndoa jinda que dihi na.

⁵⁶ Tti chojni que jine cuerpona co dihi jnina, chojni mé jí nganji na co janha rrihi ngain jehe.

⁵⁷ Nnodana que rroanha na chonda Ndo vida, co janha rrichon de ixin jehe Ndo, mexinxin tti chojni que sine na janha sechon de ixin janha.

⁵⁸ Janha nichja de ixin tti niottja que joixin de ngajni. Co niottja jihi jeha inchin tti maná que joine nindogoelitoa ra xanchjen, que masqui joine na mé, jehe na vintteguenhe na, ixin tti chojni que sine tti niottja que janha ndachjan, chojni mé rrochonda iná vida naroaxin que xonhi tiempo tsjexin.

⁵⁹ Jesús joinchecoenhe na cain cosa jihi ngain servicio ngain ninngo ngain rajna Capernaum.

Are Jesús nichja de ixin tti iná vida naroaxin

⁶⁰ Are coinhi na cain tti ndaço Jesús jihi, tsje chojni que varroé Jesús ndaço na:

—Tti ndaço xí jihi atto tangui para que rrondaço na jáni; ¿quensen nchao sinchehe caso tti ndaço xí jihi?

⁶¹ Cottimeja Jesús conohe tti tendaço chojni mé, co jehe joanchiangui ngain na co ndaço:

—¿Afeo tonoha ra de ixin tti janha rrindaçhjan?

⁶² ¿Quehe rroaxaon jaha ra si rroguicon ni ra janha, tti Xí que joixin de ngajni, sarrocajin tti joarihi are saho?

⁶³ Espíritu Santo, mé tti danjo iná vida naroaxin que xonhi tiempo tsjexin; cuerpoe ni çhoja danjo vida mé. Co cain palabra que janha ndattjo ra, mé de ixin Espíritu co danjo iná vida naroaxin que xonhi tiempo tsjexin.

⁶⁴ Pero xa te canxion jaha ra que xa ditticaonha ra.

Jamé ndaço Jesús ixin are nacoexinxon xé jehe ovenohe quecá chojni que vaguitticaonha, co quensen tsjago ttinó sehe jehe para rrotse ninigaconhe.

⁶⁵ Co Jesús ndaço:

—Mexinxin janha ndattjo ra que xonhi chojni nchao tsí nganji na si Nnodana tsiaoha.

⁶⁶ Desde are maho, tsje chojni que varroé Jesús ndacointtohe na jehe, co ivagacaoha na.

⁶⁷ Cottimeja Jesús joanchianguihi tti tteyó chojni que vacao co ndaço:

—¿Acai jaha ra rinao ra satsji ra?

⁶⁸ Pero Simón Pedro ndaço:

—Soixin, ¿quensen ngain nchao satsji na? Palabrá soixin palabra que danjo iná vida naroaxin que xonhi tiempo tsjexin.

⁶⁹ Janha na ovitticanho na, co nona na que soixin tti Cristo tti Dios rroanha co tti Xenhe Dios que jichon.

⁷⁰ Jesús ndaço:

—Janha coinchiá tti tteyó jaha ra. Co ixinha jamé, ná de jaha ra ná chojni inchínji.

⁷¹ Are ndaço Jesús jihi, Jesús nichja de ixin Judas Iscariote, xitsihi iná Simón, ixin jehe Judas tti joindaço para tse na Jesús masqui jehe Judas ná de tti tteyó chojni que vacao Jesús.

7

Xanchó Jesús vaguitticaonha xan ngain

¹ Después de cain jihi, Jesús vangaria ngain regioen Galilea. Jehe jinaoha cjoí ngain Judea ixin nttiha chojni judío que vinttechonda joachaxin joinao na narrogoenxon na.

² Pero ixin tiempo mé joiconchian tti nchanho que chojni judío vanchechjian tti quiai de chozas, mé ná de tti quiai que chojni Israel chonda,

³ mexinxin cain xanchó Jesús ndaço xan ngain:

—Tadariha nttihi; ttji para Judea para que cain chojni que te nttiha, tti nite de acuerdo de ixin tti ndaço jaha, cai sicon na tti nchehe jaha.

⁴ Ixin si ná ni que rinao ni tsje chojni satsoan ni, jehe ni ncheha ni cain cosa jimaao. Si jaha nchao nchehe cain cosa inchin cain cosa jiji, jaha nchehe ngattoxon con cainxin chojni ngoixin mundo.

⁵ Xanchó Jesús vinttendačo xan jañá ixin vaguitticaonha xan ngain jehe.

⁶ Cottimeja Jesús ndačo:

—*Āa ttiha nchanho para que janha tsononxin na ngattoxon con chojni que nchehe tti jianha, pero para ixin jaha ra quexeho nchanho nchao tsononxin ra ngattoxon con chojni mé.*

⁷ Chojni que joxon ncheḡoxinhi cosa ngataha nontte čhoha rroningaonha ra na, pero janha ningaonna na ixin janha ndattjan na claro ixin tti jehe na tenchehe na jianha jí.

⁸ Sattji jaha ra ngain quiai; janha tsjiha ixin nchanho *āa ttiha* para que janha tsji.

⁹ Co después que Jesús ndache xanchó jiji, jehe vittohe ngain Galilea nchion nchanho.

Are Jesús cjoí ngain tti quiai de chozas

¹⁰ Pero después de que savintteci xanchó Jesús, jehe Jesús cai sacjoi ngain quiai mé, masqui *ḡonhi* chojni conohe ixin jehe cjoí jimaao.

¹¹ Chojni judío que vinttechonda joachaxin vinttecéj na Jesús ngain quiai mé, co ndačo na:

—*¿Quettinó jí xí jilha?*

¹² Co de ngayé cainxin chojni ngain quiai, nttiha tsje ni tenichja de ixin jehe Jesús. Canxion na ndačo na: “Jehe ná xí jian”; pero icanxin na ndačo na: “Jeha jian ixin ncheyehe chojni.”

¹³ Pero *ḡonhi* chojni cjoao chó sén para icha chojni rroquinhi na de ixin Jesús ixin *āaon* na ngain chojni judío que vinttechonda joachaxin.

¹⁴ Ojidiji inchin ngosinexin quiai are Jesús joixinhi ngaxinhi nihngo icha importante co coexinhi joinchecoehhe chojni.

¹⁵ Co chojni judío que vinttechonda joachaxin goan na admirado co ndache chó na:

—*¿Queḡén noenxin xí jiji anto tsje cosa co jehe *āa ḡonhi* tiempo coangui *āa Palabré* Dios inchin ján na?*

¹⁶ Jesús ndačo ngain na:

—*Tti janha nttacoanha ra jeha jeho tti nona janha, sino cosa que nohe tti rroanha na janha nttihi.*

¹⁷ Si čhonja chojni rinao sinchehe tti rinao Dios, chojni mé satsoan si tti rrinttacoanha joixin de ngain Dios o ani jeho cosa que janha rinaho.

¹⁸ Tti chojni que ndačo inchin jeho rinao, chojni mé nchehe para que icha chojni sinchesayehe na jehe; pero tti chojni que nchehe que tsosayehe tti rroanha jehe, chojni mé nichja tti ndoa co *ḡonhi* tti ndoaha nichja chojni mé.

¹⁹ Moisés *čjá* ra ley, co ni ná de jaha ra ditticaon ley mé. *¿Quedonda rinao ra nasoenxon ni ra?*

²⁰ Chojni mé ndačo na ngain Jesús:

—*Jaha chonda ná espíritu jianha, mexinxin jaho tti *āaxaon* que ixin janha na rinaho na nasoenxon ra jaha, pero janha na *āaxaonha* na jamé.*

²¹ Jesús ndačo ngain na:

—*De ixin nacoaxinxon cosa que janha jointtaha ngain nchanho que nchejogaha ni, cain jaha ra doan ra admirado.*

²² Pero Moisés *čjá* jaha ra costumbre para chjehe ra cada xanxichjan letsjochjan tti *ḡohe* que dinhi circuncisión, (masqui coexinxin ngain nindogoelitoa ra *āančhjen* que cjoí icha saho que Moisés.) Co mexinxin jaha ra chjehe ra naná xanxichjan letsjo *ḡohe* mé masqui ngain nchanho que nchejogaha ni.

²³ Nchao jí remé, si para sinchehe ni inchin ttetonha ley que vayé Moisés jaha ra chjehe ra ná xanxichjan letsjo *ḡohe* masqui ngain nchanho que nchejogaha ni, *¿quedonda doñao ra nganji na ixin jointtaxingamá ngoixin cuerpoe ná xí ngain nchanho que nchejogaha ni?*

²⁴ Ncheha jaha ra juzgado jeho inchin *āaxaon* ra; nchehe ra inchin *jiquininxin*.

Jesús ndačo ttinó joixin jehe

²⁵ Cottimeja canxion chojni que vintte Jerusalén coexinhi na joanchianguihi chó na co ndačo na:

—*¿Ajeha xí jiji tti rrittjé na ixin nasoenxon na?*

²⁶ Co yá jinichja *āa* co cain chojni tettinhi, co ni ná chojni *ḡonhi* ndache *āa*. *¿O ani cain chojni que chonda joachaxin ngain autoridad *āaxaon* que ixin xí jiji tti Cristo que Dios rroanhá?*

²⁷ Pero ján na noa na ttinó joixin xí jiji, co are tsí Cristo, tti Dios rrorroanha, *ḡonhi* chojni tsonohe ttinó tsixin.

²⁸ Jehe Jesús tajinchecoenhe chojni ngaxinhi nihngo icha importante, co are coinhi Jesús cain jili, jehe ndačo sën:

—¿Ajamé ixin chonxin ni ra co noha ra ttinó joixin janha? Pero janha joiha inchin janho rinaho, janha joihi ixin tti rroanha na janha jehe anto jian co jehe mé tti jaha ra ditticaonha ra.

²⁹ Janha ditticanho jehe ixin joixin de ngain jehe, co jehe rroanha na.

³⁰ Cottimeja joinao na rrotse na Jesús para rroquiaxinhi na ngain cárcel, pero ni ná na joincheha na ixin xa jaha nchanho para que jehe siaxinhi.

³¹ Pero tsje chojni vitticaon na jehe, co ndačo na:

—Are tsí Cristo, ¿apoco sinchehe icha tsje milagro que xí jili?

Xifariseo joinao xa rroquiaxinhi xa Jesús

³² Xifariseo vinttequinhi xa tti vandačo chojni de ixin Jesús, co jehe xa co canxion xidána que vaquetonha ngain icha xidána, cain xí mé rroanha xa xipolicie nihngo icha importante para rrotse xa Jesús.

³³ Cottimeja Jesús ndačo:

—Janha sarihi nganji ra pero seha, cottimeja sarrocjan na ngain tti rroanha na.

³⁴ Jaha ra tsjé ni ra pero sinchiha ni ra ixin jaha ra čoha tsji ra ngain tti janha sarihi.

³⁵ Cottimeja chojni judío que vinttechonda joachaxin coexinhi na vintteganchianguihi chó na:

—¿Ttinó satsji xí jili que ján na čoha sonttó na xa? ¿Apoco satsji xa ngain icha chojni judío que te ngayé chojni griego que te ngain nontte icha cjin para sinchecoenhe xa chojni griego?

³⁶ ¿Quehe rročo yá tti ndattjo na xa: “Tsjé ni ra pero sinchiha ni ra ixin jaha ra čoha tsji ra ngain tti janha sarihi”?

Jesús inchin jinda que danjo vida naroaxin

³⁷ Tti último nchanho de quiai, nchanho mé nchanho icha importante. Co nchanho mé Jesús vingattjen co ndačo sën:

—Si čhonja chojni venhe jinda, tsí nganji na co sihi jinda.

³⁸ Inchin ndačo ngain tti jitaxin Palabré Dios; de ngain ansén tti chojni que sitticaon na janha, nntiha rročinxin vida naroaxin inchin jinda činxin de ngain ná manantial.

³⁹ Conixin yao, Jesús joinao ndačo que cain chojni que sitticaon jehe sayé na Espiritu Santo; ixin tiempo mé xa joiha Espiritu mé ixin Jesús xa sacoa jinha para ngajni.

Quexén ndachjea chojni

⁴⁰ Canxion na ngayé chojni nntiha, are coinhi na jili, ndačo na:

—Ndoa xí jili tti profeté Dios que ján na chonhe na.

⁴¹ Icanxin na ndačo na:

—Xí jili tti Cristo que Dios rroanha.

Pero icanxin na ndačo na:

—¿Quexén tsixin Cristo ngain regioen Galilea?

⁴² Tti jitaxin Palabré Dios ndačo que Cristo chonda que tsixin de ngain ná chojni rey David, co chojni mé tsixin de Belén, xajeho rajné David.

⁴³ Jaňá que chojni ndachjea na de ixin Jesús.

⁴⁴ Co canxion na joinao na rrotse na Jesús para rroquiaxinhi na, pero čonhi ni tse.

Chojni que ttetonha ngain juzgado vitticaonha na Jesús

⁴⁵ Xipolicie nihngo icha importante savinttecjan xa para ngain tti te xifariseo co xidána que vaquetonha ngain icha xidána, co cain xí jili joanchiangui xa ngain xipolicia co ndačo xa:

—¿Quedonda joicoha ra xa?

⁴⁶ Co xipolicia vinttendačo xa:

—¡čonhi tiempo ná chojni nichja jian inchin nichja xí yá!

⁴⁷ Cottimeja jehe xifariseo vinttendačo xa ngain xipolicia mé:

—¿Acai jaha ra jointtayaha ra xí mé?

⁴⁸ ¿Apoco canxion xittetoan na ján na o xí que ttetonhe xifariseo vintteguitticaon xa de ixin jehe xí mé?

⁴⁹ Pero chojni que ditticaon jehe xí mé chonxinha na ley que vayé Moisés, co Dios sinchecastigá na.

⁵⁰ Co nntiha jí Nicodemo, jehe cai ná de jehe xifariseo, tti cjo para joitsjehe Jesús are ná ttie; co mé ndačo ngain icha xifariseo:

⁵¹ —Pero leya na ttetonha ixin ján na čoha sonttoho na jie ngain ná xí si xa ttinha na saho palabré xa para jamé tsonoa na quehe joinchehe xa.

⁵² Cottimeja vinttendačo xa ngain jehe Nicodemo:

—¿Ajaha cai joixin de Galilea? Tsjehe ngain tti jitaxin Palabré Dios, co sicon que ni ná profeta joixinha de Galilea.

Nchí que deoacaho iná xí

⁵³ Cottimeja cada xa savintteci xa para nchiandoha xa.

8

¹ Pero Jesús sacoi para ngagaha tti jna dinhi Nttaolivo,

² co ndoexin are ovingasán, Jesús sacjan para ngain nihngo icha importante iná. Cainxin chojni conchienne na ngain Jesús, co jehe tavehe co coexinhi joinchecoehne na.

³ Cottimeja ximaestroey ley co xifariseo vinttequiaho xa ná nchí que dintteguittja xa mero tajjoacaho ncha iná xí. Coín xa nchí mé ngosine cainxin chojni que te nttiha,

⁴ co vinttendačo xa ngain Jesús:

—Maestro, nchí jili vittja na ncha mero tajjoacaho ncha iná xí.

⁵ Co ley que vayé Moisés tteonna na que nasoenxon na conixin xo cain nchí que nchehe janhi. ¿Jaha, quehe čo?

⁶ Jehe xa vinttendačo xa jili para joaquehe xa prueba ngain Jesús co jamé rroconohe xa de quehe rrocjanguixin xa Jesús. Cottimeja Jesús visé co coexinhi cjin ngataha nontte conixin dedoe.

⁷ Pero jehe xa joinchehe xa sigue joanchianguihi xa. Cottimeja Jesús xendoa co ndačo ngain xa:

—Quexeho jaha ra que xonhi cosa janha joinchehe ra ttedoehe ra ncha saho xo.

⁸ Co jehe cjan visé co joinchehe sigue cjin ngataha nontte.

⁹ Pero cain jehe xa co cain chojni que te nttiha are vinttequinhi na jili jehe na feo conohe na ixin xaxaon na que jehe na cai joinchehe na cosa janha. Co vinttegačhe ná na co ná na, saho vinttegačhe ni icha nttantaxí, cottimeja vinttegačhe tti ni icha chjan hasta cainxin na vinttegačhe na co vittohe jeho Jesús conixin jehe nchí mé.

¹⁰ Cottimeja xendoa Jesús, ixonhi icha chojni vicon, jeho jehe nchí mé. Co Jesús ndačo ngain ncha:

—¿Ttinó te chojni que cjoanguiha? ¿Ani ná na goenha na?

¹¹ Jehe ncha ndačo ncha ngain Jesús:

—Nahi, ni ná na.

Cottimeja Jesús ndačo ngain ncha:

—Pues ni janha čhoha sonhe. Jaxon sattji, co icjanha nchehe cosa janha yá.

Jesús jehe tti joadingasán de ngoixin mundo

¹² Jesús nichjé chojni iná, co ndačo ngain na:

—Janha tti joadingasán de ngoixin mundo. Tti chojni que sitticaon na janha rrochonda na jehe tti joadingasán mé que sanjo iná vida naraoxin ngain na, co xonhi tiempo sacji na ngain tti naxin xehe.

¹³ Cottimeja cain xifariseo ndačo xa ngain Jesús:

—Jaho rrinichja jian de ixin jaho, co ixin jaho rrinichja yá xonhi rentte.

¹⁴ Jesús ndačo ngain xa:

—Tti janha rrindačjan ján rentte, masqui janho rrindačjan de ixin janha, ixin janha nona ttinó joixin co ttinó satsji. Pero jaha ra noaha ra ttinó joixin janha ni noaha ra ttinó satsji.

¹⁵ Jaha ra nchejuzgá ra inchin nohe chojni nttihi ngataha nontte. Janha nttaha juzgado ni ná chojni;

¹⁶ pero si janha rojinttaha juzgado, janha sinttaha inchin jiquininxin, ixin jaonha tti nttaha juzgado, sino Nnodana que rroanha na, Ndo mé Ndo nchehe juzgado conixin janha.

¹⁷ Ngain ley que chonda ra jitaxin que are yó chojni testigo rrondačo xajeho, chonda que sitticaon ni chojni mé.

¹⁸ Pues, nchao remé, janha mismo ná testigo na de ixin janho ixin ndačjan que janha jian na, co Nnodana que rroanha na, jehe Ndo iná testigo ixin ndačo Ndo xajeho de ixin janha.

¹⁹ Cottimeja vinttegančianguihi xa Jesús co ndačo xa:

—¿Quettinó jí Nnodá?

Jesús ndačo ngain xa:

—Jaha ra ttinxinha ra tti janha rrinttaha, jamé cai tsonoaha ra de ixin Nnodana. Si rroquinxin ra tti janha rrinttaha, cai rroconoha ra de ixin Nnodana.

²⁰ Jesús nda'cho cain cosa jiji are jehe jitjagoe chojni ngaxinhi nihngo icha importante, mero ngain lugar tti te cajé tomí alcancía. Pero ðonhi chojni tse Jesús para rroquixinhi na Jesús ixin ða jeha tiempo para que jehe rroguixinhi.

Jesús ndache chojni ixin jehe na choha tsji na ngain lugar tti jehe tsji

²¹ Jesús cjan nda'cho ngain na iná:

—Janha satsji co jaha ra tsjé ni ra, co are ndasenhe ra ða sintteca ra tti jianha que nchehe ra, mexinxin tti janha satsji, jaha ra ðhoha tsji ra.

²² Cottimeja chojni judío que vinttechonda joachaxin nda'cho na:

—¿Apoco sasiguenhe jehó, mexinxin nda'cho que ján na ðhoha tsjin na tti satsji jehe?

²³ Cottimeja Jesús nda'cho ngain na:

—Jaha ra de ntíhi ngain mundo ra, pero janha de noi na: jaha ra de ngain mundo jiji ra, pero janha jeha de ngataha nontte jiji na.

²⁴ Mexinxin ndattjo ra que are senhe ra ða sintteca ra tti jianha que nchehe ra ixin si ditticaonha ra que janha mero inchin janha nda'chjan, senhe ra co ða sintteca ra tti jianha que nchehe ra.

²⁵ Cottimeja jehe na joanchianguihi na Jesús co nda'cho na:

—¿Quensen jaha?

Co Jesús nda'cho ngain na:

—Ondattjo ra de are saho.

²⁶ Janha chonda atto tsje que rronda'chjan de ixin jaha ra co sinttajuzgá ra. Co tti rroanha na janha, jehe nichja tti ndoa, co janha nda'chjan ngain chojni de mundo jiji jehó tti coian nichja jehe tti rroanha na.

²⁷ Pero jehe na coinxinha na ixin nda'cho jehe de ixin Dios Ndo'edé.

²⁸ Mexinxin Jesús nda'cho ngain na:

—Are jaha ra rrotsinhi ni ra noi janha, tti Xí que joixin de ngajni, cottimeja tsonoha ra que janha ndoa inchin janha nda'chjan, co ixin ðonhi nda'chjan inchin janho rinaho, sino que janha jehó nda'chjan tti cjoagohna Ndodana.

²⁹ Ixin Ndodana que rroanha na janha, jehe Ndo jí Ndo nganji na; co jehe Ndo ttinttonaha Ndo janho, ixin janha cainxin tiempo nttaha inchin jehe Ndo rinao Ndo.

³⁰ Are Jesús nda'cho jiji tsje na vitticaon na ngain jehe.

Jesús nda'cho quexehé tti chojni xenhe Dios co quexehé tti chojni in'chínji

³¹ Cottimeja Jesús ndache chojni judío que vitticaon ngain jehe:

—Si jaha ra sitticaon ra cainxin tiempo tti janha ndattjo ra, jaha ra ndoa sinhi ra chojnina.

³² Co rrochonxin ra tti ndoa, co tti ndoa rrochjá ra libertad.

³³ Jehe na nda'cho na ngain Jesús:

—Janha na nirazé Abraham na co ðonhi tiempo cjoí na esclavo de ni ná chojni. ¿Que'xén nda'choxin jaha ixin rrochonda na libertad?

³⁴ Jesús nda'cho ngain na:

—Janha rrindattjo ra ndoa que cainxin chojni que nchehe jianha, chojni mé tti te inchin esclavo de ngain cosa jianha.

³⁵ Ná esclavo tadeha ngain nchiandoha xinajni para cainxin tiempo; pero ná xenhe xinajni tadehe xan ngain nchiandoha ndodé xan para cainxin tiempo.

³⁶ Jamé janha, tti Xenhe Dios, rrittjenguijna ra para que isintteha ra esclavo de ngain cosa jianha, para que jaha ra ndoa sintte ra inchin chojni que chonda libertad.

³⁷ Onona que jaha ra razé Abraham, pero rinao ra nasoexon ni ra janha ixin rinaoha ra tti janha ndattjo ra.

³⁸ Janha nichja tti cjoagohna Ndodana co jaha ra nchehe ra tti dindattjo ra ndodá ra.

³⁹ Jehe na vinttenda'cho na ngain Jesús:

—Ndodana na jehe Abraham.

Pero Jesús nda'cho ngain na:

—Si jaha ra rrocji ra ndoa razé Abraham, jaha ra rrojinchehe ra tti jehe joinchehe.

⁴⁰ Co ixinha jamé, masqui ndattjo ra tti ndoa que Dios cjoagohna, jaha ra rinao ra nasoexon ni ra. ¡Co Abraham ðonhi tiempo joinchehe ja'ná!

⁴¹ Jaha ra nchehe ra ðajehó tti nchehe ndodá ra.

Cottimeja jehe na nda'cho na ngain Jesús:

—Janha na jeha chjan na que digoama ixin janha na chonda na nacoaxinxon Ndodana na que mé jehe Dios.

⁴² Cottimeja Jesús nda'cho ngain na:

—Si ndoa Dios rrocji Ndodá ra, jaha ra rrojinao ni ra janha ixin janha joixin de ngain Dios co ntíhi rrihi. Joiha janha inchin janho joinaho, Dios tti rroanha na.

⁴³ ¿Quedonda ðhoha jaha ra ttinxin ra tti janha ndattjo ra? Mé ixin jaha ra rinaoha ra ttinhi ra joajnana.

⁴⁴ Tti ndodá jaha ra, mé tti inchínji; jaha ra chojní jehe mé, co rinao ra sinchehe ra tti jehe rinao. Inchínji jehe tti nadoenxon chojní desde are saho. Co jehe ðonhi tiempo jí ngain tti ndoa co ðonhi tiempo nichja tti ndoa. Are jehe nichja tti ndoaha, jehe nichja de ixin jehe mismo ixin jehe puro ndoaha co jehe tti ndodé cainxin chojní que nichja ndoaha.

⁴⁵ Pero ixin janha nichja tti ndoa, mexinxin jaha ra ditticaonha ni ra.

⁴⁶ ¿Quensen de jaha ra nchao rrondaço que janha jointtaha jianha? Pero si janha ndačhjan tti ndoa, ¿quedonda ditticaonnaha ra?

⁴⁷ Tti chojní Dios, jehe na ttinhi na palabré Dios, pero ixin jaha ra jaha chojní Dios ra, mexinxin rinaoha ra ttinhi ra.

Cristo ovehe icha saho que Abraham

⁴⁸ Cottimeja jehe tti chojní judío que vinttechonda joachaxin ndaço na ngain Jesús:

—Janha na chonda na razón are ndačhjan na que jaha ná chojní de ngain nonttehe Samaria co chonda ná espíritu jianha.

⁴⁹ Jesús ndaço ngain na:

—Janha chondaha ni ná espíritu jianha. Tti janha nttaha mé para nttasayá Ndodana, co jaha ra nichja ra feo de ixin janha.

⁵⁰ Janha taha joachjaon si sinchesayana ra o ni nahi, pero masqui jamé, jí ná tti rinao que tsosayana, co jehe nchehe juzgado ixin atenchesayana ra o ni nahi.

⁵¹ Janha rrindattjo ra ndoa que tti chojní que nchehe caso tti ndačhjan, chojní mé ðonhi tiempo ndasennehe.

⁵² Cottimeja jehe chojní judío mé vinttendaço na ngain Jesús:

—Jaxon seguro chonxin na que jaha chonda ná espíritu jianha. Abraham co cain profeté Dios ndavintteguenhe na, co jaha ndaço: “Tti chojní que sinchehe caso tti janha ndačhjan, ðonhi tiempo ndasennehe na.”

⁵³ ¿Apoco jaha icha jian que ndodana na Abraham? Jehe ndo mé venhe ndo co cain profeté Dios cai ndavintteguenhe na. ¿Quensen toenaó jaha?

⁵⁴ Jesús ndaço ngain na:

—Si janha jitosayana janho, tti janha rrinttaha ðonhi rentte. Pero tti nchesayana janha mé Ndodana, co jehe Ndo mé mero tti ndaço jaha ra que jehe mé tti Dios de jaha ra.

⁵⁵ Pero jaha ra chonxinha ra de ixin jehe Ndo, janha nchoe ján chonxin Ndo. Si janha rrondačhjan que chonxinha Ndo, janha rronichja ndoaha inchin jaha ra cai. Pero janha ndoa chonxin Ndo, co ján nttaha caso tti jehe Ndo ndaço Ndo.

⁵⁶ Abraham, tti ndogoelitoa ra ðančhjen, anto ché ixin jehe venohe que janha sihi ngataha nontte; co jehe vicon co anto ché.

⁵⁷ Cottimeja chojní judío mé vinttendaço na ngain Jesús:

—Ëa chondaha jaha ni cincuenta nano, ¿queéén ndačhoxin ixin vicon Abraham?

⁵⁸ Jesús ndaço ngain na:

—Janha rrindattjo ra ndoa que icha saho que Abraham vehe, janha ojoarihi.

⁵⁹ Cottimeja vinttecéj na ðo para rrožanguí na Jesús, pero jehe tavema ngayehe ni icha, cottimeja jimao vačhjeyexin de ngayehe na co de ngaxinhi nihngo icha importante para sacjoi.

9

Jesús joinchexingamehe ná xí que ðhoha vaguicon

¹ Are jidatto Jesús ngain ná lugar, jehe vicon ná xí que desde are diconcjihí xa ðhoha vaguicon xa.

² Co cain chojní que vacao Jesús joanchiangui na ngain jehe co ndaço na:

—Maestro, ¿quedonda diconcjihí xí yá jañá ixin ðhoha dicon xa? ¿Puede de ixin tti jianha que joinchehe ndodé xa o janné xa, o ní de ixin tti jianha que jehe xa joinchehe xa?

³ Jesús ndaço:

—Jaha de ixin tti jianha que jehe xí yá joinchehe xa ni jaha de ixin tti jianha que joinchehe nindoha xa. Jañá jí xí yá para que de ngain xa rrožago tti nchao nchehe Dios.

⁴ Jai que nchanho janha chonda que sinttaha ðé tti rroanha na nttihí ixin otsí ttie que ní ná chojní ðhoha sinchehe ða.

⁵ Jai que janha ða rrihi nttihí ngataha nontte jihí, janha inchin tti joadingasán de ngoixin ngataha nontte jihí.

⁶ Are joexin ndaço Jesús cain jihí, jehe cointtji nttatté ngataha nontte co joinchexjian nchion nchetjaho conixin nttatté, co coinga nche nganito con tti xí que vaguiconha.

⁷ Cottimeja ndaço Jesús ngain tti xí mé:

—Janché, tti diconti jinda ngain estanque de Siloé.

Co Siloé rrocho Tti Joí.

Tti vaguiconha mé cjoí co joiconti jinda, co are jehe cjan, onchao vicon.

⁸ Cottimeja cain nivecinoe, co cain tti nivicon are saho ixin jehe vaguiconha, vinttendačo na:

—¿Ajeha xí jihi xí que vaganchiagaha?

⁹ Canxion na ndačo na:

—Ján, jehe xa.

Icanxin na ndačo na:

—Nahi, jeha xa, pero inchin jitsjehe xí mé jitsjehe xí jihi.

Pero jehe xí que vaguiconha mé ndačo xa:

—Ján, janha.

¹⁰ Cottimeja vintteganchianguihi na xí mé co vinttendačo na:

—¿Queén conhe ixin jaha onchao dicon?

¹¹ Jehe xa ndačo xa:

—Tti xí jihi que dinhi Jesús joinchechjian xa nchetjaho, co coinga xa nche nganito con ndachjenji na xa: “Janché, tti ngain estanque de Siloé co tonnti jinda.” Mexinxin janha cjoí, co are contti jinda, janha onchao vicon.

¹² Cottimeja jehe na joanchiangui na co ndačo na:

—¿Quettinó jí xí mé?

Co jehe tti vaguiconha ndačo:

—Janha nonaha.

Xifariseo joanchianguihi tti xí que vaguiconha

¹³ Cottimeja joicao na jehe tti vaguiconha mé ngain xifariseo.

¹⁴ Co tti nchanho que Jesús joinchechjian nchetjaho co joinchexingamehe con jehe tti xí que vaguiconha, nchanho mé nchanho para nchejogaha ni.

¹⁵ Mexinxin chojni fariseo cai joanchianguihi na jehe tti xí que vaguiconha ixin queéén jehe onchao dicon. Co jehe ndačo:

—Xí mé coinga xa nchetjaho nganito con, co contti jinda; co jai onchao dicon.

¹⁶ Cottimeja canxion xifariseo vinttendačo xa:

—Tti xí que joinchehe jihi jeha chojni Dios ixin chondaha xa respeto ngain nchanho que nchejogaha ni.

Pero icanxin xa vinttendačo xa:

—¿Queéén ná xí que nchehe jianha nchao sinchehe xa ná milagro?

Co mexinxin jehe xa ndachjea xa yó grupo.

¹⁷ Co cjan xa iná joanchianguihi xa jehe tti vaguiconha mé, co ndačo xa:

—¿Co jaha quehe ndačo de ixin tti xí que chjá con?

Co jehe ndačo:

—Janha ndachjan que xí mé ná profeté Dios.

¹⁸ Pero chojni judío que vinttechonda joachaxin joinaoha na rroguitticaon na que ixin xí mé vaguiconha xa co are mé onchao vaguicon xa hasta que vayeja na ndodé xa co janné xa,

¹⁹ co joanchianguihi na na co ndačo na:

—¿Ajihí tti xitsiha ra, que jaha ra ndačo ra que de concijho xa vaguiconha xa? ¿Queéén jai onchao dicon xa?

²⁰ Ndodé co janné xí mé ndačo na:

—Nona na que jihi xitsihna na co vaguiconha xa de concijho xa,

²¹ pero nonaha na queéén jai jehe xa onchao dicon xa, ni nonaha na quensen joinchexingamehe jmacon xa. Danchianguihi ra xa, ochonda xa tsje nano, co jehe xa nchao rrochjá ra xa razón.

²² Nindoha jehe tti vaguiconha ndačo na jihi ixin xaon na ixin chojni judío que vinttechonda joachaxin ocjoao chó na ixin quexeho chojni que rrondačo ixin Jesús jehe mé tti Cristo que Dios rroanha, chojni que rrondačo jihi senguixin na de ngaxinhi ningoe na.

²³ Mexinxin nindoha jehe tti vaguiconha ndačo na: “Danchianguihi ra xa, otsje nano chonda xa.”

²⁴ Cottimeja cain chojni judío cjan na vayé na jehe tti xí que vaguiconha, co ndačo na ngain:

—Ndachjenji ni ra tti ndoa ngattoxon con Dios queéén conha ixin janha na nona na que xí yá nchehe xa jianha.

²⁵ Cottimeja jehe tti xí que vaguiconha ndačo ngain na:

—Janha nonaha si jianha xa ani nahi. Janha jeho nona que janha vaguiconha co jai odicon.

²⁶ Co jehe na cjan na joanchianguihi na iná co ndaço na:

—¿Quehe joinchehe xa nganji? ¿Queñen joinchehe xa para joinchchjian xa jmacon?

²⁷ Jehe tti vaguiconha ndaço:

—Ondattjo ra, co ncheha ni ra caso, mexinxin ¿quedonda rinao ra que janha rrocjan na rronhattjo ra iná? ¿Asoixin ra cai rinao ra sitticaon ra xí mé?

²⁸ Cottimeja jehe na nichja na feo ngain jehe tti vaguiconha mé, co ndaço na ngain:

—Jaha ditticaon xí mé, pero janha na ditticanho na Moisés.

²⁹ Janha na nona na que Dios nichja ngain Moisés; pero xí yá ni nonaha na ttinó joixin xa.

³⁰ Tti xí que vaguiconha ndaço ngain na:

—Janha ttxinxinha queñen ñaxaon ra de ixin xí yá. Soixin ra noaha ra quettinó joixin xa, pero janha nona que ngain Dios joixin xa ixin joinchchjian xa jmacon na.

³¹ Ján na noa na jian que Dios ttinha tti ndaço chojni que nchehe jianha, jeho ttinhi ngain chojni que nchesayehe jehe co nchehe na tti rinao jehe.

³² Xonhi tiempo coinhi ni que ná chojni joinchchjian jmacon ná chojni que desde concjiho diconha.

³³ Si xí jihi jeha ngain Dios rroquixin xa, jehe xa çhoha rrojinchehe xa jihi.

³⁴ Cottimeja chojni judío ndaço na:

—Jaha anto jianha desde concjiha ¿co jai arinao sinchecoanna ni ra de ixin Dios?

Co venguixin na de ngaxinhi nihngo.

Tti chojni que ditticaonha Cristo te na inchin tti chojni que diconha

³⁵ Jesús conohe ixin vengui na jehe tti vaguiconha mé, co are vetan Jesús, Jesús ndaço ngain:

—¿Aditticaon jaha ngain Xenhe Dios?

³⁶ Co jehe tti vaguiconha mé ndaço:

—Ndachjenji na soixin, quensen mé, para que janha sitticanho ngain.

³⁷ Jesús ndaço:

—Jaha ovicon; mé janha tti jaha rritjao jaxon.

³⁸ Cottimeja jehe tti vaguiconha mé vettoxin nttajochjihi ngain Jesús, co ndaço:

—Ján, ditticanho, soixin.

³⁹ Cottimeja ndaço Jesús:

—Janha joihi ngataha nontte jihi para que janha sinttajuzgá chojni para que tti chojni que te inchin tti diconha, rroço ixin jehe na chonxinha na de ixin Dios, para que jai chojni mé nchao sintte na inchin tti dicon ixin sitticaon na nganji na janha. Co para que tti chojni que te inchin tti dicon, rroço ixin jehe na ndaço na que anto chonxin na de ixin Dios, chojni mé sintte na inchin tti diconha ixin sitticaonha na nganji na janha.

⁴⁰ Cottimeja canxion xifariseo que te ngain Jesús nttiha vinttequinhí xa jihi, co vintte-ganchianguihi xa Jesús co ndaço xa:

—¿Apoco janha na cai diconha na?

⁴¹ Jesús ndaço ngain xa:

—Si jaha ra rroguintte ra inchin tti diconha, xonhi rroguintteca ra de ixin tti jianha que nchehe ra. Pero ixin jaha ra ndaço ra que dicon ra, mexinxin tecaxin ra tti jianha que nchehe ra.

10

Ejemplo corré coleco

¹ Janha rroundattjo ra ndoa que tti chojni que dixinxinha de ngain puerté corré coleco, co dixinxin ojé lado, chojni mé chehe ixin tté coleco.

² Pero tti chojni que dixinxin de ngain puerta, chojni mé tti ttingaria jehe coleco co dicao cuidado de ixin jehe va.

³ Tti jinda puerta jehe danttjé puerta para dixinhi jehe tti ttingaria coleco, co jehe va datsoan va tté jehe. Co jehe dayé va de ixin nombré va co dantsjexin va de corra.

⁴ Co are ottjexin dantsje cainxin coe, jehe ditaonhe va nttiha co jehe va rroé va ixin datsoan va tté jehe.

⁵ Co jehe va rroeha va iná chojni que chonxinha va, sino que sattinga va de ngain ixin chonxinha va tté chojni mé.

⁶ Jesús ndache xifariseo ejemplo jihi, pero jehe xa coinxinha xa quehe rroço tti ndaço Jesús.

Jesús tti chojni que jian ttingaria coleco

⁷ Cottimeja Jesús cjan ndache xa:

—Janha rrindattjo ra ndoa que janha tti puerta na tti dixinxin coleco.

⁸ Cainxin chojni que jói icha saho que janha, tti nindačo que jehe na joixin na de ngain Dios, chojni mé tti chehe, pero coleco joincheha va caso.

⁹ Janha tti puerta na; co tti chojni que sixinhi de ixin janha, chojni mé janha tsjenguijna para rrochondaha na castigo de cain cosa jianha que nchehe. Co sehe inchin ná coleco que dixinhi co dachje de ngain corra co dittja va cachji que jine va.

¹⁰ Tti chehe jehó tti para tté co para nadoenxon chojni, co para nchexantte, pero janha joihi para rrochonda ra iná vida naroaxin, co cai para que janha rrochjaha ra ngain vida mé tsje tti jian que danjo Dios.

¹¹ Janha tti chojni que jian ttingaria coleco. Tti jian ttingaria coleco jehe danjo vidé para ixin jehe va.

¹² pero tti nchehe xa jehó para sacha tomi, are jehe dicon ttí condanixa, jehe tinttohe coleco co jehe sattinga ixin jehe jeha tti mero ttingaria coleco co ixin coleco jeha coe jehe. Co condanixa tonchjequé va coleco co tse va va.

¹³ Xí jihí sattinga xa ixin nchehe xa xa jehó para dacha xa tomi, co jehe xa ndosenha xa coleco.

¹⁴⁻¹⁵ Janha tti chojni que jian ttingaria coleco. Jañá inchin Ndodana chonxin Ndo jian ngain ansenna, jamé janha cai chonxin jian ngain ansén jehe Ndo; co xajehó jamé janha chonxin jian ngain ansén cain colecona, co jehe va cai chonxin va jian ngain ansenna. Co janha sanjo vidana para ixin jehe cona.

¹⁶ Cai janha chonda icanxin coleco que jeha de ngain corra jihí, co chonda que siquinha va cai. Jehe va sitticaon na va janha, co sehe nacoaxinxon tájo co nacoaxinxon tti tsingaria va.

¹⁷ Ndodana rinao na Ndo janha ixin janha sanjo vidana para nchao rrocjan na sayá vida iná.

¹⁸ xonhi chojni santsjena vidana, janho tti sanjo vidana ixin janha jañá rinaho. Janha chonda joachaxin para sanjo vidana, co cai chonda joachaxin para rrocjan na sayá vidana iná. Jehe jihí tti coetonna Ndodana.

¹⁹ Are chojni judío coinhi na cain palabra jihí, jehe na cjan na chjea na yó grupo iná.

²⁰ Tsje jehe na ndačo na:

—¿Quedonda nchehe ra caso xí yá? Jehe xa chonda xa ná espíritu jianha co ndadixenga xa.

²¹ Pero icanxin na ndačo na:

—Xonhi chojni que chonda espíritu jianha nchao rronichja jañá. ¿Apoco ná espíritu jianha nchao rrochjé jmacon chojni que diconha?

Chojni judío vayeha na Jesús

²² Co ngain tiempo mé mero tiempoe quin, co ngain ciudad de Jerusalén chojni judío mero techonda na tti quiai para xaxaonxin na tti nchanho are joexin conchjian tti nihngo icha importante.

²³ Co are mé, Jesús tarridehe ngain nihngo mé ngain lugar que vinhi portal de Salomón.

²⁴ Co chojni judío vixindanji na Jesús co ndačo na ngain:

—¿Hasta tti quesa sinchenona ni ra jaha? Si jaha tti Cristo, ndačo ndacoa nao jaxon.

²⁵ Jesús ndačo ngain na:

—Janha ondačhjan co jaha ra vitticaonnaha ra. Cain cosa que janha nttaha, nttaha ixin Ndodana ttetonna. Co ttí nttaha janha jamé xago claro quensen janha,

²⁶ pero jaha ra ditticaonha ra ixin jaha ra jeha colecona ra inchin ondattjo ra are saho.

²⁷ Colecona datsoan va ttana janha co janha chonxin jehe va co jehe va roehna va.

²⁸ Janha rrochjaha va iná vida naroaxin que xonhi tiempo tsjexin co xonhi tiempo ndasitján va, ni xonhi chojni santsjenanxin va de ngá rana.

²⁹ Ndodana chjana Ndo va co jehe Ndo chonda Ndo joachaxin de cainxin cosa, co xonhi chojni santsjehe Ndo va de ngá rá Ndo.

³⁰ Janha co Ndodana jehó nacoa na.

³¹ Cottimeja chojni judío cjan na coá na xo para rroxanguí na Jesús.

³² Co Jesús ndačo ngain na:

—Janha jointtaha tsje cosa jian ngattoxon con ra conixin joachaxin Ndodana; ¿quexehe de cain cosa jihí rinao ra rroxanguinanxin ra xo?

³³ Jehe chojni judío ndačo na:

—Janha na rroxanguiaha ra xo de ni ná cosa jian que jaha joinchehe; janha na rinaho na rroxanguiaha ra xo ixin jaha chondaha respeto ngain Dios de ixin tti jaha ndačo. Jaha jehó ná xí, pero jaha rridoan Dios.

³⁴ Cottimeja Jesús ndačo ngain na:

—Ngain ley que chonda ra jitaxin que Dios ndačo: “Jaha ra dios ra.”

³⁵ Noa na que čoha rrondačo na nahi de ixin tti ndačo ngain tti jitaxin Palabré Dios, co Dios joinchequinhi chojni dios, tti nivayé joajné jehe.

³⁶ Co si Dios joantsjenda na janha co rroanha na ngataha nontte nttihi, ¿quečén nchao ndačo ra que janha chondaha respeto ngain Dios ixin ndačhan que janha Xenhe Dios?

³⁷ Si janha čoha nttaha cain cosa que nchehe Ndodana, ditticaonha ni ra janha.

³⁸ Pero si janha ján nttaha, masqui ditticaonha ra nganji na, ditticaon ra ngain cosa que janha nttaha para que tsonoha ra que Ndodana jí Ndo nganji na co janha rrihi ngain jehe Ndo.

³⁹ Jehe na joinao na rrotse na Jesús iná, pero Jesús sacoioguehe na.

⁴⁰ Cottimeja Jesús sacjan para lado čhinxin nchanho de río Jordán co nttiha vittohe ngain tti lugar que vancheguittexin Juan chojni are icha saho.

⁴¹ Tsje chojni cjoí na joitsjehe na Jesús co ndačo na:

—Ján ndoa, masqui Juan xonhi milagro joinchehe, pero cainxin tti jehe ndačo de ixin xi jihi ján ndoa.

⁴² Co tsje chojni vitticaon na Jesús ngain lugar mé.

11

Are ndavenhe Lázaro

¹ Vehe ná xí venihi que vinhi Lázaro, xí mé Betania rajné xa, xajeho rajné María co xanchó María xanMarta.

² Jehe María jihi, nčhichó jehe Lázaro, tti venihi, co María jihi tti cointtjitte aceite que anto xajni ngataha rotté Jesús co joinchexemanxin conixin xajá.

³ Jańá cayoi nčhí mé rroanha nča joajna ngain Jesús co ndačo nča:

—Xiamigoa soixin nihi xa.

⁴ Are Jesús coinhi jihi, ndačo:

—Čhin yá nasoexinhao chin Lázaro, jeho para rrořagoxin joachaxín Dios co para de ixin chin yá cai rrořagoxin joachaxín Xenhe Dios.

⁵ Masqui Jesús anto joinao jehe Marta, conixin cayoi xanchó Marta, María co Lázaro,

⁶ are ndache na Jesús ixin Lázaro venihi, Jesús řa vittohe iyó nchanho nttiha ngain tti lugar que vehe.

⁷ Después ndačo ngain tti chojni que vacao:

—Čhjin na iná para ngain Judea.

⁸ Co tti chojni que vacao ndačo na:

—Maestro, řa seha chojni judío que techonda joachaxin de ngain lugar mé joinao na narrogoexon na jaha ixin řo, ¿co řa rinao tsji nttiha iná?

⁹ Jesús ndačo:

—¿Ajeha ndoa que nchanho chonda tteyó hora? Co si ná ni čhji ni de nchanho, tonttenguixinha ni ixin dicon ni joadingasán que jí ngataha nontte jihi,

¹⁰ pero si ná ni čhji ni de ttie, tonttenguixin ni ixin diconha ni joadingasán.

¹¹ Cottimeja ndačo Jesús ngain tti chojni que vacao:

—Xiamigoa na Lázaro tajjioa xa, pero sinttaxingamá xa.

¹² Cottimeja tti chojni que vacao Jesús ndačo na:

—Soixin, si tajjioa, rročo orroxengańao.

¹³ Pero tti ndačo Jesús rročo que Lázaro ondavenhe. Co cain tti chojni que vacao Jesús řaxaon na que ndoa tti ndačo Jesús ixin tavejoa Lázaro.

¹⁴ Cottimeja Jesús ndačo ngain na claro:

—Lázaro ondavenhe.

¹⁵ Janha chahna ixin joariha nttiha; icha jian jańá para ixin jaha ra sitticaon ra. Pero čhjin na sitsjehe na Lázaro.

¹⁶ Cottimeja Tomás, tti vancheguinhí na Xancoata, ndačo ngain tti icha chojni que vacao Jesús:

—Čhjin na ján na cai para senhe na conixin Jesús.

Jesús ndačo ixin jehe tti rroxexonxin chojni co jehe tti danjo iná vida naroaxin

¹⁷ Are jehe na joiji na nttiha, chojni nttiha joinchenohe na Jesús que Lázaro ovechonda nó nchanho que jířavá.

¹⁸ Rajna Betania vehe chiaon Jerusalén, inchin yoto kilómetro co rioho tecaouxin chó rajna mé.

¹⁹ Co tsje chojni judío joitsjehe jehe Marta co María para joantsjehe na joachjaon ansén cayoi nčhí mé de ixin xanchó nča que ndavenhe.

²⁰ Are Marta conohe que Jesús ojojii nttiha, jehe Marta vačhjexin de nchia co joichoexin Jesús ngatja nttiha, pero María ndavittohe ngaxinhi nchia.

²¹ Co Marta ndačho ngain Jesús:

—Si soixin rrogarihi nttihi, rrogenha xanchian.

²² Pero janha nona que Dios rrochjá cain tti sanchiehe.

²³ Jesús ndačho:

—Xanchó rrocjan xan sechon xan.

²⁴ Marta ndačho ngain Jesús:

—Ján, janha nona que rrocjan xan sechon xan are rroxechon cainxin nindadenhe ngain nchanho are ndatsjexin mundo.

²⁵ Cottimeja Jesús ndačho:

—Janha tti rroxechonxin cainxin chojni, co janha tti danjo iná vida naroaxin. Tti chojni que ditticaon na janha, masqui jehe senhe, pero rrochonda iná vida naroaxin.

²⁶ Co cainxin chojni que xa techon co ditticaon na, chojni mé xonhi tiempo sinchetján na almé na ixin ochonda na vida mé. ¿Aditticaon jaha jihi?

²⁷ Marta ndačho:

—Ján, janha ditticanho que soixin tti Cristo, tti Xenhe Dios, tti vandačho profeta que sihi ngataha nontte jihi.

Jesús tsjanga ngaca tti veřavá Lázaro

²⁸ Are Marta joexin ndačho jihi, cottimeja cjoijogayé María, jehe xanchó, co ndačho Marta jimao ngain María:

—Tti Maestro nttihi jí co dayaha jaha.

²⁹ Are María coinhi jihi, jehe jaicoa vingattjen co cjoijogayé Jesús.

³⁰ Jesús xa joigaha rajna rato mé; ixin jehe xa vittohe ngain tti lugar vetanxin Marta.

³¹ Are ni icha vicon na que María jaicoa vingattjen co vačhje, tti chojni judío que te nttiha ngain nchiandoha María ixin tedantsjehe na joachjaon ansén, jehe na rroé na María ixin jehe na xaxaon na que María sarrocji ngain tti jiřavá xanchó para rrotsjangaxin nttiha.

³² Cottimeja María, are joiji tti jí Jesús, María vettoxin nntajochjihi ngaca rotté Jesús, co ndačho:

—Si soixin rrogarihi nttihi, xanchian rrogenha xan.

³³ Are Jesús vicon que María jitsjanga co cain chojni judío que joicao María tetsjanga na cai, Jesús vechín co anto soji ná joachjaon conohe ngain ansén.

³⁴ Cottimeja Jesús joanchiangui co ndačho:

—¿Ttinó cjoavá ra Lázaro?

Co jehe na ndačho na:

—Xacoi soixin, sitsjehe.

³⁵ Co Jesús tsjanga.

³⁶ Cottimeja chojni judío ndačho na:

—Tsjenxin ra, anto joinao xí jihi Lázaro.

³⁷ Pero icanxin de jehe na ndačho na:

—Xí jihi tti chjé jmacon tti xí que vaguiconha, ¿co jai, ařonhi ná cosa nchao rrojinchehe xa para que Lázaro rrogenha?

Are xechon Lázaro

³⁸ Jesús cjan conohe iná joachjaon anto soji, co jehe conchienne ngain tti jiřavá Lázaro ngain ná cueva, co jijé ná xo tti dixinxin na.

³⁹ Jesús ndačho:

—Dinttjian ra xo.

Marta, nřichó jehe tti ndavenhe, ndačho nřha ngain Jesús:

—Pero puede atto xa ixin ochonda nó nchanho que ndavenhe.

⁴⁰ Pero Jesús ndačho:

—¿Andattjoha que si sitticaon nganji na janha, jaha sicon joachaxín Dios?

⁴¹ Cottimeja vinttjian na xo mé. Co Jesús tsjehe para ngain co ndačho:

—Padre soixin, chjaha gracias ixin coinhi tti janha ndačhan.

⁴² Janha nona que cainxin tiempo ttinhi tti janha ndačhan, pero jai janha rrindačhan jihi para que chojni tehe sicon na que soixin ttinhi tti janha ndačhan nganji, co para que sitticaon na que soixin rroanha na janha.

⁴³ Are joexin ndačho Jesús jihi, jehe ndačho sén:

—¡Lázaro, dačhjexin de yá!

⁴⁴ Co jehe tti ndavenhe mé vačhje. Ngoixin cuerpoe jisiandanji ná tira de manta que jiřiaxin de rá co de rotté, co ngá con jisía iná manta. Jesús ndačho:

—Tonxindanguehe ra co tančhjana ra satsji.

Quexén xaxaon na para rrotse na Jesús

(Mt. 26.1-5; Mr. 14.1-2; Lc. 22.1-2)

⁴⁵ Conixin jihi, tsje chojni judío vitticaon na Jesús, tti nihoicao María co vicon na tti joinchehe Jesús.

⁴⁶ Pero icanxin de jehe na cjoí na ngain xifariseo joitsjehe na xa co coequín na xa tti joinchehe Jesús.

⁴⁷ Cottimeja tsje xifariseo, co tsje xidána que vaquetonha ngain icha xidána co cain xí que vechonda joachaxin ngain juzgadoe nihngo xatte xa co vinttendačo xa:

—¿Quehe sinttoho na? Xí jihi atto tsje milagro jinchehe xa.

⁴⁸ Si tsanchjanda na xa jañá, cainxin chojni sitticaon na jehe xa, co tsí autoridad romano co sinchexante ningoa na icha importante conixin naciao na.

⁴⁹ Pero ná de jehe xa, que vinhi Caifás que jehe mé xidána icha importante tiempo mé, jehe mé ndačo ngain xa:

—Jaha ra xonhi noha ra,

⁵⁰ ¿anoaha ra que icha jian para ixin ján na que senhe jehi nacoaxinxon xí para ixin ngoixin nación, que rroxante ngoixin nación?

⁵¹ Pero Caifás ndačoha jihi por ixin jehi, pero ixin jehe vehe xidána icha importante tiempo mé, mexinxin Dios ndačo ngain jehe para que jehe ndačo jañá ixin Jesús ndasenne para ixin ngoixin nación judía,

⁵² co jeha para ixin jehi nación mé, cai para ixin cainxin chojni que ditticaon Dios ngoixin mundo sinchesayehe na jehi nacoaxinxon Dios.

⁵³ Co de ngain nchanho mé chojni judío que vechonda joachaxin oaxaon na para nasoenxon na Jesús.

⁵⁴ Mexinxin Jesús ivaxagoha ni ivacjia ngayé chojni judío, mexinxin jehe vačhjexin de ngain regioen Judea co sacjoi ngain ná lugar chian ngagaha jna, ngain ná rajna que dinhi Efraim. Ntíha vittohe jehe conixin cain tti chojni que vacao.

⁵⁵ Tsjehe nchanho vitján para tti quiai que dinhi pascua para ixin chojni judío. Co mexinxin tsje chojni ngain tsje rajna sacjoi na para Jerusalén para joicoroa na saho de quiai mé inchin costumbré jehe na.

⁵⁶ Saho de rroguintteguixinhi na nihngo jehe na cjoé na Jesús, co are ovinttexinhi na nihngo joanchianguihi chó ná na co iná na:

—¿Quehe xaxaon ra? ¿Atsí Jesús ngain quiai jehi ani nahi?

⁵⁷ Xifariseo co cain xidána que vaquetonha ngain icha xidána ocoetonha xa que ixin quexeho chojni nohe quettinó vehe Jesús, que rrondačo chojni mé para que nchao sitse xa Jesús co tsiaxinhi xa.

12

Ná nchí que coinga Jesús aceite

(Mt. 26.6-13; Mr. 14.3-9)

¹ Incjaon nchanho saho de tti quiai dinhi pascua, Jesús cjoí ngain Betania, tti rajna vehe Lázaro, tti Jesús joinchexechon de ndavenhe.

² Co ntíha nindoha Lázaro joinchexjian na ná comida para ixin Jesús. Marta joanjo tti joine na co Lázaro vehe ngain mesa para joinecaho Jesús conixin tti chojni que vacao.

³ Cottimeja María joiaho inchin rioho litro de aceite diconchjian joxon ca que dinhi nardo, co aceite mé anto xajni co anto rentte, co María coinga aceite mé rotté Jesús. Cottimeja joinchexemanxin conixin xajá. Ngoixin ngaxinhi nchia concaxajni aceite mé.

⁴ Cottimeja nichja Judas Iscariote, xitsihi ná tti vinhi Simón. Judas mé ná de tti tteyó chojni que vacao Jesús co jehe mé tti joindačo para tse na Jesús. Co Judas mé ndačo:

⁵ —¿Quedonda cochjia aceite jehi? Ixin rentte inchin tsjexin dacha ná tti nchehe xa ngoixin ná nano. Co nchao rrocjenguijnanxin na chojni noa.

⁶ Pero Judas ndačoha jehi ixin jehe ndoa rrojinchenihi chojni noa, jehe ndačo jañá ixin jehe chehe. Co ixin jehe vehe tesoro de tomí cain tti tteyó chojni que vacao Jesús, mexinxin jehe vaqué ttoha tomí que vaganjo na ntíha.

⁷ Mexinxin Jesús ndačo:

—Tančhanda nchí jehi ixin jehe ncha ojoinchehe ncha jehi para ngain nchanho que janha rroxavá na.

⁸ Jaha ra cainxin tiempo sintte chojni noa ngayaha ra, pero janha cainxinha tiempo sarihi ngayaha ra.

Are xaxaon na para narrogoenxon na Lázaro

⁹ Tsje chojni judío conohe na ixin Jesús vehe ngain rajna Betania, co jehe na vinttecji na nttiha, pero jeoha Jesús joitsjehe na nttiha, cjoí na para joitsjehe na Lázaro cai, tti joinchexechon Jesús are ndavenhe.

¹⁰ Cottimeja canxion xidána que vaquetonha ngain icha xidána cjoao chó xa para quexén sinttenchehe xa para narrogoenxon xa Lázaro cai,

¹¹ Ixin causexin jehe tsje chojni judío vačheyexin de ngain chojni xa para vitticaon na Jesús.

*Are Jesús joigaha ciudad de Jerusalén
(Mt. 21.1-11; Mr. 11.1-11; Lc. 19.28-40)*

¹² Tsje chojni odicji Jerusalén para tti quiai que dinhi pascua, co para ndoexin conohe na ixin Jesús siji ngain ciudad mé.

¹³ Mexinxin cončhinji na cajne co joichoexin na Jesús ngatja nttiha, co ndačo na soji:
—¡Gloria para ixin Dios! ¡Anto jian jehe tti joí conixin nombré Dios, co anto jian jehe tti Rey de chojni Israel!

¹⁴ Jesús vittja ná colochó co jehe vetaha va, inchin čho ngain tti jitaxin Palabré Dios:

¹⁵ Xaonha jaha, ciudad de Sión;

tsjenxin que joí tti Rey de jaha

jitaha ná colochó.

¹⁶ Ngain momento jiji cain chojni que vacao Jesús coinxinha na cosa jiji, pero después, are Jesús ndavenhe co xechon, cottimeja xaxaon na que cain jiji jitaxin de ixin Jesús, co jańá conhe.

¹⁷ Cain chojni que vintte ngain Jesús are jehe vayé Lázaro de ngain tti veřavá co joinchexechon are ndavenhe, cain chojni mé coequin na tti jehe na vicon na.

¹⁸ Mexinxin tsje chojni vačje na para joiguetanxin na Jesús ngatja nttiha ixin venohe na tti joinchehe Jesús ngain Lázaro.

¹⁹ Cottimeja xifariseo ndache chó xa:

—Tsjenxin ra, chojni ditticaonha na na ján na: cainxin na sattji na ngain jehe.

Canxion chojni griego cjoé na Jesús

²⁰ De ngayehe cainxin chojni que cjoí Jerusalén para joinchesayehe na quiai nttiha, vintte canxion chojni griego que cai vitticaon inchin chojni judío.

²¹ Chojni griego jiji conchienne na ngain Felipe, tti rajné Betsaida ngain Galilea, co joinchetsenhe na ñao ndačo na:

—Rinaho na que soixin tsjagohna ra Jesús ixin rinaho na rronichjá na.

²² Felipe joindache Andrés, co cayoi na joindache na Jesús.

²³ Cottimeja Jesús ndačo:

—Ojoi tiempo que janha, tti Xí que joixin de ngajni, tsosayana.

²⁴ Janha rrindattjo ra ndoa que si ná noanchjan de trigo detsingaha ngataha jinche co ndadenha, jehe noanchjan mé řajehe nacoa noanchjan, pero si noanchjan mé ndasenhe, cjan soan anto tsje noanchjan iná.

²⁵ Tti chojni que anto rinao vidé, chojni mé ndasinchetján vida mé, pero tti chojni que rinaoha vidé ngain mundo jiji, chojni mé tsenchjinha vidé para ngain vida naroxin que řonhi tiempo tsjexin.

²⁶ Si čhonja chojni rinao sinchehe řana janha, pero jehe chonda que sitticaon palabrana; co tti janha sarihi, nttiha sehe jehe cai. Tti chojni que sinchehe řana janha, Ndadana sinchesayehe Ndo chojni mé.

Jesús ndačo ixin jehe ndasenhe

²⁷ Janha jai atto soji joachjaon tonoho ansenna; ¿quehe rrondačjan janha? Janha rrondačjanha: “Padre, tančjandaha na janha ngain tti tsonna jai.” Ixin para mé joixin janha.

²⁸ Mexinxin janha rrondačjan: “Padre, nttatsanha ñao, nchehe de que cain chojni sinttasayaha.”

Cottimeja coinhi na tté Dios de ngajni que ndačo:

—Janha ojointtaha jamé, co řa sinttaha iná.

²⁹ Co canxion chojni que coinhi nttiha ndačo na que joatte, co icanxin na ndačo na:

—Ná ángel nichjé.

³⁰ Cottimeja Jesús ndačo ngain na:

—Tti jaha ra coinhi ra, yá para ixin jaha ra co nahi para ixin janha.

³¹ Jai joí nchanho que Dios sinchejuzgá mundo jiji, co jai Dios senguixin de ngain mundo jiji tti ttetonha ngain mundo jai.

³² Co are chojni rrotsín na na janha noi nganito cruz, chojni de cain nación sinao na sitticaon na na janha.

³³ Jesús ndačo jihi para que coinxin jehe na quexén senxin jehe.

³⁴ Co chojni ndačo na ngain Jesús:

—Janha na coian tti jitaxin ley que Cristo, tti Dios rrorroanha, chonda que sechon para cainxin tiempo. ¿Quexén ndačoxin jaha que tti Xí que joixin de ngain chonda que rrotsín na noi nganito cruz? ¿Quensen yá tti Xí que joixin de ngaini?

³⁵ Cottimeja Jesús ndačo ngain na:

—Jai que janha xa rrihi ngayaha jaha ra rročo que xa chonda ra joadingasán jihi, pero jeha para nchion tiempo. Dacji ra jaxon que xa chonda ra joadingasán jihi para que sinttaxaonha ra tti naxin xehe ixin tti chojni que čhji ngain tti naxin xehe noeha na ttinó rridintte na.

³⁶ Ditticaon ni ra janha que janha inchin tti joadingasán jaxon que janha rrihi nganji ra, para que sintte ra chojni joadingasán.

Co are joexin ndačo Jesús cosa jihi, jehe sacjoi co tavemehe na.

Quedonda chojni judío vaguitticaonha na Jesús

³⁷ Masqui Jesús joinchehe anto tsje milagro, co masqui joinchehe milagro mé ngattoxon con jehe na, jehe na vaguitticaonha na jehe

³⁸ ixin chonda que joiconhe jamé ixin profeta Isaías dicjin janhi:
¿Quensen vitticaon joajnana na?

¿Quensen vicon tti joachaxin jie que chonda Dios?

³⁹ Jańá mexinxin čhoča vitticaon na, co cai dicjin Isaías janhi:

⁴⁰ Dios joinchechjian jehe na de chejo na ngain joarrixaoen na co de cha ansén na, para que siconxinha na conixin joarrixaoen na, ni tsinxinha na jian de ixin cosa jihi, ni tsiha na nganji na para que janha sinttaxingamá na.

⁴¹ Isaías ndačo cain jihi ixin jehe vicon anto tsje joachaxin que Jesús chonda, co mexinxin jehe vanichja jańá de ixin Jesús.

⁴² Masqui jańá jitaxin, pero tsje chojni judío vitticaon na Jesús hasta icanxin de jehe na tti ni icha vaquetonha. Pero jehe na vandacheha na icha chojni ixin vitticaon na Jesús ixin vařaon na que xifariseo senguixin na xa de ngain nihngo.

⁴³ Jehe na icha joinao na tti jian que nichja chojni de ixin jehe na pero řaxaonha na de quexén sinchehe na para que Dios rrořaxaon jian de ixin jehe na.

Palabré Jesús sinchejuzgá ngain chojni

⁴⁴ Jesús nichja sén co ndačo:

—Tti chojni que ditticaon na janha, jeoha nganji na ditticaon, cai ditticaon ngain Ndodana que rroanha na.

⁴⁵ Co tti chojni que dicon na janha, cai chojni mé inchin jehe rroguicon tti rroanha na janha.

⁴⁶ Janha que inchin tti joadingasán joihi ngataha nontte para que cain chojni que ditticaon na janha sittoeha na ngain tti naxin xehe.

⁴⁷ Pero si canxion na ttinhi na palabrana co ncheha na caso, jeha janha tti sinttastigá na ixin janha joiha para sinttastigá chojni ngain mundo jihi; janha joihi para que tsjengujna na para que rrochondaha na castigo de cain cosa jianha que nchehe na.

⁴⁸ Are ndatsjexin mundo tti ndoa que janha ndačhjan, mé tti sinchecastigá tti chojni que rinaoha na janha co ncheha caso palabrana.

⁴⁹ Jamé ixin janha nichjaha inchin janho rinaho; Ndodana que rroanha na, Ndo mé Ndo ttetonna tti janha rrondačhjan co tti janha tsjagoa chojni.

⁵⁰ Co nona que tti ttetonna Ndodana, mé para vida naraoxin que řonhi tiempo tsjexin. Jańá mexinxin tti janha ndačhjan, ndačhjan inchin Ndodana coetonna.

13

Jesús joinchetsinda rotté cain chojni que vacao

¹ Ná nchanho saho de tti quiai dinhi pascua Jesús ovenohe que ojitonchian tiempo que jehe satsjixin de ngataha nontte ntthi co satsji para ngain Ndodé. Jehe cainxin tiempo joinao chojni jehe ntthi ngataha nontte, co nchanho mé jehe cjoagoe na que jehe anto rinao na.

²⁻⁴ Inchínji joincheřaxaon Judas Iscariote, xitsihi ná tti vinhi Simón, para que jehe řaxaon quexén sinchehe para sicjagoa chojni que ningaconhe Jesús ttinó jí Jesús para rrotse na. Jesús ovenohe que jehe joixin de ngain Dios, co ixin rrocjan satsji ngain Dios iná, co venohe que jehe Ndodé joanjo Ndo cainxin joachaxin; mexinxin are tejine na, Jesús vingattjen de

ngain mesa, co joantsje lonttoe jingá, tti lontto jidattexin co coiixin nttachajnoe conixin ná toalla.

⁵ Cottimeja coequia jinda ná chiavandejachjan co coexinhi joinchetsinda rotté cain chojni que vacao jehe, co joinchexemanxin rotté na conixin tti toalla que jidicaoxin ngain nttachajnoe.

⁶ Co are jehe coexinhi joinchetsinda rotté Simón Pedro, jehe jihi ndačo:

—¿Asoixin sinchetsinda rottena?

⁷ Jesús ndačo:

—Jai jaha ttinxinha tti rrinttaha janha, pero después jaha tsinxin.

⁸ Pero Pedro ndačo ngain:

—Janha xonhi tiempo rrochjaha joachaxin para sinchetsinda rottena.

Jesús ndačo ngain:

—Si janha sinttatsindaha rottea, jaha jaha chojnina.

⁹ Simón Pedro ndačo:

—Jeoha rottena sinchetsinda na remé; cai sinchetsinda rana co jana.

¹⁰ Pero Jesús ndačo ngain:

—Tti chojni que nandá ditsinda irrogondaha rrotsinda icha, jecho rotté ixin ngoixin cuerpoe oroa. Jaha ra oroa ansean ra masqui jaha cainxin ra.

¹¹ Jehe ndačo: “Jaha cainxin ra roa ra”, ixin jehe ovenohe quexehe tti rronache chojni quexén para rrotse na Jesús.

¹² Are joexin joinchetsinda rotté cain na, jehe cjan vengá lonttoe, tti lontto jidattexin, co tavehe ngain mesa iná co ndačo ngain na:

—¿Attinxin jaha ra tti jointtaha janha nganji ra?

¹³ Jaha ra ncheguinhí ni ra janha Maestro co tti chonda cain joachaxin para ixin jaha ra, co nchao ndačo ra jañá ixin janha ndoa jañá na.

¹⁴ Janha Maestro na co chonda joachaxin para ixin jaha ra, pero masqui jamé janha jointtatsinda rottea ra, mexinxin cai jaha ra xaxaonha ra ixin anto importante ra; chonda ra que sinchetsindehe chó rottea ra naná ra.

¹⁵ Janha jointtaha jihi para chjaha jaha ra ná ejemplo para que jaha ra sinchehe ra xajeho tti janha jointtaha.

¹⁶ Janha rrindattjo ra ndoa que ni ná tti nchehe xa choha rrochonda icha joachaxin que xinajní, co ni ná tti dicao ná joajna choha rrochonda icha joachaxin que jehe tti rroanha joajna mé.

¹⁷ Si ttinxin ra cosa jihi, co jañá sinchehe ra, jaha ra atto chjoin sintte ra.

¹⁸ Janha rrinichjaha de cainxin jaha ra ixin janha nona quecá ra xo coinchiaha ra. Pero chonda que tsonhe inchin jitaxin Palabré Dios: “Tti chojni que jinequinha, mé tti rroningaconna.”

¹⁹ Janha ndattjo jaha ra jihi jai para que are siconhe, jaha ra sitticaon ni ra janha que janha ndoa tti Cristo na inchin ndachjan.

²⁰ Janha rrindattjo ra ndoa que tti chojni que sayé quexeho chojni que janha rrorroanha, cai chojni mé sayé na janha; co tti chojni que sayé na janha, cai sayé na tti rroanha na.

Jesús ndačo ixin Judas tsjago quexén rrotse na Jesús

(Mt. 26.20-25; Mr. 14.17-21; Lc. 22.21-23)

²¹ Are joexin ndačo Jesús jihi, jehe conohe ngain ansén ná joachjaon anto soji, co ndačo claro:

—Janha rrindattjo ra ndoa que ná de jaha ra tti rronache chojni quexén para rrotse na na janha.

²² Cottimeja cain chojni que vacao Jesús coexinhi na tsjehe chó na pero noeha na quexehe de jehe na tti ndačo Jesús.

²³ Ná de tti tteyó chojni que vacao Jesús, tti Jesús anto joinao, jehe mé tajine ngaca Jesús,

²⁴ co Simón Pedro joinchehe seña ngain mé para que jehe mé sanchiangui ngain Jesús de ixin quensen tti ndačo Jesús.

²⁵ Cottimeja jehe mé icha conchienne ngain Jesús para joanchiangui co ndačo:

—Ndachjenji na soixin quensen mé.

²⁶ Jesús ndačo:

—Janha sinttatjao rioho niottja, co tti rrochjaha nio, jehe mé.

Jamé, joinchetjao rioho niottja co joanjo nio ngain Judas Iscariote, tti xitsihi ná tti vinhi Simón.

²⁷ Co are vayé Judas niottja mé, inchínji joixinhi ngain ansén. Cottimeja Jesús ndačo ngain:

—Tti sinchehe, jaicoa nchehe.

²⁸ Pero ni ná de tti nitejine ngain mesa nttiha coinxinha na ixin quedonda ndačo Jesús yá ngain Judas.

²⁹ Judas tti vehe tesorereroe tti chojni que vacao Jesús, mexinxin canxion na xaxaon na que Jesús ndache yá para que Judas rroquehna čoan cosa que rrogonda para ngain quiai, o rroganjo nchin tomi ngain chojni noa.

³⁰ Are joexin vayé Judas niottja mé, jehe vačhjexin de nttiha. Co rato mé ottie.

Cosa naroaxin que Jesús coetonha

³¹ Are Judas ovachje, Jesús ndačo:

—Jai rrořago tti joachaxin que chonda janha, tti Xí que joixin de ngajni, co joachaxin Dios rrořagoxin de nganji na,

³² ixin si janha, tti Xí que joixin de ngajni, tjago joachaxin Dios, cai Dios tsjago que janha chonda joachaxin, co jehe otoi sinchehe.

³³ Jaha ra inchin xannchinnchinchjanhna co janha ndattjo ra ixin isariha tsje tiempo nganji ra. Jaha ra tsjé ni ra, pero řajeho inchin ndattjan chojni judío rrondattjo jaha ra jai: Jaha ra čoha tsji ra tti satsji janha.

³⁴ Janha rritettonha jaha ra ná cosa naroaxin jiji: rinao chó ra. Janhi inchin janha rinaho jaha ra, jaha ra chonda ra que sinao chó ra.

³⁵ Si sinao chó ra, cainxin chojni ngoixin nontte tsonohe na que jaha ra ndoa ditticaon ni ra janha.

Jesús ndačo que Pedro rrondačo ixin jehe chonxinha Jesús

(Mt. 26.31-35; Mr. 14.27-31; Lc. 22.31-34)

³⁶ Simón Pedro joanchianguihi Jesús co ndačo:

—¿Quettinó satsji soixin?

Co Jesús ndačo ngain:

—Tti janha satsji, jaha ičoha rrorroehna jai, pero rrorroehna después.

³⁷ Cottimeja ndačo Pedro ngain:

—¿Quedonda čoha rrorroaha soixin jai? Janha nchao sanjo vidana para ixin soixin.

³⁸ Jesús ndačo ngain:

—¿Aco ndoa jaha sanjo vidá para ixin janha? Janha rrindattjo ndoa que saho de rrotsje conttaxichia, jaha orrondačo ninxin nttiha que chonxinha na janha.

14

Jesús ndačo ixin jehe tti nttiha para ngain Ndodé

¹ Taha ra joachjaon. Ditticaon ra ngain Dios co ditticaon ni ra janha cai.

² Ngain lugar tti jí Ndodana jí tsje lugar para sintte ni. Co si rrocjiha jamé, janha orrondattjo ra. Mexinxin janha tsji para siguinchía ná lugar tti sintte ra.

³ Co are onchao sehe cain cosa, janha sihi iná para sirroaha ra co satsjin na nttiha para que sintte ra řajeho lugar tti janha sarihi.

⁴ Jaha ra chonxin ra ttinó satsji janha co cai ochonxin ra quexehe nttiha.

⁵ Tomás ndačo ngain Jesús:

—Chonxinha na quettinó satsji soixin, mexinxin ¿quexén rrochonxinxin na nttiha?

⁶ Jesús ndačo ngain:

—Janha tti nttiha na, co janha tti tjago tti ndoa, co janha tti danjo iná vida naroaxin. Jeho de ixin janha nchao sijixin cain chojni ngain Ndodana.

⁷ Si jaha ra ochonxin ni ra janha, cai ochonxin ra Ndodana. Co ochonxin ra Ndo desde jai ixin jaha ra ovicon ra Ndo.

⁸ Cottimeja Felipe ndačo ngain Jesús:

—Chjana ra joachaxin sicon na Ndodá na; conixin maho janha na anto rrochahna na.

⁹ Jesús ndačo ngain:

—Felipe, ochonda anto tsje tiempo que janha rrihi nganji ra, ¿aco řa chonxinha na? Tti chojni que dicon na janha, cai jehe dicon Ndodana. ¿Quedonda ndachjenji na ixin rrochjaha joachaxin para sicon Ndodá na?

¹⁰ ¿Aditticaonha que janha rrihi ngain Ndodá na co jehe Ndo jí Ndo nganji na? Cain cosa que rrindattjo ra, rrindattjoha ra inchin janho rinaho; Ndodana que jí nganji, jehe Ndo nchehe Ndo tti jehe Ndo rinao Ndo.

¹¹ Ditticaon ni ra que janha rrihi ngain Ndodana co jehe Ndo jí Ndo nganji na, pero si nahi, jeho ditticaon ni ra ixin janha nttaha tsje cosa jian.

¹² Janha rrindattjo ra ndoa que tti chojni que ditticaon nganji na janha, cai sinchehe cain cosa que janha nttaha, co sinchehe cosa icha jian ixin janha satsji tti jí Ndodana.

¹³ Co cain tti joatotsenhe ñao ra que jaha ra sanchia ra conixin joachaxin nombrena, janha rrochjaha ra para que Ndodana tsosayehe Ndo de ixin janha tti Xenhe Ndo.

¹⁴ Janha sinttaha quexeho cosa que jaha ra sanchia ra conixin joachaxín nombrena.

Jesús ndačo ixin jehe rrorroanha Espíritu Santo

¹⁵ Si jaha ra rinao ni ra janha, ditticaon ra tti janha rrittetonha ra.

¹⁶ Co janha sinttatsán ñao Nnodana que rrorroanha ra Ndo iná tti tsjenguijna ra co sehe para cainxin tiempo nganji ra:

¹⁷ mé tti Espíritu Santo que tsjagoha ra tti ndoa de ixin Dios. Tti chojni que icha ncheçoxinhi cosa de ngataha nontte jihi, chojni mé çoha sayé Espíritu jihi ixin ni diconha na co ni chonxinha na de ixin Espíritu jihi. Pero jaha ra chonxin ra de ixin Espíritu jihi ixin jehe Espíritu jihi jí nganji ra, co sittohe ngaxinhi jaha ra para cainxin tiempo.

¹⁸ Janha tsinttoaha ra jaho ra, rrocjan na para sarihi nganji ra.

¹⁹ Iseha para que cain chojni isiconha na na janha, pero jaha ra sicon ni ra janha. Co jaha ra sinttechon ra ixin janha rrichon.

²⁰ Ngain nchanho mé jaha ra tsonoha ra que janha rrihi ngain Nnodana, co jaha ra te ra nganji janha, co janha rrihi nganji ra.

²¹ Tti chojni que nohe co ditticaon tti janha ttetonha, jehe tjago que ndoa rinao na. Co Nnodana sinao Ndo tti chojni que sinao na janha, co cai janha sinaho jehe na co rroçago na ngain na.

²² Iná Judas, jeha tti Iscariote, jehe mé ndačo:

—¿Quedonda rroçago nganji janha na co nahi ngain chojni que icha ncheçoxinhi cosa de ngataha nontte?

²³ Jesús ndačo ngain:

—Tti chojni que rinao na janha, jehe nchehe caso tti ndačhjan janha, co Nnodana sinao Ndo jehe, co Nnodana co janha sihi na sintte na ngain jehe chojni mé.

²⁴ Tti chojni que rinao na janha, jehe ncheha caso tti janha ndačhjan. Tti joajna que jaha ra tettinhi ra jeha joajnana janha, mé joajné Nnodana que rroanha na.

²⁵ Janha rrindattjo ra cain jihi jaxon que ça rrihi nganji ra,

²⁶ pero janha rrondattjan Nnodana co jehe Ndo rrorroanha Ndo Espíritu Santo para que tsjenguijna jaha ra co santsjaha ra joachjaon. Jehe mé tti tsjagoha ra cain tti ndoa, co sinttaçaxaon ra cainxin tti janha ndattjo ra.

²⁷ Jai que chiaon tiempo para janha satsjixin de nganji jaha ra, janha danjo nganji ra tti çhjoin que tsonohe ansean ra. Pero mé jeha inchin tonohe ansén chojni que ncheçoxinhi cosa jianha de ngataha mundo jihi. Mexinxin taha ra joachjaon ni çaonha ra.

²⁸ Jaha ra ocoinna ra tti ndačhjan que janha satsji, co rrocjan na sihi para sarihi nganji ra iná. Si ndoa rinao ni ra, chonda que çaha ra are conoha ra que janha satsji ngain Nnodana ixin jehe Ndo chonda Ndo icha joachaxin que janha.

²⁹ Janha rrindattjo ra jihi jaxon para que are siconhe, cottimeja sitticaon ra.

³⁰ Ironichjaha icha nganji ra ixin ojoji tti ttetonhe cain chojni que icha ncheçoxinhi cosa de ngataha nontte jihi. Masqui jehe chondaha ni ná joachaxin para ixin janha.

³¹ Pero tti tsonhe jihi chonda que tsonhe para que chojni ngoixin mundo tsonohe na que janha rinaho Nnodana co janha nttaha cainxin tti jehe Ndo coetonna Ndo. Dingattjen ra co sachjinxin na de nntihi.

15

Jesús inchin nttauva

¹ Janha inchin tti mero maté nttauva, co Nnodana inchin tti jinda nnta.

² Cainxin chojni que ditticaon na janha, jehe inchin rama que danjo ttotchjoin. Pero tti chojni que ncheha inchin rinao Nnodana, chojni mé inchin tti rama que danjoha ttotchjoin. Mexinxin Nnodana dantsjenda Ndo chojni mé inchin nchehe tti jinda nttauva tonçhinji rama que ndojoha ttotchjoin. Pero cain chojnina que nchehe inchin rinao Nnodana, jehe Ndo dinttjian Ndo cain cosa jianha de ngain chojni mé inchin nchehe tti jinda nttauva damehe co ncheroa cain rama que danjo ttotchjoin para que sanjo rama mé icha ttotchjoin.

³ Jaha ra oroa ra de ixin tti janha jointtacoanha ra.

⁴ Cainxin ra dintte ra nganji na inchin janha rrihi nganji jaha ra. Çajeho inchin ná ramé nttá çoha sinchechjian rama mé ttotchjoin si jehe rama mé jitsexinha ngain mero nttá jieto, jamé jaha ra cai çoha sitticaon ra tti janha ttetonha ra si jaha ra sintteha ra nganji na.

⁵ Janha tti nttattochjoin na, co jaha ra rama ra. Tti sehe nganji janha co janha sarihi ngain jehe, jehe sanjo atto tsje ttotchjoin, pero jaha ra çonhi sinchehe ra si janha coha na nganji ra.

⁶ Tti seha nganji na, mé inchin cain nttarama çonhi çé que dinttji co ndaxema. Co ttjejo na rama mé co tsjaga na ngain çohi.

⁷ 'Si jaha ra sinchehe ra sigue sintte ra nganji na, co rrotjañaha ra tti janha jointtacoanha ra, danchia ra tti sinoa ra, co sayehe ra.

⁸ Ndodana tsosayehe Ndo are jaha ra sinchehe ra jian co mé inchin tti anto tsje ttochjoin que sanjo ra, co jañá sintte ra chojni que ndoa ditticaon na janha.

⁹ Janha rinaho jaha ra, jañá inchin Ndodana rinao na janha; jañá nchehe ra sigue cosa jian para que janha sinoa ra.

¹⁰ Si ditticaon ra tti janha ttetonha ra, janha sinttaha sigue sinoa ra, jañá inchin janha ditticanho tti ttetonna Ndodana co jehe Ndo nchehe Ndo sigue rinao na Ndo.

¹¹ 'Janha nichja nganji ra jañá para que rrochaha ra jaha ra inchin janha chahna co jañá cainxin ra anto rrochaha ra.

¹² Tti janha ttetonha ra janhi sinchehe ra: que sinoa chó ra inchin janha rinaho jaha ra.

¹³ Xonhi iná cosa icha jie sinchehe ni para tsjagoxin ni que ndoa rinao chó ni. Jeho hasta jehe ni sanjo ni cuerpoe ni para ndasenhe para ixin xiamigoe ni.

¹⁴ Jaha ra tti xiamigona si sinchehe ra sigue ngain tti janha ttetonha ra.

¹⁵ Isinttaguinha ra ninchehe xana ixin tti nchehe xa noeha quehe nchehe xinajní. Jaha ra ntaguinha ra amigona ixin jointtagatsoan ra cainxin tti ndachjenji na Ndodana.

¹⁶ Jeha jaha ra coinchiencia ni ra janha, sino que janha tti coinchiencia jaha ra, co coetonha ra que ttji ra co ndache ra tsje chojni palabrana, co cain chojni que sitticaon palabrana, mé tti tsje ttochjoin que jaha ra sanjo ra, co cain ttochjoin mé tsonchjenhe tto. Co jamé Ndodana rrochjá ra Ndo cain tti sanchiehe ra Ndo conixin joachaxin nombrena.

¹⁷ Janha rritetonha ra que nchehe ra sigue rinao chó ra.

Chojni ningaconhe na Jesús conixin chojni jehe

¹⁸ 'Si chojni que icha ncheXoxinhi cosa de ngataha nontte rroningaconha jaha ra, noha ra que janha tti saho joiningaconna na.

¹⁹ Si jaha ra rrocji ra inchin jehe na co rrojinttaXoxinhi ra cosa inchin jehe na ncheXoxinhi na, jehe nimé rrojinao ra na inchin jehe na rinao na chojni na. Pero janha coinchiencia jaha ra de ngayé chojni mé, co mexinxin chojni mé ningaconha ra na ixin jaha ra incheha ra inchin jehe na.

²⁰ Xaxaon ra janha ndattjo ra: "Ni ná tti nchehe xa choha chonda icha joachaxin que xinajní." Si janha ningaconna tsje chojni, cai jaha ra rroningaconha ra na. Co si jehe na vitticaon na tti janha jointtacoán na, cai sitticaon na tti jaha ra sinchecoeha ra na.

²¹ Cain jiji sinchehe na nganji ra ixin causananxin janha ixin jehe na chonxinha na de ixin tti rroanha na janha.

²² 'Si janha rrojija rronichjá na, jehe na rroguinttecaha na cosa jianha que nchehe na. Pero jai jehe na teca na cainxin tti jianha que nchehe na,

²³ ixin tti chojni que ningaconna, cai ningaconhe na Ndodana.

²⁴ Si janha Xonhi tiempo rrojinttaha ngayé na lo que ni iná chojni choha nchehe, jehe na rroguinttecaha na cosa jianha que nchehe na. Pero jehe na ovicon na cain cosa jiji, co masqui jointtaha cain jiji, jehe na ningaconna na co ningaconhe na Ndodana cai.

²⁵ Pero jiji conhe ixin chonda que conhe palabra que jitaxin ngain ley que jehe na chondana. Co ley jitaxin janhi: "Jehe na joiningaconna na co janha Xonhi jianha jointtaha."

²⁶ 'Pero tsí tti ttjenguijna ni. Co jehe mé tti Espiritu Santo que joixin de ngain Ndodana co jehe mé tti janha rrorroanha nganji ra. Co jehe Espiritu mé nichja joxon cosa ndoa co jehe rronichja de ixin janha.

²⁷ Co cai jaha ra rronichja ra de ixin janha ixin vintte ra nganji na desde are nacoexi-anxon ndattjan chojni de ixin quehe rinao Ndodana.

16

¹ 'Janha rrindattjo ra cain cosa jiji para que are anto tanguí tsonha ra, jaha ra tsinttoeha ra de sitticaon ni ra.

² Jehe na senguixin ra na de ngain nihngo. Co sinqué momento de que quexeho de jehe na nasoexon ra na co jehe na rroXaxaon na que jamé jiquininxin para ixin Dios.

³ Jehe jiji sinchehe na ixin jehe na Xonhi tiempo ditticaon na ni Ndodana ni janha.

⁴ Janha rrindattjo ra cain jiji para que are tsí rato mé, jaha ra rroXaxaon ra que janha ondattjo ra.

Tti nchehe Espiritu Santo

'Janha ndattjoha ra cain jiji desde are saho ixin janha joarihi nganji ra.

⁵ Pero jai janha satsji sigarihi ngain tti rroanha na, co ni ná de jaha ra tedanchianguinaha ra ixin ttinó satsji.

⁶ Puede ixin anto vinttechinhi ra ixin ndattjo ra cain cosa jiji.

⁷ Pero rrindattjo ra ndoa que icha jian para ixin jaha ra janha satsji. Ixin si janha satsjiha, tsiha Espiritu Santo para sehe nganji ra, mé tti tsjenguijna ra co santsjehe joachjaon ansean ra. Pero si janha satsji, janha rrorroanha jehe mé.

⁸ Are jehe tsí, jehe sincheguitticaon chojni de ngataha nontte jihi que jehe na nchehe na jianha, co jehe sinchenohe chojni ixin jehe na chonda que sinchehe na jian, co jehe sinchenohe na que ixin Dios sinchejuzguehe na.

⁹ Jehe sincheguitticaon na que nchehe na jianha ixin ditticaonha na na janha.

¹⁰ Jehe sinchenohe na ixin chonda na que sinchehe na jian ixin janha satsji tti jí Ndodana, co jaha ra isiconha ni ra.

¹¹ Co jehe sinchenohe na ixin Dios sinchejuzguehe na ixin ogoan condenado tti ttonha ngain cain cosa jianha de mundo jihi.

¹² Janha chonda atto tsje que rinaho rrondattjo ra, pero jaha ra čhoħa tsinxin ra jai.

¹³ Are tsi Espiritu Santo, tti nichja ndoa, jehe tsjagoha ra cainxin tti ndoa ixin jehe rronichjaha inčhin jeho rinao, jehe rrondačho cainxin tti jehe ttinhi ngain Ndodana, co jehe sinttanoha ra cosa que siconhe.

¹⁴ Jehe sinchesayana janha ixin jehe sayé tti ndoa de ixin janha co jehe sinttagatsoan ra.

¹⁵ Cainxin tti chonda Ndodana cai para ixin janha, mexinxin janha ndačhan que Espiritu Santo sayé tti ndoa de ixin janha co jehe sinttagatsoan ra.

Jesús ndačho ixin jehe na tsa na joachjaon pero seha

¹⁶ Iseha, jaha ra isiconha ni ra, pero nchion icha después jaha ra rrocjan ra sicon ni ra. Co después janha satsji tti jí Ndodana.

¹⁷ Cottimeja canxion de tti chojni que vacao Jesús joanchianguihi chó na co ndačho na: —¿Quehe rročho jihi? Jehe ndattjo na que iseha ján na isoconha na jehe, co nchion icha después rrocjan socon na jehe iná, co ixin después jehe satsji tti jí Ndodé.

¹⁸ ¿Quehe rročho yá “iseha”? Jáñ na ttinxinha na quehe rročho tti jehe ndačho.

¹⁹ Jesús conohe que jehe na rinao na sanchiangui na ngain jehe, co jehe ndačho ngain na: —Janha ndattjo ra que iseha jaha ra isiconha ni ra, co nchion icha después jaha ra rrocjan ra sicon ni ra iná. ¿Ajehe jihi tti tedanchianguihi chó ra?

²⁰ Janha rrindattjo ra ndoa que jaha ra rrotsjanga ra co sinttechinhi ra, pero chojni de ngataha nontte que ditticaonha na janha, jehe nimé rroché na. Pero masqui jamé, co masqui jaha ra sinttechinhi ra, pero jaha ra rrocjan rrochaha ra iná.

²¹ Are ná nčhí sincheconcjihi xenhe, jehe nčha ta nčha joachjaon ixin ojoí hora de que anto tsín nčha, pero are ojoexin toncjihi xenhe nčha, ni ičaxaonha nčha de ixin anto coin nčha ixin anto ché nčha ixin joincheconcjihi nčha ná čhan.

²² Janá jaha ra cai, ta ra joachjaon jai, pero janha rrocjan na sicon ni ra, cottimeja ansean ra anto rroché co ičonhi iná chojni nchao santsjaha ra tti rroché ansean ra.

²³ Ngain nchanho mé ičonhi joatotsenhe ñao saqué ra nganji na. Janha rrindattjo ra ndoa que Ndodana rrochjá ra Ndo cainxin tti jaha ra sanchiehe ra Ndo conixin joachaxín nombrena.

²⁴ Hasta jaxon jaha ra řa řonhi danchia ra conixin joachaxín nombrena; danchia ra co sayehe ra para que anto rroché ansean ra.

Jesucristo coixinhi ngain cain cosa jianha de ngataha nontte

²⁵ Janha ndattjo ra cain cosa jihi conixin ejemplo, pero tsí hora que janha irrondattjoha ra conixin ejemplo, janha rrondattjo ra claro de ixin Ndodana.

²⁶ Ngain nchanho mé jaha ra sinchetsenhe ra ñao Ndo conixin joachaxín nombrena, co janha rrindačhanha ixin janha tti sinttatsán ñao Ndo para ixin jaha ra

²⁷ ixin jehe Ndo mero rinao ra Ndo. Jehe Ndo rinao ra Ndo ixin jaha ra rinao ni ra janha, co ditticaon ra ixin janha joixin de ngain jehe Ndo.

²⁸ Janha vačhexin de ngattoxon con jehe Ndo para que janha joihí ngataha nontte jihi, pero jai tsinttoa nontte jihi para sarrocjan na ngain Ndo.

²⁹ Cottimeja cain chojni que vacao Jesús ndačho na:

—Janché, soixin rrinichja claro, co irrinchegondaha ni ná ejemplo.

³⁰ Janché, ttianxin na que soixin noha cainxin cosa, co rrogondaha para iná chojni sanchiangui nganji soixin ixin soixin chonxin quehe rronichja ni icha saho que jehe ni rronichja ni. De ixin jihi janha na ditticanho na que soixin joixin de ngain Dios.

³¹ Jesús ndačho ngain na:

—Jai ditticaon ra.

³² Jai ojoí tiempo co řajeho jai jaha ra rochjequehe ra. Co satsji ra tti jaha ra sinao ra, co tsinttona ra janho. Pero jaonha rrihi ixin jehe Ndo ttjen Ndo nganji na.

³³ Janha rrindattjo ra cain jiji para que chjoin tsonohe ansean ra ixin te ra nganji na. Ngataha nontte jiji chonda que anto tangui tsonha ra, pero xaoonha ra ixin janha coixinna ngain cainxin cosa de ngataha nontte jiji.

17

Jesús joinchetsenhe ñao Dios para ixin chojni que ditticaon

¹ Are joexin ndacho Jesús cain cosa jiji, jehe tsjehe para ngajni co ndacho:

—Padre, horana ojoí hora. Nchesayehé Xanha para que jehe Xan cai sittasayaha Xan soixin.

² Soixin chjehe Xanha joachaxin para ngain cain chojni, para que jehe Xan joanjo Xan iná vida naroaxin ngain tti chojni que soixin joanjo ngain Xan.

³ Co vida mé rrocho que jehe na rrochonxin na de ixin soixin, tti nacoaxinxon Dios ndoa, conixin Jesucristo, tti soixin rroanha.

⁴ Janha jointtasayaha soixin nttihi ngataha nontte, co ojoena jointtaha tti soixin co-tonna.

⁵ Co jai soixin nchesayana ngattoxon con soixin xajeho inchin joinchesayana icha saho de que nontte vehe.

⁶ Tti chojni que soixin coinchiehe de ngayehé icha chojni ngataha nontte para chjana na janha, janha jointtanoa na quensen soixin. Chojni mé chojnia soixin, co soixin chjana na janha, co jehe na vitticaon na joajná soixin.

⁷ Co jai jehe na nohe na que cainxin tti chjana soixin joixin de nganji soixin.

⁸ Janha chjaha na tti joajna que soixin chjana, co jehe na vayé na joajna mé. Jehe na conohe na ndoa que janha joixin de nganji soixin, co vitticaon na que soixin rroanha na.

⁹ Janha nttatsanha ñao para ixin jehe na; janha jeha nttatsanha ñao para ixin tti chojni que icha nchexoxinhi cosa de ngataha nontte, janha nttatsanha ñao para ixin tti chojni que soixin chjana ixin chojni mé chojnia soixin.

¹⁰ Cainxin chojni que janha chonda, mé chojnia soixin, co cain chojni que soixin chonda, mé chojnina, co joachaxinna tononxin de ngain jehe na.

¹¹ Janha isittonaha nttihi ngataha nontte ixin janha sasaso para sarihi nganji soixin, pero jehe na sittohe na nttihi ngataha nontte. Soixin que anto jian, darinda conixin joachaxian tti chojni que soixin chjana na para que jehe na ngoixin tiempo sintte na unido inchin soixin co janha.

¹² Are janha joarihi ngain jehe na ngataha nontte jiji, janha joarinda cain tti chojni que soixin chjana conixin joachaxian soixin, co joarinda na jian. Ni ná de jehe na vitjanha na, jehó vitján tti jiquinixin vitján para que tsonhe tti ndacho ngain tti jitaxin Palabrá soixin.

¹³ Jai janha osaso tti ttjen soixin. Co rrindačhjan cain cosa jiji jaxon que xa rrihi ngataha nontte jiji para que jehe na xajeho rroché na inchin janha चाहना.

¹⁴ Janha chjaha na joajná soixin, pero chojni que icha rinao jehó cosa de ngataha nontte toño na ngain chojnina ixin chojnina rinaoha na jehó cosa de ngataha nontte inchin janha cai rinaoha jehó cosa de ngataha nontte.

¹⁵ Janha jeha rrinttatsanha ñao soixin que santsjexin jehe na de ngataha nontte jiji, jehó rrinttatsanha ñao ixin rančhjangaha jehe na ngain inčhínji.

¹⁶ Jañá inchin janha rinaoha jehó cosa ngataha nontte, jamé jehe na cai rinaoha na jehó cosa de ngataha nontte.

¹⁷ Dantsjenda jehe na de ngain cain cosa jianha co nchecoehne na tti ndoa; tti joajná soixin, mé tti ndoa.

¹⁸ Inchin rroanha na janha ngayé tti chojni de ngataha nontte, jamé janha cai rrorroanha jehe na ngayé tti chojni de ngataha nontte.

¹⁹ Janha rrinttaha jehó inchin soixin rinao para que jehe na cai sinchehe na jehó inchin soixin rinao, co sinchehe na mé ixin chonxin na tti ndoa.

²⁰ Pero joatotsenhe ñao jiji jeha para jehó jehe na, cai para ixin cain chojni que sitticaon na después, are chojni mé tsinhi na tti joajna que chojni tehe sicao.

²¹ Janha danchia nganji soixin que cainxin jehe na sintte na inchin nacoa chojni, inchin soixin ttjen nganji na co janha rrihi nganji soixin, que jehe na sintte na nganji ján na para que tti chojni de ngataha nontte sitticaon na que soixin rroanha na janha.

²² Janha jointtasayá jehe na inchin soixin nchesayana janha para que jehe na sintte na inchin nacoa chojni, jañá inchin soixin co janha xajeho nacoa na.

²³ Janha ngain jehe na, co soixin nganji na para que jehe na sintte na mero ndoa nacoaxinxon na, co jamé chojni de ngataha nontte tsonohe na que soixin rroanha na janha, co soixin anto rinao jehe na inchin rinao na janha.

²⁴ Padre, soixin tti chjana jehe na co rinaho que jehe na sintte na nganji na tti janha sarihi para que jehe na sicon na que xén soixin nchesayana janha ixin soixin joinao na desde icha saho que vehe nontte.

²⁵ Padre soixin que anto jian, tti chojni que icha nche xoxinhi cosa de ngataha nontte chonxinha na de ngain ansean soixin, pero janha chonxin, co chojni tehe onohé na que soixin rroanha na janha.

²⁶ Janha jointtagatsoan jehe na quensen soixin, co xa sinttaha sigue sinttagatsoan jehe na de ixin soixin para que jehe na rrochonxin na ixin soixin rinao na jehe na xajeho inchin rinao na janha, co para que janha mero sarihi ngain jehe na.

18

Are tse na Jesús

(Mt. 26.47-56; Mr. 14.43-50; Lc. 22.47-53)

¹ Are joexin ndacho Jesús cain cosa jihi, jehe conixin chojni que vacao vaçhjexin na de nttiha para sacjoi na toenixin ná tsaga que dinhi Cedrón. Nttiha vehe ná huerta, tti joigaha Jesús conixin chojni que vacao.

² Cai Judas, tti joindaço para tse na Jesús, jehe vechonxin ngain lugar mé ixin tsje nttiha Jesús conixin jehe cjoí na ngain lugar mé conixin cain icha chojni que vacao Jesús.

³ Co Judas cjoí nttiha conixin anto tsje xisoldado conixin icanxin xipolicie nihngo icha importante que vintterroanha xifariseo co xidána que vaquetonha ngain icha xidána. Cjoi na nttiha conixin nttá co joicao na canxion cosa inchin candil para joinchengasanxin na, co icanxin na joicao na jecho nttá conixin mecha ngain con nttá.

⁴⁻⁵ Co Judas, tti joindaço para tse na Jesús, nttiha joí ngayehe na cai. Pero Jesús ovenohe cain tti jehe tsonhe, mexinxin jehe vaçhjeyé co ndaço ngain na:

—¿Quensen tettjé ra?

Jehe na ndaço na ngain:

—Jesús de Nazaret.

Jesús ndaço ngain na:

—Mé, janha.

⁶ Co are Jesús ndaço: “Mé, janha”, jehe na vintteguixinto na co hasta vintteguinttji na ngataha nontte.

⁷ Cottimeja Jesús cjan joanchianguihi na ndaço:

—¿Quensen tettjé ra?

Co jehe na ndaço na:

—Jesús de Nazaret.

⁸ Cottimeja Jesús ndaço ngain na:

—Ondattjo ra que janha. Si tettjé ni ra janha, tançhjanda ra chojni tehe satsji na.

⁹ Jihi joiconhe inchin ndaço Jesús: “De tti chojni que jehe Ndo chjana Ndo, ni ná na vitjanha na.”

¹⁰ Cottimeja Simón Pedro vechonda ná espada, co jehe joantsje espada mé co conçhinjihi ndatsjoen lado jian ná tti vinhi Malco, mé ná tti nchehe xé xidána icha importante.

¹¹ Pero Jesús ndaço ngain Pedro:

—Cjan ttin espada lugué espada. Si Nnodana ndaço Ndo que janha anto tangui tsonna jaxon, mexinxin janha chonda que tsonna.

Jesús ngain Anás

(Mt. 26.57-58; Mr. 14.53-54; Lc. 22.54)

¹² Cottimeja cain xisoldado que cjoí conixin xicomandanté xa co xipolicie chojni judío, cain nimé tse na Jesús co coia na.

¹³ Cottimeja sajoicao na Jesús para ngain nchiandoha Anás. Anás mé icha saho cjoí tti dána icha importante, co mé ndonché Caifás, tti dána icha importante tiempo mé.

¹⁴ Caifás jihi tti ndaço ngain chojni judío que icha jian para ixin jehe na si senhe nacoa xí para ngoixin nación.

Pedro ndaço ixin jehe chonxinha Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro co iná de tti chojni que vacao Jesús terroé na Jesús. Co jehe Anás, tti cjoí dána icha importante are icha saho, jehe mé vechonxin tti iná chojni que joicao Simón Pedro. Mexinxin joixinhi jehe chojni mé conixin Jesús ngain patioe nchiandoha jehe Anás.

¹⁶ Pero Pedro ndavittohe ndojaxin de puerté patio mé. Mexinxin vaçhje tti iná chojni mé co nichjé tti nçhí que jinda puerta nttiha para xanxinhi nçha Pedro.

¹⁷ Cottimeja jehe tti nçhí mé joanchianguihi nçha Pedro, co ndaço nçha:

—¿Ajeha jaha ná de tti chojni que xicao xí jiha?

Pedro ndaĉho:

—Nahi, jeha janha.

¹⁸Ixin rato mé anto quin, mexinxin canxion xinchehe xé Anás co xipolicie nihngo dicjaga xa xohi, co nttiha tatengattjen xa texixohi xa. Pedro cai nttiha jixixohi ngayé xa ngaca xohi mé.

Anás joanchianguihi Jesús

(Mt. 26.59-66; Mr. 14.55-64; Lc. 22.66-71)

¹⁹Jehé Anás coexinhi joanchianguihi Jesús ixin quecá chojni vacao Jesús co quehe vancheoenhe Jesús chojni.

²⁰Jesús ndaĉho:

—Janha ndaĉhjan ngayé chojni ngoixin mundo. Janha cainxin tiempo jointtacoán chojni ngain icha nihngo co ngain nihngo icha importante, tti xatte cainxin chojni judío, jañá janha jeha jimao ndaĉhjan.

²¹¿Quedonda danchianguiha janha? Danchianguihi cain tti chojni que coinhi tti janha ndaĉhjan, co jehé na rrondaĉho na de ixin quehe ndattjan na. Jehé na nohe na tti janha ndaĉhjan.

²²Are Jesús ndaĉho jihí, ná de tti xipolicie nihngo icha importante que te nttiha xanguí xa Jesús ná manazo rroha Jesús co ndaĉho xa ngain:

—¿Ajañá ndache tti dána icha importante?

²³Jesús ndaĉho ngain xa:

—Si ndaĉhjan ná cosa que jí jianha, jaha ndaĉho queñenxin jixin jianha; pero si tti ndaĉhjan janha jí jian, ¿quedonda donhe na?

²⁴Cottimeja Anás rroanha Jesús ngain Caifás, tti dána icha importante tiempo mé. Co xa vechia Jesús.

Pedro ndaĉho iná ixin jehé chonxinha Jesús

(Mt. 26.71-75; Mr. 14.66-72; Lc. 22.58-62)

²⁵De cainxin mé, Pedro xa tajingattjen jixixohi ngandehe xohi, co joanchianguihi na co ndaĉho na ngain:

—¿Ajeha jaha ná de tti chojni que xicao xí jiha?

Co Pedro ndaĉhoja ixin ján, jehé ndaĉho:

—Nahi, jeha janha.

²⁶Cottimeja ná de tti nchehe xé Anás, jehé tti nchehe xa mé xa ichó tti xí que Pedro conĉhinjihí ndatsjoen, jehé tti nchehe xa mé ndaĉho ngain Pedro:

—¿Apoco viconha janha jaha conixin jehé xí yá are ngagaha nttattochjoin?

²⁷Pedro ndaĉho iná ixin nahi, co rato mé tsje ná conttaxichia.

Jesús ngain Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Cottimeja sajoicaoxin na Jesús de nchiandoha Caifás para ngain palacioe xigobernador. Co rato mé ocoexinhi vingasán, pero chojni judío joixinha na palacio. Si jehé na rrojixinhi na palacio mé, jehé na rroguinte na roaha inchin costumbre que vinttechonda na co ĉoha rrojine na ngain tti quiai pascua.

²⁹Mexinxin Pilato vaĉhe para nichjé na, co ndaĉho ngain na:

—¿De quehe tjanguihí ra xí jihí?

³⁰Jehé na ndaĉho na:

—Si jehé xa jeha ná chojni que nchehe tsje cosa jianha, janha na rrojiqianha na xa nganjí.

³¹Cottimeja Pilato ndaĉho ngain na:

—Sattjihó ra xa jaha ra, co jaha ra nchejuzguehe ra inchin ttetonha ley que chonda ra.

Chojni judío ndaĉho na:

—Pero janha na chojni judío na, co chondaha na joachaxin para nasoenxon na ni ná chojni.

³²Jañá joiconhe inchin ndaĉho Jesús de ixin queñén jehé chonda que senhe.

³³Pilato cjan joixinhi palacio, co jehé vayé Jesús co joanchianguihi co ndaĉho:

—¿Ajaha tti Rey de chojni judío?

³⁴Jesús ndaĉho ngain:

—¿Ajaho xaxaon danchiangui jihí, ni ixin iná chojni ndattjo de ixin jamé na janha?

³⁵Pilato ndaĉho:

—¿Apoco janha judío na? Chojni nacioan jaha co xidána que vaquetonha ngain icha xidána, nimé ni joicoho nttihi. ¿Quehe joinchehe?

³⁶Cottimeja Jesús ndaĉho:

—Tti janha ttetonha jeha nttihi ngataha nontte. Si rrocji de nttihi, cottimeja cain chojni que vitticaon na janha rroguittoexinha na para que janha rrotse na chojni judío. Pero tti janha ttetonha jeha nttihi.

³⁷ Cottimeja Pilato ndaço:

—¿Ajaha tti rey remé?

Jesús ndaço:

—Ján, janha rey na inchin jaha ndaço. Janha concjina co joihi ngataha nontte jihi para ndačhan tti ndoa. Cainxin chojni que ditticaon tti ndoa, jeha na ttinhi na tti ndačhan.

³⁸ Pilato ndaço ngain Jesús:

—¿Quexehe tti ndoa mé?

Are ndaço na ixin Jesús chonda que ndasenhe

(Mt. 27.15-31; Mr. 15.6-20; Lc. 23.13-25)

Are joexin joanchiangui Pilato jihi, jeha vačhe iná para nichjé chojni judío co ndaço ngain na:

—Janha xonhi jianha dittjá xí jihi.

³⁹ Pero jaha ra chonda ra costumbre que ttetonna ra ngain quiai pascua para que janha tančhanda quexeho ná de tti teaxinhi. Mexinxin çarinao ra que janha tsančhanda satsji tti Rey de ngain chojni judío?

⁴⁰ Cottimeja cainxin na cjan coyao na co ndaço na:

—¡Mé nahi! ¡Icha jian tančhanda Barrabás!

Co Barrabás jihi jeha ná tti chehe.

19

¹ Cottimeja Pilato coetonha para vicaon Jesús.

² Mexinxin xisoldado coentaha xa já Jesús ná corona de nchaha, co joinchengá xa Jesús ná lonto morado inchin lonto ná rey.

³ Cottimeja vintteconchienne xa ngaca Jesús co cjoanoa xa ndache xa:

—¡Viva tti Rey de chojni judío!

Co xanguí xa manazo ngá con Jesús.

⁴ Cottimeja Pilato cjan vačhe iná, co ndaço ngain na:

—Tsjenxin ra, janha santsje xa nttihi para que sicon ra que janha ni ná cosa jianha dittjaha ngain xa.

⁵ Co vačhe Jesús conixin tti corona de nchaha ngataha já co jingá jeha tti lonto morado. Cottimeja Pilato ndaço ngain na:

—Nttihi jí xa.

⁶ Are vicon xipolicie nihngo icha importante co xidána que vaquetonha ngain icha xidána, vinttecoyao xa co ndaço xa:

—¡Nchecrucificá xa! ¡Nchecrucificá xa!

Pilato ndaço ngain na:

—Sattjiho ra xa co jaha ra nchecrucificá ra xa ixin janha dittjaha ni ná cosa jianha ngain xa.

⁷ Pero chojni judío ndaço na:

—Janha na chonda na ná ley co jitaxin ngain ley mé ixin xí yá chonda que senhe xa ixin ndaço xa que jeha xa Xenhe Dios.

⁸ Are coinhi Pilato jihi, jeha icha xao.

⁹ Jeha cjan joixinhi palacio, co joanchianguihi Jesús co ndaço:

—¿Quexén dinhi rajná jaha?

Pero Jesús ixonhi ndaço.

¹⁰ Cottimeja Pilato ndaço ngain:

—¿Quedonda tencoa jaha nganji na? ¿Anoaha que janha chonda joachaxin para sinttacrucificá jaha, co janha chonda joachaxin cai para que tsančhanda satsji jaha?

¹¹ Jesús ndaço ngain Pilato:

—Jaha rrochondaha ni ná joachaxin para ixin janha si Dios rrochjaha joachaxin mé. Mexinxin tti chojni que joiquinha nganjí jaha, nimé ni icha tsje jianha teca que jaha.

¹² Ngain rato mé Pilato cjoé quexén rrojinchehe para rrocanchjanda Jesús sarrocji, pero chojni judío coyaotte na co ndaço na:

—¡Si tsančhanda Jesús satsji, jaha jeha amigoe xiemperador César que ttetonha ngain tsje nación! ¡Quexeho chojni que doan rey, chojni mé jeha amigoe xiemperador!

¹³ Cottimeja Pilato are coinhi jihi, jeha vačhecago Jesús para ndoja co jeha Pilato vetaha tti lugar que vinhi tribunal, co ngain nguigoa hebreo lugar mé vinhi Gabata, co rrocho lugar que diguittexin xo.

¹⁴ Nchanho mé cjoí víspera de ngain tti nchanho que nchejogaha na are ngain tti quíai pascua. Co mé conhe inchin ngosine nchanho. Cottimeja ndačo Pilato ngain chojni judío:

— ¡Ntíhi chonda ra tti rey de jaha ra!

¹⁵ Pero jehe na coyao na co ndačo na:

— ¡Jehe chonda que ndasene! ¡Jehe chonda que ndasene! ¡Nche crucificá!

Pilato ndačo ngain na:

— ¿Apoco janha sintta crucificá tti rey de jaha ra?

Pero xidána que vaquetonha ngain icha xidána vinttendačo xa:

— Janha na chondaha na icha rey que jehó xiemperador César que ttetonha ngain tsje nación.

¹⁶ Conixin jehó jíhi, Pilato joanjo Jesús ngain jehe na para goan crucificado, co jeha na sajoicaoxin na Jesús de nttiha.

Are Jesús goan crucificado

(Mt. 27.32-44; Mr. 15.21-32; Lc. 23.26-43)

¹⁷ Co Jesús de nttiha vachjexin coame crué para sajoicao na ngain tti lugar que vanheguinhi na Nttalorojá Chojni, co ngain nguigoa hebreo vinhi Gólgota.

¹⁸ Nttiha joinchecrucificaxin na Jesús, co are joinchecrucificá na Jesús, joinchecrucificá na iyó xí cai, naná xa cada lado, co Jesús vehe ngosine.

¹⁹ Pilato coetonha vehe nganito cruz ná letra que ndačo: “Jesús de Nazaret, Rey de chojni judío.”

²⁰ Co tsje chojni judío tsjehe na letra mé ixin tti lugar que joinchecrucificaxin na Jesús vehe chian ngaca ciudad de Jerusalén co letra mé vetaxin ngain nguigoehe hebreo, co griego, co latín.

²¹ Mexinxin xidána que vaquetonha ngain icha xidána de chojni judío vinttendache xa Pilato:

— Ttentaxinha “Rey de chojni judío”; icha jian ttentaxin, “Tti ndačo ixin jehe Rey de chojni judío.”

²² Pero Pilato ndačo ngain xa:

— Tti janha coetaxin, jañá sittohe.

²³ Are xisoldado joexin joinchecrucificá xa Jesús, cottimeja canoi xa chjeyehe xa lonttoe Jesús. Cottimeja cóa xa camisé Jesús, co camisa mé xonhi tti ditsexinxin chó manta, jehó naoa pieza camisa mé.

²⁴ Mexinxin xisoldado ndache chó xa:

— Tsinchjeha na camisa, icha jian dantsje na suerte de ixin jehe camisa para socon na quensen sittoehe camisa.

Jañá joiconhe tti jitaxin ngain Palabré Dios que ndačo: “Chjeyehe na lonttona, co joantsje na suerte de ixin jehe lontto.” Jehe jíhi tti joinchehe xisoldado.

²⁵ Ngaca crué Jesús nttiha vehe janné, co nñichó janné, co María, tti cjoí chíhi Cleofas, co María Magdalena.

²⁶ Are Jesús vicon janné tajingattjen jan nttiha, co ngaca jan tajingattjen tti chojni que vacao Jesús que jehe anto joinao, Jesús ndačo ngain janné:

— Yá rrichonda xitsiha.

²⁷ Cottimeja ndačo Jesús ngain chojni mé:

— Yá chonda janná.

Co rato mé jehe chojni mé vayé jehe janné Jesús inchin janné jehe, co jamé vayaconhe jehe janné Jesús.

Are ndavenhe Jesús

(Mt. 27.45-56; Mr. 15.33-41; Lc. 23.44-49)

²⁸ Después de cain jíhi, are Jesús conohe que cainxin oconhe, co para xettexin conhe tti jitaxin ngain Palabré Dios, Jesús ndačo:

— Venhe na jinda.

²⁹ Nttiha vehe ná chi que veche de vino que dicjan inchin vinagre; cottimeja nttiha xangui ná de xisoldado ná cosa que dinhi esponja, co cosa mé tse jinda inchin chjon algodón, co coencjin xa cosa mé con ná ntté nttahisopo co tsín xa hasta ngain rroha Jesús.

³⁰ Jesús vihi jehe vino san mé, cottimeja ndačo:

— Cainxin oconhe.

Cottimeja joinchesé já co ndavenhe.

Ná xisoldado conxiré xa nttantacoin Jesús conixin lanzé xa

³¹ Nchanho mé cjoí víspera de tti quíai pascua, co chojni judío joinaoha na para canio cuerpo mé rroguittohe nganito cruz ngain nchanho que vanhejogaha na ixin jehe

nchanho que vanhejogaha na, mé nchanho anto santo. Mexinxin ndache na Pilato que jehe tsetonhe xisoldadoe ixin tsondai xa rotté tti chojni que te crucificado para que chojni mé ndasenhe icha daca, co sinttjianxin xa cuerpoe de nttiha.

³² Cottimeja xisoldado vinttecji xa co condai xa rotté tti saho, co cai rotté tti iná, cayoixin tti vintte crucificado conixin Jesús.

³³ Pero are vintteconchienne xa ngain Jesús, vicon xa que jehe ondadiguenhe, co mexinxin icondaiha xa rotté Jesús.

³⁴ Pero masqui jehe ondavenhe, ná de tti xisoldado mé conxirehe xa nttantcain Jesús conixin ná lanza, co rato mé vaçhedoho jni co jinda.

³⁵ Janha tti cjin na jihi co vicon cain jihi co ndaçhjan tti ndoa. Co janha chonda seguro que ndaçhjan tti ndoa para que jaha ra cai sitticaon ra.

³⁶ Ixin cain cosa jihi conhe para joiconhe inchin jitaxin ngain Palabrè Dios que ndaço: “Condaiha na ni ná nttaloroe.”

³⁷ Co jí iná parte que ndaço: “Sicon na tti joincheni na.”

Are Xavá Jesús

(Mt. 27.57-61; Mr. 15.42-47; Lc. 23.50-56)

³⁸ Después de cain jihi, José, tti joixin rajna Arimatea, joanchiehe joachaxin Pilato para sajoicao cuerpoe Jesús. José mé cjoí ná chojni que vitticaon Jesús, pero jehe joinaoha para conhe icha chojni que jehe vitticaon ixin vaçagoen José chojni judío que vinttechonda joachaxin. Pilato chjé José joachaxin, mexinxin jehe cjoí co sajoicao cuerpoe Jesús.

³⁹ Cai Nicodemo, tti joinichjé Jesús ngain ná tti, jehe mé cjoí conixin ná cantte kilo de mirra co áloes, cayoi mé diguitteçjan.

⁴⁰ Co José co Nicodemo coensiha na cuerpoe Jesús conixin venda que anto çhjoin çajni de ixin tti cayoi cosa que joicao Nicodemo. Co coensiha na cuerpoe Jesús inchin vanchehe chojni judío are vacjavá na chojni que ndavaguenhe.

⁴¹ Ngain lugar tti joinchecrucificaxin na Jesús nttiha vehe ná huerta de nttattoçhjoin, co ngain huerta mé vehe ná cueva naroaxin que xa çonhi cuerpo diguenhe diçanxinhi na nttiha.

⁴² Nttiha coín na cuerpoe Jesús ixin cueva mé chiaon vehe co ixin otsexinhi tti nchanho que nchejogaha chojni judío.

20

Are xechon Jesús

(Mt. 28.1-10; Mr. 16.1-8; Lc. 24.1-12)

¹ Ngain nchanho domingo María Magdalena cjoí ngain cueva mé atto ndoyo are ça naxion xehe, co vicon que icoha tti xo que vejé cueva mé.

² Cottimeja coinga sacjoi tti vehe Simón Pedro co iná de tti chojni que vacao Jesús, tti chojni que Jesús anto joinao, co ndaço ngain na:

—Sadijicaoxin na de ngain cueva cuerpoe Jesús, co noaha na ttinó coín na cuerpo.

³ Cottimeja Simón Pedro co tti iná chojni vaçhje na co cjoí na ngain cueva mé.

⁴ Cayoixin na tettinga na nataonxin, pero tti iná icha coinga que Pedro, co jehe mé tti icha saho joiji ngain cueva mé.

⁵ Visé tsjehe co vicon jeho venda tate nttiha, pero jehe joixinha.

⁶ Cottimeja joiji Simón Pedro, co jehe vixinhi cueva mé. Jehe cai vicon jeho venda tate nttiha,

⁷ co cai vicon tti manta que gonda para vesia já Jesús, ijihá manta conixin venda, jehe manta dixea manta co ndaha jí manta.

⁸ Cottimeja vixinhi tti iná chojni cai, tti joiji icha saho ngain cueva mé, co vicon tti diconhe, co jehe vitticaon,

⁹ masqui jehe na ça coinxinha na tti jitaxin Palabrè Dios que Jesús chonda que rroxechon de ngayehe nindadiguenhe.

¹⁰ Cottimeja cayoi chojni mé sacjan na para nchiandoha na.

Are Jesús çago ngain María Magdalena

(Mr. 16.9-11)

¹¹ Pero María Magdalena nttiha vittohe ndoja ngaca cueva mé, co jitsjanga. Co are jitsjanga visé para tsjehe ngaxinhi cueva mé,

¹² co jehe vicon yó ángel que tengá loncto roa co tate tti vehe cuerpoe Jesús. Ná de jehe tají tti vehe já Jesús co iná tají tti vehe rotté Jesús.

¹³ Co cayoi ángel mé joanchianguihi María co ndaço:

—¿Quedonda rritsjanga?

Jehe María ndaço:

—Ixín sajoicoa na cuerpoe Jesús, co nonaha ttinó coín na.

¹⁴ Are joexin ndačo yá, cjoendoa já co vicon Jesús que nttiha tají pero jehe venoeha ixin jehe Jesús.

¹⁵ Cottimeja Jesús joanchianguihi:

—¿Quedonda rritsjanga? ¿Quensen rritjté?

Jehe María xaxaon que puede xí mé tti jinda nttattochjoin nttiha co ndačo ngain:

—Si soixin sacjoioh cuerpo que vehe nttihi, ndachjenji na ttinó cointtohe cuerpo para que janha sirroá cuerpo co satsjinha cuerpo mé.

¹⁶ Cottimeja ndačo Jesús ngain:

—¡María!

Co jehe María cjan, co ndačo ixin nguigoa hebreo ngain Jesús:

—¡Raboni!

Co raboni rročo Maestro.

¹⁷ Jesús ndačo:

—Tančhjanda na ixin xa tajinha ngain tti jí Ndodana. Pero ttji co ndache cain chojni que vacinha que janha tsajín ngain tti ttjen Ndodana co Ndadá jaha ra cai, tti Dios de janha co Dios de jaha ra.

¹⁸ Cottimeja María Magdalena joiquetonhe cain chojni que vacao Jesús ixin jehe María vicon Jesús, co ixin jehe Jesús ndache María para ixin rrondačo ngain na.

Jesús xago ngain chojni que vacao

(Mt. 28.16-20; Mr. 16.14-18; Lc. 24.36-49)

¹⁹ Ngain xajeho nchanho mé, tti nchanho domingo, are ottie, canxion chojni que vacao Jesús tate na ngain ná nchia co jian diquejé na puerté nchia mé ixin vařagoen na chojni judío. Co rato mé Jesús xago ngayé na, co jehe joanjo joajna ngain na, co ndačo:

—Dayehe ra tti čhjoin que tsonohe ansean ra.

²⁰ Co are joexin ndačo jihi, jehe cjoago ngain na rá jehe co nttanttacoín tti conihi. Co jehe na ché na ixin vicon na Jesús iná.

²¹ Cottimeja Jesús cjan ndačo ngain na:

—Dayehe ra tti čhjoin que tsonohe ansean ra. Inchin rroanha na Ndodana, jamé janha rrorroanha jaha ra cai.

²² Cottimeja Jesús vanottetaon na co ndačo ngain na:

—Dayehe ra Espiritu Santo.

²³ Cain chojni que jaha ra sinchetjañehe ra tti jianha que jehe joinchehe, jamé ndasitjañehe ixin cai Dios ndasinchetjañehe chojni mé; co cain chojni que jaha ra sinchetjañeha ra, jamé xa sitjañeha chojni mé ni de ngain Dios.

Tomás vicon ixin Jesús dixechon

²⁴ Pero Tomás, mé ná de tti tteyó chojni que vacao Jesús, tti vancheguinhí na Xancoata, jehe mé coha ngain na are cjoí Jesús.

²⁵ Pero tti icanxin chojni que vacao Jesús ndačo na ngain:

—Janha na vicon na Jesús.

Pero jehe Tomás ndačo ngain na:

—Si siconha janha ngá rá tti joidoho clavo, co rrořanxinha dedona nttiha, co rrořanxinha rana ngain nttanttacoín, janha čhoha sitticanho.

²⁶ Vatto jni nchanho de mé co cain chojni que vacao Jesús cjan na ngain nchia iná, co are mé nttiha vehe Tomás ngain na cai. Co masqui cain puerta tatejé jian, Jesús joixinhi, joiguehe ngayé na co joanjo joajna ngain na co ndačo:

—Dayehe ra tti čhjoin que tsonohe ansean ra.

²⁷ Cottimeja ndačo ngain Tomás:

—Tsjenxin rana, co řanxinhi dedoa nttihi; co řanxinhi rá ngain nttanttacoín na. Iřaxaonha ixin ndoaha, pero ditticaon nganji na.

²⁸ Cottimeja Tomás ndačo:

—¡Soixin tti chonda cain joachaxin, co soixin tti Dios de janha!

²⁹ Jesús ndačo ngain:

—Tomás, janché ditticaon ixin vicon na. Icha čhjoin vidé tti chojni que diconha na janha co masqui jamé jehe na ditticaon na.

Quedonda Juan dicjin libro jihi

³⁰ Jesús joinchehe anto tsje señal que vicon chojni que vacao jehe, pero cainxinha señal mé jitaxin ngain libro jihi.

³¹ Pero cain jiji jitaxin para que jaha ra sitticaon ra que Jesús mé tti Cristo que Dios rroanha, co jehe mé Xenhe Dios, co para que rrochonda ra iná vida naroaxin que xonhi tiempo tsjexin are sitticaon ra jehe.

21

Jesús xago ngain yáto chojni que vacao

¹ Después de cain jiji, Jesús cjan xago iná ngain chojni que vacao are ngandehe lago que dinhi Tiberias. Janhi conhe:

² tate yáto na, Simón Pedro; Tomás, tti Xancoata; Natanael, tti joixin rajna Caná de Galilea; co cayoi xitsihi Zebedeo; co iyó chojni que vacao Jesús.

³ Simón Pedro ndačo ngain na:

—Janha sitse copescado.

Cain jehe na ndačo na ngain:

—Janha na cai tsjin na.

Jañá savintteci na coani na ná barco, pero ttie mé xonhi copescado tse na.

⁴ Co are ocoexinhi vingasán, Jesús xago ngandehe jinda, pero cain chojni mé venoeha na ixin jehe Jesús.

⁵ Cottimeja Jesús ndačo ngain na:

—¿Axa xonhi copescado tse ra?

Co jehe na ndačo na:

—Xa xonhi va.

⁶ Cottimeja Jesús ndačo ngain na:

—Dancahngui ra nonchaha lado jian de barco, co rrotse ra va.

Co jamé joinchehe na, cottimeja ndoa hasta ni ichoha dantsjengui na nonchaha de ngangui jinda ixin anto tsje copescado vingachjian nonchaha.

⁷ Cottimeja tti chojni que Jesús anto joinao, mé ndačo ngain Pedro:

—Jehe Jesús!

Nandá coinhi Simón Pedro yá que ixin jehe Jesús, jehe Pedro jaicoa vingá lonttoe, lontto jidattexin ixin jehe joantsje lontto, co coataonhe jinda.

⁸ Co rato mé tti icha chojni que vacao Jesús xa vittohe na inchin cien metro cjinxin de ngandehe jinda. Cottimeja jehe na jói na ngandehe jinda conixin barco que jittiangANJI nonchaha jicaontja copescado.

⁹ Are ojoi na ngandehe nda ngataha jinche, vittja na ná montochjan de xoittja conixin ná copescado ngataha xohi, co niottja.

¹⁰ Jesús ndačo ngain na:

—Sicoho ra canxion copescado que tse ra jaxon.

¹¹ Simón Pedro cjan ngain barco para joica nonchaha que jiringa copescado co jehe coianganji nonchaha mé hasta tti ngandehe lago co nttiha jiringa de joxon copescado yeye hasta ciento cincuenta y tres va. Co masqui anto tsje va, vichjeha nonchaha.

¹² Cottimeja Jesús ndačo ngain na:

—Xacoi ra jintte ra.

Co ni ná de jehe nimé xaxaonha na para joanchianguihi na Jesús ixin quensen jehe ixin venohe na que jehe Jesús.

¹³ Cottimeja Jesús conchienze, co jehe cóa niottja co joanjo nio ngain jehe na, co cai copescado.

¹⁴ Jiji ninxin nttiha que xago Jesús ngain chojni que vacao después de xechon.

Jesús nichja ngain Pedro

¹⁵ Are joexin joine na, Jesús joanchianguihi Simón Pedro co ndačo:

—Simón, xitsihi Jonás, ¿arinao na janha icha que nitehe?

Pedro ndačo:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco dicao cuidado de ixin jehe va.

¹⁶ Yoxin nttiha, Jesús joanchianguihi iná co ndačo:

—Simón, xitsihi Jonás, ¿arinao na janha?

Pedro ndačo ngain:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco dicao cuidado de ixin jehe va.

¹⁷ Ninxin nttiha joanchianguihi Jesús co ndačo:

—Simón, xitsihi Jonás, ¿arinao na?

Pedro tavechín ixin Jesús joanchianguihi ninxin nttiha ixin arinao jehe Pedro Jesús. Co Pedro ndačo ngain Jesús:

—Soixin noha cainxin. Soixin noha que janha ján rinaho soixin.

Jesús ndačo ngain:

—Mexinxin darinda chojnina, jañá inchin tti ttingaria coleco dicao ciudadano de ixin jehe va.

¹⁸ Janha rrindattjo ndoa que jaha are xa joarihi icha chjan, jaha vaguitoxinha co savacji tti jaha vajinao, pero are otsonttaxí, jaha tsinxe rá co ojé ni sinttangá lonttoa, co tsjiho na tti jaha sinaoha tsji.

¹⁹ Are Jesús ndačo jihi, jehe jinchequinxin na ixin quexén senhe Pedro, co ixin jehe Pedro jañá sinchesayehe Dios. Cottimeja ndačo Jesús ngain Pedro:

—¡Jaha nchehe sigue ditticaon na!

Tti chojni que Jesús anto joinao

²⁰ Are Pedro ngaria, jehe vicon que nttiha jirroé tti chojni que Jesús anto joinao, xajeho tti vehe ngaca Jesús are joina na ngain quíai pascua co joanchiangui ngain Jesús co ndačo: “Soixin, ¿quexehe tti tsjagoe chojni que ningaconha ttinó ttjen soixin?”

²¹ Co are Pedro vicon jehe mé, jehe Pedro joanchianguihi Jesús co ndačo:

—Xí jihi, ¿quexén tsonhe xa?

²² Jesús ndačo ngain Pedro:

—Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán? Jaha nchehe sigue ditticaon na janha.

²³ Mexinxin xaxaon icha chojni que vacao Jesús que ixin jehe mé rroguenha. Pero Jesús ndačoha ngain Pedro ixin chojni mé rroguenha, Jesús jecho ndačo que: “Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán?”

²⁴ Jehe chojni mé, mé tti janha, co janha tti vicon cain cosa jihi, co cjín na cain jihi. Co noa na que ndačhjan ndoa.

²⁵ Cai jí icha cosa que Jesús joinchehe, pero si rroguetaxin ná co ná cosa mé, janha xaxanho que ngoixin mundo rroguittjaha rroguingachjian cain libro que rroguetaxin cain cosa mé. Amén.

Tti Joinchehe Nirepresentanté Jesucristo

Are Jesús ndacho ixin tsí Espíritu Santo

¹ Ngain saho librona janha cjin na para ixin jaha, Teófilo, cainxin tti joinchehe Jesús co cainxin tti cjoago Jesús desde nchanho are jehe coexinhi cjoago

² hasta nchanho que jehe sacjoi para ngajni. Co antes que Jesús sarrocji ngajni, jehe coinchié co coetonhe nirepresentanté jehe conixin joachaxin que chonda Espíritu Santo. Jehe Jesús coetonhe na de ixin quexén sinchehe na.

³ Co después de ndavenhe co xechon, jehe xago ngain cain chojni jehe. Co ngoixin cuarenta nchanho Jesús joinchehe tsje cosa para que chojni mé vintte na seguro que ixin jehe cjan jichon iná. Co vandacho ngain na de ixin quexén ttetonha Dios.

⁴ Co Jesús, are xa vehe ngain na, coetonhe na ixin rrochonhe na ngain ciudad de Jerusalén. Co ndacho ngain na:

—Chonhe ra hasta tsoenja tti ndacho Ndodana icha saho, inchin janha ondačhjan nganji ra cai.

⁵ Ndoa que Juan joincheguite chojni conixin jinda, pero nntihi quejanhi nchanho jaha ra siguutte ra conixin Espíritu Santo.

Are Jesús saccoajín para ngajni

⁶ Co are Jesús xa vehe ngain na, jehe na joanchianguihi na co ndacho na:

—Soixin, çarato jilhi, rrochjehe chojni Israel joachaxin para tsetonha ngain nonttehe iná?

⁷ Co Jesús ndacho ngain na:

—Jaha ra xonhi joachaxin chonda ra para rrochonxin ra quesu o quehe hora Ndodá na sinchehe Ndo cosa jilhi ixin jeha jehe Ndo chonda Ndo joachaxin para sinchehe Ndo cosa jilhi.

⁸ Pero are tsí Espíritu Santo nganji ra, jaha ra rrochonda ra joachaxin Dios co mexinxin sačhjejin ra de nntihi co rronichja ra de ixin janha. Co jaha ra rronichja ra nntihi ngoixin Jerusalén, cottimeja satsji ra ngain ngoixin nonttehe Judea, co ngoixin nonttehe Samaria, co hasta cain lugar que jí icha cjin de nntihi ngataha nontte.

⁹ Co are Jesús joexin ndacho cain yá, cain representanté jehe tatetsjehe na quexén saccoajín Jesús are sacjoi para ngajni. Co are onoi joi, joi ná ttjoi cjoanotaon co iviconha na.

¹⁰ Xa tatetsjehe na para ngajni ixin ttinó saccoajín Jesús are cononxin ngaca na yó xí tengá lonnto roa

¹¹ co ndacho cayoi xí mé ngain na:

—Jaha ra chojni Galilea, çquedonda tatetsjehe ra para ngajni? xajeho Jesús que sacjoixin de nganji ra rrocjan tsí iná inchin are jaha ra vicon ra sacjoi.

Are coinciehe na Matías para vehe ngain lugar de Judas

¹² Cottimeja cain nirepresentanté Jesús sacjoixin de ngagaha tti jnanchjan que dinhi Jné Nttaolivo, co sacjan na para ciudad de Jerusalén. Co jna mé anto chiaon jí jna de ngain Jerusalén inchin ley Israel tajanda chojni para sattji ngain nchanho que nchejogaha ni.

¹³ Co are joi, joi na ngain nchia tti vintte na ngain ciudad mé, jehe na coani na yoxin piso tti jehe na vintte na. Co de cain na vehe Pedro, Jacobo, Juan, Andrés, Felipe, Tomás, Bartolomé, Mateo, iná Jacobo xenhe Alfeo, Simón tti vaquetocaho gobierno romano, co Judas xenhe Jacobo.

¹⁴ Cain chojni mé vaçatte na para vanchecoanxinhi na Dios conixin cain xanchó Jesús xanxi, co María, janné Jesús, co icha nanita cai.

¹⁵ Ná nchanho tiempo mé nntiha vintte inchin ciento veinte chojni co Pedro vingattjen ngayé na co ndacho ngain na:

¹⁶ —Tsjexin ra hermanos, chonda que joiconhe tti jindacho Espíritu Santo ngain David co jehe dicjin ngain tti jitaxin Palabré Dios. Ndacho nntiha de ixin Judas tti ndacho para quexén tse na Jesús co sajoicao na.

¹⁷ Judas vacji nganji na janha na, ixin jehe vechonda xajeho xa que janha na techonda na.

¹⁸ Pero conixin tti tomi que cjoenguehe na hna para ixin tti jianha que jehe joinchehe ngain Jesús, coehna ná nontte. Co nntiha Judas cjoico cjoixin já ngataha nontte mé co çhintaon cuerpoe co vahje cain tti jiringa.

¹⁹ Co are cain chojni que vintte ngain ciudad de Jerusalén conohe na ixin jamé conhe, jehe na joincheguinhi na nontte mé Acéldama, ixin nguigohe hebreo, pero rrocho xajeho Jnguihi Jni.

²⁰ Ixin ngain libroe Salmo David ndačo janhi:

Chonda que sittohe nchiandoha jeha nchia,
co xonhi chojni sintte ngaxinhi nchia.

Co ndačo cai:

Iná chojni rrochonda tti xa que jeha vechonda.

²¹ Co nttihi ngayá na te xí que vacjinho na cainxin tiempo are Jesús vehe nttihi nganji na

²² desde nchanho que Juan joincheguitte Jesús co hasta nchanho are Jesús sacoañin para ngajni. Mexinxin chonda que ná de xí mé sehe nganji na para rrondate icha chojni ixin jeha seguro vicon ixin Jesús xechon después de ndavenhe.

²³ Cottimeja coinchiehe na yó xí de nivacao na ngain cain nchanho mé. Ná vinhi José co cai vaguinhi Justo co Barsabás. Co yoxin tattita vinhi Matías.

²⁴ Co are joexin coinchiehe na cayoi xí mé, joinchecoanxinhi na Dios co ndačo na:

—Soixin que chonxin ansén cainxin chojni, tjagohna na ra quexehe de cayoi xí tehe soixin ocoinchiehe

²⁵ para sinchehe xá soixin inchin xa que vanchehe Judas. Pero jeha joinchetján xa mé ixin joinchehe jianha co jaxon jí ngain lugar tti jiquinixin sehe.

²⁶ Cottimeja vantsje na suerte co suerte mé vittotaon tattita vinhi Matías. Co rato mé jeha Matías vehe conixin ittejngo representanté Jesús.

2

Are Espíritu Santo jói ngain chojni que vaguitticaon Jesús

¹ Co are jói quiai dinhi Pentecostés, cainxin chojni que vaguitticaon Jesús tate na ngain nacoa lugar.

² Co rato mé coinhi na ná ruido anto soji que joixin de ngajni, inchin are tja thintto soji. Jamé važoin ngoixin ngaxinhi nchia tti texinhi na.

³ Cottimeja vicon na tsje neje xohi, co jói naná neje xohi mé ngataha cada na.

⁴ Co Espíritu Santo joixinhi cuerpoe cain na conixin joachaxin. Co jeha na coexinhi na nichja na oje nguigoa inchin Espíritu Santo joinchenichja na.

⁵ Co tiempo mé nttiha vintte tsje chojni judío ngain Jerusalén que joixin de tsje nación ngoixin mundo. Co chojni mé anto vaguitticaon ley Israel co cjoí ngain Jerusalén para joinchesayexin Dios inchin ndačo ley mé.

⁶ Co are coinhi na ruido ngain nchia mé, anto tsje chojni mé xatte nttiha. Co ni inoenco na quehe rroaxaon na ixin naná na coinhi na nguigoehe na tenichja entre cain chojni que vaguitticaon Jesús.

⁷ Co tavinttetsjecoa chó na co vinttegoan na admirado. Co ndache chó na:

—Pero cain chojni que tenichja janhi; ¿jeha na ajeha de nttihi nonttehe Galilea na na?

⁸ ¿Quehe jitonhe? Cain ján na tettinhi na tenichja na ojeje nguigoaha na cada na.

⁹ Nttihi ngayá na te chojni que joixin de Partia, Media, Elam, Mesopotamia, Judea, Capadocia, Ponto, co de ngain nonttehe Asia,

¹⁰ de Frigia, Panfilia, Egipto, co cai te chojni que joixin de lugar ngain Africa que jí icha ndaha de ciudad de Cirene. Cai tsje chojni romano te nttihi. Co de cain chojni romano, canxion na goan na chojni judío, co icanxin na goanha na de razé chojni judío pero ditticaon na religioen chojni judío.

¹¹ Cai jí chojni que joixin de Creta, co Arabia. Pero cainxin na ján na tettinxin na tti ndačo jeha na ixin nichja na de ixin tsje cosa jian que Dios nchehe co nichja na cain ojeje nguigoaha na ján na.

¹² Co vinttegoan admirado cain chojni mé co noeha na quehe xaxaon na co joanchian-guihi chó na, co ndačo na:

—¿Quehe rročo cain jiji?

¹³ Pero icanxin na cjoanoa na na co ndačo na:

—Ixin diguinttecoan chojni yá, mexinxin jañá tečo.

Tti nichja Pedro ngain chojni

¹⁴ Cottimeja Pedro conixin ittejngo representanté Jesús vingattjen co Pedro nichja sén co ndačo:

—Chojni de nonttehe Judea co cainxin chojni que te ngain ciudad de Jerusalén, tonoha ra co ttinhi ra jian tti rrondate ra.

¹⁵ Xí tehe dicoanha xa inchin jaha ra xaxaon ra, ixin jaxon xa ndoyo; nandá las nueve.

¹⁶ Tti jaha ra vicon ra jaxon, jiji tti ondačo profeta Joel are nichja co ndačo:

¹⁷ Dios ndačo: ngain tiempo are ochiaon ndatsjexin mundo, rrorroanha Espíritu Santo ngain cainxin chojni.

Co chjan sayé joajnana para rrondate xan icha chojni de ixin jianha,

co janha sinttaguicon xanxí co xannchí tsje cosa xá are toxinxin xan.

Co cain chojni que ojonchjan tsioxinxin tsje cosa de ixin janha.

¹⁸ Rrorroanha Espíritu Santo nchanho mé ngain cain ninchehe xana.

Co jehe na sayé na joajnana para rrondache na icha chojni de ixin janha.

¹⁹ Co de ngajni noi tsjagoa na tsje cosa que vaguiconha chojni are saho.

Co ngataha nontte tsjagoaxin na tsje señal.

Tsjagoa na jni, xohi co ttjoi de joxon jihnnchin.

²⁰ Are mé nchanho isinchengasanha co ndatsonttie,

co conittjao ndarroccjan va inchin jni.

Cain yá tsonhe saho; cottimeja tsí nchanho are Jesús rrocjan tsí ngataha nontte,

co tsjago ngain cain chojni joachaxin que jehe chonda.

²¹ Co cainxin chojni que nichja jian de ixin Jesús, tti chonda cain joachaxin, ngain cain chojni mé jehe sanjo iná vida nara.

²² Cai Pedro ndacho:

—Ttinhí ra xo jaha ra chojni Israel, tti rrondachjan: Janha nichja de ixin Jesús tti joixin rajna Nazaret. Dios cjoagoha ra ixin jehe coinchiehe Jesús are chjé jehe jie joachaxin para joinchehe tsje cosa jian co para joinchehe tsje milagro, co para joinchehe tsje señal inchin jaha ra onoha ra.

²³ Co anto icha saho Dios ochonxin ixin jaha ra sinchehe ra nchaoha ngain Xenhe. Co ndoa, jaha ra tse ra Jesús co joinchechienhe ra ngá rá chojni jianha. Co jehe na joinchecrucificá na Jesús ixin jaha ra joinao ra.

²⁴ Pero Dios joinchexechon Jesús. Dios vantsje jehe de ngain tti nindadiguenhe ixin Jesús choha sittohe ngayé nindadiguenhe.

²⁵ Jañá conhe ixin Jesús joinchenichja rey David co ndacho:

Janha cainxin nchanho chonxin ixin Dios jí nganji janha.

Jí ngain lado jian na para que xonhi cosa sinchexaon na.

²⁶ Mexinxin ansenna anto chjoin tonohe, co neje na nichjaxin palabra jian ixin anto chahna.

Mexinxin masqui cuerpona ndasenne, pero janha xonhi rroxagoan

²⁷ ixin soixin tsinttoeha almana ngain lugué chojni ndadenhe,

ni sanjoha joachaxin para rroxantte cuerpona janha tti nttaha xá soixin ixin soixin anto rinao na.

²⁸ Cjoagohna na nttiha que danjo iná vida nara.

Co anto rrochahna are janha sicon soixin.

²⁹ Co Pedro joinchehe sigue nichjé chojni co ndacho:

—Janha ndattjo ra ndoa ixin David ndogoeilitoa na ndavenhe co xavá. Co lugar tti jehe xavá, mé xa jí jai.

³⁰ Pero David cjoí ná profeté Dios co nichja lo que Dios cjoagoe, co venohe ixin Dios ndacho ngain jehe ixin ná de xanntí xanchjen rrojiguehe xan rey inchin David co jehe rey mé Cristo.

³¹ Mexinxin osé tiempo vatto David chonxin quehe siconhe ngain Cristo. Co jehe nichja ixin quexén rroxechon Cristo. Co ndacho ixin almé rroguittoeha nttiha tti dittohe cain nindadiguenhe ni cuerpo rroxantteha.

³² Co ján Dios joinchexechon jehe Jesús, co cain janha na vicon na que Jesús ndoa xechon.

³³ Co jehe sacoján para ngajni co jí ngain lado jian de Dios. Co jehe Ndo chjé Ndo Jesús joachaxin para rroanha Espíritu Santo inchin jehe Ndo ndacho Ndo. Co Jesús rroanha Espíritu Santo nttihi, co Espíritu Santo mé tti nchehe cosa jihi que jaha ra dicen ra co ttinhí ra.

³⁴ Ixin jeha David tti sacjoi para ngajni. Ixin David ndacho:

Tti Ttetonha ndacho ngain tti Ttetonna:

“Darihi ngaca lado jian na,

³⁵ hasta que janha sinttagacha jaha de ngain cainxin tti ningaconha.”

³⁶ Mexinxin cainxin chojni ngain nación Israel chonda que tsonohe na seguro ixin Jesús, tti jaha ra coenganito ra cruz, Dios ndacho ixin jehe Jesús chonda cain joachaxin para ixin ján na, co jehe mé Cristo.

³⁷ Co are jehe na coinhi na cain tti ndacho Pedro, anto coá na joachjaon co joanchianguihi na Pedro co icha representanté Jesús co ndacho na:

—¿Quehe nchao sinttaha na?

³⁸ Cottimeja Pedro ndacho ngain na:

—Ttentoxinhí ra vidá ra ngattoxon con Dios, co diguite ra cada ra de ngain nombré Jesucristo para que sitjañaha ra cain tti jianha que joinchehe ra. Co jamé Dios rrorroanha Espíritu Santo nganji ra,

³⁹ ixin Espíritu Santo jí para ixin jaha ra, co para ixin xanha ra, co cai para cainxin chojni que te cjin, rrocho para cain chojni que sinao sayé Dios.

⁴⁰ Conixin palabra jiji, co icanxin icha palabra, Pedro nichjexin na, co ndacho ngain na: —Ncheha ra inchin tenchehe cain chojni jianha que sinchetján almé na, co nchehe ra cosa jian para que rrochonda ra iná vida naraoxin.

⁴¹ Co cain chojni que vitticaon tti ndacho Pedro, jehe na joiguite na. Co nchanho mé inchin ní mil chojni coexinhi vitticaon Jesús co joiguite na.

⁴² Co cain chojni mé vaguitticaon na jian co vanchehe na inchin vacjago nirepresentanté Jesús. Co vaguitticaon chó ná, co vanchecoanxinhi na Dios co vaʒatte na cain na para vajine na tti niottja que dinhi Santa Cena.

Vidé chojni que vitticaon Cristo tiempo mé

⁴³ Conixin joachaxin que Dios chonda, nirepresentanté Jesús joinchehe na tsje milagro co tsje señal, co cainxin chojni goan na admirado.

⁴⁴ Co cainxin chojni que vaguitticaon Jesús anto vagoan na unido co vacjenguijna chó na ʒjoin.

⁴⁵ Co coexinhi joincheji na cosé na co vaconchjea na tomi ngain nivagondehe.

⁴⁶ Nchanho co nchanho vaʒatte na ngain nihngo icha importante. Co ngain nchiandoha na vanecaho chó na. Co cain na anto vaché na co ni ná na conoeha na orgulloso.

⁴⁷ Jehe na vanchecoanxinhi na Dios. Co cainxin icha chojni ngain rajna vechonda respeto ngain cain na. Co cada nchanho Jesús, tti chonda cain joachaxin, vancheguitticaon icha co icha chojni.

3

Ná tti rrengo xingamehe

¹ Ná nchanho, Pedro co Juan sacjoi na nihngo icha importante ní hora tsocjin ixin hora mé hora para vanchecoanxinhi na Dios.

² Co cainxin nchanho are mé, nttiha icanxin chojni vaguicao na ná tti xí rrengo desde que digoan. Cainxin nchanho vagaquehe na tti rrengo mé ngain puerté nihngo mé que dinhi Puerta que ʒjoin Jí, para vaganchiagaha tomi ngain chojni que vaguixinhi nttiha.

³ Co are tti rrengo mé vicon Pedro co Juan tedixinhi na nihngo, jehe joanchiagaha tomi ngain na.

⁴ Cottimeja Pedro co Juan tsjehe na jian jehe tti rrengo mé, co Pedro ndacho ngain:

—Tsjehe nganji janha na.

⁵ Co tti rrengo mé tsjehe jian ngain na, ixin ʒaxaon puede rrochjé na ʒhoan cosa.

⁶ Pero Pedro ndacho ngain:

—Janha chondaha tomi para rrochjaha, pero lo que janha chonda rrochjaha jaha: ngain nombré co de ixin joachaxín Jesucristo, dingattjen co ttjixin rottea.

⁷ Cottimeja Pedro tsehe rá tti xí mé lado jian co joinchengattjen, co rato mé cosoji cayoi rotté.

⁸ Co tti rrengo mé ʒhinca co vingattjenxin rotté, co ocoexinhi sacjoixin rotté. Co sajoixincaho cayoi na ngaxinhi nihngo. Jehe jittjixin rotté co jiʒhinca co jinichja jian de ixin Dios.

⁹ Cainxin chojni vicon na sacjoixin rotté co nichja jian de ixin Dios.

¹⁰ Co cain chojni mé anto ʒaon na ixin queʒén conhe ixin cain jehe na chonxin na jehe tti xí mé co nohe na que jehe tti vaguehe ngandanguí tti puerté nihngo que dinhi Puerta ʒjoin Jí para vaganchiagaha tomi.

Tti nichja Pedro ngain Portal de Salomón

¹¹ Co jehe tti rrengo que ndaxingamehe vacataonxin Pedro co Juan. Co jehe sacjoi conixin Pedro co Juan ngain parté nihngo icha importante que dinhi Portal de Salomón. Co cainxin chojni goan na admirado co ttinga na cjoi na tti te canio nicanxion.

¹² Pedro are vicon cain chojni nttiha, ndacho ngain na:

—Chojni de Israel, ʒquedonda doan ra admirado jaha ra? ʒQuedonda tsjena ni ra janha na, inchin janha na mero rrojinttaxingamá na xí jiji conixin joachaxin que janha na chonda na, o ixin janha na anto chonda na respeto ngain Dios? Jaha de ixin janha na,

¹³ sino que Dios de ndogoeitoa na ʒanʒjen Abraham, Isaac, co Jacob, Dios mé tti ʒhé icha tsje joachaxin ngain Xenhe que dinhi Jesús. Co Jesús mé tti jaha ra cjoiho ra ngain Pilato. Co masqui Pilato joinao rrocanchjanda Jesús, jaha ra joinaoha ra.

¹⁴ Co jaha ra ndachoha ra para rrocanchjanda na Jesús, tti Dios coinchiehe co tti joxon jian vanchehe. Sino que ndacho ra ixin icha jian para coanchjanda na ná chojni que vagoen icha chojni.

¹⁵ Co jamé ndagonhe ra chojni que danjo vida. Pero Dios joinchexechon chojni mé. Co janha na vicon na cain yá.

¹⁶ Co nombré jehe Jesús, o icha jian ndačhjan, tti confianza que janha na chonda na ngain jehe, mé tti joinchexingamehe xí jiji que jaha ra dicon ra co chonxin ra. Ján, seguro que ixin confianza mé tti joinchexingamehe jian xí jiji inchin jaha ra nchao dicon ra.

¹⁷ Co janha onona are jaha ra conixin cain xittetonha ra gonhe ra Jesús, noaha ra quehe joinchehe ra.

¹⁸ Pero Dios joinchehe jañá, inchin ondačo are icha saho ngain profeté que nichja lo que tti jehe Dios cjoagoe. Co jehe ndačo ixin Cristo chonda que rrojiguenhe.

¹⁹ Mexinxin ttentoxinhi ra vidá ra, co ditticaon ra Dios, para sitjañaha ra cain cosa jianha que nchehe ra. Cottimeja Dios nchao tsjenguijna ra para que jaha ra anto rroché ansean ra.

²⁰ Co cai Dios rrorroanha Jesús, tti Cristo, ixin Dios coinchiehe jehe icha saho para que jehe tsjenguijna jaha ra.

²¹ Masqui jai Jesucristo chonda que tasehe ngajni hasta que tsí nchanho para Dios sinchekhjian jian cain cosa, inchin ndačo osé tiempo vatto ngain cain xón que dicjin profeté Dios ngain tiempo mé.

²² Moisés ndačo janhi ngain nindogoelitoa na xančhjen: “Dios, tti chonda cain joachaxin, rrorroanha nganji ra ná profeta que sachjexin de ngayaha ra, inchin jehe Dios rroaha na janha. Ditticaon ra cainxin tti rronattjo ra jehe mé.

²³ Co cainxin chojni que sitticaonha, profeta mé sintteha na ngain chojni Dios co ndasitján na.”

²⁴ Jañá cain profeté Dios desde Samuel co icha profeta que joí después, nichja de ixin quexén conhe tiempo jai.

²⁵ Co jaha ra xannti xančhjen de cain chojni mé. Mexinxin cain tti cjoagoe Dios cain profeta, mé para ixin jaha ra. Co para tsjenguijna jaha ra, Dios joinchekhjiancaho ná trato ndogoelitoa na xančhjen are Dios ndačo ngain Abraham: “Co de ixin chojnia, janha sinttanchaon cainxin chojni ngataha nontte jiji.”

²⁶ Are Dios joinchexechon Xenhe, rroanha Xan saho nganji ra. Jañá Dios jointtanchaon ra para que tsinttohe ra cada ra tti jianha que nchehe ra.

4

Are nittetonha ngain nihngo tse na Pedro co Juan

¹ Pedro co Juan xa tenichja na ngain chojni are joí canxion xidána conixin tti xittetonhe cain xisoldadoe nihngo icha importante conixin icanxin xisaduceo.

² Tedoñao xa ixin Pedro co Juan vacjagoe na chojni co vandačo na ixin chojni que ndadenhe rroxechon na inchin Jesús oxechon.

³ Cottimeja jehe xa tse xa Pedro co Juan para saviquiaxinhi xa na hasta tti ndoexin ixin nchanho mé otsojcin.

⁴ Pero tsje chojni que coinhi tti ndačo cayoi jehe na, vitticaon na Jesús. Co de cain chojni que coexinhi vitticaon Jesús nchanho mé, jecho xí ovittja chiaon naho mil xa.

⁵ Co nchanho yoxin xatte nttiha ngain Jerusalén canxion xivaquetonha ngain chojni judío, conixin canxion nivachonda joachaxin ngain nihngo co canxion ximaestroey ley Israel.

⁶ Co nttiha cai vehe ná xí vinhi Anás, mé xidána icha importante. Co nttiha cai vehe Caifás, Juan, Alejandro, co vintte cainxin ni ichó xidána icha importante.

⁷ Cottimeja rroanha na joajna para joixacoa Pedro co Juan. Co coín na Pedro co Juan ngosine para joanchianguihi na, co ndačo na:

—¿Quehe joachaxin chonda ra, o quensen chjá ra joachaxin para jaha ra nchehe ra cain jiji?

⁸ Cottimeja Pedro, conixin joachaxin Espíritu Santo, ndačo ngain na:

—Soixin ra xo ttetonha ra ngain chojni Israel, co soixin ra xo chonda ra joachaxin ngain nihngo icha importante:

⁹ jai soixin ra danchianguiha ra ixin quexén cjoenguijna na ná tti rrengo co quexén jointtaxingamá na.

¹⁰ Rrondačhjan na ngattoxon con ra, para que tsonohe cainxin chojni Israel ixin xí jiji que jí ngattoxon con ra, jehe xa xingamehe xa pero de ixin nombré co joachaxin Jesucristo tti joixin de rajna Nazaret. Co Jesucristo mé xajeho tti soixin ra joinchecrucificá ra. Co Dios joinchexechon jehe.

¹¹ Inchin ndačo ngain tti jitaxin Palabré Dios de ixin Jesús: “Jehe mé tti xo que soixin ra, xo ttette ra nchia, joinaaha ra. Pero jehe goan tti xo icha importante de ngain nchia.”

¹² Ni ná chojni nchao rrochjá na ján na iná vida nara, ixin Dios ndačo que xonhi iná chojni ngataha nontte jihi chonda joachaxin mé; jehó Jesús.

¹³ Are cainxin nivaquetonha coinhi na tti nichja Pedro co Juan, jehe na goan na admirado ixin venohe na que Pedro co Juan venoeha xón jian, co ixin cayoi jehe na inchin chojni que xonhi chonxin. Pero masqui jamé, xäonha na para nichja na. Cottimeja vinttegatsoan na ixin cayoi nimé vacao na Jesús.

¹⁴ Co tti xí que joinchexingamehe Pedro co Juan nttiha tajingattjen ngayé na, mexinxin čhoha joinchecaxin na Pedro co Juan ni ná cosa.

¹⁵ Cottimeja coetonhe na Pedro co Juan vačhjeyexin de ngain na co jehó na vittohe na nttiha para cjoao na ixin quexén sinchehe na.

¹⁶ Co ndačo na:

—¿Quehe sonttoho na ngain cayoi xí tehe? Cainxin chojni que te nttihi Jerusalén nohe na ixin cayoi xí tehe joinchehe milagro jihi. Co ján na čhoha rrondačo na ixin ndoaha.

¹⁷ Pero para tsonoeha icha chojni ixin choje joinchehe cayoi xí tehe, ján na sonttoxaon na de soen na para que ixonhi chojni rronichjexin conixin nombré co joachaxín Jesús.

¹⁸ Cottimeja vayé na Pedro co Juan para coetonhe na ixin čhoha rrondačo na ni tsjago na conixin nombré co joachaxín Jesús.

¹⁹ Pero Pedro co Juan ndačo ngain na:

—Xaxaon ra, soixin ra, ¿andačo Dios ixin icha jian jí si sitticanho na tti rrondačo ra soixin ra co sitticaonha na tti ndačo Dios, o ani nahí?

²⁰ Janha na čhoha tsinttoa na de rronichja na cain cosa que vicon na co coian na.

²¹ Cottimeja cain xittetonha nichja xa icha para joinchexaon xa na, pero coančjanda xa Pedro co Juan para sacjoi, ixin xonhi razón vittja xa para rroquaxinhi xa icha, ixin cainxin chojni nichja jian de ixin Dios are vicon na tti joinchehe Pedro co Juan.

²² Co tti xí que xingamehe de ixin joachaxín Dios vechonda icha que cuarenta nano.

Nirepresentanté Jesucristo joanchiehe na Dios para que rrochjé na icha confianza

²³ Are Pedro co Juan ocoančjanda na, cayoi jehe na sacjoi na para tti vintte tti icha nirepresentanté Jesús co ndache na cain tti ndačo cain xidána que vaquetonha ngain icha xidána, co cain nichonda joachaxin ngain nihngo.

²⁴ Co are tti icha nirepresentanté Jesús coinhi cain yá, cain na joinchecoanxinhi na Dios, co ndačo na:

—Ndodana na, soixin tti Dios, tti joinchexjian ngajni, co nontte, co ndachaon, co cainxin cosa que jí.

²⁵ Co soixin tti ndačo ngain Espíritu Santo para jehe joinchenichja xinchehe xá David. Mexinxin David ndačo:

¿Quedonda cain nación toňao nganji?

¿Quedonda cain chojni xaxaon cosa que xonhi xé?

²⁶ Cainxin xirey ngataha nontte co cainxin xittetonha coato chó xa para tsetocaho xa Dios co para tsetocaho xa Cristo tti coinchiehe Dios para rey, jaňá čho David.

²⁷ Co ndoa, ngain ciudad jihi Herodes, Poncio Pilato co chojni que joixin ojé nación, co chojni Israel coato chó na para coetocaho na Jesús, tti Xanha jian, tti soixin rroanha para ttjengujna na.

²⁸ Jaňá joinchehe na cainxin tti soixin ndačo are icha saho que chonda que rroguiconhe.

²⁹ Co jai tsjexin, jehe na toňao na nganji na janha na co rinao na sinchexaon na na. Mexinxin ttjengujna ni ra para rroxaonha na are rronichja na joajná soixin.

³⁰ Co nttatsán na ñao soixin, conixin joachaxian ttjengujna ni ra para sinttaxingamá na chojni nihi co para sinttaha na icha milagro de ngain nombré Jesús, tti Xanha icha jian.

³¹ Co are joexin nichja na jaňá ngain Dios, lugar tti te na nttiha coingui, co cain na chonda na tsje joachaxin de Espíritu Santo. Co joinchehe na sigue nichja na de ixin Palabré Dios sin joaxaon.

Cainxin cosa que vechonda ná na, cai cosé cain ni icha

³² Inchin xaxaon ná chojni que vaguitticaon Jesús xaxaon cain na, co xajeho conohe ngain ansén cain na. Ni ná na ndačho na ixin cosé na jehó para ixin jehe na, pero cain na ndačo na ixin cosé ná na cai cosé cainxin ni icha.

³³ Co nirepresentanté Jesús joinchehe na sigue ndache na icha chojni ixin Jesús xechon. Co Dios vaganjo ngain na anto tsje joachaxin are vanichja na, co vanchenchaon cain na.

³⁴ Co xonhi chojni que vaguitticaon Jesús vanchehe falta ná cosa ixin chojni que vechonda nonttehe o nchiandoha vanhecji na cosa que vechonda na co vaquiaho na tomi

³⁵ co vaganjo na tomi ngain nirepresentanté Jesús. Co jehe na vaconchjeya na tomi mé inchin vagondehe ni icha para čhoan cosa.

³⁶ Jañá joinchehe ná xí vinhi José co ndogelítoe xançhjen vinhi Leví. Jehé joixin de ngain ná nontte ngosine ndacháon dinhi Chipre. Co nirepresentanté Jesús joincheguinhí na Bernabé. Nombre yá rroçho tti nchegavanguehe ñao chojni.

³⁷ Xí mé joinchecji xa ná nonttehe xa co joiaho xa tomi co joanjo xa tomi ngain nirepresentanté Jesús para ixin jehé na sanjo na tomi mé ngain chojni noa que vaguitticaon Jesús.

5

Cosa jianha que joinchehe Ananías co Safira

¹ Pero vehe iná xí que vinhi Ananías, co Safira vinhi çhihi xa. Xí mé co çhihi xa joinchecji na ná nonttehe na cai.

² Pero xí mé vittoehe xa ná tanto de tomi co jehé ttoha tomi joicáo xa ngain nirepresentanté Jesús, pero ndaçho xa ixin joicáo xa cainxin tomi ngain na. Co çhihi xa venohe cainxin.

³ Cottimeja Pedro ndaçho ngain xa:

—Ananías, ¿quedonda jaha coançhanda Satanás para coetonha nganji jaha para joincheyehe Espíritu Santo, co vittoaha ttoha tomi que cjoengaxin na hna de ixin nontteha?

⁴ Nontte que jaha joinchecji nontteha. Co are ojoinchecji nontte mé, cainxin tomi tomia, para que jaha nçhao sinchehe inchin jaha rinao conixin tomi mé. Nçhao para jaha danjo cain tomi mé, ní danjo johó ttoha tomi. Pero jaha nchehe jianha ixin ndaçho que ixin rridanjo cain tomi nontteha co ndoaha. Jehá chojni tti jaha rrittemehe tti ndoa, sino Dios tti jaha rinao tsemehe tti ndoa.

⁵ Are Ananías coinhi cain yá, jehé vetsinga co ndavenhe. Co cainxin chojni que conohe na yá anto xáon na.

⁶ Rato mé jói canxion xanxí. Co jehé xan mé coensiha xan cuerpoe Ananías co sajoicáo xan para cjoavá xan.

⁷ Vatto inchin ní hora, cottimeja cjoí nçhiçhihi Ananías cai. Co venoeha nçha ixin quehe conhe xixihi nçha.

⁸ Co Pedro joanchianguihi nçha co ndaçho Pedro:

—Ndachjenji na, ¿ajoinchecjixin ra nontte inchin precio que jaha ra ndaço ra?

Co jehé nçha ndaçho nçha:

—Ján, precio mé.

⁹ Cottimeja Pedro ndaçho ngain nçha:

—¿Quedonda ndache chó ra para tema ra tti ndoa ngain Espíritu Santo? Nttimé ndoja jói nijoicjavá xixiha. Co jai tsjiho na jaha cai.

¹⁰ Co rato mé vetsinga nçha ngaca Pedro co ndavenhe nçha cai. Co are vinttequí xanxí que joicjavá xixihi nçha, vittja xan jehé nçha cai ondadiguenhe nçha. Cottimeja joantsje xan nçha co sajoicjavá xan nçha ngaca tti xavá xixihi nçha.

¹¹ Co cainxin chojni que vaguitticaon Jesús nttiha, conixin cain icha chojni que conohe cosa jihi anto xáon na.

Tsje milagro co señal joinchehe nirepresentanté Jesucristo

¹² Co tiempo mé nirepresentanté Jesús vanchehe na anto tsje señal co milagro. Co cain chojni que vaguitticaon Jesús vaçatte na ngain parté nihngo icha importante que dinhi Portal de Salomón. Co nttiha vechondaxin na servícoe na.

¹³ Co icha chojni anto vechonda respeto ngain chojni que vaguitticaon Jesús pero vaçáon na vacji na servícoe na.

¹⁴ Pero masqui jamé, icha tsje chojni, xí co nçhí vitticaon Jesús, tti chonda cain joachaxin.

¹⁵ Co hasta cainxin chojni que vechonda niníhi vagantsje na tti níhi ngandehe nttiha ngataha cania o ngataha saon. Ixin vajinao na que are vagatto Pedro masqui cara jehé saon vagattotaon jehé niníhi mé para vanchexingamehe na.

¹⁶ Cai tsje chojni vaquixin de icha rajna que vintte chiaon Jerusalén co vaquiaho na tsje chojni níhi co tsje chojni que veninxin espíritu jianha. Co cainxin chojni mé vaxingamehe na.

Nittetonha ngain nihngo joiningaonhe na Pedro co Juan

¹⁷ Cottimeja xidána icha importante co cain xicompañeroe xa que dinhi xisaduceo anto vintteonchjoehé xa ngain nirepresentanté Jesús,

¹⁸ co tse xa chojni mé co coiáxinhí xa na ngaxinhí cárcel tti jí tsje chojni que joinchehe tsje cosa jianha.

¹⁹ Pero ná ángel de Dios conxiré puerté cárcel are ttie co joantsje cain nirepresentante mé co ndaçho ngain na:

²⁰—Sattji ra ngain nihngo icha importante. Co nttiha ttequinhi ra cain chojni cainxin de ixin tti vida naroaxin que danjo Jesucristo.

²¹Co cain chojni Jesús vitticaon tti ndačo ángel. Co are vingasán joixinhi na nihngo icha importante co coexinhi na joinchecoenhe na chojni.

Co rato mé xidána icha importante co xicompañeroe xa coetonhe xa cain nivechonda joachaxin ngain juzgadoe na para žatte na. Cottimeja rroanha na xipolicía ngain cárcel para joixacoa nirepresentanté Jesús.

²²Pero are xipolicía joiji xa ngain cárcel, ivittjaha xa nirepresentanté Jesús. Co sacjan xa para joiquetonhe xa xidána.

²³Co vittendačo xa:

—Vittja na puerté cárcel jijé jian co cain xisoldado tatenda xa nttiha. Pero are conxirá na puerta, ixonhi chojni te ngaxinhi nttiha.

²⁴Are xicapitén xisoldadoe nihngo icha importante co cain xidána que vaquetonha ngain icha xidána coinhi xa cain yá, anto joanchianguihi chó xa ixin quehe conhe, co quehe rročo cain jihi.

²⁵Co rato mé joí ná xí co ndačo xa ngain na:

—Cain tti xí que jaha ra coiaxinhi ra, te xa ngain nihngo icha importante co tenchecoenhe xa chojni.

²⁶Cottimeja tti xicapitén xipolicía cjoí xa conixin canxion xipolicía para joiaho xa cain nirepresentanté Jesús. Pero xonhi joinchehe xa ngain chojni mé ixin xaon xa que puede cain chojni que te nttiha ngain nirepresentanté Jesús rrocaxin na xa žo.

²⁷Co are ojoiaho xa cain nirepresentanté Jesús ngain juzgado tti te xi icha, nttiha coengattjen xa cain na. Co xidána icha importante ndačo xa ngain na:

²⁸—Janha na coetonha ra ixin itsjagoeha ra chojni conixin nombré co joachaxín Jesús. ¿Co quehe joinchehe ra? Ngoixin ciudad de Jerusalén joexin joinchecoenhe ra chojni tti jaha ra noha ra, co jaha ra nchecaxin ni ra ixin janha na gonhe na xí yá co rinao ra que chojni sitticaon na jamé.

²⁹Cottimeja Pedro co cain icha nirepresentanté Jesús ndačo na:

—Janha na chonda que sitticanho na Dios saho que chojni.

³⁰Ti Dios de nindogoelitoa na žančhen joinchexechon Jesús, tti soixin ra coeriahnda ra nganito ná cruz co nagoenxon ra.

³¹Co Dios joinchecajinhi para ngajni. Co nttiha Dios coin ngain lado jian co chjé joachaxin para que jehe ttetonha cain chojni co para jehe danjo ngain na iná vida naroaxin. Co cai Dios chjé Jesús joachaxin para tjuguijna chojni Israel tsentoxinhi vidé na co para ixin Jesús sinchetjañe na cain cosa jianha que nchehe na.

³²Co cain yá janha na vicon na, co cai Espíritu Santo tjago ixin ndoa conhe. Co Dios rroanha Espíritu mé ngain cain chojni que ditticaon ngain jehe Dios.

³³Co are coinhi na cain yá, coñao na co joinao na narrogoenxon na na.

³⁴Pero ngagué cain chojni que vechonda joachaxin nttiha vehe ná xifariseo vinhi Gamaliel, co xí mé vanchecoenhe xa icha chojni quehe vaquetonha ngain ley Israel. Co cain chojni vařaxaon na anto jian de ixin xí mé. Co vingattjen xa co coetonha xa vantsjeyexin na nchion rato cain chojni Jesús.

³⁵Cottimeja ndačo xí mé ngain cain icha chojni nttiha:

—Cain jaha ra žo xí Israel ra, ttijho ra cuidado tti sinchehe ra ngain xí tehe.

³⁶řaxaon ra que ná tiempo vatto, joí ná xí vinhi Teudas, co ndačo xa ixin jehe xa anto importante xa. Co inchin nó ciento xí vaguitticaon co vacao jehe Teudas. Pero icha chojni vitticaonha co ndagoen Teudas, co cain chojni que vacao ndachjequé na, co ndajoexin cainxin.

³⁷Co cai icha después, are cjoinhi ná censo para vinttetaxin cain chojni, are mé joí ná xí de nonttehe Galilea que vinhi Judas. Cai ndačo xa ixin jehe xa anto importante xa, co tsje chojni vacao xa cai. Pero cai icha chojni vitticaonha co ndagoen xa, co cain chojni que vacao xa ndachjequé na cai.

³⁸Mexinxin jaha ra icha jian tančhanda ra cain xí tehe co dixintteha ra ngain xa. Ixin si cain cosa yá jecho xa tenchehe xa, chonda que ndatsjexin toin,

³⁹pero si Dios ndačo cain cosa yá, jaha ra čhoħa rrondačo ra ixin ndatsjexin. Mexinxin tančhanda ra cain na para jaha ra tsetocħa ra Dios.

⁴⁰Co cainxin na vitticaon na tti ndačo Gamaliel. Cottimeja vayé na cain nirepresentanté Jesús, vintja na na ixin nttá, cottimeja coetonhe na cain chojni mé ixin irronichjaha na conixin nombré co joachaxín Jesús. Cottimeja coančhanda na na sacjoí na.

⁴¹Co are cain chojni Jesús sacjoixin de ngain cain chojni ngain juzgado, anto ché na ixin Dios coančhanda na para vetan na tanguí de ixin nombré Jesús.

⁴² Co vaquinttoeha na de vacjagoe na chojni, ixin cainxin nchanho vanichja na de ixin Jesús ngain nihngo icha importante co ngain nchiandoha tsje chojni cai.

6

Are coinchiehe na yáto xí para cjoenguijna nirepresentanté Jesús

¹ Co tiempo mé, anto cotsje chojni que vaguitticaon Jesús. Pero chojni que vaguitticaon Jesús que vanichja griego nchion coñao na ngain chojni que vaguitticaon Jesús que vanichja hebreo. Ixin nimé ni vinttendačo na ixin cain nchiganha que vanichja griego que vintte ngain na vacaha ncha jian vane ncha are vaconchjea na cada nchanho tti vane cain chojni que vaguitticaon ngain Jesús.

² Cottimeja tti tteyó nirepresentanté Jesús joatse cainxin chojni co ndačo ngain na: —Nchaoha jí si janha na tsinttoa na de rronichja na joajné Dios ngain icha chojni jeho por ixin rrochjaha na tti sine na.

³ Mexinxin icha jian ttinchiehe ra yáto xí de ngacjan jaha ra, pero xí que ditticaon jian ngain Jesucristo, co chonda joachaxin de Espíritu Santo, co chonxin quehe rinao Dios. Co tti yáto xí mé ndache ra xa para sinchehe xa xa jiji.

⁴ Co janha na rrocjan na sinttacoanxian na Dios, co sinttacoán na icha chojni joajné Dios.

⁵ Co cainxin na vitticaon na tti ndačo nirepresentanté Jesús, co coinchiehe na yáto xí. Saho coinchiehe na Esteban, tti anto vaguitticaon Jesús co tti chonda tsje joachaxin de Espíritu Santo. Co xí icha vinhi xa Felipe, Prócoro, Nicanor, Timón, Parmenas, co yatoxin xí vinhi Nicolás. Co jehe xa joixin xa de ciudad dinhi Antioquia, co icha saho xí mé coexinhi xa vaguitticaon xa religioen chojni judío.

⁶ Cottimeja joiaho na tti yáto xí mé para ngain nirepresentanté Jesús. Co jehe na joinchecoanxinhi na Dios co coín rá na ngataha já tti yáto xí mé para ná señal que cain xí mé coexinhi xa joinchehe xa xa para ixin Dios.

⁷ Co ttinga icha tsje chojni coinhi joajné Dios ngain Jerusalén. Co icha cotsje chojni que vitticaon Jesús, hasta tsje xidána de ngain religioen chojni judío cai vitticaon xa ngain Jesucristo.

Are coiaxinhi na Esteban

⁸ Esteban vachonda anto tsje joachaxin de Espíritu Santo co Dios anto vanchenchaon jeh Esteban. Co jehe Esteban vanchehe tsje milagro co señal ngattoxon con chojni.

⁹ Cottimeja joi canxion chojni de ná nihngo Israel que vinhi los Esclavos Libertados. Co cai icanxin chojni joixin de ngain ná rajna dinhi Cirene, co de ciudad de Alejandría. Co joi icha chojni cai que joixin na ná nación que dinhi Cilicia co icha chojni que joixin na nontteha Asia. Cainxin chojni mé coexinhi na joinchediscutí na ngain Esteban.

¹⁰ Pero coiaxinha na ngain ixin Espíritu Santo anto cjoenguijna Esteban co cjoagoe jeh quexén nichja ngain chojni mé.

¹¹ Mexinxin chojni mé cjoenguehe na hna icanxin chojni para ndačo ixin jeh na coinhi na nichja Esteban jianha de ixin Moisés co de ixin Dios.

¹² Co jañá joinchehe na para joincheguitticaon na cain chojni, co cain nivechonda joachaxin ngain nihngo Israel, co cain ximaestroe ley Israel. Cottimeja cain na coñaohe na Esteban co tse na co joicao na ngain juzgadoe nihngo Israel.

¹³ Co cai cjoé na icanxin chojni que ndačo ixin Esteban nichja jianha, masqui ndoaha tti ndačo na. Co chojni mé ndačo:

—Jan, ndoa, xí yá anto nichja xa jianha de ixin nihngo icha importante co de ixin ley Israel.

¹⁴ Coian na ndačo xa ixin Jesús que joixin Nazaret sinchexantte nihngo icha importante jiji co tsentoxinhi cain cosa que coetoan na Moisés sonttoho na.

¹⁵ Cottimeja cain chojni nttiha tsjehe na Esteban. Co vicon na ixin jidaquín ngá con Esteban inchin ngá con ná ángel.

7

Tti ndačo Esteban

¹ Cottimeja xidána icha importante joanchianguihi xa Esteban co ndačo xa:

—¿Andoa cain tti ndačo chojni jiji?

² Co Esteban ndačo:

—Soixin ra, tinna ni ra tti rrondačhan. Dios de ján na anto jian co xago ngain ndogolitoa na Abraham are vehe ndo ngain nonttehe Mesopotamia antes que jeh ndo sacjoi ndo Harán.

³ Co Dios ndačo ngain ndo: “Ttinttohe nontteha co cain ni xa ichó, co sattji ngain nontte que janha tsjagoha.”

⁴ Cottimeja ndogoelitoa na Abraham vačhjexin ndo de ngain nonttehe Caldea co sacjoi ndo ngain nonttehe Harán. Co vehe ndo nntiha Harán. Cottimeja ndavenhe ndodé ndogoelitoa na Abraham, co Dios rroanha ndogoelitoa na Abraham ngain nontte jihi, tti ján na te na jai.

⁵ Pero Dios ʒa joanjoha ni rioho nontte nntihi ngain ndogoelitoa na Abraham. Pero Dios ndačho ixin sanjo nontte mé ngain xenhe ndogoelitoa na Abraham masqui ʒa vechondaha ndo chjan tiempo mé.

⁶ Co masqui jamé, pero Dios ndačho ngain ndogoelitoa na Abraham ixin xanntti ndo ʒančhjen sintte xan ojé nontte que jeha nonttehe xan co ngain nontte mé tsochji xan ngain ʒa co icha chojni sinchehe feo ngain xan para nó ciento nano.

⁷ Pero cai Dios ndačho ngain ndogoelitoa na Abraham: “Janha rrochjaha castigo tti chojni que sinchehe feo ngain xannttia. Cottimeja jeha xan satsjixin xan de nntiha para sinchesayana xan ngain lugar jihi.”

⁸ Co are Dios joinchecjian trato mé ngain ndogoelitoa na Abraham, Dios coetonhe ndo para chjá na ndo ná ʒohe que dinhi circuncisión. Mé rrotho ixin cain chojni que chonda ʒohe mé, chonda parte ngain trato mé. Mexinxin are concjihi xenhe Abraham, xanIsaac, co vatto jni nchanho de concjihi xan, Abraham chjé xan ʒohe mé. Co ʒajeho jamé joinchehe Isaac después ngain Jacob, xenhe jeha Isaac. Co ʒajeho jamé joinchehe Jacob después ngain cain tti tteyó xenhe, tti xancjoi ndogoelitoe tti tteyó grupoe chojni Israel.

⁹ Co cain xenhe Jacob mé, tti cjoí ndogoelitoa na ʒančhjen, conchjoehe na ngain José tti xanchó na icha nchín. Co jeha na joinchecji na xan ngain chojni que sacjoi ngain nonttehe Egipto. Pero Dios cjoenguijna José,

¹⁰ co masqui tsje cosa tangui conhe José nntiha Egipto, después Dios coančhjandaha José ngain cain cosa mé. Co Dios chjé jeha jian joarrixaon, co cjoenguijna José para que Faraón joinao jeha José. Faraón tti rey ngain Egipto co jeha rey mé chjé José anto tsje joachaxin para vehe gobernador de Egipto co vaquetonha ngain nchiandoha rey mé.

¹¹ Cottimeja vehe jintta ngain nonttehe Egipto co ngain nonttehe Canaán. Mexinxin anto tangui vehe para cain chojni ngoixin nontte mé. Co cain nindogoelitoa na ʒančhjen ivaguitjaha na tti vane na.

¹² Pero are Jacob conohe ixin vehe trigo ngain Egipto, rroanha nntiha canxion xenhe, tti xancjoi ndogoelitoa na ʒančhjen. Co mé tti saho nntiha que cjoí xan nntiha.

¹³ Co hasta tti yoxin nntiha que joiquehna xan trigo nntiha Egipto, José ndačho ngain xanchó ixin quensen jeha. Co are mé tti rey ngain Egipto conohe cai quensen nichó José.

¹⁴ Cottimeja José ndačho para joi ndodé José, ndoJacob, conixin cainxin nichó. Co cain jeha na vittja setenta y cinco chojni.

¹⁵ Jañá conhe para Jacob sacjoi Egipto, co nntiha vehe hasta ndavenhe, co cai nntiha venxin cain ndogoelitoa na ʒančhjen.

¹⁶ Co después xenhe sajoicao xan nntaloroe na ngain nonttehe Siquem para ʒavá nnta ngain cueva tti coenanxin Abraham conixin tomi ngain xenhe Hamor nntiha Siquem.

¹⁷ Co are ochiaon joi tti tiempo para tsonhe tti ndačho Dios ngain Abraham, cainxin chojni Israel anto cotsje na ngain Egipto.

¹⁸ Cottimeja iná rey coexinhi coetonhe na nntiha. Rey mé vechonxinha José.

¹⁹ Co rey mé joincheyehe nindogoelitoa na ʒančhjen co anto feo joinchehe ngain na. Co jeha rey mé coetonhe nindogoelitoa na ʒančhjen que tsinttohe na xenhe na que nandá vagoan para ndasenhe xan.

²⁰ Co ngain tiempo mé concjihi Moisés. Dios anto joincheʒoxinhi chjan mé. Co nindoha Moisés joincheganguixin na ngain nchiandoha na, ní conittjao.

²¹ Cottimeja chonda que cointtohe na para ndarroguenhe. Co nchanho mé ná nchichjeha rey vittja Moisés co sajoicao ncha para nchiandoha ncha co joincheganguí ncha Moisés inchin ná xenhe ncha.

²² Mexinxin Moisés coanguí cain tti venohe chojni Egipto co jeha anto vechonxin para vanichja co cain tti vanchehe jeha, vanchehe jian.

²³ Are jeha ovechonda cuarenta nano, jeha ʒaxaon joitsjeha cain nirajné, tti chojni Israel.

²⁴ Co nntiha vicon Moisés ná chojni Egipto jitjáya ngain ná chojni Israel. Co Moisés para cjoenguijna chojni Israel que jidicaon, Moisés nagoenxon chojni Egipto que jitjáya.

²⁵ Jañá joinchehe Moisés ixin ʒaxaon que cain chojni Israel ʒajeho nirajné jeha. Co ʒaxaon ixin jeha na venohe na que Dios rroanha Moisés para santsjexin na de nntiha. Pero jeha na venoeha na mé.

²⁶ Co nchanho yoxin, Moisés vetan yó chojni Israel que tetteto co jeha joinao ixin irroquetoha na. Mexinxin ndačho ngain na: “Jaha ra de ʒajeho rajna ra, ʒquedonda tedonhe chó ra jaho ra?”

²⁷ Cottimeja tti jidoen xicompañeroe conxina Moisés co ndaño ngain: “¿Quensen coín jaha de juez co xinajni para tsetonha nganji na?”

²⁸ ¿Arinao nasoenxon na janha cai inchin nagoenxon ná chojni Egipto jna?”

²⁹ Co are coínhi Moisés yá, sacoi ngaxin de nttiha co sacjoi ngain nonttehe Madián. Masqui jehe vechon nttiha, pero nttiha jeha nonttehe. Co nttiha vechonda yó xenhe xanxi.
³⁰ Vatto cuarenta nano. Cottimeja ngain rotté ná jna dinhi Sinaí, viconxin Moisés ná ángel de Dios ngacjan ná xohi. Co xohi mé jiche ngagaha ná canchaha.

³¹ Moisés medio xaoen ixin tti jehe vicon, co are conchienne ngain canchaha para vicon icha jian, coínhi ndaño Dios janhi:

³² “Janha tti Dios de nindogoelitoa xanchjen, janha tti Dios de Abraham, de Isaac, co de Jacob.” Cottimeja Moisés coexinhi xanga de joaxaoen, co ni thoha tsjehe icha ixin anto xaoen.

³³ Co Dios ndaño ngain: “Dantsjenga cattea de rottea ixin tti lugar que rrittingachje yá ná lugar santo.

³⁴ Janha vicon que anto tettín chojnina ngain Egipto, janha coian que tedetan na tangui, co janha xincanji na para itsoenha na jañá. Tsjexin, janha rrorroanha jaha ngain Egipto.”

³⁵ “Mexinxin masqui jehe na cjoanoa na Moisés co ndaño na ngain: “¿Quensen coín jaha para ixin tsetonha co sarihi juez?”, pero Dios rroanha Moisés mé inchin ná tti tsetonha co para coanñjandaha na conhe na icha feo nttiha. Co rroanha tti ángel que Moisés viconxin ngacjan xoi canchaha para ndache jehe cain yá.

³⁶ Co Moisés tti joantsjexin nindogoelitoa na xanchjen de ngain Egipto, jehe tti joinchehe tsje milagro co tsje señal. Jehe joinchehe cosa mé ngain nonttehe Egipto co ngain ndachaon que dinhi Mar Rojo co ngagaha jna tti vacji na ngoixin cuarenta nano.

³⁷ Co Moisés mé tti ndaño ngain cain chojni Israel: “Dios rrorroanha ra ná chojni que sachjexin de nganji ra que rronichja tti jehe Dios tsjagoe, inchin rroanha na janha. Nchehe ra caso ngain.”

³⁸ Co Moisés mé tti vehe ngagué cain chojni are ngagaha jna. Co cai jehe vehe conixin tti ángel que nichjixin ngataha jna Sinaí. Co cai Moisés nichjixin ngain cain nindogoelitoa na xanchjen. Co jehe mé tti vayé palabré Dios que danjo vida, co jehe dicjin palabra mé para que ján na jai chonda na palabra cai.

³⁹ Pero nindogoelitoa na xanchjen thoha na vitticaon na, co coñahe na co joinao na sarrocjan na para Egipto.

⁴⁰ Co are Moisés xa vehe ngataha jna Sinaí cain na nichja na ngain Aarón, tti dána icha importante, co ndache na Aarón: “Rinaho na que sinchechjianna ni ra canxion dio que sitaonna na nttiha. Ixin nonaha na quehe conhe Moisés tti joantsjexin na de ngain nonttehe Egipto.”

⁴¹ Cottimeja joinchechjian na ná coxinttachjan co goen na tsje coxigo para coín na ngain dio mé. Co anto ché na ngain tti jehe na joinchechjianxin na rá na.

⁴² Cottimeja Dios sacjoixin de ngain na. Co coanñjanda na para jehe na joinchesayehe na cosa que dicen ni ngajni. Co janhi jitaxin ngain libro que dicjin profeté Dios: Jaha ra chojni Israel, ¿agonhe ra coxigo para vachjana ra va janha ngoixin cuarenta nano ngagaha jna?

⁴³ Nahi, vachjanaha ra va tiempo mé. Sino que jaha ra vacjiho ra tti dio dinhi Moloc, co tti cosa inchin ná conotse que jaha ra ndaño ra ixin dio co nheguinhi ra Renfán.

Cain retrato yá jaho ra joinchechjian ra para joinchesayehe ra.

Mexinxin janha santsjexin ra de ngain nacioan ra co rrorroanha ra icha ndaha de Babilonia.

⁴⁴ Ndaño Esteban cai:

—Ngagaha jna nindogoelitoa na xanchjen joinchechjian ná nchia de joxon manta para ixin Dios, co nttiha vaquenchjinha na tabla que jitaxin ley de Dios. Co jehe na joinchechjian na nchia mé inchin coetonha Dios ngain Moisés, ixin Dios cjoagoe Moisés co ndaño: “Nchechjian nchia inchin nchia jaha vicon.”

⁴⁵ Co are Moisés ndavenhe, Dios coinchiehe Josué para coetonha chojni Israel, co jehe sajoicao nchia mé are vantsje nindogoelitoa na xanchjen de ngagaha jna co are savacao na ngain nontte que Dios vanjo ngain na. Pero tiempo mé icha chojni vintte nttiha. Pero Dios cjoenguijna nindogoelitoa na xanchjen para vantsjexin na chojni mé de nonttehe. Co jañá cjoí hasta que David joiguehe rey.

⁴⁶ Dios anto joinao rey David. Co David joinao rroinchechjian ná nchia ixin Dios de ndogoelitoa na Jacob.

⁴⁷ Pero Salomón tti joinchechjian nchia mé para ixin Dios.

⁴⁸ Jañá joinchehe Salomón masqui Dios que jí noi seha ngaxinhi nchia que nchechjian chojni. Ixin profeté Dios ndaño janhi:

⁴⁹ Janha Dios na co ngajni inchin ntaxintaonna

co ngataha nontte inchin tti ttingachje rottena.

Mexinxin, ¿quehe nchia sinchehjian ra para ixin janha?

¿O ngain quexehe nchia nchao sinttajogaha?

⁵⁰ ¿Ajeha janha conixin rana tti jointtachjianxin cain cosa yá? čho Dios.

⁵¹ Pero Esteban joinchehe sigue ndacho:

—Pero soixin ra cainxin tiempo atto cha ansean ra co vittoaxinha ra vitticaon ra. Co soixin ra inchin cain tti chonxinha Dios ixin rinaoha ra sitticaon ra Dios co ttinxinha ra Palabré Dios. Cainxin tiempo ningaconhe ra Espíritu Santo inchin vanchehe cain ndogoelitoa ra xančhjen.

⁵² Nindogoelitoa ra xančhjen joinchehe na feo ngain cainxin niprofeté Dios. Co jehe na goen na cainxin chojni mé que ondačo are icha saho de ixin quežén tsí Cristo tti anto jian. Co are ojoí Cristo, soixin ra joinchechienhe ra ngain chojni romano co nagoenxon ra.

⁵³ Co masqui ángel ndache nindogoelitoa ra xančhjen ley de Dios, pero soixin ra ditticaonha ra.

Are Esteban ndavenhe

⁵⁴ Co are cain na coinhi na cain cosa yá, icha co icha coñao na ngain Esteban co hasta joinetaon neno na ixin anto coñao na ngain.

⁵⁵ Pero Esteban anto vechonda joachaxin de Espíritu Santo hasta jehe nchao tsjehe ngajni co vicon chíxo tti jí Dios co cai vicon Jesús tajingattjen ngain Dios lado jian.

⁵⁶ Cottimeja ndacho:

—jTsjexin ra, janha dicon ngajni jixangué co tti Xí que joixin de ngajni tajingattjen Xa ngain Dios lado jian!

⁵⁷ Pero jehe na coejé na ndatsjoen na conixin rá na co coyao na soji. Co cainxin na tse na Esteban.

⁵⁸ Joantsjexin na de ciudad mé co coaxin na Esteban xo. Co chojni que coaxin xo joantsje na lonttoe na que tetsá na co cointtohe na lontto nntiha ngain ná xanxí que vinhi Saulo.

⁵⁹ Co are tetaxin na Esteban xo, jehe joinchecoaxinhi Dios co ndacho:

—Jesús, soixin tti chonda cain joachaxin, dayehe espirituna.

⁶⁰ Cottimeja vettoxin co ndacho sén:

—Soixin tti chonda cain joachaxin, nchetjañehe na tti jianha que jehe na tenchehe na jaxon.

Co are joexin ndačo yá, jehe ndavenhe.

8

Saulo vaningaonhe chojni que vaguitticaon Jesús

¹ Co Saulo cai anto ché ixin Esteban ndavenhe.

Co xajeho nchanho que Esteban ndavenhe anto tsje chojni coexinhi joinchehe feo ngain chojni que vaguitticaon Jesús ngain Jerusalén. Co cainxin na chjequé na sacjoi na ngain ngoixin nonttehe Judea co nonttehe Samaria. Joho nirepresentanté Jesús sacjoixinha na de Jerusalén.

² Co canxion xí que anto jian vaguitticaon xa ngain Jesús cjoavá xa cuerpoe Esteban co anto tsjangaxin xa Esteban.

³ Co tiempo mé Saulo anto feo vanchehe ngain chojni que vaguitticaon ngain Jesús, hasta vaguixinhi nchiandoha na para vagantsje xí co nčhi co vaquianganji na co vaquixinhi na ngain cárcel.

Are chojni Jesús nichja tti jian joajna ngain nonttehe Samaria

⁴ Pero chojni que vachjexin de Jerusalén, ngoixin tti vacji na, vandache na icha chojni tti joajna que danjo iná vida naroa.

⁵ Ná de jehe na que vachjexin de Jerusalén vinhi Felipe, co jehe cjoí ngain ná rajna nonttehe Samaria co coexinhi ndache chojni nntiha de ixin Cristo.

⁶ Co chojni nntiha vaquinhí na jian tti vandačo Felipe. Co jehe na vaguicon na cain milagro que jehe vanchehe conixin joachaxin Dios,

⁷ Ixin tsje chojni que vechonda espíritu jianha vagačhjehe na cain tti jianha mé, co espíritu jianha mé vacoyao are vagačhjexin de ngain na. Co tsje chojni que čhoha vaquingui co chojni que čhoha vacji cai vacoxoenhe na.

⁸ Mexinxin ngain rajna mé chojni anto vaché na.

⁹ Pero nntiha cai vehe ná xí que vinhi Simón. Icha saho jehe xa vehe xa ná ttoso ngain rajna mé, co jehe xa vanchejehe xa co vanchexaon xa chojni nntiha ngain nonttehe Samaria. Co vandačo xa ixin jehe xa ná chojni anto importante.

¹⁰ Niyeye co ninchinnchin, cainxin na anto jian vaquinhí na tti vandačo xí mé co vandačo na:

—Xí yá tti chonda jie joachaxín Dios.

¹¹ Co cain na anto vaquinhí na tti vandácho xí mé ixin jehe xa vancheyehe xa na conixin joattosohe xa anto sé tiempo.

¹² Pero are Felipe ndache na tti jian joajna de ixin que xén Dios ttetonha co de ixin nombré Jesucristo, are jehe nichja jañá, anto tsje chojni, xí co nchí vitticaon na co joiguite na.

¹³ Co cai Simón vitticaon co joiguite. Cottimeja jehe vacao Felipe. Co anto vagoan admirado are vicon tsje milagro co señal que vanchehe chojni Jesucristo.

¹⁴ Are mé cain nirepresentanté Jesús xa vintte na Jerusalén. Co are jehe na conohe na ixin chojni Samaria vitticaon na joajné Dios, rroanha na Pedro co Juan nttiha.

¹⁵ Co are cayoi nimé joihi na nttiha, joinchetsenhe na ñao Dios que jehe rrorroanha Espiritu Santo ngain chojni que vitticaon Jesús nttiha Samaria

¹⁶ ixin xa joiha Espiritu Santo conixin joachaxin ngain ni ná na, ixin jecho joiguite na de ngain nombré Jesús.

¹⁷ Cottimeja Pedro co Juan coín rá ngataha já na co jañá joí Espiritu Santo ngain na conixin joachaxin.

¹⁸ Co are Simón vicon ixin Espiritu Santo tti ngain chojni are nirepresentanté Jesús vaquín rá na ngataha já na, jehe joinchenttoxinhi na tomi

¹⁹ co ndácho:

—Chjana ra janha joachaxin yá cai, para que are janha cai tsín rana ngataha já quexeho chojni, Espiritu Santo tsí ngain jehe na conixin joachaxin.

²⁰ Cottimeja Pedro ndácho ngain:

—Dios sinttatján jaha conixin tomia cai ixin jaha xaxaon que tti danjo Dios nchao sina conixin tomi.

²¹ Jaha jiquininxinha sinchehe xa jhi ixin ansean jeha jian ngain Dios.

²² Ttendoenhe ñao cosa jianha jhi, co nchetsenhe ñao Dios para ver si jañá sinttatjañaha tti jaha xaxaon ngain ansean.

²³ Janha chonxin ixin jaha anto tonchjoaha co ansean jianha, co cain cosa jianha yá tti tanhchandaha jaha para ttinxin tti jian.

²⁴ Cottimeja Simón ndácho:

—Nchetsenhe ra ñao Dios para ixin janha para xonhi tsonna de ixin tti jaha ra ndachjenji ni ra.

²⁵ Cottimeja Pedro co Juan ndache chojni nttiha quehe joinchehe Jesús are vacao na. Co cai jehe na nichja na palabré Dios. Cottimeja sacjan na para Jerusalén, co are ngatja nttiha, nichja na tti jian joajné Jesucristo ngain tsje rajna ngain nonttehe Samaria.

Felipe co ná xí de Etiopía

²⁶ Are joexin cain yá, ná ángel Dios, tti chonda cain joachaxin, ndácho ngain Felipe:

—Dingattjen co sadingajin ngain nttiha que xincajinxin de Jerusalén para Gaza.

Nttiha mé datto ntia lugar tti xonhi chojni te.

²⁷ Felipe vingattjen co sacjoi. Co ngatja nttiha mé vetanxin ná xí de nación que dinhi Etiopía. Xí mé vechonda xa tsje joachaxin ngain nchí que vaquetonhe nación mé. Co nchí mé vinhi ncha Candace. Xí mé tti venda cain tomí co cosé nchí mé. Co jehe xa cjoí ná xí eunuco ixin xonhi chjan vechonda ni xonhi nchí vecao xa. Dici xa ngain Jerusalén para joinchesayehe xa Dios.

²⁸ Co nchanho mé sajicjan xa para ngain nonttehe xa jingá xa carro que ttinganji conxin co jitjao xa xón que dicjin profeta Isaías.

²⁹ Cottimeja Espiritu Santo ndácho ngain Felipe:

—Tonchienenhe tti jí carro jiha co tato tti jidicao carro.

³⁰ Co are Felipe conchienenhe nttiha, coinhi ixin xí mé jitjao xa xón que dicjin Isaías. Felipe joanchiangui ngain xa co ndácho:

—¿Attinxin quehe rrocho xón que rritjao?

³¹ Co xí mé ndácho xa:

—¿Que xén janha tsianxin, si xonhi quensen ndachjenji na quehe rrocho?

Cottimeja joinchetsenhe xa ñao Felipe ixin tsani carro mé co sehe ngaca xa.

³² Co tti parte de tti jitaxin Palabré Dios que jitjao xa, mé ndácho:

Joicao na joigoen na inchin are doen na ná coleco, jamé savicao na jehe.

Co jamé inchin corregochjan tencoa va are cjinhi na va,

jamé jehe cai conxireha rroha.

³³ Icha chojni cjoanoa na jehe co anto feo joinchehe na ngain masqui xonhi tiempo jehe joinchehe cosa jianha.

Co de chojni jehe, ¿quensen nchao rronichja?

Ixin jehe na nagoenxon na are jehe vehe ngataha nontte jhi.

- ³⁴ Co xí mé joanchianguihi xa Felipe co ndaço xa:
—Ndachjenji na nttatsanha ñao, ¿de ixin quensen ndaço Isaías? ¿Ade ixin jehe o de ixin iná chojni?
- ³⁵ Cottimeja Felipe coexinxin nichja de ixin lugar de Palabré Dios tti jitjao xí mé. Cottimeja jehe ndaço ngain xa tti jian joajné Jesús.
- ³⁶ Co are jidattocaho xa ngain ná lugar tti jí jinda, ndaço xa ngain Felipe:
—Ntthi jí jinda. ¿Açhoha siguittexin na ntthi?
- ³⁷ Felipe ndaço ngain xa:
—Si ndoa ditticaon jaha, nchao.
Co jehe xa ndaço xa:
—Ditticanho que Jesucristo ján Xenhe Dios.
- ³⁸ Cottimeja xí mé coetonha xa ixin coengattjen na carro mé, co cayoxin na vania na co sacjoi na para ngain jinda; co Felipe joincheguitte xí mé.
- ³⁹ Co are vachjenguixin na de jinda, Espíritu Santo que Jesús rroanha sajoicao Felipe. Co xí mé icjanha xa vicon xa Felipe, pero sacjoi xa noxon ntthi jiyá xa co anto ché xa.
- ⁴⁰ Co rato mé Felipe çago ngain rajna que dinhi Azoto, co sacjoi de rajna co rajna para ndache chojni tti jian joajna hasta joiji ngain ciudad de Cesarea.

9

*Quexén Saulo coexinhi vitticaon ngain Jesús
(Hechos 22.6-16; 26.12-18)*

- ¹ Co tiempo mé Saulo ça anto feo vanchehe ngain chojni que vaguitticaon Jesús, tti chonda cain joachaxin. Co jehe vanchexaon de narrogoenxon cain na. Mexinxin joitsjehe xidána icha importanta
- ² para joanchiehe xa carta que chjé jehe joachaxin para rrocjixin ngain ningoe ciudad de Damasco para rrocjé cainxin chojni que vaguitticaon tti jian joajné Jesús co para rotse na co sarrojicao na cain na, xí co nthí para ngain Jerusalén.
- ³ Pero are ngatja ntthi, ochiaon ngain ciudad de Damasco, vingasantte ná çohi que joixin de ngajni ngá ntthi tti jittji.
- ⁴ Cottimeja Saulo vetsinga ngataha nontte co coinhi tté Jesús que ndaço:
—Saulo, Saulo, ¿quedonda ningaconna co feo nchena?
- ⁵ Cottimeja Saulo joanchiangui co ndaço:
—¿Quensen soixin?
Co tté mé ndaço:
—Janha Jesús tti jaha ningaconhe co feo nchehe ngain. Pero jaho rritoniha ixin jaha inchin coxintá are çantoe va con garrocha.
- ⁶ Cottimeja Saulo jixanga de joaxaon co ndaço:
—¿Quehe rinao soixin que janha sinttaha?
Co Jesús ndaço:
—Dingattjen co tti ciudad de Damasco, co ntthi jí chojni que rrondattjo quehe chonda que sinchehe jaha.
- ⁷ Co cain xí que joicao Saulo tavinttetsjecoa xa ixin coinhi xa tti jinichja pero çonhi quensen vintteguicon xa.
- ⁸ Cottimeja vingattjen Saulo de ngataha nontte, pero are conxiré jmacon içhoja vicon ixin ndacochejo. Mexinxin tsehe na rá co sajoicao na ngain ciudad de Damasco.
- ⁹ Are joiji na Damasco, Saulo viconha ngoixin ní nchanho, co ngoixin nchanho mé çonhi joine ní çonhi vihi.
- ¹⁰ Co ngain Damasco vehe ná xí vinhi Ananías co xí mé vaguitticaon xa Jesús. Co jehe xí mé cononxinhi xa Jesús, co Jesús ndaço:
—¡Ananías!
Co jehe ndaço:
—Ntthi rrihi. ¿Quehe rinao, soixin?
- ¹¹ Cottimeja Jesús ndaço:
—Dingattjen co sattji ngain tti ntthi dinhi Nao. Co are saso ngain nchiandoha Judas, danchiangui de ixin ná xí que joixin Tarso, dinhi Saulo. Co xí mé jincheoanxinna xa janha jaxon.
- ¹² Co jehe xa cononxinhi xa co vicon xa ná xí dinhi Ananías jitonchienhe ngain xa co ttín rá ngataha já xa para nchao rrocjan xa sicon xa.
- ¹³ Are Ananías coinhi cain yá, ndaço:
—Soixin, tsje chojni ndachjenji na de ixin xí yá co de ixin cainxin cosa jianha que joinchehe xa ngain chojni que ditticaon soixin ngain ciudad de Jerusalén.

¹⁴ Co jai jói xa nttihi conixin joachaxín xidána que ttetonha ngain icha xidána para rrotse xa cain chojni nttihi que nichja jian de ixin soixin.

¹⁵ Pero Jesús ndacho ngain:

—Sattji ixin janha coincia xí mé para rronichja xa de ixin janha ngain chojni de icha nación co ngain cain rey de cain nación co ngain chojni Israel cai.

¹⁶ Janha tsjagoa xa cain cosa tangui que chonda que tsonhe xa ixin jehe xa sitticaon na xa janha.

¹⁷ Cottimeja Ananías sacjoi para ngain nchia tti vehe Saulo. Co are jehe joixinhi nchia mé, jehe coín rá ngataha já Saulo, co ndacho ngain:

—Hermano Saulo, Jesús, tti chonda cain joachaxin, tti nichjaha jaha ngatja nttiha, mé tti coetonna para joihi nttihi para que jaha nchao sicon iná co para que Espiritu Santo tsí nganji jaha conixin tsje joachaxin.

¹⁸ Co rato mé vinttjixin de ngain jmacon Saulo nchin cosa inchin jochochjenhe copescado, co Saulo onchao vicon iná. Cottimeja Saulo vingattjen co joiguite.

¹⁹ Cottimeja joine co cjan vechonda fuerza iná. Co nttiha vehe ngain ciudad de Damasco canxion nchanho ngain chojni que vaguitticaon Jesús nttiha.

Are Saulo nichjé chojni ngain ciudad de Damasco de ixin Cristo

²⁰ Saulo toin coexinhi nichja ngain cain ningoe chojni judío co ndacho ixin Jesús ján tti Xenhe Dios.

²¹ Cain chojni que vaquinhí tti vandacho Saulo vagoan na admirado, co vandacho na:

—¿Ajeha xí jilhi tti vanchehe feo ngain chojni ngain ciudad de Jerusalén que vaguitticaon Jesús? Co ¿ajeha xí jilhi tti jói nttihi cai para ixin rrotse xa cain chojni que ditticaon Jesús co para ixin sasicao xa na para sinchechienhe xa na ngain xidána que ttetonha ngain icha xidána?

²² Pero Saulo icha vañaonha para vanichja, co cjoagoe na conixin tti Xón que jitaxin Palabré Dios que ixin Jesús jehe tti Cristo, hasta chojni judío que vintte ciudad de Damasco vinttegoan na admirado ixin Saulo oditticaon ngain Cristo.

Are Saulo saccoinguehe chojni judío

²³ Cottimeja vatto tsje nchanho, co chojni judío vinttendache chó na para rrogoen na Saulo.

²⁴ Pero Saulo conohe que cjoao chó na ixin rrogoen na co ixin nchanho co ttie vachonhe na Saulo ngain cain lugar tti dačhjexin chojni de ngain ciudad ixin rrogoen na.

²⁵ Pero chojni que vaguitticaon Jesús, chojni mé ngá ná ntaña jie coengaha na Saulo co ná ttie vantsje na ngadoxin ná ventané ttjariho co joinchegania na Saulo para nontte. Ttjariho mé vehe ttjario ngoixin ngandehe ciudad mé, co jamé jehe nchao saccoinga.

Are Saulo vehe ngain Jerusalén

²⁶ Are Saulo joihi Jerusalén, jinao coato chojni que vaguitticaon Jesús, pero cainxin na vañagoen na ixin jehe na vitticaonha na ixin Saulo ovitticaon Jesús.

²⁷ Masqui jamé, Bernabé joicao jehe ngain nirepresentanté Jesús. Co Bernabé ndache na ixin ngatja nttiha Saulo vicon Jesús, tti chonda cain joachaxin, co ixin Jesús nichja ngain, co ixin después de mé Saulo nichja sin joañaon ngain ciudad de Damasco conixin nombré co joachaxín Jesús.

²⁸ Co Saulo vittohe canxion nchanho ngain Jerusalén co vacao nirepresentanté Jesús.

²⁹ Jehe vañaonha para vanichja conixin nombré co joachaxín Jesús, tti chonda cain joachaxin, co cjoao chojni judío que vanichja na nguigoa griego. Pero chojni mé jinao na rrogoen na Saulo.

³⁰ Co are chojni que vaguitticaon Jesús coinhi na cainxin mé, savicao na Saulo ngain ciudad de Cesarea. Co de nttiha rroanha na ngain ciudad de Tarso.

³¹ Cottimeja cain chojni Jesús vajinao chó na, co vaquetocaoha chó na ngain ngoixin nonttehe Judea, nonttehe Galilea, co ngoi nonttehe Samaria. Co coangui na icha co icha de ixin Dios. Cainxin na vanchehe na cainxin cosa inchin jinao Jesús, tti chonda cain joachaxin. Co Espiritu Santo cjoenguina na para que xatte icha tsje chojni.

Are Eneas coxoehne

³² Pedro ngaria rajna co rajna para vaguistsjehe chojni que vaguitticaon Jesús. Co ná de nchanho mé sajoistsjehe nivintte rajna Lida.

³³ Nttiha vetan ná xí vinhi Eneas que venihi co vetsinga jni nano vaquinguiha.

³⁴ Co Pedro ndache:

—Eneas, Jesucristo sinttañoanha. Dingattjen co datsín caniaha.

Co rato mé vingattjen Eneas.

³⁵ Co cainxin chojni que vintte ngain rajna Lida co ngain nontte Sarón vicon na quehe conhe tti Eneas. Co cainxin chojni mé coentoxinhi na vidé na co vitticaon na Jesús, tti chonda cain joachaxin.

Are xechon nanita vinhi Dorcas

³⁶ Co tiempo mé vehe ngain ciudad de Jope ná nanita vinhi Tabita que vaguitticaon Jesús. Co ngain nguigoa griego nanita mé vinhi Dorcas. Ngoixin vidé jehe vanchehe cosa jian co vacjenguijna chojni noa.

³⁷ Co are Pedro vehe ngain rajna Lida, conihi nanita mé co ndavenhe. Cottimeja joinchetsinda na cuerpoe co vaguehe na ngain ná cuarto noi.

³⁸ Jope vehe chiaon rajna Lida, co chojni que vaguitticaon Jesús ngain Jope conohe na ixin Pedro vehe ngain rajna Lida. Mexinxin rroanha na yó xí ngain Pedro co xí mé ndačo xa ngain:

—Chjin na toin para rajnana na.

³⁹ Cottimeja Pedro sacjoi ngain na. Co are joihi na nchiandoha nanita, savicao na Pedro ngain cuarto tti jí cuerpoe. Co cainxin nchiganha víxin ndaji na co tsjanga ncha co cjoago ncha lonto que Dorcas vanchechjian are vechon.

⁴⁰ Cottimeja Pedro vantsje cain na. Co jehe vettoxin nntajochjihi co joinchecoanxinhi Dios. Cottimeja tsjehe nanita ndadiguenhe, co ndache:

—Tabita, dingattjen.

Cottimeja jehe nanita mé conxiré jmacon. Co are vicon nanita mé Pedro, xendoa co tavehe.

⁴¹ Cottimeja Pedro tsehe rá co joinchengattjen. Vayé cainxin chojni que vaguitticaon Jesús, conixin nchiganha cai, co cjoagoe na nanita jichon nanita.

⁴² Cosa jihi conohe na ngoixin ciudad de Jope co tsje chojni vitticaon na ngain Jesús, tti chonda cain joachaxin.

⁴³ Co Pedro vittohe canxion nchanho ngain ciudad mé ngain nchiandoha ná tti vinhi Simón que vagatse roé coxigo.

10

Pedro co Cornelio

¹ Co tiempo mé vehe ná xí vinhi Cornelio ngain ciudad de Cesarea. Co xí mé vehe xa capitán ngain ná grupo de cien xisoldado. Co grupo mé vinhi Italiano.

² Cornelio jeha judío, pero masqui jamé, jehe conixin nindoha anto vanchesayehe na Dios, co vanchehe na inchin joinao Dios. Co cai, jehe vaganjo tsje tomi ngain chojni judío noa. Co cainxin nchanho vanchecoanxinhi Dios.

³ Co ná nchanho inchin ní hora tsocjin jehe Cornelio vicononxinhi jian ná ángel Dios. Co ángel mé joi tti jí Cornelio co ndache:

—¡Cornelio!

⁴ Jehe Cornelio tavetsjecoa tti ángel co anto xaon. Cottimeja joanchiangui co ndačo:

—¿Quehe rinao soixin?

Cottimeja ángel mé ndache:

—Dios ján joinchehe caso tti jaha nchecoanxinhi nanao co ixin tti jaha ttjenguijna cain ninoa.

⁵ Mexinxin rroanha jaha canxion xí ngain ciudad de Jope para tsiaho na ná xí dinhi Simón co xí mé dinhi xa Pedro cai.

⁶ Jehe xa jí xa ngain nchiandoha iná tti xí dinhi Simón, pero mé datse roé co, co nchiandoha jí nchia chiaon chica ndachaon. Co Simón Pedro rronattjo quehe chonda que sinchehe.

⁷ Cottimeja sacjoi tti ángel nichjé, co Cornelio vayé yó ninchehe xé co ná xisoldadoe que vaguitticaon Dios cai. Co Cornelio vechondehe xisoldado mé confianza.

⁸ Co coequín na cainxin tti conhe. Cottimeja Cornelio rroanha na para Jope.

⁹ Nchanho yoxin are satettji ninchehe xé co xisoldadoe Cornelio co are ochiaon ciudad de Jope, Pedro cjoi ngataha nchia tti vehe inchin ngosine nchanho para joinchecoanxinhi Dios.

¹⁰ Co anto venhe jintta co joinao rrojine. Ngoixin tenchechjian na tti rrojine, jehe Pedro vicononxinhi tsje cosa que cjoagoe Dios.

¹¹ Vicon ngajni xiré co xincanji ná cosa inchin ná manta jie jitte canoi esquiné.

¹² Ngá manta mé vehe cain coxigo que chonda nó rotté, conché, co conttoa.

¹³ Cottimeja coinhi tté Dios que ndačo:

—Pedro, dingattjen, donhe quexeho co rinao co jintte va.

¹⁴ Pero Pedro ndačo:

—Nahi, soixin, xonhi tiempo janha joine cosa ttjoaha co ley Israel jitaxin ixin coxigo mé ttjoaha va.

¹⁵ Cottimeja Dios nichjé iná co ndačo:

—Cosa que Dios joincheroa, jaha čhoha rrondačo ixin ttjoaha.

¹⁶ Jihi conhe ní ntthi, cottimeja sacjan manta mé para ngajni.

¹⁷ Are Pedro jixaxaon ixin quehe rročo tti vicon, ninchehe xé co xisoldadoe Cornelio ttinga tedanchiangui na ixin ttinó jí nchiandoha Simón co ojoiji na ngain puerté nchia.

¹⁸ Cottimeja joanchiangui na sén ixin antthi jí ná tti dinhi Simón co cai dinhi Pedro.

¹⁹ Co Pedro xa jixaxaon ixin tti vicon are Espiritu Santo ndache:

—Tsjexin, ní xí tedanchiangui xa ixin jaha.

²⁰ Dingattjen co dania co nchedudaha de sattjiho xa ixin janha rroanha chojni rá.

²¹ Cottimeja Pedro vania tti te chojni rroanha Cornelio, co Pedro ndache na:

—Janha tti tettjé ra. ¿Quehe rinao ra?

²² Jehe na ndačo na:

—Coetonna na ná xicapitán dinhi Cornelio. Jehe ná xí jian que ditticaon Dios co cainxin chojni judío chondehe na respeto co rinao na xa. Mé ná ángel de Dios jói co ndačo ngain xa ixin rrorroanha xa joajna para que soixin tsji ndoha xa co jehe xa tsinhi xa tti soixin rrondache xa.

²³ Cottimeja Pedro ndache na para vixinhi na nchia. Co ttie mé vittohe na ntthi. Nchanho yoxin Pedro sajoicao na conixin icanxin chojni que vaguitticaon Jesús que vintte ciudad de Jope.

²⁴ Ndoexin joiji na ciudad de Cesarea. Ntthi Cornelio joichonhe conixin nindoha co chojni que navacaoxon, cain nimé vayé Cornelio para que chonhe na nijorroé Pedro.

²⁵ Are Pedro joiji nchiandoha, Cornelio vachje para chjé joajna co vettoxin nttajochjihi para rrojinchesayehe.

²⁶ Pero Pedro joinchengattjen co ndache:

—Dingattjen. Caixon janha ná xí na inchin jaha.

²⁷ Co are jehe na nichjé chó na, joixincaho chó na nchia, co ntthi dixejo tsje chojni.

²⁸ Cottimeja Pedro ndache na:

—Jaha ra noha ra ixin chojni judío čhoha xatte ngain chojni jé ni dixinha nchiandoha na. Pero Dios cjoagohna janha ixin irrondachjanha ixin xonhi chojni o cosa ttjoaha.

²⁹ Mexinxin are joiji chojni que jaha ra rroanha ra, toin sajoihi co xonhi joanchiangui na. Mexinxin, jaxon rinaho tsonona quedonda vayahna ni ra.

³⁰ Cottimeja Cornelio joattehe:

—Jai vittja nó nchanho janha ntthi nchiania jointtacoaxian Dios are otsocjin, co hora mé xa joineha ixin jointtasayá Dios. Are mé vicon ná xí que jingá ná lontto jidaquin.

³¹ Co xí mé ndachjenji na xa: “Cornelio, Dios coinhi ixin jaha nichjehe co xaxaon tti nchehe jaha para ttjenguijna cain chojni noa.

³² Mexinxin rroanha jaha joajna ciudad de Jope para tsí Simón, tti xí que dinhi Pedro cai. Xí mé jí xa ndoha iná tti dinhi Simón, pero mé datse roé co, co nchiandoha jí nchia chiaon čhica ndachaon. Are tsí Simón Pedro, jehe rronichjaha jaha.”

³³ Co jaňá janha rroanha joajna jaicoa para joicjé na co anto nchao ixin jaha joihi daca. Dios jitsjehe ixin cain na te na ntthi co rinaho na tsian na cainxin cosa que jehe coetonna jaha para rrondachjenji ni ra.

Tti ndačo Pedro ngaxinhi nchiandoha Cornelio

³⁴ Cottimeja Pedro coexinhi nichja co ndačo:

—Jai ttianxin que ndoa Dios rinao cainxin chojni, masqui ojé chojni, pero para ixin jehe cainxin na xajeho na.

³⁵ Dios čhoha sinchejé chojni que joixin iná nontte, sino que Dios rinao cainxin chojni que nchesayehe jehe co nchehe jian.

³⁶ Dios rroanha Jesucristo ngagué chojni Israel para que Jesucristo, tti chonda joachaxin para cainxin chojni, nichja tti jian joajna que ndačo ixin Dios itoňaoha ngain chojni.

³⁷ Co jaha ra anto jian noha ra quehe joinchehe Jesucristo ngain nonttehe chojni judío. Co jehe coexinhi joinchehe xé ngain regioen Galilea después de que Juan joexin nichjé co joincheguitte chojni.

³⁸ Co noha ra quexén Dios joanjo joachaxin Espiritu Santo ngain Jesús que joixin rajna Nazaret co quexén Jesús vangaria co joinchehe jian co joinchexingamehe cainxin chojni que vaguetan tangui de ixin tti jianha que vanchehe inchínji ngain. Jaňá vanchehe Jesús ixin Dios jí ngain.

³⁹ Co janha na vicon na cainxin tti vanchehe Jesús ngain nonttehe Judea co ngain ciudad de Jerusalén. Cottimeja goen na are coenganito na nttacruz.

⁴⁰ Pero nchanho nixin Dios joinchexechon Jesús co Dios cjoagohna na ixin ján xechon Jesús.

⁴¹ Cainxinha chojni vicon Jesús, jeha janha na vicon na ixin Dios coinchiehna na desde are saho para ixin rronichja na ngain icha chojni. Janha na joinequinha na Jesús co viquinha na Jesús después de xechon.

⁴² Co Jesús coetonna na que rronhattjan na icha chojni ixin Dios coinchiehe Jesús para sehe Juez ngain chojni techon co ngain chojni ndavintteguene.

⁴³ Co anto saho que Jesús jói ngataha nontte jiji, cainxin profeté Dios vandačo ixin cainxin chojni que ditticaon Jesús, Dios nchetjañehe na cainxin cosa jianha que nchehe na conixin nombré co joachaxín Jesús.

Are Espíritu Santo jói ngain chojni que jeha judío

⁴⁴ Xa jinchja Pedro are jói Espíritu Santo ngain cainxin chojni que jittinhi joajné Pedro.

⁴⁵ Co chojni judío que vaguitticaon Jesús co joixin ciudad de Jope conixin Pedro vintegoan na admirado ixin Espíritu Santo jói cai ngain chojni que jeha judío.

⁴⁶ Ixin coinhi na ojé nguigoa jinchja chojni mé co cai joinchesayehe na Dios.

⁴⁷ Cottimeja Pedro ndačo:

—Espíritu Santo jói ngain na conixin joachaxin inchin jói nganji na janha na. Mexinxin, ¿ají ná chojni que rročhohe ixin jeha na siguitte na?

⁴⁸ Co Pedro coetonha ixin joiguitte na ngain nombré Jesucristo. Cottimeja chojni de Cesarea joinchetsenhe na ñao Pedro ixin sittohe ngain na icanxin nchanho.

11

Tti joinchenohe Pedro cain chojni que vaguitticaon Jesús ngain Jerusalén

¹ Nirepresentanté Jesús conixin icha chojni que vaguitticaon Jesús que vintte na nonttehe Judea, chojni mé coinhi ixin chojni que jeha judío cai vitticaon joajné Dios.

² Co are Pedro jói ngain ciudad de Jerusalén, chojni que vandačo ixin cai chojni que jeha judío chonda na que sitticaon na ngain circuncisión co ngain icha costumbre chojni judío are ditticaon na ngain Jesucristo, chojni que vandačo jañá nichja na feo de ixin Pedro.

³ Co joanchianguihi na Pedro co ndačo na:

—¿Quedonda joitsjehe co jointtecho chojni que jeha judío?

⁴ Cottimeja Pedro coequín na cainxin lo que conhe co ndačo:

⁵ —Are janha tarrhi ciudad de Jope co are rrinttaoanxian Dios, vicononxinna ná cosa inchin ná manta jie que xincanjinxin de ngain co jitte canoi esquiné co jói hasta tti janha rrihi.

⁶ Co are janha vicon jian ngaxinhi manta mé, vicon anto tsje coxigo que chonda nó rotté, coxigo chintto, conché, co conttoa.

⁷ Co coian tté Dios que ndachjenji na: “Pedro, dingattjen, donhe va co jintte va.”

⁸ Pero janha ndachjan: “Nahi, soixin. Xonhi tiempo janha joine cosa ttjoaha, co ley Israel jittaxin ixin coxigo yá ttjoaha.”

⁹ Cottimeja tté Dios nichjahna iná co ndachjenji na: “Cosa que Dios joincheroa, jaha čhoha rrondačo ixin ttjoaha.”

¹⁰ Jiji conhe ní nttiha, cottimeja sacjan cainxin mé para ngaini.

¹¹ Rato mé joiji ní xí ngain tti nchia joarihi. Vinttequixin xa ciudad de Cesarea ixin joicjé na xa.

¹² Co Espíritu Santo coetonna ixin sacjoinha xa co nchao jointtaha para sacjoinha xa. Cai cjoinha incjaon nitehe tti niditticaon Jesús. Co cain na joixinhi na nchiandoha Cornelio.

¹³ Xí mé coequinna na xa ixin quežén vicon xa ná ángel tajangattjen ngaxinhi nchiandoha xa co ndache xa: “Rroanha joajna ngain ciudad de Jope ixin tsi Simón tti dinhi Pedro cai.

¹⁴ Co jeha rronhattjo quežén jaha co cainxin nindoí nchao rrochonda ra iná vida naroa que xonhi tiempo tsjexin.”

¹⁵ Co are janha coexian nichjá na, Espíritu Santo ojoí ngain na conixin tsje joachaxin inchin are jói nganji na ján na are saho.

¹⁶ Cottimeja xaxanho tti ndachjenji na Jesús, tti chonda cain joachaxin; jeha ndačo: “Ndoa que Juan joincheguittexin ní conixin jinda, pero jaha ra siguittexin ra conixin Espíritu Santo.”

¹⁷ Jañá Dios rroanha Espíritu Santo ngain jeha na inchin rroanha nganji ján na are coexinhi na votticaon na Jesucristo, tti chonda cain joachaxin. Mexinxin si Dios joinchehe jamé, janha čhoha ndachjan nahi.

¹⁸ Cottimeja are chojni que vaguitticaon Jesús que vintte na ciudad de Jerusalén coinhi na yá, inichjaha na feo de ixin Pedro, co vitticaon na ixin Dios anto jian co ndačo na:

—¡Caixon Dios chjé chojni que jeha judío joachaxin para ttentoxinhi na vidé na co para rrochonda na iná vida naraa que xonhi tiempo tsjexin!

Chojni que vaguitticaon Jesús ngain ciudad de Antioquía

¹⁹ Are saho are nagoenxon na Esteban, are mé, coexinhi na anto feo joinchehe na ngain icha chojni que vaguitticaon Jesús. Co tsje chojni que vaguitticaon Jesús chonda que sacoiinga na hasta tti ngain nonttehe Fenicia co ngain nontte ngosine ndachaon dinhi Chipre co cai ngain ciudad de Antioquía. Ntliha nichja na tti jian joajna pero jeha ngain chojni judío co ngain icha chojni nahi.

²⁰ Pero canxion nivaguitticaon Jesús que joixin nontte ngosine ndachaon dinhi Chipre co rajna Cirene, chojni mé joiji na ciudad de Antioquía co ndache na chojni que jeha judío tti jian joajna de ixin Jesús, tti chonda cain joachaxin.

²¹ Chonda na joachaxin jeha Jesús co jañá tsje chojni coentoxinhi na vidé na co vitticaon na Jesús, tti chonda cain joachaxin.

²² Are chojni que vaguitticaon Jesús ngain ciudad de Jerusalén, conohe cain mé, rroanha na Bernabé ngain ciudad de Antioquía.

²³ Are Bernabé joiji, jeha vicon ixin quexén Dios joinchenciaon chojni ntliha, co are vicon mé, anto ché. Jeha ndache cain na co ndaço:

—Conixin ansean rá ditticaon ra Jesús, tti chonda cain joachaxin.

²⁴ Co Bernabé ná chojni jian, co Espíritu Santo anto vaquetonha ngain co jeha anto vaguitticaon Jesús. Co jañá icha tsje chojni vitticaon Jesús por ixin Bernabé.

²⁵ Cottimeja Bernabé sacjoi para ciudad de Tarso para ixin joicjé Saulo. Co are vetan Bernabé Saulo, joicao ngain ciudad de Antioquía.

²⁶ Co vintte na ntliha ngagué chojni que vaguitticaon Jesús ngoixin ná nano co joinchecoehne na tsje chojni. Ntliha ngain ciudad de Antioquía tti saho lugar que chojni coexinhi na joincheguinihi na chojni que vaguitticaon Jesús, cristiano.

²⁷ Co tiempo mé canxion chojni que vanichja tti vagayé de ngain Dios joixin na de ngain Jerusalén co sacjoi na ngain ciudad de Antioquía.

²⁸ Co ná de chojni mé vinhi Agabo vingattjen ngagué chojni que vaguitticaon Jesús. Co Espíritu Santo cjoenguijna para conohe quehe nichja jeha co ndaço ixin tsí tiempo que ngoixin mundo seha tti sine chojni. Co jañá joiconhe después, are Claudio vehe emperador.

²⁹ Cottimeja chojni que vaguitticaon Jesús ngain ciudad de Antioquía ndache chó na ixin cjoenguijna na chojni que vaguitticaon Jesús, nite nonttehe Judea. Co naná na joanjo na según inchin chonda na.

³⁰ Co jañá joinchehe na co rroanha na Bernabé co Saulo para joicaohe na tti xí que vaquetonha chojni que vaguitticaon Jesús que vintte nonttehe Judea cain tti joatse na.

12

Are ndavenhe Jacobo co are coiaxinhi na Pedro

¹ Co tiempo mé rey Herodes coexinhi vanchehe feo ngain nivaguitticaon Jesús.

² Jeha coetonha ixin nagoenxon na Jacobo, xanchó Juan, conixin espada.

³ Co are jeha vicon ixin chojni judío joincheoxinhi yá, jeha coetonha ixin tse na Pedro. Cosa jilhi conhe ngain quiai pascua are jine na niottja que chondaha levadura.

⁴ Are tse na Pedro, coiaxinhi na ngain cárcel. Co ntliha jí nó grupo xisoldado jinda cárcel mé co cada grupo chonda nó xisoldado. Herodes xaxaon ixin are tsjexin quiai pascua, rrogantsjexin Pedro de ngain cárcel para ixin rroguicon chojni are Pedro ngain juzgado co are ndarroguenhe.

⁵ Co jañá Pedro tajiixinhi co tsje xisoldado jinda. Pero chojni que vaguitticaon Jesús nchanho co tti vanchetsenhe na ñao Dios para ixin Pedro.

Dios vantsjexin Pedro de ngain cárcel

⁶ Ttie mé co ndoexin Herodes rrogantsjexin Pedro de ngain cárcel para rrojinchejuzguehe, co tti mé Pedro tajiioa ngagué yó xisoldado co tajiixinhi yó cadena co icanxin xisoldado tenda xa cárcel ndojaxin.

⁷ Co rato mé joí ná ángel Dios co ngoixin ngaxinhi cárcel anto vingasán xóhi. Angel mé catte nttaçhén Pedro co joinchexingamehe co ndache Pedro:

—Dingattjen jaicoa.

Cottimeja cadena tti jichixin rá Pedro vinttji cadena ngataha nontte.

⁸ Co ángel mé ndache:

—Nchenttedo cinturoan co tjanga cattea.

Co are Pedro joinchehe cain yá, ángel mé ndaço ngain:

—Daritsí noxá co chjin na.

⁹ Co Pedro rroé ángel co sacjoi, masqui noeha andoa ni nahi tti jitsjehe. xaxaon ixin jitsjehe inchin are toxinxin ni.

¹⁰ Pero vatto na tti te xisoldado saho co xisoldado yoxin, co are joihi na ngain puerta chia que jixin nongaxin nttiha, xiré puerta jeha puerta. Co vachje na, co cjoí na inchin ná esquina. Cottimeja ángel cointtohe jeha Pedro.

¹¹ Cottimeja Pedro coinxin co ndacho:

—Janché onona ixin Jesús, tti chonda cain joachaxin, rroanha ná ángel co vantsjexin na de ngá rá Herodes co de ngain cainxin tti rrojinchena chojni judío.

¹² Co are Pedro xa jixaxaon de ixin cain yá, sacjoi nchiandoha María, janné Juan que cai vinhi Marcos. Co nttiha anto tsje chojni tenchetsenhe na ñao Dios.

¹³ Co are Pedro vinga puerta, vachje ná xannché vinhi Rode para joitsjehe xan quensen joí.

¹⁴ Co are coinhi xan tté Pedro, anto ché xan co xa conxireha xan puerta. Sacjan xan ttinga xan joiquetonha xan ngaxinhi ixin Pedro ngain puerta tají.

¹⁵ Cottimeja ndacho cainxin na:

—¡Ndadixenga jaha!

Co jeha xan anto ndacho xan ixin ndoa. Pero masqui jamé, jeha na ndacho na:

—Jeha jeha Pedro. Yá tti ángel que jinda Pedro.

¹⁶ Co ngoi rato mé ndoja Pedro xa jidinga puerta. Co are conxiré na puerta co vicon na Pedro, cainxin na xaon na.

¹⁷ Pero jeha joinchehe seña conixin rá para que jeha na tencoa na co coequinhi na quexén Jesús vantsjexin de ngaxinhi cárcel co ndache na:

—Ttequinhí ra cain yá Jacobo co ni icha que ditticaon Jesús.

Cottimeja vachje co sacjoi ojé lugar.

¹⁸ Co are vingasán xisoldado anto xaon xa ixin noeha xa quehe conhe conixin Pedro.

¹⁹ Herodes coetonha joicjé na pero choha vittja na. Cottimeja Herodes joanchianguihi xisoldado ixin quexén Pedro sacjoi, co coetonha nagoenxon na cainxin xisoldado mé. Cottimeja Herodes sacjoixin de nonttehe Judea co sacjoi ngain ciudad de Cesarea. Co nttiha vehe tsje nchanho.

Are ndavenhe Herodes

²⁰ Icha saho Herodes vanganjo tti vane chojni ciudad de Tiro co Sidón. Cottimeja Herodes coñao ngain chojni mé. Co jeha na cjoao chó na ixin joitsjehe na Herodes. Co jeha na joincheconvensé na Blasto, ná xinchehe xé Herodes que chonda xa tsje joachaxin, ixin ndache xa Herodes ixin itsoñaoha ngain cayoi ciudad mé.

²¹ Co Herodes coín ná nchanho para ixin coinhi tti ndacho na. Co nchanho mé vengá lonttoe rey co tavetaha ntaxintaoen tti dehe are ttetonha, co coexinhi nichja ngain cain chojni.

²² Cottimeja cainxin chojni coexinhi coyao na co ndacho na:

—¡Jeha ná xí tti jinichja! ¡jhi ná dios!

²³ Co rato mé ná ángel Jesús, tti chonda cain joachaxin, joinchehe que tse ná chin co joxon cotsindo coexinhi joine cuerpoe hasta ndavenhe jeha Herodes. Jañá conhe Herodes ixin joinao que chojni joincheguinhí na dios jeha.

²⁴ Pero icha co icha tsje chojni coinhi joajné Dios co jamé icha co icha tsje lugar chojni vitticaon na Jesús.

²⁵ Co are Bernabé co Saulo joexin joinchehe na xé na, cjanxin na de ngain ciudad de Jerusalén co joicao na Juan que vinhi Marcos cai.

13

Are Bernabé co Saulo coexinhi nichja joajné Dios ngain icha lugar

¹ Ngagué chojni que vaguitticaon Jesús ngain ciudad de Antioquía vintte canxion chojni que vagayé joajna de ngain Dios co cai vintte canxion tti joinchecoenhe chojni de ixin Dios. Chojni mé vinhi Bernabé, Simón (que vinhi cai tti Ttie), Lucio de ciudad de Cirene, Manaén (que vanguicaho Herodes tti vaquetonha ngain nonttehe Galilea), co Saulo.

² Ná nchanho are tecjáño na co tenchecoanxinhi na Jesús, tti chonda cain joachaxin, Espiritu Santo ndacho ngain na:

—Rroanha ra Bernabé co Saulo ngain tti xa que janha ochjaha na.

³ Cottimeja cjáño na co joinchecoanxinhi na Dios icha, co después coín rá ni icha ngataha já cayoi na. Cottimeja rroanha na na savinttecji na.

Bernabé co Saulo ngain nontte ngosine ndachaon dinhi Chipre

⁴ Cottimeja Bernabé co Saulo sacjoi ngain ciudad de Seleucia inchin coetonha Espíritu Santo. Co nttiha coaxin na barco que sajoicao na ngain nontte ngosine ndachaon dinhi Chipre.

⁵ Co are joihi na ciudad de Salamina, tti dengattjen barco, coexinhi na nichja na joajné Dios ngaxinhi cainxin ningoe chojni judío. Co cai joicao na Juan Marcos ixin cjoengujna na.

⁶ Joingaria na ngoixin nontte mé hasta joihi na ciudad de Pafos. Nttiha vetan na ná chojni judío que vinhi Barjesús. Co xí mé ttoso xa. Co jehe xa joincheyehe xa chojni ixin ndaço xa que nichja xa para ixin Dios.

⁷ Xittoso mé anto xiamigoe xa xigobernador que vinhi Sergio Paulo. Xigobernador mé vechonda xa jian joarriaon. Co xí mé rroanha xa joajna ixin jói Bernabé co Saulo ixin joinao xa coinhi xa joajné Dios.

⁸ Co xittoso mé, que cai vinhi xa Elimas, çhoha xa co joinaoha xa ixin xigobernador rroguitticaonxin xa tti nichja na.

⁹ Cottimeja Saulo, que cai vinhi Pablo, tavetsjehe xittoso mé jian. Co Pablo anto tsje joachaxin Espíritu Santo chonda.

¹⁰ Co jehe ndache xa:

—Jaha tti ncheyehe chojni, co jaha nchehe jianha; jaha xenhe inchínji co jaha tti ningaonhe cainxin tti jian. ¿Quedonda toncjamangui palabré Jesús, tti chonda cain joachaxin, para que chojni sitticaonha na jehe?

¹¹ Janché, jehe Jesús sinttastigá jaha co tsejé jmacon co jaha siconha canxion nchanho. Co rato mé ndaconaxinhi xa xehe. Cottimeja cjoé xa ná tti rrotse rá xa ixin idiconha xa.

¹² Co are xigobernador vicon quehe conhe jehe xittoso mé, vitticaon xa Jesús ixin jehe xa tavetsjeoa xa ixin tti cjoagoe na xa de ixin Jesús, tti chonda cain joachaxin.

Pablo co Bernabé ngain ciudad de Antioquia que jí nonttehe Pisidia

¹³ Pablo co xjoicao ngain ciudad de Pafos nttiha coaxin na barco co sacjoi na ngain ciudad de Perge ngain nonttehe Panfilia. Pero Juan Marcos cointtohe na co sacjan ngain ciudad de Jerusalén.

¹⁴ Cottimeja jehe na sacjoixin na de ngain ciudad de Perge co sacjoi na ciudad de Antioquia que jí ngain nonttehe Pisidia. Co nttiha are nchanho que nchejogaha na, joixinhi na ningoe chojni judío co tavintte na.

¹⁵ Cottimeja are xivaquetonhe nihngo mé joexin tsjehe xa çón que jitaxin ley que vayé Moisés co çón que jitaxin tti dicjin profeté Dios, xí mé rroanha xa joajna ngain na co ndaço xa:

—Si jaha ra noha ra çhoan palabra jian para ixin chojni nttihi, nchao nichja ra jaxon.

¹⁶ Cottimeja Pablo vingattjen co joatsín rá para ixin chojni rrotencia na co ndaço:

—Tsjexin ra jaha ra chojni Israel co jaha ra que çagonhe ra Dios.

¹⁷ Dios de chojni Israel coinchiehe ndogelitoa na çançhjen co jehe cjoengujna na para anto cotsje na are ça vintte na nonttehe Egipto. Co después Dios vantsjexin na de nttiha conixin joachaxin.

¹⁸ Co Dios anto venda cainxin chojni mé ngoixin cuarenta nano ngagaha jna, masqui jehe na antoha jian vaguitticaon na ngain Dios.

¹⁹ Cottimeja Dios conxantte yáto nación que vintte ngain nonttehe Canaán. Co cainxin nontte mé joanjo Dios ngain ndogelitoa na çançhjen para inchin cuatrocientos cincuenta nano.

²⁰ Co ngoixin tiempo mé Dios coinchiehe tsje xijuez para coetonhe chojni mé hasta are jói profeta que vinhi Samuel.

²¹ Cottimeja chojni Israel joinchetsenhe na ñao Dios para que ná xirey rroquetonha ngain na. Mexinxin Dios joanjo ná xí vinhi Saúl, xenhe Cís, co mé ná xanntí ndogelitoa na çançhjen que vinhi Benjamín. Co xí mé vehe rey ngoixin cuarenta nano.

²² Cottimeja Dios joantsjehe Saúl joachaxin de rey, co çhé David joachaxin de rey. Co Dios ndaço de ixin David: “David, tti xenhe Isai, ná xí que janha anto ncheçoxinna co jehe sinchehe cainxin tti janha rinaho.”

²³ Jesús vehe ná xannti çançhjen de David mé co Dios rroanha Jesús para danjo chojni Israel iná vida naroa que çonhi tiempo tsjexin, inchin jehe ndaço are saho.

²⁴ Icha saho que Jesús jói, Juan vanichjé cainxin chojni Israel co ndache na ixin chonda na que tsentoxinhi na vidé na co siguitte na.

²⁵ Co are Juan chiaon jittjexin vidé, ndaço: “Janha jaha tti jaha ra çaxaon ra. Co después de janha, tsí ná tti rrochonda anto tsje joachaxin co janha jiquininxinha na ni para sisehe tsonxindangá corrié catté.”

²⁶ Hermanos, joajné Dios tti danjo iná vida naroaxin, mé para ixin jaha ra xó xanntti xanchjen de Abraham co jaha ra xó xagonhe ra Dios.

²⁷ Chojni que vintte ciudad de Jerusalén co xivaquetonhe chojni joinoeha na quensen Jesús co ni vaquinxinha na tti vacjin profeté Dios masqui vatsjehe na xón mé ngaxinhi ningoe na cada nchanho que nchejogaha na. Pero masqui jamé, are ndache chó na ixin nagoenxon na Jesús, jañá joinchehe na inchin ondačo profeté Dios icha saho.

²⁸ Co masqui chondaha na razón para nasoenxon na Jesús, pero joinchetsenhe na ñao Pilato ixin rrorroanha xisoldado para nasoenxon xa Jesús.

²⁹ Mexinxin are joexin goen xa Jesús inchin jitaxin ngain Palabré Dios, chojni jehe joinchegania na de nganito cruz co cjoavá na.

³⁰ Pero Dios joinchexechon jehe Jesús.

³¹ Co para tsje nchanho Jesús xago ngain chojni que vacao are joixin nonttehe Galilea co sacjoi ngain ciudad de Jerusalén. Co chojni mé tti ndache icha chojni de ixin Jesús jai.

³² Co jañá janha na tenichja na tti jian joajna de ixin tti ndačo Dios ngain nindogelitoa na xanchjen are saho.

³³ Co ján na xanntti xanchjen na de nindogelitoa na. Mexinxin jai Dios ojoinchexechon Jesús. Co jehe Dios joinchehe mé para ixin ján na inchin jehe ndačo ngain yoxin Salmo sé tiempo vatto. Co Salmo mé ndačo: “Jaha Xanhna. Co janha chjaha vida jai.”

³⁴ Co cai are saho Dios cjoago ixin rrojoinchexechon Jesús para que rrorrengaha cuerpoe are ndačo ngain Palabré Dios: “Janha sinttanchaon jaha ra inchin ndattjan David.”

³⁵ Mexinxin cai ndačo ngain iná Salmo: “Co soixin sanjoha joachaxin para rrorrenga cuerpona janha tti nttaha xá soixin ixin soixin anto rinao na.”

³⁶ Co, ndoa, David joinchehe xé Dios ngagué chojni que vintte are tiempoe David inchin coetonha Dios. Pero cottimeja ndavenhe co xavá chica nindoha co cuerpoe ndarrenga.

³⁷ Pero cuerpoe Jesús que Dios joinchexechon, xonhi conhe.

³⁸ Mexinxin cain jaha ra chonda que tsonoha ra ixin Jesús nchao nchetjañehe chojni cain tti jianha que nchehe na.

³⁹ Ley que vayé Moisés choha nchetjañehe cain tti jianha que nchehe chojni, pero conixin Jesús cainxin chojni que ditticaon Jesús, ditjañehe cain tti jianha que nchehe na.

⁴⁰ Mexinxin ttijho ra cuidado ixin tsoenja nganji ra inchin dicjin profeté Dios ngain tti jitaxin Palabré Dios are ndačo na:

⁴¹ Tsjexin ra, jaha ra xó tjanoa ra, tadinttetsjecoa ra co ndasenhe ra ixin janha Dios na. Co janha sinttaha ná cosa ngain tiempoa ra co cosa mé sitticaonha ra masqui chojni rronndattjo ra.

⁴² Cottimeja are Pablo co xijoicoa vačhjexin na de ningoe chojni judío, chojni que jeha judío joinchetsenhe na ñao Pablo ixin are sinchejogaha na iná nttiha ijni nchanho, tsinhi na xajeho tti nichja Pablo.

⁴³ Are cainxin chojni vačhjexin nihngo, tsje chojni judío co canxin chojni que jeha judío pero que vaguitticaon na inchin chojni judío, cain nimé rroé na Pablo co Bernabé. Co Pablo co Bernabé ndache na ixin jehe na tsinttoeha na de sinao na Dios.

⁴⁴ Are joí nchanho que nchejogaha chojni judío iná, merocoa ngoixin ciudad xatte ngain ningoe chojni judío ixin tsinhi na joajné Dios.

⁴⁵ Pero are chojni judío vicon ixin joí anto tsje chojni, coexinhi na conchjoehe na co coexinhi na nichja na oje que Pablo jinichja co nichja na jianha de ixin Pablo.

⁴⁶ Cottimeja Pablo co Bernabé xaonha are nichja co ndache na:

—Chonda que nichja na joajné Dios nganji ra saho ixin jaha ra judío ra. Pero jaha ra rinaoha ra tsinhi ra co jaha ra xaxaonha ra ixin jian para rrochonda ra iná vida naroaxin que xonhi tiempo tsjexin. Mexinxin jaxon janha na rronichja na ngain chojni que jeha judío.

⁴⁷ Ixin jañá coetonna na Dios, tti chonda cain joachaxin, ixin ndačo: Janha joaqué jaha inchin ná xohi para ixin cainxin nación.

Co para rronichjehe chojni ngoixin mundo que nchao rrochonda na iná vida naroa que xonhi tiempo tsjexin.

⁴⁸ Are coinhi chojni que jeha judío, anto ché na co coexinhi na ndačo na ixin joajné Jesucristo, tti chonda cain joachaxin, atto jian. Co cainxin nicoinchiehe Dios ixin chonda na iná vida naroaxin que xonhi tiempo tsjexin, cainxin nimé vitticaon na Jesús.

⁴⁹ Co jañá coexinhi na nichja na ngoixin nonttehe Pisidia joajné Jesús, tti chonda cain joachaxin.

⁵⁰ Pero chojni judío nichja ngain canxin nanita que anto jian vaguitticaon inchin chojni judío, co ngain tattita que vinttechonda joachaxin ngain ciudad mé. Co ndache na cain nimé ixin ningaconhe na Pablo co Bernabé. Co hasta vantsjexin na na de ngain nontte mé.

⁵¹ Cottimeja Pablo co Bernabé contsjenga na rotté na para ixin vinttji jinche co jamé joinchehe na señal ixin chojni nttiha vitticaonha na joajné Jesucristo. Cottimeja sacjoi na ngain ciudad de Iconio.

⁵² Co chojni que vaguitticaon Jesús anto ché na co anto vacançhanda na Espíritu Santo para vaquetonhe na.

14

Are Pablo co Bernabé ngain ciudad de Iconio

¹ Ngain ciudad de Iconio Pablo co Bernabé joixinhi ningoe chojni judío co nichja na jian. Jañá tsje chojni judío co tsje chojni que jeha judío vitticaon na ngain Jesús.

² Pero chojni judío que vitticaonha Jesús ndache chojni que jeha judío para ningaconhe na co xaxaon na jianha de ixin chojni que vaguitticaon Jesús.

³ Mexinxin Pablo co Bernabé vittohe na nttiha sé co nichja na co xaxaon na co chonda na confianza ngain Jesús, tti chonda cain joachaxin. Co Jesús joinchesegurá tti jehe na ndaço na de ixin quexén Dios rinao cain chojni ixin joanjo joachaxin para joinchehe na tsje milagro.

⁴ Co nchion chojni de ciudad mé xaxaon na inchin chojni judío, co nchion na xaxaon na inchin nirepresentanté Jesús.

⁵ Mexinxin chojni judío co chojni que jeha judío nichjé na xinchíxin co cjoao chó na ixin rrocoyaotte na na co rrocaxin na na xo.

⁶ Are Pablo co Bernabé conohe mé, sacoinga na co sacjoi na ngain rajna Listra co ngain rajna Derbe, co ngain nontte te chiaon, co cayoi rajna mé te nonttehe Licaonia.

⁷ Co nttiha cai nichja na tti jian joajné Jesús.

Are coaxin na xo Pablo ngain rajna Listra

⁸ Nttiha rajna Listra vehe ná xí que çhoaha vacji desde are goan.

⁹ Xí mé tajittinhi xa tti ndaço Pablo, co Pablo tsjehe xa jian co conohe ixin xí mé vitticaon xa co vechonda xa fe de que ixin nchao rroxingamehe xa.

¹⁰ Cottimeja Pablo ndache xa sén:

—Daringattjen jian conixin rottea.

Co xí mé çhinca xa vingattjen xa co coexinhi xa cjoi xa.

¹¹ Co are chojni vicon tti joinchehe Pablo, coexinhi na coyao na ixin nguigoehhe nonttehe Licaonia co ndaço na:

—Joi yó dios nganji na inchin xí.

¹² Co nimé ndaço na ixin Bernabé ná dios vinhi Júpiter co Pablo ná dios vinhi Mercurio ixin jehe tti nichja.

¹³ Co ngandehhe rajna vehe ná nihngo tti vanchecoanxinhi na Júpiter. Co ná xidané Júpiter joiaho coxintá jittea va tsjo. Co xidána co chojni mé joinao na rrogoen na coxintta para rrojinchesayehe na Pablo co Bernabé.

¹⁴ Pero are Bernabé co Pablo, yó de tti representanté Jesús, conohe na yá coinchje na lontoe na co coinga na cjoi na ngain tti jí tsje chojni co ndaço na sén:

—¿Quedonda jañá tenchehe ra? Janha na xí na inchin jaha ra. Co janha na joihi na para ixin rroundattjo ra ixin chonda ra que tsinttohe ra cosa jiji que xonhi xé co sitticaon ra Dios tti jichon. Dios mé tti joinchehjian ngajni, nontte, ndachaon co cainxin cosa que jí.

¹⁶ Are icha saho Dios coançhanda chojni joinchehe na inchin joinao na.

¹⁷ Co masqui jamé, cainxin tiempo jehe nchehe jian ngain chojni co jamé tjago ixin jehe Dios. Jehe nchegania çhin co danjo jian cosecha, co çhjá na cain tti jontte na co cai çhjá na icha cosa para que ján na anto chá na.

¹⁸ Pero masqui ndaço na cain yá, jehe na anto tangui cayacoenxin na chojni ixin goenha na coxintá rrocodayexin na.

¹⁹ Cottimeja canxion chojni judío que vitticaonha Jesucristo joixin de ngain ciudad de Antioquia co Iconio co jehe na ndache na chojni rajna Listra ixin coaxin na Pablo xo. Co are joexin coaxin na xo, jehe na xaxaon na ixin ondavenhe Pablo co coinganji na hasta tti ngandehhe rajna.

²⁰ Pero are chojni que vaguitticaon Jesús xatte na ngandaji Pablo, jehe vingattjen co sacjan ngaxinhi rajna iná. Co nchanho yoxin sajoicao Bernabé ngain rajna Derbe.

²¹ Ngain rajna Derbe nichja na tti jian joajné Jesucristo, co jañá tsje chojni vitticaon Jesús. Cottimeja çjan na iná ngain rajna Listra co ngain ciudad de Iconio co ngain ciudad de Antioquia.

²² Co ngain cainxin lugar mé Pablo co Bernabé ndache chojni que joinchehe sigue jian vaguitticaon Jesús. Co ndache na na ixin cain chojni chonda que tsixinhi na are anto tangui tsonhe na, co jamé rrochonda na parte ngain tti ttonha Dios.

²³ Co coinciehe na canxion xí ngain cada lugar para vaquetonhe chojni que vaguitticaon Jesús nttiha. Co are joexin joinchecoanxinhí na Dios co are xa vinttecjáño na, jehe na joinchetsenhe na ñao Jesús, tti chonda cain joachaxin, ixin cjoenguijna cain chojni mé que vaguitticaon ngain jehe Jesús.

Pablo co Bernabé sacjan ngain ciudad de Antioquía nonttehe Siria

²⁴ Cottimeja vatto na ngain nonttehe Pisidia co joihi na ngain nonttehe Panfilia.

²⁵ Co nichja na tti jian joajné Jesucristo nttiha ngain ciudad de Perge. Cottimeja sacjoi na ngain rajna Atalia.

²⁶ Nttiha coaxin na barco co sacjoi na ngain ciudad de Antioquía, tti ciudad joixin na are coexinhí na sacjoi na are chojni que vaguitticaon Jesús nttiha joinchetsenhe na ñao Dios ixin cjoenguijna na ngain xa, co jaxon Pablo co Bernabé sacjan na ixin ojehe na xa mé.

²⁷ Co are joihi na ciudad de Antioquía joatse na cain chojni que vaguitticaon Jesús co coequinhí na na cainxin tti joinchehe Dios ngain na co quexén Dios coanchjanda vitticaon chojni que jeha judío.

²⁸ Co Pablo co Bernabé vittohe sé nttiha ngain chojni que vaguitticaon Jesús.

15

Are xatte na ngain Jerusalén

¹ Co tiempo mé canxion xí que sacjoixin xa de nonttehe Judea para ngain ciudad de Antioquía coexinhí xa joinchecoenhe xa chojni ixin cain chojni que rinao sayé iná vida naroa chonda que tsa na xöhe que dinhi circuncisión inchin coetonha Moisés.

² Pero Pablo co Bernabé vitticaonha na ixin chojni que ditticaon Jesús chonda que tsa na xöhe. Mexinxin anto joinchediscuti chó na. Cottimeja chojni que vaguitticaon Jesús nttiha Antioquía coinciehe Pablo co Bernabé co icha xí para tsji sicjao representanté Jesús co tti vaquetonhe nivaguitticaon Jesús que jí ngain Jerusalén. Jehe na tsji na sicjao na na quexén tsonhe, ¿atsa na xöhe ani nahi?

³ Chojni que vaguitticaon Jesús ngain ciudad de Antioquía rroanha na na. Sacjoi na co vatto na ngain nonttehe Fenicia co nonttehe Samaria. Co ndache na chojni nttiha ixin tsje chojni que jeha judío jai ovitticaon na ngain Dios. Co cainxin chojni que vaguitticaon Jesús nttiha anto ché na are coinhi na yá.

⁴ Are Pablo co Bernabé joihi na ngain ciudad de Jerusalén, cain chojni que vaguitticaon Jesús conixin cain representanté Jesús co cain xí que vaquetonhe chojni que vaguitticaon Jesús, cain nimé vayé na Pablo co Bernabé. Co coequinhí na na cainxin tti joinchehe Dios ngain na.

⁵ Pero canxion xifariseo que vaguitticaon Jesús vingattjen xa co vinttendačo xa:

—Chojni que jeha judío chonda que sayé na xöhe que dinhi circuncisión are sitticaon na Jesús, co chonda que sinchehe na cainxin tti ttonha ley que vayé Moisés.

⁶ Cottimeja nirepresentanté Jesús co cain xí que vaquetonhe chojni que vaguitticaon Jesús, nimé ni xatte ixin cjoao na de ixin cosa mé.

⁷ Anto cjoao chó na. Cottimeja Pedro vingattjen co ndache na:

—Jaha ra noha ra ixin icha saho Dios coinciehna janha de ngayaha ra para que rroundattjan chojni que jeha judío tti jian joajna que danjo iná vida naroxin, jamé para que jehe na sitticaon na ngain Jesús.

⁸ Co Dios, tti chonxin cainxin ansén na, cjoago ixin jehe vayé chojni mé ixin jehe rroanha Espíritu Santo ngain jehe na inchin rroanha nganji ján na.

⁹ Dios ndačo ixin jehe na co ján na xajeho na ngattoxon con jehe ixin jehe joincheroa ansén na por ixin confianza que chonda na ngain Jesucristo inchin joinchehe nganji ján na.

¹⁰ Jai, ¿quedonda ditticaonha ra tti joinchehe Dios? Nindogolitoa na xanchjen čoha joinchehe ndo cain tti ndačo ley que vayé Moisés. Mexinxin čoha tsetonhe ra chojni que ditticaon Jesús que jeha judío ixin sinchehe na tsje ley que ni ján na čoha jointtoho na co ni ndogolitoa na xanchjen čoha joinchehe ndo.

¹¹ Ncheha ra jamé. Noa na ixin Dios vanjo iná vida naroa co xonhi joinchecobrá ixin Jesús, tti chonda cain joachaxin, rinao na ján na co cai jehe na.

¹² Cottimeja cainxin jehe na tencoa na co coinhi na are Bernabé co Pablo coequinhí na quecá señal co milagro joinchehe Dios ngagué chojni que jeha judío.

¹³ Are joexin nichja na, Jacobo ndačo:

—Hermano, ttinna ni ra:

¹⁴ Simón Pedro coequinna na quexén Dios cjoago ixin anto rinao chojni que jeha judío co coinciehe chojni mé cai para soan chojni Dios.

¹⁵ Cainxin yá inchin tti ocjin profeté Dios ngain tti jitaxin Palabré Dios. Co Palabra mé ndačo:

¹⁶ Cottimeja janha rrocjan na sihi iná
co inchin ná tti ttette nchia que oxantte,
jañá janha sinttaha para ixin chojni sinchesayana na inchin joinchesayana na are tiempoe
David;

janha sinttaha para ixin chojni sinchecoanxinna co sinchehe inchin janha rrondaçhjan,
¹⁷ jañá sinttaha para que chojni ngoixin mundo sinao sitticaon na,
co para ngain cainxin nación sintte chojnina.

¹⁸ Jañá çho Dios, tti chonda cain joachaxin, que joinchenona na cainxin jihi desde osé.

¹⁹ Mexinxin janha ndaçhjan ixin inttoguetanha na tangui chojni que ditticaon Dios que
jeha judío.

²⁰ Jeho rrocjinhi na na ixin isineha na tti joaquehe na ngain ídolo. Co ixin sinttejoacaoha
na nchí que jeha nchíchihi na o xí que jeha xixihi na, co ixin sineha na nntaohe coxigo
diguinguehe na ttosin ixin coxigo mé dinttjinguilha va jni, co sineha na jni va cai.

²¹ Ixin ngain cada rajna co para tsje nano te chojni que nchecoenhe chojni ley que vayé
Moisés, co ley mé tsjehe na ngain ningoe chojni judío cada nchanho que nchejogaha na.

²² Cottimeja nirepresentanté Jesús co tti xí que vaquetonhe chojni que vaguitticaon Jesús,
conixin cainxin chojni que vaguitticaon Jesús nntiha Jerusalén, cain nimé cjoao chó na ixin
coinchiehe na canxion chojni de ngagué na para rroanha na na conixin Pablo co Bernabé
ngain ciudad de Antioquía. Coinchiehe na Judas que cai vinhi Barsabás co iná xí vinhi Silas.
Co chojni que vaguitticaon Jesús anto vechonda respeto ngain cayoi xí mé.

²³ Co chojni que coinchiehe na joinchechjian ná carta, co Judas co Silas joicao carta mé
para ngain ciudad de Antioquía. Co carta mé ndaço carta:

“Janha na ço representante na de Jesús co ço ttetonhe chojni que ditticaon Jesús conixin
cain icha chojni que ditticaon Jesús nntihi chjaha ra joajna jaha ra ço jeha judío ra pero
ditticaon ra Jesús, jaha ra ço te ra ngain Antioquía co ngain nonttehe Siria co ngain nonttehe
Cilicia.

²⁴ Janha na coian na ixin canxion chojni cjoixin de nntihi co jointtaguetanha ra na tangui
conixin tti ndaço na. Mexinxin jaha ra noaha ra quehe nchao sinchehe ra ixin jehe na
ndattjo ra na ixin chonda que tsa ra çohe co sitticaon ra tti ttetonha ley que vayé Moisés.
Pero çonhi tiempo janha na chjaha na na joachaxin para nichja na jañá.

²⁵ Mexinxin cjoao chian na co çaxanho na ixin anto nchao jí ixin coinchiá na canxion
chojni ngaguehna na ixin tsji na sitsjaha ra na conixin Bernabé co Pablo, tti ján na rinao na
co tti ditticaon Jesús inchin cain na.

²⁶ Co jehe na coín vidé na en peligro de ixin causexin Jesucristo, tti chonda cain joachaxin
para ixin ján na.

²⁷ Mexinxin rroanha na Judas co Silas nganji ra co jehe na rronattjo ra na cainxin tti
cjoao chian na.

²⁸ Espíritu Santo cjoengujna na, mexinxin çaxanho na ixin nchao jí ixin itsetoanha ra
na sitticaon ra tsje ley que anto tangui para ixin chojni sinchehe. Jeho ley tehi chonda que
sitticaon ra:

²⁹ sintteha ra nntaohe coxigo que joaquehe na ngain ídolo, co cai sintteha ra jni va co ni
sintteha ra nntaohe coxigo que diguinguehe na ttosin, co sintteçhicoha ra nchí que jeha
nchíchihi ra, ni xí que jeha xixiha ra. Co si sitticaon ra cain jihi, sinchehe ra jian. Dios
senda ra tti te ra.” Jañá jitaxin carta.

³⁰ Cottimeja orroanha na na co sacjoi na ngain ciudad de Antioquía. Co nntiha joatse na
cainxin chojni que vaguitticaon Jesús co joanjo na carta que joicao na.

³¹ Co are chojni que vaguitticaon Jesús tsjehe na carta mé, anto ché na ixin tti jitaxin ngá
çón vantsjehe na joachjaon chonda ansén na.

³² Co ixin Judas co Silas cai chonda joachaxin de ndache chojni joajna que vayé na de
ngain Dios, mexinxin jehe na anto joincheconsolá na co joincheanimá na chojni nntiha
conixin tti ndache na na.

³³ Co Judas co Silas vittohe canxion nchanho nntiha. Cottimeja are sacjan na ngain tti
nirroanha na, chojni que vaguitticaon Jesús chjé na na joajna are sacjoi na.

³⁴ Pero Silas ndaço ixin sittohe nntiha nchion icha.

³⁵ Co cai Pablo co Bernabé vittohe nntiha ngain ciudad de Antioquía. Cayoi nimé co icha
tsje chojni nichja na co joinchecoenhe na na joajné Jesucristo, tti chonda cain joachaxin.

Are Pablo sacjoi nntiha yoxin para ixin nichja joajné Dios

³⁶ Are ovatto nchion tiempo, Pablo ndache Bernabé:

—Chjin na iná ngain cainxin rajna tti nichja na joajné Jesucristo, tti chonda cain
joachaxin. Sitsjehe na cain nihermano para tsonoa na si ça tenchehe na sigue ditticaon
na jian ngain Jesús o ani nahí.

³⁷ Bernabé joinao rrojica Juan Marcos cai,

³⁸ pero Pablo joinaoha rrojica na Juan Marcos iná ixin are saho coixinha joinchehe xa conixin jehe na, ixin are jehe na ngain regioen Panfilia, Juan Marcos cointtohe na co sacjoi Jerusalén.

³⁹ Anto joinchediscutí na hasta vačhendehe chó na. Bernabé sajoica Marcos, co coá na barco co sacjoi na nontte ngosine ndachaon dinhi Chipre.

⁴⁰ Pero Pablo coinchiehe Silas. Co chojni que vaguitticaon Jesús joinchetsenhe na ñao Dios ixin jehe senda na. Cottimeja Pablo co Silas sacjoi na.

⁴¹ Co vatto na ngain nonttehe Siria co ngain nonttehe Cilicia. Nttiha joincheanimá na chojni que vaguitticaon Jesús.

16

Pablo co Silas joica na Timoteo

¹ Pablo co Silas joihi na rajna Derbe co rajna Listra. Nttiha Listra jí ná xí tti vaguitticaon Jesús que vinhi Timoteo. Janné xa ná judía que vaguitticaon jan Jesús, co ndodé xa ná chojni griego.

² Chojni que vaguitticaon Jesús que te na ngain rajna Listra co ngain ciudad de Iconio nichja na jian de ixin jehe xa.

³ Co Pablo joinao joica Timoteo, mexinxin chjé xohe que dinhi circuncisión para que tsoñaoha chojni judío que vintte nttiha, ixin cain chojni mé nohe na ixin ndodé xa ná chojni griego co chojni griego ndačo ixin chondaha que tsa ni xohe mé.

⁴ Co ngain cainxin rajna vatto na ndache na chojni que vaguitticaon Jesús cainxin tti cjoao chó nirepresentanté Jesús conixin tti xí que vaquetonhe chojni que vaguitticaon Jesús ngain ciudad de Jerusalén.

⁵ Co jañá chojni anto jian vaguitticaon Jesús co cada nchanho icha tsje chojni coexinhi vitticaon Jesús.

Pablo vicononxinhi ná xí de nonttehe Macedonia

⁶ Espíritu Santo coančhjangdaha na nichja na joané Dios ngain nonttehe Asia. Mexinxin vangaria na nonttehe Frigia co nonttehe Galacia.

⁷ Co joihi na ngandehe nonttehe Misia. Cottimeja xaxaon na rrogatto na ngain nonttehe Bitinia. Pero Espíritu Santo que Jesús rroanha coančhjangdaha na.

⁸ Mexinxin jehe na vatto na nonttehe Misia hasta joihi na ciudad de Troas jí ngandehe ndachaon.

⁹ Co nttiha are ttie, Pablo vicononxinhi ná xí que joixin xa de nonttehe Macedonia. Co xí mé tajingattjen xa co jinchetsenhe xa ñao Pablo co ndačo xa: “Datto sihi nttihi nonttehe Macedonia co ttjenguinja ni ra.”

¹⁰ Co ixin Pablo vicon cain yá, janha na jointtachjian na tti cjoinha na are sacjoi na nonttehe Macedonia. Co conona na ixin Dios rroanha na ixin nichja na tti jian joajna ngain chojni que te nttiha.

Pablo co Silas ngain Filipos

¹¹ Ngain ciudad de Troas janha na coaxin na barco co sacjoi na nao ngain nonttehe Samotracia que jí ngosine ndachaon. Co nchanho yoxin sacjoixin na nonttehe Samotracia co joaso na ngain rajna Neápolis.

¹² De nttiha cjoí na ngain ciudad de Filipos. Ciudad mé ná ciudé chojni romano. Co ciudad mé icha importante que vehe lado činxin nchanho ngain nonttehe Macedonia. Nttiha vintte na janha na canxion nchanho.

¹³ Ná nchanho que nchejogaha chojni judío janha na vačhexin na de ngain ciudad mé co sacjoi na ngandehe ndarío tti vačatte chojni judío para vanchecoanxinhi na Dios. Joaso na tavintte na nttiha co nichja na joané Dios ngain ninčhi díxatte nttiha.

¹⁴ Ná de tti nčhi mé vinhi Lidia co nčhi mé joixin nča de ngain ciudad de Tiatora. Co jehe nča vanhecji nča manta morado anto fino. Co nčhi mé anto vanchecoanxinhi nča Dios inchin chojni judío. Co are janha na nichja na, jehe nča tajittinhi nča, co Dios, tti chonda cain joachaxin, cjoenguinja nča vitticaon nča tti jindačo Pablo.

¹⁵ Cottimeja joiguite nča, jehe nča conixin nindoha nča. Cottimeja joinchetsenna na nča ñaho na co ndačo nča:

—Si jaha ra ditticaon ra que janha ndoa ditticanho Jesús, tti chonda cain joachaxin, chjin na nchiania sintte ra.

Co jañá joinchetsenna na nča ñaho na co sacjoinha na nča.

¹⁶ Ná nchanho are janha na sacjoi na tti nchecoanxinin na Dios, ngatja nttiha vetan na ná xannčhi que vechonda xan ná espíritu jianha. Co espíritu mé vanchenichja xan cosa de quehe tsonhe. Co jañá vagacha xan tsje tomí para ixin ninajní xan.

¹⁷ Xannché mé coexinhi xan rroehna na xan Pablo co janha na. Co jehe xan jitoyao xan, co ndačo xan:

—Xí tehe xinchehe xé Dios tti ttjen ngajni. Co ndattjo ra xa quexén rrochonda ra iná vida naraa.

¹⁸ Jañá joinchehe xannché mé tsje nchanho. Mexinxin Pablo coñao co ngaria co ndache espíritu jianha ngaxinhi xan:

—Conixin nombré co joachaxin Jesucristo janha ttetonha dačhjexin de ngain xannché yá. Co rato mé espíritu jianha vačhjexin de ngain xan.

¹⁹ Pero are cain xinajní xan vicon xa que ichoha sachaxin xa xan icha tomi, tse xa Pablo co Silas co joicao xa ngain centroe ciudad tti jí xipolicía.

²⁰ Cottimeja joinchechienhe xa ngain xijuez romano co ndačo xa:

—Xí tehe judío, co ncheñao xa chojni ngain ciudad na.

²¹ Jehe xa nchecoehne xa chojni costumbré xa co ján na čhoha sinttoho na ni čhoha sotticaon na ixin ján na romano na.

²² Cottimeja chojni ngain ciudad ningaconhe na na. Co coetonha xijuez ixin vantsjehe na na lontto co goenxin na na nttá.

²³ Co are joexin anto goen na na, xanxinhi na na ngaxinhi cárcel co coetonhe na tti jinda cárcel ixin jian venda.

²⁴ Co are tti jinda cárcel coinhi mé, xanxinhi Pablo co Silas cuarto jí icha ngaxinhi cárcel mé co joaquehe rotté na ngagué yó nttá.

²⁵ Co are inchin ngosine ttie, Pablo co Silas tenchecoanxinhi na Dios co tetsje na himno ngain Dios, co icha chojni teaxinhi coinhi na mé.

²⁶ Co rato mé coinguí nontte anto soji hasta contsjenga xo tenganguihi cárcel mé. Co rato mé xiré cainxin puerté cárcel co xindanguehe cainxin cadena techoaxin tti teaxinhi.

²⁷ Co are mé tti jinda cárcel xingamehe. Co are vicon ixin taji xangué cainxin puerté cárcel, vantsje espadé para rrogoenxin cuerpoe ixin xaxaon que niteaxinhi osacoinga na.

²⁸ Pero Pablo coyaotte co ndache:

—Nahi, jañaha nchehe. Cain janha na te na nttihi.

²⁹ Cottimeja tti jinda cárcel joanchia ná xohi co coinga joixinhi co jixanga ixin joaxaon co cjo vettoxin nttajochjiji čhica rotté Pablo co Silas.

³⁰ Cottimeja joantsje na co joanchianguihi na co ndačo ngain na:

—Soixin ra, ¿quehe chonda que sinttaha para sayá iná vida naraa?

³¹ Co jehe na ndačo na:

—Ditticaon ngain Jesucristo, tti chonda cain joachaxin, co jamé jaha conixin cain nindoi rrochonda ra iná vida naraa.

³² Cottimeja Pablo co Silas ndačo na joajné Jesúcriso ngain jehe tti jinda cárcel co ngain cain nindoha.

³³ Co are xa ttie, jehe tti jinda cárcel joinchexoenhe tti conihí Pablo co Silas ixin vicaon na. Cottimeja jehe co cain nindoha joiguite na.

³⁴ Co tti jinda cárcel sajoicao na nchiandoha co chjé na joine na. Co jehe conixin nindoha anto ché na ixin vitticaon na Dios.

³⁵ Co are ndoexin xijuez rroanha xa xipolicía ngain tti jinda cárcel ixin rrogantsje Pablo co Silas.

³⁶ Cottimeja tti jinda cárcel ndache Pablo:

—Xijuez coetonna ixin santsje jaha ra. Mexinxin nchao satsji ra. Dio sitaonha ra nttiha.

³⁷ Pero Pablo ndache xipolicía:

—Janha na chojni romano na. Co cjoiha na ngain juzgado para chojni rrondačo ajian o jianha na. Pero masqui jamé, goen na na co tsje chojni tatetsjehe. Cottimeja coiaxinna na na ngaxinhi cárcel. Co jaxon rinao na santsje na na jimao. ¡Jañá nahi! Ndache ra jehe na ixin tsí na jehe na mismo para santsje na na.

³⁸ Xipolicía coequinhi xa cain yá xijuez romano, co xijuez xaon xa are conohe xa ixin Pablo co Silas chojni romano.

³⁹ Cottimeja sacjoi xa ngain Pablo co Silas co joinchetsenhe xa ñao na ixin sinchetjañehe na xa. Cottimeja joantsje na xa de ngain cárcel co joinchetsenhe xa ñao na ixin satsjixin na de ngain ciudad mé.

⁴⁰ Are vačhjexin na de ngain cárcel, sacjoi na nchiandoha Lidia. Cottimeja joitsjehe na chojni que vaguitticaon Jesús co joincheanimá na. Cottimeja sacjoi na.

¹ Co are sacjoi Pablo co Silas, vatto na ciudad de Anfípolis co ciudad de Apolonia. Cottimeja joiiji na ciudad de Tesalónica. Co nttiha vehe ná ningoe chojni judío.

² Vittohe na nttiha Tesalónica ní semana, co cada nchanho que joinchejogaha na, Pablo cjoí ningoe chojni judío co nichjé nite nttiha, inchin costumbre que chonda Pablo ngain cainxin rajna.

³ Jehe ndache na ixin ngain tti jitaxin Palabré Dios ndačo ixin Cristo chonda que vetan tangui co después que ndavenhe chonda que cjan xechon. Co ndache na:

—Tti Jesús que janha rrindattjo ra, jehe mé tti Cristo.

⁴ Cottimeja canxion chojni judío vitticaon ngain Jesús co vacao na Pablo co Silas. Co cai tsje chojni griego que vaguitticaon Dios inchin chojni judío coexinhí na vitticaon na Jesús. Co cai tsje nčí importante vitticaon ncha Jesús.

⁵ Pero chojni judío que vitticaonha conchjoehe na co joatte na canxion xí que nchehe jianha rridinttecoa ngá nttiha. Co cain nimé joinchequinga na chojni ngain ciudad. Co afuerza joixinhí na nchiandoha Jasón ixin tettjé na Pablo co Silas ixin rrogantsjexin na de nttiha co rrojicaon na ngain chojni.

⁶ Pero ixin vittjaha na Pablo co Silas nttiha, mexinxin coinganjincoa na Jasón co icanxin chojni que vaguitticaon Jesús, co joicaon na ngain xinchíxin co xipolicía de ciudad mé. Co ndačo na sén:

—Xí tehe ngoixin mundo joinchexenga xa chojni co cai nttihi joí xa.

⁷ Co Jasón vayé xa nchiandoha co cainxin jehe xa ningaconhe xa ley de rey romano ixin ndačo xa que jí iná rey que chonda icha tsje joachaxin que dinhi Jesús.

⁸ Are chojni co autoridad de ngain ciudad mé coinhi na cain yá, anto coñao na.

⁹ Pero Jasón co icha nihermano que tse autoridad joanjo na tomi co mexinxin coanchjanda na na.

Are Pablo co Silas vintteci rajna Berea

¹⁰ Co are naxin xehe ttié mé, chojni que vaguitticaon Jesús chjé na na joajna, co Pablo co Silas sacjoi na para rajna Berea. Co are joiiji na nttiha, sacjoi na ningoe chojni judío.

¹¹ Chojni judío que te nttiha icha joinao na coinhi na joajné Dios que nite ciudad Tesalónica. Anto coinhi na joajna mé co cada nchanho vacjé na tti jitaxin Palabré Dios para sicon na andoa tti tendache na na ni nahi.

¹² Co jañá tsje chojni judío vitticaon ngain Jesús co cai ngagué chojni griego tsje nčí importante co tsje xí vitticaon na Jesús.

¹³ Cottimeja are chojni judío que te ciudad de Tesalónica conohe na ixin Pablo jinichja joajné Dios ngain rajna Berea cai, cjoí na nttiha para joincheñoa na chojni ngain Pablo co Silas.

¹⁴ Pero chojni que vaguitticaon ngain Jesús toin rroanha na Pablo ngandehe ndachaon. Pero Silas co Timoteo vintteguitttohe ngain rajna Berea.

¹⁵ Pablo sacjoi co cai canxion chojni sajoicaon hasta tti ngain ciudad de Atenas. Co nttiha are sacjan na Berea, Pablo coetonhe na ixin ndache na Silas co Timoteo toin satsji na ngain Pablo.

Are Pablo cjoí Atenas

¹⁶ Are Pablo jichonhe Silas co Timoteo ngain ciudad de Atenas, jehe chjoinha conohe ixin vicon nttiha anto tsje retratoe idolo.

¹⁷ Mexinxin cjoí ngain ningoe chojni judío para nichjé jehe na conixin icha nivaguitticaon Dios inchin chojni judío. Co cai cada nchanho nichja ngain nivaguetan ngain ndásin.

¹⁸ Cottimeja canxion chojni coexinhí na nichja na ngain Pablo. Canxion chojni mé vacangui na tti xaxaon canxion xí vinhi epicúreos, co icanxin na vacangui na tti xaxaon canxion xí vinhi estoicos. Canxion de jehe na ndačo na:

—¿Quehe jindačo xí yá que anto nichja xa?

Co icanxin na ndačo na:

—Jehe rinao sinchecoene chojni de ixin icanxin dios.

Jañá ndačo na ixin Pablo jinichjé na tti jian joajna de ixin Jesús co ndache na ixin cain chojni nchao rroxechon.

¹⁹ Cottimeja savicaon na Pablo ngain ná jna vinhi Areópago, tti vařatte autoridad de ngain ciudad mé. Co nttiha jehe na ndačo na:

—Rinaho na tsonona na tti jaha rrinchecoene chojni.

²⁰ Ixin tti rrinichja ojé para ixin janha na. Co rinaho na tsonona na quehe rročo cain yá.

²¹ Jañá ndačo na ixin cainxin chojni que te ngain Atenas co cai chojni que joixin cjin que te na nttiha, cain nimé anto vancheřoxinhí na vaquinhí na co vanichja na de ixin quexeho joajna naraoxin.

²² Cottimeja Pablo vingattjen ngagué chojni mé nttiha Areópago co ndačo:

—Janha vicon ixin jaha ra xo te ra nttihi Atenas anto nchesayeha ra tsje dios.

²³ Ixin are janha ngaria ngagaha rajná ra tsjá quecá tti nchesayexin ra dios. Are mé vittja ná tti dinchetsonji ra co nttiha jitaxin: “Jihi para ixin dios que chonxinha na.” Co jaxon janha rrinichja nganji ra de ixin Dios mé que jaha ra nchechoanxinhí ra masqui chonxinha ra.

²⁴ Tti Dios que joinchechjian mundo co cainxin cosa que jí, jehe tti chonda cain joachaxin ngajni co nttihi ngataha nontte. Jehe dittoeha ngaxinhí nihngo que chojni nchechjian.

²⁵ Co jehe rrogondeha tti nchechjian chojni para ixin jehe ixin jehe mismo tti chjá na vidá na co chintto co cainxin tti dondá na cainxin na.

²⁶ Cainxin chojni que jí ngataha nontte joixin de tti nacoa chojni que joinchechjian Dios are saho. Co Dios coetonhe na ixin sintte na ngoixin ngataha nontte, co jehe coetonha quesa co quettinó sintte na.

²⁷ Jamé joinchehe Dios ixin rinao que chojni tsjé na jehe co sitticaon na jehe ixin jehe cjinha jí de nganji naná ján na.

²⁸ Ixin jí Dios, mexinxin techonxin na, tettingui na co nttoho na cain. Cai inchin coentaxin canxion tattita que dicjin xón nttihi nontteha ra are osé, co dicjin na jañá: “Ján na chojni Dios na.”

²⁹ Mexinxin ixin ndoa que ján na chojni Dios na, xaxaonha na ixin Dios inchin ná cosa de oro ni de plata ni de xo que chojni joinchechjian conixin rá inchin xaxaon na.

³⁰ Dios chjeha castigo ixin tti jianha que vanchehe chojni anto osé, ixin chojni mé vechonxinha jehe. Pero jai Dios ttetoan na cainxin na ngoixin mundo ixin tsentoxinhí na vidá na

³¹ Ixin Dios ocoinchiehe ná nchanho are jehe sinchejuzguehe cainxin chojni ngoixin mundo. Co Dios coinchiehe ná xí para juez. Co jehe Dios cjoago ixin jhi seguro are joinchexechon xí mé.

³² Are coinhí na ixin jí ná chojni que oxechon, canxion na cjoanoa na co icanxin na ndacho na:

—Otsian na icha are jaha rronichja iná.

³³ Cottimeja Pablo cointtohe na co sacjoi.

³⁴ Pero canxion chojni vitticaon na ngain Jesús co savicao na Pablo. Ngagué chojni mé vehe ná xí vinhi Dionisio. Co xí mé vehe xa ná juez nttiha Areópago. Co cai ngagué chojni que vitticaon ngain Jesús vehe ná nanita vinhi Dámaris co icha chojni.

18

Are Pablo ngain Corinto

¹ Cottimeja Pablo vačhjexin de ciudad de Atenas co sacjoi ngain ciudad de Corinto.

² Co nttiha vetan ná judío que vinhi Aquila. Xí mé goanxin xa nonttehe Ponto. Nchion icha saho Aquila co chihí que vinhi Priscila joixin na nonttehe Italia ixin tiempo mé Claudio vehe emperador nttiha Roma, capitál de nonttehe Italia, co coetonha ixin cainxin chojni judío chonda que sačhjexin na de Roma. Cottimeja Pablo cjoí joitsjehe na ngain ciudad de Corinto.

³ Pablo joinohe xajeho xa que jehe na, ixin canio na joinohe na vanchechjian na nchia de ixin manta. Mexinxin Pablo vittohe ngain na para ixin sinchehe na xa mé.

⁴ Co cada nchanho que nchejogaha chojni judío, Pablo sacjoi ngain ningoe na co nttiha nichja de ixin Dios co cjoao chojni judío conixin chojni que jeha judío para que vitticaon na ngain Jesucristo.

⁵ Co are Silas co Timoteo joixin na nonttehe Macedonia, Pablo ijoinchechjianha nchia de ixin manta, sino que nichja tti jian joajna nchanho co nchanho, co joinchecoenhe chojni judío ixin Jesús ndoa tti Cristo que jehe na techonhe na.

⁶ Pero chojni mé ningaconhe na co nichja na jianha de ixin jehe Pablo. Mexinxin Pablo contsenga lonttoe para ixin cain jinche cointtji nche ngataha nontte inchin ná señal que jehe satsji, co ndache na:

—Are ndasenne ra sinchetján ra co jaho ra setsingataha ra co janha idancataha ni ra. Jaxon satsji janha para ixin rronichja tti jian joajna ngain chojni que jeha judío.

⁷ Cottimeja vačhjexin ningoe chojni judío co sacjoi nchiandoha ná xí vinhi Justo. Xí mé jeha ná judío, pero vaguitticaon xa Dios inchin chojni judío. Co nchiandoha xí mé vehe nchia thica ningoe chojni judío.

⁸ Co ná xí vinhi Crispo vaquetonha ngain nihngo mé. Co jehe xa conixin cainxin nindoha xa vaguitticaon na ngain Jesús, tti chonda cain joachaxin. Co cai anto tsje chojni nttiha ngain ciudad de Corinto coinhí na joajné Dios co vitticaon na ngain Jesús co joiguite na.

⁹ Cottimeja ná tie Pablo vicononxinhí Jesús. Co jehe ndache Pablo:

—Xaonha, sino que nchehe sigue ndache chojni joajnana, co tencoaha
¹⁰ ixin janha rrihi nganji para ixin ttjenguijna co xonhi chojni nchao sinttaniha jaha. Mexinxin xaonha ixin tsje chojni ngain ciudad jihi, mé chojnina janha.

¹¹ Mexinxin Pablo vittohe ná nano co rioho nttiha Corinto para cjoagoe na joajné Dios.

¹² Pero are Galión vehe xigobernador ngain nonttehe Acaya, chojni judío xatte na para ixin tse na Pablo. Co joicao na ngain juzgado,

¹³ co ndache na xigobernador:

—Xí jihi jittingaria jitjagoe chojni ixin oje síncecoanxinhí na Dios co jeha inchin jitaxin ley que janha na chonda na.

¹⁴ Co Pablo rrojinichja are Galión ndache chojni judío:

—Sí xí jihi rrojinchehe xa jianha inchin rrocacoe xa cosé na o rrogoen xa chojni, janha rroquian tti tendaço ra, jaha ra xo judío ra.

¹⁵ Pero jeha jamé. Jaha ra toñao ra jeha ixin jeha xa oje jitjagoe xa chojni quehe jitaxin ngain leya jaha ra. Janché jaho ra tjao chó ra de ixin cosa jihi ixin janha rinaoha rroxantexin rana.

¹⁶ Co jeha vantsjexin na de nttiha.

¹⁷ Cottimeja chojni Galión tse na Sóstenes, tti vaquetonha ngain ningoe chojni judío. Co vintja na jeha Sóstenes nttiha ngattoxon con xigobernador. Pero masqui Galión vicon cain yá, jeha xonhi joinchehe ixin cosa mé ndosenha jeha.

Are Pablo cjan Antioquia co coexinhí nttiha nínxin para joinichja joajné Dios icanxin rajna

¹⁸ Pablo xa vittohe tsje nchanho nttiha Corinto. Cottimeja jeha chje joajna chojni que vaguitticaon Jesús ixin satsji jeha conixin Aquila co Priscila. Co are joiji na rajna Cencrea, Pablo cjinhi já inchin ná señal que jeha ojoinchecumplí ná promesa ngain Dios. Cottimeja canio na cjoí na coá na ná barco ixin satsji na ngain nonttehe Siria.

¹⁹ Are joiji na ciudad de Efeso, Pablo cointtohe Priscila co Aquila co sacjoi ngain ningoe chojni judío co cjoao chó chojni judío que vaaxatte nttiha.

²⁰ Co joinchetsenhe na ñao Pablo ixin rroguittohe icha sé nttiha, pero jeha çhoha.

²¹ Cottimeja chje na joajna co ndaço:

—Chonda que sarihi ngain ciudad de Jerusalén are tsexinhí quiai que jitonchiaon. Pero sí Dios rinao, rrocjan na janha sihi iná sítsjaha ra.

Cottimeja coá barco co sacjoixin de ngain Efeso.

²² Co are joiji ciudad de Cesarea Pablo vaniaxin de barco co sacjoi ngain ciudad de Jerusalén para ixin chje joajna ngain chojni que vaguitticaon Jesús nttiha. Cottimeja sacjoi ngain ciudad de Antioquia.

²³ Co vittohe canxion nchanho nttiha Antioquia. Cottimeja sacjoi iná co ngaria cainxin rajna ngain nonttehe Galacia co nonttehe Frigia co nttiha joincheanimá cainxin chojni que vaguitticaon Jesús.

Are Apolos vanichja de ixin Dios ngain Efeso

²⁴ Co are mé joiji ná xí judío ngain ciudad de Efeso, co xí mé vinhí xa Apolos co jeha xa diquixin xa de ciudad de Alejandría. Jeha xa anto jian nichja xa de ixin Dios co anto nohe xa tti jitaxin Palabré Dios.

²⁵ Jeha xa ochonxin xa tsje de ixin quexén Jesucristo, tti chonda cain joachaxin, rinao sinchehe chojni. Co jeha xa anto vaché xa ixin vanichja xa de ixin Jesús, co jian vancheoenhe xa chojni de ixin Jesús. Pero jeha xa jeha vechonxin xa de tti vancheguite Juan chojni.

²⁶ Co jeha Apolos xaonha co anto nichja ngain ningoe chojni judío. Co are coinhi Priscila co Aquila tti ndaço Apolos, joicao na ngain nchiandoha na co joincheoenhe na icha jian de ixin quexén Dios rinao sinchehe chojni.

²⁷ Cottimeja are Apolos ndaço ixin satto ngain nonttehe Acaya, chojni que vaguitticaon Jesús nttiha Efeso cjoenguijna jeha ixin rroanha na ná carta ngain chojni que vaguitticaon Jesús nttiha Acaya ixin sayé na jian. Co are Apolos joiji ngain nonttehe Acaya, anto cjoenguijna tsje chojni que Dios chje joachaxin ixin vitticaon na Jesús.

²⁸ Apolos co chojni judío anto cjoao chó na co Apolos cjoagoe cainxin chojni ixin tti vaaxaon chojni judío nchaoha jí, co tti vandáço Apolos jeha na çhoha vandáço na ixin nchaoha jí cai porque jeha vacjagoe na conixin tti jitaxin Palabré Dios ixin Jesús ndoa tti Cristo, tti Dios coinchiehe co tti jeha na techonhe na.

¹ Are Apolos xa vehe ngain ciudad de Corinto, Pablo vatto ngain cainxin rajna que vintte ngagaha jna. Co jañaxon hasta joiiji ngain ciudad de Efeso, tti vetan canxion chojni que vaguitticaon Jesús.

² Co joanchianguihi na co ndaño ngain na:

—¿Ajoí Espíritu Santo nganji ra conixin joachaxin are vitticaon ra?

Co jehe na joattehe na:

—Janha na xonhi tiempo ttian na ixin jí Espíritu Santo.

³ Cottimeja Pablo joanchianguihi na:

—Mexinxin ¿quexén joiguitte ra?

Jehe na joattehe na:

—Inchin Juan ndaño para joiguitte na.

⁴ Pablo ndache na:

—Ndoa, Juan joincheguitte chojni que coentoxinhi vidé. Pero cai jehe ndache chojni ixin chonda na que sitticaon na ná tti tsí después de jehe. Co jehe mé ojoí, co jehe mé Jesús tti Cristo.

⁵ Co are coinhi na jamé, cain na joiguitte na para goan na chojni Jesús, tti chonda cain joachaxin.

⁶ Co are Pablo joaquehe rá ngataha já na, Espíritu Santo joí ngain na conixin joachaxin co jehe na coexinhi na nichja na ojeje nguigoa co nichja na joajna que vayé na de ngain Dios.

⁷ Co cain nivitticaon inchin tteyó xí.

⁸ Pablo vittohe nntiha ciudad de Efeso ní conittjao co vacji ningoe chojni judío tsje nntiha. Nntiha vanichja ngain chojni conixin confianza, co cjoao na para cjoagoe na de ixin quexén Dios ttetonha.

⁹ Pero canxion chojni joinaoha na vitticaon na tti ndaño Pablo. Co nimé johó nichja na jianha de ixin tti jian joajné Jesucristo ngatte con icha chojni. Cottimeja Pablo vachjendehe jehe na co savicao chojni que vaguitticaon Jesús ngain ná escuelé ná ximaestro vinhi Tiranno. Co nntiha vanichja cainxin nchanho.

¹⁰ Co jañá vanchehe ngoixin yó nano. Mexinxin cainxin chojni que vintte ngain nonttehe Asia coinhi na joajné Jesús, tti chonda cain joachaxin. Chojni judío co cai chojni que jeha judío coinhi na mé.

¹¹ Co Dios joanjo joachaxin ngain Pablo para ixin jehe joinchehe tsje milagro.

¹² Anto tsje joachaxin joanjo Dios hasta chojni joiaho mantachjan co joiaho lonnto que joincheguindatte na cuerpo Pablo. Co are vajicao na cosa mé ngain chojni tenihi, chojni mé vaxingamehe na co tti espíritu jianha vagachjexin de ngaxinhi na.

¹³ Pero vehe cai canxion chojni judío que vangaria co vagatsje espíritu jianha de ngain chojni. Co chojni mé joinaó rrojinchegonda na nombré co joachaxin Jesús, tti chonda cain joachaxin, para ixin rrogantsjexin na espíritu jianha de ngain chojni. Co ndache na espíritu mé:

—Conixin nombré Jesús, tti nombre que Pablo nichja, janha na ttetonha ra ixin dachjexin ra de ngain chojni.

¹⁴ Jañá joinchehe tti yáto xenhe ná chojni judío vinhi Esceva. Co jehe xí mé vehe xa ná xidána que vaquetonha ngain icha xidána.

¹⁵ Pero are ndaño xan yá, tti espíritu jianha joattehe xan:

—Janha nona quensen Jesús co nona quensen Pablo, pero jaha ra, ¿quensen jaha ra?

¹⁶ Cottimeja tti xí que vechonda espíritu jianha chinca xatja jehe nimé co anto cjoaya xa ngain na hasta que jehe na ttolocho na co conihi na sacoingaxin na de nchia mé.

¹⁷ Cainxin chojni que vintte ngain ciudad de Efeso, chojni judío co cai chojni que jeha judío conohe na cain mé co anto xaon na, co ndaño na anto tsje cosa jian de ixin Jesús, tti chonda cain joachaxin.

¹⁸ Cai tsje chojni que vaguitticaon ngain Jesús xatte na co ndaño na ngattoxon con icha chojni cosa jianha que joinchehe na icha saho.

¹⁹ Co tsje chojni ttoso joiaho xón de ixin joattosohe co xón mé cjoaga na xon co tatetsjehe cainxin chojni. Co are coequin na quejanhi rroguite cain xón mé, vittja inchin cincuenta mil tomi de plata.

²⁰ Jañá icha co icha chojni vitticaon na joajné Jesucristo co vicon na ixin joajna mé chonda tsje joachaxin.

²¹ Cottimeja Pablo xaxaon satsji ngain tsje rajna nonttehe Macedonia co nonttehe Acaya. Cottimeja satsji ngain ciudad de Jerusalén. Co cai ndaño ixin are satsjixin de ngain Jerusalén cai chonda que satsji ngain ciudad de Roma.

²² Cottimeja Timoteo co Erasto, tti yó xí que vacjenguijna, rroanha na para ngain nonttehe Macedonia. Co jehe Pablo xa vittohe sexin ngain nonttehe Asia.

Are ngain ciudad de Efeso chojni coñao na

²³ Are mé tsje chojni coñao ixin tti jian joajné Jesucristo que vanichja Pablo.

²⁴ Ná xí vinhi Demetrio joincheña cain chojni mé. Xí mé vanchexjian xa tsje figurachenhe nihngo conixin plata, xá ningoe ná ídolo vinhi Diana. Co chojni que vanchehe xé xa vagacha na tsje tomi.

²⁵ Co jehe xa vayé xa nivanchehe xé xa conixin icha chojni que vanchehe xajeho xa co ndache xa na:

—Jaha ra noha ra que conixin xa que nttoho na tedacha na tsje tomi, mexinxin chonda na jian vidá na.

²⁶ Co jaha ra coinhi ra co vicon ra quexén Pablo ngaria co ndacho ixin cain dios que vanchexjian chojni jeha Dios ndoa. Co jañá joincheguitticaon tsje chojni, co jeoha nttihi Efeso, cai merocoa ngoixin nonttehe Asia te chojni que ditticaon tti ndačo jehe.

²⁷ Co nchaoha jí para ixin ján na ixin puede irrochondaha na xa. Co cai puede chojni irronichjaha na de ixin ningoe dios Diana co isinchesayeha na dios mé masqui jai cainxin chojni ngain nonttehe Asia co cainxin chojni ngoixin mundo anto nchesayeha na dios Diana.

²⁸ Co are cain chojni coinhi mé, anto coñao na co ndačo na sén:

—¡Anto jian dios Diana ngain ciudad de Efeso!

²⁹ Cottimeja ngain ciudad mé cain chojni anto coñao na. Co činca na xatja na Gayo co Aristarco, tti yó xí que Pablo joiaoxin de nonttehe Macedonia. Co coinganji na xa hasta tti jí nchia tjaoxin chó na.

³⁰ Pablo joinao rrojixinhí nttiha para ixin rrojinichjé chojni mé pero chojni que vaguitticaon Jesús coanchjandaha na.

³¹ Cai canxion chojni que vaquetonha ngain nonttehe Asia niamigoe Pablo co nimé rroenhe na joajna ixin sixinttexinha nttiha.

³² Nttiha tti xatte na, jeje coyaotte chó na ixin cain na coñao na co merocoa cain chojni noeha na quedonda xatte na nttiha.

³³ Cottimeja canxion tti tengagé nttiha ndache ná xí vinhi Alejandro ixin quehe xattexin na nttiha, co jehe mé tti chojni judío vantsjeyexin na de ngagé na co joaquehe na xa ngatto con icha chojni. Alejandro conixin rá joinchehe seña ixin chojni rrotenco na ixin rinao rronichja de ixin chojni judío para que icha chojni tsoñaoha ngain na.

³⁴ Pero are chojni conohe ixin jehe ná judío, cainxin na coyaotte na inchin yó hora co ndačo na:

—¡Viva Diana de ngain ciudad de Efeso!

³⁵ Cottimeja are xisecretarioe ciudad mé onchao joinchetenco xa chojni, jehe xa ndačo xa:

—Jaha ra de ciudad de Efeso, cainxin chojni ngoixin mundo nohe na ixin ján na nttihi Efeso tenda na ningoe dios Diana que chonda tsje joachaxin co ixin tenda na retratoe que xincanjinxin de ngajni.

³⁶ Co xonhi chojni nchao ndačo ixin jili ndoaha; mexinxin tencoa ra, co xaxaon ra jian saho que sinchehe ra ná cosa.

³⁷ Xijoicó ra tehe xonhi vantsje xa de ngain ningoa na co ni nichjaha xa jianha de ixin dioa na.

³⁸ Si Demetrio co ninchehe xé chonda na čhoan tti sičo na jie, jí xijuez; co cainxin nchanho te xa ngain juzgadoe xa. Mexinxin jehe na nchao satsji na ngain xijuez de ciudad jhi. Co nttiha cada chojni nchao rronichja tti joinchehe co tti joincheha.

³⁹ Co si jaha ra ojé rinao ra, nchao satse ra chojni co tsjaoxin ra, pero jian inchin ley ttetonha.

⁴⁰ Ixin puede čhoan chojni sinttacaxin na arinao na tsetocoho na gobierno romano, co çehe rrondačo na si čhoan chojni sanchianguia na ixin quedonda anto coñao na?

⁴¹ Co are joexin nichja xa cain yá, coetonhe xa chojni ixin satsji na.

20

Are Pablo cjoí Macedonia co Grecia

¹ Co are chojni que coñao ojoexin chjequé na, Pablo joatsetaonhe cain chojni que vaguitticaon Jesús co joinchearimá na. Cottimeja chjé chó na joajna co Pablo sacjoi nonttehe Macedonia.

² Ngain cain rajna que cjoí, joitsjehe cain chojni que vaguitticaon Jesús nttiha co joinchearimá na conixin tti ndache na. Cottimeja joiji nonttehe Grecia.

³ Nttiha vittohe ní conittjao, co are jehe rroca barco ixin sarrocji ngain nonttehe Siria, conohe ixin chojni judío joinao na narrogoenxon na. Mexinxin cjoixinha nataon jinda sino sacjan vatto ngain nonttehe Macedonia iná.

⁴ Co tsje xí sacjoi xa conixin Pablo. Ná vinhi Sópater que joixin xa rajna Berea; iná vinhi Aristarco, co iná vinhi Segundo, cayoi xí mé joixin ciudad de Tesalónica; co iná vinhi Gayo que joixin xa rajna Derbe; co iná xí vinhi Timoteo; co iyó xí vinhi Tíquico co Trófimo, co mé joixin xa nonttehe Asia.

⁵ Cainxin xí mé vitaon xa nttiha co chonhe xa ixin janha na saso na nttiha ciudad de Troas.

⁶ Co are joexin quiai are jine ni niottja que chondaha levadura, cottimeja janha na coá na barco co vachjexin na de ngain ciudad de Filipos. Co are nchanho naonxin joiguetanxin na cain xí mé ngain ciudad de Troas. Co nttiha vittona na yáto nchanho.

Are Pablo ngain Troas

⁷ Co saho nchanho de semana janha na xatte na para ixin joine na tti niottja que dinhi Santa Cena. Co Pablo joinchecoehne chojni que vaguitticaon Jesús. Co jehe Pablo nichja hasta ngosine ttie ixin jehe chonda que sarrocji nchanho yoxin.

⁸ Janha na otate na ngain ná cuarto piso ninxin. Co nttiha anto tsje xoi candil tedacaon.

⁹ Co nttiha ná xanxí vinhi Eutico tají xan ngain ventana. Pero ixin Pablo anto sé nichja, mexinxin xanxí mé anto chjé xan cottachin co tavejoa xan; cottimeja ndaditse xan cottachin co vetsinga xan de ngain ventana de ngain piso ninxin de nchia mé para ndoja. Co are jehe na joatsin na xan, ondadiguenhe xan.

¹⁰ Cottimeja Pablo vania co vettoxin nttajochjihí co cjóa xan co ndačho ngain chojni que vaguitticaon Jesús:

—Xaonha ra, ixin jichon xan.

¹¹ Cottimeja Pablo sacjan ngaxinhi cuarto noi iná co joine tti niottja que dinhi Santa Cena co joinecaho chojni nttiha. Cottimeja jehe nichja icha hasta vingasán, cottimeja sacjoi.

¹² Co xanxí mé cjan xan xingamehe xan de ndadiguenhe xan co savicao na xan nchiandoha xan co cain na anto ché na.

Are sacjoixin na de Troas co sacjoi na Mileto

¹³ Pablo ndačho ixin jehe rotteo satsjixin hasta tti ngain rajna Asón. Mexinxin janha na coá na ná barco co vitaon na nttiha hasta tti ngain rajna Asón. Nttiha sirroataonxin na Pablo inchin cjoao na.

¹⁴ Co are janha na vetan na Pablo nttiha Asón, coaninxin barco conixin janha na co sacjoi na ngain rajna Mitilene.

¹⁵ Janha na vachjexin na de nttiha co nchanho yoxin joaso na ngain nontte ngosine ndachaon dinhi Quío. Co nchanho ninxin joaso na ngain iná nontte ngosine ndachaon dinhi Samos, co jointtajogaha na ngain rajna Trogilio. Co ndoexin joaso na ngain ciudad de Mileto.

¹⁶ Jañá conhe ixin Pablo joinaoha conchjenhe sé ngain nonttehe Asia ni joinaoha cjo ciudad de Efeso ixin jehe joinao toin rroguiji ciudad de Jerusalén ixin joinao vehe nttiha are nchanho quiai que dinhi Pentecostés, si nchao.

Tti nichja Pablo ngain nivaquetonhe chojni que vaguitticaon Jesús ngain Efeso

¹⁷ Are vehe Pablo ngain ciudad de Mileto, rroanha joajna ngain xí que vaquetonhe chojni que vaguitticaon Jesús ngain ciudad de Efeso para ixin tsonchienne na ngain.

¹⁸ Co are joí na ndache na:

—Jaha ra noha ra quexén vanttaha janha desde saho nchanho que joihi nttihi nonttehe Asia co hasta jai.

¹⁹ Cainxin nchanho janha joarihi nganji ra jointtaha tti coetonna Jesús, tti chonda cain joachaxin, co janha xonhi tiempo conona orgulloso. Co jí nttiha tsjanga janha de ixin jaha ra. Co cai anto vetan tangui ixin tti joinchehe chojni judío nganji na janha.

²⁰ Pero janha cointtoaha de vanichja nganji jaha ra cain tti nchao cjoenguijna jaha ra. Co jointtacoanha ra ngain lugar tti te tsje chojni co cai ngain nchiandoi ra.

²¹ Janha coetoan chojni judío co chojni que jeha judío ixin chonda que tsentoxinhi na vidé na inchin Dios rinao co sitticaon na ngain Jesucristo, tti chonda cain joachaxin para ixin ján na.

²² Co jaxon janha satsji ciudad de Jerusalén ixin Espíritu Santo coetonna, masqui nonaha quehe tsonna nttiha.

²³ Jeho nona que ngain cainxin ciudad tti janha cjoí Espíritu Santo ndachjenji na ixin anto tangui tsonna co cai ixin siaxinna ngain cárcel.

²⁴ Pero janha xaonha na de ixin tti ndachjenji na Espiritu Santo co xaonha na masqui ndasenne na. Jeho rinaho tsjexin xa que Jesús, tti chonda cain joachaxin, chjana. Xa mé xa de rronichja tti jian joajna que ndačo ixin Dios anto rinao cain chojni.

²⁵ 'Are osé janha vanichja nganji ra ixin quexen Dios tte-tonha. Co jai nona ixin ni ná de jaha ra rrocjan sicon ni ra janha iná.

²⁶ Mexinxin jai rinaho rronhattjo ra que si chonja chojni ditticaonha, jeho setsingataha co janha idancataha na jehe.

²⁷ Ixin janha ondattjo ra de ixin cainxin tti rinao Dios que sinchehe ra, co janha xonhi tjañana de ndattjo ra.

²⁸ Mexinxin ttijho ra cuidado jaha ra co cai dinttenda ra cainxin chojni que ditticaon Jesús ixin Espiritu Santo chjá ra xa jihi de dinttenda ra cain chojni que ditticaon Jesús, ixin Jesús, tti chonda cain joachaxin, ndavenhe para ixin cain ján na are joí jni jehe.

²⁹ Co janha nona ixin are janha satsji, tsí ojé chojni co jehe na sinao na sinttayaha ra na ixin isitticaonha ra Jesús co nimé inchin colobo chintto are tse va coleco co jine va va.

³⁰ Co cai ngayaha ra jaha ra mismo sačhe tti nirronichja ndoaha, co jamé canxion chojni que ditticaon Jesús sitticaon na tti rrondačo jehe na.

³¹ Mexinxin ttijho ra cuidado co xaxaon ra que janha ngoixin ní nano nchanho co ttie jointtacoanha ra hasta tsjanga janha por ixin jaha ra.

³² Jaxon danchia Dios ixin jehe senda ra co ixin sitticaon ra tti joajna que ndačo ixin Dios anto rinao cain ra, co joajna mé chonda joachaxin de sinttaguitticaon ra jian que jaha ra cai tequininxin ra ngain Dios.

³³ Co janha xonhi tiempo joinaho ná cosé chojni ni loncto ni tomi.

³⁴ Jaha ra jian noha ra que janha vanttaha xa para ixin joarichonda cain tti vagondana co cai tti vagondehe nivacjinha.

³⁵ Co jañá janha cjoagoha ra ixin icha jian nchehe ni xa co ttjenguijna ni ninoa. Co xaxaon ra tti ndačo Jesús, tti chonda cain joachaxin, are ndačo: "Icha chjoin tonohé ansén chojni que danjo que tti tonohé ansén chojni que dayé."

³⁶ Co are Pablo joexin nichja cain yá, vettoxin nttajochjihi jehe co cainxin chojni co joinchecoanxinhi Dios.

³⁷ Cainxin na tsjanga na are cjóa na co coetoxin na Pablo.

³⁸ Co anto vinttechín na ixin Pablo ndačo ngain na ixin irrocjanha na sicon na. Cottimeja joicanxin na hasta tti jí barco.

21

Are Pablo sacjoi Jerusalén

¹ Are janha na cointtoa na chojni que vaguitticaon Jesús, coá na ná barco co sacjoi na nao ngain nontte ngosine ndachaon dinhi Cos. Co nchanho yoxin joaso na ngain nontte ngosine ndachaon dinhi Rodas co de nttiha sacjoi na ngain rajna Pátara.

² Co nttiha rajna Pátara janha na vittja na ná barco sajittji ngain nonttehe Fenicia, mexinxin coá na barco mé co sacjoi na.

³ Co vicon na nontte ngosine ndachaon dinhi Chipre co nontte mé vittohe lado cjon na co jañá sacjoi na hasta nonttehe Siria. Co nttiha ciudad de Tiro barco chonda que cointtohe barco carga joiaho barco, co mexinxin nttiha janha na vania na.

⁴ Ngain ciudad mé janha na vetan na chojni que vaguitticaon Jesús co nttiha vittona na ngain na ná semana. Co jehe na ndache na Pablo ixin icha jian tsjiha ngain ciudad de Jerusalén. Jañá ndache na ixin Espiritu Santo joinchenohe na quehe tsonhe Pablo nttiha Jerusalén.

⁵ Pero are joexin semana mé, janha na sacjoi na. Cainxin nivaguitticaon Jesús, nixi co chíhi na co xenhe na, cain nimé joicanxin na na hasta tti ngandehé ciudad mé, co nttiha nganda ndachaon janha na joarittoxin na nttajochjihna na co jointtacoanxian na Dios.

⁶ Cottimeja chjaha na na joajna co cjóa na na co coá na barco co jehe na sacjan na nchiandoha na.

⁷ Co jañá sacjoixin na ciudad de Tiro co joaso na ciudad de Tolemaida. Co nttiha vaniixin na barco. Co ngain ciudad mé janha na vetan na nivaguitticaon Jesús co vittona na ná nchanho ngain na.

⁸ Co nchanho yoxin cain na janha na sacjoixin na de ngain ciudad de Tolemaida co joaso na ngain ciudad de Cesarea. Nttiha cjoí na nchiandoha ná xí vinhi Felipe. Xí mé joindache tsje chojni tti jian joajné Jesucristo, co jehe xí mé vehe ná de tti yáto xí que vacjenguijna co vachjé tti sine chojni que vaguitticaon Jesús ngain ciudad de Jerusalén. Co janha na vittona na ngain xí mé.

⁹ Co Felipe vechonda nó xenhe xannchí que xa vinttecaoha xan xí. Co xannchí mé vanichja xan vojna que vagayé xan de ngain Dios.

¹⁰ Are janha na vintte na nttiha canxion nchanho, joihi ná xí que vanichja xa vojna que vagayé xa de ngain Dios. Xí mé joixin xa nonttehe Judea co vinhi xa Agabo.

¹¹ Co xí mé joi xa joitsjena na xa. Co are jehe xa nttiha nganji na, coá xa cinturoen Pablo co coiattexin xa rotté xa co rá xa conixin cinturón mé co ndacho xa ngain Pablo:

—Espíritu Santo ndacho ixin ngain ciudad de Jerusalén chojni judío tsiatte na jaha janhi inchin janha coiatte rana co rottena co jañá sinttachianha na ngain chojni que jeha judío.

¹² Are coian na jihi, janha na co chojni de ngain ciudad de Cesarea jointtatsán na ñao Pablo ixin tsjiha Jerusalén.

¹³ Pero Pablo joattehe:

—¿Quedonda nchehe ra ixin janha sarichinhi? ¿Co quedonda tsjanga ra? Janha rrihi dispuesto de jeoha tsiatte na na sino que cai rrihi dispuesto de ndasenne na ngain Jerusalén para ixin causein Jesús, tti chonda cain joachaxin.

¹⁴ Pero masqui janha na nichjá na sé, jehe choha vitticaon tti ndattjan na. Mexinxin ixonhi icha ndattjan na, jeha ndachjan na:

—Que tsonhe inchin Jesús, tti chonda cain joachaxin, rinao.

¹⁵ Co are joexin cain jihi, janha na coengachjian na tti cjoinha na co sacjoi na ngain Jerusalén.

¹⁶ Canxion chojni que vaguitticaon Jesús que joixin na de ngain ciudad de Cesarea sacjoinha na na co ngayé cain chojni mé vehe ná xí vinhi Mnasón. Xí mé joixin xa nontte ngosine ndachaon dinhi Chipre, co osé jehe xa vaguitticaon xa Jesús. Co janha na vittona na ngain nchiandoha xí mé canxion nchanho.

Pablo joitsjehe Jacobo

¹⁷ Are joaso na ciudad de Jerusalén, chojni que vaguitticaon Jesús nttiha anto ché na co jian vayahna na na.

¹⁸ Nchanho yoxin Pablo co janha na sacjoi na joitsjá na Jacobo co nttiha cai vintte cainxin xí que vaquetonhe chojni que vaguitticaon Jesús.

¹⁹ Pablo chjé na joajna, cottimeja coequinhi na cainxin tti joinchehe jehe de ixin joachaxin Dios ngain chojni que jeha judío.

²⁰ Are jehe na coinhi na yá, joinchesayehe na Dios. Cottimeja ndache na Pablo:

—Nchao jí hermano; pero jaha noha ixin jí tsje mil chojni judío que oditticaon Jesús. Co cain nimé anto rinao sitticaon na cain tti coetonha ley que vayé Moisés.

²¹ Co jehe nimé coinhi na ixin jaha nchecoenhe cainxin chojni judío que te ngain rajné chojni que jeha judío ixin sitticaonha na tti coetonha Moisés. Co coinhi na cai ixin jaha nchecoenhe na ixin icha jian rrochjeha na xenhe na xöhe que dinhi circuncisión co sincheha na inchin ndacho costumbrea na.

²² ¿Quehe sinttaha na reme? Nona na ixin chojni judío que ditticaon Jesús rroçatte na are tsinhi na ixin jaha ojoihi.

²³ Mexinxin xaxanho na icha jian si jaha sinchehe inchin rroundattjo ra. Jí nó xí ngaguehna na que sinchecumplí ná promesa para ixin Dios.

²⁴ Tsjiho xí mé. Co sinchehe inchin jehe xa are sinchehe xa cain tti ndacho chojni judío ixin sintte xa jian para ixin Dios. Co chjehe xa tomi para ixin tsenanxin xa cain tti sanjo xa ngain Dios. Cottimeja jehe xa nchao rrocjinhi xa xajá xa. Jañá cainxin chojni rrochonxin que cain tti ndacho na de ixin jaha ndoaha. Co sicon na ixin cai jaha ditticaon cainxin ley que vayé Moisés.

²⁵ Pero de ixin chojni que jeha judío, icha saho janha na rroanha na joajna ngain chojni mé co ndattjan na na ixin chonda que sineha na tti joaquehe na tti nchesayexin na ídolo, co sineha na jni, co sineha na nntaöhe coxigo diguisinguehe na ttosin. Co cai que sinttejoacaoha na nchí que jeha nchíchihí na o xí que jeha xixihi na.

Are tse na Pablo ngain nihngo icha importante

²⁶ Cottimeja Pablo sajoicao tti nó xí co nchanho yoxin joinchehe inchin joinchehe xa para ixin vintte xa jian para ixin Dios. Cottimeja Pablo joixinhi nihngo icha importante para ndache na xidána quesa jehe co tti nó xí tsjehe na sinchehe na jamé, rrocho quesa nchao soen na coxigo que sanjo na ngain Dios.

²⁷ Are merocoa vatto tti yáto nchanho are rrocojian tti nó xí, canxion chojni judío que joixin nonttehe Asia vicon na Pablo ngain nihngo icha importante. Chojni mé joincheña na cainxin chojni co tse na Pablo.

²⁸ Co ndacho na sén:

—Jaha ra xo xí Israel, xacoi ra co ttjenguijna ni ra. Xí jihi ttingaria xa cainxin rajna co ndache xa cainxin chojni ixin sitticaonha na chojni na co sitticaonha na ley que

vayé Moisés co sitticaonha na xidané ningoa na jihi. Cai joiaho xa canxion chojni griego ngaxinhi nihngo jihi co jañá joinchehe na menos ningoa na.

²⁹ Jañá ndaço na ixin jehe na vicon na Pablo ngain ciudad de Jerusalén conixin ná xí griego vinhi Trófimo que joixin xa ciudad de Efeso. Co jehe na xaxaon na ixin Pablo joicao xí mé ngaxinhi nihngo icha importante; pero Pablo joincheha jamé.

³⁰ Co cainxin chojni ngain Jerusalén anto coñaon na co coinga na xatete na. Cottimeja tse na Pablo co coianganji na vantsjexin na de nihngo icha importante co coejé na puerté nihngo mé.

³¹ Jehe na joinao na narrogoenxon na Pablo, pero jehe tti vaquetonhe xisoldado romano coinhi ixin cain chojni ngain Jerusalén anto coñaon na.

³² Co rato mé jehe tti vaquetonhe xisoldado vayé xisoldadoe co icha xí que vaquetonhe icha xisoldado co cain xí mé coinga xa cjoí xa tti vintte cainxin chojni. Co are cain chojni vicon xisoldado co tti vaquetonhe xisoldado, jehe na igoenha na Pablo icha.

³³ Cottimeja jehe tti vaquetonhe xisoldado conchienen ngain Pablo co coetonhe xisoldadoe ixin tse xa Pablo co ixin coiatte xa Pablo conixin yó cadena. Cottimeja joanchiangui ixin quensen Pablo co quehe joinchehe.

³⁴ Pero cainxin chojni coyaotte na co nichja na ojejé cosa. Mexinxin tti vaquetonhe xisoldado çhoha chonxin quehe conhe ixin anto coyao chojni. Co coetonha ixin sajoicao xa Pablo ngain tti vintte xisoldado.

³⁵ Co are xisoldado joihi xa conixin Pablo ngain escaloen tti vintte xa, jehe xa chonda que vatsin xa Pablo noi ixin chojni joinao rrogoen Pablo iná.

³⁶ Ixin cainxin chojni rroé na co ndaço na sén:
—Nadoenxon ra.

Tti ndaço Pablo ngattoxon con cainxin chojni

³⁷ Co are sajidicao xa Pablo tti vintte xisoldado, Pablo ndache xivaquetonhe xisoldado:

—¿Anchao rronichja nganji?

Co tti vaquetonhe xisoldado joattehe:

—¡Pero jaha nchao nichja nguigoa griego!

³⁸ Mexinxin jaha jaha xí que joixin Egipto que nchion sé coetocaho xa gobierno co sajoicao xa ngagaha jna nó mil xisoldado que anto chintto.

³⁹ Cottimeja Pablo ndaço:

—Janha ná judío que joixin ciudad de Tarso que mé ná ciudad importante ngain nonttehe Cilicia. Co nttatsanha ñao, chjana joachaxin ixin rronichja ngain cainxin chojni.

⁴⁰ Co tti vaquetonhe xisoldado chjé joachaxin co Pablo vingattjen ngataha escalón mé, co joinchechjian seña conixin rá para joinchetencao cainxin chojni. Co are cainxin na tencao na, Pablo nichjé na ixin nguigoa hebreo co ndaço:

22

¹ —Jaha ra, ço chonda ra nchion tsje nano inchin janha co ço daçhichjan ra, ttinhi ra quehe rronhattjo ra.

² Co are coinhi na ixin Pablo nichjexin na nguigoa hebreo, jehe na tencao na icha co Pablo ndache na:

³ —Janha ná judío na. Co goanxin na ngain ciudad de Tarso nonttehe Cilicia co vanguixin na nttihi ciudad de Jerusalén co Gamaliel cjoí ximaestrone. Jehe xa joinchecoanna xa jian de ixin ley que vayé Moisés. Cainxin nchanho janha joinaho jointtaha inchin janha xaxanho que Dios rinao, inchin jaha ra nchehe ra jai.

⁴ Icha saho janha rroá co tse chojni que ditticaon Jesús co coixian na ngain cárcel, xí co nçhí, co coetonha ixin nagoenxon na na.

⁵ Xidána icha importante co cainxin xittetonha ngain ningoa ra nchao rronhattjo ra na ixin jehe na chjana na carta para ixin chojni judío ngain ciudad de Damasco. Mexinxin janha cjoí nttiha ixin rrotse chojni que ditticaon Jesús para rrojiquian na nttihi Jerusalén co rrochjaha na castigo.

Pablo ndache na quexén vitticaon ngain Jesús

(Hechos 9.1-19; 26.12-18)

⁶ Co janha sacjoi, pero are ngatja nttiha chiaon ciudad de Damasco inchin chonguixin, rato mé vingasantte na ná çohi que joixin de ngajni ngá nttiha tti rrittji.

⁷ Co janha joaritsinga ngataha nontte. Cottimeja coian inchin ná tté chojni que ndachjenji na: “Saulo, Saulo, çquedonda jaha ningaonna co feo nchena?”

⁸ Cottimeja janha joanchianguia co ndaçhjan: “¿Quensen soixin?” Co ndachjenji na: “Janha Jesús tti joixin rajna Nazaret tti jaha ningaconhe co feo nchehe ngain.”

⁹ Co chojni que cjoinha janha cai vicon na xohi mé. Pero anto xaoon na ixin coinha na tté Jesús que nichja nganji janha.

¹⁰ Cottimeja janha ndattjan: “¿Soixin, quehe chonda que sinttaha janha?” Co jehe ndachjenji na: “Dingattjen co nchehe sigue sattji ciudad de Damasco. Nttiha jí chojni que rrondatto cainxin tti chonda que sinchehe jaha.”

¹¹ Co rato mé janha xhoha vicon ixin xohi mé joinchenihi jmacon na janha. Co chojni que cjoinha janha tse na na rana co sacjoinha na hasta joaso na Damasco.

¹² Nttiha vehe ná xí vinhi Ananías. Co xí mé anto nchesayehé xa Dios co anto ditticaon xa ley que vayé Moisés. Co cainxin chojni judío que te ciudad de Damasco nichja na jian de ixin xí mé.

¹³ Co Ananías jói joitsjena co ndachjenji na: “Hermano Saulo, jaxon jaha sicon iná.” Co rato mé janha onchao vicon, co nchao tsjá xa.

¹⁴ Cottimeja Ananías ndachjenji na: “Dios de nindogoelitoa na ocoinchiaha jaha de osé. Jehe coinchiaha jaha para satsoan tti rinao Dios, co para rrochonxin Jesucristo, tti xonhi tiempo joinchehe cosa jianha, co para tsinhi tti rrondatto jehe Jesús nganji jaha.

¹⁵ Jañá joinchehe Dios para ixin jaha rronichja de ixin Jesús ngain cainxin chojni co jaha tsequinhi na tti vicon co tti coinhi.

¹⁶ Choenha icha. Ditticaon ngain Jesucristo co dingattjen co diguite para sinhi chojni Jesús. Co jañá sitjañehe cain tti jianha que joinchehe.”

Pablo coequin quedonda sacjoi ngain chojni que jeha judío

¹⁷ Co Pablo ndaño cai:

—Co are janha sacjan na nttihi Jerusalén, sacjoi ngain nihngo icha importante para jointtaoanxian Dios. Co nttiha janha vicononxinna Jesús, tti chonda cain joachaxin,

¹⁸ co ndachjenji na: “Jaca satsjixin de ciudad de Jerusalén ixin nttihi sitticaonha na tti jaha rrondatto de ixin janha.”

¹⁹ Cottimeja janha ndattjan Jesús: “Soixin, cainxin chojni mé nohe na ixin janha vangaria tsje rajna co joixinhi cainxin ningoe cain rajna mé para vatse chojni que ditticaon na soixin, co gonhe na co coaixian na ngain cárcel.

²⁰ Co are chojni coaxin na xo Esteban ixin jehe nchehe xa de nichja de ixin soixin, janha joarihi nttiha co vicon. Are mé, janha joarihi de acuerdo conixin tti jehe na joinchehe na co janha joarinda lonttoe na que vinttetsá na are goen na Esteban.” Jañá ndattjan Jesús.

²¹ Pero Jesús, tti chonda cain joachaxin, ndachjenji na: “Sattji ixin janha rrorroanha cjin ngain chojni que jeha judío.”

Are Pablo ngá rá tti vaquetonhe xisoldado

²² Cain chojni nttiha coinhi na tti ndaño Pablo hasta jehe ndaño ixin jehe tsji ngain chojni que jeha judío. Co are mé coexinhi na ndaño na sén:

—Icha jian xí jilhi ndasenehe xa. Jiquininxinha sechon xa.

²³ Co ixin anto coñaon na, coyaotte na co contsenga na lonttoe na que vinttetsá na co cjoa na jinche para noi.

²⁴ Co tti vaquetonhe xisoldado coetonha ixin sajoicao xa Pablo ngaxinhi tti vintte xisoldado. Co ndache xisoldadoe ixin rrogoen xa Pablo conixin ná cuarta de roa para rroquequin Pablo quedonda cainxin chojni coyaotte na.

²⁵ Co are joexin coenchoa xa rá co rotté Pablo ixin rrogoen xa, Pablo ndache xicapitán que vengattjen nttiha:

—¿Achonda ra joachaxin para sonhe ra ná chojni romano saho de sinchejuzguehe ra jehe?

²⁶ Are xicapitán coinhi xa yá, sacjoi xa co ndache xa tti vaquetonhe xisoldado co ndaño xa:

—Ttjiho cuidado tti sinchehe ngain xí yá ixin jehe xa ná chojni romano xa.

²⁷ Cottimeja tti vaquetonhe xisoldado conchienne ngain Pablo co joanchianguihi co ndaño:

—¿Andoa jaha ná chojni romano?

Co Pablo joattehe:

—Jan, ndoa.

²⁸ Cottimeja tti vaquetonhe xisoldado ndaño:

—Janha cjoenga hna tsje tomi ixin goan na chojni romano.

Co Pablo ndaño:

—Pero janha ná chojni romano ixin ndodana cjoí ndo ná chojni romano cai.

²⁹ Are xisoldado que rrogoen Pablo coinhi xa mé, joixintonxin xa de tti jí Pablo. Co tti vaquetonhe xisoldado xaoon are conohe ixin Pablo ná chojni romano ixin jehe ocoetonhe xisoldadoe ixin coenchoa xa Pablo. Co jiquininxinha rrojinchehe xa jamé ngain ná chojni romano.

Are Pablo cjoí ngain juzgadoe nihngo

³⁰ Co ixin tti vaquetonhe xisoldado joiñao chonxin quehe ndaço chojni judío ixin quehe cosa jianha joinchehe Pablo, mexinxin nchanho yoxin jehe joantsjehe cadena veçoaxin Pablo co coetonha ixin xatte cain xidána que vaquetonha ngain icha xidána co cain xidána que vechonda joachaxin de juez ngain juzgadoe na. Cottimeja jehe tti vaquetonhe xisoldado sajoicao Pablo ngain juzgado mé co coetonhe Pablo ixin vingattjen ngagué cain nimé.

23

¹ Pablo tsjehe ngain xite ngain juzgadoe nihngo co ndache xa:

—Soixin ra, janha tonona çhjoin ngain ansenna ngattoxon con Dios de ixin cainxin tti janha jointtaha ngain vidana.

² Cottimeja Ananías que vehe xidána icha importante coetonhe chojni tsingaxintonxin de çhiqué Pablo ixin rroquedoe na manaso rroha.

³ Co Pablo joattehe xa:

—Jaha tti ncheha inchin ndaço, Dios cai soen jaha! Jaha nttihi rrihi ixin rrondachjenji na quehe jianha jointtaha janha inchin jitaxin ley. Pero ley çhjaha joachaxin para coetonha chojni ixin rroquedoehna na manaso.

⁴ Co chojni que vengattjen nttiha ndaço na:

—¿Quedonda jaha nichja feo de ixin xidané Dios? ixin jehe xa tti dána icha importante.

⁵ Pablo ndaço:

—Soixin ra, nonaha ixin jehe xidána icha importante. Si janha rroconona yá, rronichjaha tti janha onichja ixin jitaxin ngain Palabré Dios: “Nichjaha jianha de ixin ná tti tteonhe chojnia.”

⁶ Cottimeja Pablo conohe ixin chojni ngain juzgadoe nihngo vechonda yó grupo. Ná grupo vehe chojni saduceo. Co iná grupo vehe chojni fariseo. Mexinxin Pablo ndaço anto sén:

—Soixin ra, janha ná xifariseo na co ndodana cai cjoí ná xifariseo. Co soixin ra nttihi para rrondaço ra si janha jian na ni jianha na ixin ditticanho que tti nindadiguenhe chonda que rroxechon na.

⁷ Are Pablo ndaço yá, xifariseo co xisaduceo coexinhi xa joinchediscutí xa. Co cayoi grupoe xa çaxaon xa ojeje.

⁸ Ixin xisaduceo vandaço xa ixin tti nindadiguenhe irrocjanha rroxechon na co ixin çonhi ángel jí co ni çonhi espíritu jí. Co xifariseo vandaço xa que ján jí cain mé.

⁹ Cainxin xa coyao xa icha co icha. Cottimeja vingattjen canxion ximaestroe ley que vaquitticaon xa inchin xifariseo co ndaço xa:

—Xí jiji çonhi cosa jianha joinchehe xa. Co puede ná espíritu jian o ná ángel de Dios onichja ngain xa, mexinxin tjiho na cuidado que ixin rroningacoehna na Dios.

¹⁰ Co anto joinchediscutí xa hasta tti vaquetonhe xisoldado çaon ixin puede nasoexon xa Pablo. Mexinxin rroanha joajna ngain xisoldadoe ixin vantsjexin xa Pablo de nttiha co sajoicao xa Pablo tti vintte xa iná.

¹¹ Co are ttie Jesús, tti chonda cain joachaxin, çago ngain Pablo co ndache:

—Çaonha Pablo, ixin jaha rronichja de ixin janha ngain ciudad de Roma inchin jaha onichja nttihi Jerusalén.

Are çaxaon na queçén narrogoexon na Pablo

¹² Co nchanho yoxin canxion chojni judío cjoao chó na ixin narrogoexon na Pablo. Co joinchejurá na ixin rrojineha na ni rroguiha na hasta narrogoexon na Pablo. Co ndaço na ixin Dios nchao rrojinehe feo ngain na si nasoexonha na Pablo.

¹³ Co cain nicjoao chó mé icha que cuarenta xí.

¹⁴ Co sacjoi na ngain xidána que vaquetonha ngain cain icha xidána co ngain xivaquetonha ngain nihngo judío co ndache na xa:

—Janha na jointtajurá na co ndattjan na Dios ixin nchao sinchehe feo nganji na si nasoexonha na Pablo. Co jointtajurá na ixin sineha na ni siha na hasta soenja na Pablo.

¹⁵ Mexinxin jaxon, soixin ra co icha chojni que chonda joachaxin ngain juzgadoe nihngo, ndache ra tti tteonhe xisoldado ixin ndoe tsiaho Pablo nganji ra iná. Co ndache ra ixin rinao ra sanchianguihi ra icha. Pero Pablo tsiaho ixin janha na rrochoan na ngatja nttiha para sonhe na.

¹⁶ Co xancoén Pablo, xenhe nçhichó Pablo, conohe xan cain yá co sacjoi xan tti vintte xisoldado para ixin ndache xan Pablo cain yá.

¹⁷ Cottimeja Pablo vayé ná xicapitán co ndache xa:

—Nttatsanha ñao, ttjiho xan jiji ngain tti ttetonhe xisoldado ixin chonda xan ná joajna para ixin jehe.

¹⁸ Xicapitán mé joicao xa xan ngain tti vaquetonhe xisoldado co ndache xa:

—Pablo tti jiaxinhi vayahna para ixin joiquian xan jiji nganji ixin jehe xan chonda xan ná joajna para ixin soixin.

¹⁹ Tti vaquetonhe xisoldado tse ná rá xan mé co joantsjenda xan nchion co joanchianguihi xan co ndačo:

—¿Quehe rinao rrondachjenji na?

²⁰ Cottimeja xan mé ndache xan:

—Canxion chojni judío ocjoao chó na ixin rrondattjo na soixin ixin ndoe tsjiho Pablo ngain juzgadoe nihngo. Jehe na rrondattjo na ixin rinao na sanchianguihi na Pablo icha.

²¹ Pero soixin ditticaonha na ixin ngatja nttiha sema icha que cuarenta xí de ngain ladoe na rrochonhe xa Pablo ixin nasoenxon xa. Co ojoincejurá xa ixin Dios nchao sinchehe feo ngain xa isi soenha xa Pablo co cai sineha xa ni siha xa hasta soenja xa Pablo. Co jaxon techonhe xa quehe rrondacho soixin.

²² Cottimeja tti vaquetonhe xisoldado ndache xan ixin rrondacheha xan ni ná chojni tti ndache xan jehe. Cottimeja coanchjanda xan sacjoi xan.

Are rroanha na Pablo ngain xigobernador Félix

²³ Cottimeja tti vaquetonhe xisoldado vayé yó xicapitén co ndache xa:

—Sico yó ciento xisoldado que tsjixin rotté co setenta xisoldado que sinttetaha conxin co yó ciento xisoldado que sicao lanzé. Co cainxin ra sattji ra ttie a las nueve ngain ciudad de Cesarea.

²⁴ Co cai ttjiho ra canxion conxin para ixin Pablo setaha. Co dinttenda ra Pablo hasta saso ra ngain Félix xigobernador ixin xonhi tsonhe.

²⁵ Co tti vaquetonhe xisoldado rroanha ná carta conixin xisoldado mé, co carta mé ndačo carta:

²⁶ “Janha Claudio Lisias chjaha joajna nganji soixin Félix xigobernador.

²⁷ Chojni judío coiaxinhi xí jiji co joinao na narrogoenxon na xa. Pero are janha conona ixin jehe xa ná chojni romano, janha cjoi conixin xisoldadona co vantsjexin xa de ngá rá chojni judío.

²⁸ Co janha cjoinha xa ngain juzgadoe ningoe chojni judío ixin joinaho conona quehe cosa jianha joinchehe xa.

²⁹ Co janha vicon ixin chojni judío anto coñao na ngain xa pero jeho ixin jehe xa ditticaonha xa ley de jehe na. Pero jiquininxinha senhe xa ni jiquininxinha seaxinhi xa cárcel.

³⁰ Cottimeja coian ixin canxion chojni judío ocjoao chó na ixin nasoenxon na xa. Mexinxin janha rroanha xí jiji nganji soixin. Co janha ondattjan chojni judío que chonda que rrondattjo na soixin quedonda anto coñao na ngain xa.” Janhi jitaxin carta mé.

³¹ Cottimeja cainxin xisoldado joinchehe xa inchin vitonhe xa. Tse xa Pablo co are naxin xehe sajoicao xa ngain rajna Antípatris.

³² Co nchanho yoxin xisoldado que vacjixin rotté sacjan xa ngain tti vintte xa. Co xisoldado que vicao conxin sajoicao xa Pablo hasta ciudad de Cesarea.

³³ Co are joihi na ngain Cesarea, joanjo xa carta ngain xigobernador co cai cointtohe xa Pablo nttiha.

³⁴ Co are xigobernador joexin tsjehe xa carta mé, joanchianguihi xa Pablo ttinó joixin. Co are coinhi xa ixin Pablo joixin nonttehe Cilicia,

³⁵ ndache xa:

—Janha tsian tti rrondačo jaha are tsí nioičo jie de ixin jaha.

Cottimeja coetonhe xa xisoldado ixin venda xa Pablo ngaxinhi palacioe Herodes.

24

Tti nichja Pablo ngain Félix

¹ Are vatto naho nchanho, Ananías, tti xidána icha importante, joihi Cesarea conixin canxion xivaquetonha ngain nihngo judío. Co cai sajoicao ná xiabogado vinhi Tértulo. Cain nimé sacjoi na ngain xigobernador para joičo na jie de ixin Pablo.

² Co are Pablo conchienne ngain xigobernador, Tértulo coexinhi čo jie de ixin Pablo co ndache Félix xigobernador:

—Dio rrotsjenga hna soixin ixin cain na te na jian co ttetoha na. Co nonttehna na anto chjoin jí ixin soixin xaxaon jian co nchehe tsje cosa jian para ixin janha na.

³ Janha na anto rinaho na chjaha ra soixin gracias ixin cain tti jian que dayá na de nganji soixin.

⁴ Co janha na rinaoha na santsjaha ra tsje tiempo. Pero nttatsanha ñao, ttinhi nchion tti janha na rrondachjan na.

⁵ Janha na onona na ixin xí jihi anto joincheñao xa chojni. Co ngain cainxin nontte cjoí xa ngayé chojni judío co joinchexjan xa division. Jehe xa tti tettonhe xa chojni que ditticaon Jesús, tti joixin rajna Nazaret.

⁶ Co jehe xa joinao xa rrojinchehe xa menos ningona na icha importante. Pero janha na tse na xa co joinaho na rrochjaha na xa castigo inchin jitaxin ley na.

⁷ Pero Lisias, tti tettonhe xisoldado, joí co afuerza vantsjejenanxin na xa.

⁸ Co cai ndacho ixin chojni que joícho jie de ixin Pablo chonda que joí na nganji soixin. Co si soixin sanchianguihi xí jihi, soixin rrochonxin ixin ndoa tti joíchjan na jie de ixin jehe xa.

⁹ Co chojni judío que te na nttiha ngain xigobernador cai ndacho na ixin ndoa cain tti ndacho Tértulo.

¹⁰ Cottimeja xigobernador joinchehe xa ná señal ngain Pablo ixin nchao rronichja. Co Pablo ndacho:

—Anto chahna ixin soixin tsinhi tti janha rronichja, ixin janha nona que tsje nano soixin rritettonha ngain nontte jihi.

¹¹ Jai vittja tteyó nchanho que janha cjoí ngain Jerusalén para ixin jointtasayá na Dios. Soixin nchao tsonoha isi andoa ni nahi.

¹² Co janha xonhi chojni cjoao co xonhi chojni jointtañao ngain nihngo icha importante, ni ngain icha nihngo, ni ngain iná parte de ciudad mé.

¹³ Chojni tehe chondaha na quehe rrocho na jie de ixin janha ixin janha xonhi jianha jointtaha.

¹⁴ Pero tti ján ndoa es que janha nttasayá Dios inchin nindogoelitona na vanchesayehe na Dios ixin janha nttaha inchin Jesús tettonha. Mexinxin chojni tehe tendacho na ixin janha rrinttasayá Dios ngain ná manera ojé, pero ndoaha. Ixin janha ditticanho cainxin tti jitaxin ley que vayé Moisés co ditticanho tti ndacho profeté Dios.

¹⁵ Janha chonda confianza ngain Dios inchin chojni tehe ixin ditticanho que tti nindadiguenhe rrocjan rroxechon na masqui cjoí na chojni jian o ni nahi.

¹⁶ Mexinxin cainxin tiempo janha rinaho nttaha jian ngattoxon con Dios co ngattoxon con chojni.

¹⁷ 'Co canxion nano janha ojoiningaria tsje rajna. Cottimeja janha sacjan na ngain Jerusalén ixin janha cjoinha tomi ngain ninoa, co tomi mé tomi vachjana chojni. Co cai sacjan na para ixin rroganjo coxigo para ngain Dios.

¹⁸ Co janha cjoí ngaxinhi nihngo icha importante para jointtaha jamé, co ojointtaha inchin jitaxin ley para varihi ná chojni jian ngain Dios. Co are mé canxion chojni judío que joixin nonttehe Asia vicon na ixin janha tarrihi ngaxinhi nihngo mé. Pero tsjeja chojni vehe nganji na co xonhi chojni jointtañao.

¹⁹ Icha jian si chojni que vicon na nttiha tsí na nttihi co rrocho na jie de ixin janha si rrondacho na ixin janha jointtaha jianha.

²⁰ O que chojni tehe que cai vintte na ngain juzgadoe nihngo rrondacho na quehe cosa jianha xijuez de ngain juzgado ndacho xa ixin janha jointtaha.

²¹ ¿Apoco janha nichja jianha are janha ndattjan na sén: "Jai soixin ra chonda ra que sinchejuzgana ra ixin ditticanho que tti nindadiguenhe chonda que rrocjan rroxechon na"?

²² Are Félix coinhi yá, jehe joinao rronichja na icha pero iná nchanho ixin jehe oconohe jian quexén nchehe chojni que vaguitticaon Jesús. Co jehe ndache na:

—Are tsí Lisias, tti tettonhe xisoldado, jehe rrondachjenji na icha de ixin jihi.

²³ Cottimeja Félix coetonhe xicapitán ixin sinchehe xa sigue senda xa Pablo pero coetonha cai ixin rrochjé xa Pablo nchion libertad co cai tsanchjanda xa niamigoe Pablo sitsjehe na co sicaohe na Pablo tti sondehe.

²⁴ Are vatto canxion nchanho cottimeja Félix cjoí ngain Pablo iná. Co joicao çhihi vinhi Drusila que mé ná nchí judía. Co Félix coetonha ixin vayé na Pablo ixin joinao rronichja de ixin quexén ná chojni sitticaon Jesucristo.

²⁵ Co Pablo ndache Félix ixin chonda que sinchehe ni jian inchin Dios rinao co ixin çhoha sinchehe ni inchin cuerpoe ni rinao co ixin tsí ná nchanho are Dios sinchejuzguehe cain chojni. Co are Félix coinhi cain mé, anto xaon co ndache:

—Sattji jaxon. Co are janha rrochonda icha tiempo janha sayaha iná.

²⁶ Félix xaaxon ixin puede Pablo rroganjo tomi ngain para ixin rrocanchjanda. Mexinxin jehe coetonha ixin vayé na Pablo tsje nttiha para ixin cjoao Pablo.

²⁷ Jañá vatto yó nano, cottimeja Félix cointtohe de vehe xigobernador. Co ná xí vinhi Porcio Festo coexinhi vehe gobernador. Co Félix joinaoha ixin chojni judío rrocoñao ngain, mexinxin cointtohe Pablo ngain cárcel.

25

Are Pablo nichja ngain Festo

¹ Cottimeja Festo joihi ngain ciudad de Cesarea para ixin coexinhi vehe gobernador. Co are vatto ni nchanho, sacjoixin de ngain Cesarea co cjoí ngain Jerusalén.

² Nttiha xidána que vaquetonha ngain icha xidána co chojni judío que vechonda joachaxin joiçho na jie de ixin Pablo ngain Festo.

³ Co jehe na oçjoao chó na ixin rroanha na xí ixin rrogoen xa Pablo ngatja nttiha. Mexinxin anto joinchetsenhe na ñao Festo ixin rrogayé Pablo ngain Jerusalén.

⁴ Pero Festo çhoça co joattehe ixin Pablo veaxinhi nttiha Cesarea co jehe çaxaon ixin tsjeha nchanho rroconçhenhe co toin rrocjan nttiha.

⁵ Co ndache na:

—Nçhao nittetoanha ra tsjinha na ngain ciudad de Cesarea co jehe na siçho na jie de ixin Pablo, si jehe joinchehe jianha.

⁶ Festo vittohe ngain Jerusalén jehó jni o tte nchanho icha, cottimeja sacjan ngain ciudad de Cesarea. Nchanho yoxin jehe vetaha xintaon que gondehe are vehe gobernador co coetonhe xisoldado ixin vayé xa Pablo.

⁷ Co are Pablo joi, çatte tsje chojni judío que joixin de Jerusalén co chojni mé joiçho na jie de ixin Pablo co ndaçho na ixin jehe joinchehe anto tsje cosa jianha, pero çhoça joincheguitticaon na Festo que ixin ján seguro Pablo joinchehe jamé.

⁸ Cottimeja Pablo ndaçho de ixin jehe mismo:

—Janha çonhi jianha jointtaha ngain ley chojni judío, ni ngain nihngo icha importante, ni ngain emperador romano.

⁹ Festo joinaoha ixin chojni judío rrocoñao na ngain, mexinxin ndache Pablo:

—¿Arinao satsji Jerusalén? Co nttiha janha sinttajuzgaha jaha.

¹⁰ Co Pablo joattehe:

—Jaxon janha rrihi ngain juzgadoe emperador romano co nttihi tti janha jiquininxin soan na juzgado co nahi ngain Jerusalén. Soixin ochonxin que janha çonhi jianha jointtaha ngain chojni judío.

¹¹ Si janha jointtaha jianha co jiquininxin ndasenhe na, janha rronichjaha nahi. Pero si jehe na ndaçho na ndoaha de ixin janha, çonhi chojni chonda joachaxin para sinchechienhe na janha ngain na. Janha rinaho que xiemperador ngain ciudad de Roma sinchejuzgana.

¹² Cottimeja Festo çjoao nivacjenguijna vaquetonha, cottimeja ndache Pablo:

—Jaha ndaçho ixin jaha rinao que ixin xiemperador sinttajuzgá; mexinxin jaha satsji ngain xa.

Are Pablo nichja ngain xirey Agripa

¹³ Canxion nchanho después Agripa xirey co Berenice nçhichó xa cjoí Cesarea para ixin joitsjehe na Festo.

¹⁴ Co ixin vittohe na nttiha nchion nchanho, Festo coequin Agripa de ixin Pablo. Co ndache xa:

—Jí ná xí que tti Félix cointtohe ngain cárcel nttihi are janha coexian joarihi gobernador.

¹⁵ Are janha cjoí Jerusalén xidána que tettonha ngain icha xidána co tti xí que tettonha ngain ningoe chojni judío joiçho na jie de ixin jehe xí mé. Co jehe na rinao na ixin janha sinttacondená xa para ndasenhe xa.

¹⁶ Co janha ndattjan na ixin ley romano ndaçho ixin çhoça sinchecondená ni ná chojni para ndasenhe antes que chojni mé tsinhi tti rrondaçho chojni que joiçho jie de ixin jehe. Co cai chonda que chojni mé rronichja de ixin quehe joinchehe jehe are chojni que tjanguihí tsinhi na tti rronichja jehe.

¹⁷ Mexinxin are chojni judío joi na nttihi, janha toin nchanho yoxin joaritaha xintaon xigobernador co vayá Pablo.

¹⁸ Janha çaxanho que jehe joinchehe ná cosa anto jianha, pero nijoiçho jie de ixin jehe nichjaha na inchin janha çaxanho.

¹⁹ Jehó ndaçho na ixin jehe ditticaonha religioen na. Co nichja na de ixin ná xí vinhi Jesús que ndavenhe. Pero Pablo ndaçho ixin xí mé jichon xa.

²⁰ Janha joinonaha quehe rrojinttaha, mexinxin janha joanchianguia Pablo si jehe rinao tsji Jerusalén para soenxin juzgado nttiha.

²¹ Pero Pablo ndačo ixin jehe rinao Augusto tti emperador sinchejuzguehe. Mexinxin janha coetonha ixin jehe vittohe ngain cárcel hasta que janha nchao rroanha jehe ngain emperador mé.

²² Cottimeja Agripa ndache Festo:

—Cai janha rinaho tsian tti rrondačo xí mé.

Festo joattehe:

—Ndoe tsinhi tti rrondačo xa.

²³ Co nchanho yoxin Agripa co Berenice vinttengá lonttoe jian co chjoin te. Co are chojni anto joinchesayehe na, cayoi na sacjoi na ngaxinhi ná cuarto jie tti vintte tsje nivaquetonhe xisoldado co tsje nivechonda joachaxin ngain ciudad mé. Festo coetonhe xisoldadoe ixin vayé xa Pablo.

²⁴ Cottimeja Festo ndačo:

—Rey Agripa co cainxin soixin ra que joihi ra, nttihi jí tti xí. Tsje chojni judío ngain Jerusalén co nttihi Cesarea joičo na jie de ixin jehe xa. Co cainxin nchanho ndachjenji na na ixin jehe xa jiquininxin ndasenne xa.

²⁵ Pero janha xaxanho que jehe xa xonhi joinchehe xa para jiquininxin ndasenne xa. Co ixin jehe xa joanchia xa que Augusto tti emperador sinchejuzguehe xa, mexinxin janha rrorroanha jehe xa ngain jehe emperadoar na.

²⁶ Pero janha nonaha tti cosa jianha que joinchehe xa para janha nchao rrocjin na joajna ngain emperador. Mexinxin janha vayá xa para soixin ra sicon ra co para rey Agripa sicon co sanchianguihi ra xa tti cosa jianha que joinchehe xa. Jamé puede janha nchao rrocjin na joajna para ngain emperador.

²⁷ Ixin xonhi xé si janha rrorroanha ná tti teaxinhi cárcel co choha rrondattjan tti cosa jianha que joinchehe.

26

Are Pablo nichja ngain rey Agripa

¹ Cottimeja Agripa ndache Pablo:

—Jaha nchao nichja de ixin tti jaha joinchehe jaxon.

Co Pablo vatsin rá para chjé joajna ngain Agripa co coexinhi nichja ngain co ndačo:

²—Soixin, anto chahna ixin chjana joachaxin de rronichja nganji soixin de ixin tti jianha que ndačo chojni judío de ixin janha.

³ Co cai anto chahna ixin soixin onoha jian cainxin costumbre de chojni judío co onoha quexehe cosa nchediscutí na. Mexinxin nttatsanha ñao soixin, ttinhi jian tti janha rrondattjo.

Quexén vanchehe Pablo icha saho, antes de que rroguitticaon ngain Jesús

⁴ Cainxin chojni judío chonxin quexén janha jointtaha ngayé na ngain rajnana co ngain ciudad de Jerusalén desde janha xa nchín na.

⁵ Co cai jehe na chonxin na co nchao rrondattjo na soixin, si jehe na rinao na, ixin de osé janha joarihi ná fariseo. Co xifariseo icha dicao cuidado de nchehe cainxin tti jitaxin ley que vayé Moisés que icha chojni judío.

⁶ Co jaxon janha nttihi rrihi para que soixin rrondačo ixin janha, ajian na ni jianha na ixin ditticanho que Dios sinchexechon nindadiguenhe inchin ndačo Dios ngain nindogoolitoa na.

⁷ Cainxin chojni ngain tti tteyó grupoe chojni Israel chonda na confianza ixin Dios sinchexechon nindadiguenhe ixin jañá ndačo. Mexinxin nchesayehe na Dios nchanho co ttie. Co jaxon, canxion chojni judío joičo na jie de ixin janha ixin janha chonda confianza mé cai.

⁸ ¿Apoco soixin ra xo judío ra ditticaonha ra ixin Dios sinchexechon nindadiguenhe?

Icha saho quexén Pablo vanchehe jianha ngain chojni que vaguitticaon Jesús

⁹ Icha saho janha vaaxanho ixin janha vanttaha jian are vanttaha feo ngain chojni que ditticaon Jesús, tti joixin rajna Nazaret.

¹⁰ Co jañá janha vanttaha ngain ciudad de Jerusalén. Co xidána que ttetonha ngain icha xidána chjana xa joachaxin de coixian tsje chojni que ditticaon Jesús. Co are jehe xa ndačo xa ixin navenxon na, janha cai ndačhjan ixin nchao vanchehe xa.

¹¹ Anto tsje nttiha janha jointtaha feo ngain chojni que ditticaon Jesús ixin rinaho que chojni mé irroguitticaonha na Jesús icha. Co jañá vanttaha ngain cainxin nihngo. Co janha anto vacoñaoa na, mexinxin hasta vacjé chojni mé ngain tsje rajna de ojé nontte.

*Pablo nichja iná de ixin quexén jehe coexinhi vitticaon Jesús
(Hechos 9.1-19; 22.6-16)*

¹² Co are janha vanttaha jamé, janha sacjoi ciudad de Damasco conixin joachaxin de xidána que ttetonha ngain icha xidána.

¹³ Pero are janha ngatja nttiha ngosine nchanho, janha vicon vingasantte na ná xohi que joixin ngajni ngá nttiha que rrittji janha conixin chojni que cjoinha. Co xohi mé anto icha soji xoi que nchanho.

¹⁴ Cottimeja cain na vinttji na ngataha nontte. Co janha coian tté Jesucristo nichjaxin nguigoahna hebreo co ndacho: “Saulo, Saulo, ¿quedonda ningaconna co feo nchena? Jaho rritoniha ixin jaha inchin coxintá are xantoe va con garrocha.”

¹⁵ Cottimeja janha ndachjan: “¿Quensen, soixin?” Co Jesús, tti chonda cain joachaxin, ndacho: “Janha Jesús tti jaha ningaconhe co feo nchehe ngain.

¹⁶ Dingattjen, janha joihi nganji co nichjaha para sinchehe xana. Janha coinchiaha jaha ixin jaha rrondache chojni que xén jaha vicon na janha jai co cai tti janha tsjagoha jaha are jaha sicon na janha icha.

¹⁷ Co janha rrorroanha jaha ngain chojni que jaha judío. Co janha tsjenguijna jaha are jaha ngayé chojni judío co chojni que jaha judío para ixin cain chojni mé nasoenxonha na.

¹⁸ Janha rrorroanha jaha ngayé chojni que jaha judío para que jaha sincheoenhe na tti ndoa. Jamé jehe na tsinttohe na de nchehe na cosa jianha co tsexinhi na sinchehe na cosa jian. Co jehe na isitticaonha na tti ndacho xijianha, sino que sitticaon na ngain Dios. Co jañá janha sinttatjañá na cain cosa jianha que nchehe na. Co jehe na sintte na conixin icha chojni que coinchiehe Dios.”

Pablo vitticaon tti ndacho Jesús

¹⁹ Mexinxin, soixin, janha vitticanho cain tti ndacho Jesús nganji na are janha vicononx-inna.

²⁰ Janha saho nichja ngain chojni ngain ciudad de Damasco. Cottimeja nichja ngain chojni ngain ciudad de Jerusalén, cottimeja nichja ngain chojni ngoixin nonttehe Judea co ngain chojni que jaha judío. Janha ndattjan cain chojni mé ixin tsentoxinhi na vidé na co sincheha na cosa jianha, sino que sinchehe na cosa jian inchin Dios rinao para tsjagoe na icha chojni que ndoa jehe na coentoxinhi na vidé na.

²¹ Co canxin chojni judío tse na janha ngain nihngo ixin janha nichja jamé. Co chojni mé joinao rrogoen na janha.

²² Pero Dios cjoenguijna na, mexinxin janha xa rrinichja cain tti janha vicon ngain chojni noa co ngain chojni rico, co cainxin tti janha nichja jí de acuerdo conixin cain profeté Dios co Moisés dindacho ixin chonda que tsonhe.

²³ Co cain nimé dicjin na ixin Cristo chonda que anto tangui tsonhe co ixin Cristo ndasenhe co rroxechon icha saho de cainxin chojni que ndadiguenhe. Co jañá tti Cristo tsjagoe chojni judío co chojni que jaha judío ixin ndoa jehe nchao danjo ngain cain chojni iná vida naroaxin.

Pablo joinao ixin rey Agripa rroguitticaon Jesús

²⁴ Are Pablo jimichja cain yá de ixin jehe, Festo ndacho sén:

—¡Pablo, jaha ndadixenga! Jaha dixantte ttjelea ixin anto coangui xón.

²⁵ Pero Pablo joattehe:

—Nahi, soixin, janha dixengaha na. Cainxin tti janha ndachjan ndoa.

²⁶ Co nttihi jí rey Agripa. Jehe chonxin cain yá. Janha nichja ngain jehe conixin confianza ixin nona que jehe ochonxin cain tti janha ndachjan. Ixin cain tti ndachjan janha ndoa conhe ngattoxon con tsje chojni.

²⁷ Cottimeja Pablo ndache rey Agripa:

—Soixin, ¿aditticaon tti dicjin profeté Dios? Janha nona que soixin ditticaon.

²⁸ Cottimeja Agripa ndacho:

—Ngain nchion tiempo jihi ¿axaxaon ixin sinchequitticaon na Jesús?

²⁹ Cottimeja Pablo ndacho:

—Masqui nchion o tsje tiempo, anto jian si soixin co cain icha chojni nttihi que tettinhi tti janha rrinichja sitticaon ra co sintte ra inchin janha. ¡Pero nahi sietteha ra conixin cadena inchin janha!

³⁰ Are Pablo joexin nichja cain yá, xirey, xigobernador, Berenice co cain icha chojni que te nttiha vingattjen na,

³¹ co vachjexin na de cuarto co coexinhi na cjoao chó na co ndacho na:

—Xí jihi xonhi cosa jianha joinchehe xa, mexinxin jiquininxinha xa ndasenhe xa ni jiquininxinha xa siaxinhi xa cárcel.

³² Co Agripa ndache Festo:

—Si xi jihi rrondachoha xa ixin rinao xa que xiemperador sinchejuzguehe jehe xa, ján na nchao rrogatsje na xa de cárcel.

27

Are rroanha na Pablo para Roma

¹ Cottimeja jehe na cjoao chó na co rroanha na na janha na para nonttehe Italia. Co are mé jehe na ndache na ná xicapitán que vinhi Julio ixin sajoicao xa Pablo conixin icha nivintteaxinhi nttiha. Jehe Julio cjoí xicapitén ná grupoe xisoldado vinhi Augusto.

² Cai ná xí vinhi Aristarco que joixin xa de ngain ciudad de Tesalónica ngain nonttehe Macedonia cjoí xa conixin janha na. Coá na ná barco que joixin ciudad de Adramitio. Co barco mé vehe listo sajittji barco ngain canxion rajna ngain nonttehe Asia.

³ Co nchanho yoxin joaso na ciudad de Sidón. Julio joinchehe jian ngain Pablo co coančhanda Pablo vanianxin de barco co joitsjehe niamigoe nttiha co coančhanda niamigoe Pablo chjé na jehe tti gondehe.

⁴ Cottimeja janha na sacjoixin na de nttiha ngain barco. Anto soji jitja čhintto, mexinxin janha na vatto na nontte ngosine ndachaon dinhi Chipre ngain lado cjon ixin nttiha čhintto mé icha sojiha čhintto.

⁵ Cottimeja vattoa na ndachaon chian nonttehe Cilicia co nonttehe Panfilia. Co joaso na ciudad de Mira ngain nonttehe Licia.

⁶ Nttiha xicapitén xisoldado vittja xa ná barco que joixin ciudad de Alejandría co barco mé sajittji ngain nonttehe Italia. Jehe xa coetonha xa ixin janha na coá na barco mé para jointtaha sigue sacjoi na.

⁷ Co canxion nchanho sacjoi na anto yao co anto tangui joaso na chian rajna Gnido. Anto soji čhintto co čhoja sacjoi na nao icha, mexinxin vatto na chiaon rajna Salmón ngain nontte ngosine ndachaon dinhi Creta ixin nttiha čhintto icha sojiha.

⁸ Anto yao vatto na ngoixin nontte mé hasta joaso na ná lugar chian rajna Lasea. Co lugar mé anto nchao para cainxin barco dinttengattjen barco nttiha, mexinxin dinhi Buenos Puertos.

⁹ Are mé ovatto canxion semana hasta joaso na lugar mé, co anto chiaon tiempoe quin are anto soji čhintto. Mexinxin Pablo nichja tti řaxaon

¹⁰ co ndačo:

—Janha ndattjo ra ixin anto tangui tsoan na isi satsji na icha. Barco jiji rroxantte ixin anto soji tseto jinda. Co barco co cargue sitján. Co anto peligro para cain na ján na cai.

¹¹ Pero xicapitén xisoldado icha joinchehe xa caso tti ndačo xí que vagueca barco mé co tti ndačo xí que coehna barco mé.

¹² Co masqui lugar tti vintte na anto nchao para cainxin barco vaguengattjen, nchaoha nttiha para barco vaguittohe ngoixin tiempoe quin are anto soji čhintto. Mexinxin merocoa cainxin chojni řaxaon ixin icha jian janha na sacjoixin na de nttiha. Jehe na joinao na rrogaso na ngain ciudad de Fenice ngain řajeho nontte mé para rrogatto na tiempoe quin are anto soji čhintto, ixin ngain ciudad mé veva čhinttoe norte ni čhinttoe sur.

Are coeto ndachaon soji

¹³ Cottimeja joi ná čhinttoe sur que sojiha čhintto danto, co jehe na řaxaon na ixin nchao satsji na icha. Mexinxin janha na sacjoixin na de lugar mé co sacjoi na anto chiaon ngandehe ndachaon čhiqué nontte ngosine ndachaon que dinhi Creta.

¹⁴ Pero nchion después joi ná čhintto anto soji que joixin nontte mé co vinhi čhintto Nordeste. Čhintto mé anto soji joinchenguittjen čhintto barco mé.

¹⁵ Co čhintto mé coančhanda barco para sacjoi nao, mexinxin tti veca barco nda-joinchengattonoa barco. Cottimeja coančhanda ixin čhintto veca barco mé.

¹⁶ Co vatto na ná nontte nčin que jí ngosine ndachaon que dinhi nontte Claudia. Co nttiha čhintto mé joinchenguittjenha barco soji inchin icha saho. Mexinxin masqui tangui, janha na nchao vantsje na ná lanchachjan de ngataon jinda tti jičhoanito barco para xantteha lanchachjan mé.

¹⁷ Co joaqué na lanchachjan mé ngaxinhi barco. Cottimeja coiattehe na barco conixin jino jieto. Co joaqué na jino mé čhinguihi barco para ixin barco rroxantteha. Co anto řaon na ixin řaxaon na puede barco satsji ngain lugar vinhi Sirte, tti jí tsje nchise co ningaha jinda. Mexinxin jehe na joinchegania na manta jie que joinchegonda čhintto para deca barco. Cottimeja barco mé sacjoi lado jittjixin čhintto.

¹⁸ Co nchanho yoxin řa anto soji čhintto, mexinxin jehe na coexinhi na vancainhi na barco cargué barco čhingui ndachaon para ixin barco setsinganguiha jinda ixin anto soji coinguittjen jinda.

¹⁹ Co nchanho ninxin janha na conixin rana na vancanguixin na jinda tsje cosa tti nchexin na řa ngaxinhi barco.

²⁰ Tsje nchanho janha na viconha na ni nchanho ni conotse. Co janha na xaxanho na ixin ndarroguenhe na nttiha ixin xa anto soji coinguitjen ndachaon co chintto.

²¹ Co are vatto tsje nchanho que jehe na joineha na, Pablo vingattjen ngagué na co ndaço:

—Icha jian isi jaha ra rroguitticaon ra tti janha ndattjo ra icha saho. Icha jian isi rrocjixinha na de Creta. Pero jai cainxin cosé barco ndavitján.

²² Co jaxon janha ndattjo ra ixin taha ra joachjaon, ixin masqui barco jiji sitján, pero xonhi chojni ndasenhe.

²³ Jamé nona, ixin are naxin xehe jói nganji na janha ná ángel Dios, tti ttonna co janha rrinttaha xé jehe Dios mé.

²⁴ Co ángel mé ndachjenji na: “Xaonha, Pablo, ixin jaha chonda que satsji ngain emperador romano. Co ixin Dios anto rinao jaha, ni ná chojni conixin jaha ngaxinhi barco jiji ndasenhe.” Jañá cho ángel Dios.

²⁵ Mexinxin taha ra joachjaon ixin janha chonda confianza ngain Dios co ditticanho ixin cainxin cosa tsonhe inchin ndaço Dios.

²⁶ Pero seguro que masqui barco rroxantte, pero ján na saso na ngain ná nontte.

²⁷ Jañá vatto yó semana de chintto. Cottimeja ná tte joaso na ngain parte de ndachaon que vinhi Adria. Co johó chintto veca barco mé. Co ngosine tte mé, jehe nitenda na barco vicon na ixin barco mé ojoiji barco chiaon de ngain tti jí jinche.

²⁸ Jehe na vattechoha na jinda para chonxin na que xén ningaxin vehe jinda mé. Co jinda vechonda nda treinta y seis metros nttiha. Co are vatto na nchion icha, cjan na vattechoha na jinda iná co nttiha vechonda veintisiete metros.

²⁹ Co ixin jehe na xaon na ixin puede barco rroxantte ngataha xo, mexinxin vancahngui na jinda nó chia yeye conixin jino para ixin coengattjen na barco mé. Co jehe na anto joinao na jaca rrojingasán.

³⁰ Nivinttenda barco joinche xaxaon icha chojni ixin jehe na tedancahngui na icha chia jinda conixin jino nojaxin barco. Pero jehó joincheyehe na na ixin joinao na sarroquina na de ngain barco ngaxinhi lanchachjan.

³¹ Cottimeja Pablo ndache xicapitán co xisoldadoe:

—Si xí que tericao barco jiji sittoeha xa ngaxinhi barco, jaha ra ndasenhe ra chingui jinda.

³² Mexinxin xisoldado conchinji xa jinoo lanchachjan icha saho que xí que tericao barco vengá lanchachjan mé. Co sajoicao jinda lanchachjan mé.

³³ Co are ojidingasán Pablo ndache cain na:

—Icha jian isi jaha ra sintte ra ixin vatto yó semana co xonhi jointte ra ni vinttechinha ra.

³⁴ Mexinxin jinte ra para ixin rrochonda ra fuerza. Co taha ra joachjaon ixin xonhi tsonha ra ni tsoniaha ra.

³⁵ Co are joexin nichja Pablo cain yá, jehe tse ná niottja co chjé gracias ngain Dios are cainxin chojni coinhi na. Cottimeja jehe conchinji niottja mé co coexinhi joine nio.

³⁶ Cottimeja cain na goan na animado de ixin tti ndaço Pablo, co jehe na cai joine na.

³⁷ Co janha na vintte na doscientos setenta y seis chojni ngaxinhi barco mé.

³⁸ Co are joexin joine na niottja mé co ocojehe na, coexinhi na vancahngui na trigo ndachaon para ixin itsonontteha barco chingui jinda.

Are xantte barco

³⁹ Co are vingasán, jehe nitericao barco chonxinha na nontte ngosine ndachaon tti joaso na. Pero vicon na ná lugar ngandehe nontte mé ttinó jinda ijittinguitjenha nda co tti oji nchise. Jehe na joinao na rroguca na barco nttiha, si nchao.

⁴⁰ Cottimeja jehe na conchinji na jinoo chia yeye que coengattjenxin na barco co vittohe chia chingui jinda. Cottimeja coxindanguehe na direccioen barco chingui jinda que jehe na gondehe na para ixin veca na barco mé nao. Cottimeja jehe na vatsín na manta jie ngain já barco para ixin chintto nchao veca chintto barco mé. Cottimeja barco sacjoi ngain lugar tti ijittinguitjenha jinda.

⁴¹ Pero sacjoi na ngain lugar tti jinda vetanxin chó nda. Co jinda tse nda barco co sajoicao nda ngain ná jnanchjan de puro nchise chingui jinda. Co já barco mé choha vachjexin de nttiha. Co noton barco mé coexinhi xantte ixin anto soji goen jinda.

⁴² Rato mé xisoldado xaxaon xa ixin narrogoenxon xa tti vintteaxinhi ixin xaon xa que puede tti vintteaxinhi nchao sarroquina na are oviji na ngataha nontte xema.

⁴³ Pero xicapitán joinaoha xa ixin Pablo ndasenhe, mexinxin coanchandaha xa xisoldadoe xa goen xa tti vintteaxinhi; sino que coetonhe xa cain chojni que onohé nchenadá rrochinca na ngain jinda hasta siji na ngain nontte xema.

⁴⁴Co cai coetonhe xa cain chojni que noeha nchenadá ixin quexén satto ngataonhe jinda ngataha nttatablé barco co ngataha icha cosé barco. Co jañá cain na joaso na tti xema nontte co xonhi conna na.

28

Are Pablo ngain nonttehe Malta

¹Co are cain na joaso na nontte, coian na ixin nontte mé dinhi Malta.

²Co chojni nttiha coiaconoana na. Jehe na joinchechjian na ná xohi jie ixin anto quin co ixin jittí chin. Cottimeja ndachjenji na na ixin rroxixona na ngandehé xohi mé.

³Pablo tse ná manoj de nttaniho co joaquehe nta ngataha xohi. Co rato mé ná conché vathjexin va de ngacjan xohi mé ixin anto soa co joinehe va rá Pablo co taveriahnda va nganito rá Pablo.

⁴Are chojni que joixin nontte mé vicon ixin conché mé taveriahnda va nganito rá Pablo, jehe na ndache chó na:

—Seguro xí jiji ná tti doen chojni. Co masqui ndavenha xa ngain ndachaon, pero chonda que ndasenne xa ixin joinchehe xa jianha.

⁵Pero Pablo contsenga rá co vanca va ngatto xohi. Co xonhi conhe Pablo.

⁶Co chojni que joixin nontte mé chonhe na para ixin rroguicon na rrogatjoe rá Pablo o que rato mé ndarroguenne Pablo. Pero chonhe na sé co Pablo xonhi conhe, mexinxin xaxaon na ojé co coexinhi na ndaço na ixin Pablo ná dios.

⁷Ná xí vinhi Publio vaquetonhe nonttehe Malta. Jehe xa chonda xa jnguihi xa chiaon tti janha na texixona na, co jian vayahna na xa ngaxinhi nchiandoha xa ngoixin tti ní nchanho que vintte na nttiha.

⁸Tiempo mé ndodé Publio tavetsinga ndo ngataha saoen ndo ixin anto vechonda ndo soa co anto vechonda ndo diarrea. Pablo sacjoi joitsjehe ndo. Jehe tsín rá ngataha ndo co joinchecoanxinhi Dios. Co jehe ndo xingamehe ndo.

⁹Cottimeja cainxin chojni nihi ngain nontte mé joí na ngain Pablo co cain jehe na xingamehe na.

¹⁰Co anto tsje cosa joinchettohna na na. Co are janha na sacjoi na, jehe na cjoenguijna na na jointtaca na iná barco cain cosa mé.

Are Pablo joiji Roma

¹¹Are vatto ní conittjao que janha na vintte na ngain nontte mé, coá na iná barco que nttiha vehe ngoixin tiempo quin are anto soji chintto. Co barco mé joixin de ngain ciudad de Alejandría. Co ngain nojaxin barco mé vintte yó retratoe dios, ná vinhi Cástor co ná vinhi Pólux.

¹²Co ngain barco mé sacjoixin na de nonttehe Malta que jí ngosine ndachaon co joaso na ciudad de Siracusa. Vittona na nttiha ní nchanho.

¹³Cottimeja sacjoixin na de nttiha co sacjoi na chiaon ngandehé ndachaon hasta joaso na ngain ciudad de Regio. Co nchanho yoxin coexinhi cjoa ná chinttoe sur, mexinxin janha na sacjoi na norte co ndoexin joaso na ngain ciudad de Puteoli. Nttiha vanianxin na de barco.

¹⁴Nttiha janha na vetan na canxin chojni que vaguitticaon na ngain Jesús, co jehe na vayahna na na ngain nchiandoha na para ngoixin ná semana. Cottimeja janha na sacjoi na para ciudad de Roma.

¹⁵Co chojni que vaguitticaon Jesús ngain Roma coinhi na de ixin janha na. Mexinxin vathjexin na de ciudad mé co vetan na na ngatja nttiha. Canxion na sacjoi na hasta ngain rajna Foro de Apio co icha na sacjoi na hasta ngain lugar que dinhi Tres Tabernas para vetan na na. Co are Pablo vicon na, jehe chjé gracias ngain Dios co goan animado.

¹⁶Are joaso na ngain Roma, xicapitán joanjo xa tti vintteaxinhi ngain xivaquetonha cárcel de Roma. Pero jehe xa joanjo xa joachaxin que Pablo vittohe ngain ná nchia, jehe conixin nacoa xisoldado para venda xa.

Are Pablo joinchecoenne chojni de ixin Dios ngain Roma

¹⁷Are vatto ní nchanho de joaso na Roma, Pablo rroanha joajna cainxin nivaquetonhe chojni judío que vintte na nttiha Roma ixin xatte na ngain jehe Pablo. Cottimeja Pablo ndaço ngain na:

—Hermanos, masqui janha xonhi jianha jointtaha ngain chojni judío ni ngain costumbre que chonda na de ngain nindogoelitoa na xançhjen, pero masqui jamé coiaxinna na nttiha Jerusalén co joanjo na na ngá rá chojni romano.

¹⁸Co chojni romano anto cjoao na co ndaço na ixin janha jiquininxinha ndasenne na. Mexinxin jinao na rrocantçhjana na na rrogachjexin de cárcel.

¹⁹ Pero chojni judío çhoha na. Mexinxin janha chonda que joanchia ixin xiemperador sinchejuzgana janha masqui chondaha ni ná cosa jianha para rronichja de ixin chojni judío.

²⁰ Mexinxin janha vayaha ra ixin janha rinaho sicon ra co rronichjaha ra ixin jaxon janha rriçhoaxin cadena jecho ixin janha ditticanho ngain jehe tti techonhe cain chojni judío.

²¹ Cottimeja jehe na ndache na Pablo:

—Janha na çonhi joajna vayá na de ngain nontte Judea de ixin soixin. Co çonhi chojni judío que joixin nttiha nichja jianha de ixin soixin.

²² Pero janha na nona na ixin ngain cainxin lugar te chojni que anto çoñao ngain chojni que ditticaon Jesús. Mexinxin janha na anto rinaho na tsian na tti rrondachjenji ni ra soixin.

²³ Cottimeja jehe na coín na ná nchanho para ixin jehe na çatte na iná. Co nchanho mé jehe na co anto tsje icha chojni çatte na ngain nchia tti vehe Pablo. De vingasán hasta tti Pablo ndache na de ixin queçén Dios ttetonha. Pablo joinao ixin cain chojni mé rrochonxin na quensen Jesús, mexinxin conixin ley que vayé Moisés co çón que dicjin profeté Dios Pablo cjoagoe chojni de ixin quensen Jesús.

²⁴ Co canxion chojni vitticaon na tti ndaço Pablo co icanxin na çhoha vitticaon na.

²⁵ Co ixin vintteha na de acuerdo, sacjoi na cada na nchiandoha na. Cottimeja Pablo ndaço:

—Anto ndoa tti ndaço Espíritu Santo ngain nindogoe litoa na are nichjé Isaías co ndaço:

²⁶ Sattji ngain chojni tehe co ndache na:

Jaha ra ján tsinhi ra, pero tsinxinha ra.

Jaha ra ján sicon ra, pero rrochonxinha ra quehe rroçho tti sicon ra;

²⁷ ixin ansean ra anto concha

co rinaoha ra tsinhi ra

co coejehe ra jmacon ra

para que siconha ra conixin jmacon ra

ni tsinhi ra conixin ndatsjoan ra,

ni tsinxin ra ngain ansean ra

ni tsentoxinhi ra vidá ra para que janha sinttaxingamaha ra.

²⁸ Co cai Pablo ndaço:

—Mexinxin chonxin ra ixin Dios de jai pa ndaha sanjo joachaxin ngain chojni que jeha judío ixin sitticaon na Jesús co jehe sinchetjañehe na cosa jianha que nchehe na. Co chojni mé sinao na tsinhi na cain tti ndaço Dios.

²⁹ Co are joexin nichja Pablo cain yá, sacjoi chojni judío co anto joinchediscutí na de ixin cain yá.

³⁰ Co Pablo vittohe nttiha yó nano ngain nchia que joincherentá. Co vayé quexeho chojni vacji nchiandoha.

³¹ Co Pablo nichja de ixin queçén Dios ttetonha. Co joinchecoenhe chojni de ixin Jesucristo, tti chonda cain joachaxin. Co çonhi chojni cayacoen Pablo para nichja joajné Dios.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Roma

Pablo chjé joajna chojni ngain Roma

¹ Janha Pablo, ná ninchehe xé Jesucristo. Dios nichjahna janha co joantsjenda na para rrihi ná representanté jehe, para rrindattjan icha chojni joajné jehe que danjo iná vida naroaxin.

² Desde anto osé Dios ndačo joajna jiji ngain cain profeté, co jehe profeta cjin joajna jiji ngain tti libro que jitaxin Palabré Dios.

³ Jehe joajna jiji tti jinichja de ixin Jesucristo, Xenhe Dios. Co para nntihi ngataha nontte, Jesucristo mero razé rey David.

⁴ Pero para ixin ngajni, Espiritu Santo ndačo que Jesucristo Xenhe Dios, tti chonda cain joachaxin, ixin jehe xechon de tti ndavenhe.

⁵ De ixin Jesucristo, Dios chjana na joachaxin para que te na representanté jehe para que ngain cainxin nación, sintte chojni que sitticaon Dios co sinchehe na inchin jehe rinao.

⁶ Ngayé cain chojni jiji, te ra jaha ra cai, xo nichjaha ra Dios para goan ra chojni Jesucristo.

⁷ Mexinxin janha rricjinha ra jaha ra, xo te ra ngain ciudad de Roma, jaha ra xo Dios anto rinao ra, co nichjaha ra para sintte ra ngain ná vida jian para ixin Dios. Jehe Dios Ndadá na, conixin Jesucristo, tti chonda cain joachaxin para ixin ján na, cayoi nimé ni sinttanchaon ra co sanjo nganji ra tti chjoin que tsonohe ansean ra.

Pablo rinao sitsjehe chojni ngain Roma

⁸ Saho, de ixin Jesucristo, janha chjaha gracias ngain Dios para ixin cainxin jaha ra ixin cainxin parte de ngoixin mundo tenichja chojni de ixin tti jaha ra ditticaon ra ngain Jesucristo.

⁹ Co Dios, tti xé rrinttaha janha conixin ansenna ixin rrindattjan chojni tti jian joajné Xenhe Dios, jehe Dios nohe jian quexén janha xaxanho jaha ra cainxin nntiha que janha rrinttacoanxian Dios.

¹⁰ Janha cain tiempo rrinttatsán ñao Dios para que jehe rrochjana joachaxin para que jai janha nchao saso sasotsjaha ra.

¹¹ Ixin janha rinaho sicon ra co tsjenguijna ra de ngain tti ditticaon ra de ixin Jesucristo para que sitticaon ra icha jian;

¹² rročo para que sonttoanimá chó na conixin jehe tti dotticaon na jiji de jaha ra conixin janha.

¹³ Hermanos, janha rinaho que jaha ra tsonoha ra que tsje nntiha janha joinaho rrogaso para rrogasotsjaha ra, pero hasta jai xa choha. Janha rinaho saso nntiha Roma para sinttaguitticaon chojni nntiha de ixin Jesucristo inchin jointtaha ngain icanxin parte de ngoixin mundo.

¹⁴ Ixin Dios coetonna janha ixin chonda que sinttanoa cainxin chojni, sea griego o jeha griego; o chojni que chonxin jian, o chojni que xonhi chonxin.

¹⁵ Mexinxin jañá janha anto rinaho rrondattjo ra cai tti joajna que danjo iná vida naroaxin, jaha ra xo te ra ngain ciudad de Roma.

Joachaxin que chonda tti joajna jian

¹⁶ Janha tsoanaha de rrondattjan chojni tti jian joajné Jesucristo ixin mé joachaxin Dios para sanjo iná vida naroaxin ngain cain tti chojni que ditticaon joajna mé. Icha saho chojni nichja joajna jiji jeha ngain chojni judío, pero jai, cai nichja na ngain chojni que jeha judío.

¹⁷ Ixin joajna jiji tjagoa na quexén Dios nntaroo na ngatxoxon con jehe. Co jehe nttajian na de ixin tti confianza que ján na chonda na ngain Jesucristo, co jeha ixin chonda na confianza mé. Jamé ndačo ngain tti jitaxin Palabré Dios cai: “Tti chojni que dehe jian para ngain Dios conixin confianza que chonda ngain jehe, chojni mé rrochonda iná vida naroaxin.”

Tti teca chojni ngain Dios

¹⁸ Ján na docon na ixin tti anto soji castigoe Dios ttixin de ngajni para ngain chojni que jeha jian co nchehe na inchin jiquininxinha. Ixin tti jianha que chojni mé nchehe tančjandaha que rrochonxin na tti ján ndoa.

¹⁹ Cain chojni mé nohe na jian quexén rrochonxin ni de ixin Dios, ixin jehe Dios mismo cjoagoe na.

²⁰ Ixin desde que Dios joinchechjian mundo, cain chojni nchao chonxin na cosa de Dios que choha dicon ni, ixin nchao chonxin ni ixin tti joachaxin que jehe chonda xonhi tiempo tsjexin, co ni jehe Dios xonhi tiempo tsjexin. Co jiji jehe ni nchao satsoan ni de ixin ngain cain tti dinchechjian Dios; mexinxin cain tti chojni que ditticaonha ngain Dios, jehe sinchetjañeha cain chojni mé, ixin ¿quedonda ditticaonha na?

²¹ Co cain chojni mé masqui chonxin na jiji de ixin Dios, nchesayehe na inchin jiquininxin jehe, ni danjoa na gracias ngain jehe. En lugar de sinchehe na mé, jehe na joxon xaxaon na cosa que xonhi xé, co jamé naxin xehe para joarrixaoen na.

²² Masqui ndacho na que jehe na anto nohe na, pero jeha ndoa, ixin jehe na xonhi chonxin na.

²³ Ixin en lugar de rrojinchesayehe na Dios, tti ndoa jian, co tti xonhi tiempo ndasenne, jehe na nchesayehe na retratoe chojni que ndadenhe, co hasta retratoe conttoa, conché co icha coxigo nchesayehe na.

²⁴ Mexinxin Dios ndacointtohe na para nchehe na cosa jianha inchin jehe na rinao na, co jamé jehe na nchehe na cosa de joasoaxin de ná na co iná na.

²⁵ Jehe na vitticaonha na tti ndoa de ixin Dios, sino que jehe na vitticaon na ngain cosa ndoaha, co jehe na nchesayehe na co nchecoanxinhi na tsje cosa que Dios joinchechjian, co nahi Dios mismo tti jiquininxin tsocoanxinhi para cainxin tiempo. Amén.

²⁶ Mexinxin Dios ndacointtohe cain chojni mé para nchehe na cosa de joasoaxin inchin rinao cuerpoe na, ixin hasta nchi nchehe ncha ngain iná nchi tti jiquininxinha sinchehe ncha, mé jiquininxin nchehe ncha jeha ngain xixihi ncha.

²⁷ Co xajeho jamé nchehe xí cai, nchehe xa ngain iná xí cosa de joasoaxin que jiquininxinha; jeha jiquininxin sinchehe xa ngain chihi xa. Co hasta anto rinao cuerpoe xa sinchehe xa jamé. Xí mé nchehe xa cosa de joasoaxin ngain iná xí, co mexinxin Dios nchecastigá xa ngain cuerpoe xa de ixin tti jianha que jehe xa nchehe xa.

²⁸ Co ixin chojni mé irinaoha na datsoan na de ixin Dios, mexinxin jehe cointtohe na para xaxaon na cosa jianha, co para que sinchehe na sigue de sinchehe na tti tequininxinha na sinchehe na.

²⁹ Jehe na anto nchehe na cosa que jiquininxinha; ncheyehe na nchi co xí, nchehe na tti jianha, anto rinao na cosa de ngataha nontte, co jianha na. Co jehe na anto chjoehe na, dantsjehe na vidé icha chojni, ttjé na chijni, ncheyehe na icha chojni, xaxaon na cosa jianha, co ncheoxonhi na ttequin na cuentoe icha chojni que jiquininxinha tsequin na.

³⁰ Jehe na nichja na jianha de ixin icha chojni, ningaconhe na Dios, chondaha na respeto ngain icha chojni, co nichja na jian de ixin jeha na mismo, co orgulloso na. Co jehe na xaxaon na que xén nchehe na icha cosa jianha, co ditticaonha na ndodé na ni janné na.

³¹ Jehe na rinaoha na ttinxin na, co ncheyaxon na chonja tti ndacho na, rinaoha na icha chojni, noeha na nchetjañeha na na, co tiaconoeha na ni ná chojni.

³² Cain chojni mé nohe na jian quehe coetonha Dios, co nohe na que cain chojni que nchehe cosa jiji, Dios ndacho que chojni mé tequininxin tsji ngain inferno; pero masqui jamé, jehe na nchehe na sigue de nchehe na cosa jianha co hasta ché na are dicon na iná chojni que jinchehe jamé cai.

2

Dios nchejuzguehe chojni inchin jiquininxin

¹ Mexinxin jaha ra nchejuzgueha ra iná chojni, masqui jaha ra chojni judío o quexeho chojni, sino que nchehe ra jeha inchin jiquininxin. Ixin are jaha ra tenchejuzguehe ra iná chojni, jaho ra mismo ttedoan ra condenado, ixin jaho ra mismo cai tenchehe ra jehe tti jianha mé.

² Ján na noa na que Dios nchejuzguehe chojni inchin tequininxin are jehe ndacho ixin quehe tsonhe cain tti chojni que nchehe cain cosa jianha jiji.

³ Co jaha ra, xo nchejuzguehe ra icha chojni, cottimeja nchehe ra xajeho inchin jehe na, ¿Apoco xaxaon ra que jaha ra Dios sinttastigaha ra?

⁴ ¿Apoco xaxaon ra que xonhi rentte que ixin Dios anto jian nchehe ngain chojni, co chonda anto tsje paciencia ngain na, o atonoaha ra ixin jehe anto jian nganji ra ixin rinao que jaha ra tsentoxinhi vidá ra?

⁵ Pero jaha ra anto cha ansean ra co xa rinaoha ra ttentoxinhi ra vidá ra. Mexinxin jaha ra anto tettjejo ra castigo para ixin jaha ra que sayehe ra ngain tti nchanho de castigo are Dios sinchejuzguehe cain chojni inchin tequininxin na.

⁶ Are mé jehe tsjenguehe hna cada chojni inchin jehe na joinchehe na.

⁷ Dios sanjo iná vida naroaxin ngain tti chojni que cain tiempo nchehe tti jian, ixin ttjé na Dios conixin glorié co ixin rinao na que Dios sinchenchaon na co rrochjé na iná vida naroaxin que xonhi tiempo tsjexin.

⁸ Pero Dios anto toñao co sinchecastigá cain tti chojni orgulloso, co rinaoha na ditticaon na tti ndoa, sino que ditticaon na ngain cosa jianha.

⁹ Anto tangui tsonhe co anto joachjaon tsí ngain cain tti chojni que nchehe cosa jianha; co mé saho tsonhe chojni judío, cottimeja tti chojni que jeha judío.

¹⁰ Pero cain chojni que nchehe tti jian, Dios rrochjé na gloria co sinchenchaon na, co sanjo ngain na tti chjojn que tsonohe ansén na; co mé saho sayé tti chojni judío, cottimeja cai tti chojni que jeha judío.

¹¹ Ixin para Dios xonhi chojni icha rentte; cainxin na xajeho na.

¹² Ixin cain chojni que jeha judío co chonxinha na tti ley que vayé Moisés, are jeha na nchehe na cosa jianha, jeha na ndasinchetján na almé na masqui chondaha na ley mé. Co chojni judío que chonxin na ley que vayé Moisés, are nchehe na cosa jianha, Dios sinchejuzguehe chojni mé inchin ndacho ley mé.

¹³ Ixin jeha jian ni para ngain Dios si jeha chonxin ni ley mé, sino que jian ni si nchehe ni cain tti ttetonha ley mé.

¹⁴ Pero tti chojni que jeha judío co ni chondaha na ley mé, pero are deporsín nchehe na inchin ttetonha ley mé, jamé rrocho ixin jeha na ochonda na ná ley de jeha na mismo,

¹⁵ ixin jamé jeha na tjago na de ngain tti jeha na nchehe na que ján chonda na ná ley ngain ansén na. Mexinxin chonxin na tti jian, co joarrixaoen na ndache na si jian tenchehe na o ani jianha tenchehe na.

¹⁶ Jamé tsonhe ngain tti nchanho are Dios sinchejuzguehe tti jimao que xaxaon cainxin chojni. Dios sinchejuzguehe na de ixin Jesucristo inchin ndacho tti joajna que danjo iná vida naroaxin que janha ndattjan icha chojni.

Chojni judío co ley que vayé Moisés

¹⁷ Pero cada jaha ra ndacho ra que ixin judío ra, co chonda ra confianza ngain ley que vayé Moisés, co tonoha ra anto orgulloso ixin jaha ra tti chojni Dios.

¹⁸ Cada ra chonxin ra quehe rinao Dios, co ley que vayé Moisés tjagoha ra para ttinchiehe ra tti icha jian.

¹⁹ Co jaha ra tonoha ra orgulloso ixin toenao ra ixin nchao nchecoenhe ra tti chojni chejo, rrocho tti chojni que xonhi chonxin de ixin Dios, co toenao ra ixin nchao nchengasenhe ra tti chojni que espiritue te ngain tti naxin xehe.

²⁰ Co xaxaon ra que noha ra quexén nchecoenhe ra tti chojni que xonhi nohe de Palabré Dios, co quexén nchenohe ra cain tti chojni que xa jianha ditticaon ngain Dios, ixin ngain tti ley que vayé Moisés nttiha chonda ra quexén para chonxin ra de ixin Dios co quexén para chonxin ra tti ndoa.

²¹ Co jaha ra xo jañá xaxaon ra ixin nchao nchecoenhe ra icha chojni, ¿quedonda tanguiha ra jaho ra mismo? Si jaha ra mismo ndache ra chojni que jiquininxinha tsé ni cosé iná chojni, ¿quedonda jaha ra ttehe ra?

²² Si jaha ra mismo ndacho ra que jiquininxinha sincheyehe ni çhihi iná xí, ¿quedonda jaha ra jamé nchehe ra? Si jaha ra mismo ndoa ningaconhe ra ídolo, ¿quedonda ttehe ra cosa que jí ngaxinhi ningoe?

²³ Jaha ra tonoha ra anto orgulloso ixin chonda ra tti ley que vayé Moisés, pero jaha ra chondaha ra respeto ngain Dios ixin ncheha ra inchin jitaxin ngain ley mé.

²⁴ Mexinxin jí razón jitaxin ngain Palabré Dios janhi: "Tti chojni que jeha judío nichja na jianha de ixin Dios, pero por ixin tti jaha ra nchehe ra."

²⁵ Ján, ndoa que tti xohe que dinhi circuncisión jian para ixin jaha ra si ditticaon ra tti ley que vayé Moisés. Pero si jaha ra ditticaonha ra ley mé, rrocho que inchin ni chondaha ra xohe mé.

²⁶ Co si ná chojni que chondaha xohe mé, pero si jeha nchehe inchin ttetonha ley, Dios sayé chojni mé inchin si jeha rrochonda xohe, masqui chondaha xohe mé.

²⁷ Tti chojni que chondaha xohe jiji ngain cuerpoe, pero tti ditticaon ley que vayé Moisés, chojni mé tti sinttajuzgá jaha ra, xo ditticaonha ra ley mé; masqui techonda ra ley nganito xón co techonda ra xohe ngain cuerpoa ra.

²⁸ Ixin ná chojni judío çhoha rrondacho ixin jeha ndoa judío jeha ixin ndodé co janné cjoii chojni judío. Co tti xohe que jeha chonda xonhi rentte si jeha chonda xohe mé ndojaxin, ngama cuerpoe.

²⁹ Sino que tti chojni que jeha ndoa judío pero de ngain ansén, co tti xohe que ndoa rentte, mé tti xohe de ngain ansén, co jiji ná cosa que ley çhoha sinchehe, sino que jeha Espiritu

Santo tti nchao sinchehe. Co tti chojni jamé, Dios mismo sinchesayehe chojni mé, co nahi chojni nttihi ngataha nontte tti sinchesayehe.

3

¹ Mexinxin ¿quexén icha jian para ná chojni judío? ¿o quehe rentte para ná chojni que chonda tti xohe que dinhi circuncisión?

² Ján, jí anto tsje razón ndoa. Co ná de razón mé ixin Dios joanjo joajné ngain chojni judío.

³ ¿Pero quehe tsonhe are çhonja de jehe na iditticaonha na joajna mé? ¿Apoco ixin jehe na jamé na, mexinxin Dios isincheha tti jehe ndaço?

⁴ ¡Seguro que Dios sincheha jamé! Sino que Dios nchehe inchin jiquininxin tti ndoa, masqui cainxin chojni ngoixin mundo mentiroso na, ixin ngain tti jitaxin Palabré Dios ndaço:

Chonda que xago ixin soixin nichja inchin jiquininxin, co soixin sachá are chojni sinttajuzgaha na.

⁵ Cosa roa icha roa are jí ngain cosa chimeco. Co canxion chojni ndaço na ixin jamé cai tti jianha que ján na nttoho na tjago anto jian que ixin Dios nchehe inchin jiquininxin. ¿Quehe rrondaço na remé? ¿Apoco Dios nchehe jianha ixin jehe nttacastigá na? (Jaxon janha rrinichja inchin tti icha chojni.)

⁶ ¡Seguro que nahi! Ixin si Dios rrocji jianha ¿quexén jehe nchao sinchejuzguehe chojni ngoixin mundo?

⁷ Pero si janha rronichja cosa ndoa co si cosa mé rrogonda para que rrocjago ixin tti nchehe Dios anto jian; si jamé rrocji, mexinxin ¿quedonda Dios nchejuzgá na que janha ná chojni jianha na?

⁸ Si jamé, ¿a icha jian si ján na sonttoho na tti jianha para que jamé tsí tti jian? Jihi tti ndaço canxion chojni que janha na tjago ra, pero jehe na jianha xaxaon na, co cain chojni que nichja mé tequininxin na soan na condenado.

Cain na teca na cosa jianha ngain Dios

⁹ ¿Mexinxin quehe rrondaço na? ¿Aján na xo judío na icha jian na que jehe na que jeha judío na? ¡Seguro que nahi! Ixin janha na ondattjo ra que ixin cosa jianha chonda joachaxin para ixin cain chojni judío co cai para ixin cain icha chojni que jeha judío.

¹⁰ Ngain tti jitaxin Palabré Dios ndaço: xonhi chojni jian, pero ni ná chojni;

¹¹ xonhi chojni rinao ttinxin, xonhi ni ná chojni ttjé Dios.

¹² Cainxin chojni ndavitján na de ngain Dios, cainxin na tenchehe na joxon tti nchaoa jí. xonhi chojni que nchehe tti jian, xonhi pero ni ná na.

¹³ Ttosin na inchin ná sepulcro que jíxangue; conixin neje na ncheyexin na icha chojni.

Co inchin ná venoe conché jí ngaxinhi rroha na;

¹⁴ Jehe na jeha nichja na cosa jianha para icha chojni co cosa que chjé joachjaon iná chojni.

¹⁵ Jehe na daca ttji na para digoexon na chojni;

¹⁶ co de ixin tti jianha que jehe na nchehe na tsje chojni ndaditján co detan tangui,

¹⁷ co jehe na chonxinha na tti çhjoin que tonhe ansén ni.

¹⁸ Co ni xonhi tiempo xaxaon na para xaon na ngain Dios.

¹⁹ Ján na noa na que cain tti ndaço ley que vayé Moisés are osé tiempo, cain mé ndaço para ixin cain chojni que vayé ley mé. Jamé para que xonhi chojni rrondaço ixin jehe jiquininxinha castigoe Dios, co para que cainxin chojni, Dios tti sinchejuzguehe na.

²⁰ Ixin xonhi chojni nchao tsojian de ixin ley mé, ixin ley jeha donda para nttao na que ján na nttoho na cosa jianha.

Dios tsjenguijna chojni si jehe na chonda na confianza ngain Jesucristo

²¹ Pero jái Dios ojointanoa na quexén joinchehe jehe para que ján na sontte na chojni jian ngattoxon con jehe. Co mé jeha de ixin ley, pero tti libro que jitaxin ley jiji, co tti dicjin cain profeté Dios, mé nichja de ixin jiji.

²² Co mé rroço que ixin Dios nttajian na ngattoxon con jehe si ján na chonda na confianza ngain Jesucristo. Co jamé para ixin cainxin chojni que chonda confianza ngain Jesucristo, ixin para ixin Dios cainxin chojni xajeho rentte na.

²³ Ixin cainxin chojni joinchehe na jianha co tequininxinha na para sayé na iná vida nroaxin de ngain Dios.

²⁴ Pero Dios, ixin jehe anto jian ngain cainxin chojni, mexinxin jehe joinchejian na co xonhi nchecobrehe na; rroço ixin chjá na iná vida nroaxin de ixin tti joinchehe Jesucristo.

²⁵ Dios rroanha Jesucristo para joiguenxin nttihi ngataha nontte co mexinxin de ixin jehe, Dios nchetjañehe chojni tti jianha que jehe na nchehe na. Co cain chojni vitjañehe cain cosa jianha que nchehe na si jehe na chonda na confianza ngain Jesucristo. Jihi conhe para xagoxin que Dios nchehe inchin jiquininxin, co de ixin tti paciencia que jehe chonda, jehe joincheha caso cain cosa jianha que joinchehe chojni are saho.

²⁶ Cai conhe cain jihi para xagoxin que Dios jehe nchehe inchin jiquininxin jai cai, rrocho que Dios cain tiempo nchehe inchin jiquininxin ixin jehe ndacho que cain chojni que chonda confianza ngain Jesucristo, ixonhi cosa jianha teca na ngain Dios.

²⁷ Mexinxin ¿quehe cosa chonda na para sontte na orgulloso? Ixin orgulloe chojni ixonhi rentte. ¿Co quedonda? Ixin si chojni nchao rroguitticaon na ley co jamé rrocojian na ngattoxon con Dios, jamé nchao rroconohe na orgulloso; pero Dios dayá na inchin chojni jian jeha ixin chonda na confianza ngain Jesucristo co mexinxin ján na choha tsonoa na orgulloso.

²⁸ Mexinxin janha na ocjoagoha ra que Dios ndacho ixin cain chojni que chonda confianza ngain Jesucristo jian na ngattoxon con Dios masqui joinchehe na inchin ttetonha ley o ni nahi.

²⁹ ¿Apoco Dios jeha Dios de chojni judío? ¿Ajeha cai Dios para chojni que jeha judío? Claro que cai Dios para jehe na.

³⁰ Ixin xonhi iná Dios, jeha nacoaxinxon. Co jehe tti Dios mé tti nchejian cain chojni que chonda confianza ngain Jesucristo masqui chonda na tti xohe que dinhi circuncisión o ni nahi.

³¹ Mexinxin, ¿axaxaon ra que jihi rrocho que ley que vayé Moisés xonhi rentte ixin ján na odotticaon na ngain Jesucristo? ¡Seguro que jeha jamé! Sino que ján na ndacho na que ján ley jihi anto rentte.

4

Ejemploe Abraham

¹ Mexinxin ján na, ¿quehe rrondacho na de ixin quehe joacha Abraham tti cjoi ndogueli-toa na xanchjen?

² Ixin si jehe ndo vanchehe ndo cosa jian, mexinxin rrondachoxin Dios que Abraham jian ngattoxon con jehe; si jamé rrocji, Abraham jehe nchao rroconohe orgulloso, pero jeha ngattoxon con Dios.

³ Pero ndacho ngain tti jitaxin Palabré Dios: “Abraham chonda confianza ngain Dios, co ixin jehe chonda confianza mé, Dios vayé jehe inchin ná chojni que xonhi jica.”

⁴ Nchao jí remé. Jí ná ejemplo: si ná chojni nchehe ná xa, tti tomi que xinajni danjo, mé jeha ná regalo, sino que tomi mé xinajni ojica xa ngain tti nchehe xa mé.

⁵ Pero si ná chojni masqui xonhi cosa jian joinchehe, pero si jehe chonda confianza ngain Dios, Dios dayé chojni mé inchin ná chojni jian jeha ixin chojni mé chonda confianza ngain Dios. Jamé Dios dayé chojni que nchehe cosa jianha como si rrocji jian.

⁶ Cai mé tti rrocho rey David are ndacho ixin anto chjoin para ixin tti chojni que Dios dayé inchin chojni jian sin que nchehe caso cain cosa jianha que chojni mé joinchehe.

⁷ Co David ndacho:

Anto chjoin para ixin cain tti chojni que Dios nchetjañehe na cain cosa jianha que nchehe na.

⁸ Anto chjoin para ixin tti chojni que Dios ncheha caso cain tti jianha que chojni mé joinchehe.

⁹ ¿Axaxaon ra que tti chjoin jihi jeha para ixin tti chojni que chonda xohe que dinhi circuncisión, o ni cai para ixin tti chojni que chondaha xohe mé? Janha na ondachjan na que Dios vayé Abraham inchin ná chojni jian que xonhi cosa jianha veca ixin jehe vechonda confianza ngain Dios.

¹⁰ Pero, ¿axaxaon ra quesa Dios vayé Abraham? ¿Adespúes de que Abraham vayé xohe mé, o ani icha saho? Nahí, jeha despúes, sino que icha saho.

¹¹ Co despúes que Dios vayé Abraham inchin jian, cottimeja Abraham vayé tti xohe que dinhi circuncisión inchin ná señal o ná sello que ixin Dios ovayé Abraham inchin ná chojni jian ixin Abraham ovechonda confianza ngain Dios. Jañá conhe para que Abraham joiguehe inchin ndodé cain tti chojni que chonda confianza ngain Dios, masqui vayeha na xohe mé, pero ixin chonda na confianza ngain Dios, jehe Dios dayé na inchin chojni jian que xonhi jianha teca na.

¹² Ján seguro que Abraham inchin tti ndodé cain chojni judío que dayé xohe mé, pero jeha si chojni mé chonda confianza ngain Dios inchin ndodá na Abraham are xa vayeha ndo xohe mé.

Promesé Dios que tonhe are chojni chonda confianza ngain jehe

¹³ Dios ndačo ngain Abraham conixin ngain cain chojni Abraham que sayé na ngoixin nontte inchin herencia. Co Dios chjé na promesa jihi pero jeha ixin Abraham joinchehe cain tti tetonha ley, sino que ixin jehe chonda confianza ngain Dios, co ixin Dios vayé jehe Abraham inchin ná chojni jian que xonhi jianha veca.

¹⁴ Ixin si jecho tti chojni que nchehe tti tetonha ley tti dayé herencia, entonce rročo que xonhi rentte tti confianza que chonda chojni ngain Dios, co xonhi rrocorentte promesé Dios.

¹⁵ Ley ndačo ixin Dios tsiaho castigo para chojni que ditticaonha ley me; pero tti chojni que xonhi ley chonda, čoha ni rrondačo ni si ná ni nchehe ni tti tetonha ley o ni nahi.

¹⁶ Mexinxin, para que promesé Dios ngain Abraham tonhe ngain cain chojni Abraham, mé chonda que vehe inchin ná regalo que dayé cainxin chojni que chonda confianza ngain Dios. Rročo, que promesa mé jeoha para ixin cain tti chojni que nchehe tti tetonha ley, sino cai para ixin chojni que chonda confianza ngain Dios inchin confianza vechonda Abraham. Mexinxin jehe Abraham cjoí inchin ndodá na cainxin na

¹⁷ Xo chonda na confianza ngain Dios inchin confianza vechonda jehe. Inchin ndačo ngain tti jitaxin Palabré Dios: “Janha coín jaha inchin ndodé tsje chojni.” Ixin Dios tti danjo vida ngain tti chojni que ondadenhe, co jehe Dios tti nchechjian cain cosa que veba are saho.

¹⁸ Masqui ngain tiempo mé Abraham xonhi esperanza vechonda de rrochonda chjan; pero masqui jamé, jehe vechonda confianza ngain Dios co jamé jehe joiguehe “ndodé tsje chojni”, jamé inchin Dios ndačo ngain jehe Abraham: “Jańá tsotsjexin chojni razá.”

¹⁹ Abraham joinchetjanha confianza jihi ngain promesé Dios, masqui jehe ovechonda inchin cien nano co ovenohe que jehe co Sara anto onttaxichjan para que rroguintte-chonda chjan.

²⁰ Pero masqui jamé jehe Abraham cointtoeha de vitticaon ni goanha desconfiado de ixin tti ndačo Dios, sino que jehe icha vitticaon co vechonda icha confianza de ixin tti ndačo Dios. Co jehe Abraham joichecoanxinhi Dios,

²¹ Ixin jehe Abraham anto vechonda seguro de que Dios chonda joachaxin para sinchehe cain tti jehe ndačo.

²² Mexinxin Dios vayé jehe Abraham inchin ná chojni jian que xonhi jianha veca ixin Abraham vechonda confianza ngain Dios.

²³ Co jehe jihi de que ixin Dios vayé jehe Abraham inchin ná chojni jian que xonhi jianha veca ixin jehe vechonda confianza ngain Dios, mé vetaxinha de ixin jecho Abraham;

²⁴ Sino que vetaxin cai de ixin ján na. Ixin ján na cai chonda na confianza ngain Dios tti dayá na ján na cai inchin chojni jian que xonhi jianha teca na, ján na xo dotticaon na ngain Dios tti joinchexechon Jesucristo, tti chonda cain joachaxin para ixin ján na.

²⁵ Jesucristo xanjo para ndavenhe para cjoenga hna cain cosa jianha que jointtoho na co cjan xechon, co jamé para que Dios nchao vayá na inchin chojni jian.

5

Tti tsonhe ni ixin Dios ovayé ni inchin chojni jian

¹ Jańá ixin Dios ovayá na ján na inchin chojni jian ixin chonda na confianza ngain jehe, mexinxin ján na dontte na amigoe Dios de ixin Jesucristo, tti chonda cain joachaxin para ixin ján na.

² Ixin de ixin Jesucristo Dios jointtanchaon na ján na ixin chonda na confianza ngain jehe. Co ixin jehe jointtanchaon na, mexinxin chonda na seguro, chá na co techonhe na ixin Dios rrochjá na parte ngain joachaxin jehe.

³ Co jeoha chá na de ixin jihi, sino que cai chá na masqui tti anto tangui toan na, ixin noa na que de ngain tti tangui que toan na, nttiha ttixin paciencia que ján na chonda na.

⁴ Co are ján na ttixian na ngain cosa tangui conixin paciencia, are mé Dios sayá na inchin chojni jian co mé chjá na esperanza de rrochonda na iná vida naroaxin.

⁵ Co ján na xonhi tiempo tsosaá na ixin chonda na esperanza jihi ixin mé cjoago que Dios anto rinao na ján na ixin rroanha Espíritu Santo nganji na.

⁶ Ixin are ján na xa čoha vanttoho na inchin Dios nchexoxinhi, Cristo venhe para cjoenguijna chojni jianha ngain tiempo que Dios coinchiehe.

⁷ Xonhi chojni rinao denhe para tsjenguijna iná chojni, ni jehe rinaoha senhe para tsjenguijna ná chojni jian; pero para ixin ná chojni que anto jian, ján, puede sittoexin iná chojni senhe para tsjenguijna chojni jian mé.

⁸ Pero Dios tjagoa na que jehe anto rinao na, ixin jehe rroanha Jesucristo para venxin nttihi ngataha nontte para cjoenguijna na ján na masqui ján na xa vanttoho na cosa jianha.

⁹ Co jai, ján na ote na chojni jian para ngain Dios ixin Jesucristo ndavenhe para ixin ján na. Mexinxin jai nchao rrochonda na seguro ixin jehe Jesucristo tsan'chjandaha na para ngain tti castigo anto soji que tsí después.

¹⁰ Ixin si Dios mismo cointte na chojni jian para ixin jehe ixin ndavenhe Jesucristo, Xenhe jehe Dios, are ján na xa gontte na chojni jianha para ixin jehe, mexinxin jai icha seguro que ján na rrochonda na iná vida naroaxin ixin Cristo jichon co jí nganji na.

¹¹ Co jeoha jihi, sino que cai chá na ngain Dios de ixin Jesucristo, tti chonda cain joachaxin para ixin ján na, ixin de ixin Jesucristo ján na amigoe na Dios.

Adán co Cristo

¹² Jañá de ixin tti jianha que joinchehe nacoaxinxon xí joí cosa jianha ngataha nontte nttihi, co cai joí tti denhe ni, co mexinxin cainxin chojni denhe na ixin cainxin na joinchehe na cosa jianha.

¹³ Icha saho que rroquehe ley que vayé Moisés, cainxin chojni ngoixin mundo ovanchehe na cosa jianha; masqui Dios vancheha caso de ixin cosa jianha que vanchehe chojni are xa chondaha na ley mé.

¹⁴ Pero masqui jamé, desde ngain tiempoe Adán hasta ngain tiempoe Moisés cain chojni que joinchehe na jianha chonda que ndavenhe na, masqui jehe tti jianha que jehe na joinchehe na jeha inchin tti joinchehe Adán, tti vitticaonha tti coetonha Dios. Co Adán rroanha cain tti jianha que nchehe chojni, pero Jesucristo tti joí después dinttjian cain tti jianha mé.

¹⁵ Pero tti jianha que joinchehe Adán çhoha tsoyahi tti jian que Dios chjá na. Ixin de tti cosa jianha que joinchehe nacoa xí, anto tsje chojni ndavintteguenhe na. Pero de tti joinchehe iná xí co mé Jesucristo, de ixin mé Dios chjá na iná vida naroaxin, co çonhi nttacobrá na. Co jihi tti joinchehe Dios, mé tti anto icha jian de tti joinchehe Adán, co jehe mé tti ttjenguijna tsje chojni.

¹⁶ Tti jianha que joinchehe nacoaxinxon xí çhoha tsoyahi tti vida naroaxin que Dios chjá na; ixin de ngain tti nacoa cosa jianha que joinchehe Adán, Dios joinchecondená cainxin chojni. Pero jai Dios chjé chojni iná vida naroaxin co çonhi nchecobrehe na masqui anto tsje cosa jianha teca na.

¹⁷ Ixin si tti ndadenhe ni vechonda joachaxin ngain chojni jeho de ixin tti jianha que joinchehe nacoa xí, mexinxin anto icha seguro que cainxin chojni que Dios ndaço que ixin ixonhi cosa jianha teca na, cain chojni mé rrochonda na joachaxin Dios para isincheha na cosa jianha ngain vidé na naroaxin de ixin tti joinchehe iná xí, co jehe xí mé Jesucristo.

¹⁸ De ixin tti jianha que joinchehe Adán, cainxin chojni ngataha nontte vintte na condenado, jamé cai de ixin tti jian que joinchehe Jesucristo, Dios dayé cainxin chojni que chonda confianza ngain Jesucristo inchin chojni que çonhi cosa jianha teca.

¹⁹ Rroço que de ixin tti vitticaonha nacoaxinxon xí, que mé Adán, tsje chojni joinchehe na cosa jianha; pero cai de ixin tti vitticaon nacoaxinxon xí, que mé Jesucristo, Dios rrondaço ixin tsje chojni jian na.

²⁰ Dios vanjo ley ngain Moisés para que chojni anto jian rrochonxin na que tenchehe na cosa jianha; pero masqui chojni joinchehe na tsje cosa jianha; Dios anto icha jian ngain na ixin nchetjañehe na cosa jianha que nchehe na.

²¹ Jañá, mexinxin inchin tti cosa jianha que joinchehe chojni joichonda joachaxin para joiaho tti diguenxin ni, jamé cai ixin Dios ndaço que ixonhi cosa jianha teca na ján na, mexinxin tti jian que ttixin de ngain Dios, mé chonda joachaxin para chjá na iná vida naroaxin que çonhi tiempo tsjexin. Co cain tti sayé na jihi, mé por ixin Jesucristo, tti chonda cain joachaxin para ixin ján na.

6

Ján na inttoha na tti jianha, sino que nttoho na inchin ttetonha Jesucristo

¹ Mexinxin jai çqueçén sonttoho na? ¿Axa sonttoho na sigue de sonttoho na cosa jianha para que Dios sinchehe sigue sinttatjañá na?

² ¿Seguro que nahi! Ján na ocoentoxinhi na vida na de ngain tti jianha que vanttoho na. Mexinxin çqueçén ján na sonttoho na sigue de sonttoho na cosa jianha?

³ ¿Anoaha jaha ra que ixin ján na co Jesucristo te na inchin nacoa chojni ixin joiguite na para sontte na chojni jehe? Co mé rroço que ixin ján na ndarroguenhe na conixin jehe.

⁴ Ixin are ján na joiguite na, mé rroço que inchin ján na cai çavá na conixin jehe are jehe ndavenhe, para que inchin jehe xechon de ixin tti anto jie joachaxin Ndodá na, que ttjen ngajni, cai ján na xechon na para te na ngain iná vida naroaxin.

⁵ Ixin si ján na cjoí na ngain Cristo para ndavenhe na, jañá cai rroxechon na inchin jehe xechon.

⁶ Ixin ján na noa na que cainxin tti jianha que vanttoho na are saho, cain mé ondavenxin nganito cruz conixin Jesucristo, para que cuerpoa na tehe que rridinchehe cosa jianha ixonhi joachaxin rrochonda para que tsetoan na sonttoho na cosa jianha; co ján na isontteha na de esclavo ngain cosa jianha inchin ngain ná xinajni.

⁷ Ixin chojni que ondadenhe na de ngain cosa jianha, jehe na ichoha sinchehe na icha cosa jianha.

⁸ Si ján na ondavenhe na conixin Jesucristo, ján na rrochonda na confianza que sonttechon na conixin jehe.

⁹ Ixin ján na noa na que ixin Cristo oxechon de ngain tti jehe ndavenhe; ixonhi tiempo jehe rrochon senhe iná ixin tti ndadenhe ni ixonhi joachaxin chonda para ngain Jesucristo.

¹⁰ Ixin are Cristo ndavenhe, jehe cjoenga hna cain cosa jianha que nchehe cainxin chojni; jehe ndavenhe nacoa nttiha co mé gonda para cainxin tiempo. Co jehe xechon, co jai jehe jichon para cainxin tiempo para Dios.

¹¹ Jañá jaha ra cai xaxaon ra que inchin ondavenhe ra de cain cosa jianha que joinchehe ra; pero jai jaha ra dintte ra para ixin Dios inchin nacoa chojni, jaha ra conixin Jesucristo, tti chonda cain joachaxin para ixin ján na.

¹² Mexinxin jai jaha ra dittoaxinha ra que cosa jianha sinchehe sigue de tsetonha ngain cuerpoa ra, tti cuerpo que ndadenhe. Dittoaxinha ra que cosa jianha que rinao cuerpoa ra tsetonha nganji ra.

¹³ Co dittoaxinha ra que cuerpoa ra sinchehe cosa jianha. Sino que danjo ra ansean ra para ixin Dios, inchin jiquinixin chojni que ondavenhe co cjan xechon. Dittoaxin ra que Dios tsetonha ngain cuerpoa ra para que sinchehe ra cosa jian.

¹⁴ Ixin cosa jianha ixonhi joachaxin chonda nganji ra, ixin ley que vayé Moisés ittetoanha nganji ra jai, ixin jai tti jian que ttixin de ngain Dios, mé tti tsetonha nganji ra.

Ján na inchin ninchehe xa ngain ná xinajni

¹⁵ ¿Mexinxin, quehe sonttoho na? ¿Asonttoho na cosa jianha ixin ley ittetoanha nganji ra, co ixin tti jian que ttixin de ngain Dios tti ttetoan na? ¿Seguro que nahi; sonttoha na cosa jianha!

¹⁶ Jaha ra noha ra jian que si rroxanjo ra inchin ná esclavo ngain ná xinajni para sitticaon ra xa cain tti tsetonha ra xa, jamé jaha ra oná esclavo ra ngain xa co chonda ra que sitticaon ra xa. Jañá, mexinxin si jaha ra sitticaon ra cosa jianha inchin ná xinajni, pero mé ndasinchetján almá ra. Co si sitticaon ra Dios, jaha ra sintte ra ngain ná vida nao co jian.

¹⁷ Pero janha chjaha gracias ngain Dios ixin masqui jaha ra are saho vintte ra inchin esclavo ngain cosa jianha, pero jai jaha ra conixin ansean ra vitticaon ra Palabré Dios inchin cocoaonha ra.

¹⁸ Jai jaha ra iteha ra inchin esclavoe cosa jianha, ixin jai jaha ra ote ra inchin ninchehe xé cosa jian que rinao Dios.

¹⁹ (Janha rrinichja inchin cain chojni jaxon, ixin jaha ra xa čhoha ttinxin ra jian cain cosa jihl.) Inchin are saho jaha ra xanjo ra joinchehe ra cosa tjoaha co cosa jianha; jamé xanjo ra jai para nchehe ra cosa jian, para sintte ra ngain ná vida nao inchin chojni que tequinixin Dios.

²⁰ Are jaha ra xa vintte ra inchin esclavo de ngain cosa jianha, are mé jaha ra vintteha ra ngain ná vida nao.

²¹ Pero ¿quehe cosa joacha ra are mé de ngain cosa que jai tosoaha ra ixin vanchehe ra mé? Xonhi joacha ra ixin cosa mé jeha para nchetján almé ni.

²² Pero jai cosa jianha mé ixonhi joachaxin chonda para ixin jaha ra ixin jaha ra ojoanjo ra vida ra para tenchehe ra xé Dios. Co jihl ná cosa jian para ixin jaha ra co de ixin mé jaha ra sinao ra sinchehe ra jeha cosa inchin Dios rinao. Co después rrochonda ra iná vida que xonhi tiempo tsjexin.

²³ Pero chojni que nchehe cosa jianha, jehe na chonda na que tsji na ngain infierno. Pero Dios danjo iná vida que xonhi tiempo tsjexin co tti vida mé rrochonda na ján na conixin Jesucristo, tti chonda joachaxin para ixin ján na.

7

Ejemploe ná nchiganha conixin ján na

¹ Hermanos, jaha ra xo chonxin ra ley que vayé Moisés onoha ra que ley mé chonda joachaxin ngain chojni, pero jeha are xa jichon chojni mé.

² Jihl ná ejemplo: Ná nchí que tottehe xixihi, ley ttetonhe ncha que chonda que secaho ncha xixihi ncha mé are jehe xa xa jichon xa; pero si xixihi ncha ndasenhe xa, ley mé ixonhi ttetonhe ncha de ixin jihl.

³ Rrocho que si jehe ncha decaho ncha iná xí co xixihi ncha xa jichon xa, jehe ncha jianha nchehe ncha ixin jicaho ncha yó xí ngain nacoa tiempo. Pero si xixihi ncha ndavenhe xa, jehe ncha chonda ncha joachaxin de secaho ncha iná xí co jamé jeha cosa jianha sinchehe ncha.

⁴ Jañá jaha ra cai, hermanos, xo tequininxin ra Cristo; are saho, ley que vayé Moisés vaquetonha nganji ra inchin ná xi ttetonha xa ngain nchiçhihi xa. Pero jai jaha ra cai ondavenhe ra de ngain ley mé, para que jai ojé xí ttetonha ra, co mé Cristo, tti xechon de tti ndavenhe. Co jiji conhe para que vidá na nchao sonda ngattoxon con Dios.

⁵ Ixin are saho, are ján na xa vanttoho na cain tti vajinao cuerpoa na, are mé tti ley que vayé Moisés vanttanímá na para vanttoho na icha cosa jianha inchin vajinao cuerpoa na. Co cain cosa jiji jeha donda para nchetján almé ni.

⁶ Pero jai ján na ondavenhe na para ngain ley mé, tti ley que anto soji vaquetoan na, co jamé ján na nchao sonttoho na inchin rinao Dios de ngain vidá na naroaxin que chjá na Espíritu Santo, co inttoha na inchin vanttoho na are tti ley icha saho vaquetonha nganji na.

Tti jianha que jí nganji na janha

⁷ Mexinxin, ¿quehe rrondaçho na? ¿Apoco rrondaçho na ixin ley que vayé Moisés, mé jianha? ¡Seguro que nahi! Pero janha rrochonxinha quexehe cosa jianha si rroguéha ley mé. Jí ná ejemplo: Janha rrocononaha tti jianha de rinaho cosé iná chojni si ley rrondaçho que ixin mé jianha.

⁸ Si rrocochoa ley jiji, janha antoha rrojinaho rrojinttaha cosa jianha, pero ixin ley jói, joarrixaonna icha xaxaon de jointtaha cosa jianha. Ixin tti coha ley, cai nntiha chojni chonxinha quexehe cosa jianha.

⁹ Vehe ná tiempo are janha xa venonaha quehe ttetonha ley jiji, are mé janha vaxaxanho que xonhi cosa jianha rica. Pero después, are janha oconona quehe ttetonha ley jiji, are mé janha joatsoan que rrica tsje cosa jianha, que hasta jiquininxin na tsji ngain infierno ixin anto tsje cosa jianha jointtaha.

¹⁰ Jañá rrocho que ley mé tti rroganjo ná vida que xonhi tiempo tsjexin ngain tti chojni que rroguitticaon ley mé, pero para ixin janha, ley mé jeha cjoago que jiquininxin na tsji ngain infierno ixin çhoha jointtaha cain tti ttetonha ley mé.

¹¹ Ixin tti jianha que cuerpona rinao, mé joincheyana, cottimeja joinchegonda ley para ndaço que ixin janha jiquininxin tsji ngain infierno.

¹² Mexinxin jehe ley mé que vayé Moisés, seguro jian ley, co cain tti ttetonha ley jian, co inchin jiquininxin, co nchao jí.

¹³ Pero ¿apoco rrocho que cain cosa jian jiji, tti ndaço ixin janha jiquininxin tsji para ngain infierno? ¡Seguro que nahi! Tti cain cosa jianha que janha jointtaha, mé tti ndaço ixin janha jiquininxin tsji para ngain infierno ixin ley jiji cjoago que tti janha jointtaha jianha jí. Co jañá ley jiji cjoago ixin tti jianha que nchehe ni anto nchaoha jí.

¹⁴ Ján na noa na que ley jian ixin joixin de ngain Espíritu Santo, pero janha inchin ná esclavo que dicoçhi na ngain cosa jianha.

¹⁵ Ixin janha ttianxinha quehe tonna, ixin janha rinaho sinttaha inchin jiquininxin, pero çhoha. Sino que tti jianha que janha rinaoha sinttaha, mé tti janha nttaha.

¹⁶ Jañá si tti janha rinaoha sinttaha, mé tti janha nttaha, jamé janha datsoan que jehe ley que vayé Moisés jian ley mé.

¹⁷ Mexinxin jañá rrocho que jeha janha tti nttaha cosa jianha yá, sino que tti jianha que jí ngaxinhi cuerpona, mé tti nchehe cosa jianha yá.

¹⁸ Ixin janha nona que tti jí nganji janha, rrocho ngain cuerpona, mé jeha jian. Ndoa janha rinaho sinttaha cosa jian, pero çhoha.

¹⁹ Janha çhoha nttaha cosa jian inchin janha rinaho, sino que janha nttaha sigue de nttaha cosa jianha que janha rinaoha.

²⁰ Mexinxin si janha nttaha tti janha rinaoha sinttaha, rrocho que jeha janha tti rrinttaha, sino tti jianha que jí ngaxinhi cuerpona, mé tti jinchehe yá.

²¹ Jañá mexinxin janhi tti tonna: are janha rinaho sinttaha cosa jian, çhoha ixin jeha nchao nttaha cosa jianha.

²² Ngaxinhi ansenna janha anto rinaho sinttaha inchin ttetonha ley de Dios.

²³ Pero cuerpona rinaoha nchehe inchin rinao ansenna. Cosa jianha que jí ngaxinhi cuerpona, mé tti ttetonha ngain cuerpona co mé rrocho que inchin jiaxinna ngain cosa jianha.

²⁴ ¡Anto feo tonona janha! ¿Quensen nchao tsonxindanguehe joachaxin jianha que jí ngain cuerpona jiji para que janha tsjiha ngain infierno?

²⁵ Jeho Dios tti nchao tsjenguijna na janha de ixin Jesucristo, tti chonda cain joachaxin para ixin ján na. ¡Chjaha gracias ngain Dios para ixin jiji! Mexinxin jai janha tianxin que

janha chonda que sitticanho ley de Dios pero si janha rroguitticaonha ngain Jesucristo, cain cosa jianha xa rroguintte ngain cuerpona co janha rrogarihi inchin esclavo de ngain cosa jianha mé.

8

Espíritu Santo de Dios tti ttjenguijna na para nttoho na inchin jiquininxin

¹ Pero jai Dios xonhi castigo sanjo ngain cain tti chojni que te inchin nacoa chojni conixin Jesucristo; tti chojni que incheha na inchin rinao cuerpoe na, sino que nchehe na inchin rinao Espiritu Santo.

² Ixin tti ttetonha Espiritu Santo, mé tti ntaha janha jai. Co Espiritu mé tti chjana janha vida naraixin ixin janha ditticanho Jesucristo, co jamé cosa jianha ichondaha joachaxin nganji janha, co itsjiha ngain infierno.

³ Ixin Dios nchao joinchehe tti choha joinchehe ley que vayé Moisés, ixin ley mé coixinha joacha ngain cosa jianha que jí ngain cuerpoe ni. Pero Dios ján, coixinhi joacha ngain cosa jianha ixin jehe rroanha Xenhe, co joigayé Xan ná cuerpo inchin cuerpo que ján na chonda na para ndavenhe Xan para que cjoenga Xan hna cain cosa jianha que jointtoho na. Rrocho que jamé Dios rroanha Xenhe para joantsjehe tti joachaxin que vechonda cosa jianha ngain cuerpoa na.

⁴ Cain jihi joinchehe Dios para que ján na nchao sonttoho na cain tti ttetonha ley, ixin jai ján na inttoha na inchin rinao cuerpoa na, sino inchin rinao Espiritu Santo.

⁵ Ixin cain tti chojni que nchehe inchin rinao cuerpoe, chojni mé jehó xaxaon na cain cosa que rinao cuerpoe na. Pero cain tti chojni que nchehe inchin rinao Espiritu Santo, chojni mé xaxaon na de ixin cosa que Espiritu Santo rinao.

⁶ Co si rroxaxaon ni jehó cain cosa que rinao cuerpoe ni, jehe ni seguro tsji ni ngain infierno are ndasenhe ni. Pero si rroxaxaon ni cosa que Espiritu Santo rinao, jehe ni rrochonda ni vida ngain Dios que xonhi tiempo tsjexin, co tsonohe ni chjoin ngain ansén ni.

⁷ Cain tti chojni que xaxaon jehó tti rinao cuerpoe, chojni mé ningaconhe na Dios, ixin ni rinao na ni thoha na para que jehe na sitticaon na ngain ley de Dios.

⁸ Mexinxin cain tti chojni que anto rinao nchehe jehó inchin rinao cuerpoe, chojni mé choha sinchehe inchin ncheoxoxinhi Dios.

⁹ Pero jaha ra itencheha ra inchin rinao cuerpoa ra, sino que jai jaha ra tenchehe ra inchin rinao Espiritu Santo, si ndoa Espiritu Santo de Dios jí nganji ra. Ixin tti chojni que chondaha ngain ansén tti Espiritu Santo que Cristo rroanha, chojni mé jeha chojni Cristo.

¹⁰ Pero si Cristo jí ngain ansean ra masqui cuerpoa ra chonda que ndasenhe ixin joinchehe ra cosa jianha, masqui jamé tsonhe cuerpoa ra, pero espiritua ra sinchehe sigue sechon ixin Dios ondacho que jaha ra ixonhi cosa jianha teca ra.

¹¹ Espiritu Santo de Dios joinchexechon Jesucristo, co cai si jí Espiritu Santo nganji ra, jehe Dios sinchexechon cuerpoa ra co rrochonda cuerpo iná vida naraixin de ixin Espiritu Santo mé.

¹² Jañá hermanos, mexinxin jí ná cosa que ján na chonda que sonttoho na, pero jeha de sonttoho na tti rinao cuerpoa na.

¹³ Ixin si jaha ra tenchehe ra cain tti rinao cuerpoa ra, jaha ra chonda ra que tsji ra ngain infierno, pero si sinchehe ra inchin rinao Espiritu Santo, jamé jaha ra sinchexante ra tti jianha que rinao cuerpoa ra, co jamé jaha ra rrochonda ra tti vida naraixin.

¹⁴ Cainxin chojni que nchehe inchin rinao Espiritu Santo de Dios, cainxin chojni mé xenhe Dios.

¹⁵ Co Espiritu Santo que jaha ra vayehe ra, mé jeha ná espíritu que joindattjo ra que jaha ra sintte ra inchin ninchehe xa que anto chonda joaxaon ngain xinajni na. ¡Nahi, jeha jamé! Sino que Dios rroanha Espiritu mé nganji ra para que jaha ra nchao sintte ra xenhe Dios. Co jehe Espiritu jihi tti nttaoán na nichja na: "¡Dios, Ndodá na!"

¹⁶ Co jehe mismo Espiritu Santo jihi tti tti ngain espiritua na para dindacho nganji na que ján na seguro oxenhe Dios na.

¹⁷ Co ixin ján na xenhe Dios na, ján na chonda na derecho de sayé na cain tti jian que Dios ndacho rrochjá na ixin ján na conixin Jesucristo sayé na cain tti jian mé. Ixin si jai tonoa na tangui inchin Cristo conohe, después ján na tsosayá na conixin jehe.

¹⁸ Nchao remé, janha xaxanho que tti tangui jihi xonhi quehe para ngain tti chjoin que socon na después.

¹⁹ Cainxin tti joinchexjian Dios techonhe co anto rinao tsí tti nchanho que Dios rrondacho quecá chojni tti xenhe Dios.

²⁰ Ixin cain cosa que joinchechjian Dios goan condenado, pero jeha ixin cosa mé jamé rinao, sino que ixin Dios tti joinchecondená cain yá ixin chojni joinchehe na jianha. Pero mé jeha tsonchjenhe hasta que

²¹ cainxin cosa que jí, sehe naroaxin co xonhi tiempo rroxantte ni irrorrengaha, sino que sintte na chjoin inchin xenhe Dios co ixonhi tsonhe cain cosa mé.

²² Ján na noa na que hasta ngain tiempo jiji cainxin tti joinchechjian Dios tangui jitonhe co deha inchin ná nchí que jittín ixin sincheconejihí chjan.

²³ Co jeoha cainxin cosa mé tti tangui jitonhe, sino que cai ján na mismo, masqui ján na ochonda na Espíritu Santo ngain ansean na, que mé saho de cain tti rrochjá na Dios. Ján na anto tá na joachjaon co techonha na tti nchanho are ján na sontte na inchin mero xenhe Dios, ixin are mé Dios tsentoxinhi cuerpoa na que chonda na jai para rrochonda na iná cuerpo que xonhi tiempo ndasenhe.

²⁴ Ixin ján na dotticaon na ngain Jesucristo, mexinxin chondaxin na iná vida naroaxin; co ixin dotticaon na, rrocho ixin ján na techonha na ná cosa que xa chondaha na. Ixin si ján na orrochonda na cosa mé, ichondaha na que rrochonhe na jeha mé.

²⁵ Pero si tti ján na techonha na, mé ná cosa que ján na xa choha dayé na, ján na chonda na que rrochonhe na conixin paciencia.

²⁶ Co cai jamé Espíritu Santo jittjenguijna na are ján na techonda na ná problema. Ixin ján na noaha na nttotsenhe na ñao Dios inchin jiquininxin, pero Espíritu Santo, jeha mismo tti nchetsenhe ñao Dios para ixin ján na, co jeha nichja de iná manera que ján na chonxinha na.

²⁷ Co Dios, tti chonxin ansén cain chojni, nohe quehe rinao Espíritu Santo ixin jeha Espíritu Santo nchetsenhe ñao Dios para que Dios sinchehe ngain chojni inchin jeha Dios rinao.

Ján na osacha na cain tti jian de ixin Jesucristo

²⁸ Ján na noa na que cainxin tti tonhe chojni que rinao Dios, cain cosa mé Dios rroanha ngain na para ttjenguijnaxin na, ixin cain chojni mé tti Dios coinchiehe, co mé tonhe na inchin rinao Dios.

²⁹ Ixin desde are coexinhi vehe mundo, Dios onohé quecá chojni sitticaon na ngain jeha, co desde are maho jeha ondacho que cain chojni mé sintte na inchin xenhe jeha para que Jesucristo Xenhe Dios, mé tti Xansaho de ngayehe tsje xanchó Xan.

³⁰ Co cain tti chojni que desde are saho Dios ondacho que sintte na inchin xenhe jeha, cai jeha nichjé cain chojni mé para tsí ngain jeha, co cai jeha sayé cain chojni mé inchin chojni jian para ixin jeha, co cai jeha Dios vanjo tsje cosa jian ngain cain chojni mé.

³¹ ¿Mexinxin, jai quehe rrondacho na remé? Si Dios jañá ttjenguijna na, ¿quensen nchao tsja cha nganji na?

³² Xonhi cosa jí que Dios rinaoha chjá na, ixin hasta rroanha Xenhe para joiguenhe Xan para cjoenguijna na Xan ján na cainxin na. Mexinxin si jeha jamé rroanha Xenhe nganji na, seguro que jeha rrochjá na cain tti jian que jeha chonda.

³³ ¿Quensen nchao rrocho jie de ixin tti chojni que Dios coinchiehe? Ixin Dios tti ondacho que jeha na ixonhi cosa jianha teca na.

³⁴ Mexinxin ¿quensen nchao sinchecondená cain chojni mé? Ixin Cristo tti ndavenhe para ixin jeha na, co icha de mé, Cristo tti oxechon co jai jeha jí ngain lado jian de Dios, co jinchetsenhe ñao Dios para ixin ján na.

³⁵ Mexinxin, ¿quensen nchao rrocayaoen Cristo para que isinaoha na? Xonhi cosa sinchehe mé, ixin masqui tsonia na o tsonoa na tangui, o masqui icha chojni feo sinchehe na nganji na, o masqui senhe na jintta o rrochondaha na lontto, o masqui rrochonda na peligro, o masqui hasta ndasenhe na; masqui cain problema mé rrochonda na, pero Cristo cainxin tiempo sinoa na.

³⁶ Inchin ndacho ngain tti jitaxin Palabré Dios:

De ixin causá soixin janha na cain nchanho chonda na peligro de ndasenhe na; icha chojni nchehe na nganji na inchin nchehe na ngain coleco que sadiguenhe.

³⁷ Pero masqui cain jiji toan na, ján na sacha na ngain cain cosa jiji, de ixin Jesucristo, tti anto rinao na.

³⁸ Jañá mexinxin janha rrichonda seguro que xonhi cosa rrocayaoen Dios para que isinaoha na. Ni masqui ndasenhe na, o ni sonttechon na, ni masqui tti sinchehe ángel de Dios, ni tti sinchehe espíritu jianha, ni masqui cain tti tetoan na jai, ni cain tti tsoan na después,

³⁹ ni masqui tti sinchehe cain cosa que jí noi, ni tti sinchehe cain cosa que jí anto nihnga, ni masqui tti sinchehe iná cosa que Dios joinchechjian, pero ni ná de cainxin cosa yá chonda

joachaxin para que rrocayacoen Dios para que Dios isinaoha na, ixin jehe cjoagoa na que anto riano na ixin rroán na Jesucristo, tti chonda cain joachaxin para ixin ján na.

9

Dios tti coinchiehe chojni Israel

¹ Janha rrindachjan tti mero ndoa inchin jiquininxin chojni que ditticaon ngain Jesucristo, co xonhi cosa ndoaha rrindachjan. Ixin Espiritu Santo jittetonhe ansenna, co jinchenona que ján seguro tti janha rrindachjan.

² Co janha anto rrichinhi co ngain ansenna cainxin tiempo anto feo tonona, ixin chojni Israel ditticaonha na joajna ndoa.

³ Mexinxin janha mismo rrojinaho que Dios rrojinchecondená na co rrogachjenda de Cristo, si cain jiji rrocji jian para ixin chojnina, tti chojni que joixin de ngain xajeho razana.

⁴ Cain chojni jiji razé Israel, co are icha saho Dios vayé nindogelitoa jehe na inchin xenhe jehe. Dios vehe ngayeje jehe na co vicon na tti chíxo que jehe chonda are cononxin ngain na, co Dios joinchechjian trato ngain na, joanjo ngain na tti ley que vayé Moisés, cjoagoe na quexén vanchecoanxinhi na jehe ngain nihngo, co chjé na promesa.

⁵ Co cain chojni Israel de tiempo jiji joixin na de ngain razé nigoelitoa na xanchjen. Co de ngain nimé cai joixin Cristo, co Cristo, jehe Dios de cainxin cosa, co jamé jiquininxin tocoanxinhi para cainxin tiempo. Amén.

⁶ Pero mé rrochoha que ixin promesé Dios coenha ngain chojni Israel; pero rrocho que cainxinha chojni que joixin de ngain razé Israel cjoí tti ndoa chojni Israel.

⁷ Cai cainxinha chojni que joixin de ngain razé ndo Abraham cjoí ndoa chojni ndo, ixin Dios ondacho ngain tti jitaxin Palabré: “De ixin xanha Isaac rrochonda xanttia.”

⁸ Mexinxin noa na que ni xonhi chojni cjoí xenhe Dios jeho ixin joixin de ngain ná raza especial. Sino que jeho chojni que ditticaon ngain promesé Dios, mé tti xenhe Dios.

⁹ Ixin janhi promesé Dios para ixin Abraham: “Ngain tiempo que janha coinchiá, janha sihi co nchichiha Sara rrochonda ncha ná chjan.”

¹⁰ Co cai jí icha. Cayoi xenhe Rebeca chonda xan nacoa ndodé xan, que mé ndogelitoa na Isaac.

¹¹⁻¹³ Pero icha saho que chjan mé concjiji xan, rrocho are xa xonhi joinchehe xan, ni cosa jian joincheha xan, ni cosa jianha joincheha xan, pero are mé Dios ndache Rebeca: “Esaú, tti sehe xansaho, sinchehe xé Jacob, tti xanyoxin.” Co mexinxin cai Dios ndacho ngain tti jitaxin Palabré: “Janha rinaho Jacob pero rinaoha Esaú.” Mexinxin jiji cjoago ixin Dios chonda joachaxin de ttinchiehe quexeho chojni que jehe rinao, masqui nchehe na jian o jianha.

¹⁴ Mexinxin ¿quehe rrondacho na? ¿Apoco rrondacho na ixin Dios ncheha inchin jiquininxin? ¡Segruo que nahí!

¹⁵ Ixin Dios ndacho ngain Moisés: “Janha tsiaconoá chojni tti janha rinaho ttiaconoá, co sinchenina tti chojni que janha rinaho tsiaconoá.”

¹⁶ Mexinxin rrocho que Dios tsiaconoeha chojni ixin jehe na jamé rinao na o ixin jehe na joinchehe na tsje cosa jian, sino que Dios tsiaconoeha chojni jeho ixin jehe jamé rinao.

¹⁷ Ixin ngain tti jitaxin Palabré Dios, nttiha Dios ndacho janhi ngain rey de Egipto: “Janha chjaha jaha joachaxin de rey jeho para cjoago tti joachaxin que janha chonda co para chojni ngoixin nontte rrochonxin nombrena.”

¹⁸ Mexinxin rrocho ixin Dios tsiaconoeha tti chojni que jehe Dios rinao ttiaconoeha co jehe sinchecha ansén tti chojni que jehe Dios rinao nchecha ansén na.

¹⁹ Pero puede ná ra rrondachjenjí ni ra: “Si jamé, ¿quedonda Dios ndacho ixin chojni teca jianha ngain jehe? Ixin ¿quensen nchao sinchehe cosa ojé que Dios rinao?”

²⁰ Pero, ¿quensen jaha para sinchediscutí ngain Dios? ¿Apoco ná chi nchao ndacho ngain jehe tti joinchechjian chí mé: “¿Quedonda jaha jañá joinchechjian na?”

²¹ Ixin jehe tti nchechjian chí chonda joachaxin de nchechjian quexeho cosa jehe rinao. Jehe nchao nchegonda xajeho tipo de jinche para nchechjian ná chí anto chjoín co iná chí corriente.

²² ¿Co quexén jaha ndacho ixin nchaoha si Dios rinao sinchegonda chojni que tsji ngain infierno, co jehe coixinhi ngain na conixin anto paciencia masqui vequininxin na castigo, si jehe joinchegonda chojni mé para cjoago joachaxin que jehe chonda co ixin jehe nchecastigá chojni jianha?

²³ Ixin jehe Dios jamé joinchehe para que ján na rrochonxin na ixin jehe jiquininxin tsosayehe co ján na jehe coiaconoá na co jointtanoa na icha saho ixin rrochonda na ttoha joachaxin conixin Jesucristo.

²⁴ Ixin Dios ndattjo na ján na ixin sihi na ngain jehe, ján na xo judío na conixin jaha ra xo jeha judío ra.

²⁵ Jamé inchin ndačo ngain Palabré Dios ngain libroe Oseas:

Chojni que jeha chojnina, jehe na sinttaguinhi na chojnina, co chojni que rinaoha, chojni mé tti janha sinaho.

²⁶ Co ngain xajeho lugar tti janha ndačhjan: “Jaha ra jeha chojnina”, nttiha chojni mé sinhi na xenhe Dios que jichon.

²⁷ Co profeta Isaías ndačo janhi de ixin chojni Israel: “Masqui chojni de ngain razé Israel tsotsje na hasta inchin xochjenhe nchise ngandehé ndanchaon, masqui jamé sintte na, pero jeho nchion na rrochonda na iná vida naroaxin de ngain Dios,

²⁸ ixin Dios, tti chonda cain joachaxin, anto daca sinchecastigá cainxin chojni ngataha nontte.

²⁹ Co inchin Isaías ndačo icha saho ngain Palabré Dios:

Si Dios, que chonda cainxin joachaxin nttiha ngajni, si jehe rroquiaconoaha na ján na ján na rrochoa na jai, inchin chojni ngain ciudad de Sodoma co ciudad de Gomorra.

Chojni judío vitticaonha na tti jian joajna

³⁰ Mexinxin ¿quehe rrondačhjan na? Rrindačhjan na que ixin chojni que jeha judío cjoeha na quexén sintte na jian ngattoxon con Dios. Pero masqui jamé, Dios vayé na inchin chojni jian ixin chonda na confianza ngain Jesucristo.

³¹ Pero chojni Israel rinao ditticaon nchehe ná ley co jamé rroguinte na jian ngattoxon con Dios, pero jehe nimé čhoha joinchehe na cain tti ttetonha ley mé.

³² ¿Quedonda čhoha vintte na jian? Ixin jehe na joinao na rroguinte na jian ngattoxon con Dios jeho de ixin tti vanchehe na, co nahi de ixin tti confianza ngain Dios. Mexinxin jehe na vetsinga na inchin ngataha “tti xo que tonttenguixin chojni”,

³³ tti xo que Palabré Dios ndačo janhi:

Janha tsín ngain ciudad de Sión inchin ná xo que tonttenguixin chojni, co jehe na xantjixin na;

co cain chojni que ditticaon ngain jehe tti xo mé, xonhi tiempo sinttechín na de ixin xo mé. Ixin xo mé Jesucristo.

10

¹ Hermanos, tti janha anto rinao ngain ansenna co tti janha anto nttatsán ñao Dios, mé que ixin cainxin chojni Israel rrochonda na iná vida naroaxin.

² Anto nchao para ixin jehe na ixin anto rinao na sinchecoanxinhi na Dios, pero chonxinha na nttié Dios.

³ Ixin jehe na chonxinha na quexén Dios nchejian chojni ngattoxon con jehe, sino que jeho na cjoé na quexén sinchehe na para tsojian na ngattoxon con Dios, co jamé ditticaonha na tti joinchehe Dios para ixin jehe na.

⁴ Ixin are Cristo joi, jehe joinchehe cain tti ttetonha ley que vayé Moisés. Co jai de ixin tti jehe joinchehe, cain chojni que chonda confianza ngain jehe tsojian na ngattoxon con Dios.

⁵ Moisés dicjin janhi de ixin quexén chojni tsojian na ngattoxon con Dios de ixin ley que jehe vayé: “Chojni que nchehe cain tti ndačo ley sinttechon na para cainxin tiempo.”

⁶ Pero ján na tsojianxin na ngattoxon con Dios de ixin tti confianza que chonda na ixin ngain Palabré Dios ndačo janhi: “Ndačhoha ra ngain ansean ra: ¿Quensen sacojin para ngajni? —rročo para sinchexincanji ra Jesucristo—;

⁷ ni ndačhoha ra: ¿Quensen rroxincanji ngain tti te nindadiguenhe?” —rročo para sinchecajin ra Cristo de ngayehe nindadiguenhe.

⁸ Cain mé ndačhoha ra ixin jitaxin ngain Palabré Dios janhi: “Palabré Dios jí anto chiaon nganji ra, ixin ojí Palabra mé ngá rroha ra co ngaxinhi ansean ra.” Co Palabra jiji tti joajna que janha na ndačhjan na.

⁹ Si jaha rrondačo conixin rroha que ixin Jesucristo, mé tti chonda joachaxin nganji jaha, co si jaha ditticaon ngain ansean ixin Dios joinchexechon jehe, si jamé nchehe, jaha rrochonda iná vida naroaxin.

¹⁰ Rročo de ixin tti dotticaon na ngain ansean na, ján na nchao tsoroa na ngattoxon con Dios. Co de ixin rroha na nichjaxin na jian de ixin Jesucristo para jamé rrochonda na iná vida naroaxin.

¹¹ Ngain Palabré Dios ndačo: “Ni ná chojni que ditticaon ngain Jesucristo sechín de ixin jehe.”

¹² Jaha importante para ixin Dios si chojni judío o ni nahi, ixin Dios chonda joachaxin para ixin cain chojni, co anto nchenchaon cain chojni que nchecoanxinhi jehe.

¹³ Ixin janhi ndaĉho ngain tti jitaxin Palabr  Dios: "Cainxin chojni que ncheoanxinhi Dios, tti chonda cain joachaxin, cain chojni m  rrochonda na in  vida naroaxin."

¹⁴ Pero   que en chojni nchao sincheoanxinhi na Dios si  a ditticaonha na ngain?   Co que en nchao sitticaon na ngain Dios si  a  onhi coinhi na de ixin jehe?   Co que en tsinhi na si  onhi chojni cjoi joindache na joajna de ixin jehe?

¹⁵   Co que en chojni tsji sindache icha chojni joajna m  si  onhi quensen rroanha na? Inchin jitaxin ngain Palabr  Dios: " Anto  hjoin are tti chojni que dicao joajna que ncheconohe  hjoin ans n chojni, co m  tti jian joajn  Jesucristo!"

¹⁶ Pero cainxinha chojni nchehe caso ngain joajna m  que danjo in  vida naroaxin. Jam  inchin ndaĉho profeta Isa as: " Quensen vitticaon joajna que joiquian na?"

¹⁷ Mexinxin chojni nchao sitticaon na o ani nahi ngain Jesucristo, pero jeha hasta tsinja na joajn  jehe.

¹⁸ Pero janha danchiangui:   Andoa ixin chojni Israel coinha joajn  Jesucristo?   Nahi, ndoaha; seguro que jehe na coinhi na! Ixin ngain Palabr  Dios ndaĉho jianhi:

Chojni de ngoixin mundo coinhi na tt  chojni que vanichja Palabr  Dios,

co hasta chojni ngain lugar icha cjin de ngain nontte jihi cai coinhi na palabr  jehe na.

¹⁹ Pero janha cjan danchiangui in :   Apoco chojni Israel coinxinha na joajna m ? Saho Dios nichjaxin tt  Mois s para ndaĉho ngain tti jitaxin Palabr  Dios:

Janha sinttanchaon n  naci n que jeha naci n ndoa para que tsochjio chojnina,

co janha sinttanchaon chojni que  onhi chonxin para que tso ao chojnina.

²⁰ Cottimeja Dios nichjaxin tt  profeta Isa as para ndaĉho:

Chojni que cjoeha na na janha, pero nim  ni vittja na;

co janha  ago na ngain chojni que joanchianguiha de ixin janha.

²¹ Co Dios nichja in  ixin tt  Isa as; nichja de ixin chojni Israel are ndaĉho: "Ngoixin nchanho janha rrinichj  chojni que ditticaonha nganji na co tti ningaconna janha."

11

Chojni Israel que chonda in  vida naroaxin

¹ Mexinxin jaxon janha danchiangui:   Apoco Dios vengui cain chojni jehe, tti chojni Israel co ixonhi tiempo rrocjan say  na in ?   Seguro que nahi! Ixin janha mismo n  chojni Israel. Janha joixin de raz  Abraham co de ngain grupoe Benjam n.

² Desde are saho Dios ndaĉho ixin chojni Israel, chojni jehe. Co jehe senguiha cain na jai.   Achonxinha ra tti ndaĉho Palabr  Dios ngain histori  profeta El as tti joincheoanxinhi co cjoanguihi chojni Israel ngain Dios? Jehe El as are m  ndaĉho:

³ "Chojni Israel nagoenxon na cain profeta co joinchexantte na cain alt r soixin. Co jeha janha xehe na, co jehe na rinao na nasoenxon na na cai."

⁴ Pero Dios ndaĉho: "Janha coenchjinha y to mil x  que joinchesayeha  a  dolo Baal."

⁵ Co tonhe  ajeho jai cai. Dios coinchiehe nchion chojni Israel para joinchetja ehe na. Jam  joinchehe Dios ixin jehe anto jian.

⁶ Dios nchetja ehe chojni ixin jehe Dios jian. Si Dios jeha rrojinchetja ehe tti chojni que nchehe jian, m  rroĉho que j n na ivitja aha na de ixin tti jian que Dios chonda.

⁷ Mexinxin jihi tti conhe: Chojni Israel vittjaha na tti cjo  na. Jeha tti chojni que Dios coinchiehe, m  nivittja tti jian que Dios chonda. Cain icha chojni cosoji ans n na.

⁸ Inchin ndaĉho ngain Palabr  Dios: "Dios joincheha ans n na; jeha  hj  na jmacon na que  hoha dicon co ndatsjoen na que  hoha ttinhi. Co jam  tetonhe na hasta jai."

⁹ Cai David ndaĉho:

Que vandangoe na roccjamanguia inchin trampa co inchin nonchaha

para que jeha m  rrotse chojni co soan na castigado.

¹⁰ Co que jmacon na isiconha jmacon co tsochejo na, co que lomoe na rro adoho para cainxin tiempo.

Chojni que jeha jud o nchao rrochonda na in  vida naroaxin

¹¹ Jai janha danchiangui:   Apoco chojni jud o are vetsinga na ixonhi tiempo singattjen na in ?   Seguro que nahi! Sino que ixin chojni jud o vitticaonha na, mexinxin chojni que jeha jud o chonda na oportunidad de rrochonda na in  vida naroaxin. Jam  para tsochjio chojni Israel hasta que jehe na cai sinao na vida m .

¹² Mexinxin tti nchaoha que joinchehe chojni jud o cjoi jian para icha chojni ngataha nontte. Co ixin chojni jud o concjin de ngain Dios, icha chojni nchao tsonchienhe ngain Dios. Mexinxin, si jihi tti conhe ixin chojni jud o iditticaonha ngain Dios,   seguro anto icha jian tsonhe cain chojni are chojni jud o rrocjan sitticaon ngain Dios in !

¹³ Pero janha chonda tti rronhattjo ra xo jeha judío ra. Ixin Dios chjana xa de representanté Jesucristo ngain chojni que jeha judío, mexinxin janha ndachjan ixin xa jiji, anto importante xa.

¹⁴ Rinaho que de ixin xa jiji canxion chojni que cai judío na tsochjio na de ixin jaha ra, co sinao na rrochonda na iná vida naroaxin cai.

¹⁵ Ixin si chojni ngoixin mundo tsonohe ehjain ngattoxon con Dios ixin jai jehe vengui chojni judío mexinxin ¿quehe tsonhe are Dios sayé na iná? Mé inchin vida naroaxin para tti nindadiguenhe.

¹⁶ Ixin si tti saho niottja que tonchjian de ngain nchoho, si niottja mé jiquininxin ngain Dios, rrocho ixin ngoixin nchoho mé jiquininxin ngain Dios. Co si noehe ná nttá jiquininxin ngain Dios, rrocho ixin cain ramé nttá mé jiquininxin ngain Dios cai.

¹⁷ Ná chojni nchao tonchinji ramé ná nttaolivo fino co ngain lugar mé nchetsexin ramé ná nttaolivo cimarrón. Jamé conhe chojni judío; Dios conchinji canxion chojni judío co saquehe chojni que jeha judío ngain lugué na. Co mexinxin jai jaha ra xo jeha judío ra chonda ra xajeho parte ngain Dios inchin vechonda chojni Israel. Jamé inchin ramé ná nttaolivo cimarrón que ndatsexin nttaolivo fino, rama mé chonda parte ngain noehe co ngain vidé nttaolivo fino.

¹⁸ Pero xaxaonha ra ixin jaha ra icha jian ra que rama que vehe icha saho, rrocho chojni judío. Co si xaxaon ra ixin icha jian ra, xaxaon ra ixin jaha ra vanjoha ra vidá ra ngain noehe nttá, sino que noehe nttá tti chjá ra vida.

¹⁹ Puede rrondacho ra: “Ján ndoa pero tti rama icha saho chinji rama para janha tsexin na nttiha.”

²⁰ Ndoa, pero jehe na chinji na ixin vitticaonha na ngain Jesucristo, co jaha ra chonda ra lugar nttiha jeha ixin ditticaon ra ngain Jesucristo. Mexinxin tonoaha ra orgulloso, sino que ttjiho ra cuidado.

²¹ Ixin si Dios joinchetjañeha chojni judío, tti cjoí inchin rama icha saho, cai jaha ra sinttatjañaha ra si chondaha ra confianza ngain Jesucristo.

²² Tsjexinxin ra, Dios anto jian, pero cai jehe toñao ngain chojni que ndaditján ngain tti jianha. Pero jehe anto jian nganji jaha ra. Pero jaha ra chonda que sinchehe ra sigue dayehe ra jian cain tti jian que danjo Dios. Si nahí, jaha ra cai tsonchinji ra inchin ramé nttá icha saho.

²³ Co cai si chojni judío xa rrocjan sitticaon iná, Dios sinchetsexin ngain nttá iná, ixin Dios chonda joachaxin mé.

²⁴ Ixin si jaha ra que jeha chojni judío, pero Dios conchinji jaha ra de ngain ná nttaolivo cimarrón co joinchetsexin ngain nttaolivo fino; si Dios nchao nchehe jamé, ¡seguro que jehe nchao sinchetsexin rama saho ngain nttá iná; rrocho ixin nchao sayé chojni judío iná!

Are chojni Israel rrochonda na vida naroaxin

²⁵ Hermanos, janha rinaho que jaha ra rrochonxin ra cosa jima que Dios sinchehe. Rinaho que jaha ra datsoan ra jiji para xaxaonha ra ixin anto noha ra. Co jiji tti xaxaon Dios: Masqui tsje chojni Israel ditticaonha ngain Jesucristo jai, pero mé jeha tsonchjenhe hasta que ositticaon cainxin chojni que jeha judío que sinao sitticaon ngain Jesucristo.

²⁶ Are tsonhe jiji, cottimeja cainxin chojni Israel sayé na iná vida naroaxin, ixin ngain tti jitaxin Palabré Dios ndacho:

Jehe tti danjo iná vida naroaxin tsixin de ngain Sión
co jehe sinttjian cain tti jianha de ngain razé Jacob.

²⁷ Co janha sinttachjian trato jiji conixin jehe na
are sinttjian cain tti jianha que chonda na.

²⁸ Ixin chojni judío ditticaonha tti jian joajné Jesucristo, mexinxin Dios ningaconhe na. Jamé para rrochjá jaha ra ná oportunidad para sitticaon ra ngain Jesucristo. Pero Dios xa rinao chojni judío ixin coinchiehe nindogoelitoe na xanchjen.

²⁹ Co tti Dios danjo, jehe xonhi tiempo dinttjian iná co xonhi tiempo ndacho ixin chojni jehe ijeha chojni.

³⁰ Icha saho jaha ra vaguitticaonha ra Dios, pero jai Dios coiaconoaha ra ixin chojni judío incheha na inchin ttetonha jehe.

³¹ Co jai jehe na iditticaonha na, pero mé jeha para que Dios tsiaconoeha na, jamé inchin jai coiaconoaha ra jaha ra.

³² Ixin Dios chjé joachaxin cainxin chojni de sincheha na inchin jehe ttetonha para que jehe nchao tsiaconoeha yahi cain na.

³³ ¡Anto tsje cosa rentte chonda Dios! ¡Co anto nohe co anto ttinxin jehe! xonhi chojni nchao ndacho quedonda jehe nchehe tti jehe nchehe, ni xonhi chojni nchao ttinxin nttié jehe.

³⁴ Ixin jitaxin ngain Palabré Dios: “¿Quensen ttinxin tti xaxaon Dios, tti chonda cain joachaxin? ¿O quensen joincheoenhe Dios?”

³⁵ ¿Co quensen nchao rrochjé Dios ná cosa saho, para que después nchao sachá chonja cosa?”

³⁶ Ixin cainxin cosa joixin de ngain Dios co cainxin cosa conchjian de ixin jehe co para ixin jehe. ¡Dios tsosayehe para cainxin tiempo! Amén.

12

Quexén nchehe chojni que tequininxin ngain Dios

¹ Mexinxin hermanos, ixin Dios anto ttiaconoehe cain chojni, janha nttatsanha ñao ra ixin xanjo ra jaha ra mismo ngain Dios, inchin ná ofrenda que jichon, que jiquininxin ngain Dios, co nchexoxinhi jehe. Jihí rrocho ixin jaha ra ndoa nchecoanxinhi ra Dios, co jihí tti jiquininxin sinchehe ra.

² Ncheha ra inchin ndacho chojni que ditticaonha ngain Jesucristo; sino ttentoxinhi ra joarixaoan ra para que jamé sintte ra chojni nroaxin. Co jamé rrochonxin ra tti rinao Dios, rrocho cosa jian, cosa que nchexoxinhi Dios co tti jian que jiquininxin sinchehe ra.

³ Ixin Dios anto jian, jehe chjana xa de representanté Jesucristo. Co mexinxin janha rrondatto ra cain ra, que xaxaonha ra ixin jaha ra anto jian ra. Pero cada ra chonda ra que xaxaon ra jian quexén tenchehe ra jai que Dios ojointtanchaon ra de ixin tti confianza que chonda ra ngain Jesucristo.

⁴ Ixin inchin cuerpoe chojni chonda tsje parte, co cainha parte mé nchehe xajeho xa,

⁵ jamé cai ján na masqui tsje na, pero ján na inchin nacoa cuerpo. Co ján na te na ngain Jesucristo inchin cain parte de cuerpoe ná chojni.

⁶ Dios ochjá na ojejé joachaxin. Co chjá na cada na tti clase de joachaxin que jehe rinao rrochonda na. Co ján na chonda na que nttogonda na jian tti clase de joachaxin que Dios chjá na. Rrocho, si Dios chjá na joachaxin de ndache na chojni joajna que dayé na de ngain Dios, ján na chonda na que sotticaon na jian ixin Dios ndoa chjá na joajna, co rrondache na chojni joajna que dayé na.

⁷ O si Dios chjá na joachaxin de tsjengujna na icha chojni, ján na chonda na que tsjengujna na na jian. Co jehe tti chonda joachaxin para sincheoenhe chojni, chonda que sincheoenhe na conixin ngoi ansén.

⁸ Co jehe tti chonda joachaxin de sincheanimá chojni, chonda que sincheanimá na conixin jian ansén. Co jehe tti tsjengujna icha chojni conixin tomi ixin Dios jamé rinao, jehe chonda que sanjo tomi conixin jian ansén. Co jehe tti chonda joachaxin para tsetonhe icha chojni, chonda que sicao cuidado de sinchehe jamé pero jian. Co jehe tti chonda joachaxin de tsiaconoehe chojni noa, chonda que tsonohe chjoin are sinchehe jamé.

Tti chonda que sinchehe chojni que ditticaon ngain Jesucristo

⁹ Rinao chó ra conixin ansean ra roa. Ningaconhe ra cain tti jianha co nchehe ra tti jian.

¹⁰ Chonda ra que rinao chó ra inchin rinao ra xanchó ra; tjengujna chó ra co nchere-spetá chó ra.

¹¹ Nchehe ra xá ra conixin ansean ra, co xonhi tiempo tosaha ra. Co nchehe ra xé Jesucristo conixin ngoixin ansean ra.

¹² Cainxin tiempo contento dintte ra ixin jaha ra chonda ra seguro ixin chonda ra iná vida nroaxin. Co chonda ra paciencia are tangui tsonha ra. Co xonhi tiempo ttinttohe ra de nchecoanxinhi ra Dios.

¹³ Tjengujna ra icha chojni que ditticaon ngain Jesucristo are jehe na dondehe na chonja cosa. Co jian dayehe ra tti chojni que siji sitsjaha ra.

¹⁴ Nchetsenhe ra ñao Dios ixin jehe sinchenchaon chojni que nchehe feo nganji ra. Nchetsenhe ra ñao Dios ixin jehe sinchenchaon chojni mé, co danchiaha ra cosa jianha para ixin jehe na.

¹⁵ Contento dintte ra ngain chojni que te contento; co tsjanga ra conixin chojni que tetsjanga.

¹⁶ Rinao chó ra chjoin. Dintteha ra orgulloso, sino que dintte ra inchin chojni que jeha importante. Co xaxaonha ra ixin anto noha ra.

¹⁷ Si ná chojni sinchehe feo nganji ra, jaha ra ncheha ra feo ngain chojni mé. Tsjehe ra quexén sinchehe ra para que sinchehe ra tti jian ngattoxon con cain chojni.

¹⁸ Nchehe ra cainxin tti jaha ra nchao nchehe ra para sinao ra chjoin cainxin chojni.

¹⁹ Hermanos que janha anto rinaho, xonhi tiempo nchehe ra feo ngain chojni que joinchehe feo nganji ra, sino que dittoaxin ra que Dios sinchecastigá chojni mé, ixin ngain tti jitaxin Palabré Dios ndacho: “Janha tti jiquininxin na sinttastigá chojni; janha tti tsjengá hna, ndacho Dios, tti chonda cain joachaxin.”

²⁰ Cai ndaĉho ngain Palabré Dios: “Si ná chojni que jaha ningaoncha jidenhe jintta, chjehe jehe tti sine; co si jidenhe jinda, chjehe jehe tti sihi, ixin si jaha jamé sinchehe, jehe anto tsosoé.”

²¹ Dittoaxinha ra que sinttatján ra cosa jianha. Sino que nchetján ra tti jianha de ixin tti jian.

13

¹ Cain chojni chonda que sitticaon na ngain nittetonha ngain gobierno. Ixin xonhi chojni chonda joachaxin para ttetonha si Dios chjeha joachaxin mé. Co cainxin nittetonha mé vayé na joachaxín na de ngain Dios.

² Mexinxin chojni que ttetocaho gobierno, chojni mé ttetocaho tti Dios joinchechjian. Co cain chojni que nchehe jamé sintteca tti jianha co soan castigado.

³ Ixin cainxin chojni que ttetonha ngain gobierno teha para sinchexaon chojni que nchehe jian, sino que para sinchexaon chojni que nchehe tti jianha. Mexinxin zarinao tasarihi co rroxaonha ngain nittetonha? Nchehe tti jian co chojni que ttetonha anto sinao na jaha.

⁴ Ixin nittetonha, mé ninchehe xé Dios que nchehe xa para ttjenguijna jaha. Pero si jaha sinchehe tti jianha, rrochonda que rroxagoen nittetonha mé ixin jehe na ndoa chonda na joachaxin para sinchecastigá na chojni. Nittetonha mé ninchehe xé Dios para sinchecastigá chojni que nchehe jianha.

⁵ Mexinxin jaha ra chonda ra que ditticaon ra ngain nittetonha nganji ra, co jeoha para sayeha ra castigo, sino que cai para que tsonoha ra de ngain ansean ra que chonda que sitticaon ra.

⁶ Co cai de ixin cain jihi jaha ra chonda ra que tsjenga ra hna impuesto ixin nittetonha mé nchehe na xé Dios co jehe na cainxin tiempo nchehe na xa jihi.

⁷ Chjehe ra cada chojni tti jiquininxin. Ngain chojni que jaha ra teca ra contribución, ttjenga ra hna impuesto mé. Co ngain chojni que jaha ra teca ra impuesto, ttjenga ra hna impuesto mé. Co ngain chojni que jiquininxin respeto, chjehe ra respeto. Co ngain chojni que jiquininxin sintheadmirá ra, ntheadmirá ra chojni mé.

⁸ Dinttecaha ra ngain ni ná chojni. Jaha ra jeha chonda ra que rinao chó ra. Ixin chojni que rinao icha chojni, mé tti jinchehe cain tti ttetonha ley de Dios.

⁹ Mandamientoe Dios ndaĉho: “Chondaha ra nĉhicoxe o xicoxe, co dantsjeha ra vidé iná chojni, ni tteha ra cosé iná chojni ni nichjaha ra cosa ndoaha de iná chojni, ni dinaoha ra rrochonda ra cosé iná chojni”; pero mandamiento jihi co cain icha mandamiento jí ngain jeha palabra que ndaĉho janhi: “Dinao ra icha chojni inchin rinao ra cuerpoa ra.”

¹⁰ Chojni que rinao icha chojni sincheha feo ngain na, co jamé de ixin tti rinao chó na, ditticaon na nchehe na ngoixin ley que ttetonha Dios.

¹¹ De ixin cain palabra jihi, xaxaon ra ngain quexehe tiempo techon na jai, co onoha ra ixin ojoj tiempo para que ján na rroxingamá na de ngain cottaĉhin. Jamé ixin jai anto icha ochiaon jitonchienne tiempo para rrochonda na iná vida naraoxin que are coexinhi na gotticaon na joajné Jesucristo.

¹² Tti naxin xehe omerocoa ndajoexin, co jitonchienne nchanho. Mexinxin chonda na que isonttoha na cosa que nchehe ni ngain naxin xehe, rroĉho cosa jianha, co sonttengá na lontto de chia para sontte na inchin soldado que ĉhji ngain joadingasán.

¹³ Rroĉho que sonttoho na tti jian, inchin jiquininxin nchehe ni ngain nchanho. Co sontteha na dicoan na, ni sacijha na ngain vandango tti anto ruido jí, ni rrochondaha na nĉhicoxe ni xicoxe, ni rrochondaha na vicio, ni tsetocoha chó na, ni rrochondeha chó na joachjoehe.

¹⁴ Pero ján na jian sayé na joajné Jesucristo, que mé tsjenguijna na inchin lontto chia ttjenguijna xisolado. Co rroxaonha na de sonttoho na inchin rinao cuerpoa na.

14

Nichjaha feo de ixin tti nchehe iná chojni que ditticaon ngain Jesucristo

¹ Si ná chojni xa jianha ditticaon ngain Jesucristo, pero dayehe ra chojni mé inchin hermanoa ra co nchediscutiha ra ngain chojni mé cosa que seguroha de ixin tti dotticaon na.

² Jí ná ejemplo: Te chojni que xaxaon ixin nchao jine na cain cosa, co te chojni que xa jianha ditticaon ngain Jesucristo, co chojni mé jineha nntao.

³ Tti chojni que jine cain cosa ĉhoja sinchehe meno jehe tti jineha cainxin cosa; co tti chojni que jineha cainxin cosa chondaha que rronichja feo de ixin jehe tti jine cain cosa, ixin Dios ovayé jehe chojni mé.

⁴ ¿Co quensen jaha ra para rronichja ra feo de ixin ninchehe xé iná chojni? Ixin si chojni mé sittohe jian o sittoeha jian, pero mé cosé ninajní jehe. Co seguro ixin jehe sittohe jian ixin Dios, tti chonda cain joachaxin, tsjenguijna jehe para sittohe jian.

⁵ Co jí iná ejemplo: Te chojni que chjé icha importancia ngain ná nchanho que ngain iná nchaon, co te icha chojni que xaxaon cain nchanho xajeho nchaon. Naná chojni chonda que tsinchiehe tti jehe sitticaon, co sitticaon jian ngain mé.

⁶ Chojni que xaxaon ixin te nchanho que icha importante que icha nchaon, chojni mé jamé xaxaon para nchesayehe Jesucristo. Co tti chojni que xaxaon ixin cain nchanho xajeho, cai chojni mé jamé xaxaon para nchesayehe Jesucristo. Co chojni que jine cain cosa, jamé jine na para nchesayehe na Jesucristo, ixin chojni mé danjo na gracias ngain Dios para ixin tti jine na. Co chojni que jineha cain cosa, cai jamé nchehe na para nchesayehe na Jesucristo, co jehe na cai danjo na gracias ngain Dios.

⁷ Ixin ni ná de ján na techon na para ixin jaon na mismo, co are ndadenhe na, jeha para ixin jaon na mismo.

⁸ Ixin are techon na, mé para ixin Jesucristo, co are ndasenhe na, mé para ixin Jesucristo cai. Mexinxin are techon na co después de ndasenhe na, ján na chojni Cristo na.

⁹ Ixin Cristo ndavenhe co después jehe xechon iná, para rrochonda cain joachaxin para ixin tti nindadenhe co cai para tti ni xa techon.

¹⁰ Pero jaha ra, ¿quedonda nchejuzgá ra ngain icha chojni que ditticaon Jesucristo? ¿O quedonda nchehe ra meno jehe na? Ixin cain ján na rrochonda na que tsonchienne na ngattoxon con Cristo para que jehe sinttajuzgá na.

¹¹ Ixin ndačo ngain Palabré Dios:

Inchin anto seguro que janha rrichon, cai anto seguro que cainxin chojni settoxin nttajochjihi na ngattoxon con na janha, ndačo Dios, tti chonda cain joachaxin, co cainxin chojni rrondačo na ngattoxon con icha chojni ixin janha Dios na.

¹² Mexinxin naná na chonda na que rrondache na Dios cainxin tti nttoho na ntthi ngataha nontte.

Nchetjanjiha ra icha chojni que ditticaon ngain Jesucristo

¹³ Mexinxin ján na chondaha na que rronichja na feo de ixin tti nchehe icha chojni que ditticaon ngain Jesucristo. Co en lugar de mé tsjehe ra que xén sinchehe ra para que sinchetjanjiha ra chojni mé, rročo que xonhi nchehe ra para sinchencheha ra na cosa jianha.

¹⁴ Janha nona que ni ná cosa que jine chojni ttjoaha, co janha chonda seguro de jiji ixin ditticanho Jesucristo, tti chonda cain joachaxin. Pero si chonja chojni xaxaon ixin ná cosa ttjoaha para jine ni, mexinxin para ixin jehe, cosa mé ttjoaha.

¹⁵ Co si de ixin tti jintte jaha, iná chojni que ditticaon Jesucristo tonohé feo, mé rročo ixin are jintte cosa mé jaha irinaoha chojni mé. Dittoaxinha que ndasitján ná chojni que Jesucristo ndavenhe para cjoenguijna, jeha ixin jaha rinao jintte chonja cosa que chojni mé ndačo ixin ttjoaha.

¹⁶ Chjeha ra icha chojni oportunidad de rronichja na jianha de ixin cosa que jaha ra ndačo ra ixin jian.

¹⁷ Ixin ngain tti tettonha Dios jeha importante tti jine ni co tti dihi ni, sino que tti importante, mé ná vida jian, co tti chjoin que tsonohe anséan ra co ixin contento sintte ra. Cain mé tti danjo Espíritu Santo.

¹⁸ Jehe tti nchehe xé Cristo inchin cain jiji, chojni mé nchehe tti nche xoxinhi Dios co icha chojni rronichja jian de ixin jehe chojni mé cai.

¹⁹ Mexinxin ján na sontocho na sigue tsjé na tsje cosa que tsonohe chjoin ngain ansean na ixin conixin cain mé ján na nchao tsjenguijna chó na para icha jian sotticaon na.

²⁰ Xonhi cosa nchehe que sinchetján tti joinchehe Dios ngain vidé iná chojni de ixin tti jintte. Seguro ixin chojni nchao jine quexeho cosa, pero jianha para jine ni ná cosa que sinchetjanji iná chojni para sinchehe cosa jianha.

²¹ Anto jian si chojni sineha nttao, ni diha vino, ni xonhi iná cosa nchehe que sincheyehe iná chojni que ditticaon ngain Jesucristo, o que sinchenchehe jehe cosa jianha, o que sinchesojiha de ngain confianza que jehe chonda.

²² Tti jaha ditticaon de ixin cain cosa jiji ndache jeha Dios. ¡Anto chjoin para ixin tti chojni que tonohé feo are jehe nchehe ná cosa que jehe ndačo ixin jian!

²³ Pero tti chojni que jine ná cosa co chondaha seguro que mé jian, Dios sinchecondená chojni mé, ixin jehe mé chondaha seguro si Dios ndačo ixin jian cosa mé para sine. Ixin jianha nttoho na are nttoho na ná cosa co chondaha na seguro si Dios chjá na joachaxin para nttoho na jamé.

15

Nchehe tti ncheꝑoxinhi icha chojni co jeoha tti ntaꝑoxinhi jaha

¹ Ján na ʒo dotticaon na jian ngain Jesucristo ʒoha sonttoho na jeho inchin jaon na rinao na, sino que chonda que tsjenguijna na tti chojni que ʒa jianha ditticaon ngain Jesucristo para que jehe na icha tsojoji na de ngain confianza para ngain Jesucristo.

² Naná ján na chonda na que sonttoho na tti ncheꝑoxinhi icha chojni para tsjenguijna na jehe na para que sinttotsje na confianzé na para ngain Jesucristo.

³ Ixin Cristo cai joincheha inchin jeho joincheꝑoxinhi; sino que conhe inchin ndaʒo ngain Palabré Dios: “Tti cosa feo que chojni ndaʒo de ixin soixin, vetsingataha na janha.”

⁴ Ixin cain cosa que vetaxin icha saho ngain Palabré Dios, cain cosa mé chojni Dios dicjin na para tsjagoa na na de ixin Dios, para que ján na rrochonxin na jian que ixin Dios danjo ngain chojni iná vida naraoxin, co de ixin jiji rrochonda na paciencia co consuelo que danjo tti Palabré Dios.

⁵ Que Dios, tti danjo paciencia co consuelo, tsjenguijna ra para sintte ra ʒhjoin ngain icha chojni, inchin ndaʒo Jesucristo.

⁶ Jamé para que cain ra junto, ʒá nacoa tté chojni tsinhi ni, sinchecoanxinhi ra Dios, Ndodé Jesucristo, tti chonda cain joachaxin.

Tti jian joajné Jesucristo cai para ixin chojni que jeha judío

⁷ Mexinxin dayehe chó ra inchin Cristo vayá na ján na; jamé nchehe ra para nchesayehe ra Dios.

⁸ Ixin janha ndattjo ra que ixin Cristo joí ngataha nontte para tsjenguijna chojni judío co jañá joinchehe ngain na para joiconhe tti joincheprometé Dios are saho ngain ningoelitoa na, co jamé cjoago ixin Dios ndoa nchehe tti ncheprometé.

⁹ Cai jehe joí ngataha nontte para que chojni que jeha judío sinchecoanxinhi Dios ixin jehe anto ttiacoonehe chojni, inchin ndaʒo ngain Palabré Dios: Mexinxin janha sinttacoanxinha soixin ngayé chojni que jeha judío co janha rrotsje na himno para sinttasayaha soixin.

¹⁰ Co ngain iná parte de Palabré Dios ndaʒo:

Chaha ra ʒo jeha judío ra conixin jaha ra ʒo chojni Dios.

¹¹ Co ngain iná parte de Palabré Dios ndaʒo:

Nchecoanxinhi ra Dios, tti chonda cain joachaxin, cainxin ra ʒo jeha judío ra

co cain ra nichja ra de ixin tti joachaxin que jehe chonda.

¹² Co Isaías dicjin:

Tsoncjihí ná tti tsixin razé Isai

que mé Dios tsín para tsetonhe cain chojni que jeha judío;

co jehe nimé tsí na ngain jehe para rrochonda na iná vida naraoxin.

¹³ Que Dios, tti ʒhjá na confianza de rrochonda na iná vida naraoxin, tsjenguijna ra para anto rrochaha ra co anto ʒhjoin tsonohe ansean ra ixin ditticaon ra ngain jehe, para que de ixin joachaxin Espiritu Santo jaha ra anto tsje confianza rrochonda ra de rrochonhe ra tti iná vida naraoxin que tsí.

¹⁴ Hermanos, janha chonda seguro ixin jaha ra anto jian ra ngain icha chojni co anto jian chonxin ra, co ixin anto noha ra queʒén ʒhehe chó ra jian consejo.

¹⁵ Pero ngain carta jiji janha ʒaonha na para cjinha ra anto claro de ixin cain cosa jiji para que ʒonhi rrotjañaha ra. Janha jamé jointtaha ixin Dios, tti anto jian, ʒjana ʒa

¹⁶ de nttaha ʒé Jesucristo ngayé chojni que jeha judío. Janha ndaʒhjan na tti joajné Dios que danjo iná vida naraoxin ngain cainxin chojni para que janha nchao sanjo tti chojni mé ngain Dios, co jehe Dios sinao sayé na ixin Espiritu Santo osincherona.

¹⁷ Ixin janha ditticanho Jesucristo, mexinxin janha tonona ʒhjoin de ixin ʒa que nttaha para ixin Dios,

¹⁸ ixin janha nichja jeho tti Jesucristo joinchehe de ixin janha para que jai chojni que jeha judío ditticaon na ngain Dios co nchehe na inchin ndaʒo jehe. Co jiji joiconhe conixin palabra que jehe joinchenichja na co de ixin tti jehe joinchehe conixin janha,

¹⁹ co de ixin señas co milagros co joachaxin Espiritu Santo. Co jamé janha joexin ndattjan chojni tti jian joajné Jesucristo desde ciudad de Jerusalén co cainxin lugar hasta regioen Ilirico.

²⁰ Mexinxin janha cainxin tiempo joinaho nichja tti jian joajna mé ngain lugar tti chojni ʒa coinha de ixin Cristo, para que janha ʒonhi tiempo sinttaha sigue sinttaha ʒa que iná chojni nchequexinhi.

²¹ Sino que icha jian tonhe inchin ndaʒo ngain Palabré Dios:

Chojni que ʒonhi tiempo coinhi joajné jehe, mé sicon na jehe,

co chojni que ʒonhi tiempo coinhi de ixin jehe, nimé ni tsinxin de ixin jehe.

Pablo xaxaon tsji Roma

²² Co ixin janha varichonda tsje xa, mexinxin čoha joasotsjaha ra, masqui tsje nttiha janha joihao rrogasotsjaha ra.

²³ Pero jai janha ojoexin xana ngain región jihi, co ixin chonda tsje nano que janha rinaho saso sasotsjaha ra,

²⁴ jai xaxanho ixin satto nttiha para sasotsjaha ra are satsji España. Co después de osasotsjaha ra, xaxanho que puede jaha ra tsjenguijna ni ra para sinttavijá tti tsji.

²⁵ Pero jai janha tsji Jerusalén para tsinha tomi ngain chojni que ditticaon Jesucristo nttiha.

²⁶ Ixin chojni ngain nihngo ngain Macedonia co Acaya xaxaon na joatsetaonhe chó na tomi para rroanha na ngain chojni Jesucristo que anto noa ngain Jerusalén.

²⁷ Jehe na joinchehe na jamé ixin xaxaon na ixin mé jian, co ndoa jihi jian, ixin ndoa cai que chojni ngain Macedonia co Acaya teca na ngain tti ni ngain Jerusalén. Ixin de ixin chojni judío, tti chojni que jeha judío nchao rrochonda iná vida naroaxin. Mexinxin chojni que jeha judío co ditticaon ngain Jesucristo co chonda iná vida naroaxin chonda que tsjenguijna conixin tomi na tti chojni judío que ditticaon ngain Jesucristo.

²⁸ Mexinxin are janha tsjexin xana co sanjo tomi mé ngain chojni de Jerusalén, cottimeja satsji España co are mé satto sasotsjaha ra cai.

²⁹ Janha chonda seguro que are janha tsji nganji ra, Dios anto sinchenciaon tti jian joajné Jesucristo que janha rrondattjo ra.

³⁰ Hermanos, janha nttatsanha ñao ra por ixin Jesucristo, tti chonda cain joachaxin para ixin ján na, co de ixin Espíritu Santo, tti tjenguijna na para rinaho chó na, nttatsanha ñao ra de ixin mé que sinchetsenhe ra ñao Dios para ixin janha.

³¹ Nchetsenhe ra ñao Dios que tsjenguijna na para que xonhi tsonna de ngain chojni que ditticaonha Jesucristo ngain Judea, co ixin chojni que ditticaon Jesús ngain Jerusalén jian sayena na janha conixin tomi que tsjinha.

³² Jamé para que si Dios rinao janha saso sasotsjaha ra co anto rrochahna co nchao sinttajogaha are sasotsjaha ra jaha ra.

³³ Que Dios, tti danjo tti čjoin que tonohé ansén ni, sehe nganji ra. Amén.

16*Joajna que cjoihí cada chojni*

¹ Janha rrinttatsanha ñao ra que dayehe ra jian hermana Febe, nčí que joinchehe xé Dios ngain nihngo que jí ngain rajna Cencrea.

² Dayehe ra nčí jihi jian de ngain nombré Jesucristo, inchin jiquininxin nchehe cain chojni que ditticaon ngain Jesucristo, co tjenguijna ra ncha de ngain quexeho cosa que sondehe ncha, ixin jehe ncha cjoenguijna ncha tsje chojni que ditticaon ngain Jesucristo, co cai cjoenguijna na ncha janha mismo.

³ Chjehe ra joajna cai ngain nčí que dinhi Priscila co xixihi que dinhi Aquila, tti compañerona ngain xé Jesucristo.

⁴ Cayoi chojni jihi coín na vidé na en peligro para cjoenguijna na na janha para venha na. Mexinxin janha chjaha cayoi na gracias, co jeoha janha rrichjaha na gracias, sino que cai cain chojni que jeha judío pero ditticaon ngain Jesucristo.

⁵ Chjehe ra joajna cai cain tti chojni que ditticaon ngain Jesucristo, ni xatte ngain nchiandoha Priscila co Aquila. Chjehe ra joajna xiamigona Epeneto que janha anto rinaho, ixin xí jihi tti saho vitticaon ngain Jesucristo de cainxin chojni ngain regioen Acaya.

⁶ Chjehe ra joajna María, tti anto joinchehe xa ngayaha jaha ra.

⁷ Chjehe ra joajna Andrónico co Junias tti vinttequixin rajnana co tti vintteguiaxinhi ngain cárcel conixin janha. Cain nirepresentanté Jesucristo anto jian chonxin cayoi xí jihi, co jehe xa icha saho vitticaon xa ngain Jesucristo que janha.

⁸ Chjehe ra joajna Amplias, xiamigona que janha anto rinaho que ditticaon xa ngain Jesucristo.

⁹ Chjehe ra joajna Urbano, xicompañeroa na de ngain xé Jesucristo, cai chjehe ra joajna Estaquis, xiamigona que anto rinaho.

¹⁰ Chjehe ra joajna Apeles, tti ocjoagoa na tsje nttiha ixin jehe anto jian ditticaon ngain Jesucristo. Cai chjehe ra joajna cain nifamilié Aristóbulo.

¹¹ Chjehe ra joajna Herodión, tti joixin de rajnana. Co cai chjehe ra joajna cain nifamilié Narciso que cain nimé ditticaon na ngain Jesucristo.

¹² Chjehe ra joajna Trifena co Trifosa, nčí que dinttenchehe xé Jesucristo. Chjehe ra joajna na Pérsida, nčí que ján na anto rinao na; jehe anto joinchehe xé Jesucristo cai.

¹³ Cai chjehe ra joajna Rufo, tti anto jian ditticaon ngain Jesucristo, co cai janné tti cjoí inchin ná jannana janha.

¹⁴ Chjehe ra joajna Ansíncrito, co Flegonte, Hermas, Patrobas, Hermes, conixin cain chojni que ditticaon Jesucristo nttiha.

¹⁵ Chjehe ra joajna Filólogo, Julia, Nereo conixin nchichó Nereo, Olimpas conixin cain chojni que ditticaon ngain Jesucristo que te ngain nimé.

¹⁶ Naná ra chjehe chó ra joajna jian. Cain chojni nttihi que ditticaon ngain Jesucristo roanha na joajna para ixin jaha ra.

¹⁷ Hermanos, janha nttatsanha ñao ra que ttjiho ra cuidado de ngain tti chojni que nchecjian división co ttín na cosa que nchetjanji chojni. Cayoi cosa jihi ningaconhe tti jaha ra coangui ra de ixin Jesucristo. Jaha ra dachjenda ra de ngain chojni mé.

¹⁸ Ixin cain chojni que nchehe mé nchesayeha na Jesucristo, tti chonda cain joachaxin para ixin ján na, sino que chojni mé nchehe na inchin rinao cuerpoe na, co ncheyehe na chojni que nandá ttexinhí ditticaon ngain Jesucristo, conixin tti anto chjoin que jehe na nichja na.

¹⁹ Cainxin chojni ngoixin mundo nohe na quexén jaha ra vitticaon ra nchehe ra tti ndacho Jesucristo; mexinxin janha anto chahna jai, co janha rinaho que jaha ra sintte ra listo para sinchehe ra joxon cosa jian, pero que sincheha ra cosa janha.

²⁰ Co Dios, tti danjo tti chjoin que tonoho ansén chojni, mé tti toin sinchettegaos Satanás ngangui rottea na. Que Jesucristo, tti chonda cain joachaxin para ixin ján na, sinttanchaon ra.

²¹ Nttihi Timoteo, tti xicompañerona de ngain xé Jesucristo, rroanha joajna para ixin jaha ra; cai Lucio, Jasón co Sosípater, tti nijoixin de ngain rajnana rroanha na joajna para ixin jaha ra cai.

²² Janha que dinhi na Tercio, que rricjin na carta jihi para ixin Pablo, cai rriroanha joajna para ixin jaha ra de ngain nombré Jesucristo.

²³ Cai Gayo rroanha joajna para ixin jaha ra. Janha nttihi rrihi ngain nchiandoha jehe Gayo, tti nchia que Gayo nchecjen cain chojni que ditticaon ngain Jesucristo para que jehe na nchegonda na para servicio. Cai Erasto, tti tesorero de ngain ciudad jihi rroanha joajna para ixin jaha ra co cai tattita que dinhi Cuarto, tti ditticaon ngain Jesucristo, rroanha joajna para ixin jaha ra.

²⁴ Que Jesucristo, tti chonda cain joachaxin para ixin ján na, que jehe sinchenchaon nganji ra cainxin ra. Amén.

Nttihi joexinxin joajna jihi

²⁵ Co jai nttocoanxinhi na Dios, tti nchao icha sinttajian na de ixin tti joajna que danjo iná vida naroaxin que joajna mé tti janha ndachjan co nttacoán chojni de ixin Jesucristo. Co cai joajna mé xajeho palabra que Dios xaxaon icha saho que nontte rroaguehe, pero desde mé joajna jihi vema joajna.

²⁶ Pero jai Dios, que jí para cainxin tiempo, jehe jinchenohe cain chojni joajna mé de ixin cain xón que dicjin profeté are saho. Jamé joinchehe Dios para que jai chojni de cain nación sitticaon na co sinchehe na tti ndacho jehe.

²⁷ Jeho nacoa Dios, mé tti nohe cainxin cosa, co jehe tti jiquininxin tsosayehe para cainxin tiempo de ixin tti joinchehe Jesucristo! Amén.

Saho Carta Que Dicjin Pablo Para Ixin Chojni Que Ditticaon Jesucristo Ngain Ciudad De Corinto

Pablo chjé joajna chojni Corinto

¹ Janha Pablo na, tti Dios vayahna janha para rrihi ná representanté Jesucristo. Janha co Sóstenes

² techjaha ra joajna ngain carta jiji para ixin cain jaha ra que ditticaon ra Dios, xo te ra ngain ciudad de Corinto; jaha ra xo tequininxin ra ngain Dios ixin jaha ra anto ditticaon ra Jesucristo. Dios vayaha jaha ra ngain ná vida jian, jaha ra conixin cain chojni de cain lugar tti nichja na jian de ixin nombré Jesucristo, tti chonda joachaxin para ixin ján na. Jehe tti chonda joachaxin para ixin jehe na, co para ixin ján na cai.

³ Dios Ndodá na, co Jesucristo, tti chonda joachaxin para ixin ján na, sinchenchaon nganji ra co rrochjá ra tti chjoin que tsonohe ansean ra.

Quexén nchenchaon Dios chojni por ixin Jesucristo

⁴ Janha siempre chjaha gracias ngain Dios de ixin jaha ra ixin Dios jointtanchaon jaha ra de ixin Jesucristo.

⁵ Ixin ditticaon ra Cristo, Dios chjá jaha ra cainxin joachaxin de ngain cain tti jaha ra nichja ra co ngain cain tti jaha ra noha ra.

⁶ Tti ndattjo ra de ixin Cristo jaha ra ndoa vayehe ra.

⁷ Co jamé sinchetjanha ra ni ná cosa que danjo Dios jaxon que xa techonhe jaha ra tti nchanho que Jesucristo, tti chonda joachaxin para ján na, rrocjan tsí iná.

⁸ Jehe tti sinchesoji ansean ra hasta are ndasenehe ra para que ni ná ra xonhi jianha sinteca ra are tsí Jesucristo, tti chonda joachaxin para ixin ján na.

⁹ Dios siempre nchehe tti jehe ndacho, co jehe tti vayaha jaha ra para que te ra jai, jaha ra conixin Jesucristo, Xenhe Dios co tti chonda joachaxin para ixin ján na.

Tti ndacho Pablo de ixin chojni Jesús que dachjendehe chó

¹⁰ Nttatsanha ñao ra de ixin nombré Jesucristo, tti chonda joachaxin para ixin ján na, que dintte ra de acuerdo co dachjendehe chó ra. Dintte ra nacoaxinxon grupo, co nacoaxinxon forma de xaxaon ra co de tsonohe ngain joarrixaoan ra.

¹¹ Janha ndachjan jiji nganji jaha ra ixin nindoha Cloé ndachjenji na na janha ixin jaha ra toñaohé chó ra.

¹² Janha ndachjan que jaha ra toñaohé chó ra ixin cada jaha ra nichja ra ojeje; canxion ra ndacho ra: "Janha chojni Pablo na"; co icanxin ra ndacho ra: "Janha chojni Apolo na"; co icanxin ra ndacho ra: "Janha chojni Pedro na"; co icanxin ra ndacho ra: "Janha chojni Cristo na."

¹³ Pero, ¿apoco Cristo rinao que chojni sachjendehe chó na? ¿Apoco janha Pablo na goan na crucificado para ixin jaha ra? ¿O ani joiguite jaha ra para sintte ra jehó chojnina?

¹⁴ Janha chjaha gracias ngain Dios ixin janha jointtaguiteha ni ná jaha ra, jehó Crispo co Gayo tti jointtaguite janha.

¹⁵ Jañá ni ná chojni choha rrondacho na ixin joiguite na para sintte na chojnina janha.

¹⁶ Ján, cai jointtaguite cain nindoha Estéfanos, pero janha xaxanho que ijointtaguiteha icha chojni.

¹⁷ Cristo coetonnaha para sinttaguite chojni. Jehe coetonna para rrondattjan chojni quexén sinchehe na para sayeha na castigo de ixin tti jianha que nchehe na, pero janha nichjaha conixin joxon palabra chjoin inchin nchexoxinhi chojni, ixin janha nichja jehó de ixin quedonda Cristo ndavenxin nganito cruz, co jiji tti icha rentte para que chojni tsonohe.

Cristo chonda joachaxin Dios, co jehe chonxin quexehé cosa jian inchin Dios chonxin

¹⁸ Are chojni que ndeditján ngain vicio ttinhi na tti joajna de ixin quedonda ndavenxin Cristo nganito cruz, jehe na xaxaon na ixin mé xonhi xé, pero para ján na que chonda na iná vida naxoaxin que sehe para cainxin tiempo, joajna mé chonda joachaxin Dios.

¹⁹ Inchin ndacho ngain tti jitaxin Palabré Dios:

Janha tsjago ixin xonhi xé tti anto chonxin chojni que anto nohe cosa de ngataha nontte, co janha tsin ndaha joarrixaoen tti chojni que chonda seguro ixin anto jian ttinxin de tti nohe jehó.

²⁰ Mexinxin xonhi rentte tti xaxaon chojni que anto chonda seguro ngain tti jehe na xaxaon na, co tti anto nohe, co tti anto tjao chó de ixin cosa de ngataha nontte nttihi. Dios cjoago ixin tti xaxaon chojni que ditticaonha Jesucristo, mé xonhi xé.

²¹ Dios jehe nohe nchehe cain cosa jian. Co jehe coančhjanda cain chojni que jehe nchežoxinhí na cosa de ngataha nontte para que rrochonxinha na quehe rinao jehe Dios, ixin tti jehe na nohe na žonhi xé mé para ixin Dios. Pero jehe Dios conixin joajné coančhjandaha tsji ngain infierno tti chojni que chonda confianza ngain jehe Dios. Masqui tti chojni que ditticaonha žaxaon na que joajna jihi žonhi xé.

²² Ni chojni judío ni chojni griego rinaoha na sitticaon na tti jian joajné Jesucristo. Ixin chojni judío icha rinao na sicon na señal de milagro, co chojni griego icha rinao na ttjé na de quežén tsonohe na quežén rrochonxin na icha de ngataha nontte nttihi.

²³ Pero janha na ndattjan na cain chojni de ixin Cristo que goan crucificado. Co chojni judío are ttinhi na ixin Jesús goan crucificado, jehe na žaxaon na que mé ža jeha Cristo mero, mexinxin ža čho na ditticaon na. Co tti chojni que jeha judío, jehe na ndačho na ixin žonhi xé tti janha na ndačhan na.

²⁴ Pero para tti chojni que Dios coinchiehe, masqui chojni judío o chojni griego, pero ttinxin na que Cristo chonda joachaxín Dios co jehe ttinxin cainxin tti nchehe Dios.

²⁵ Ixin masqui jí chojni que ndačho ixin tti nchehe Dios žonhi xé, pero jehe mé icha jian que cain tti jian que nchehe chojni ngataha nontte. Co masqui jí chojni que ndačho ixin tti nchehe Dios sojiha joachaxin chonda, pero jehe mé icha soji joachaxin chonda que tti joachaxin que chonda chojni ngataha nontte.

²⁶ Jaha ra chonda que rrožaxaon ra quežén vayaha ra Dios. Jehe vayaha ra masqui tsjeha ra chonxin ra jian tti nohe chojni ngataha nontte, co masqui tsjeha ra chonda ra joachaxin ngain icha chojni ni nindoi ra importanteha na ngain autoridad.

²⁷ Jaha jamé ixin Dios coinchiehe de ngataha nontte tti chojni que icha žonhi chonxin para sinchecosoé na tti chojni que anto chonxin. Co Dios coinchiehe de ngataha nontte tti chojni que chondaha ni rioho joachaxin ngataha nontte para sinchecosoé na tti chojni que chonda anto tsje joachaxin.

²⁸ Dios coinchiehe chojni que žonhi importancia chonda ngataha nontte, tti chojni que icha chojni rinaoha na jehe, rročho ixin Dios coinchiehe tti chojni que icha chojni žaxaon ixin žonhi rentte, para tjago que ngattoxon con Dios žonhi rentte tti chojni que chonda importancia nttihi ngataha nontte.

²⁹ Jamé joinchehe Dios para que žonhi chojni nchao tsonohe ixin jehe icha jian ngattoxon con Dios.

³⁰ Pero Dios mismo jointtauní jaha ra ngain Jesucristo. Co Dios ndačho cai que de ixin Cristo ján na rrochonxin na jian de ixin Dios, co de ixin tti joinchehe Cristo, Dios itoñaoha nganji ján na co joxon jian na para ngain Dios, co ižonhi tsonhe almá na.

³¹ Mexinxin inchin ndačho ngain tti jitaxin Palabré Dios: “Si čhonja ra rinao ra tsonoha ra orgulloso, tonoha ra orgulloso pero de ngain Dios.”

2

Joajné Cristo que goan crucificado

¹ Ttinhi jaha ra, are janha joasondattjo ra tti ndoa de ixin Dios, janha jointtagondaha palabra anto tangui co ni palabra que nchegonda chojni anto importante.

² Are janha joarihi ngayaha ra, janha joinaoha conona de icha cosa, jehó de ixin Jesucristo co de ixin quehe rročho que Jesucristo goan crucificado.

³ Are janha joaso nganji ra janha ža sojiha na co žanga na de joažoon.

⁴ Co are nichjaha ra co ndattjo ra jehe jian joajné Jesucristo, janha joinaoha jointtaguiticaon jaha ra conixin palabra tangui inchin palabré chojni que anto chonxin. Janha jeha jamé jointtaha, pero conixin Espíritu Santo co joachaxín Dios janha jointtaguitticaon jaha ra.

⁵ Mexinxin jaha ra ditticaon ra ngain Jesucristo ixin vicon ra joachaxín Dios co jeha ixin coinhi ra palabré ná chojni que anto chonxin cosa nttihi ngataha nontte.

Dios rroanha Espíritu Santo para rrochonxin ni jehe por ixin Espíritu Santo

⁶ Pero ixinha jamé, are janha ttji ngayehe tti chojni que ditticaon jian ngain Jesucristo, janha na nichja na conixin palabra tangui. Pero palabra jihi jeha de ixin chojni nttihi ngataha nontte, ni de ixin cain tti ttetonha nttihi ngataha nontte ixin tti nohe chojni nttihi ngataha nontte, mé chonda que ndatsjexin.

⁷ Tti tangui que janha na nichja na joixin de ngain Dios, co mé rročho tti žaxaon Dios para que jehe rrochjá na vida que žonhi tiempo tsjexin. Jihi tti žaxaon Dios icha saho que jehe rrojinchchjian nontte. Pero žagoha nganji na hasta ndavenja Jesucristo.

⁸ Ni ná xí que ttetonha ngataha nontte jihi ttinxinha xa jihi, ixin si rroguinttequinxin xa, rrojinchecrucificaha xa Jesús que joixin de ngajni.

⁹ Pero conhe inchin jitaxin ngain Palabré Dios:

Cosa que xonhi chojni vicon ni coinha na,
ni xonhi chojni xaxaon,

pero mé tti xaxaon Dios para cain chojni que jehe na rinao na jehe.

¹⁰ Dios jointtagatsoan na cosa jiji de ixin tti Espiritu Santo que jehe rroanha, co Espiritu mé tti chonxin cain cosa co hasta cain cosa que jima ngain Dios.

¹¹ Ixin zquensen nchao rrochonxin quehe jixaxaon ansén iná chojni? Chonda que jehó espiritue chojni mé tti nohe. Jamé cai Espiritu Santo tti nohe quehe xaxaon Dios.

¹² Tti ján na coangui na jeha tti xaxaon chojni de ngataha nontte jiji; ján na vayé na Espiritu Santo que joixin de ngain Dios para que ján na tsinxin na cain lo que Dios chjá na.

¹³ Janha na nichja na de ixin cosa jiji conixin palabra que joinchecoanna na Espiritu Santo de Dios, co jeha de ixin palabra que janho na coangui na. Jañá ndachjan na cosa de Espiritu Santo ngain chojni que Espiritu mé jí ngain.

¹⁴ Tti chojni que coha Espiritu Santo ngain, jehe čhoaha dayé cosa que ttixin de ngain Espiritu mé ixin para chojni mé xonhi xé cain cosa de Espiritu Santo. čhoaha ttinxin chojni mé cosa de Dios ixin cain cosa mé čhoaha chonxin na si jian o ni nahi ixin coha Espiritu Santo de Dios ngain na.

¹⁵ Pero tti chojni que jí Espiritu Santo de Dios ngain, jehe nchao rrochonxin quehe rročho cain cosa, co xonhi chojni nchao rrondačho de ixin quehe jinchehe jehe tti chojni que jí Espiritu mé ngain.

¹⁶ Tti jítaxin Palabré Dios ndačho: “xonhi chojni ttinxin tti jixaxaon jehe tti chonda cainxin joachaxin. Co xonhi chojni nchao sehe maestro ngain Dios.” Pero ixinha mé, ján na noa na tsje de tti jixaxaon Jesucristo.

3

Chojni que nchehe xé Dios

¹ Are janha joarihi nganji ra, hermanos, janha čhoaha nichja nganji jaha ra inchin janha rronichja ngain tti chojni que tenchehe inchin rinao Espiritu Santo. Sino que janha nichja nganji ra inchin ngain tti chojni que coha Espiritu Santo ngain. Janha nichja nganji ra inchin are nichja ni ngain xannčhinnchinchjan que xa chondaha tsje experiencia, jamé jaha ra cai xa chonxinha ra jian de ixin Cristo.

² Tti janha jointtacoanha ra tanguilha inchin ná xanletsjochjan que xa tai. Dayé xan tsjin en lugar de nio co ndaxa. Co inchin jamé vintte jaha ra cai. Inchin estomagoe ná xanletsjochjan čhoaha dayé nio co ndaxa, jamé jaha ra cai čhoaha coinxin ra tti ttetonha Cristo. Co ni jai xa čhoaha ttinxin ra

³ Ixin jaha ra xajeho inchin cain icha chojni. Ixin jaha ra xa chjoaha ra, xa ningaconhe chó ra, co xa chonda ra división. Mexinxin jaha ra jehó inchin cain icha chojni co tenchehe ra inchin nchehe cain chojni.

⁴ Ixin are ná ra ndačho ra: “Janha chojni Pablo na”, co iná ra ndačho ra: “Janha chojni Apolo na”; are jaha ra ndačho ra jañá, jaha ra tenchehe ra inchin nchehe cain icha chojni.

⁵ zQuensen janha Pablo? co zquensen jehe Apolos? Cayoi janha na xajeho ninchehe xé Dios co de ixin janha na jaha ra vitticaon ra Jesucristo, tti chonda cainxin joachaxin. Cada na janha na jointtaha na tti xa que Dios coetonna na.

⁶ Janha inchin tti ttenga noa ngataon jngui, jamé coín palabré Dios ngain ansean ra; co Apolos inchin tti chjé jino jinda, ixin jointtanimá ra. Pero Dios tti joinchegangui fe ngain ansean ra inchin are jehe nchegangui jino ngataon jngui.

⁷ Mexinxin xonhi rentte ni tti ttenga noa ni tti chjé jino jinda; jehó Dios tti rentte ixin jehe nchegangui cain cosa.

⁸ Mexinxin tti ttenga co tti chjé jinda xajeho nataonxin, pero Dios ttjenguehe na hna cada na inchin xa que jehe na nchehe na.

⁹ Cayoi janha na compañero na de ngain xé Dios co jaha ra inchin jngui que Dios jinchehe xa.

O cai, jaha ra inchin ná nchia jie que Dios jinchechjan.

¹⁰ Janha inchin ximaestro albañil co Dios chjana joachaxin para coín base. Co jé ni tette nchia ngataha base. Pero cada na rrochonda na cuidado quečén tsette na nchia ngataha base

¹¹ Ixin xonhi iná chojni nchao tsín iná base que jehó base que ojí, co jehe base mé jehe mero Jesucristo.

¹² Co cada maestro nchao tsette quexeho clase de nchia ngataha base jiji, nchia de oro, de plata, co xo que anto fino inchin marmol, o nchia de ntatabla, de nttanehe co cachji.

¹³ Co are Jesucristo tsí conixin xohi para rrondaço quehe tsonhe, cottimeja tsonohe cada maestro mé quehe clase de nchia dinchechjian. Ixin cada nchia mé chonda que rroche nchia.

¹⁴ Co si çhonja maestro dinchechjian nchia que rrocheha, maestro mé rroxenguehe hna.

¹⁵ Pero tti maestro que dinchechjian nchia que ndarroche, maestro mé ndasinchetján cainxin, masqui jehe mismo xonhi tsonhe, co jehe inchin ná chojni que sattingaxin de ngain ná xohi.

¹⁶ ¿Apoco noaha ra que ixin jaha ra tti nihngo para ixin Dios co Espíritu Santo jí nganji ra?

¹⁷ Si çhonja chojni sinchexantte ningoe Dios, Dios sinchexantte jehe chojni mé cai ixin ningoe Dios anto jian ningo ngattoxon con jehe, co jaha ra tti jehe nihngo mé.

¹⁸ Masqui anto noha ra pero xaxaonha ra ixin anto ttinxin ra jian. Si ttoha ra tonoha ra que ixin anto noha ra inchin xaxaon chojni nttihi ngataha nontte, chonda ra que rrocjan ra inchin tti chojni que xonhi nohe para que sintte ra tti chojni que ndoa nohe,

¹⁹ Ixin tti nohe chojni ngataha nontte nttihi xonhi xé para ixin Dios. Tti jitaxin Palabré Dios ndaço: “Dios nchenchehe tti chojni que anto nohe para que tti jehe na nchehe na xonhi xé.”

²⁰ Cai ndaço ngain Palabré Dios: “Jehe tti chonda cain joachaxin nohe que xonhi rentte tti xaxaon cain chojni que anto nohe.”

²¹ Mexinxin ni ná jaha ra chondaha ra que tonoha ra orgulloso ixin tangui ra de ngain ná chojni maestro, ixin cainxin maestro co cainxin cosa jian Dios chjá ra para tsjenguijna ra ngain tti ditticaon ra.

²² Pablo, Apolos, Pedro, ngoixin mundo, vida, tti ndadenhe ni, tiempo jaxon, tiempo tsí, cainxin mé para tsjenguijna jaha ra.

²³ Co jaha ra chojni Jesucristo co joixin de ngain Dios.

4

Tti xa que joinchehe cain nirepresentanté Jesucristo

¹ Jañá chonda ra que rroxaxaon ra que janha na jeho ninchehe xé Jesucristo. Janha na tti vitonna na para rronichja na tti jima de ixin Dios.

² Nchao remé, ná tti ditonhe ná cosa chonda que sinchehe cosa mé jian para jamé chojni sicon na que jehe ná chojni de confianza.

³ Pero para ixin janha, antoha tá joachjaon de ixin tti nichja chojni de ixin janha, jaha ra o ngain ná juzgado tti ttetonha chojni nttihi ngataha nontte. Ni janha mismo ndaçhjanha ixin anto jian rrinttaha.

⁴ Masqui janha xaxanho que xonhi jianha rrinttaha, pero mé xa rroçhohe ixin janha anto jian na. Jesucristo, tti chonda cain joachaxin, mé tti rrondaço ixin quexén na janha.

⁵ Mexinxin jaha ra ndaçohe ra icha saho ixin quehe tenchehe icha chojni; jaha ra chonhe ra hasta are tsí Jesucristo, tti chonda cain joachaxin, co jehe sinchenonxin cain tti jima ngain tti naxin xehe. Co jehe sinchenonxin cain tti teçaxaon ansén cada chojni. Cottimeja Dios rrochjé cada chojni inchin tequininxin na.

⁶ Janha rrindattjo ra cain cosa jihi para tsjenguijna jaha ra. Janha co Apolos ná ejemplo para ixin jaha ra para que icha jian tsinxin ra. Janha ndaçhjan jañá para que de ixin ejemplona na jaha ra tsangui ra sitticaon ra jeho tti ttetonha Dios, co para que ni ná ra tsonoaha ra orgulloso de ngain ná chojni co sincheha ra caso iná chojni.

⁷ ¿Quedonda xaxaon ra que jaho ra tti icha jian ra? ¿Quehe cosa chonda ra que jeha Dios chjá ra? Jehe Dios chjá ra cain cosa que jaha ra chonda ra, mexinxin ¿quedonda tonoha ra orgulloso ixin cain cosa que jaha ra chonda ra jeho conixin joachaxin ra chondaxin ra?

⁸ Jaha ra tonoha ra que anto tsje cosa que joixin ngain Dios chonda ra, co chonda ra cain tti jaha ra rinao ra. Tonoha ra inchin rey, co janha na ndacointtona ni ra iná lado. ¡Icha jian si ndoa jaha ra rroguintte ra rey para que janha na rroquetonha na cai ngain tti jaha ra ttetonha ra!

⁹ Janha tonona que janha na xo representanté Jesucristo na Dios cointtona na hasta tti último lugar. Janha na inchin tti chojni que tequininxin ndadenhe, janha na inchin ná joaxoan que chojni ngoixin mundo dicon na na. Dicon na cain ángel cai.

¹⁰ Cain chojni ndaço na que ixin janha na chojni que xonhi chonxin ixin ditticanho na Jesucristo, co jaha ra tonoha ra que ixin anto ttinxin ra cain cosa de Jesucristo. Janha na xonhi importancia chonda na para ngain chojni co jaha ra tonoha ra anto importante ra. Cain chojni ncheha na na caso janha na, co jehe na chonda na respeto nganji ra.

¹¹ Hasta jai janha na denhe na jintta co jinda co xonhi xé lonnto que chonda na, co tsje chojni feo nchehe na nganji na co chondaha na nchia tti sintte na,

¹² Co tončhjen na ixin anto nttaha na x̄a conixin rana na. Nichja chojni feo nganji janha na, pero janha na nttatsán na ñao Dios que jehe sinchenchaon jehe na. Chojni feo nchehe na nganji na pero janha na ttixinna na.

¹³ Nichja na cosa ndoaha de ixin janha na, pero janha na chjaha na na consejo conixin paciencia. Nchehe na nganji na inchin nchehe na ngain caxineno ngataha nontte; hasta jai tonna na ngain na inchin tti iḡonhi x̄é de ngain chojni.

¹⁴ Janha rricjianha ra cain cosa jiji para tsooaha ra, jeha para rrichjaha ra ná consejo ixin jaha ra inchin xanhna que anto rinaho ra.

¹⁵ Co masqui jaha ra rrochonda ra hasta dies mil maestro que sinttacoanha ra de ixin Jesucristo, pero cain mé x̄a sintteha inchin ndodá ra. Janha tti ndodá ra de ngain confianzé Jesucristo ixin janha tti joasondattjo ra de ixin tti jian joajna, co mexinxin Jesucristo chjá ra iná vida naraixin are vitticaon ra joajna mé.

¹⁶ Mexinxin janha nttatsanha ñao ra que rroehe ra ejemplona.

¹⁷ Janha rrorroanha Timoteo nganji ra co jehe inchin xanhna que anto rinaho ixin jehe ditticaon jian ngain Jesucristo. Jeha Timoteo tti sinttaxaon ra quex̄én janha nttaha ixin ditticanho Jesucristo co quex̄én janha nttacoán cainxin chojni que ditticaon Jesucristo ngain cainxin rajna.

¹⁸ Canxion jaha ra atto tonoha ra orgulloso ixin x̄axaon ra que janha x̄aon na para sasotsjaha ra iná.

¹⁹ Pero janha rinaho que toin saso para sasotsjaha ra, si Jesucristo rinao. Cottimeja janha sicon si jaha ra x̄o tonoha ra anto orgulloso, ndoa chonda ra joachaxín Dios o ni nahi.

²⁰ Ixin are Dios ottetonha ngain ansén ná chojni, mé nichjacoaha ixin palabré cai chonda joachaxín Dios.

²¹ ¿Quehe rinao jaha ra remé are janha saso? ¿Asaso para sinttastigá ra o ni saso para rronichjaha ra čhojin?

5

Pablo ndačho ixin quehe tsonhe chojni que nchehe jianha

¹ Tenohe tsje chojni ixin ná de jaha ra techonda ra jeha jannajonha ra de čhiha ra. Co jehe yá ná cosa anto jianha que ni tti chojni que ditticaonha Dios x̄a ncheha na jañá.

² ¿Co jaha ra x̄a tonoha ra ixin anto jian ra en lugar de rroguinttechinhi ra co rrocosoaha ra! Tti chojni que jinchehe cosa jianha yá jaha ra chonda ra que dantsjeyexin ra de nganji ra.

³ Masqui janha mero rriha nganji ra, pero janha oḡaxanho de ixin quehe tsonhe tti xí que jinchehe jianha yá inchin janha mero rrojarihi nganji ra.

⁴ x̄atte cainxin ra de ixin nombré Jesucristo, tti chonda cainxin joachaxin para ixin ján na, co joarrixaonna sehe nganji ra, co joachaxín Jesucristo sehe nganji ra.

⁵ Cottimeja tti xí que jinchehe cosa jianha yá ncheha ra consiente ngain ningoa ra; tančhjanda ra Satanás para sinchehe inchin jehe rinao ngain cuerpoe xí mé. Co puede jamé jehe xa sačhjenda xa de cosa jianha que nchehe xa para que x̄onhi tsonhe espiritue xa are tsí Jesucristo, tti chonda cainxin joachaxin.

⁶ Jaha ra chondaha ra que tonoha ra orgulloso. ¿Anoaha ra que si ná chojni jinchehe cosa jianha ngayaha ra, sicon icha chojni co jehe rroḡaxaon sinchehe jamé cai?

⁷ Denguixin ra de nganji ra tti chojni que jinchehe jianha yá para que cainxin ra sintte ra joxon chojni que x̄onhi jianha chonda. Jesucristo ondavenhe para ixin ján na inchin cain coleco que ndavaguenhe ngain quí pascua para que Dios vanchetjañehe na tti jianha que vanchehe na.

⁸ Mexinxin ján na rrochá na ngain jehe co sontte na jian ngain vidá na inchin rinao Jesucristo co tinttohe na nondaha tti vida jianha que nchaoha jí que ján na jointtoho na. Co jai nttoseyehe na Jesucristo conixin vidá na jian que x̄onhi jianha tenttoho na inchin tti niottja que chondaha levadura para tosayexin Dios.

⁹ Ngain saho cartana que rroanha ra jointtatsanha ñao ra que tatoha ra tti chojni que ncheḡoxinhi dinttejoacaho icha nčhí que jeha nčhičhihi.

¹⁰ Pero janha ndačhjanha que ixin ndasačhjendehe ra cain chojni de ngain mundo, rročo tti chojni que ditticaonha Jesucristo. Ndoa, que chojni que ditticaonha Jesús ncheḡoxinhi na dinttejoacaho na icha nčhí que jeha nčhičhihi na, co jehe na anto rinao na rrochonda na icha co icha cosa, co jehe na chehe na, co jehe na nchesayehe na ídolo. Co para que jaha ra te ra ngataha nontte jiji, jaha ra chonda ra que sintte ra ngayé cain chojni yá.

¹¹ Pero janha ndačhjan que jaha ra chonda ra que sačhendehe ra cain chojni que ndačho ixin ditticaon na Jesucristo co x̄a nchehe na cosa jianha. Inchin puede ncheḡoxinhi na

dinttejoacaho na icha n'chí que jeha n'chíchihi na, o rinao na rrochonda na icha co icha cosa, o nchesayehe na ídolo, o ncheʒoxinhi na nichja na feo de iná chojni, o ncheʒoxinhi na coan na, o ttehe na cosé iná chojni. Tti chojni de jaha ra que nchehe jañá ni para sinttecoho ra chondaha ra que tsonchienne ra ngain.

¹²Janha ʒonhi joachaxin chonda para rrondačhjan de ixin quehe tenchehe tti chojni que ditticaonha Cristo. Pero jaha ra chonda ra que rrondačo ra de ixin tti jianha que tenchehe tti chojni que ditticaon Jesucristo inchin jaha ra.

¹³Co tti chojni que ditticaonha Cristo, Dios tti rrondačo de ixin quehe tenchehe na, ʒajian o ni nahi? Pero jaha ra chonda ra que rrondačo ra de ixin quehe tenchehe tti chojni que ditticaon Jesucristo. Mexinxin jaha ra dantsjeyehe ra de ngayaha ra tti xí que jinchehe cosa jianha yá.

6

Are chojni coeto na ngain xijuez que vaguitticaonha Jesucristo

¹Are čhonja ra rrochonda ra ná cosa que tsjangui ra de ixin iná chojni que ditticaon Jesucristo, nchaoha jí si jaha ra sicjangui ra ngain xijuez que ditticaonha Jesucristo en lugar de rroguicjangui ra ngain ʒajeho chojni que ditticaon Jesucristo para que jeha chojni mé rrondačo quexeha ra ʒo chonda ra razón.

²ʒApoco noaha ra que ngain tiempo que tsí chojni que ditticaon Jesús sinchejuzguehe na chojni que ditticaonha Jesucristo? Mexinxin jai, ʒquedonda jeha jaho ra nchechjian ra cain asunto icha tanguiha que jaha ra chonda ra?

³ʒApoco noaha ra que ján na nchao sonttojuzuguehe na hasta ángel? ¡Co mé chojni que ditticaon Jesucristo ngain tiempo jili čhoha xijonttonhe na ná jie!

⁴Co are jaha ra chonda ra problema de ngain tiempo jili, ʒquedonda dicjangui ra ngain xijuez que ditticaonha Jesucristo?

⁵Janha ndačhjan yá para que rrochonda ra joasoaxin. ʒApoco coha ngayaha ra ni ná chojni que nohe jian para que jeha chojni mé tti rrojinttajuzgaha ra cain jaha ra ʒo ditticaon ra Jesucristo?

⁶ʒApoco jiquininxin que ná chojni que ditticaon Cristo sičo jie de ixin iná chojni Jesucristo ngain xijuez que ditticaonha Jesucristo?

⁷Mexinxin atto nchaoha jí tteto ra jaho ra. Icha jian si ttixinha ra are nicompañeroa ra feo sinchehe na nganji ra. Co icha jian si jaha ra toñaoha ra are tsaha ra na cosá ra.

⁸Pero jaha ra en lugar de rrojinchehe ra jamé, jaha ra nchehe ra feo cai inchin jeha na, co cai hasta ttehe ra cosé ʒajeho chojni que ditticaon Jesús.

⁹⁻¹⁰ʒApoco noaha jaha ra que tti chojni que ncheha jian seha ngain parte tti ttetonha Dios? Dittoaxinha ra sinttayaha ra na ixin ngain parte tti ttetonha Dios čhoha sintte tti chojni que puro ncheʒoxinhi tsontaonxin n'chí co doanha n'cha n'chíchihi, ni chojni que nchesayehe ídolo, ni chojni que ncheʒoxinhi dinttejoacaho icha n'chí que jeha n'chíchihi, ni xí que chonda ʒajeho iná xí inchin rrocji n'chíchihi, ni tti chehe que tté cosé iná chojni, ni chojni que anto rinao rrochonda icha co icha cosa de ngataha nontte, ni chojni que puro coan, ni chojni que nichja cosa ndoaha ngain iná chojni, ni tti chojni que nichja ná cosa seguro co jeha ncheha. Tonoha ra jian que cainxin chojni yá čhoha sintte ngain parte tti ttetonha Dios.

¹¹Canxion jaha ra jañá vanchehe ra cai, pero Jesucristo, tti chonda cainxin joachaxin, co Espíritu Santo que Dios roanha ojointtaroa ra de cain cosa jianha que joinchehe ra, co jointtajoxon ra chojni jian, co mexinxin Dios vayé jaha ra co ndačo que jaha ra joxon chojni jian que ʒonhi jianha chonda ra.

Tti jiquininxinha sinchehe ni ngain cuerpoe ni

¹²Jeha ni ndačo ni que nchao sinchehe ni cain tti sinao ni. Co ján ndoa, pero jeha cainxin mé jian para ixin jeha ni. Si ná ni sinchehe ni lo que sinao ni, pero sicao ni cuidado que ni ná cosa mé tsetoanha ngain cuerpoe ni.

¹³Ján, ndoa que cain tti jine ni sattji para ngain tsejnoe ni co tsejnoe ni para tti jine ni, pero cayoi cosa mé ndatsjexin are ndasenne ni. Pero jeha ndoa que cuerpoe ni para ngain iná n'chí que jeha n'chíchihi ni; cuerpoe ni jeha para ixin Jesucristo, tti chonda cain joachaxin, co Jesucristo jí para ixin cuerpoe ni.

¹⁴Co jañá inchin Dios joinchehexon Jesucristo, jamé sinttaxechon na ján na cai conixin joachaxín jeha.

¹⁵ʒApoco ttinxinha jaha ra que cada cuerpo que jaha ra chonda ra, mé ná parte de cuerpoe Jesucristo? ʒApoco nchao tsá na ná de tti parte de jeha cuerpoe Jesucristo para sanjo na ngain cuerpoe ná n'chí que dachaxin tomi cuerpoe? ¡čhoha sonttoho na jamé!

¹⁶ ¿Apoco noaha jaha ra que are ná xí deajoacaho xa ná nchí que dachaxin cuerpoe tomi, cayoi na tonchjian na inchin nacoa cuerpo? Ngain tti jitaxin Palabré Dios ndačo: “Cayoixin chojni sintte na inchin nacoa chojni.”

¹⁷ Pero are ná chojni ditticaon ngain Jesucristo, chojni mé co Jesucristo dintte na inchin nacoa chojni ixin chonda jehe na xajeho Espíritu Santo.

¹⁸ Mexinxin janha rrindattjo ra que dinttečhincoha ra nchí que jeha nchíchiha ra. xonhi iná cosa icha janha para ixin cuerpoe ni, jeha cosa mé ixin are ná chojni nchehe cosa janha yá, jeha nchehe janha ngain cuerpoe.

¹⁹ Jaha ra noha ra que cuerpoe ra mé ningoe tti Espíritu Santo que Dios chjá ra, co Espíritu Santo jí ngaxinhi cuerpoe ra. Jeha jaha ra tti ttonha ra ngain cuerpoe ra,

²⁰ ixin Dios anto rentte cjoenga hna para ixin cuerpoe ra. Mexinxin chonda ra que nchesayehe ra Dios de ngain cuerpoe ra co de ngain espiritua ra ixin cayoi cosa mé cosé Dios.

7

Consejo para chojni que tecaó chó

¹ Jai rrondattjo ra tti jaha ra joanchianguina ra ngain cartá ra. Ján ndoa, jian para que xí secaoha xa nchí.

² Pero ixin anto tsje chojni puro rinao tsontaonxin chó, mexinxin icha jian si cada xí rrochonda xa nchíchihi xa co cada nchí rrochonda ncha xixihi ncha.

³ Co xixihi nchí chonda xa que sinchehe xa inchin jiquininxin ngain nchíchihi xa, co cai nchí chonda ncha que sinchehe ncha inchin jiquininxin ngain xixihi ncha.

⁴ Cuerpoe nchíchihi ná xí jeha jehe ncha tti cuerpoe ncha ixin cuerpo mé jiquininxin xixihi ncha. Co xajeho ngain xixihi nchí cai, nchíchihi xa tti jiquininxin cuerpoe xa.

⁵ Xo nchí ra, are xixiha ra sinao xa cuerpoe ra ndačoha ra que nahi, co cai jaha ra xo xí ra, are nchíchihi ra sinao ncha cuerpoe ra, cai ndačoha ra que nahi. Jeha si jaha ra sinao ra rrochjeha chó ra cuerpoe ra ixin sinchecoanxinhi ra Dios. Cottimeja nchao rrochjehe chó ra cuerpoe ra ixin puede tsixianha ra sé tiempo, co puede Satanás rrondattjo ra co sinchehe ra cosa janha.

⁶ Janha rrindattjo ra cain jiji, co rročo que janha rridanjo joachaxin que nchao sinttecho chó ra si jaha ra sinao ra, co cai nchao si jaha ra sinaoha ra sinttecho chó ra.

⁷ Janha rrojinaho que cain jaha ra xonhi nchí rroquinttecho ra inchin janha, pero cada na Dios chjá na joachaxin de quexén sontte na; toha na sonttecho na nchí co te na nahi.

⁸ Cain chojni que xa tecaoha chó co cain nchiganha que xonhi xí tecaó, janha ndačhan que icha jian para ixin jehe na si ixonhi nchí o xí sinttecao na; janhi inchin janha.

⁹ Pero si jehe na tsixinha na, nchao tsjé na nchíchihi na o xixihi na ixin icha jian rrochonda na nchíchihi na o xixihi na que puro rroaxaon na de ixin nchí o de ixin xí.

¹⁰ Pero cain ra xo otecho ra nchíchihi ra o xixiha ra, janha rritetonha ra que nchí tsinttoeha ncha xixihi ncha. Tti janha rritetonha jiji joixinha de ngain joarriaonna, sino que joixin de ngain Jesucristo, tti chonda cain joachaxin.

¹¹ Pero si ná nchí sachjendehe ncha xixihi ncha, jehe ncha čhoha secoa ncha iná xí, pero xa nchao rrocjantehe ncha xajeho xixihi ncha. Co xajeho ngain xixihi ná nchí cai, jehe xa čhoha sachjendehe xa nchíchihi xa.

¹² Icanxin chojni ndattjan na inchin janha nona, ixin xonhi coetonha Cristo de ixin jiji. Si ná xí que ditticaon Jesucristo co čihi xí mé ditticaonha ncha, pero si jehe ncha jí ncha conforme para tasecao xí mé ngoixin vidé ncha, jehe xí mé chondaha xa que tsinttohe xa nchíchihi xa.

¹³ Si ná nchí ditticaon Jesucristo co xixihi ncha nahi, pero si jehe xa jí xa conforme para tasecao xa nchí mé ngoixin vidé xa, cai jehe nchí mé chondaha ncha que sachjendehe ncha xixihi ncha mé.

¹⁴ Ixin tti xixihi ná nchí que ditticaonha xa Jesucristo co jehe ncha ditticaon ncha, Dios ojoinchenchaon xí mé ixin jehe xa jicao xa nchí que ditticaon Jesucristo. Co nchíchihi ná xí que ditticaonha ncha Jesucristo co jehe xa ditticaon xa, cai nchí mé Dios ojoinchenchaon ncha ixin jehe ncha jicao ncha xí que ditticaon Jesucristo. Si jeha jamé, xanha ra sintte xan inchin xenhe chojni que ditticaonha Jesucristo, pero ixin masqui jeha ná ra ndoa ditticaon ra Jesucristo, mexinxin cai xanha ra Dios ojoinchenchaon na.

¹⁵ Pero si xixihi ná nchí o nchíchihi ná xí que ditticaonha Jesucristo sinao sachjendehe xixihi o nchíchihi, tančhanda ra na sinchehe na. Cottimeja tti xí o tti nchí que ditticaon Jesucristo chonda libertad, ixin Dios rinao que tti chojni que ditticaon Jesucristo sintte na čhjoin ngain vidé na.

¹⁶ Co si jaha ná n'chí, ¿que'én noanxin ixin anchao tsjenguijna xixiha para sitticaon xa Jesucristo? O si jaha ná xí, ¿que'én noanxin ixin anchao tsjenguijna n'chíchiha para sitticaon n'cha Jesucristo?

¹⁷ Mexinxin cada chojni chonda que sintte na ngain vidé na de acuerdo conixin tti joachaxin que joanjo Jesucristo co inchin jehe na vintte na are Dios vayé na. Jañá tteonha janha ngain cain chojni que ditticaon Jesucristo.

¹⁸ Si Dios vayé chojni que chonda xohe que dinhi circuncisión ngain cuerpoe, chojni mé chonda que jamé sittohe conixin xohe mé. Co si Dios vayé chojni que chondaha xohe que dinhi circuncisión ngain cuerpoe, chojni mé chondaha que rrochonda xohe.

¹⁹ Ixin jeha importante para que cain chojni rrochonda xohe mé; tti importante que cain na sitticaon na cain tti tteonha Dios.

²⁰ Cada chojni chonda que sintte na inchin vintte na are Dios vayé na.

²¹ Si jaha joarihi ná ninchehe xa que dicochji ngain xinajni are Dios vayaha, jaha taha joachjaon de ixin mé. Masqui jamé, si jaha chonda oportunidad de sarihi libre, nchao, ixin icha jian sarihi libre.

²² Tti chojni que vehe ninchehe xa que dicochji ngain xinajni are Dios vayé na para que jehe na vitticaon na ngain Jesucristo, jai jehe na te na libre para ngain xé Jesús. Co cai, tti nivintte libre are Dios vayé na, jai jehe na te na inchin tti nchehe xa que tochji pero de ngain Jesús.

²³ Dios anto rentte coenaxin jaha ra, mexinxin dittoaxinha ra para que iná chojni tsetonha ra.

²⁴ Jañá, cada ra dintte ra ngattoxon con Dios inchin jaha ra vintte ra are Dios vayaha ra.

²⁵ Co cain chojni que xa tecaoha n'chí o xí, janha xa xonhi tsetoan na ixin Jesucristo xonhi coetonha de ixin jehe na, pero janha rrondattjan na tti janha xaxanho ixin tti janha xaxanho jehe jian ixin Dios chjana tti janha xaxanho.

²⁶ Cain chojni que ditticaon Jesucristo tiempo jai atto tsje peligro tetonchienhe ngain na, co tiempo inchin jihí, para ixin janha, puede icha jian para cain chojni que xa dinttecaoha n'chí o xí, isinttecaoha chó na.

²⁷ Pero tti chojni que otecao çhihi o xixihi irroxaxaonha na para tsinttohe chó na. Pero tti chojni que xa dinttecaoha chó, icha jian irroxaxaonha na para sinttecao chó na.

²⁸ Pero si sinttecao chó na cai nchao jí ixin mé jeha cosa jianha. Cai si ná xann'chí secas xan xixihi xan, cai mé jeha jianha sinchehe xan. Pero tti chojni que sinttecao chó rrochonda na problema ngain vida jihí, co janha rinaho que rrochondaha na problema mé.

²⁹ Janha rinaho rrondattjo ra ixin atto tsjeha tiempo dittoá na jai pa ndaha. Mexinxin cain chojni que tecaos çhihi o xixihi chonda que sinchehe na xé Jesucristo como si rrochondaha na çhihi na o xixihi na.

³⁰ Co tti chojni que anto techín, chonda que sintte na como si xonhi joachjaon rrogu-inttechonda na. Co tti chojni que techonda quiai, chonda que sinchehe na como si xonhi quiai rroguinttechonda na. Co tti chojni que coehna na cosa, chonda que sintte na como si rrochondaha na cosa mé.

³¹ Co tti chojni que anto nchegonda na tti cosa que jí ngataha nontte, chonda que sintte na como si rrojinchegondaha na cosa mé, ixin mundo jihí que ján na docon na ondajittjexin.

³² Janha rinaho que jaha ra rrochondaha ra joachjaon. Are ná xí que xonhi n'chí jicao, jehe xa icha xaxaon xa de ixin Dios co nchehe xa xé Dios ixin rinao xa que Dios ncheçoxinhí tti jehe xa nchehe xa.

³³ Pero are ojicao xa n'chí, jehe xa icha xaxaon xa cain cosa de ngataha nontte jihí, co para que çhihi xa ncheçoxinhí n'cha tti jehe xa nchehe xa.

³⁴ Cai jí diferencia de ngain n'chí que tecaos xí conixin n'chí que tecaoha xí. N'chí que tecaoha xí icha xaxaon n'cha cosa de Dios para que te n'cha jian ngain Dios de ngain cuerpoe n'cha co de ngain espiritue n'cha. Pero tti n'chí que tecaos xí icha xaxaon n'cha cosa de ngataha nontte jihí co para que xixihi n'cha sincheçoxinhí xa tti jehe n'cha tenchehe n'cha.

³⁵ Janha rrindattjo ra cain jihí pero jeha para tsjenguijnaxin ra, jeha para que jaha ra isinttecoha chó ra ndoa. Janha rinaho que sinchehe ra cain cosa inchin jiquininxin co rinaho que cain tiempo sinchehe ra jian xé Jesucristo, tti chonda cain joachaxin.

³⁶ Pero si ná chojni xaxaon que icha jian para que xenhe secas xan xí, ixin ojiddattohe xan de xann'chí, co si para ixin jehe chojni mé jihí tti icha jian, nchao sinchehe remé. Nchao secas xenhe chojni mé xí. Mé jeha cosa jianha para ixin Dios.

³⁷ Pero si ná chojni xaxaon que xenhe secas xan xí co si ndoa jehe jamé rinao sehe xenhe, cai chojni mé nchao nchehe.

³⁸ Jañá, tti rinao que secas xenhe xí nchao nchehe, co tti rinao que secas xenhe xí icha nchao nchehe.

³⁹ Ley de Dios ndacho que tti nchí que tecao xixihi, jehe ncha chonda que sitticaon ncha tti rrondacho xixihi ncha hasta ndasenne xa. Pero si xixihi nchí mé ndasenne xa, jehe ncha sittohe ncha libre para secoa ncha quexeho xí que jehe ncha sinao ncha, pero ná xí que ditticaon Jesucristo.

⁴⁰ Pero janha ndachjan que jehe ncha icha feliz sehe ncha si ixonhi xí secoa ncha, jihi tti raxanho janha, co toenaho que tti janha rrindattjo ra jihi joixin de ngain Espíritu Santo que Dios rroanha.

8

Tti danjo chojni ngain ídolo

¹ Janché rrondattjo ra quehe rrocho tti danjo chojni ngain ídolo. Ján, ndoa que cain na xaxaon na que chonxin na co noa na jian de ixin cosa jihi, pero tti ján na noa na, mé xonhi xé ixin anto tonoa na orgulloso. Pero si sonao chó na, mé tti sinttasoji na ngain tti dotticaon na de ixin Jesucristo.

² Si chonja chojni tonoho que jehe anto nohe pero jehe xa xonhi nohe ixin xa ditján tti jiquininxin tsonohe.

³ Pero tti chojni que rinao Dios, Dios jí ngain chojni mé.

⁴ Mexinxin, ¿quehe chonda na que sonttoho na? ¿Asontte na tti nntao que ttinhi na ídolo? Ján, ndoa noa na jian que ná ídolo na xoinxon joachaxin chonda ngain cain chojni, ixin jí jecho nacoaxinxon Dios.

⁵ Canxion chojni ndacho que ixin jí tsje dio que chonda joachaxin ngajni co nntihi ngataha nontte, co jehe na nchequinhí na, señor.

⁶ Pero ján na noa na que jí nacoaxinxon Dios, tti Ndodá na. Ndo mé Ndo joinchexhjan cainxin cosa, co ján na te na para ixin jehe Ndo. Cai jí nacoaxinxon tti dinhi Señor, co jehe mé Jesucristo. De ixin jehe jixin cainxin cosa, hasta ján na texin na cai.

⁷ Pero cainxinha chojni nohe jihi. Canxion niditticaon Jesucristo jai vintte na acostumbado de vanchesayehe na ídolo. Co jai xa ttinxinha na jian de ixin Jesucristo. Mexinxin are jine na tti nntao que dehe na ngain ídolo, tonoho na feo ixin xa xagoen na ídolo mé.

⁸ Seguro que Dios ndosenha si ján na sontte na nntao mé o ni nahi. Jaha icha jianha na si sontte na nntao mé, ni jaha icha jian na si sontteha na nntao mé.

⁹ Pero ttijho ra cuidado de ixin tti joachaxin que jaha ra cóa ra de ixin sintte ra cain cosa, ixin puede de ixin tti sinchehe ra jaha ra icha chojni sinchehe na jianha ixin xa ttinxinha na jian de ixin Jesucristo.

¹⁰ Ntthi jí ná ejemplo: si ná de jaha ra xo ojian ttinxin ra de ixin Jesucristo, co noha ra de ixin cain cosa jihi sintte ra sintte ra ngain lugar tti icha chojni nchesayexin ídolo co sicon ra iná chojni que xa ttinxinha jian de ixin Jesucristo, chojni mé nchao rroxaxaon sine cai tti cain cosa que saquehe na ngain ídolo.

¹¹ Jañá jaha ra ixin ottinxin ra jian sinchetján ra iná chojni tti xa ttinxinha jian, co Jesucristo venhe cai para ixin chojni mé.

¹² Mexinxin are jaha ra sinchetján ra tti chojni que xa ttinxinha jian de ixin Jesucristo, jaha ra cai rrocho que sinchehe ra jianha ngain mero Jesucristo.

¹³ Mexinxin, si janha sinttatján tti chojni que xa ttinxinha jian de ixin Jesucristo are jehe chojni mé sicon na janha sine tti nntao que daquehe na ídolo, icha jian xonhi tiempo janha sine nntao mé para sinttatjanha chojni mé ngain cosa jianha.

9

Derecho que chonda ná representanté Jesucristo

¹ Ján, ndoa que janha chonda joachaxin co cain derecho ná representanté Jesucristo. Janha vicon Jesucristo, tti chonda joachaxin para ixin ján na, co jaha ra tti xa que janha jointtaha para ixin jehe.

² Puede ícanxin chojni xa chonxinha na na janha ixin janha ná representante na. Pero jaha ra chonda ra que chonxin ni ra janha ixin janha tti ndattjo ra para que jaha ra vitticaon ra ngain Jesucristo, co yá ná prueba que ndoa janha ná representante na de Jesucristo.

³ Co jihi tti rrondačjan ngain cain chojni que nche xoxinha tti janha rrinttaha:

⁴ janha chonda derecho de sayá cain tti rrochjana na para sine co cain tti rrochjana na para sihi,

⁵ co cai para rrochonda ná thihna que ditticaon ncha Jesucristo sacjinha ncha ngain viajena tti chji, jañá inchin nchehe tti ícanxin representanté Jesucristo inchin Pedro co xanchó Jesús.

⁶ ¿O apoco xaxaon ra que janho co Bernabé tti tequininxin na sinttaha na yó xa ngain nacoa tiempo? xa para sachaxin na tomi que sondana na, co xa de rronddatjo ra tti jian joajna.

⁷ Xaxaon ra jian que xonhi xisoldado jí que jehe xa ttjenga xa hna cain gastoe xa. Co xonhi chojni que ttjenga nntauva que jehe jineha ttochjoín nnta. Co xonhi chojni que ttingaria coleco que jehe diha tsjinhi va.

⁸ Co xaxaonra ra ixin jehó xí ngataha nontte xaxaon jiji, ixin cai Dios coetonhe Moisés para coentaxin de ixin jiji ngain libro tti jitaxin ley de Dios.

⁹ Co ngain libro mé jitaxin: “Ttengueha ra coxinttaha nchisen are tondai va trigo.” Dios ndačhoja jiji de ixin jehó coxinttá,

¹⁰ jehé ndačho jańá para ná ejemplo para ixin ján na. Ley jiji jian para ixin ján na ixin tti nchehe xa ngataon jngui co tti tondai trigo chonda na derecho de sayé na parte de cosecha.

¹¹ Mexinxin, si janha na coenga na ngayaha ra palabré Dios, ¿apoco tonoha ra atto tsje si jaha ra rrochjana ra nchion tomi para sinenxin na?

¹² Si icanxin chojni chonda na derecho jiji de chjehe ra na tomi, mé icha janha na.

Pero janha na nntagondaha na derecho que janha na chonda na. Janha na nntaha na icanxin xa para dachaxin na tomi que dondana na co para que jaha ra, xo rinao ra sitticaon ra tti jian joajné Jesucristo, tsonoaha ra molestia de ixin janha na.

¹³ Jaha ra noha ra que tti nchehe xa de ngain ningoe chojni judío de ngain nihngo sachaxin na tti sine na. Rročho que tti chojni que nchehe xa ngain alté Dios, tti ttín na nntaohé coxigo para ixin Dios, chojni mé jine tti nntao que dehe nntiha.

¹⁴ Xajehó cai, Jesucristo ndačho que tti chojni que nichja tti jian joajna, chojni mé de ngain xa mé sachaxin na tti sine na.

¹⁵ Pero janha xonhi tiempo jointtagonda ni ná derecho jiji, ni cai jeha rricjinha ra jiji para que jaha ra rrochjana ra nchin tomi. ¡Para ixin janha icha jian si saho ndasenxin na jinta que ná chojni santsjena tti čhjoin que tsonohe ansenna de ixin jiji!

¹⁶ Janha nichja tti jian joajna ngain chojni pero rinaoha que chojni sinchesayana ixin Dios coetonna que rronichja joajna mé. Co anto tangui tsonna si janha rrondačjanha joajna jiji.

¹⁷ Si janho rroguinchiá xa jiji, Dios rrocjengana hna. Pero jeha jamé ixin xa jiji ná responsabilidad que Dios chjana, co čhoja rronddattjan que nahí.

¹⁸ Mexinxin tti anto čhjoin tonona are ndattjan chojni tti jian joajna, jiji tti xenga na hna co xonhi chojni ndattjan ixin tsjengana hna tomi. Rročho janha nntagondaha derechona para rrogacha tomi de ngain xana ixin janha nichja tti joajna mé.

¹⁹ Masqui janha jeha ninchehe xé de ni ná chojni, janha goan na ninchehe xa de cainxin chojni para dacha icha chojni para ixin Jesucristo.

²⁰ Are janha rrihi ngayé chojni judío janha cjan na inchin chojni judío para dacha jehe na para ixin Jesucristo. Rročho para tti anto ditticaon ley que vayé Moisés, janha cai ditticanho ley mé para que janha dacha jehe na, masqui janha chondaha que nntaha inchin ttetonha ley mé.

²¹ Co para que janha dacha para ixin Jesús tti chojni que ncheha inchin ttetonha ley que vayé Moisés, janha cjan na inchin jehe na cai. Masqui ján, janha nntaha inchin ttetonha ley de Dios ixin janha ján orrinttaha inchin ttetonha ley de Jesucristo.

²² Co are janha rrihi ngain chojni que xa ttinxinha jian de ixin Jesucristo, janha nntaha inchin costumbré jehe na para que janha chonda oportunidad de ndattjan na icha de ixin Jesucristo, jamé nntaha para que jehe na icha ttinxin na. Rročho janha darihi inchin cada naná jehe na para que jamé nchao Jesucristo tsjenguijna canxion na para xonhi castigo rrochonda na de cain cosa jianha que nchehe na.

²³ Ján, nntaha cain jiji para que nntanoa chojni tti jian joajna co para que janha cai rrochonda tti jian que Dios danjo.

²⁴ Jaha ra onoha ra que ngain ná juego de carrera cain ni ttinga ni pero jehó nacoaxinxon tti dacha. Jamé ttinga jaha ra cai para que jamé sachá ra.

²⁵ Cain tti chojni que doan preparado cuerpoe para rrotsontaon ngain ná juego, chojni mé jineha cosa que sinchehe daño co ncheha cosa que sinchehe daño ngain cuerpoe. Co cain chojni mé nchehe na jamé jehó para dacha na ná premio jehó ná corona de qué nntalaurel que tončhenja sé. Pero ján na ntotoh na lucha para que sachá na ná premio que tsončhenje para cainxin tiempo.

²⁶ Para ixin janha jeha jamaoncoa ttinga; janha jeha ttinga para sinttatján. Co cai janha inchin ná xiboxeador que tjacoaha tton ngataonhe čhintto.

²⁷ Janha nntaguetan cuerpona tangui co nntaha para que cuerpona sitticaon na janha para que janha sinttatjanha tti janha ditticanho que janha jointtacoán icha chojni.

10

Pablo rinaoha que chojni sinchesayehe na ídolo

¹ Janha rinaho que jaha ra tsonoha ra tti conhe nindogelitoa na xançhjen ngatja nttiha are anto osé. Para que jehe na sacjoi na, Dios rroanha ná ttjoi para vitaoonhe na nttiha. Co Dios conxiré ndachaon para vehe ná nttiha tti jehe na vattoxin na ndachaon que dinhi Mar Rojo.

² Ttjoi jiji co tti conhe ndachaon, jiji ná señal que Dios coinchiehe Moisés para savicao jehe na co rroçho que por ixin milagro jiji que Dios chjé Moisés, jehe na joiguite na ngain.

³ Co cai cain jehe na joine na tti joanjo Dios

⁴ Co cain jehe na vihi na tti jinda que vaçhjodoxin xo co jinda mé Dios joanjo cai. Co tti xo mé inchin Cristo.

⁵ Co masqui jamé, anto tsje na vitticaonha na Dios, co mexinxin cain nimé ndavintteguenxin na nttiha ngagaha jna.

⁶ Cain jiji conhe inchin ná ejemplo para ixin ján na para que ján na sonaoha na cosa jianha inchin joinao na jehe na.

⁷ Mexinxin jaha ra nchesayehe ra ídolo inchin joinchehe canxion jehe na. Noa na que joinchesayehe na ídolo ixin ndaço tti jitaxin Palabré Dios: “Tti chojni nttiha vintte na joine na co vihi na. Cottimeja vinttengattjen na vinttette na són para joinchesayehe na tti coxinttachjan de oro.”

⁸ Co ján na chondaha na que rrotsontaonxin na nçhi que jeha nçhiçhiha na inchin vinttenchehe canxion jehe na, co mexinxin vintteguenxin veintitrés mil na ngain nacoa nchanho.

⁹ Ni chondaha na que tsjá na paciencia que chonda Dios inchin joinchehe canxion jehe na, co mexinxin conché joinehe va jehe na co ndavintteguenhe tsje na.

¹⁰ Ni tsoñaoha na ngain Dios inchin joinchehe canxion jehe na, co mexinxin Dios rroanha ná ángel de jehe co ndagoen tsje na.

¹¹ Cain jiji conhe nindogelitoa na xançhjen are saho co vetaxin ngain tti jitaxin Palabré Dios inchin ná ejemplo para ixin ján na para que ján na isonttoha na jamé inchin joinchehe jehe na ixin ján na techon na ngain tiempo que ochian ndatsjexin mundo.

¹² Mexinxin jaha ra xo tonoha ra que ojian ditticaon ra Jesucristo ttjijo ra cuidado para que sincheha ra jianha.

¹³ Tti tangui que jaha ra tonha ra xajeho jamé tonhe cainxin chojni cai. Pero jaha ra nchao chonda ra confianza ngain Dios ixin jehe sanjoha icha tangui nganji ra, jeha tti jaha ra nchao tsixinha ra. Ixin are rrochonda ra tangui, Dios sinttanoha ra ngain ansean ra para que xén sinchehe ra para sachjexin ra de ngain tangui mé. Co jamé tsixinha ra ngain cain cosa tangui.

¹⁴ Mexinxin, cain jaha ra hermano, nchesayehe ra ídolo.

¹⁵ Janha ndattjo jaha ra jañá ixin jaha ra nchao ttinxin ra, co xaxaon ra jian si jeha ndoa tti janha ndattjo ra.

¹⁶ Are dayé na tti vaso de vino ngain Santa Cena co are ján na donho na vino mé, jamé ntoto na ixin rroçho que ján na dotticaon na ixin Jesucristo jehe cointtji jni para ixin ján na. Co are jontte na tti niottja que ján na tonchjea na, jamé ntoto na ixin rroçho que ján na dotticaon na ixin Jesucristo jehe joanjo cuerpoe para ixin ján na.

¹⁷ Masqui ján na anto tsje na, pero cain na jontte na xajeho niottja mé co jiji rroçho ixin cain na nacoaxinxon cuerpo na para ngain Jesucristo.

¹⁸ Xaxaon ra de ngain chojni Israel; are jehe na jine na nntao que dehe ngain mesé Dios, tjago na ixin cain jehe na nacoaxinxon cuerpo para ngain Dios.

¹⁹ Ndaçhjanha que ixin ídolo techon o chonda joachaxin, ni tti nntao que daquehe chojni ngain jeha icha jian nntao que cain icha nntao.

²⁰ Tti janha ndaçhjan rroçho que are tti chojni que chonxinha Dios daquehe nntao ngain ídolo, nntao mé para ixin espíritu jianha ixin nntao mé jeha para ixin Dios. Co janha rinaoha que jaha ra sinchesayehe ra espíritu mé.

²¹ Çhoha sixin ra ngain vasoe Jesucristo co sixin ra ngain vasoe espíritu jianha. Çhoha sinttixin ra ngain mesé Jesucristo co sinttixin ra ngain mesé espíritu jianha.

²² ¿Apoco sonao na sonttoñaon na Jesucristo? ¿Apoco icha soji ján na que jehe?

Tti nchao sinchehe ni co tti sinao chó ni ixin ditticaon ni Cristo

²³ Ján, ndoa tti ndaço na que ná ni nchao sinchehe ni lo que sinao ni, pero cainxinha jian para ixin jehe ni. Ján, ná ni nchao sinchehe ni lo que sinao ni, pero jeha cainxin tti sinchehe ni tsjenguijna ni para sitticaon ni Jesucristo icha.

²⁴ Chonda ni que tsjé ni tti jian para icainxin chojni co jeoha tsjé ni jian para ixin jeha ni.

²⁵ Jaha ra nchao jintte ra cainxin tipo de nntao que tochji ngain ndásin. Jaha ra chondaha ra joaxaon de sintte ra quexeho nntao mé co danchianguiha ra si vehe nntao mé ngain ídolo o ni nahi

²⁶ ixin nontte co cain cosa que jí ngataha nontte Dios joinchekhjian cain mé co cain mé cosé jehe.

²⁷ O si ðhonja chojni que xa ditticaonha Jesucristo rronhattjo ra ixin sinttecoho ra, co si jaha ra sinao ra sinttecoho ra, nchao para jaha ra jintte ra cain tti rrochjá ra na co xaonha ra para jintte ra nntao mé. Co xonhi danchianguihi ra de ixin ttinó joixin cain nntao mé.

²⁸ Pero si tti chojni que rrochjá ra nntao rrondatño ixin nntao mé vehe nntao ngain ídolo, jaha ra jintteha ra nntao mé para sincheha ra jianha ngain tti chojni que rronhattjo ra jamé, co para que chojni mé tsonoeha feo ngain ansén.

²⁹ Janha rrinichja de ixin quexén tonoe icha chojni, nahi de ixin quexén tonoha jaha ra.

Pero puede chonja ra sanchianguiha ra: “¿Andosenna tti xaxaon icha chojni?”

³⁰ Ixin puede xaxaon ra que si danjo ra gracias ngain Dios de ixin tti jintte ra, icha chojni ðhoha rronichja na feo de ixin jaha ra.

³¹ Nchao jí si jaha ra jintte ra o dihi ra o nchehe ra icanxin cosa, pero nchehe ra cain mé para nchesayexin ra Dios.

³² Ncheha ra cosa que iná chojni feo tsonohe ngain ansén, ni para chojni judío, ni para chojni que jeha judío, ni para chojni que ditticaon Jesucristo.

³³ De partena janha ttijnha cuidado para que cainxin chojni sinao na tti janha rrinttaha, janha ttjeha jian jeha para ixin janha, janha ttjé para ixin icha chojni para que Jesucristo nchao tsjenguijna jehe na para que rrochondaha na castigo de ixin tti jianha que nchehe na.

11

¹ Jaha ra rroehe ra ejemplona janha inchin janha rroá ejemploe Jesucristo.

Tti jiquininxin sinchehe nchí ngain servicio

² Janha atto chahna ixin jaha ra cainxin tiempo xaxaon ni ra janha co tenchehe ra sigue tti janha jointtaoanha ra.

³ Pero janha rinaho que tsinxin ra que Cristo, mé tti já de cada xí ixin jehe tti ttetonhe cada xí; co cada xí, mé tti já nchíchihí ixin jehe xa tti ttetonhe nchíchihí xa; jañá inchin Dios, mé tti já Jesucristo.

⁴ Si ná xí tsjanotaon já xa are jincheoanxinhi xa Dios are ngain servicio o are jindache xa chojni ngain nihngo tti joajna que jehe xa vayé xa que joixin de ngain Dios, mé rrotho ná joasoaxin para ixin Cristo.

⁵ Pero si ná nchí tsjanotaonha já ncha are jincheoanxinhi ncha Dios are ngain servicio ngain nihngo o are jindache ncha icha chojni tti joajna que jehe ncha vayé ncha que joixin de ngain Dios, rrotho ná joasoaxin para ixin xixihí ncha. xajeho inchin jehe ncha rrocjinhi ncha ngoixin já ncha.

⁶ Si ná nchí tsjanotaonha já ncha, mexinxin icha jian rrochinji cainxin xajá ncha. Pero si jaha ra tsonoha ra que atto soaxin para ná nchí rrochinji xajá ncha o rrocjin ncha hasta tti nganito já ncha, mexinxin icha jian chonda ncha que tsjanotaon já ncha.

⁷ Xí chondaha que tsjanotaon já xa ixin Dios joinchekhjian jehe xa inchin jehe Dios. Co de ngain xí Dios tosayehe. Co nchí para sinchesayehe ncha xí.

⁸ Jañá ixin are Dios joinchekhjian xí, jehe joinchekhjianha xa de ngain ná nchí, sino que Dios joinchekhjian nchí de ngain xí.

Dios conchjian ncha para ixin xí, co jeha conchjian xí para ixin nchí.

¹⁰ Mexinxin de cain jihí, nchí chonda que tsjanotaon já ncha para ná señal que jehe ncha ditticaon ncha xixihí ncha, co para rroché cain ángel.

¹¹ Pero masqui jamé, para ixin ján na que dotticaon na Jesucristo, xí ðhoha sehe xa si coha nchí, ni nchí ðhoha sehe ncha si coha xí,

¹² ixin ján ndoa que saho nchí conchjian ncha de ngain ná xí, pero de are mé para ndahi, xí doanxin xa de ngain nchí, co cayoi mé ttixin de ngain Dios.

¹³ Jaha ra mismo ndatño ra si nchao jí que nchí are sincheoanxinhi ncha Dios tsjanotaonha já ncha.

¹⁴ ¿Apoco noeha cain chojni que ná joasoaxin para ixin xí rrochonda xa xajá xa yeye?

¹⁵ Pero para ixin nchí ná cosa jian para ixin jehe ncha rrochonda ncha xajá ncha yeye ixin vayé ncha xajá ncha yeye para rrojanotaon já ncha.

¹⁶ Pero si ðhonja chojni rinao tsoñao de ixin asunto jihí, pero chojni mé chonda que tsonohe que ni ján na co ni icha chojni que ditticaon na Dios chonxinha na iná costumbre.

Tti joinchehe chojni ngain Santa Cena

¹⁷ Janha xaxanho rronhattjo ra canxion cosa que janha nchexoxinnaha. Ndachjenji na chojni que are xatte ra para ngain servicio, parece que chojni ngain ningoa ra nchehe na jianha en vez de jian.

¹⁸ Ixin janha ndachjenji na na que are xatte ra para nchesayehe ra Dios ngain servicio, are mé nichja ra ixin rrochjeya ra, co janha ditticanho nchion que puede ndoa jamé nchehe ra.

¹⁹ Pues, ¡puede jaha ra xaxaon ra que chonda que rrochjeya ra en grupos para que tsonohe ni quexehe ra xo ndoa ditticaon ra Jesucristo!

²⁰ Mexinxin tti cena que jaha ra jintte ra ngain nihngo, mé ijeha Cena de Jesucristo ixin jaha ra jañá xaxaon ra.

²¹ Co ixin are hora que jaha ra jintte ra cena mé, cada ra choenha chó ra; saditaon ra nttiha para ditse ra cená ra jaho ra. Mexinxin toha ra anto jintte ra co dihi ra hasta dinttecoan ra. Co itoaha ra denhe ra jintta.

²² Co jañá tenchexin ra jianha ngain chojni Jesucristo co nchecosoehe ra tti chojni noa que dicaoha tti jine. ¿Achondaha ra nchiandoi ra tti sinttexin ra co tti sixin ra? ¿Quexén rrochjan de ixin jaha ra? ¿Arronichja chjoin de ixin jaha ra? ¡Nahi de ixin tti tenchehe ra jiji!

Cena de Jesucristo

(Mt. 26.26-29; Mr. 14.22-25; Lc. 22.14-20)

²³ Janha de ngain Jesucristo mismo vayaxin tti janha jointtacoanha jaha ra: Que ngain tti tie que Judas cjoago Jesús para ngain tti chojni que ningaconhe jehe, Jesús de rá tsexin niottja

²⁴ co are joexin joanjo gracias ngain Dios, jehe conchinsi nio co ndacho: “Jintte ra. Jiji jehe cuerpona que janha sanjo para tsjenguijnanxin jaha ra. Janhi nchehe ra para rroxaxaonxin ni ra janha.”

²⁵ Jamé cai, are joexin cena, jehe de rá tsexin tti vaso que jiria vino co ndacho: “Vino jiji rrocho tti nuevo trato que nchesegurá conixin jnina. Cada nttiha que jaha ra sihi ra, nchehe ra para rroxaxaonxin ni ra janha.”

²⁶ Mexinxin cada nttiha que jaha ra sintte ra niottja co sihi ra vino para ngain Santa Cena, jaha ra nchehe ra jañá ixin Jesucristo ndavenhe para ixin jaha ra. Co nchehe ra jiji hasta que jehe tsi iná.

Quexén sine chojni tti Santa Cena

²⁷ Jañá, quexeho chojni que jine niottja co dihi de ngain vaseo Jesucristo co si jehe chojni mé ncheha inchin jiquininxin, jehe nchesayehe Dios, co chojni mé nchehe jianha ixin dicaoha respeto ngain cuerpo Jesucristo co ngain jni Jesucristo.

²⁸ Pero are Jesucristo jehe dicon que ján na nchaoha tenttoho na, jehe nttacastigá na nchion jai para que ján na ttentoxinhi na vidá na, co jamé ján na tsjinha na ngain infierno tti tsji cain chojni que ditticaonha Jesucristo.

²⁹ Ixin si jintte ra co dihi ra co xaxaonha ra que ixin mé rrocho cuerpo Jesucristo, pero jeha tettje ra castigo para ixin jaha ra.

³⁰ Mexinxin anto tsje de jaha ra teniha ra co tsangaha ra, co icanxin chojni de jaha ra hasta ondavenhe na.

³¹ Pero si ján na rrocjinho na cuidado jian jaon na ante de rrojontte na Cena jiji, Jesucristo rrochondaha que rrochjá na castigo jiji.

³² Pero are Jesucristo jehe dicon que ján na nchaoha tenttoho na, jehe nttacastigá na nchion jai para que ján na ttentoxinhi na vidá na, co jamé ján na tsjinha na ngain infierno tti tsji cain chojni que ditticaonha Jesucristo.

³³ Jañá mexinxin are rroxatte ra para sintte ra Cena jiji, chonhe chó ra naná ra para nataonxin sintte ra cain ra.

³⁴ Si chonja chojni senhe jintta, icha jian si jehe sine ngain nchiandoha para que jehe sitaonha nttiha co sine icha que cainxin chojni are sine na ngain Cena mé, co jamé Dios rrochjeha chojni mé castigo. Co tti icha asunto janha rronhattjo ra are saso para sasotsjaha ra.

12

Tti joachaxin que danjo Espíritu Santo ngain cada chojni

¹ Hermanos, jí icanxin cosa que janha rinaho tsonoha ra de ixin joachaxin que danjo Espíritu Santo ngain cada chojni.

² Jaha ra noha ra jian que are xa vaguitticaonha ra Jesucristo, jaha ra vaguittoaxin ra de vanchesayehe ra canxion idolo que choha nichja.

³ Mexinxin jai janha rinaho tsonoha ra que cain chojni que jí Espíritu Santo ngain çhoha rrondaço: “¡Jesús jianha!” Co cain chojni que rrondaço: “¡Jesús tti chonda cain joachaxin!” pero ixin Espíritu Santo jí ngain chojni mé.

⁴ Dios chjá na tsje clase de joachaxin, pero jeho ngain Espíritu Santo ttixin cain joachaxin mé.

⁵ Jí tsje clase de ça que sonttoho na, pero cain ça mé çajeho ça para ixin Jesucristo.

⁶ Jí tsje manera que nttoho na ça mé, pero jeho nacoaxinxon Dios tti ttjenguijna cain chojni para nchehe na ça mé.

⁷ Dios tjago ixin cada na chonda na Espíritu Santo nganji na ixin jehe mé tti chjá na joachaxin cada na. Co joachaxin mé tti ttjenguijna na ján na para que ján na nchao tsjenguijna na icha chojni que ditticaon Jesús.

⁸ De ixin Espíritu Santo Dios danjo joachaxin ngain canxion chojni para nichja na jian inchin anto ttinxin na. Co icanxin na çajeho Espíritu Santo tti danjo joachaxin para ndaço na ngain icha chojni tti Dios joinchenohe na.

⁹ Canxion na dayé na joachaxin de ixin jehe Espíritu mé para ditticaon na jian. Co icanxin na dayé na joachaxin para nchexingamehe na chojni nihi.

¹⁰ Icanxin na dayé na joachaxin de nchehe na milagro. Co icanxin na dayé na joachaxin para ndache na chojni joané Dios que jehe na dayé na. Co icanxin na Espíritu Santo chjé na joachaxin para datsoan na tti chojni que jí espíritu jianha ngain co tti chojni que jí Espíritu ndoa ngain. Co icanxin na dayé na joachaxin de nchao nichja neje na palabra que ni jehe na ttinxinha na. Co icanxin na dayé na joachaxin para ndaço na ixin quehe rroço palabra mé.

¹¹ Pero cainxin cosa jili nchehe jeho tti nacoaxinxon Espíritu Santo, mé tti tonchjea ojejé joachaxin ngain cada chojni inchin rinao jehe Espíritu Santo.

Cain na tequininxin na ngain nacoaxinxon cuerpo

¹² Inchin cuerpo ni chonda tsje parte, pero masqui tsje parte rroço nacoa cuerpo, jamé ján na cai ngain Jesucristo; masqui tsje na, pero tonchjian na nacoa cuerpo para ixin jehe.

¹³ Cada na ján na ná parte de cuerpo Cristo masqui judío na o griego na, o dicochji na ngain ça o ni nahi. Pero Espíritu Santo joinchechjian cain na nacoa cuerpo are joiguite na. Co mexinxin ján na parte de cuerpo Cristo, co cain na vayé na Espíritu Santo.

¹⁴ Ná cuerpo tonchjianha nacoa parte, sino de tsje parte.

¹⁵ Si rotté ni rrondaço: “Janha jeha rá na, mexinxin janha jeha ná parte de cuerpo jili”, çapoco por ixin jamé rotté ni ijeha ná parte de cuerpo ni?

¹⁶ O si ndatsjoen ni rrondaço: “Janha jeha jmacon na, mexinxin janha jeha ná parte de cuerpo jili”, cai çapoco por ixin jamé ndatsjoen ni ijeha ná parte de cuerpo ni?

¹⁷ Si ngoixin cuerpo ni rrocji joxon jmacon ni, ¿queçén nchao rroquinhí ni? O si ngoixin cuerpo ni rrocji joxon ndatsjoen ni, ¿queçén nchao rroçoajnihi ni ná cosa?

¹⁸ Pero Dios coín cada parte de cuerpo ni ngain lugar tti jehe joinao.

¹⁹ Si cain rrocji nacoa parte, ¿queçén rroquehe cuerpo ni?

²⁰ Masqui jí tsje parte, tonchjian jeho nacoaxinxon cuerpo.

²¹ Jmacon ni çhoha rrondaço ngain rá ni: “Jaha rrogondanaha”; ni cai já ni çhoha rrondaço ngain rotté ni: “Jaha rrogondanaha.”

²² Jeha jamé ixin tti cain parte de ngain cuerpo ni que jehe ni tonhohe ni dondaha ngain cuerpo, pero cain parte mé tti icha donda ngain cuerpo ni.

²³ Co tti ngain parte de cuerpo ni tti antoha rinao ni, cai çanotaon. Co tti ngain parte de cuerpo ni que çhoha çago, co mé tti icha dicao ni cuidado para çanotaon jian,

²⁴ Co ncheha ni ngain parte que nchao çago. Jamé Dios joinchechjian cuerpo ni para que cain parte que icha rinaoha ni, mé tti icha tosayehe,

²⁵ para que çonhi parte tsoñahe iná parte, sino que cada parte de cuerpo rroçaxaon de ixin icha parte de çajeho cuerpo.

²⁶ Si ná parte de cuerpo ni ttín, cai icha parte de cuerpo ni tonhohe feo. Co si ná parte de cuerpo ni çhjoin tonhohe, cai tti icha parté de cuerpo ni çhjoin tonhohe.

²⁷ Tti janha rrinndaçhjan rroço que cain jaha ra tonchjian ra nacoa cuerpo Cristo, co cada ra tonchjian ra naná parte de cuerpo mé.

²⁸ Jamé Dios chjé cargo jian canxion chojni que te ngain nihngo. Co saho parte para ixin tti chojni que te representanté Jesucristo, yoxin parte para ixin tti chojni que ndaço tti joajna que jehe dayé de ngain Dios, ninxin parte para tti chojni que ncheoenhe icha chojni de ixin Dios, cottimeja para ixin tti chojni que nchehe milagro, para ixin tti chojni que nchexingamehe chojni nihi, para ixin tti chojni que nchao ttjenguijna icha chojni, co para ixin tti chojni que nchao tjagohe icha chojni para nchao nchehe na ça unido, co para ixin tti chojni que nichja neje palabra que ni jehe çhoha ttinxin.

²⁹ ¿Apoco cain na joxon representanté Jesucristo na? O ¿apoco cain na dayé na joajné Dios? ¿Apoco cain na nttoehenhe na chojni de ixin Dios? O ¿apoco cain na nttoho na milagro?

³⁰ O ¿apoco cain na chonda na joachaxin de nttoxingamehe na chojni nihi? ¿Apoco cain na nchao ndačo neje na palabra que ján na ttinxinha na? ¿Apoco cain na nchao ndache na icha chojni quehe rrocho palabra mé? Claro que nahi.

³¹ Jaha ra nchehe ra de que sayehe ra de ngain Dios cain tti joachaxin icha jian. Pero janha tsjagoha ra iná cosa icha jian.

13

Quehe rrocho tti rinao chó chojni

¹ Si janha nchao nichja cainxin nguigoehhe chojni ngataha nontte co hasta nguigoehhe cain ángel, pero si janha rinaoha cain chojni, janha xonhi rentte na masqui rrinichja, ixin mé inchin ná niroa que torancjan o inchin ná chia que nchechjian joxon ruido.

² Si janha ndachjan tti joajna que janha dayá de ngain Dios, co si janha chonxin cainxin cosa que siconhe, co si janha nona canchesinxon cosa, co si janha anto jian ditticanho Cristo hasta nchao ttetoan jna para satsjixin jna de ngain lugar que te jna, si janha nchao nttaha cain mé, pero si janha rinaoha cain chojni, janha xonhi rentte na.

³ Si janha tsonchjeyá chojni noa cainxin cosa que janha chonda nttihí ngataha nontte, co si janha sanjo hasta cuerpona para rroche ixin janha nichja joajné Jesucristo, pero si janha rinaoha cain chojni, xonhi xé cain tti janha jointtaha.

⁴ Tti chojni que rinao cain chojni chonda paciencia co nchehe cosa jian ngain icha chojni. Chojni mé jeha chjoehhe, ni jeha puro nichja de ixin jehe mismo, ni jeha orgulloso.

⁵ Chojni mé jeha grosero ni ttjeha cosa jian para ixin jeho. Chojni mé toñaoha ni ttenchjanha coraje.

⁶ Chojni mé cheha de ixin tti jianha que nchehe icha chojni, jehe ché ngain tti ndoa.

⁷ Cainxin ttixinhí chojni mé de ngain icha chojni ixin jehe na cain tiempo xaxaon na jian de ixin cain chojni mé, co jehe na chonhe na para que chojni mé tsentoxinhí na vidé na ixin nchaoha tenchehe na, co chonda na paciencia para cain chojni mé.

⁸ Ján na chonda na que sonao na cain chojni para cainxin tiempo. Tsí tiempo que tti chojni que nichja joajné Dios que jehe dayé irrochondaha na que rronichja na, ni irronichjaha neje na tti palabra que ni jehe na ttinxinha na. Co ngain tiempo mé isondeha na que Dios sinchenohe na.

⁹ Jai ján na chonda na joachaxin para rrochonxin na, pero jeho nchion, co chojni jai tsjeha joajné Dios dayé.

¹⁰ Pero are tsí Jesucristo, cottimeja tti nchion que ján na chonxin na ndatsjexin ixin Dios sinttanoa na cain.

¹¹ Are janha xa nchín joarihi, janha vanichja co vařaxanho co vaquianxin inchin ná chjan. Pero are janha ocjoi ná xí, cointtoa cain cosa que vařaxanho are nchín na.

¹² xajeho jamé jai docon na cain cosé Dios inchin ngacjan ranontte, o inchin are čhoha doconxin na con na ngain ná espejo que xonhi xé. Pero cottimeja ján na socon na cain cosa claro. Jai janha chonxin jeho nchion, pero cottimeja janha rrochonxin cainxin inchin Dios chonxin na janha.

¹³ Jamé, jí ní cosa que ján na chonda na que sonttoho na para cain tiempo. Chonda na que sotticaon na Jesucristo, co chonda na que sotticaon na ixin seguro tsonhe cain tti ndačo Dios, co chonda na que sonao na cain chojni. Pero de canio cosa jihi jeho nacoa tti icha importante; jeho tti sonao na cain chojni.

14

Pablo ndačo ixin quehe rrocho tti nichja neje ni palabra que jehe ni ttinxinha ni

¹ Nchehe ra que rinao ra cain chojni, co xajeho tiempo danchia ra que Dios rrochjá ra cain clase de joachaxin, pero icha danchia ra tti joachaxin de rrondache ra chojni tti joajna que dayé ni que ttixin de ngain Dios.

² Tti chojni que nichja neje tti palabra que ni jehe ttinxinha, chojni mé nichja ngain Dios co jeha ngain chojni ixin xonhi chojni ttinxin tti jinichja chojni mé. Espíritu Santo tti nchenichja chojni mé, pero jehe nichja cosa jima que xonhi chojni ttinxin.

³ Co tti chojni que nichja tti joajna que jehe dayé que ttixin ngain Dios, jehe nichja ngain icha chojni para icha sitticaon na Jesucristo co para sincheanimá na co para que xonhi joachjaon tsa ansén na.

⁴ Tti chojni que nichja neje tti palabra que ni jehe ttinxinha, jamé jehe mismo icha ditticaon Jesucristo. Pero tti chojni que nichja tti joajna que jehe dayé que ttixin de ngain Dios, chojni mé icha nchequitticaon cain chojni que tinhi.

⁵Janha rrojinaho que cain jaha ra rrochonda ra joachaxin de rronichja neje ra tti palabra que ni jaha ra ttinxinha ra. Pero are xatte ra ngain servicoa ra, janha icha rinaho que jaha ra rronichja ra tti joajna que dayehe ra que ttixin de ngain Dios. Ixin jamé icha tsjenguijna ra cain chojni, co rronichjaha ra tti palabra que xonhi chojni ttinxin. Pero si ná ra chonda ra joachaxin para rrondache ra chojni quehe rrocho palabra mé, nchao para rronichja ra palabra mé ixin cai mé tsjenguijna cain jaha ra.

⁶Mexinxin si janha saso para sasotsjaha ra co rronichjaxin ra tti palabra que ni janha tsianxinha, xonhi xé para ixin jaha ra tti janha rronichja. Pero si janha rrondattjo ra claro tti ndachjenji na Dios, o sinttacoanha ra tti ndoa de ixin Dios, cottimeja ján, janha rrochjaha ra tti rrogondaha ra co tti ndoa sondaha ra.

⁷Tsín na de ejemplo cosa que nchechjian són tti chondaha vida inchin ná flauta o ná arpa. Si chojni noeha danao o dinga cosa mé, choha satsoan ni quehe són jinchechjian.

⁸Co iná ejemplo de ngain guerra. Si clarín sanoaha xa claro ixin tseto xa, xonhi soldado rroaxaon ixin tseto.

⁹xajejo jamé tonhe nganji jaha ra cai: si neje ra ndathoha palabra que nchao tsinxin ni, xonhi chojni tsinxin quehe tendacho ra.

¹⁰Ján, ndoa que jí tsje idioma ngoixin mundo, co palabré cada idioma mé chonda sentido.

¹¹Pero si janha ttianxinha tti idioma que rronichjanxin icanxin chojni, janha inchin chojni de iná nación para ngain chojni mé, co cai jehe na inchin chojni de iná nación para nganji na janha.

¹²Mexinxin jaha ra que anto rinao ra sayehe ra joachaxin que ttixin de ngain Espíritu Santo, pero de cain yá, icha nchehe ra que dayehe ra tti joachaxin que tsjenguijna cain chojni que ditticaon Jesucristo.

¹³Jamé cai, tti chojni que chonda joachaxin de nichja neje palabra que jehe ttinxinha, cai chonda que sanchia joachaxin ngain Dios para que Dios rrochjé jehe joachaxin de nchao tsinxin para rrondache icha chojni quehe rrocho palabra mé.

¹⁴Si janha sinttacoanxian Dios conixin tti palabra que janha ttianxinha, ján, ndoa que janha rrinichja conixin espirituna, pero ngain joarrixaoanna rritianxinha quehe rrocho tti janha rrinichja.

¹⁵¿Quehe sinttaha janha remé? Chonda que jí tiempo que janha rronichja ngain Dios conixin espirituna pero cai chonda que jí tiempo que janha rronichja ngain Dios conixin joarrixaoanna. Chonda que sinttacoanxin himno conixin espirituna, pero cai sinttacoanxin conixin joarrixaoanna.

¹⁶Ixin si ná chojni jincheoanxini Dios jeha de ngain espiritue, masqui icha chojni tettinhi tti jehe jindacho, pero jehe na ttinxinha na tti jehe jindacho co mexinxin choha rronichja na ngain Dios junto conixin jehe ixin jehe na ttinxinha na palabra mé.

¹⁷Masqui tti jehe ni nichja ni ngain Dios atto nchao jí, pero para icha chojni, nahi, ixin ttinxinha na tti jehe ni nichja ni.

¹⁸Janha chjaha gracias ngain Dios ixin janha nichja neje palabra que janha ttianxinha icha tsje nttiha que cain jaha ra,

¹⁹pero are ngain servicio, icha jian si janha nichja jeha naho palabra que chojni nchao tsinxin na, que rronichja dies mil palabra que xonhi chojni ttinxin.

²⁰Hermanos, janha rinaho que rroaxaonha ra inchin chjan de cain cosa jiji. Já, dinte ra inchin chjan que chonxinha cosa jianha, pero dinte ra inchin chojni yeye para xaxaon ra jian ngain cosa de Dios.

²¹Ndacho ngain tti libro que jitaxin Palabré Dios: “Janha rronichjá nación mé ngain ojé nguigoa co de ixin tti chojni que tsixin de ngain ojé nontte, pero masqui jamé, xa sincheha na na caso, jañá cho Dios.”

²²Jamé que tti joachaxin de rronichja neje ni palabra que ni jehe ni tsinxinha ni, mé sirve para ná señal para ixin tti chojni que ditticaonha Jesucristo, co jeha para ixin tti chojni que ditticaon Jesucristo. Pero tti joachaxin de rrondache ni chojni tti joajné Dios que jehe ni dayé ni, mé sirve de señal para ixin tti chojni que ditticaon Jesucristo, co jeha para ixin tti chojni que ditticaonha Jesucristo.

²³Mexinxin are ná chojni que ditticaonha Jesucristo o chonxinha quehe rrocho cain jiji siji ngain nihngo co tsinhi que jaha ra tenichja ra palabra que ni jaha ra ttinxinha ra, chojni mé daca rroaxaon que jaha ra ndadinttexenga ra.

²⁴Pero si ngain nihngo jaha ra tendacho ra tti joajna que ttixin de ngain Dios que dayehe ra co rato mé sixinhi chojni que ditticaonha Jesucristo o tti chojni que xa ttinxinha jian de ixin Cristo, chojni mé sitticaon co satsoan ixin joinchehe jianha. Jehe jamé tsonohe are tsinhi tti jaha ra tendacho ra.

²⁵Jamé cain tti jí ngain ansén chojni mé tononxin, co jehe settoxin nntajochjiji para sinchesayehe Dios co rrondacho que ndoa jí Dios ngayaha ra.

Nchehe ra cain cosa inchin ditonha ra co inchin jiquininxin

²⁶ Mexinxin, hermanos, are rroʒatte ra para sincheoanxinhi ra Dios, canxion ra rrotsje ra salmo, co icanxin ra sincheoenhe ra chojni cosa de Dios, co icanxin ra rrondačo ra cosa que Dios jointtanoha ra, co icanxin ra rronichja neje ra palabra que ni jaha ra ttinxinha ra, co icanxin ra rrondačo ra ixin quehe rročo tti palabra mé. Pero janha rinaho que cain mé tsjengujna chojni que ditticaon Jesucristo.

²⁷ Are rronichja neje ra palabra que ni jaha ra ttinxinha ra pero are mé rronichja jeha yoto ra, o hasta ní ra co rronichja ra naná ra co naná ra. Co ttoha de jaha ra chonda ra que rrondačo ra quehe rročo tti nichja compañeroa ra.

²⁸ Pero si ʒonhi chojni nchao rrondačo ixin quehe rročo tti palabra que rronichja ra, icha jian ʒonhi palabra mé rronichja ra ngain servicio, sino que cada ra rronichja ra jion ngain Dios para que ʒonhi chojni sinchetjanji ra.

²⁹ Jamé cai si para rronichja ra tti joajna que jaha ra dayehe ra que ttixin de ngain Dios, rronichja jeha yó o ní chojni, co icha ra tsinhi ra co rrondačo ra si ndoa joajna mé joixin de ngain Dios.

³⁰ Pero si rato mé Dios sinchenohe ʒonja cosa iná chojni que te nttiha, tti chojni que jinichja rato mé chonda que sattechoha tiempo para que rroxeha tiempo para ixin rronichja iná chojni.

³¹ Jañá cain ra ʒo sayehe ra joajné Dios, saho rronichja ná ra cottimeja iná ra para que icha chojni tsanguí co soan na animado.

³² Tti chojni que nichja tti joajna que jeha dayé que ttixin de ngain Dios chonda joachaxin para rrochonhe tsjexin rronichja ná na cottimeja jeha

³³ ixin Dios jeha ncheʒoxinha chojni que ttenchjianza respeto.

Jaha ra nchehe ra jian inchin nchehe chojni ngain icha nihngo.

³⁴ Ixin ngain ningoe Jesucristo, mé nchí chondaha ncha que rronichja ncha are ngain servicio ngain nihngo ixin jiquininxinha. Ixin chondaha nchí joachaxin para que jeha ncha tsetonha ncha ngain nihngo ixin jamé jitaxin ngain ley de Dios.

³⁵ Si jeha ncha rinao ncha tsonohe ncha ná cosa, chonda ncha que sanchianguihi ncha xixihi ncha are ongain nchiandoha na ixin ʒjoinha dicon ni que ná nchí rronichja ncha are ngain servicio.

³⁶ Chonda que ʒaxaon ra que jeha jaha ra tti chojni que saho conohe palabré Dios, ni jeoha jaha ra tti chojni que vayé palabré Dios, mexinxin ʒoaha tti rrondačo jaha ra sinchehe icha chojni ngain nihngo.

³⁷ Si ttoha de jaha ra datsoan ra que chonda ra joachaxin para nichja ra joajna que dayehe ra que ttixin de ngain Dios o que chonda ra quexeha joachaxin de Espíritu Santo, pero chonda que satsoan ra que tti janha rricjinha ra Dios coetonna.

³⁸ Pero si chojni que rronichja joajna mé ncheha caso jiji, cai jaha ra ncheha ra caso tti rrondačo chojni mé.

³⁹ Jañá, hermanos, nchehe ra de que Dios rrochjá ra joajné para nchao rrondate ra icha chojni, co cayacoenha ra tti chojni que rronichja neje palabra que ni jeha tsinxinha.

⁴⁰ Pero nchehe ra cain jiji inchin jiquininxin conixin respeto.

15

Pablo ndačo quehe rročo ixin Cristo xechon

¹ Janché, janha rinaho que rroʒaxaon ra tti jian joajna que janha ndattjo ra. Joajna jiji tti jaha ra vitticaon ra, co tti jaha ra ditticaon ra hasta jai.

² Cai de ixin joajna jiji jaha ra chonda ra iná vida naraoxin que ʒonhi tiempo tsjexin si jaha ra sinchehe ra sigue tti jaha ra ditticaon ra, si vitticaon ra ndoa.

³ Saho, janha jointtacoanha ra tti janha vayá. Janha ndattjo ra que ixin Cristo venhe para cjoenga hna de ixin cain tti jianha que nttoho na inchin ndačo ngain libro que jitaxin Palabré Dios.

⁴ Co janha ndattjo ra que cjoavá na Jesús co ninxin nchanho jeha xechon inchin jitaxin ngain Palabré Dios cai.

⁵ Co janha ndattjo ra que ixin jeha saho ʒago ngain Pedro, cottimeja ngain tti icha nirepresentanté jeha.

⁶ Co después ngain nacoa tiempo jeha ʒago ngain icha de naho ciento chojni que vitticaon jeha. Co tsje de chojni mé ʒa techon na jai, masqui ttoha na ondavenhe na.

⁷ Después, jeha ʒago ngain Jacobo, cottimeja ngain cain nirepresentanté jeha.

⁸ Co después de cainxin mé, ʒago nganji na janha cai masqui are mé janha joarihi inchin ná ʒjan que toncijihi xan are janné xan ʒaxaonha jan ixin tsoncijihi ʒjan mé.

⁹ Janha tti icha jeha importante na de cainxin nirepresentanté Jesucristo co ninchin jiquininxinha na para sinhi na representanté jehe ixin janha feo vantaha ngain chojni que vitticaon jehe.

¹⁰ Pero jai janha ndoa representanté Jesucristo na ixin Dios jian nganji janha, co tti jehe joinchehe nganji janha jeha jamaoncoa ixin janha jointtaha xa icha que cain icha nirepresentanté Jesucristo masqui jeha janha tti jointtaha, Dios tti joinchehe de ixin janha.

¹¹ Pero ndosennaha si janha tti icha jointtaha xa o jehe na, pero jiji tti joajna que janha na vayá na, co joajna jiji tti vitticaon ra jaha ra.

Quehe rrocho tti rroxechon chojni que ndadenhe

¹² Tti joajna que janha na ndattjo ra ndacho que Cristo xechon, mexinxin ¿quedonda ttoha de jaha ra ndacho ra que ixin tti chojni que ndadenhe irrocjanha na rroxechon na?

¹³ Si chojni que ndadenhe irroxechonha na, mexinxin ni Cristo xechonha.

¹⁴ Co si Cristo xechonha, rrocho xonhi xé tti joajna que janha na ndattjo ra remé. Co tti jaha ra ditticaon ra de ixin Jesucristo xonhi xé cai remé.

¹⁵ Si jamé, janha na rrocho chojni que nichja ndoaha de ixin Dios ixin ondachjan na que Dios joinchexechon Cristo are ndavenhe. Pero si jeha ndoa que ixin chojni que ndadenhe xechon na, mexinxin jeha ndoa que Dios joinchexechon Cristo are ndavenhe

¹⁶ Ixin si nindadenhe ixechonha na, mexinxin cai Cristo xechonha are ndavenhe.

¹⁷ Co si Cristo xechonha are ndavenhe, tti jaha ra ditticaon ra de ixin jehe na xoinxon xé, co jaha ra xa teca ra cain cosa jianha que nchehe ra.

¹⁸ Co si jamé, cai cain chojni que vitticaon Cristo co ndavintteguenhe na ndavitján almé na.

¹⁹ Si ján na dotticaon na que Cristo jeha jian para ngain vida jiji, ján na tti chojni que icha feo tsonohe de cain chojni.

²⁰ Pero tti mero ndoa que ján, Cristo xechon are ndavenhe. Jehe tti saho xechon para que cain chojni que ndadenhe chonda que rroxechon na.

²¹ Ixin Adán vitticaonha Dios, cainxin chojni ngoixin mundo tequininxin ndasenne na. Co ixin Jesucristo xechon are ndavenhe, jamé cai cain chojni jehe chonda que rroxechon na después de ndadenhe na.

²² Jamé inchin cain na ndadenhe na ixin ján na razé Adán na, cai cain na rroxechon na co rrochonda na iná vida naroaxin ixin ján na chojni Cristo na.

²³ Pero cada na inchin tequininxin na: Cristo tti saho xechon are ndavenhe. Cottimeja are Cristo tsí iná, cain chojni jehe rroxechon na.

²⁴ Cottimeja Cristo sinchexante cainxin joachaxin que jí ntthi ngataha nontte co ngajni co sinchegayé joachaxin mé ngain Dios Ndoá na

²⁵ Ixin Cristo chonda que tsetonha hasta tsjeja cainxin chojni que ningaconhe jehe.

²⁶ Co tti última cosa que jehe ningaconhe, tti ndadenhe ni, cai mé chonda que rroxante co ndasitján.

²⁷ Ixin Dios joanjo joachaxin ngain Cristo para que jehe ttetonhe cain cosa, pero are ndacho ngain Palabré Dios que Cristo ttetonhe cain cosa, mé rrochoha ixin ttetonha ngain Dios ixin Dios tti joanjo joachaxin ngain Cristo para que jehe ttetonha.

²⁸ Co are Cristo osacha de ngain cain tti ningaconhe, cottimeja jehe Cristo tti Xenhe Dios, rrocjan sanjo joachaxin que jehe vayé de ngain Dios para que jeha Dios tti tsetonha cain cosa. Ixin Dios tti joanjo joachaxin para que Cristo sacha.

²⁹ Si chojni que ndadenhe irroxechonha na ¿quedonda jí chojni que diguite na en lugar de tti chojni que ndadenhe? ¿Quedonda nchehe na jañá si jehe na ditticaonha na que tsí nchanho que cain tti ndadenhe rroxechon?

³⁰ ¿Co quedonda cain tiempo ján na techonda na peligro?

³¹ Cain nchanho janha chonda peligro de ndasenne na ixin nichja de ixin Jesucristo. Co jamé ndoa tti janha tonna, pero cai chjoin tonona janha ixin jaha ra ditticaon ra Jesucristo, tti chonda cain joachaxin para ixin ján na.

³² Janha jointtadiscuti xí chintto ngain ciudad de Efeso de ixin jehe palabré Dios, pero si rocji ndoa que chojni que ndadenhe irroxechonha na, janha irrochondaha que rrondachjan palabra mé co rrochonda razón tti chojni que ndacho: "Sontte na co sonho na ixin ndoe o rejngui ondasenne na."

³³ Dittoaxinha ra sinttayaha ra na. Ndoa inchin ndacho dicho: "Chojni jianha nchetján chojni jian."

³⁴ Jaha ra dintte ra ngain ná vida jian co nao; ncheha ra cosa jianha. Janha ndattjo ra jiji ixin nona que ttoha de jaha ra xa ditticaonha ra Dios. Janha ndattjo ra jañá para que rrochonxin ra joasoaxin.

Quexén rroxechon chojni que ndadenhe

³⁵ Pero puede ðhonja chojni sanchiangui: “¿Queéén rroxechon chojni que ndadenhe? ¿Quehe clase de cuerpo rrochonda na?”

³⁶ Co mé ná pregunta que ðonhi xé. Inchin are dinga ná semilla, semilla mé chonda que ndadenhe para que ðinhí ca.

³⁷ Tti dinga jeha ca ixin jeha ca tti ðhintaon, jeha grano que dinga, mé tti ðhintaon, sea trigo o iná semilla.

³⁸ Cottimeja Dios chjé semilla mé forma que jeha rinao co cada semilla dayé cuerpoe inchin tequininxin.

³⁹ Jeha cainxin cuerpo ðajeho. Cuerpoe chojni ojé clase, co cuerpoe coxigo ojé clase, cuerpoe conttoa iná clase, co cuerpoe copescado ojé clase.

⁴⁰ Jamé cai cuerpoe ángel ngajni ná clase co cuerpoe chojni ngataha nontte iná clase. Pero cuerpoe ángel chonda ná manera de ðhjoin te co cuerpoe chojni chonda ojé manera de ðhjoin te.

⁴¹ Tté nchanho icha jé que tté conittjao, co cai icha jé tté conotse, co de cain conotse cai ojejé tté va.

⁴² Jamé tsonhe cai ngain tti rroxechon chojni que ndadenhe. Jeha ðavá ná cuerpo que rrenga, co rroxechon iná cuerpo que isenha.

⁴³ Tti cuerpo que chonda na jai ðhjoinha te ixin tonihi co ndadenhe, pero cuerpo que rroxechon anto ðhjoin sehe ixin itsoniha co ni isenha. Cuerpo que chonda na jai tsangaha, pero cuerpo que rroxechon jeha soji.

⁴⁴ Are ndadenhe ni, ðavá jeha cuerpo que jeha ni dayé ni de ngataha nontte, pero are rroxechon ni, sayé ni cuerpo de ngain Dios. Jí cuerpo de ngataha nontte, co cai jí cuerpo de ngajni.

⁴⁵ Ndaçho ngain tti jitaxin Palabré Dios: “Tti saho xí cjoí Adán co jeha vehe tti saho chojni que vechonda vida”, pero ján na ndaçho na ixin Cristo tti último Adán ixin jeha chonda espíritu que danjo vida.

⁴⁶ Pero jai ján na chondaha na cuerpo de ngajni; jai ján na chonda na cuerpo de ngataha nontte. Cottimeja rrochonda na cuerpo de ngajni.

⁴⁷ Tti saho xí conchjian xa de jinche, co jeha xa de ngataha nontte xa. Co Jesucristo inchin tti yoxin xí, pero jeha joixin de ngajni.

⁴⁸ Cada chojni chonda naná cuerpo inchin cuerpo que vechonda Adán que conchjian de jinche. Pero tti chojni que ditticaon ngain Jesucristo, chojni mé tsí nchanho que rrochonda na cuerpo inchin cuerpo que chonda Jesucristo ngajni.

⁴⁹ ðajeho jai ján na chonda na ná cuerpo inchin cuerpoe Adán, pero tsí nchanho que ján na rrochonda na cuerpo inchin cuerpoe Jesucristo.

⁵⁰ Janha rrindattjo ra que cuerpo de nntao co nntaloro ðhoha sehe ngain lugar tti jittetonha Dios, ixin tti seha tonçhjenhe ðhoha sehe ngain tti tonçhjenhe para cainxin tiempo.

⁵¹ Pero janha rinaho que jaha ra tsonoha ra ná cosa que ða noaha ra: Jeha cainxin na senhe na, pero ján, cainxin na sayé na ojé cuerpo.

⁵² Jihí tsonhe anto daca inchin are ttejé co danttjé con ni; tsonhe are tsinhí ni tti último tsoyao trompeta. Are mé cain chojni que vitticaon palabré Jesús co ondavenhe na, jeha na rroxechon na conixin iná cuerpo co iðonhi tiempo senhe na. Co ðo ða sonttechon na are mé anto daca sitoxin cuerpoa na cai

⁵³ ixin cuerpoa na jai tonçhjenha sé; co chonda que sitoxin para que nchao tsonçhjenhe conixin tti tonçhjenhe para cainxin tiempo.

⁵⁴ Co are tsonhe jamé, cottimeja yá joiconhe tti ndaçho ngain tti jitaxin Palabré Dios: “Tti ndadenhe ni ondaxantte ixin ojoacha tti danjo vida.”

⁵⁵ Co nntiha ndaçho cai: “Muerte, ¿cja tti jaochaxin que jaha joarichonda para vagoenxin cuerpona na? ¿Cja tti jaha rrojacha?”

⁵⁶ Ixin tti jianha que nchehe ni, mé tti chjé joachaxin muerte para doen cuerpoe ni. Co ley que joanjo Dios ndaçho que ixin jamé tsonhe.

⁵⁷ Pero chjé na gracias ngain Dios ixin jeha chjá na joachaxin para sacha na de ngain muerte ixin Jesucristo ojoacha.

⁵⁸ Mexinxin de cain jihí, cainxin tiempo dintte ra soji co nchehe ra icha co icha inchin coetonha Jesucristo ixin jaha ra onoha ra que tti ða que jaha ra tenchehe ra conixin Cristo jeha jamaoncoa.

¹ Janhi sinchehe ra para satsetaonhe chó ra tomi para tsjenguijnaxin ra icha chojni que ditticaon Jesucristo, xajeho inchin tti ndattjan chojni ngain cainxin nihngo que te ngain nonttehe Galacia.

² Cain domingo cada jaha ra dantsjenda ra nchion tomi que dacha ra ngain cada semana co ttenchjinha ra tomi mé para que isatsetaonhe chó ra tomi are janha saso.

³ Co are janha saso, janha rrorroanha para Jerusalén tti chojni que jaha ra rrondačo ra, co janha rrochjaha na ná carta para que sicao na tomi que jaha ra joatse ra para ngain chojni que ditticaon Jesús nttiha.

⁴ Co si janha nchao tsji, cai tsji conixin jehe na.

Are xaxaon Pablo quecá lugar satsji

⁵ Ngain viajena chonda que satto nongain nonttehe Macedonia, cottimeja saso ngain ciudad de Corinto.

⁶ Puede nttiha tasarihi nganji ra nchion sé o puede hasta ngoixin tiempoe quin. Cottimeja jaha ra nchao tsjenguijna ni ra para ngain viajena tti janha chonda que satsji después.

⁷ Janha rinaoha jeha sattotaonxon nganji ra; janha rinaho sarihi ná tiempo nchion sé nganji ra si Dios rrochjana joachaxin.

⁸ Pero janha xa sarihi nttihi ngain ciudad de Efeso hasta ngain quiai de Pentecostés,

⁹ ixin janha chonda ná jian oportunidad ngain tiempo jiji para rronhattjan chojni co tsjagoa na de ixin Dios masqui te tsje chojni que jehe anto ningaconhe tti janha ndačhan.

¹⁰ Si siji Timoteo nganji ra, nchehe ra que jehe sehe contento ngayaha ra ixin jehe nchehe xé Dios inchin janha.

¹¹ Mexinxin ni ná jaha ra nchedespreciaha ra are jehe siji nganji ra. Ttjenguijna ra para ngain viajé jehe para que jehe tsí contento sitsjena ixin janha rrichoan jehe conixin icanxin xicompañerona na.

¹² Co Apolos janha anto jointtatsán ñao para que rroguiji rroguitsjaha ra conixin icanxin chojni que ditticaon Jesucristo, pero jehe čhoha joihi jai. Jehe siji pero are jehe rrochondaja oportunidad.

Pablo joexin cjin carté co rroanha joajna

¹³ Dintte ra listo, co ditticaon ra jeha Cristo. Dintte ra inchin xí jian. Dintte ra soji.

¹⁴ Cain cosa que sinchehe ra, nchehe ra jian ixin jamé rročo que ján rinao ra cain chojni.

¹⁵ Co jai, hermanos, jaha ra noha ra que ixin Estéfanos conixin cain nindoha, jehe na tti nisaho vitticaon tti jian joajné Cristo ngain regioen Acaya. Co jehe na nitettjenguijna icha chojni que teditticaon palabré Cristo.

¹⁶ Janha rinaho que jaha ra ditticaon ra tti chojni que nchehe inchin jehe Estéfanos conixin nindoha co inchin tti chojni que nchehe xé Dios co inchin tti chojni que ttjenguijna icha chojni que ditticaon palabré Cristo.

¹⁷ Janha anto chahna ixin vicon jói Estéfanos, co Fortunato co Acaico. Jehe na nicjoenguijna na janha na ixin jaha ra čhoha cjoenguijna ni ra ixin vintteha ra nttihi.

¹⁸ Jehe na joincheanimá na na janha inchin joinchehe na nganji ra cai. Janha rinaho que cain chojni rronichja jian ngain chojni que nchehe inchin jehe na.

¹⁹ Cain chojni ngain nihngo de ngain regioen Asia rroanha na joajna para ixin jaha ra. Co Aquila, co Priscila, co cain chojni que xatte ngain nchiandoha na para servicio cai rroanha na tsje joajna para ixin jaha ra.

²⁰ Cai cain chojni que ditticaon Jesucristo nttihi ngain ciudad jiji rroanha na tsje joajna nganji jaha ra. Co cain jaha ra chjehe chó ra joajna jian are setan chó ra.

²¹ Janha, Pablo na, rrorroanha ra joajna jiji que cjinxin na conixin rana co letрана.

²² Si čhonja chojni rinaoha na Jesucristo, chojni mé te na condenado. ¡Jesucristo, jaca sihi!

²³ Jesucristo sinchenchaon nganji ra.

²⁴ Janha rinaho de ngain ansenna cainxin jaha ra ixin cainxin na chojni Jesucristo na. Amén.

Yoxin Carta Que Dicjin Pablo Para Ixin Chojni Que Ditticaon Jesucristo Ngain Ciudad De Corinto

Pablo chjé joajna chojni ngain Corinto

¹ Janha Pablo na Dios joinao para que janha rrihi ná representanté Jesucristo. Janha conixin Timoteo techjaha ra joajna jiji, jaha ra xo ditticaon ra Dios ngain ciudad de Corinto, co cai jaha ra xo ditticaon ra Dios que te ra ngoixin regioen Acaya.

² Dios Ndodá na co Jesucristo, tti chonda joachaxin para ixin ján na, sinchenchaon nganji ra co rrochjá ra tti chjoin que tsonohe ansean ra.

Tti anto tangui que conhe Pablo

³ Ján na sonttocoanxinhi na Dios Ndodé Jesucristo ixin jehe Dios mé tti Ndodá na que ttiaconoá na co jehe Dios mé tti chjá na consuelo cainxin tiempo.

⁴ Dios chjana na janha na consuelo de cainxin tti tangui que tonna na para que janha na cai nchao sinttaconsolá na tti chojni que tangui tonhe conixin xajeho consuelo que chjana na Dios.

⁵ Jañá janha na anto tangui tonna na ixin ditticanho na Cristo, pero cai de ixin Cristo janha na dayé na anto tsje consuelo.

⁶ Mexinxin si janha na tangui tonna na o si Dios ncheconsolá na, mé para que jaha ra rrochonxin ra de ixin Dios co rrochondaha ra castigo de ixin tti jianha que joinchehe ra. Co jamé rrochonda ra paciencia para tsixinha ra are anto tangui tsonha ra inchin tetonna na janha na jai.

⁷ Co janha na chonda na seguro que xonhi jianha tsonha ra are setan ra tangui inchin janha na tedetan na jai ixin Dios tsjenguijna ra inchin jehe ttjenguijna cain chojni que ditticaon ngain.

⁸ Hermanos, janha na rinaho na que jaha ra tsonoha ra quejanhi problema joichonda na janha na ngain nonttehe Asia. Mé cjoí ná cosa anto tangui para ixin janha na, hasta que merocoa rroquixinnaha na ngain problema mé. Co janha na oxaxanho na que ndarroguenxin na nttiha.

⁹ Janha na conona na que seguro narrogoenxon na na. Pero jiji conna na para que coangui na chonda na confianza jehó ngain Dios que nchexechon chojni, co chondaha na confianza ngain chojni ni nganji na janha na mismo sino que jehó ngain Dios.

¹⁰ Dios coanchjandaha janha na venhe na are mé, co xa jinda na jai; jehe tančjandaha chojni que rinao nasoenxon na. Co chonda na cainxin confianza ngain jehe que jehe xa senda na de ngain chojni que ningaonna na,

¹¹ si jaha ra tsjenguijna ni ra ixin sinchetsenhe ra ñao Dios para ixin janha na. Co si tsje chojni sinchetsenhe na ñao Dios para ixin janha na, cai tsje chojni sanjo gracias ngain Dios de ixin tti jian que Dios sinchehe nganji na janha na.

Quedonda cjoiha Pablo ngain ciudad de Corinto

¹² Jí ná cosa que ansenna na chjoin tonohé, co mé ixin janha na nona na que janha na jian tenttaha na ngataha nontte jiji, co cai nganji jaha ra. Dios cjoenguijna na janha na para que tenttaha na jañá ixin jehe anto jian; jeha ixin janha na anto nona na.

¹³⁻¹⁴ Cain carta que janha na rroanha ra, xonhi icha cosa jitaxin nttiha jehó tti jaha ra nchao cjoao ra co coinxin ra. Jai te parte que jaha ra ocoinxin ra, pero janha rinaho que tsinxin ra jian cain parte para que ngain nchanho are tsí Jesucristo jaha ra nchao tsonohe ansean ra chjoin de ixin janha na, inchin janha na chjoin tsonohe ansenna na de ixin jaha ra.

¹⁵ Janha chonda confianza de ixin cain jiji, mexinxin janha joiřaxanho saho rrogaso nganji ra para rrogasotsjaha ra para que jaha ra chjoin rroconoha ra ixin janha rrogasotsjaha ra yó nttiha.

¹⁶ Janha joiřaxanho rrogatto noyá para rrogasotsjaha ra are janha sacjoi para regioen Macedonia, co después are janha rrocjanxin na de nttiha rrogaso para rrogasotsjaha ra iná. Co jamé jaha ra rrochonda ra oportunidad de rrocjenguijna ni ra de ixin tti rrogondana ngain viajena para regioen Judea.

¹⁷ Puede jaha ra řaxaon ra que janha jointtachjianha medidana jian are janha joiřaxanho rrojinttaha jiji. O puede řaxaon ra que janha inchin tti chojni que ndačho de ngain rroha “ján” co de ngain ansén “nahi”.

¹⁸ Dios nohe jian que janha na jeha jamé na.

¹⁹ Silvano, co Timoteo co janha ndattjo ra de ixin Jesucristo tti Xenhe Dios. Co Jesucristo jeha inchin tti chojni que ndačo jamé; Jesucristo cainxin tiempo nchehe cain tti jian que jehé ndačo.

²⁰ Co de ngain jehé toenxin cainxin tti jian que ndačo Dios. Mexinxin are nttocoanxinh na Dios, ndačo na “Amén” que rročo jamé tsonhe, co ndačo na jañá ngain Dios por ixin Jesucristo.

²¹ Co Dios, mé tti nchesoji na conixin jaha ra para que dontte na inchin nacoa chojni ngain Cristo, co jehé tti jointtaroa na ngattoxon con jehé.

²² Co jehé cjoago ixin ján na chojni jehé ixin jehé coín Espíritu Santo ngain ansean na co mé rročo ixin anto seguro que jehé rochjá na anto tsje icha cosa jian cai ngain tiempo que tsí.

²³ Pero xa dasoha Corinto ixin rinaoha sinttasattaha ra porque janha anto rinaho ra co janha tsín Dios de testigona co jehé nchao santsjena vidana si ndoaha tti janha rrindattjo ra.

²⁴ Jeha ixin janha na rinaho na tsetonha ra de ngain tti ditticaon ra. Nahi. Jeha mé ixin jaha ra oditticaon ra jian ngain Cristo. Janha na jehó rinaho na tsjengujna ra para que rochaha ra icha co xonhi joachjaon sehe ngain ansean ra.

2

¹ Mexinxin janha joiřaxanho ijoasoha joasochjaha ra joachjaon.

² Ixin si janha rrochjaha ra joachjaon jaha ra, cottimeja xonhi ngain chojni tti rrochananxin janha ixin jaha ra irročoha ra tsjengujna ni ra para rrochahna ixin janha ochjaha ra joachjaon.

³ Mexinxin janha cjinha ra cartana icha saho para que jaha ra tsentoxinh na vidá ra ixin rinaoha saso sinttasattaha ra co rrochjaha ra joachjaon. Icha jian si are janha sasotsjaha ra janha rrochahna nganji ra. Janha chonda seguro que are chahna janha, cain jaha ra chaha ra cai.

⁴ Are janha cjinha ra carta mé, anto coá joachjaon que hasta tsjanga; co conona que ndavichjenga ansenna are janha cjinha ra carta mé. Pero jeha cjinha ra carta mé para que jaha ra sinttechinh ra, jehó para que janha cjoagoha ra que anto rinaho ra.

Quexén sitjañehe tti chojni que joinchehe jianha

⁵ Pero si çhonja chojni joinchehe jianha co jidanjo joachjaon, chojni mé jeoha janha jichjana joachjaon, cai cain jaha ra jichjá ra nchion joachjaon. Janha ndačhjan que jichjá ra nchion joachjaon para rrondačhjanha icha soji nganji ra.

⁶ Tti castigo que jaha ra chjehe ra chojni mé, conixin jehó mé ichondaha ra que rrochjehe ra icha castigo.

⁷ Jai onchao, nchetjañehe ra chojni mé, co dantsjehe ra joachjaon ngain ansén ixin si nahi, puede jehé isitticaonha Jesucristo.

⁸ Mexinxin janha rrinttatsanha ñao ra que tjagohe ra chojni mé que jaha ra ján rinao ra jehé.

⁹ Janha rroanha carta mé nganji ra de ixin asunto jihí para rroconona aco ndoa teditticaon ni ra.

¹⁰ Co si jaha ra sinchetjañehe ra chojni mé, cai janha sinttatjañá jehé. Si ndoa jehé joinchehe jianha nganji na janha, janha jointtatjañá jehé ixin janha anto rinaho jaha ra. Co janha jointtatjañá chojni mé ngattoxon con Jesucristo,

¹¹ para que Satanás tsixinha sinttayá na, ixin ján na chonxin na jian quexén jehé rinao sincheyehe chojni.

Pablo vaha contento ngain ciudad de Troas

¹² Are janha joaso ngain ciudad de Troas para jointdattjan chojni joajné Jesucristo, are mé janha joarichonda anto jie oportunidad para ndattjan chojni joajna mé.

¹³ Pero ansenna vaha contento ixin janha vittjaha Tito. Mexinxin janha sacjoixin de nttiha co sacjoi para regioen Macedonia.

Pablo joinchenohe chojni quexén sachá ni are ditticaon ni ngain Jesucristo

¹⁴ Pero janha chjaha gracias ngain Dios ixin cain tiempo jehé tjengujna na para dacha na ngain cosa jianha. Co de ixin janha na, Dios ndache tsje chojni joajné Jesucristo. Co joajna mé inchin tsjoca que toncařajni cain lugar.

¹⁵ Ixin janha na inchin tti tsjoca que Cristo tjaga para ixin Dios. Co tti řajni mé ttji para ngain tti chojni que ditticaon co para ngain chojni que sitján almé.

¹⁶ Para ixin tti chojni que sitján almé, tti çhjoin řajni jihí, anto feo xa para ixin jehé na inchin ná cosa que ndadoen chojni. Pero para ixin tti chojni que chonda vida naroaxin,

para ixin jehe na, cosa que ĉhjoin ĵajni jiji inchin ná cosa que danjo vida ngain na. Co si Dios tsjenguijnaha chojni, jehe na ĉhoha rronichja na joajna jiji.

¹⁷ Janha na jeha rrindattjan na chojni joajné Dios para sachaxin na tomi. Janha na ttentoxinha na joajné Dios inchin nchehe icha chojni. Janha na jeha jamé nttaha na. Janha na ngattoxon con Dios ndattjan na chojni joajna jiji ixin janha na ninchehe xé Jesucristo co chojni Dios que jehe rroanha.

3

Tti ndaĉho joajné trato naroaxin

¹ Are janha na ndaĉhjan na jiji, ĉaxaxaon ra que janha na cjan na tendaĉhjan na ía ixin janha na anto jian na? ĉO apoco rinao ra que janha na tsjagoha ra ná carta de recomendación que ixin andoa ditticanho na Cristo? O ĉani rrogondana na que jaha ra rrochjana ra ná carta de recomendación para sacinha na?

² Nahi, janha na jeha jamé sinttaha na ixin jaha ra mismo inchin tti carta de recomendación que janha na rrogondana na, ixin cain chojni que dicon que jaha ra ocoentoxinhi ra vidá ra, chojni mé tti rrondaĉho que ixin ján jian tti janha na tenttaha na nganji ra, co mé tti rroĉho que jaha ra inchin ná carta de recomendación para ixin janha na.

³ Jaha ra tti inchin carté Cristo que janha na cjin na ixin janha na jointtacoanha ra palabré jehe co jai ditticaon ra jehe. Jaha ra ná carta que conĉhjianha conixin ndajni, sino conixin Espíritu Santo de Dios que jichon. Jaha ra jeha ná carta que vetaxin nganito ná xo inchin tti Diez Mandamiento, sino que vetaxin ngain ansén chojni.

⁴ Janha na chonda na seguro de cain tti nichja na jiji, porque chonda na confianza ngain Dios por ixin Jesucristo.

⁵ Jaha ixin janho na chonda na joachaxin para sinttaha na ná cosa jian. Nahi, jeha jamé ixin cain tti nchao que janha na nttaha na ttixin de ngain Dios.

⁶ Jehe ĉhjana na joachaxin para que janha na nichja na joajné Jesucristo, co joajna mé tti trato naroaxin. Co jehe trato naroaxin mé ĉjá na vida naroaxin ixin Espíritu Santo jí ngain ansean na. Tti saho trato que Dios ĉhjé Moisés, mé vaganjoha vida naroaxin ixin trato mé jeha tjagoa na ixin anto jianha na co tequininxin na ndasenne na.

⁷ Jehe ley de trato que Dios ĉhjé Moisés jiji vetaxin nganito yó tabla de xo. Co are Moisés vayé ley mé, jói ná ĉixo anto soji ngá con Moisés que chojni Israel are mé ĉhoha tsjehe na ngá con jehe ixin anto jitonguixian ngá con. Pero masqui jamé, jehe ĉixo mé yayao ndavanga. Pero si anto ĉhjoin jói ley mé, co jeha cjoago que jiquininxin ndasenne ni,

⁸ mexinxin joajné Jesucristo que ttiaoa na na Espíritu Santo anto icha ĉhjoin.

⁹ Si ley mé anto ĉhjoin jói co jeha joicjago que janha na tequininxin na ndasenne na, mexinxin joajna que ndaĉho ixin íxonhi jianha teca na anto icha ĉhjoin joajna que ley mé.

¹⁰ Ixin tti ley are saho anto ĉhjoin jói ley mé, pero jai merocoa íxonhi rentte ley mé ixin jai anto icha ĉhjoin co icha rentte tti joajna que danjo vida naroaxin.

¹¹ Mexinxin si anto ĉhjoin jói tti ley que conĉhjenha sé tiempo, seguro anto icha ĉhjoin co rentte tti joajna que ĉonhi tiempo tsjexin.

¹² Janha na chonda na seguro que joajna jiji ĉonhi tiempo tsjexin, mexinxin janha na ndattjan na icha chojni conixin anto tsje confianza.

¹³ Janha na ĉonhi tiempo nttaha na inchin joinchehe Moisés ixin jehe vacjanotaon ngá con conixin ná manta para que chojni Israel rroguiconha na queĉén ndajoexin ĉixo mé ixin ĉixo mé deporsín seha rroconĉjenhe.

¹⁴ Pero jehe na vaquinxinha na queĉén Dios rinao tsjenguijna na. Co hasta jai chojni Israel ĉa ĉhoha ttinxin na jiji ixin are jehe na tsjehe na ngain tti jitaxin ley que vayé Moisés ĵajeho inchin jicayacoen joarrixaon na tti manta que cjoanotaon con Moisés. Co jehe manta mé tti tanĉhjangaha na para ttinxin na. Co ĉonhi chojni nchao sinttjian manta mé, jeha Jesucristo.

¹⁵ Hasta ngain tiempo jai, are jehe na tsjehe na libroe Moisés, ĉá ná manta cayacoen joarrixaon na para ttinxinha na.

¹⁶ Pero are ná chojni ditticaon jehe, tti chonda cain joachaxin, are mé manta ndadaĉhehe manta de ngain joarrixaon chojni mé.

¹⁷ Co Dios, jehe tti Espíritu Santo. Co si Espíritu Santo que rroanha Dios jí ngain ansean na, joarrixaon na chonda libertad para tsinxin na de ixin Dios.

¹⁸ Mexinxin cain ján na ixin teĵanotaonha con na conixin manta, ján na te na inchin ná espejo ixin icha chojni nchao sicon de ixin ján na ixin Dios anto jian. Co ján na sontte na icha co icha jian inchin Cristo ixin chonda na icha co icha joachaxín jehe. Cain jiji nchehe jehe tti Espíritu Santo de Dios.

4

¹ Mexinxin janha na xonhi tiempo soan na desanimado ixin Dios tti coiaconoana na, jehe chjana na xa jihi de rronichja na palabré jehe.

² Janha na ningacoan na cain cosa que nchehe ni jimao, co cain cosa de joasoaxin, janha na xonhi chojni nttayá na ni ttentoxinha na Palabré Dios. Sino que janha na ndačhjan na jehó tti ndoa, co jamé icha chojni nchao rrochxonin na que janha na tjagoa na na jehe tti ndoa co cain tti nttaha na, nttaha na ngattoxon con Dios.

³ Pero si te chojni que ttinxinha tti jian joajna que janha na ndačhjan na, jehó ixin chojni mé ndateditján almé na para cainxin tiempo.

⁴ Jehé na ditticaoona na ngain Cristo, mexinxin inchínji chonda joachaxin ngain na, co jehe tti jicayacoen joarrixaoen na. Mexinxin ttinxinha na tti anto jian joajné Jesucristo co jehe Jesús, mé tti jói ngataha nontte co jehe mero Dios.

⁵ Are janha na ndačhjan na de ixin joajna jihi, jeha ndačhjan na de ixin janho na, sino que janha na ndačhjan na de ixin Jesucristo que jehe tti chonda cain joachaxin, co nttanoha ra ixin janha na jehó inchin ninchehe xa nganji ra ixin janha na rinaho na Jesucristo.

⁶ Are Dios joinchechjian mundo jihi, jehe tti coetonha para vehe xohi que joinchengasán ngain tti naxin xehe que vehe are saho. Co jamé Dios tti joinchengasán ngain ansean na para que de ixin joadingasán mé Cristo nttanoa na ixin Dios anto jian.

Are chonda na confianza ngain Jesucristo, ján na chonda na vida naroaxin

⁷ Co tti jointtanoa na Cristo, mé anto rentte inchin ná tesoro ngain cuerpoa na, masqui cuerpoa na tehe sojiha inchin chi de barro. Jamé para que rroxago que joachaxin que jí ngain cuerpoa na, mé joachaxin Dios co jeha joachaxin na ján na.

⁸ Mexinxin masqui janha na chonda na anto tsje problema, pero xonhi tiempo sinttech-inhi na ixin Dios ttjenguijna na. Co masqui chonda na joachjaon, pero xonhi tiempo rinaho na ttinttoa na de tti ditticanho na.

⁹ Co masqui chojni feo nchehe na nganji na, pero xonhi tiempo te na janho na ixin Dios jí nganji na. Co masqui chojni doen na, pero nadoenxonha na na.

¹⁰ Cain lugar tti janha na čhi na, xaxanho na que puede icha chojni nasoenxon na na ixin janha na ndattjan na chojni tti jian joajné Jesucristo. Pero janha na rroxaoona na ixin jamé jehe na nchao sicon na que janha na chonda na vida naroaxin que danjo Jesucristo.

¹¹ Cada nchanho que janha na xa techon na, chonda na peligro de senhe na ixin ndattjan na chojni joajné Jesucristo. Pero mé tjago ixin Jesucristo jí nganji na janha na cada nchanho.

¹² Mexinxin janha na cainxin tiempo jí en peligro vidana na ixin nichja na joajné Jesucristo, pero jaha ra ovayehe ra vida naroaxin ixin janha na ndattjo ra joajna mé.

¹³ Ngain tti jitaxin Palabré Dios ndačo: “Janha vitticanho co mexinxin nichjaxin.” Jamé janha na cai, ditticanho na, mexinxin nichjaxin na jai,

¹⁴ Ixin nona na que Dios joinchexechon Jesús are ndavenhe, co jehe Dios mé sinchexechon na janha na para sinttechon na conixin Jesús. Co janha na conixin cain jaha ra cai, satsjiho na ngain lugar tti ttjen jehe.

¹⁵ Cain cosa tangui que tonna na jihi, mé jian para ixin jaha ra ixin are icha co icha chojni sayé tti jian de ngain Dios, jamé cai sintte icha tsje chojni que sanjo gracias ngain Dios para que jehe tsosayehe.

¹⁶ Mexinxin janha na xonhi tiempo doan na desanimado. Masqui cuerpona na ndattetjexin, pero espirítuna na icha tetosoji cada nchanho.

¹⁷ Ixin cain tti tangui que tonhe ni ngain vida jihi, seha tončjenhe, toin datto co jamé tonhe ni para que Dios rrochjé ni ná vida que xonhi tiempo tsjexin co vida mé anto icha jian que iná vida.

¹⁸ Janha na tsjianha na cuidado de ngain cosa que nchao dicon ni; sino que janha na tsjinha na cuidado de ngain cosa que čhoha dicon ni ixin cain cosa que nchao dicon ni, mé toin ndattjexin, pero cain cosa que čhoha dicon ni, mé xonhi tiempo tsjexin.

5

¹ Ján na noa na que are ndasenhe na, cuerpoa na ndarroxante ixin cuerpoa na inchin ná nchia que tončjenha sé. Pero Dios rochjá na iná cuerpoa na que jehe jittenchjianha ngajni para ixin ján na, co cuerpo mé xonhi tiempo tsjexin. Co cuerpo mé inchin ná nchia que conchjianxinha de rá chojni.

² Ján ndoa jaxon que xa techon na ngain cuerpo tehe, techín na ixin orinao na rrochonda na tti cuerpo de ngajni,

³ ixin cuerpo mé sottengá na inchin lonttoa na para que tsottolochoha na.

⁴ Jaxon que xa techon na ngain cuerpoa na tehe que inchin ná nchia ngataha nontte nttihi, ján na tonoa na feo co donttechín na. Pero jeha ixin ján na orinao na sachjexin na de ngain cuerpoa na tehe. Tti ján na rinao na na que orrochonda na tti cuerpo de ngajni para que isenha na.

⁵ Co Dios tti ndacho ixin jañá tsoan na. Co jehé chjá na Espíritu Santo jai para ná seguridá que jehé rochjá na anto tsje icha cosa jian.

⁶ Mexinxin janha na cainxin tiempo chonda na confianza co xaonha na de ndasenne na. Nona na que jaxon que xa techon na ngain cuerpona na tehe janha na xa teha na ngajni tti jí Jesucristo.

⁷ Pero masqui jamé, janha na sinttaha na sigue ngain xa que chjana na Dios ixin chonda na confianza ngain, co jeha ixin nchao dicon na jaxon tti rochjana na Dios.

⁸ Pero xaonha na de ndasenne na ixin icha rinaho na ndasenne na para sachjexin na de ngain cuerpo que chonda na jai para nchao sasiguintte na ngain Jesucristo.

⁹ Mexinxin cain tiempo rinaho na nttaha na jeho tti nchexoxinhi Jesús, sea que te na ngain cuerpona na jai o masqui are sintte na ngajni.

¹⁰ Ixin cainxin na chonda na que tsonchienne na ngattoxon con Jesucristo para que cada na sayé na inchin jiquinixin si jointtoho na jian o si jointtoho na jianha cain tti ján na tenttoho na jai que xa techon na ngataha nontte nttihi.

Quexén sintte chojni de acuerdo

¹¹ Ixin janha na nona na que Jesucristo sinchejuzguehe cain chojni, mexinxin ttingaria na ndattjan na chojni que sittoexin na sitticaon na tti jehé coetonha. Pero Dios onöhe quexén janha na tonona na ngain ansenna na, co janha rinaho que jaha ra tsonoha ra jamé cai de ixin janha na.

¹² Janha na tecjanha na tenichja na jian de ixin janho na, sino que janha na techjaha na jaha ra ná oportunidad de chjoin tsonoha ra nganji na para que nchao rrochonxin ra quehe rronchache ra tti chojni que anto orgulloso de ixin tti nchehe na en lugar de tti jí ngain ansén.

¹³ Jí nttiha are chojni ndacho na ixin janha na ndadixenga na are tthinhi na nichja na de ixin Dios, pero Dios jamé rinao que janha na sinttaha na. Co are jehé na ndacho na que ixin janha na jian te joarrixaonna na, mé jian para ixin jaha ra.

¹⁴ Jesucristo jehé anto rinao na cainxin na, mexinxin janha na chonda na que ndattjan na chojni de ixin jehé. Co janha na chonda na seguro de que Jesucristo ndavenhe para que cjoenga hna tti jianha que joinchehe cainxin chojni, co mexinxin cainxin tti jianha que gontteca na, jai itecaha na.

¹⁵ Cristo ndavenhe para cjoenga hna tti jianha que joinchehe cainxin chojni para que jai chojni que xa techon isincheha na inchin rinao na jeho na, sino que sinchehe na inchin rinao Cristo ixin jehé ndavenhe co xechon para jittjenguijna cain jehé na.

¹⁶ Tti chojni que ditticaonha Jesucristo xaxaon na ixin icha chojni chjoin vidé chonda si jehé importante o si jehé chonda tsje tomi. Janha na ixxaxaonha na jamé. Ndoa vehe ná tiempo que janha na cai vaaxaxanho na de ixin Cristo inchin xaxaon chojni nttihi ngataha nontte, pero jai janha na ixxaxaonha na jamé de ixin jehé.

¹⁷ Jamé are ná chojni ditticaon Jesucristo, chojni mé oná chojni nroaxin ixin cain cosa jianha que jehé vanchehe incheha; jai cain cosa que jehé nchehe onaroaxin cainxin.

¹⁸ Cain jihi nchehe Dios. De ixin Jesucristo Dios joinchehe para que ján na sontte na chojni jian ngattoxon con jehé, co cai coetonna na que rronhattjan na icha chojni de ixin Cristo para que jehé na cai sintte na chojni jian ngattoxon con Dios.

¹⁹ Rrocho que de ixin Jesucristo Dios joanjo oportunidad ngain chojni ngoixin mundo de que sintte na chojni jian ngattoxon con jehé. Dios ndajoinchetjahehe cain tti jianha que jehé na joinchehe na. Co jihi tti joajna que jehé coetonna na para rronhattjan na icha chojni.

²⁰ Mexinxin janha na tti joiquinha na joajné Jesucristo nganji ra. Dios jincheconda na janha na para que de janha na jehé jinichja nganji ra. Mexinxin de ixin nombré Jesucristo, janha na nttatsanha ñao ra que ditticaon ra jehé para que jaha ra sintte ra chojni jian ngattoxon con Dios.

²¹ Jesucristo ni ná cosa jianha joincheha; pero por ixin ján na Dios rroanha jehé ngataha nontte para joiguenxin nttihi vetan tangui inchin chojni que nchehe tsje cosa jianha, para que ján na are odotticaon na Cristo, Dios ndacho ixin ján na jian na inchin jehé jianxin.

6

¹ Mexinxin ixin janha na compañeroa ra de ngain xé Dios, nttatsanha ñao ra que nchegonda ra cain tti jian que Dios danjo nganji ra.

² Ixin jehé dindacho ngain tti libro que jitaxin Palabré jehé:

Ngain ná tiempo que jian para ixin jaha ra, janha coian tti jaha ra tedanchia ra; janha tsjengujna jaha ra ngain tti tiempo que janha sanjo iná vida naroaxin ngain chojni que ditticaon na.

Co jai jehe mero tti tiempo jian para ixin jaha ra co jai jehe mero tti tiempo que Dios danjo vida naroaxin.

³ Janha na rinaoha na sinttaha na ni ná cosa que chojni ndačo ixin jianha, para que xonhi chojni rronchja jianha de ixin xa que janha na tenttaha na.

⁴ Sino que janha na rinaho na sinttaha na joxon jian para que cain chojni sicon na que janha na ndoa ninchehe xé Dios ixin janha na anto chonda na paciencia are anto detan na tangui co are chondaha na tti dondana na co are icha chojni feo nchehe na nganji na,

⁵ ixin goen na na co coiaxinna na na. Co cai chonda na paciencia are chojni ningaonna na co vacoyaotte na na. Co janha na anto soji jointtaha na xa co vehe ttie que ni vaguintečhinha na co vehe tiempo que vaguenhe na jintta.

⁶ Cain mé ttixinna na para que chojni dicon na que janha na ndoa ninchehe xa na de Dios. Mexinxin janha na jian chojni na ngain vidana na, chonxin na tti ndoa, chonda na paciencia, nttaha na jian ngain chojni, co Espiritu Santo jí nganji na, co janha na ján ndoa rinaho na cain chojni,

⁷ ndačhjan na tti joajna ndoa que joixin de ngain Dios co joachaxin Dios jí nganji na. Co janha na nttagonda na cosa jian que chjana na Dios, mé inchin ná morona para ttetoquianxin na tti jianha, co cosa jian mé cai inchin ná escudo que janha na čhinha na para cayacoanxin na tti jianha.

⁸ Jí rato que chojni nchesayana na co jí rato que chojni feo nichja na nganji na. Jí rato que chojni nichja jian de ixin janha na, co jí rato que jehe na nichja na jianha de ixin janha na. Jí nchanho chojni ndačo na que ixin janha na jaha chojni que nichja tti ndoa, co jí nchanho ndačo na que ixin janha na tti chojni que nichja na tti ndoa.

⁹ Jí nchanho nchehe na nganji na inchin chojni que jehe na chonxinha na, co jí nchanho nchehe na nganji na inchin chojni que jehe na anto jian chonxin na. Co jí nchanho que janha na anto tangui tonna na que hasta merocoa nasenxon na, pero masqui jamé janha na xa techon na. Janha na tangui conna na ngain chojni pero nadoenxinhao na na.

¹⁰ Masqui jí rato que janha na dinttechinhi na, pero cainxin nchanho janha na chahna na ngain xé Jesucristo. Co masqui janha na xonhi tomi chonda na, pero tti joajna que janha na ndattjan na icha chojni, mé tti icha rentte para ngain almé na. Co masqui xonhi cosa anto rentte chonda na nttihí ngataha nontte, pero janha na chonda na tti icha rentte que joixin de ngain Dios.

¹¹ Jaha ra de ngain ciudad de Corinto, ndattjo ra cainxin tti janha na tonona na, ixin janha na anto rinaho na cainxin jaha ra.

¹² Janha na ixonhi cosa jichjian ngain ansenna na que rrondattjo ra; jaha ra tti xa techonda ra tsje tti rrondachjenji ni ra.

¹³ Janha rrinttatsanha ñao ra inchin ná ndodaha que nchetsenhe ndo ñao xenhe ndo, rinao ni ra conixin ansean ra inchin janha rinaho jaha ra.

Ján na tti ningoe Dios que jichon

¹⁴ Chondaha ra confianza ngain chojni que ditticaonha Jesucristo, ni nchechjianha ra nčhičhiha ra o xixiha ra chojni mé ixin si jaha ra tsato ra chojni mé, jaha ra tsonha ra inchin ná yunta que dinttjianha ningue nataonxin. Ixin cosa jian čhoha sehe ngain cosa jianha. Co joadingasán čhoha sehe compañeroe tti naxin xehe.

¹⁵ Ixin Satanás čhoha sinchehe inchin rinao Cristo, ni Cristo čhoha sinchehe inchin rinao Satanás. Co cai ná chojni que ditticaon Cristo čhoha sinchehe inchin rinao ná chojni que ditticaonha Cristo.

¹⁶ Cai, ningoe Dios conixin ídolo teha de acuerdo. Co jaha ra mero tti ningoe Dios que jichon, inchin ndačo Dios:

Janha sarihi ngaxinhi ansén na co tti sacji na, nttiha sacjinha na;

janha tti sarihi Dios de jehe na,

co jehe na nisoan chojnina.

¹⁷ Mexinxin cai ndačo Dios:

Dačhjeyexin ra de ngayehe jehe na, co dačhjenda ra;

dintteha ra compañeroe jehe chojni jianha.

Para que janha nchao sayaha jaha ra

¹⁸ co janha sarihi ná Ndodaha para ixin jaha ra,

co jaha ra soan ra xanhna,

jańá čo Dios que chonda cainxin joachaxin.

7

¹Jañá hermanos, cain yá tti ndačo Dios sinchehe nganji na. Mexinxin ján na cain tiempo tsjiho na cuidado de sonttoha na cosa que nchejianha cuerpoe ni co tti nchejianha espiritue ní. Co ixin ján na xaon na ngain Dios, mexinxin ján na sonttoho na joxon jian para que sontte na chojni jian para ixin jehe.

Quexén coentoxinhi chojni Corinto vidé na

²Nttatsanha na ñao ra, rinao ni ra de ngain ansean ra ixin janha na xonhi cosa jianha jointtaha na nganji ra ni ná ra, ni jointtagačoeha na ni ná jaha ra, co ni jointtayaha ra ni ná ra.

³Janha rrindačhjan cain jihi pero jeha para rrinttasattaha ra ixin janha ondattjo ra que janha anto rinaho cain jaha ra de ngain ansenna para que masqui ndasenne na o xa sonttechon na pero sontte na inchin nacoa chojni ngattoxon con Dios.

⁴Janha anto chonda confianza nganji ra, co anto chahna nganji ra. Masqui tsje cosa tangui tonna na pero are janha xaxanho jaha ra, janha anto chahna co xaonha na ngain tti tangui que tonna na.

⁵Desde que joaso na ngain regioen Macedonia, janha na vintteha na contento ixin anto tsje cosa tangui conna na co tsje chojni coetoquinha na, co anto cóa na joachjaon de ixin quexén sinttaha na sigue xa que janha na chonda na.

⁶Pero Dios tti ncheanimá cain chojni que techín, jehe mé tti joincheanimá janha na are joihi Tito nganji na.

⁷Co jeoha ixin Tito joihi nganji na, cai ixin jaha ra anto dincheanimá ra jehe. Co jehe ndachjenji na que jaha ra anto rinao ra sicon ni ra janha na, co coequinna na ixin jaha ra anto techinhi ra de ixin tti jaha ra vitticaonha ni ra janha na, co cai ixin jaha ra anto rinao ra tsjenguijna ni ra janha. Are janha coian cain jihi, janha anto icha chahna.

⁸Masqui vinttechinhi ra are tsjehe ra tti cartana que janha orroanha ra, janha taha joachjaon de ixin tti janha cjin na ngain carta mé. Ndoa, janha cóa joachjaon are saho de ixin tti ndattjo ra ngain carta mé,

⁹pero jai janha chahna. Pero jeha chahna ixin jaha ra vinttechinhi ra, sino que de ixin tti jaha ra vinttechinhi ra, mé tti coentoxinhi vidá ra. Jaha ra coixinha ra ngain joachjaon mé inchin joinao Dios, mexinxin tti janha na cjin na nganji ra jehe jian co nahi jianha.

¹⁰Ixin are Dios nchehe ná cosa para que ján na donttechín na, jehe jamé nchehe nganji na para que ján na ttentoxinhi na vidá na, co mé rrotho tsjenguijna na para que ján na rrochonda na iná vida naroaxin, mexinxin ján na chondaha na que tsá na joachjaon are donttechín na. Pero tti dinttechinxin tti chojni que ditticaonha Cristo, mé tti sadicao na ngain inferno.

¹¹Jaha ra coixinha ra are vinttechinhi ra co mé joinchehe ra inchin Dios rinao, co jai cain mé jian para ixin jaha ra. Jehe mé tti jointtaxaxaon ra jian de ixin quehe ndattjo ra ngain cartana, co jehe mé tti jointtaxaxaon ra que jaha ra ján vaguittoaxin ra para vehe chojni jianha ngayaha ra. Co jehe mé tti jointtaxaxaon ra para coñao ra ngain tti joinchehe jianha ngayaha ra, co cai para xaon ra que ixin Dios rrojinttastigá ra. Cottimeja anto joinao ra sicon ni ra janha. Co jehe tti vinttechinhi ra, mé tti jointtaxaxaon ra para joinchecastigá ra tti chojni que joinchehe jianha mé. Co ngain cain jihi jaha ra cjoago ra que jaha ra xonhi culpa chonda ra de ngain cosa jianha mé.

¹²Mexinxin are janha cjinha ra saho carta, jeha ixin janha anto xaxanho de ixin tti chojni que joinchehe jianha ni de ngain tti chojni que conhe jianha mé. Janha xaxanho cjin na carta mé para que jaha ra conoha ra ngattoxon con Dios que jaha ra ndoa anto rinao ra tsjenguijna ni ra janha na.

¹³Mexinxin janha na anto čhjoin conohe ansenna na.

Co icha chahna na are janha na vicon na que Tito jehe anto jiché ixin jaha ra dicjenguijna ra para que jehe conohe čhjoin ngain ansén.

¹⁴Janha vittona jian de ixin tti ndattjan Tito icha saho que jehe joihi nganji ra. Janha ndattjan jehe ixin janha anto chahna de ixin jaha ra. Co inchin cain tti janha na ndattjo ra cjoí ndoa, jamé cjoí ndoa cain tti ndattjan na Tito, que ixin janha na anto chahna na de ixin jaha ra.

¹⁵Co Tito jehe icha rinao jaha ra are jehe xaxaon que cain jaha ra joinchehe ra tti jehe coetonha ra, co ixin jaha ra vayehe ra jehe conixin respeto.

¹⁶Co janha chahna ixin chonda cain confianza nganji ra.

8

Pablo rinao que chojni Corinto tsjenguijna na chojni noa que ditticaon Jesucristo

¹ Hermanos, jai rrondattjo ra que Dios joinchenchaon cain chojni que ditticaon Jesucristo de ngain cain nihngo que te ngain regioen Macedonia.

² Masqui anto tsje cosa tangui conhe na para que Dios vicon aco ndoa ditticaon na Jesucristo, jehe na ché na. Co masqui jehe na anto noa na, pero jehe na vintteganjo na tsje tomi inchin chojni rico.

³ Janha ná testigo na de ixin mé, ixin vicon na ndoa joanjo na tsje tomi co hasta icha que tti nchao rroganjo na.

⁴ Jehe na anto joinchetsena na na ñaho na ixin rroganjo na joachaxin para que jehe na ꝥa rrojenguijna na chojni noa que ditticaon Jesucristo.

⁵ Jehe na joinchehe na icha que tti janha na joiꝥaxanho na ixin saho jehe na mismo ꝥanjo na ngá rá Jesús para joinchehe na inchin rinao jehe. Cottimeja jehe na ꝥanjo na para vitticaon na tti ndattjan na na. Jamé joinchehe na inchin rinao Dios.

⁶ Mexinxin janha na jointatsán na ñao Tito que jehe jian sinchejexin tti ꝥa que jehe coexinhi ngayaha ra de joatsetaonhe tti tomi que jaha ra joanjo ra, para ixin tti chojni noa que ditticaon Jesucristo.

⁷ Jaha ra nchehe ra jian cainxin cosa; jaha ra anto jian ditticaon ra Cristo, jaha ra anto nchao nchecoehne ra icha chojni Palabré Dios, anto jian ttinxin ra de ixin Dios, anto rinao ra Jesucristo, co anto rinao ni ra janha na. Mexinxin jaha ra cai nchao sinchehe ra ꝥa jiji jian de tsjenguijna ra icha chojni noa conixin tomi.

⁸ Janha rrindattjo ra jiji, pero jeha rritetonha ra que sinchehe ra afuerza, jeha ixin rinaho que jaha ra rrochonxin ra quexén ꝥaxaon chojni ngain Macedonia ixin jehe na rinao na tsjenguijna na icha chojni. Mexinxin janha rrindattjo jaha ra cai para siconxin ni aco ndoa rinao ra tsjenguijna ra icha chojni cai.

⁹ Jaha ra ochonxin ra tti jian que joinchehe Jesucristo, tti chonda cain joachaxin para ixin ján na. Jehe anto rico de ngain joachaxin que jehe chonda, pero ixin jehe anto rinao na ján na, mexinxin jehe joinchegondaha joachaxin mé, inchin jehe rrocji anto noa de joachaxin. Mexinxin vittoexin jehe ndavenxin nganito cruz para que ján na nchao rrochonda na cain tti jian que ttixin de ngain Dios.

¹⁰ Janha rinaho jian para ixin jaha ra, mexinxin janha rrondattjo ra tti janha ꝥaxanho de ixin cosa jiji. Jaha ra tti saho grupo que coexinhi ra joatsetaonhe chó ra tomi ngain nano vatto. Jaha ra joinchehe ra jamé pero jeha ixin coetonha ra iná chojni, sino que ixin jaha ra ján joinao ra joinchehe ra jamé.

¹¹ Co jai janha rinaho que nchehe ra sigue jañá, inchin ꝥhjoin coexinhi ra, jamé hasta tsjexin para tsjenguijna ra chojni mé conixin tti jaha ra nchao sanjo ra.

¹² Ixin si ná chojni ndoa rinao sanjo, Dios ján sayé; Dios ꝥhoha sanchia icha tsje de tti jehe ni chonda ni.

¹³ Rinaho que jaha ra tsjenguijna ra chojni noa, pero jeha sanjo ra cain tti jaha ra chonda ra.

¹⁴ Tti janha rinaho que cain ra rrochonda ra nataonxin. Jai jaha ra tsjenguijna ra jehe na ixin jehe na chondaha na co jaha ra chonda ra. Co después jehe na nchao tsjenguijna ra na jaha ra ixin puede jehe na orrochonda na co jaha ra irrochondaha ra. Co jañá cain ra rrochonda ra nataonxin.

¹⁵ Inchin jitaxin ngain Palabré Dios: “Tti vechonda anto tsje, ꝥonhi xehe; co tti tsjeha vechonda ꝥonhi vitjañehe.”

Tito co nicompañeroe

¹⁶ Pero janha chjaha gracias ngain Dios ixin jehe joincheꝥaxaon Tito para tsjenguijna ra ꝥajeho inchin janha ꝥaxanho tsjenguijna ra.

¹⁷ Ixin jehe vittoexin tti janha coetoan que jehe siji sitsjaha ra, co jai jehe tti anto rinao para siji sitsjaha ra.

¹⁸ Jai siji Tito conixin iná nihermanoa na que janha na rrorroanha na. Nihermano mé anto jian ditticaon ngain Jesucristo, co chojni que ditticaon Jesucristo nichja na jian de ixin jehe ixin jehe jian nichja ngain na tti joajna que danjo iná vida naroaxin.

¹⁹ Co jeoha de ixin cayoi cosa mé, sino que chojni que ditticaon Jesucristo coinchiehe na jehe para tsjinha na de compañero ngain viajena na para tsjinha na tti tomi que janha na joatsetaon na para tsjenguijnaxin na chojni noa. Co jiji sinttaha na para tsosayeha Jesucristo co para que tsjago na que jaha ra anto rinao ra chojni.

²⁰ Jañá sinttaha na ixin rinaoha na que chojni rronichja na feo de ixin janha na de ixin tti tomi que janha na tedatsetaon na jai.

²¹ Janha na tenttaha na jiji pero inchin jiquininxin, co jeoha de ngattoxon con Dios, sino que cai de ngattoxon con chojni.

²² Co ngain cayoixin jehe na janha na rrorroanha na iná nihermano. Co janha na vicon na tsje nttiha na xajeho xa para tettjenguijna na jaha ra. O si sanchianguiha ra na de ixin confianza nganji ra.

²³ Jaha ra xo ditticaon ra Jesucristo ngain Corinto, si çhonja chojni sanchianguiha ra de quensen jehe Tito, jaha ra ndache ra na que mé xicompañerona janha, que janha co jehe tenttaha na xajeho xa para tettjenguijna na jaha ra. O si sanchianguiha ra na de ixin quensen tti yó compañeroe Tito, jaha ra ndache ra na que chojni que ditticaon Jesucristo nttihi rroanha na cayoi nihermano mé ixin cayoi jehe na nchesayehe na Jesucristo.

²⁴ Mexinxin, para que icha chojni que ditticaon Jesucristo rrochonxin na de ixin quehe chojni jaha ra, jaha ra rinao ra canio chojni mé. Jamé para que icha chojni que ditticaon Jesucristo tsonohe na que janha na chonda na razón para chonda na confianza nganji ra.

9

Tti tomi que joatsetaonhe na para tsjenguijnaxin na chojni noa

¹ Janha ichondaha que rrondattjo ra de ixin tti tomi que tedatsetaonhe chó ra para tsjenguijnaxin ra chojni noa que ditticaon Jesucristo,

² ixin janha ochonxin que jaha ra anto rinao ra sinchehe ra jamé. Janha chahna cainxin nttiha que janha ndaçhjan ngain cain chojni que te ngain regioen Macedonia de ixin jaha ra xo te ra ngain regioen Acaya. Ixin jaha ra anto rinao ra para tettjenguijna ra chojni noa desde ngain nano vatto. Co conohe chojni que ditticaon Jesucristo ngain regioen Macedonia ixin jaha ra jañá tettjenguijna ra chojni, mexinxin cai merocoa cain jehe na goan na animado de tettjenguijna na chojni noa.

³ Pero masqui jamé, janha rrorroanha ra nihermano tehe para que siconhe ndoa tti janha ndaçhjan de ixin jaha ra de ngain asunto jiji. Rroçho que ndoa jaha ra ochonda ra tti tomi que joatsetaonhe chó ra inchin janha ndaçhjan,

⁴ ixin nchaoha si çhonja chojni de Macedonia sasoquinha janha co jehe sicon ixin jaha ra xa digatsetaonhe chó ra tomi. Co jamé janha na anto tsosoahna na después de que janha na anto chonda na confianza nganji ra ixin jaha ra ochonda ra tomi mé. Co si jamé tsonhe, seguro que jaha ra icha tsosoaha ra que janha na.

⁵ Mexinxin janha xaxanho que icha jian jian saho rrorroanha ra nihermano tehe para que jehe na siji na sitsjaha ra na saho. Co jehe na tsjenguijna ra na para satsetaonhe ra tomi mé para que jaicoa sinchexette ra tti tomi que jaha ra ondaçho ra are icha saho. Co jamé tti tomi que jaha ra sanjo ra osehe listo. Jamé jaha ra tsjago ra que anto rinao ra para sanjo ra tomi mé, co jeha ixin janha na tentapurado ra ixin sanjo ra tomi mé.

⁶ xaxaon jaha ra palabra tehe: Tti tsjeha ttenga, cai tsjeha cosecha tsín; co tti ttenga tsje, cai tsje cosecha datsín.

⁷ Cada ra danjo ra inchin tti oçaxaon ra de ngain ansean ra ixin xonhi xé si jaha ra sanjo ra co hasta tenttaniha ra. O ni jeha afuerza para sanjo ra, ixin tti chojni que danjo co ncheniha, Dios rinao chojni mé.

⁸ Dios nchao rrochjá ra cainxin tti jian que ttixin ngain jehe para que jamé cainxin tiempo rrochonda ra cain cosa que icha donda de ngain vidá ra, co rrochonda ra para que sinchexin ra cain cosa jian.

⁹ Ngain tti jitaxin Palabrè ndaçho janhi:

Dios joanjo anto tsje ngain chojni noa,

co tti jian que jehe joinchehe, mé sittohe para cainxin tiempo.

¹⁰ Dios danjo semilla para que dinga ngataon jngui, co Dios chjá na tti jontte na. Co jehe tsjenguijna ra para sinchehe ra jian co jehe sinchençaon tti jian mé para que jaha ra nchao sinchehe ra icha tsje jian.

¹¹ Jamé jaha ra rrochonda ra tsje cosa para que jaha ra nchao sanjo ra tsje. Co chojni nttiha que ditticaon Jesucristo sanjo na gracias ngain Dios de ixin tti tomi tsjinha na janha na que jaha ra rrorroanha ra.

¹² Ixin are janha na rrochjaha na chojni que ditticaon Jesucristo tomi jiji, jeoha rrochjaha na na tti jehe na rrogondehe na, sino que cai sinttaha na para que jehe na anto sanjo na gracias ngain Dios.

¹³ Jehe na sinchesayehe na Dios ixin tti tomi que jaha ra tsjenguijnaxin ra na jiji rroçaxaonxin jehe na que jaha ra anto ditticaon ra tti jian joajné Jesucristo. Cai jehe na sinchesayehe na Dios de ixin tti tsje tomi que jaha ra sanjo ra para ixin jehe na co para ixin icha chojni que ditticaon Jesucristo.

¹⁴ Co jehe na sinchetsenhe na ñao Dios para ixin jaha ra, co jehe na icha sinao na jaha ra ixin Dios anto jian joinchehe ngain jehe na pero de ixin jaha ra.

¹⁵ Janha chjaha gracias ngain Dios ixin jehe rroanha Xenhe nntihi, co mé anto jian para ixin ján na que hasta ni čhoha rrondačo na quexén jehe mé anto jian!

10

Tti joachaxin que chonda Pablo de representanté Jesucristo

¹ Janha Pablo na, rrinttatsanha ñao jaha ra jian inchin Jesucristo rrojinttatsanha ñao ra. Canxion jaha ra ndačo ra que are janha rrihi nganji ra sojiha palabrana, pero ngain cartana que janha rroanha ra canxion ra ndačo ra que ixin anto soji palabrana.

² Mexinxin are janha sasotsjaha ra, rrinttatsanha ñao ra que xonhi ra ndachjenji ni ra ixin janha rrinttaha inchin tenchehe chojni que ditticaonha Jesucristo, ixin janha rrocjan na sinttasattaha ra soji čhonja ra xo rrondačo ra jamé.

³ Já n doa que janha na chojni na, pero janha na ixonhi tiempo nttaluchá na inchin ncheluchá tti chojni que ditticaonha Jesucristo.

⁴ Ixin tti janha na tjayaxin na jeha inchin tti tjayaxin chojni nntihi ngataha nontte, ixin janha na nntagonda na joachaxin Dios para nttaxanttexin na cain joachaxin espíritu jianha que te ngain mundo jiji.

⁵ Jamé nttaxantte na cain tti jianha que nichja chojni de ixin Dios, co cain icha cosa jianha que cayacoen chojni para sitticaon na Dios. Co danjo na ngain Cristo cain tti xaxanho na para que Cristo tsetonha ngain cainxin tti janha na xaxanho na.

⁶ Co are ocainxin jaha ra de ngain Corinto ositticaon ra jian, cottimeja si te chojni ngayaha ra que xa rinaoha na sitticaon na, janha na seguro sitttaccastigá na chojni mé conixin joachaxin Dios.

⁷ Jaha ra jeha xaxaon ra tti dicon ra de ngain chojni, co xaxaonha ra de quehe jí ngain ansén chojni mé. Si čhonja ra xaxaon ra que seguro ditticaon ra Jesucristo, chonda ra que xaxaon ra que janha na cai seguro ditticanho na Jesucristo.

⁸ Masqui janha nichja icha tsje de tti jiquinxin rronichja de ixin joachaxin que chonda na, pero janha chondaha que tsosoahna ixin Jesucristo chjana na joachaxin jiji para que janha na sinttasoji na jaha ra de ngain tti ditticaon ra co jeha para que janha na sinttaxantte na tti jaha ra ditticaon ra.

⁹ Janha rinaoha que čhonja ra rroxaxaon ra que janha jeha rinaho sinttaxaon ra de ixin tti ndattjo ra ngain cartana.

¹⁰ Ttoha de jaha ra ndačo ra que ixin janha atto soji palabrana ngain cartana, pero are janha dasotsjaha ra co nichja janha mismo nganji ra, jaha ra ndačo ra que janha inchin tti chojni que xonhi nohe co xonhi xé tti janha ndačhan.

¹¹ Pero tti chojni que ndačo cain jiji chonda que rroxaxaon cai que inchin janha na nichja na ngain cartana na, jamé sinttaha na cai are janha na saso na para sasotsjaha ra.

¹² Janha na xonhi tiempo nttaha na inchin nchehe tti chojni que nichja jian de ixin jeha. Chojni mé xonhi xé tti nchehe na ngattoxon con Dios ixin en lugar de sinchehe na inchin rinao Dios, jehe na nchehe na inchin nchehe icha chojni, cottimeja jehe na ndačo na ixin jehe na jian na jeha ixin nchehe na inchin nchehe icha chojni.

¹³ Janha na rinaoha na que chojni rrochondana na anto tsje respeto que ijiqinxinha na. Dios nohe quehe xa tenttaha na janha na, co jehe tti chjana na joachaxin para que janha na joaso na Corinto para joasondattjo ra jaha ra tti jian joajné Jesucristo.

¹⁴ Janha na tti saho chojni que joasondattjo ra tti jian joajné Jesucristo. Mexinxin janha na jeha ojé xa tenttaha na; janha na tenttaha na tti xa que vitonna na.

¹⁵ Tti xa que iná chojni jinchehe ngayaha ra o ngayé icha chojni de ixin Jesucristo, janha na ndačhanha na que xa mé janha na jointtaha na. Janha na jeha rinaho na que jaha ra sitticaon ra icha co icha de ixin Jesucristo, co jamé janha na icha nchao sinttacoanha ra de ixin Jesucristo, pero cain tiempo janha na rrondattjo ra jeha inchin coetonna na Dios.

¹⁶ Cottimeja janha na nchao satsji na ngain icha tsje parte que te icha cjin de Corinto para rrondattjan na chojni nntiha tti jian joajné Jesucristo. Pero janha na tsji na jeha ngain tti rajna que xa xonhi chojni tenchehe xa de ixin Jesucristo, para que xonhi chojni rrondačo que ixin xa que odinchehe iná chojni, mé sittonanxin na jian janha na.

¹⁷ Jamé si čhonja chojni rinao tsonohe orgulloso, tonoho orgulloso pero de ngain Dios.

¹⁸ Ixin tti chojni que nichja jian de ixin jeha mismo, chojni mé dačhjeha jian ngattoxon con Dios, sino que tti chojni que Jesucristo nichja ixin ján jian.

11

Pablo nichja de ixin chojni que ndačo ixin jehe na representanté na Jesucristo, pero ndoaha

¹ Rinaho que jaha ra tsixinha ra are janha ndachjan nchion cosa de ixin tti jian de janho mismo. Puede xonhi xé que janha ndachjan jamé, pero nttatsanha ñao ra ttixinha ra rroundatto ra tti janha tonona ngain ansenna.

² Ixin janha anto chjio na de ixin jaha ra, xajeho inchin Dios anto chjio de ixin jaha ra. Ixin janha ondachjan que sanjo jaha ra ngain Jesucristo joxon jian ra co sinao ra jehojehé, inchin ná xannché que ttenchjinha cuerpoe para hasta ngain xixihi xan que secas xan.

³ Pero janha xaoon na que puede chonja chojni jianha tsí nganji ra para sinttayaha ra sinchehe ra ojé co ndarrotojañaha ra de ixin Jesucristo, inchin joinchehe Eva are conché joinchehe va jehé conixin palabra chjoin are jehé ngain huerta de Edén.

⁴ Ixin jaha ra anto daca ditticaonxin ra tti chojni que diji dindattjo ra anto ojé de ixin Jesucristo co jeha inchin tti janha na ndattjo ra. Co de ngain ansean ra anto rinao ra dayehe ra ojé espíritu que Espíritu Santo que jaha ra ovayehe ra, co anto daca ditticaonxin ra ojé joajna que tti jian joajné Jesucristo que janha na ondattjo ra.

⁵ Pero janha xaxaon que tti chojni que tenttayaha ra chondaha icha tsje joachaxin que janha ngattoxon con Dios.

⁶ Masqui jaha ra xaxaon ra que tti forma que janha nichja anto xaja, pero janha nona jian ngain Palabré Dios. Co jiji cjoago janha na nganji ra de ngain tti janha na jointtaha na cain tiempo.

⁷ ¿Oni xaxaon ra que janha jointtaha jianha are joasondattjo ra tti jian joajné Jesucristo co xonhi cobro jointtaha ra? Janha jamé jointtaha para joarihi icha importanteha ngattoxon con jaha ra para que jaha ra ditticaon ra Jesucristo co jamé te ra icha importante ngattoxon con Dios.

⁸ Janha joanchiá icha chojni que ditticaon Jesucristo tomi co ján vittoexin na chjana na, co tomi mé gondana are janha joasondattjo ra de ixin Cristo.

⁹ Co are janha joarihi nganji ra co are ndavacjena tomi co vaguenhe na jintta, janha xonhi tiempo ndattjo ni ná jaha ra que rrochjana ra tomi o ni tti rrojine. Canxion chojni que ditticaon Jesucristo ngain nonttehe Macedonia joi na nganji na co nimé ni chjana na tomi para gondana. Co jamé janha cjoinha cuidado de xonhi molestia chjaha jaha ra. Co jamé xa sinttaha para que xonhi tiempo rrochjaha ra molestia.

¹⁰ Inchin jaxon janha chonda seguro que ndoa chonxin tti ndoa de ixin Jesucristo, jamé nona que xonhi chojni de ngoixin regioen Acaya santsjena tti chjoin que tonohé ansenna ixin xonhi tomia ra dayá janha.

¹¹ Janha ndachjan jañá nganji ra, pero xaxaonha ra que ixin janha rinaoha ra; Dios nohe que janha anto rinaho jaha ra.

¹² Pero janha xa sinttaha sigue ngain tti rrinttaha para xonhi oportunidad rrochjaha tti chojni que tenttayaha ra, ixin chojni mé rinao na que jaha ra rrondacho ra ixin chonda na xajeho xa que janha na.

¹³ Ixin chojni mé ndoaha ixin jehé na representanté Jesucristo na. Jehé na nichja na ixin jehé na representanté Jesucristo na, pero para ncheguitticaon na tsje chojni tti jeha ndoa de ixin Jesucristo.

¹⁴ Co jiji jeha ná cosa que chojni soan na admirado ixin Satanás mismo cjamanga inchin ná ángel de Dios que ttí conixin joadingasán.

¹⁵ Co mexinxin tanguiha para que tti chojni que nchehe tti rinao Satanás cjan na chojni que nchehe jian. Pero cain chojni mé Dios sinchecastigá na de ixin cain cosa jianha que nchehe na.

Tti anto tangui que conhe Pablo ixin jehé ná representanté Jesucristo

¹⁶ Janha rrocran na rroundatto ra iná que xaxaonha ra que ixin janha ndadinttatján joarrixaonna, pero si jaha ra xaxaon ra jamé, tanchjanda ni ra que janha rronichja nganji ra masqui inchin tti chojni que ndadinchetján joarrixaoen para que janha cai tsonona nchion orgulloso inchin tonohé tti chojni que nichja ixin jehé ná representanté Jesucristo pero jeha ndoa.

¹⁷ Tti janha rrindachjan jiji jeha Dios coetonna, sino que janha rrindachjan inchin ná chojni que ndadinchetján joarrixaoen, jehé para que janha tsonona orgulloso.

¹⁸ Ixin jí anto tsje chojni que tonohé orgulloso jehé de ixin cain cosa que jí ngataha nontte, jamé janha cai tsonona orgulloso.

¹⁹ Jaha ra ndacho ra que ixin anto noha ra tsje cosa mexinxin jaha ra ttixinha ra ttinhi ra tti ndacho chojni que ndadinchetján joarrixaoen.

²⁰ Co jaha ra ttixinha ra ngain tti chojni que nttayaha ra masqui jehé na ndattjo ra na co nttantaha ra na que sinchehe ra inchin jehé na rinao na, masqui jehé na dantsjacoa ra na cosá ra, masqui jehé na rinaoha na jaha ra, co masqui jehé na xanguí na canxion rá na ngá con ra.

²¹ Masqui janha na cai nchao sinttaha na inchin chojni mé pero janha na xonhi tiempo jointtaha na ni sinttaha na.

Pero si cain chojni mé coesoeha na de nichja na jian de ixin jeho na, mexinxin cai janha tsooanaha de rronichja jian de ixin janho, masqui ndacho ra que janha nichja inchin tti ndadinchetján joarrixaoen.

²² Chojni mé ndacho na ixin jehe na hebreo na, pero janha cai hebreo na. Co jehe na ndacho na ixin nacioen na Israel, pero janha cai nttiha nacionna. Co jehe na ndacho na ixin Abraham tti ndogelitoe jehe na xanchjen, pero janha cai mé tti ndogelitona xanchjen.

²³ Co jehe na ndacho na ixin nchehe na xé Jesucristo, pero seguro que janha icha tsje xé Jesucristo rrinttaha que jehe na, masqui jaxon janha rrinichja inchin tti dinchetján joarrixaoen ixin janha rrinichja jian de ixin janho. Pero ján, ndoa que janha tti icha tsje xé Jesucristo rrinttaha que jehe na, co janha tti icha vicaon na que jehe na, co janha tti icha tsje nttiha viaxinna ngain cárcel, co tsje nttiha janha joarichonda peligro de narroguenxon na.

²⁴ Co chojni judío naho nttiha chjana na tti castigo de vicaon na janha conixin tti treinta y nueve cuarta.

²⁵ Co ní nttiha coaxin na na nttá, co ná nttiha coaxin na na xo. Co ní nttiha cononttengui barco jinda tti barco que janha cjoinha, co ná de tti ní nttiha mé vittona janha ngataonhe ndachaon ná tie co ná nchanho.

²⁶ Janha anto jointtavaijá, co tsje peligro vetan janha de ngain tsje río, de ngain tti chehe, peligro de ngacjén chojni de ngain nacionna janha, de ngacjén chojni que jeha nacionna. Vetan peligro ngain ciudad, ngagaha jna, ngataon ndachaon, co vetan peligro ngacjén tti chojni que ndacho ixin jehe na ditticaon na Jesucristo co ndoa.

²⁷ Janha soji xa jointtaha hasta anto conchjen na, co tsje tti janha joarichinha, tsje nttiha janha vaguenhe na jintta co jinda, tsje nttiha janha cjáño vagarihi, co tsje nttiha janha tangui conna de ixin quin co de ixin lonto ixin ndajoexin vichje cain lonttona.

²⁸ Masqui cain cosa jihi conna, pero cada nchanho janha icha xaxanho de ixin chojni que ditticaon Jesucristo ngain cain región.

²⁹ Si chonja de jehe na anto tangui tonohé na de ixin tti jian joajné Jesucristo, mé inchin rrocji janha mismo rroconona jamé, ixin janha ttiaconoá na jehe na. Co si ná chojni ncheyehe thonja de jehe na para que jehe na isitticaonha na Jesucristo, janha anto feo tonohé ansenna co toñaho ngain chojni mé.

³⁰ Si nchao tsonohé ni orgulloso, janha tsonona orgulloso de cain cosa tangui que tonna ixin de nttiha xago que janha chondaha joachaxin. Co jamé tti rinao Dios para que jehe nchao nchegonda na janha.

³¹ Dios, Ndodé Jesucristo tti jiquininxin sonttocoanxinhí na cainxin tiempo, mé tti nohe icha jian que janha ján nichja tti ndoa.

³² Are joarihi janha ngain ciudad de Damasco, xigobernador que vehe ngain tti nontte que vaquetonha rey Aretas, xigobernador mé coetonha xa que vinttenda xisoldado cain puerta de ciudad mé, ixin ngoixin ngandajin ciudad mé jindehe ttjarioho atto noi, mexinxin xisoldado vintte xa cada puerta mé para rrotse na xa janha co rroquiaxinna xa.

³³ Pero canxion chojni amigona que diquencia nchiandoha ngain ttjarioho mé de ngain ventané nchia mé joinchexincajinxin na na janha conixin jino ngá ná nttaxa para toenxin ttjarioho mé, co jamé janha nchao sacoi ngá xigobernador mé.

12

Tti vicononxinhí Pablo co tti jehe coxinxin

¹ xonhi dacha ni de nichja ni jian de ixin jeho ni mismo. Pero masqui jamé, janha chonda que rrondachjan tti coxinnanxin co tti vicononxinna que Jesucristo cjoagohna.

² Janha chonxin ná xí que ditticaon Jesucristo, que ochonda catorce nano que Dios savicao xí mé hasta tti ngain ninxin ngajni. Pero janha nonaha si xí mé sacjoi xa conixin cuerpoe xa o ani nahi; jeho Dios tti nohe.

³ Pero ján, nona que ixin xí mé sacjoi xa, jeho nonaha si sacjoi xa conixin cuerpoe xa, o ani nahi, jeho Dios tti nohe mé.

⁴ Dios sajoicaó xí mé hasta tti ngain lugar de ngajni mé, co nttiha coinhi xa tsje palabra que xonhi chojni chonxin ni xonhi chojni chonda joachaxin para rronichja na palabra mé.

⁵ Janha nchao rroconona orgulloso de ixin tti joinchehe Dios ngain xí mé ixin xí mé janha mero, pero janha tononaha orgulloso de ixin janho mismo, sino que ixin janho mismo chondaha joachaxin.

⁶ Masqui, si janha rronichja jian de ixin janho mismo, cai mé jian ixin tti janha rronichja joxon cosa que ndoa, pero janha xonhi tiempo sinttaha jamé, para que xonhi chojni rronichja jian de ixin janha icha de tti janha ni ijiquininxinha na.

⁷ Cain tti janha coxinnanxin, mé anto chjoin. Co para que janha tsononaha anto orgulloso de ixin mé, janha vayá ná cosa que inchin ná nchaha joidoho cuerpona. Co mé joixin de ngain Satanás, para nchemolestá na janha co para que janha xonhi tiempo tsonona orgulloso de ixin tti janha coxinnanxin.

⁸ Ní nttiha janha joanchiá Jesucristo que jehe rroquinttjianxin de ngain cuerpona tti anto jittín.

⁹ Pero jehe ndachjenji na: “Jaha ixonhi icha dondaha, jeho tti janha anto rinaho jaha, ixin joachaxin que janha chonda xago icha jian ngain tti chojni que sojiha de ngain cuerpoe.” Mexinxin janha chahna que ixin sojiha cuerpona, para que joachaxín Jesucristo rroxago nganji janha.

¹⁰ Mexinxin janha chahna ixin sojiha na, co ixin chojni nichja na feo nganji janha, co de ixin are xonhi tomi chonda co denhe na jintta, co de tangui que tonna ixin janha ditticanho Jesucristo. De cainxin yá janha chahna ixin si janha tonona icha tsangaha na, pero are mé janha icha soji na de ixin joachaxín Jesucristo que jehe chjana.

Pablo anto coá joachjaon por ixin chojni Corinto

¹¹ Janha jointtaha inchin ná chojni que ndadinchetján joarrixaoen ixin nichja jian de ixin janho mismo, pero janha chonda que jamé jointtaha ixin jaha ra ttjioha ra respeto nganji. Jaha ra tti jiquininxin rronichja ra jian de ixin janha. Si janha xonhi rentte na nganji ra, icha xonhi rentte tti chojni que ndacho na que jehe na representanté Jesucristo na pero jeho nttayaha ra na. Janha ndattjo ra cain jiji masqui xonhi rentte na.

¹² Ngain tti xa que janha jointtaha conixin anto paciencia ngayaha ra, nttiha vicon ra tsje señal co tsje milagro que janha jointtaha, co cain mé rrocho que janha ndoa ná representanté Jesucristo na.

¹³ Are janha joarihi ngayaha ra, cain tiempo jointtaha nganji ra xajeho inchin nttaha ngain icha chojni que ditticaon Jesucristo. Jeho nacoa cosa oje jointtaha nganji ra; janha xonhi tiempo joanchiaha ra tomia ra. ¡Si jiji ná cosa nchaoha para ixin jaha ra, nttatsanha ñao ra nchetjañana ra!

¹⁴ Co jai janha orrihi listo para sasotsjaha ra ninxin nttiha pero xonhi molestia sasochjaha ra de ixin tomi, ixin janha jeha tomi rinaho; janha rinaho jaha ra mismo. Inchin ná ndodaha, jehe ndo tti jiquininxin ttje ndo tomi para ixin xenhe ndo, co jeha chjan tti tsje tomi para ixin jehe ndo.

¹⁵ Co janha anto rinaho sinttaxian cain tomi que janha chonda co hasta janha mismo ndajittjexin na para que almá ra sintte jian. Jamé ixin janha cada nchanho icha co icha rinaho ra, masqui puede jaha ra cada nchanho icha rinaoha ni ra janha.

¹⁶ Co nona que canxon ra masqui xaxaon ra que janha xonhi tiempo ndattjo ra ixin rrocjenguijna ni ra conixin tomi, pero ndacho ra que ixin janha jimao jointtayaha ra.

¹⁷ ¿Ani xaxaon ra que janha jointtayaha ra de ngain toha de tti chojni que janha rroanha nganji ra?

¹⁸ Janha jointtatsán ñao Tito para que jehe joiji joitsjaha ra, co janha rroanha iná xí que ditticaon Jesucristo para jojjicaho jehe. ¿Ani Tito jointtayaha ra para joantsjaha ra tomia ra? ¿Anoaha ra que janha co jehe Tito nttaha na xajeho jian co cayoi na chonda na xajeho Espíritu Santo?

¹⁹ Puede jaha ra xaxaon ra que cain tti janha na tendattjo ra, mé para que rroxaxaon ra jian de ixin janha na. Pero jeha jamé ixin janha na tenichja na ngattoxon con Dios conixin joachaxin nombré Jesucristo. Co mé para tsjenguijnaxin ra de ngain espiritua ra para sinttasoji ra ngain tti ditticaon ra de ixin Jesucristo ixin janha na anto rinaho na jaha ra.

²⁰ Ixin janha xaon na que are janha sasotsjaha ra puede itencheha ra inchin janha rinaho, co jaha ra isinttaxoxianha ra tti janha rrondattjo ra. Janha xaon na que sehe pleito ngayaha ra, joachjoeha, puro tefoaohe chó ra, jaho ra tsonoha ra que icha importante ra que icha chojni, sinttaxoxianha ra tsequin ra cuentoe iná chojni que jiquininxinha, sinttaxoxianha ra xé iná chojni que jehe jinchehe, tsonoha ra jian de ixin jaho ra mismo, co xonhi respeto sehe ngayaha ra.

²¹ Janha xaon na que are janha sasotsjaha ra Dios sincheconohe ngain ansenna ná joasoaxin de ixin jaha ra, co hasta rrochonda que rrotsjanga janha de ixin cain jaha ra xo xa diquentoxinha ra vidá ra de tti jianha que tenchehe ra desde are saho, co de tti techonda ra oje nchí que jeha nchichiha ra o xo nchí ra techonda ra oje xí que jeha xixiha ra, co icha vicio que jaha ra dicangui ra.

13

Tti coetonha Pablo co tti joexinxin joajné

¹ Jihi tti ninxin nttiha que janha sasotsjaha ra. Co are mé sayehe ra castigo cain ra xo tenchehe ra cosa jianha, pero saho sintte yó o ni testigo tti rrondaço que ndoa jehe nimé vicon na que jaha ra tenchehe ra jianha.

² Ngain tti yoxin nttiha que janha joasotsjaha ra, are mé ndattjo ra que cain ra xo joinchehe ra cosa jianha que isincheha ra. Co jai que cjin rrihi de jaha ra, janha rritetonha ra cain ra xajeho iná. Co jai que sasotsjaha ra iná, si çhonja ra xa tenchehe ra jianha, janha itsiaconoaha ra.

³ Cottmeja sicon ra que ixin Cristo seguro nchegonda na janha para que jehe nichja nganji ra. Co jeha ixin Jesucristo çonhi joachaxin chonda para nganji ra, sino que jehe tjago nganji ra tti anto tsje joachaxin que jehe chonda.

⁴ Ján ndoa que jehe goan crucificado nganito cruz co ndavenhe inchin si jehe rrochondaha joachaxin, pero jai jehe jichon de ixin joachaxín Dios Ndodé jehe. Jamé janha na jai cai chondaha na joachaxin ngain cuerpona na, pero masqui jamé janha na te na inchin nacao chojni conixin jehe co techon na de ixin joachaxín Dios para nchao tsjenguijna ra jaha ra.

⁵ Jaho ra mismo çaxaon ra jian tti joinchehe ra, para sicon ra aco ndoa jian ditticaon ra Jesucristo, co mé ná prueba para ixin jaha ra. Ixin çanoaha ra que Jesucristo jí ngain ansean ra si jaha ra ndoa ditticaon ra jehe mero?

⁶ Pero janha rinaho que jaha ra tsonoha ra que janha na ján ndoa ditticanho na jehe mero.

⁷ Co janha na nttatsán na ñao Dios para que jaha ra çonhi cosa jianha sinchehe ra ngain vidá ra, pero jeha para que icha chojni rrondaço na ixin janha na anto jian jointtacoanha ra, sino para que jaha ra sintte ra jian ngain vidá ra. Co jeha importante que chojni rronichja si janha na tenttaha na inchin rinao Cristo o ani nahi.

⁸ Ixin janha na çoha rronichja na tti ndoaha, sino chonda na que rronichja na joxon tti ndoa.

⁹ Mexinxin janha na sintte na contento masqui çonhi joachaxin chonda na ixin janha na rinaho na que jaha ra tsojoji ra de ixin joachaxín Dios, co sinttaha na sigue de sinttacoanxian na Dios para que jaha ra sintte ra chojni jian.

¹⁰ Janha rricjinha ra carta jihi icha saho que janha sasotsjaha ra, para que jaha ra noha ra cain quehe sinchehe ra para que are janha saso, irrochondaha que sinttasattaha ra ni sinttastigá ra conixin joachaxin que janha chonda. Co tti joachaxin mé çjana Jesucristo para tsjenguijnaxin ra para que icha jian sitticaon ra Jesucristo co jeha para que janha sinttaxante tti jaha ra ditticaon ra.

¹¹ Co jai hermanos, rinaho que jaha ra sintte ra contento. Ttjé ra queçén nchehe ra para sintte ra chojni jian ngain vidá ra, co ditticaon ra tti consuelo que janha çjaha ra, co ditticaon chó ra cain ra co ttetocoha chó ra. Co Dios, tti danjo tti çjain que tonohé ansén ni, co jehe tti anto rinao ni, mé tti senda ra.

¹² Çjehe chó ra joajna jian naná ra.

¹³ Cain chojni que ditticaon Jesucristo nttihi, rroanha na joajna para ixin jaha ra.

¹⁴ Dayehe ra tti jian que ttixin de ngain Jesucristo, tti chonda cain joachaxin nganji na. Co noha ra ixin Dios anto rinao ra co Espíritu Santo jí nganji ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Regioen Galacia

Pablo chjé joajna chojni ngain regioen Galacia

¹ Janha Pablo na, janha ná representanté Jesucristo. Janha jeha chojni de nttihi ngataha nontte rroanha na, ni jeha chojni joincheguinhí na representante, sino que Jesucristo mismo rroanha na janha co jehé tti joincheguinhí na jañá, conixin Dios Ndadá na, tti joinchexechon Jesucristo are jehé ndavenhe.

² Janha rricjin na carta jihí conixin icha chojni que ditticaon Jesucristo, tti nite nttihi nganji na janha. Co carta jihí para nganji jaha ra xo ditticaon ra Jesucristo que te ra ngain regioen Galacia.

³ Dios Ndadá na, co Jesucristo, tti chonda cain joachaxin, sinttanchaon ra co rrochjá ra tti chjoin que tonohe ansean ra.

⁴ Jehé Jesucristo xanjo para ndavenhe para cjoenga hna cain tti jianha que ján na jointtoho na co jañá jehé vinttjianxin na de ngain cain cosa jianha que jí ngataha nontte jai, ixin jamé joinao Dios Ndadá na.

⁵ ¡Dios jehé tti jiquinixin tsosayehe para cainxin tiempo! Amén.

Ixonhi iná joajna que danjo iná vida naroa

⁶ Janha ttianxinha quedonda jaha ra anto daca ndatetjañaha ra Dios, tti nichjá na de ixin tti jian que joinchehe Cristo para ixin ján na ixin jehé Cristo anto rinao na, co jai jaha ra teditticaon ra ojé joajna que toenao ra rrochjá ra iná vida naroa.

⁷ Jehá ixin jí iná joajna que sanjo iná vida naroa. Sino que tti jitonhe jihí que canxion chojni tenttayahá ra co rinao na que jaha ra sitticaon ra ojé joajna que jeha joajné Jesucristo, tti danjo iná vida naroa.

⁸ Pero si chonja chojni rrondattjo ra iná joajna ojé de tti joajna que janha na ondattjo ra, chojni mé chonda que soan condenado, quexeho chojni que rrondattjo ra ojé joajna mé, masqui janha o ná ángel que tsixin de ngajni.

⁹ Janha ondačhjan co xa rrocjan na rrondačhjan iná: Quexeho chojni que rrondattjo ra ojé joajna de tti joajna que janha ondattjo ra, chojni mé soan condenado.

¹⁰ Janha ndačhjan cain jihí, pero jeha ixin rinaho para que chojni rronichja jian de ixin janha, sino que rinaho que Dios xaxaon jian de ixin janha. Si janha rinaho sitttona jian ngain chojni, janha isariha ná jian xinchehe xé Jesucristo.

Quexén joiguehe Pablo representanté Jesucristo

¹¹ Pero janha rinaho que jaha ra tsonoha ra que tti joajna que danjo iná vida naroa que janha rrindattjan chojni, mé joixinha de ngain tti xaxaon chojni nttihi ngataha nontte.

¹² Janha vayaha joajna jihí ni de ngain ná xí, ni xonhi chojni joinchecoanna joajna jihí, sino que Jesucristo mismo tti joinchenona joajna jihí.

¹³ Jaha ra onoha ra quehe vanttaha janha are saho, are janha varroá religioen chojni judío. Jaha ra onoha ra que janha conixin anto coraje vanttaha feo ngain cain chojni que ditticaon Jesucristo, co vajinaho que narrogoenxon cainxin na.

¹⁴ De ngain religioen chojni judío, janha tti icha vaguitaon nttiha de tsje xicompañerona que chonda xajeho nano inchin janha, ixin janha tti icha vaguitticanho cain costumbré nindogoelitona xančhjen.

¹⁵ Pero Dios ocoinchiehe na janha icha saho que rroconcjina, co ixin jehé anto rinao na, mexinxin nichjahna. Co cai are jehé jañá joinao,

¹⁶ jehé joinchegatsoan na Xenhe para que janha joindattjan tti chojni que jeha judío tti jian joajné jehé. Are jihí joiconhe, janha cjoiha joiganchianguia ni ná chojni que xén sinttaha.

¹⁷ Ni cjoiha ngain ciudad de Jerusalén para joiganchianguia cain tti vintte representanté Jesucristo icha saho que janha. Sino que janha jaicoa sacjoi para ngain regioen Arabia, co después sacjan na para Damasco.

¹⁸ Co hasta vattoja ní nano janha cjoí ngain ciudad de Jerusalén. Nttiha joatsoanxin Pedro, co joarihi yó semana ngain jehé.

¹⁹ Pero viconha icha representanté Jesucristo, sino que jehó Jacobo, xanchó jehé Jesús.

²⁰ Janha nttaseguraha ra jihí ngattoxon con Dios, que tti rrindattjo ra jihí, ján ndoa.

²¹ Después de cain jihí janha sacjoi para ngain regioen Siria co regioen Cilicia.

²² Are mé cain chojni que ditticaon Jesucristo, tti nite ngain regioen Judea xa vechonxinha na na janha mismo.

²³ Jeho vaquinhi na vanichja chojni janhi: “Tti xí que feo vanchehe are saho ngain chojni Jesucristo, jái jehe xí mé tti rridendache chojni xajeho tti joajna que are saho joinao xa rrojinchexantte xa.”

²⁴ Co chojni mé joinchesayehe na Dios ixin jehe coentoxinhi vidana janha.

2

Are icha representanté Jesucristo vitticaon que Pablo cai ná representanté Jesucristo

¹ Vatto catorce nano, cottimeja janha cjoí Jerusalén iná conixin Bernabé co cjoinha na Tito cai.

² Janha cjoí nttiha iná ixin Dios ndachjenji na que janha chonda que tsji nttiha iná. Nttiha ngain Jerusalén are xatte cain ninchecoene cain chojni que ditticaon Jesucristo, janha ndattjan na de ixin tti joajna que danjo iná vida naroa que janha rrinttanoa icha chojni que jeha judío. Janha jointtaha jhi ixin rinaoha que cain xé Jesucristo que ojointtaha co rrinttaha, xonhi tsorentte xa mé.

³ Nttiha vehe Tito nganji na janha, co masqui coaha xohe que dinhi circuncisión ixin jehe judío, ndacheha na que ixin jehe chonda que rroca xohe mé.

⁴ Ján ndoa que canxion chojni nttiha joinao na que Tito rroca xohe mé. Pero jehe chojni mé ndoaha ditticaon na Jesucristo, co jimao dijiyehna na na. Chojni mé joiji na para joitsayana na na para vicon na co nichja na feo de ixin janha na ixin iditticaonha na costumbré chojni judío. Co jehe na joinao na que janha na rroguinte na esclavo de ngain costumbre mé iná.

⁵ Pero janha na ni ná rato jointtaha na caso ngain na, ixin janha na joinaho na que jaha ra joinchehe ra sigue vitticaon ra cainxin tti ndoa que jí ngain tti joajna que danjo iná vida naroa.

⁶ Pero cain tti ninchecoene chojni que ditticaon Jesucristo nttiha, que chojni ndaço que ixin jehe na anto importante na, jehe na ndaçooha na ixin nchaoha jí tti rrinttacoán chojni. Co janha ndosenaha si jehe na importante na o ani nahi, ixin Dios tsjeha tti nchehe chojni, sino que jehe tsjehe ngain ansén cada chojni.

⁷ En lugar de rrondachjenji na na ixin nchaoha jí tti rrinichja janha, jehe na vitticaon na que ján ndoa Dios tti chjana xa de rrintattjan chojni que jeha judío tti joajna que danjo iná vida naroa, jañá inchin Dios chjé Pedro xa de ndaço xajeho joajna jhi ngain cain chojni judío.

⁸ Ixin Dios que roanha Pedro inchin representanté para ngayé chojni judío, xajeho Dios mé rroanha na janha cai inchin representanté para ngayé chojni que jeha judío.

⁹ Mexinxin Jacobo, Pedro co Juan, canio nimé nivintte nttiha icha importante de vaquetonha na, joatsoan na que ján ndoa Dios chjana xa jhi. Mexinxin jehe na tsena na na rana na janha co Bernabé. Jhi joinchehe na para ná señal que janha na co jehe na compañero na, co nchao para que ixin janha na tsji na sindačhjan na joajna jhi ngayé chojni que jehe judío inchin jehe na rrondaço na ngayé chojni judío.

¹⁰ Pero jehe na joinchetsena na na ñaho na que rrořaxanho na co tsjenguijna na chojni noa, co jilhi tti janha na anto tsjá na nttaha na conixin tsje cuidado.

Are Pablo joinchesattehe Pedro ngain ciudad de Antioquía

¹¹ Pero are Pedro cjoí ngain ciudad de Antioquía, janha jointtasattá ixin tti jehe joinchehe jianha jí.

¹² Ixin are saho jehe joinecaho chojni que jeha judío, hasta que joijija canxion chojni que dirroanha Jacobo, cottimeja jehe ttingavačhjenjehe chojni que jeha judío co cointtohe de joinecaho na, ixin jehe xaoan ngain nijojji ixin nimé ni ndaço que cain chojni Jesucristo chonda que sitticaon na ngain circuncisión co ngain icha costumbré chojni judío.

¹³ Cottimeja inchin Pedro joinchehe tti jianha, cai icha chojni judío que ditticaon Jesucristo joinchehe na xajeho inchin tti jianha que joinchehe Pedro, que hasta Bernabé joinchehe cai inchin joinchehe Pedro.

¹⁴ Pero are janha vicon que jehe na tencheha na inchin ttetonha tti ndoa que tjago tti joajna que danjo iná vida naroa, janha ndattjan Pedro ngattoxon con cain chojni que ditticaon Jesucristo: “Jaha que ná chojni judío joinchehe inchin nchehe chojni que jeha judío, co incheha inchin jiquininxin nchehe chojni judío, ¿mexinxin quežén rinao jaha que chojni que jeha judío sinchehe na inchin chojni judío?”

Dios dayé cain chojni masqui jeha judío, jeha por ixin confianzé na ngain Jesucristo

¹⁵ Janha na chojni judío na desde are concjina na, co janha na jeha chojni que nchehe jianha inchin icha chojni.

¹⁶ Co ixinha mé, janha na nona na que xonhi chojni sehe jian ngain Dios jeha ixin nchehe na tti ttetonha ley que vayé Moisés, sino que chojni jian na ngain Dios si jehe na chonda na

confianza ngain Jesucristo. Mexinxin cai janha na vitticanho na ngain Jesucristo para que janha na sintte na chojni jian ngain Dios de ixin confianza que janha na chonda na ngain jehe, co nahi ixin janha na jointtaha na tti ttetonha ley que vayé Moisés. Ixin xonhi chojni nchao sintte jian ngain Dios jecho ixin nchehe tti ttetonha ley mé.

¹⁷ Co jai si ján na rinao na sontte na chojni jian ngain Dios jecho por ixin Jesucristo; pero si jamé, rrocho que ján na idotticaonha na ley que vayé Moisés. ¿Apoco jihi rrocho que Cristo tti ndattjo na sonttoho na jianha? ¡Nahi, jeha jamé rrocho!

¹⁸ Pero ján, janha jianha rrojinttaha si janha rrojinttaxante ná cosa cottimeja rrocjan na sinttachjian. Rrocho que janha jianha sinttaha si janha tsinttoa de sinttaha tti ndacho ley, cottimeja rrocjan na sinttacoán chojni de ixin ley mé iná.

¹⁹ Ixin janha para ngain ley que vayé Moisés inchin ondavenhe na, ixin ley mismo ndacho ixin janha jiquininxin ndasenhe na, co jai janha rrinttaha inchin Dios rinao.

²⁰ Rrocho que janha inchin ondavenxin na nganito cruz conixin Jesucristo ixin janha isinttaha inchin jinao icha saho. Mexinxin ijeha janha tti rrichon jai, sino que Jesucristo tti jichon ngaxinhi cuerpona. Co jai tti vida que janha rrichonda ngain cuerpona, janha rrichonda vida jihi ixin janha ditticanho Xenhe Dios. Ixin jehe Xan anto joinao na Xan janha co xanjo Xan para ndavenhe Xan por ixin janha.

²¹ Mexinxin janha ditticanho ngain Cristo ixin rinaoha sinttaha desprecio tti danjo Dios. Ixin si ná ni nchao sintte ni chojni jian ngain Dios jecho ixin sitticaon ni nchehe ni tti ttetonha ley que vayé Moisés, si rrocji jamé, rrocho que xonhi xé ixin Cristo venhe para ixin ján na.

3

¿Quexeha cosa icha nchao: aley que vayé Moisés o confianza ngain Dios?

¹ ¡Atto cha ttinxin ra jaha ra chojni Gálatas! ¿Quensen joantonga ra para que jaha ra ditticaonha ra tti joajna ndoa? Janha na mismo jian cjoagoha ra de ixin Cristo. Co jaha ra ocoinxin ra jian quedonda ndavenxin Jesucristo nganito cruz.

² Jai ndachjenji ni ra jihi: ¿Avayehe ra jaha ra Espiritu Santo de Dios ixin joinchehe ra cain tti ttetonha ley que vayé Moisés, o ani ixin vitticaon ra tti coinhi ra de ixin Jesucristo?

³ ¿Quedonda jaha ra anto cha ttinxin ra? Are saho jaha ra anto tsje confianza chonda ra ngain Dios ixin Espiritu Santo cjoengujna ra. ¿Apoco jai xaxaon ra ixin icha jian rroguitticaon ra si rrojinchehe ra tsje cosa inchin ttetonha ley?

⁴ Después de anto tangui conha ra de ixin tti jian joajné Jesucristo, ¿andasinchetján ra cain mé? Nahi, janha rinaho que sinchetjanha ra mé.

⁵ Ndachjenji ni ra: Are Dios rroanha Espiritu Santo nganji ra co are jehe nchehe tsje milagro ngayaha ra, ¿quedonda jehe nchehe jihi? Jehe nchehe jihi pero jeha ixin jaha ra nchehe ra cain tti ttetonha ley que vayé Moisés, sino que ixin jaha ra nchehe ra caso tti jian joajna que jaha ra coinhi ra.

⁶ Abraham jehe vitticaon ngain Dios, co ixin jehe vechonda confianza ngain, mexinxin Dios vayé Abraham inchin ná xí jian para ixin jehe.

⁷ Mexinxin jaha ra chonda ra que tsonoha ra que cain tti nichonda confianza ngain Dios, mé ni ndoa chojni Abraham.

⁸ Tti xón que jitaxin Palabré Dios, nttiha jitaxin que Dios sinchejian cain chojni que jeha judío si rrochonda na confianza ngain jehe. Mexinxin desde are icha saho Dios ndache Abraham tti jian joajna jihi: “Chojni de cainxin nación tsonchaon na por ixin jaha.”

⁹ Mexinxin Dios nchenchaon cain chojni que chonda confianza ngain jehe xajeho inchin joinchenchaon Abraham are jehe vechonda confianza cai.

¹⁰ Cain chojni que chonda confianza que jecho ley que vayé Moisés tsjengujna, chojni mé soan na condenado. Ixin ndacho ngain tti jitaxin Palabré Dios: “Cainxin chojni que sincheha jian masqui nacoa de cain tti jitaxin ngain ley que vayé Moisés, cainxin chojni mé soan na condenado.”

¹¹ Jañá jí claro que ixin xonhi chojni jian ngattoxon con Dios jecho ixin vitticaon na joinchehe na cain tti ttetonha ley que vayé Moisés, ixin ngain tti jitaxin Palabré Dios ndacho: “Tti chojni que dehe jian para ngain Dios conixin confianza que chonda ngain jehe, chojni mé rrochonda iná vida naroa.”

¹² Pero ley que vayé Moisés jindaçhoha de tti confianza que rrochonda ni, sino que jindaçho: “Tti chojni que nchao sinchehe cainxin tti jitaxin ley jihi, rrochonda iná vida naroxin ixin jehe tsixinhi sinchehe cain tti ndacho ley.”

¹³ Jesucristo cjoenga hna para que ján na irrochondaha na castigo inchin ttetonha ley que vayé Moisés, jehe Jesucristo tti goan condenado de ixin causaxin na ján na, ixin ndacho ngain tti jitaxin Palabré Dios: “Condenado cain tti chojni que seriahnda nganito ná nttá.”

¹⁴ Cain jìhi conhe para que de ixin Jesucristo, Dios nchao sinchenciaon chojni que jeha judío xajeho inchin jehe Dios joinchenciaon Abraham. Co para que cainxin ján na nchao sayé na Espíritu Santo ixin chonda na confianza ngain Dios.

Ley que vayé Moisés co promesé Dios

¹⁵ Hermanos, janha rronhattjo ra ná ejemplo de ngain vida jìhi: Are ná xí nchechjian ná testamento co nchefirmá xa, ixonhi chojni nchao tsentoxinhi testamento mé, ni ixonhi chojni tsentaxin icha palabra ngain testamento mé.

¹⁶ Nchao remé, Dios vanjo promesa ngain Abraham co ngain xanntí Abraham. Pero Palabré Dios jitaxinha de ixin tsje xanntí. Sino que rrocho nacoa xanntí Abraham, co mé rrocho que jeha Jesucristo.

¹⁷ Tti janha rrindathjan rrocho janhi: Dios joinchechjian ná promesa ngain Abraham co Dios joinchesequehe promesa mé. Mexinxin ley que vayé Moisés cuatro cientos treinta nano después, çhoha sinchexantte jeha promesa mé co sittohe sin que tsorentte tti ndaço Dios ngain Abraham.

¹⁸ Ixin si tti danjo Dios rroquixin jeha si rrogotticaon na rrojonttoho na cainxin tti ttetonha ley que vayé Moisés, mexinxin mé rrocho que ijeha promesé Dios. Pero jeha jamé, ixin ján na noa na que Abraham vayé promesé Dios jeha ixin vechonda confianza ngain jeha co nahi ixin vaguitticaon vanchehe tti vaquetonhe Dios.

¹⁹ Mexinxin ¿quedonda jí ley que vayé Moisés? Ley mé joiguehe después de Abraham para joicjago ley que ixin tti nchehe cain chojni nchaoa jí. Pero ley jìhi jeha conçhehe ley hasta tí ngain nchanho que joi jeha tti xanntí Abraham que Dios joincheprometehe ixin rroquí. Dios rroanha ángel para joiaho ley jìhi co joinchegonda Moisés para cjoago ley ngain cain chojni judío.

²⁰ Pero are Dios nichjé Abraham, mé cjoi para vanjo promesa ngain. Inchin are ná chojni chjé promesa iná chojni, dondeha que iná chojni rronichja por ixin jeha. Mexinxin jañá Dios gondeha iná chojni o ángel are nichjé Abraham.

Quedonda vehe ley que vayé Moisés

²¹ ¿Apoco jìhi rrocho que ley que vayé Moisés jíha de acuerdo conixin tti promesé Dios? Nahí, jeha jamé. Ixin si ná ley nchao rroganjo ley iná vida naroa ngain chojni, si jamé rrocji, Dios rrondaço que chojni rrocojian na si ditticaon na nchehe na cain tti rroquetonha ley mé.

²² Pero inchin jitaxin ngain Palabré Dios cainxin na tteaxian na para sonttoho na cosa jianha. Co cain jìhi jañá jí para que cain chojni que rrochonda confianza ngain Cristo sayé cain tti jian que Dios joincheprometé, jeha ixin chonda confianza mé.

²³ Icha saho de que chojni rrochonda oportunidad de rroguitticaon ngain Jesucristo, janha na xo judío na vintte na inchin tti teaxinhi ngain cárcel, co ley que vayé Moisés, mé inchin tti cárcel viaxinna na hasta que joija tiempo que janha na nchao rrochonda na confianza ngain Jesucristo.

²⁴ Rrocho ixin ley que vayé Moisés vaquetonna na inchin ná maestro ttetonha ngain chjannchecoenhe. Co jamé vintte na hasta que joija Cristo are Dios ndaço que janha na chojni jian na para ngain jeha si chonda na confianza ngain Cristo.

²⁵ Co jai janha na ochonda na oportunidad de chonda na confianza ngain Jesucristo, co mexinxin ley que vayé Moisés ixonhi joachaxin chonda nganji na.

²⁶ Co cai cain jaha ra xenhe Dios ra ixin chonda ra confianza ngain Jesucristo.

²⁷ Co cain jaha ra joiguite ra ixin ocjan ra chojni Jesucristo. Co mexinxin Cristo jí ngain ansean ra co nchehe ra inchin jeha rinao.

²⁸ Co para que xo chojni Jesucristo, jeha importante si judío o ani griego, o nchehe xa de ngain ná xinajni o ani nahi, o si ani nchí o xí, ixin cainxin na xajeho na inchin nacoa chojni ngattoxon con Jesucristo.

²⁹ Co si jaha ra chojni Jesucristo ra, mé rrocho ixin jaha ra cai chojni Abraham co sayehe ra cainxin tti ndaço Dios que rrochjé Abraham.

4

¹ Jìhi ná ejemplo de tti janha ndaçhjan: Ná chjan are ndadenhe ndodé xan, sayé xan cainxin tti chonda ndodé xan. Pero are xa nchín xan, jeha xan jí xan inchin ná ninchehe xé ndodé xan ixin xa çhoha tsetonha xan ngain cain cosa mé hasta que sanguija xan, masqui cain cosa mé ocosé xan.

² Dintte chojni que dicao cuidado de ixin jeha xan are xa nchín xan co nchechjian na cain asuntoe xan hasta que dinqué tiempo que coetonha ndodé xan para sayé xan joachaxin de cain cosé ndo.

³ Co jamé tonhe nganji janha na cai, ixin are saho janha na xa vaquianxinha na de ixin Dios. Are mé janha na vintte na inchin xannchinnchinchjan ixin costumbré chojni ngataha nontte jiji, mé tti vaquetonha nganji na.

⁴ Pero are ovinqué tiempo que Dios ndacho, jehe rroanha Xenhe joiconcjihi Xan de ngain ná nchi, co joi Xan inchin chojni judío que vitticaon ley que vayé Moisés.

⁵ Jañá joi Xan para que joichjana na Xan libertad cain janha na xo vaquetonna na ley mé para que Dios vayehna na janha na inchin chojni jehe.

⁶ Co para que Dios cjoagoha jaha ra que jaha ra oxenhe jehe cai, jehe rroanha Espiritu Santo ngain ansean ra, co Espiritu mé joixin de ngain Cristo, co Espiritu tti nttanichja na are ndacho na: "¡Padre mío!"

⁷ Mexinxin jai jaha ra oxenhe Dios ra, ijeha inchin ninchehe xa. Co ixin jaha ra oxenhe Dios ra, jehe rrochjá ra por ixin Cristo cainxin inchin jehe ndacho.

Pablo ta joachjaon para ixin cain chojni que ditticaon Jesucristo

⁸ Are saho, are jaha ra xa vechonxinha ra de ixin Dios; jaha ra vintte ra inchin esclavo de ngain choan cosa que joincheguinhí ra dios, pero que jeha ndoa Dios.

⁹ Pero jai que ochonxin ra de ixin Dios, o icha jian rrocho que ixin Dios ochonxin ra jaha ra, mexinxin ¿quedonda jaha ra xa rrocjan ra sintte ra esclavo iná ngain costumbre que vechonda ra are saho? Onoha ra que mé xonhi rentte co xonhi joachaxin chonda.

¹⁰ Rrocho que jaha ra jai te nchanho co conittjao co tiempo co nano que icha chojni ndacho ixin importante, co jaha ra xa nchesayehe ra mé.

¹¹ Janha anto xaon na ixin puede tti xa que janha joasonttaha ngayaha ra tsoxonhi xé xa mé.

¹² Hermanos, nttatsanha ñao ra que nchehe ra inchin janha, ixin icha saho varichonda ley que vayé Moisés co jai sacjan na inchin jaha ra xo chondaha ra ley mé. Janha rrinichja jiji, pero jeha ixin jaha ra joinchena ra chonja cosa jianha.

¹³ Jaha ra onoha ra, are janha joaso nganji ra saho nttiha para joasondattjo ra tti jian joajna que danjo iná vida nara, are mé janha anto venina, co mexinxin vechonda tiempo para ndattjo ra tti joajna mé.

¹⁴ Co tti chin que janha joarichonda, mé cjoi ná prueba para ixin janha, pero jaha ra cjoanoaha ni ra ni joinchesattenaha ni ra ixin jamé joarihi. Sino que jaha ra vayehna ni ra inchin rrogayehe ra ná ángel Dios o inchin rrogayehe ra Jesucristo mero.

¹⁵ Co ¿cja tti anto chaha ra que vinttechonda ra are mé? Are mé vicon janha que si rrocji posible, jaha ra hasta rrogantsjengui ra jmacon ra para rrochjana ni ra janha ixin anto joinao ni ra janha.

¹⁶ Co jai, ¿anigaonna ni ra jeha ixin ndattjo ra tti ndoa?

¹⁷ Tti icha chojni que joi nganji ra ndacho na ixin anto rinao ra na, pero jeha ndoa. Jehe na jeha rinao na que santsjenda ra na de nganji na janha na, para que cottimeja jaha ra jeha sitticaon ra jehe na.

¹⁸ Ján, anto nchao jí para sinao ra chojni, pero de jian co que mé tsonchjenhe para cainxin tiempo, co jeoha are janha rrihi nganji ra.

¹⁹ Jaha ra inchin xannchinnchinchjanhna co jai janha jittín na de ixin jaha ra inchin are ttín ná jannaha are ncheconcjihi jan xenhe jan; co sinchehe sigue tsín na hasta que jaha ra sitticaon ra jian ngain Cristo.

²⁰ Janha rrojinahó rrojarihi nganji ra jaxon, para que rronichjaha ra icha jian; ¡ixin janha anto tsje joachjaon tá de ixin jaha ra!

Ejemploe Agar co Sara

²¹ Jaha ra xo rinao ra sitticaon ra ley que vayé Moisés, ndachjenji ni ra jiji: ¿Acoinha ra tti jitaxin ley mé?

²² Nttiha jitaxin que Abraham joichonda yó xenhe xanxí. Ná xan concjiji xan de ngain ná nchinchehe xé, co iná xan concjiji xan de ngain nchihihi jehe, que nchi mé jeha nchehe xa ncha.

²³ Xenhe jehe nchinchehe xa mé concjiji xan xajeho inchin toncjihi cain chjan, pero chjan que concjiji de ngain chihi mero, chjan mé concjiji xan para que conixin jiji joiconhe tti ndacho Dios ngain Abraham.

²⁴ Yá conhe para ná ejemplo. Tti yó nchi mé rrocho yó manera que Dios ttjengujna chojni. Ná de tti yó manera jiji joiconhe ngataha jna Sinaí, tti vanjonxin Dios ley ngain Moisés. Co tti nchi vinhi Agar rrocho cain jiji. Co cain chojni que ditticaon jeha jiji, jehe na inchin esclavo na ngain jiji, xajeho inchin Agar conixin xenhe vintte esclavo cai.

²⁵ Co Agar rrocho jna Sinaí que jí ngain nonttehe Arabia, co jna Sinaí rrocho ciudad de Jerusalén ixin chojni nttiha jai tiempoa na jiji te na inchin esclavo ngain ley que vayé Moisés.

²⁶ Pero ngajni jí iná Jerusalén. Co ján na xo tequininxin na nttiha, chonda na libertad ixin Dios jinda na, co mé rajná na.

²⁷ Ndačo janhi ngain Palabré Dios de ixin ciudad de Jerusalén nttiha ngajni: Chaha jaha nchí que čhoha ncheconcjihí chjan, jaha que xonhi chjan chonda; toyao ixin anto chaha, jaha que chonxinha tti ttín nchí de ncheconcjihí ncha chjan. Ixin tti nchí que ndacointtohe xixihi, nchí mé rrochonda ncha icha tsje chjan que tti nchí que jicao xixihi.

²⁸ Hermanos, ján na te na inchin Isaac, ixin jehe goan ixin Dios ndache Sara, nchíchihi Abraham, ixin rrochjé ncha ná chjan. Co ján na xenhe Dios na, tti chjan que jehe joincheprometé.

²⁹ Pero ngain tiempo vatto, xenhe Agar, tti concjihí xan inchin cain chojni, chjan mé feo joinchehe xan ngain tti chjan que joincheconcjihí Sara de ixin tti joinchehe Espíritu Santo; co cai jamé tetoan na ján na jai ixin chojni que rinao nchehe na inchin ttetonha ley que vayé Moisés, chojni mé feo nchehe nganji na xo dotticaon na Cristo.

³⁰ Pero ¿quehe ndačo ngain Palabré Dios? Nttiha ndačo: “Dehngui nchinchehe xa conixin xenhe ncha ixin xenhe nchinchehe xa čhoha rrochonda xan parte ngain tti herencia que sayé xenhe tti nchí que jaha nchehe xa.”

³¹ Jañá, hermanos, ján na jaha inchin xenhe tti nchinchehe xa, sino que ján na inchin xenhe tti nchí que jaha nchehe xa.

5

xonhi tiempo ttinttohe ra tti libertad que chonda ra jai

¹ Cristo vantsje na de ngain joachaxín ley que vayé Moisés para que ján na sontte na libre. xonhi tiempo jaha ra ttinttohe ra libertad jihí, co icjanha ra dintte ra inchin esclavoe ley mé o icha costumbré chojni.

² Ttínhi ra tti rroundattjo ra. Janha Pablo rrindattjo ra que si jaha ra sittoaxin ra tsa ra tti xohe que dinhi circuncisión, ixin xaxaon ra ixin xohe mé tsjenguijna ra ngattoxon con Dios, si jamé sinchehe ra, Jesucristo ichoha tsjenguijna ra.

³ Janha rrindačhjan iná que cain xí que xaxaon que ixin icha jian si tsa xa xohe mé, jehe xa chonda xa que sinchehe xa cainxin tti ttetonhe ley que vayé Moisés.

⁴ Jaha ra xo xaxaon ra ixin Dios rrogayaha ra inchin chojni jian si jehorroguittaon ra rrojinchehe ra cain tti ttetonha ley mé, pero mé rročo ixin jaha ra ichondaha ra confianza ngain Jesucristo; jaha ra ondavačhenda ra de ngain jehe co de ngain tti jian que ttixin de ngain Dios.

⁵ Pero ján na chonda na confianza ngain Jesucristo de ixin joachaxín Espíritu Santo, co mexinxin chonda na seguro que ixin Dios sayá na inchin chojni jian.

⁶ Ixin are ján na te na ngain Jesucristo, jaha rentte si ján na chonda na xohe mé o ni nahí. Tti ján, rentte, mé tti ján na rrochonda na confianza ngain Cristo. Co confianza mé tti ttjenguijna na para sonao na cain chojni.

⁷ Jaha ra oanto jian vanchehe ra. ¿Quensen jointtayaha ra para que ndacointtohe ra de ditticaon ra tti mero ndoa mé?

⁸ Jaha Dios tti jointtayaha ra, sino que chojni que ditticaonha ngain jehe.

⁹ xaxaon ra que “nchion levadura ncheganguí cain nchoe niottja.” Co cai nchion chojni jianha nchejianha icha chojni.

¹⁰ Pero janha chonda confianza ngain Dios que jehe tsjenguijna jaha ra para rroxaxaonha ra iná cosa que jaha ndoa. Co Dios sinchecastigá tti chojni que tenttayaha ra; jehe ndosenha quexeho de jehe na.

¹¹ Co de ixin janha, hermanos, si janha xa rroquetoan chojni que chonda confianza ngain Jesucristo que ixin chonda na que tsa na xohe que dinhi circuncisión, chojni judío ifeoha rrojinchehe na nganji na janha co irročoñaaha na are rroquinhí na tti joajna que janha ndačhjan de ixin quedonda Cristo ndavenxin nganito cruz.

¹² Pero tti chojni que nttayaha ra ixin chonda ra que tsa ra tti xohe que dinhi circuncisión, jncho jehoroginchenihí cuerpoe na mismo!

¹³ Ixin jaha ra hermanos, Dios vayaha ra para que jaha ra sintte ra chojni libre. Pero jihí rročoaha ixin jaha ra nchao sinchehe ra jehoroginchenihí rinao ra, sino que por ixin rinao chó ra, ttjenguijna chó ra naná ra.

¹⁴ Ixin ngoixin ley de Dios rročo jihí: “Rinao chó ra inchin rinao ra cuerpoa ra jaha ra mismo.”

¹⁵ Pero si jaha ra sintte ra inchin coxigo čhintto que nehe chó va co jine chó va jehoroginchenihí, si jamé nchehe ra, ttjihoroginchenihí ra cuidado ixin jamé jahoroginchenihí ra sinchetján chó ra.

Tti rinao cuerpoe ni co tti vida que danjo Espíritu Santo

¹⁶ Jihi tti janha rrindattjo ra: Nchehe ra inchin rinao Espíritu Santo, co jañá isincheha ra tti jianha que rinao cuerpoe ra.

¹⁷ Ixin tti jianha que rinao cuerpoe ni, mé rinaoha Espíritu Santo de Dios. Co tti rinao Espíritu Santo, mé rinaoha cuerpoe ni. Cayoi parte mé ningaconhe chó co mexinxin jaha ra čhoah sinchehe ra inchin jaho ra rinao ra.

¹⁸ Pero si jaha ra nchehe ra inchin rinao Espíritu Santo, tti ley que vayé Moisés ichondaha joachaxin nganji ra.

¹⁹ Tanguiha para datsoan ni quehe nchehe tti chojni que nchehe tti rinao cuerpoe: Jehe na deajoacaho na iná nčhi que jeha čihi na, co nchehe na cosa anto jianha, joxon cosa que rinao cuerpoe na,

²⁰ co jehe na nchesayehe na ídolo co dantonga chó na, ningaconhe chó na, ditticaonha chó na, co chonda na joachjio. Nanao toñaohé chó na. Si nchehe na čhoan cosa jian, pero jeho para que jehe na sittohe na jian ngain icha chojni. Co dachjendehe chó na co nchechjian na tsje grupo.

²¹ Jehe na chjoehe na, dantsjehe na vidé icha chojni, coan na, anto xengo na, co nchehe na icha cosa jianha inchin cain jihi. Janha rrindattjo ra iná inchin ondattjo ra are saho, que cain chojni que nchehe cosa jihi rrochondaha na parte ngain tti ttetonha Dios.

²² Pero janhi tti nchehe Espíritu Santo: Jehe nchehe para que ján na rinao na cain chojni, para que anto chá na, para que tonoa na čhjoin ngain ansean na, para que chonda na paciencia, para que sontte na amable na, para que sinao ansean na ttjenguijna icha chojni, para que ján na sonttoho na sigue inchin Dios rinao,

²³ para que tsorentteha na ni sontteha na orgulloso, co para que sonttoha na tti rinao cuerpoe na. Co jamé xonhi ley jí que ndačo ixin cosa tehe nchaoha te.

²⁴ Co tti chojni que ditticaon Cristo, chojni mé ncheha na cain tti rinao cuerpoe na ni cain tti jehe na xaxaon na.

²⁵ Jañá inchin Espíritu Santo chjá na iná vida naroa, ján na cai chonda que sittoaxin na que Espíritu mé tsetonha nganji na.

²⁶ Ján na chondaha na que sontte na orgulloso, ni sonttoñaoha chó na, ni tsonchjoeha chó na.

6

Ttjenguijna chó ra ná ra co iná ra

¹ Hermanos, si jaha ra tsinhi ra que ná chojni de jaha ra jinchehe jianha, jaha ra xojian ditticaon ra nchehe ra tti ttetonha Espíritu Santo nganji ra, xojian mé chonda ra que rrondache ra chojni que jinchehe jianha que isincheha jamé. Pero mé chonda ra que sinchehe ra conixin ansean ra jian, co torentteha ra ixin tsjenguijna ra na. Co ttjiho ra cuidado cada ra cai para que jaha ra sincheha ra cosa jianha jamé cai.

² Ttjenguijna chó ra naná ra are tangui tsonha ra, co jamé sinchehe ra tti ttetonha Cristo.

³ Ixin si ná chojni tsonohe ixin anto importante co jehe ni xonhi quehe, mé rročo que jeho jincheyehe ansén.

⁴ Cada ni chonda ni que sinchejuzgá ni tti jehe ni tenchehe ni. Co si jian tti jehe ni joinchehe ni, jehe ni nchao tsonohe ni čhjoin, co xonhi xé para rroxaxaon ni si joinchehe ni icha tsje o icha tsjeha que iná chojni.

⁵ Ixin cada chojni chonda responsabilidad ngattoxon con Dios de tti jehe nchehe.

⁶ Co nitetangui ngain tti jian joajné Jesucristo, chojni mé chonda que tsonchjeya na ngain ximaestroe na cain cosa jian que jehe na chonda na.

⁷ Dittoaxinha ra xaxaon ra tti ndoaha: xonhi chojni nchao tsjanaoa Dios, ixin tti jehe ni ttenga ni, mé tti tsín ni.

⁸ Tti chojni que ttenga cosa jianha inchin tti rinao cuerpoe, jehe ndasinchetján vidé ngattoxon con Dios, co de tti jehe ndasenhe, mé rročo cosecha que jehe rrotsín. Pero tti chojni que ttenga tti rinao Espíritu Santo, chojni mé rronchonda iná vida naroa para cainxin tiempo, co mé tti coseché que jehe rrotsín.

⁹ Mexinxin ján na xonhi tiempo tsinttohe na de sonttoho na tti jian, ixin si ján na soanha na desanimado de sonttoho na tti jian, ján na rrotsín na cosechá na mero ngain tti tiempo que Dios coinchiehe.

¹⁰ Mexinxin cada nntiha que nchao, ján na sonttoho na jian ngain cain chojni, nttoho na jamé co icha para ngain tti chojni que ditticaon ngain Jesucristo.

Pablo joexin cjin carté co rroanha joajna

¹¹ Tsjexin ra que xén yeyexin letra rricjianxin ra conixin rana ngain parte jihi.

¹² Tti chojni que ndattjo ra ixin chonda ra que tsa ra tti xohé que dinhi circuncisión, chojni mé jamé nchehe na jeho para que sittoexin na jian ngain chojni judío, co jamé para que

tsonoeha na tangui ixin causexin Jesucristo are rronache na icha chojni ixin quedonda Jesucristo ndavenxin nganito cruz.

¹³ Ixin ni jehe tti chojni que ta xöhe mé nchehe na cain tti jindačo ngain ley que vayé Moisés. Pero jehe na rinao na que jaha ra tsa ra xöhe mé para que jehe na nchao tsonohe na orgulloso, ixin jaha ra vitticaon ra cóa ra xöhe inchin jehe na coetonha na nganji ra.

¹⁴ Pero para ixin janha, rinaoha tsonona orgulloso de ixin icha cosa, sino que janha tonona orgulloso de ixin quedonda Jesucristo ndavenxin nganito cruz. Ixin are jehe ndavenhe, rročo inchin cain cosa feo co jianha ngataha nontte jihi ndavitján co ndavenhe para ixin janha, co janha inchin ondavenhe na de cain cosa mé.

¹⁵ Ixin si ján na chojni Cristo na, jaha importante si ján na techonda na tti xöhe que dinhi circuncisión o ni nahi; tti importante na, que ján na sontte na chojni nroaxin para ngain Dios.

¹⁶ Janha rinaho que Dios rrochjá ra tti çhjoin que tsonohe ansean ra, co jehe tsiaconoaha ra, cain jaha ra xo ditticaon ra jihi, co para cainxin tti chojni que ján ndoa chojni Dios.

¹⁷ De jai para ndaha rinaho que xonhi chojni rrochondana problema, ixin cain marca que rrichonda ngain cuerpona jai de ixin tti anto vicaon na, mé tjago que janha ndoa ná ninchehe xé Jesucristo.

¹⁸ Hermanos, janha danchia que Jesucristo, tti chonda cain joachaxin, sinttanchaon ra cainxin ra jaha ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Efeso

Pablo chjé joajna chojni ngain Efeso

¹ Janha Pablo na, Dios joinao que janha rrihi ná representanté Jesucristo. Janha rricjin na carta jihi para nganji jaha ra xo te ra ngain ciudad de Efeso, jaha ra xo chojni Dios ixin ditticaon ra Jesucristo.

² Dios Ndodá na co Jesucristo, tti chonda cain joachaxin para ixin ján na, sinchenchaon nganji ra co rrochjá ra tti chjoin que tsonohe ansean ra.

Dios anto nttanchaon na de ixin Jesucristo

³ Nttocoanxinhi na Dios Ndodé Jesucristo, tti chonda joachaxin para ixin ján na, ixin jehe Dios anto jointtanchaon na de cainxin cosa jian que ttixin de ngajni. Jehe rroán na cain cosa mé ixin ján na te na inchin nacoa chojni, ján na conixin Jesucristo.

⁴ Icha saho que Dios joinchechjian nontte, jehe ocoinchí na ján na para sontte na chojni jehe de ixin Jesucristo, para que ján na sontte na chojni jian ngattoxon con jehe que xonhi cosa jianha rrochonda na.

⁵ Cai desde icha saho, Dios anto joinao na, mexinxin jehe ndačo que ján na sontte na xenhe jehe. Mexinxin jehe rroanha Jesucristo para joicjenga hna para ixin ján na, jamé joinchehe Dios ixin jehe jamé rinao.

⁶ Mexinxin ján na cainxin tiempo sontocoanxinhi na Dios ixin jehe anto jian nganji na, ixin jehe chjá na joachaxin para que ján na te na inchin nacoa chojni conixin Xenhe que jehe anto rinao.

⁷ Dios jehe anto rinao na ján na, mexinxin rroanha Xenhe nttihi ngataha nontte para ndavenhe Xan; jamé para cjoenga Xan hna cain tti jianha que ján na nttoho na. Co mexinxin jai Dios ojointtatjañá na cain tti jianha mé.

⁸ Dios ocojogoa na que jehe anto rinao na ixin jehe tti ntaaxaxaon na jian co ntaquianxin na jian de ixin jehe.

⁹ Co jehe jointtagatsoan na tti jehe rinao co tti jehe sinchehe ngain cain chojni, co cain mé nonxinha vehe desde ngain tiempo vatto.

¹⁰ Co jihi rročo que tsonhe ngain tti mero nchanho que Dios tsinchiehe, jehe Dios sanjo joachaxin ngain Jesucristo para que Jesucristo tsetonhe cain cosa que jí ngajni co cain cosa que jí nttihi ngataha nontte.

¹¹ Co desde icha saho, Dios ocoinchí na ján na para que sontte na inchin nacoa chojni conixin Jesucristo, jamé para que ján na nchao sayé na tti jehe Dios rrochjá na. Co cain jihi tsonhe inchin jehe rinao, co Dios nchehe cainxin cosa inchin tti jehe ndačo que jian jí.

¹² Jañá joinchehe Dios para que janha na xo saho vitticanho na Jesucristo sinttacoanxian na jehe Dios ixin jehe anto jian.

¹³ Co cai jaha ra vitticaon ra Jesucristo are coinhi ra tti joajna ndoa, co joajna mé tti chjá ra iná vida nroaxin. Co desde ngain rato mé jaha ra te ra inchin nacoa chojni conixin Jesucristo. Co Dios ndačo ixin jaha ra chojni jehe are chjá ra Espíritu Santo inchin jehe ndačo icha saho.

¹⁴ Espíritu Santo que jí nganji ján na, mé inchin ná seguridá de que ján na sayé na tti ndačo Dios que rrochjá na are jehe tsjexin sincheroa cain chojni que jiquininxin para ixin jehe co cain jihi para que tsocoanxin jehe, ixin jehe anto jian.

Pablo nchetsenhe ñao Dios que Dios sinchequinxin cain chojni que ditticaon Jesucristo

¹⁵ Mexinxin desde ngain nchanho que janha coian ixin jaha ra oditticaon ra Jesucristo, co ixin anto rinao ra cain chojni Dios,

¹⁶ desde ngain nchanho mé co hasta jai, janha cainxin tiempo danjo gracias ngain Dios para ixin jaha ra, co cain tiempo xaxanho jaha ra are janha rrinttacoanxian Dios.

¹⁷ Janha nttatsán ñao Dios, Ndodé Jesucristo, tti chonda cain joachaxin, co Dios mé Ndodá na cai co tti jiquininxin tsosayehe. Janha nttatsán ñao jehe que sinttaquianxin ra conixin Espíritu Santo para que tsinxin ra jian tti jehe rroundattjo ra, co para que jian rrochonxin ra jehe.

¹⁸ Co janha nttatsán ñao Dios que jehe sinchengasán ngain joarrixaoan ra para que rrochonxin ra que ixin jaha ra oseguro chonda ra tti vida nroaxin que jehe ochjá ra. Co para que cai rrochonxin ra que anto jian co anto rentte cain cosa que danjo Dios ngain chojni jehe.

¹⁹ Co rinaho cai que jaha ra rrochonxin ra que Dios chonda anto tsje joachaxin co xonhi cosa que Dios choha sinchehe. Joachaxin jihi jí nganji ján na xo dotticaon na Jesucristo. Co xajeho joachaxin jihi joinchegonda Dios

²⁰ are jehe joinchexechon Jesús are ndavenhe co joaquehe ngain lado jian nttiha ngajni.

²¹ Co rato mé jehe Dios chjé Jesús joachaxin para que Jesús ttetonhe cain tti icha ttetonha nttiha ngajni. Co Jesucristo jehe tti chonda icha joachaxin de cain cosa, masqui quexeho tiempo, sia tiempo jai o tiempo que tsí.

²² Dios chjé Jesucristo cain joachaxin para ngain cain cosa co Dios joanjo joachaxin cai para que Jesucristo jí inchin já cain chojni que ditticaon jehe.

²³ Co tti cain chojni que ditticaon Jesucristo, cain chojni mé inchin ngoixin cuerpoe Jesucristo ixin cain jehe na conixin Jesucristo te na inchin nacoa cuerpo. Co Jesús jí ngain cainxin lugar desde ngajni co nttihi ngataha nontte.

2

Dios chjá na vida naroaxin ixin jehe anto rinao na

¹ Dios chjá jaha ra vida naroaxin masqui icha saho jaha ra vintte ra inchin tti ndadiguenhe de ixin tti cainxin cosa jianha

² que jaha ra vanchehe ra. Are mé jaha ra vanchehe ra inchin nchehe cain chojni que ditticaonha Jesucristo, co jaha ra vaguitticaon ra tti ttetonha ngain cain demonio que chonda joachaxin ngain cain tti chojni que ncheha tti ttetonha Dios.

³ Co cai cain ján na jañá vanttoho na are saho. Ján na vanttoho na inchin vařaxaon na, co vanttoho na inchin vajinao cuerpoe na co joarrixaoan na. Mexinxin ján na vequininxin na tti anto soji castigoe Dios inchin icha chojni.

⁴ Pero Dios jehe anto coiaconoá na, co anto rinao na,

⁵ masqui ján na gontte na inchin chojni que ndadiguenhe para ixin Dios ixin anto tsje jianha vanttoho na. Pero jehe chjá na iná vida naroa, co mexinxin jai ján na co Jesucristo inchin nacoa chojni. Jañá jaha ra irrochondaha ra tti anto soji castigo ixin Dios anto coiaconoaha ra.

⁶ Co jamé rrocho que Dios jointtaxechon na de tti ndavenhe na, are jehe joinchexechon Jesucristo, co inchin jehe Dios ocoín na ján na ngajni ngain Jesucristo.

⁷ Jehe joinchehe jañá para que sicon cain chojni de ngain tiempo que tsí que ixin anto rinao na ján na, co jehe anto jian nchehe nganji na de ixin Jesucristo.

⁸ Mexinxin jaha ra ochonda ra iná vida naroa ixin Dios anto rinao ra co ixin jaha ra chonda ra confianza ngain Jesucristo. Co vida jihi jeha ixin jaha ra joinchehe ra ná cosa jian mexinxin chondaxin ra vida jihi, sino que Dios joinao chjá ra vida jihi.

⁹ Jaha de ixin tti jian que nchehe ná chojni mexinxin chondaxin vida jihi, nahi jeha jamé. Mexinxin xonhi chojni tsonohe orgulloso ixin chonda vida jihi.

¹⁰ Ixin Dios jehe jointtachjian na ján na; co de ixin Jesucristo Dios chjá na iná vida naroa para que ján na sonttoho na jian ngataha nontte jihi, inchin jehe ořaxaon desde are saho.

Tti chjoin tonoa na ngain Dios por ixin Cristo

¹¹ Mexinxin řaxaon jaha ra de ixin queřén vintte ra are saho. Jaha ra jeha chojni judío ra, co chojni judío ndacho na que jeho na nichojní Dios ixin chjé chó na řohe que dinhi circuncisión ngain cuerpoe na, co jaha ra nahi ixin chondaha ra řohe mé.

¹² Ngain tiempo mé jaha ra řa jeha chojni Jesucristo ra, co jaha ra ni jeha chojni judío ra, co ni řa vinttechonxinha ra tti trato que joinchexjian Dios conixin Abraham, co ni řa vinttenoaha ra de ixin tti jian que Dios ndacho sanjo ngain chojni. Are mé jaha ra vintte ra ngataha nontte jihi pero řonhi esperanza vinttechonda ra que ixin Dios tsjenguijra co ni vinttechonxinha ra de ixin Dios.

¹³ Pero masqui ngain tiempo mé jaha ra cjin vintte ra de Dios, jai jaha ra oconchienne ra ngain Dios ixin para mé venxin Jesucristo co jai te ra inchin nacoa chojni conixin jehe.

¹⁴ Jesucristo mé tti chjá na tti řhjoin que tonoe ansean na. Co jehe tti joinchehe para que chojni judío co chojni que jeha judío pero que cain na xo dotticaon na jehe te na inchin nacoa grupo ixin Jesucristo conxante tti vaningaonhe chó na. Mexinxin jai cain chojni que ditticaon na jehe, cain na amigo na.

¹⁵ Are ndavenhe Jesús, are mé jehe conxante cain tti costumbre que vanchehe chojni judío ngain ley que vayé Moisés, ixin ley jihi tti chjeyaxin chojni. Pero jehe joinchexjian nacoa grupo de chojni jehe, de tti chojni judío co de tti chojni que jeha judío, pero cain na te na nacoa grupo jai. Co jamé cointte Jesucristo cain chojni jehe para que cain na rinao chó na.

¹⁶ Mexinxin are Jesucristo ndavenxin nganito cruz, jehe joinchexantte tti vaningaconhe chó chojni de chojni judío co tti chojni que jeha judío. De cain chojni mé jehe cointte na inchin nacoa chojni para que jai cain na sintte na jian ngattoxon con Dios.

¹⁷ Jesucristo jói ngataha nontte jihi para joindache cayoi grupo de chojni jihi tti jian joajna para que ansean na cain na thjoin tsonohe. Jehe ndattjo jaha ra joajna mé masqui cjin vintte ra para Dios, co jehe ndachjenji na janha na xo chojni judío na cai, co janha na icha chian vintte na para Dios.

¹⁸ Mexinxin de ixin Jesucristo, cainxin na masqui chojni judío na o nahi pero cainxin na nchao tsonchienne na ngain Dios Ndodá na ixin chonda na xajeho Espíritu Santo.

¹⁹ Mexinxin jai jaha ra ijeha chojni ojé ra, sino que jai jaha ra xajeho cain chojni que ditticaon Dios, ixin cain na ján na xajeho chojni Dios na.

²⁰ Co jaha ra inchin ná nchia jie que jingattjen soji. Ixin jai jaha ra te ra ngataha tti base que vinttequin cain nirepresentanté Jesucristo co cain profeté Dios, co Jesucristo mismo inchin tti xo esquina que icha importanté ngain base mé.

²¹ Co ngataha base jihi, que mé Jesucristo, ján na sontte na cainxin na inchin xo que ditte ttjarioho hasta que tsonchjian na ná nihngo jian para ngain Dios co cainxin na sontte na inchin nacoa na para ixin Jesucristo.

²² Co jamé jaha ra cai dintte ra inchin nacoa chojni conixin Jesucristo, co doan ra inchin nacoa ra conixin icha chojni jehe para que cain ra tsonchjian ra ná nchia tti nchao sehe Espíritu Santo de Dios.

3

Dios chjé Pablo xa de rronichja joajné ngain chojni que jeha judío

¹ Mexinxin janha Pablo na nttatsán ñao Dios para ixin jaha ra, co janha rriaxinna ngain cárcel ixin ndattjo ra joajné Jesucristo, jaha ra xo jeha chojni judío ra.

² Seguro que onoha ra que ixin Dios anto jian jehe chjana xa jihi que janha rrinttaha nganji ra para que jaha ra sintte ra chojni jehe.

³ Rrocho que Dios cjoagohna tti nonxinha vehe que jehe xaxaon joinchehe ngain chojni. Jehe joinchenona mé, co janha ondattjo ra nchion de mé ngain cartana.

⁴ Are jaha ra rrotsjehe ra carta mé iná, nchao tsinxin ra que janha chonxin tti nonxinha mé de ixin Jesucristo.

⁵ Mé ná cosa que xonhi chojni venohe are icha saho, pero jai Dios cjoagoe cain nirepresentanté jehe co cain profeté jehe de ixin Espíritu Santo que jehe rroanha.

⁶ Tti nonxinha vehe mé jihi: que de ixin tti jian joajné Jesucristo, Dios nchennaon tti chojni que jeha judío inchin nchennaon chojni judío, co cain na xajeho chojni Jesucristo na; rrocho inchin nacoa cuerpo cain na, co cain na yahi sayé na tti ndacho Dios que rrochjá na ixin dotticaon na Jesucristo.

⁷ Dios jehe anto jian para nganji janha ixin de joachaxin que jehe chonda, ixin jehe chjana xa de nichja joajna jihi.

⁸ Janha tonona que icha rentteha na de cain chojni Dios, pero masqui jamé, Dios chjana joachaxin jihi para ndattjan icha chojni que jeha judío tti jian joajné Jesucristo. Co joajna mé anto icha rentte que cainxin cosa nntihi ngataha nontte.

⁹ Dios tti joinchexjian cainxin cosa, coetonna para rronattjan cain chojni tti jehe vacjagoha jian ngain cain chojni are icha saho.

¹⁰ Jamé conhe, para que jai de ixin cain chojni que ditticaon Jesús, cain ángel que chonda joachaxin nntiha ngajni tsonohe, tsinxin co satsoan icha tsje de tti danjo Dios, tti anto chonxin co nohe cain de cain tti jian.

¹¹ Dios joinchehe cain jihi inchin jehe xaxaon desde icha saho que jehe joinchexjian mundo jihi, co de ngain Jesucristo coenxin cain cosa jihi.

¹² Co de ixin tti joinchehe Jesucristo ján na jai ochonda na joachaxin para tsonchienne na ngain Dios. Ján na chonda na confianza mé ixin dotticaon na ngain Jesucristo.

¹³ Mexinxin janha nttatsanha ñao ra que doanha ra desanimado ixin janha rriaxinna jai. Janha cain jihi jitonna ixin ndattjo ra tti jian joajné Jesucristo, co cain tti janha jitonna jihi rrocho chjoin para ixin jaha ra.

Pablo nchetsenhe ñao Dios para rrochonxin na quexén Cristo rinao jehe na

¹⁴ Mexinxin janha dariitoxin nttajochjihna ngattoxon con Dios Ndodé Jesucristo.

¹⁵ Co jehe Dios jihi tti Ndodé cain chojni que te nntihi ngataha nontte, co de ángel que te nntiha ngajni; jeha Dios jihi tti Ndodaha desde nntiha ngajni co hasta nntihi ngataha nontte.

¹⁶ Janha nttatsán ñao Dios que de ngain cain tti jian que jehe chonda, rrochjá ra joachaxin co sinchesoji espiritua ra de ixin Espíritu Santo que jehe rrochjá ra,

¹⁷ para que Jesucristo mismo nchao sehe ngain ansean ra ixin jaha ra ditticaon ra jehe. Co janha nttatsán ñao Dios que jaha ra anto sinoa ra cain chojni ixin jaha ra osoji tengattjen ra ngain Dios inchin ná nttá que jingattjen soji ixin noehe nnta nihnga teẓavá.

¹⁸ Co jamé para que jaha ra co icha chojni que ditticaon jehe nchao tsinxin ra jian queẓén Jesucristo anto rinao na ján na.

¹⁹ Janha danchiá Dios que jaha ra rrochonxin ra queẓén jehe anto rinao ra para que jamé xonhi sinchetján ra ixin Dios sehe nganji ra. Janha danchia jihi masqui xonhi chojni nchao tsinxin cainxin de queẓén Dios rinao chojni.

²⁰ Co jai de ixin joachaxín Dios que jí nganji na, sonttosayehe na jehe ixin jehe tti chonda joachaxin para sinchehe anto icha tsje que tti ján na danchiehe na, o icha que de tti ján na xaxaon na.

²¹ Que cain chojni que ditticaon Jesucristo, conixin jehe Jesucristo cai, cainxin na sinchesayehe na jehe Dios para cainxin tiempo. Amén.

4

Cain chojni que chonda Espiritu Santo te na inchin nacoa chojni

¹ Mexinxin janha que rriaxinna jai ngain cárcel ixin nttanoha ra tti jian joajné Jesucristo nttatsanha ñao ra que nchehe ra jian inchin jiquininxin sinchehe chojni que Dios coinchiehe, ixin jehe coinchiaha jaha ra.

² Dintteha ra inchin chojni orgulloso, nchehe ra jian ngain icha chojni, co chondehe chó ra paciencia, co ttiacoñohe chó ra ixin rinao chó ra cain ra.

³ Nchehe ra de que cainxin tiempo dintte ra inchin nacoa chojni ixin Espiritu Santo tsjenguijna ra para sinchehe ra jamé ixin jehe danjo tti tchoin que tsonohe ansean ra.

⁴ Ixin cainxin na, xo dotticaon na Jesucristo, te na inchin nacoaxinxon cuerpo para ixin jehe, co cain na chonda na xajeho nacoaxinxon Espiritu Santo, co Dios ndattjo na cain na ixin seguro rrochonda na iná vida naroaxin cainxin na.

⁵ Co jí jehó nacoaxinxon Jesucristo, tti chonda cain joachaxin para ixin ján na, co jehó jehe tti jiquininxin sotticaon na ján na, co cainxin na diguitte na para xago ixin ján na chojni Jesucristo,

⁶ co jí jehó nacoaxinxon Dios, tti Ndodé cainxin chojni. Co jehe tti ttonha cain cosa, co jehe nchegonda chojni para nchehe xé jehe nntihi ngataha nontte, co jehe jí nganji na cainxin na.

⁷ Pero cada na ján na Jesucristo chjá na naná clase de joachaxin inchin jehe joinao.

⁸ Mexinxin ndačo ngain tti jitaxin Palabré Dios:

Jehé sacojín para ngajni, jamé joinchehe para cjoago que jehé ojoacha ngain cain tti ningaconhe jehe,

co ngain rato mé joanjo joachaxín jehe ngain tti chojni que ditticaon jehe.

⁹ ¿Co attinxin ra de ixin quehe rročo jihi tti “jehé sacojín”? Jihi rročo que saho jehé xincanji hasta tti tchingui nontte.

¹⁰ Co xajeho jehe tti xincanji, mé tti sacojín hasta tti ngain parte icha noi de ngajni para que jamé Jesús jí ngain cainxin lugar desde nntihi ngataha nontte co hasta ngajni.

¹¹ Co jehé chjá na cada na xo dotticaon na jehe ná clase de joachaxin. Canxion na chjá na joachaxin de nirepresentaté jehe, co icanxin na chjá na tti joachaxin de ndache na icha chojni tti joajné Dios que jehe mismo nttanoa na, co icanxin na chjá na joachaxin de ndache na icha chojni tti jian joajna que danjo iná vida naroaxin, co icanxin na chjá na joachaxin de tenda na chojni ngain icha nihngo, co icanxin na chjá na joachaxin de nttocoenhe na icha chojni ngain nihngo de ixin Dios.

¹² Co jañá cain joachaxin yá danjo Jesucristo ngain chojni para que jehe na nchao sinchehe na xé jehe co para que chojni jehe tosoji na ngain tti ditticaon na. Co cain chojni mé inchin cuerpoe Jesucristo.

¹³ Jamé hasta que cainxin na sontte na inchin nacoa chojni ngain tti dotticaon na co tsinxin na cainxin de ixin Xenhe Dios. Co jamé, sontte na chojni de jian joarrixaon para ngattoxon con Dios ixin sontte na inchin Jesucristo mismo.

¹⁴ Are mé ján na isontteha na inchin xannchinnchinchjan que anto daca ttentoxinhi xan tti xaxaon xan, ni isontteha na inchin ca dixema que anto daca sadicao tchintto, rročo que are mé isotticaonha na tti ndačo canxion chojni que rinao sinttayá na ixin tjagoa na de ixin Cristo, pero jeha mero ndoa tti jehe na sinttacoán na na, jehó rinao na que ján na sonttoho na inchin jehe na tenchehe na.

¹⁵ Sino que ján na sonttoho na tti mero ndoa que rinao Dios ixin sonao chó na. Co chonda na que sonttosoji na espiritua na para que jamé nchao sontte na conixin Jesucristo,

inchin nacoa chojni ixin cain chojni que ditticaon jehe tonchjian na inchin nacoa cuerpo co Jesucristo jehe tti já cuerpo jiji.

¹⁶ Inchin cada parte de cuerpo tetsexin chó, jamé já na are çhjoin dotticaon chó na de ixin Jesucristo. Co inchin já na ttetonhe cuerpoa na para nchehe inchin jehe já na rinao, jamé cai Jesucristo ttetoan na já na. Co mexinxin are já na sonttoho na inchin rinao Jesucristo, co sonao chó na, cottimeja cain na junto ntosoji na espirítua na co ttjenguijna chó na.

Tti vida naroa que chonda na ixin dotticaon na Jesucristo

¹⁷ De ixin joachaxin nombré Jesucristo, jaxon janha rrindattjo ra, co rritettonha ra que ixonhi icha cosa jianha nchehe ra inchin tenchehe tti chojni que ditticaonha tti ttetonha Dios, co nchehe na inchin jehe na teřaxaon na. Co tti jehe na teřaxaon na, mé çonhi xé.

¹⁸ Co chojni mé joarrixaoen na te inchin ngain tti naxin xehe ixin ttinxinha na de ixin Dios. Chojni mé chondaha na tti vida naroa que danjo Dios ixin jehe na choxinha na quehe rinao Dios ixin ansén na anto cha para ngain Dios.

¹⁹ Chojni mé itosoeha na de cain tti jianha que nchehe na, co ndadiřanjo na para nchehe na tsje cosa jianha, co hasta ché na are nchehe na cain cosa jianha mé.

²⁰ Pero jaha ra jeha jañá coangui ra ngain Jesucristo,

²¹ si ndoa jaha ra coinhi ra de ixin jehe, co coangui ra de ngain jehe Jesús tti ndoa que jehe chonda.

²² Mexinxin jai jaha ra incheha ra cain cosa jianha que vanchehe ra are saho. Ixin vida mé anto feo ixin cosa jianha que vařaxaon joarrixaoan ra mé tti jointtayaha ra para vanchehe ra jamé.

²³ Dittoaxin ra que Dios tsentoxinhi joarrixaoan ra co ansean ra,

²⁴ co ngain vidá ra naroa nchehe ra joxon cosa jian inchin rinao Dios, co jamé sicon chojni ixin jaha ra chonda ra ná vida jian para ixin Dios. Jaha ra chonda ra que nchehe ra joxon jian inchin jiquininxin ngain vidá ra.

²⁵ Mexinxin jaha ra ichondaha ra que nichja ra mentira, sino que cada ra ndache chó ra joxon tti ndoa, ixin cain na já na rroçho parte de cuerpoe Jesucristo.

²⁶ Si tsoñao ra, pero ncheha ra jianha, co tançhjangaha ra coraje mé sehe ngain ansean ra ngoixin nchanho.

²⁷ Chjeha ra inçinji ni rioho oportunidad de sehe nganji ra.

²⁸ Si çhonja ra vaguehe ra cosé iná chojni, jai incheha ra jamé, icha jian nchehe ra ná ça jian conixin rá ra para que jamé nchao sacha ra tomia ra co jamé rrochonda ra nchion tomi para tsjenguijnaxin ra chojni nao.

²⁹ Nichjaha ra palabra jianha, sino que tangui ra nichja ra joxon palabra jian que tsjenguijna ngain espirítue cain chojni que tsinhi, co palabra mé sicao ná cosa jian ngain chojni mé.

³⁰ Co çonhi cosa jianha nchehe ra para que sechinha Espíritu Santo de Dios nganji ra, ixin Dios rroanha Espíritu jiji nganji ra para ná señal que jaha ra oçojni jehe co jañá sintte ra hasta ngain tti nchanho que jehe tsjehe sincheroa ra de cainxin tti jianha que nchehe ra.

³¹ Ttenchjianha ra coraje co itoñaoeha chó ra co itoyaotthea chó ra co ifeoha çoache chó ra co incheha ra cosa jianha.

³² Ncheha ra cain mé, dintte ra chojni jian, co ttiaconoehe chó ra ná co ná ra co nchetjañehe chó ra ná ra co ná ra, jamé inchin Dios jointtatjañaha ra jaha ra ixin ditticaon ra Jesucristo.

5

Quexén jiquininxin sintte chojni Dios

¹ Jaha ra oxenhe Dios que jehe anto rinao, mexinxin chonda ra que sinchehe ra jian inchin jehe nchehe.

² Rinao chó ra ngain vidá ra, jamé inchin Jesucristo rinao na cainxin na. Co inchin chojni are saho vagoen na coleco para que Dios vanchetjañehe na tti jianha que vanchehe na, cai Jesucristo çanjo venhe jamé para que já na vitjañá na para cainxin tiempo tti jianha que nttoho na. Co Dios anto joincheçoxinhi tti joinchehe Jesús para cjoenguijna na cainxin na.

³ Co jai jaha ra que oçojni Dios ra, ni ichondaha ra que rrořaxaon ra de sintteçinchoho ra iná nçhi que jeha nçhiçhiha ra, ni de quexeho iná cosa jianha, ni de rrochonda ra anto tsje cosa.

⁴ Nichjaha ra palabra grosería, ni palabra que çonhi xé, ixin jiquininxinha que chojni Dios rronichja jañá; icha jian danjo ra gracias ngain Dios.

⁵ Jaha ra onoha ra que ixin chojni jianha çhoaha rrochonda na parte ngain tti ttetonha Jesucristo co Dios. Jiji rroçho tti chojni que deçoacaho nçhi que jeha nçhiçhihi, o nchehe

iná cosa jianha, o que rinao rrochonda anto tsje cosa, ixin jehe tti icha rinao rrochonda tsje cosa de ntthi ngataha nontte co xaxaonha de ixin Dios, chojni mé xajeho inchin jehe tti nchesayehe ídolo.

⁶ Dittoaxinha ra para sinttayaha ra icanxin chojni conixin palabra que xonhi xé ixin jamé ttixin castigoe Dios anto soji ngain tti chojni que ditticaonha tti ttetonha Dios.

⁷ Ni tatoha ra cain chojni que nchehe jamé.

⁸ Are saho jaha ra vintte ra inchin ngain tti naxin xehe, pero jai ote ra inchin ngain joadingasán ixin ditticaon ra Jesucristo co te ra inchin nacoa chojni conixin jehe. Mexinxin cain tiempo nchehe ra inchin nchehe chojni que te ngain joadingasán,

⁹ Ixin joadingasán mé tti ttjenguijna na para nttoho na jian ngain chojni, co para nichja na tti ndoa, co para nttoho na inchin jiquininxin ngain vidá na.

¹⁰ Tangui ra nchehe ra jeho tti rinao Jesucristo.

¹¹ Ncheha ra cosa que xonhi xé que nchehe tti chojni que rridinte inchin ngain tti naxin xehe. Sino que nchenohe ra chojni mé que ixin tti jehe na tenchehe na, mé jianha.

¹² Co hasta soaxin rronichja ni tti jehe na nchehe na jimao.

¹³ Pero are cain mé rrořago ngain joadingasán, cainxin tsononxin, ixin joadingasán sinchenonxin cainxin.

¹⁴ Mexinxin ojítaxin:

Xingamaha, jaha que tarrichin,
dingattjenxin de ngayehe nindadiguenhe,
co Jesucristo sinttangasanha jaha.

¹⁵ Mexinxin ttijho ra cuidado jian tti jaha ra sinchehe ra. Ncheha ra inchin chojni que xonhi chonxin, sino que nchehe ra inchin chojni que chonxin jian.

¹⁶ Co nchegonda ra cada oportunidad que rrochjá ra Dios para nichja ra joajné jehe ngain icha chojni ixin ngain tiempo jihí anto tsje chojni tenchehe jianha.

¹⁷ Co dintteha ra chojni que ttinxinha de ixin Dios sino que tangui ra ttinxin ra jian quehe rinao Jesucristo.

¹⁸ Dinttecoanha ra ixin tti coan ni ndanchetján ni. Sino que cain nchanho dintte ra conixin joarrixaon ra jian co dittoaxin ra que Espíritu Santo tsetonha ngain ansean ra.

¹⁹ Ndache chó ra naná ra conixin salmo, co tsje ra himno co coro, jamé jaha ra rrotsje ra co sinchecoanxinhí ra Jesucristo conixin ansean ra.

²⁰ De cainxin cosa jaha ra danjo ra gracias ngain Dios Ndodá na de ixin joachaxín Jesucristo, tti chonda cain joachaxin para ixin ján na.

Tti jiquininxin sinchehe ni conixin nindoha ni are oditticaon ni Jesucristo

²¹ Chondehe chó ra respeto cada ra ixin jamé rrořago que chonda ra respeto ngain Dios.

²² Jaha ra řo nchí ra ditticaon ra tti tsetonha ra xixiha ra, jańá inchin jaha ra ditticaon ra tti ttetonha Jesucristo.

²³ Ixin xí tti jiquininxin ttetonha ngain nchíchíhi, jamé inchin ttetonha Jesucristo ngain cain chojni que ditticaon jehe. Co cai jehe Jesucristo tti ttjenguijna ján na para rrochondaha na castigo de cain cosa jianha que nttoho na, co cain na řo dotticaon na jehe te na inchin cuerpoe jehe.

²⁴ Jańá inchin cain chojni Jesucristo ditticaon na tti ttetonha jehe, jamé cai cain nchí chonda ncha que sitticaon ncha cain tti tsetonha xixihi ncha.

²⁵ Jaha ra řo xí ra rinao ra řhiha ra, jańá inchin Jesucristo jehe rinao chojni, hasta joanjo vidé para ixin jehe na.

²⁶ Jańá joinchehe jehe para joincheroa ansean na řo dotticaon na jehe para ixin Dios. Co jehe jointtaroa na ixin ján na joiguittexin na jinda co cai conixin palabré jehe.

²⁷ Jańá joinchehe jehe para que are ján na tsonchienhe na ngattoxon con jehe, xonhi cosa jianha sehe ngain ansean na, sino que sontte na joxon chojni jian para ixin jehe que rrochondaha na ni ná mancha jianha ngain ansean na are mé.

²⁸ Jamé xí cai chonda que sinao xa nchíchíhi xa, inchin jehe xa rinao xa cuerpoe xa. Co xí que rinao nchíchíhi, jamé rinao xa cuerpoe xa cai.

²⁹ Seguro que xonhi chojni tti rinao ha cuerpoe; cain ni rinao ni cuerpoe ni ixin chjé ni cuerpoe ni tti techonxin cuerpo, co dicao ni cuidado de ixin jehe cuerpo. Co jamé nchehe Jesucristo nganji na ján na řo dotticaon na jehe,

³⁰ Ixin ján na cuerpoe Jesús, co ján na de ngain cuerpoe jehe inchin de nntaohé co nntaloroé.

³¹ Mexinxin ndačo ngain tti jitaxin Palabré Dios: “Xí sachjendehe xa ndodé xa co janné xa, para seao xa jeho řhihi xa, co cayoixin na sintte na inchin nacoa chojni.”

³² Co jihí ná cosa jimao que anto importante, co janha ndačjan que rrořo de ixin Jesucristo conixin cain chojni que ditticaon jehe.

³³ Pero cai rrotho que cada ra chonda que rinao ra n̄chichiha ra, inchin rinao ra cuerpoa ra. Co jaha ra xo n̄chí ra chonda que rrochonda ra respeto ngain xixiha ra.

6

¹ Co jaha ra xo xannchinnchinchjan ra, chonda que sitticaon ra tti tsetonha ra ndodá ra co janná ra ixin jamé jiquininxin sinchehe chjan que ditticaon Jesucristo.

²⁻³ “Ttjiho ra respeto ngain ndodá ra co ngain janná ra para que rrochaha ra co para que sinttechon ra tsje nano ngataha nontte jihi.” Jihi tti saho mandamientoe Dios que ndacho jehe sinchenchaon cain chojni que sinchehe jamé.

⁴ Co jaha ra, xo ndodaha ra, nchehe ra feo ngain xanha ra para que jehe xan soanha xan desanimado, sino que nchecoehne ra xan sitticaon xan cain tti tsetonhe ra xan, co nchecoehne ra xan que x̄én sitticaon xan Jesucristo, tti chonda cain joachaxin para ixin ján na.

⁵ Co jaha ra, xo ninchehe xa ra, ditticaon ra tti tsetonha ra ninajnia ra nttihi ngataha nontte, ditticaon ra na conixin respeto, co chonda ra joaxaon ngain na, co ditticaon ra na conixin ansean ra jian. Jañá inchin jaha ra rrojinchehe ra x̄é Jesucristo.

⁶ Are sinchehe ra x̄é na, doan ra purado jecha are tatetsjehe na para sittoaxin ra jian ngain na, sino que nchehe ra xa inchin ninchehe x̄é Jesucristo, co nchehe ra xa jian inchin rinao Dios.

⁷ Nchehe ra xa mé conixin jian ansean ra inchin ná xa que jaha ra rrojinchehe ra ngain Jesucristo, co nahi ngain chojni.

⁸ Ixin jaha ra onoha ra que cada chojni masqui ninchehe xa de ngain iná chojni o tti chojni que jaha ninchehe xa, pero cada chojni Jesucristo tsjenguehe na hna inchin tti jian que jehe na joinchehe na.

⁹ Co jaha ra, xo najni ra, xajeho jamé nchehe ra jian ngain ninchehe x̄á ra, co xonhi tiempo nchexaon ra na. xaxaon ra que jaha ra conixin jehe na xajeho chojni Jesucristo que tjeen ngajni, co para ixin jehe, jaha ra jaha icha jian ra que jehe na; para ixin jehe cain chojni xajeho na.

Tti tsetoxin chojni Dios ngain espíritu jianha

¹⁰ Co jai, hermanos, dintte ra soji ngain Jesucristo de ixin tti anto soji joachaxin que jehe chonda ixin jaha ra te ra inchin nacoa chojni conixin jehe.

¹¹ Co nchegonda ra cain joachaxin que Dios chjá ra, para que sintte ra soji are inchínji rinao sinttayaha ra.

¹² Ixin jaha tettetocoho na chojni de ntao co loro, sino que ján na tettetocoho na espíritu jianha que choha dicon ni. Co espíritu mé chji ngataon chintto, co espíritu mé tti chonda joachaxin ngain tti chojni que ditticaonha Jesucristo.

¹³ Mexinxin jaha ra dayehe ra cain joachaxin que Dios chjá ra para que nchao tsixinha ra ngain tti nchanho que tsí are anto tangui tsonha ra, co después de sinchehe ra jamé, nchehe ra sigue de dintte ra soji ngain Dios.

¹⁴ Jamé dintte ra soji ngain Dios. Dinttechiha ra jian conixin tti palabra ndoa que chjá ra Dios ixin palabra mé inchin cinturoen xisoldado. Co tti jian que nchehe ra, mé tti rrocayacoen cuerpoa ra are inchínji sinao sinttayaha ra inchin tti chia que dinttengá pechoe xisoldado para que didoha xa espada are tteto xa conixin espada.

¹⁵ Dintte ra listo para dindache ra chojni joajné Jesucristo inchin are xisoldado tjanga xa tteroe xa para dintte xa listo ngain guerra.

¹⁶ Co tti jaha ra ditticaon ra, mé inchin ná escudo para cayacoenxin ra cain cosa jianha que rrorroanha inchínji, inchin xisoldado cayacoenxin xa escudo cain fleché chíjno que tja xicontrarioe xa.

¹⁷ Co tti vida nroaxin que chonda ra, mé inchin casco que sinttengá já ra inchin cascoe xisoldado. Co palabré Dios nchegonda ra inchin espada que Espíritu Santo chjá ra.

¹⁸ Nchecoanxinhi ra Dios para que nchao sinchehe ra cain cosa jihi; nchetsenhe ra ñao Dios co danchiehe ra cainxin tiempo conixin joachaxin Espíritu Santo. Co para que nchao sinchehe ra cain jihi, dintte ra listo co xonhi tiempo doan ra desanimado, co nchetsenhe ra ñao Dios para que jehe tsjenguijna cain chojni jehe.

¹⁹ Cai nchetsenhe ra ñao Dios para que jehe rrochjana palabra que janha rronichja are rronhattjan icha chojni joajné jehe, co para que janha rroxaonha na rronichja are sinttanoa na quehe rrotho joajné Jesucristo que danjo iná vida nroaxin co joajna mé nonxinha vehe are saho.

²⁰ Dios chjana xa de rrihi representanté jehe para nichja joajna jihi. Co mexinxin rriaxinnanxin jai ngain cárcel. Nchetsenhe ra ñao Dios para que jehe tsjenguijna para rroxaonha na janha de rronhattjan icha chojni joajna jihi inchin jiquininxin.

Pablo joexin cjin carté co rroanha joajna

²¹ Tíquico, jehe cai anto jian ditticaon Jesucristo, co tti ján na anto rinao na, co tti cain tiempo ttjenguijna na janha ngain xé Jesucristo, jehe rronhattjo ra de cain tti janha jitonna, co de cain tti janha rrinttaha.

²² Mexinxin janha rroanha jehe nganji ra para que jehe rronhattjo ra de quexén te na janha na nttihi, co jamé jaha ra rrochaha ra.

²³ Dios Ndadá na co Jesucristo, tti chonda cain joachaxin para ixin ján na, sanjo ngain chojni que ditticaon jehe tti chjoin que tsonohe ansén na, co tsjenguijna na para sinao chó na ixin ditticaon na jehe.

²⁴ Co Dios sinchachaon ngain cain chojni que anto rinao na Jesucristo, co que xonhi tiempo ttentoxinhi na de tti jehe na rinao na Jesucristo. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Filipos

De ngain cárcel rroanxin Pablo joajna para chojni ngain Filipos

¹ Janha Pablo na co Timoteo ninchehe xé Jesucristo techjaha ra joajna ngain carta jiji; jaha ra xo ditticaon ra Jesucristo ngain ciudad de Filipos. Co carta jiji cai para ixin cain chojni que chonda joachaxin ngayaha ra co cai para cain tti chojni que tjenguijna nichonda joachaxin ngayaha ra, que cain chojni mé conixin jaha ra chojni Dios ixin ditticaon ra Jesucristo.

² Dios Ndodá na co Jesucristo, tti chonda cain joachaxin para ixin ján na, sinchenchaon nganji ra co rrochjá ra tti chjoin que tsonohe ansean ra.

Pablo vanchetsenhe ñao Dios para ixin chojni Jesucristo

³ Cada nttiha que janha xaxanho jaha ra, janha danjo gracias ngain Dios de ixin jaha ra.

⁴ Co janha anto chahna are nttatsán ñao Dios para cainxin jaha ra

⁵ ixin cainxin jaha ra cjoenguijna ni ra para que janha nchao ndattjan icha chojni tti jian joajné Jesucristo desde are nacoexinxon ra hasta jaxon.

⁶ Dios coexinhi joinchehe tti jian ngain vidá ra, co janha chonda seguro que jehe xa sinchehe tti jian mé hasta que jaha ra sintte ra joxon jian ngain nchanho que Jesucristo tsí.

⁷ Anto jiquininxin rroaxanho jañá de ixin cain jaha ra ixin anto rinaho jaha ra ixin Dios jointtanchaon jaha ra inchin joinchenchaon na janha para tonoa na xajeho masqui janha diaxinna o masqui janha tonchián ngain xinchíxin para nttadefendé tti jian joajné Jesucristo, co para janha ndachjan que seguro ndoa co jian joajna mé.

⁸ Dios nohe que janha anto rinaho cain jaha ra, co mé tti joixin de ngain Jesucristo.

⁹ Janha are nttacoanxian Dios, janha danchia que jaha ra icha sinao chó ra co icha sinao ra Dios cai. Co danchia que tsonoha ra quexehé cosa jian para ixin Dios co jaha ra tsinxin ra cainxin cosa mé inchin Dios ttinxin,

¹⁰ para que cain tiempo tsonoha ra tsinchiehe ra tti jian. Jamé nchao rrochonda ra ná vida roa co ixonhi cosa jianha sehe nganji ra are Jesucristo tsí.

¹¹ Jañá para que vidá ra sehe inchin ná jian cosecha ixin tecao ra de cosa jian que danjo Jesucristo, jamé jaha ra sinchesayehe ra Dios de ixin vidá ra co vidá ra tsjago que jaha ra anto jian ditticaon ra Dios.

Pablo ndacho que para ixin jehe, Jesucristo mé tti vida

¹² Janha rinaho que jaha ra tsonoha ra que cain cosa que janha conná, cain cosa mé cjoenguijna na para que janha nichja tti jian joajné Jesucristo.

¹³ Mexinxin jai cainxin xisoldadoe xiemperador co cain icha chojni nohe na que janha rriaxinna por ixin ndattjan chojni joajné Jesucristo.

¹⁴ Co jai que janha rriaxinna, icha tsje chojni que ditticaon Jesús coexinhi na nichja na jehe joajné Dios co xaonha na co icha tsje confianza chonda na ngain Jesucristo, tti chonda cainxin joachaxin.

¹⁵ Ján, ndoa que canxion chojni nichja na de ixin Jesucristo pero ixin tonchjoehe na nganji janha co toñaona na, pero ittoha chojni ndoa nchehe na de jian.

¹⁶ Co tti chojni que toñaon co tonchjoehe nichja na de ixin Jesucristo ixin rinao na sintte na icha importante co nahi ixin jehe na rinao na Jesucristo, ixin cain jehe na rinao na que janha icha tangui tsonna jai que rriaxinna.

¹⁷ Pero ittoha na tenchehe na ixin rinao na Jesucristo co rinao na na janha ixin nohe na que nttihi rrihi janha ixin rrinttadefendé tti jian joajné Jesucristo.

¹⁸ Pero janha ndosennaha de quexeho de cayoi manera mé, ixin masqui jehe na nichja na de jian o ni nahi, pero jehe na xa nichja na de ixin Jesucristo. Mexinxin janha anto chahna.

Co janha xa rrochahna icha

¹⁹ ixin janha nona que cain tti janha tsonna, jiji atto jian para ixin janha ixin jaha ra nchetsenhe ra ñao Dios para ixin janha co ixin Espíritu Santo que rroanna Jesucristo tjenguijna na janha.

²⁰ Janha rinaho sinttaha cain cosa jian co jamé tsooanaha ngattoxon con Jesucristo. Janha rinaho rronichja conixin cainxin confianza inchin jaxon co para cainxin tiempo, para que icha chojni sicon na icha co icha que janha rrinttasayá Jesucristo, masqui janha rrichon o ndasenhe na.

²¹ Janha rinaho sarichon para sinttaha jeha inchin rinao Cristo, pero are ndasenne na, mé tti sacha.

²² Pero si janha xa sarichon ngain cuerpo jihi, janha xa rronhattjan chojni tti jian joajné Jesucristo, tti chonda cain joachaxin. Mexinxin janha ni nonaha quexehe tti tsinchía.

²³ Para ixin janha atto tangui para tsinchía cayoi cosa yá. Janha rrojinaho ndarroguenhe na para tsji sigarihi ngain Jesucristo, co jamé icha jian para ixin janha.

²⁴ Pero para ixin jaha ra icha jian para janha sarichon ngain cuerpo jihi.

²⁵ Co ixin janha rrihi seguro de cain jihi, janha nona que xa sittona nganji ra para que tsjenguijna ra para sitticaon ra icha co para que rochaha ra icha ngain tti jaha ra ditticaon ra.

²⁶ Co ná nchanho janha rrocjan na sasotsjaha ra iná co jamé rrochonda ra icha razón para rochaha ra de ixin Jesucristo.

²⁷ Janha rinaho que dintte ra jian ngain vidá ra inchin ttetonha joajné Jesucristo. Jamé para que si janha saso sasotsjaha ra o cjin sarihi de jaha ra, janha sayá joajna ixin cainxin ra jaha ra xa ditticaon ra Jesucristo co te ra inchin naoa chojni, co nichja ra tti jian joajné Jesucristo,

²⁸ co ninchin dittoaxinha ra xaon ra ngain chojni que ningaonha ra. Cain jihi ná señal atto nonxin que jehe na teditján na de ixin cosa jianha que nchehe na, pero xago cai que jaha ra rrochonda ra iná vida naroaxin, co cain jihi ttixin de ngain Dios.

²⁹ De ixin Jesucristo jaha ra chonda ra oportunidad jeoha de ditticaon ra jehe, ixin cai para tangui tsonha ra de ixin jehe.

³⁰ Jaha ra conixin janha tenttoho na xajeho xa de ixin joajné Jesucristo. Jaha ra ovicon ra icha saho queXén jointtaha xa mé, co jai noha ra queXén janha xa rrinttaha xa mé.

2

Tti nchehe Jesucristo para ixin ján na

¹ Jamé Cristo chjá ra ánimo, co chonda ra consuelo ixin jehe rinao ra, co chonda ra xajeho Espíritu Santo que jehe rroanha, co ttiaconoehe ra chojni.

² Si ndoa cain jihi chonda ra, rinao chó ra co ditticaon chó ra para que cain ra sintte ra inchin naoa chojni, co jamé janha anto rrochahna.

³ Xonhi cosa sinchehe ra para que jaha ra sintte ra icha importante, ni ncheha ra que jaha ra icha noha ra, co xaxaonha ra que jaha ra icha jian ra que icha chojni; sino que naná ra xaxaon ra que icha chojni icha jian na que jaha ra.

⁴ Ttjeha ra tti jian jeha para ixin jaha ra; sino que ttjé ra tti jian para cain icha chojni cai.

⁵ Janha rinaho que cain jaha ra xaxaon ra inchin Jesucristo xaxaon

⁶ ixin masqui jehe cai Dios, pero joinaoha joinchegonda joachaxin que Dios chonda.

⁷ Jehe joinchegondaha joachaxin mé are jehe concijhi inchin ná xí co vehe inchin ná nchehe xa.

⁸ Co are jehe vehe ná xí, jehe vittoxin co vitticaon cain tti ndaCHO Dios hasta jehe ndavenhe, masqui soaxin de que jehe ndavenxin nganito cruz.

⁹ Mexinxin Dios chjé cain joachaxin co Dios ndaCHO que icha importante nombré Jesús que de cainxin nombre.

¹⁰ Jamé joinchehe Dios para que cain na rrochonda na respeto are tsinhi na nombré Jesús. Co sinttettixin nttajochjihí cainxin tti te ngajni co cainxin tti te ngataha nontte co cainxin tti te ngain infierno

¹¹ para que cain yá rrondaCHO que ixin Jesucristo, mé tti chonda cainxin joachaxin, co jamé tosayexin Dios Ndodá na.

Cain chojni que ditticaon Jesucristo inchin ná conotse que tetongúxin are naxin xehe

¹² Mexinxin hermanos, inchin jaha ra vitticaon ni ra janha cainxin tiempo are janha joarihi nganji ra, ditticaon ra icha jai que cjin rrihi de nganji ra. Dios ondaCHO que jaha ra ixonhi castigo rrochonda ra ixin ditticaon ra Jesucristo. Mexinxin cain nchanho nchehe ra jian. Co chonda ra cuidado que ncheha ra cosa jianha que Dios ncheXoxinha

¹³ ixin jehe Dios tti chjá ra tti jian que xaxaon ra, co ttjenguijna ra para sinchehe ra jamé inchin jehe rinao.

¹⁴ Cain yá nchehe ra, pero toñaoha ra ni ttetocoha chó ra

¹⁵ para que ni ná chojni rrondaCHOha que ixin jaha ra tenchehe ra cosa jianha co para que jaha ra sintte ra joxon chojni jian. Jaha ra xenhe Dios, mexinxin dintte ra jian ngayehe chojni que nchaoha nchehe. Jaha ra tongúxin ra ngayehe chojni mé inchin cain conotse ngain tti naxin xehe

¹⁶ are jaha ra tsjiohe ra na tti joajna que danjo iná vida naroaxin. Jañá, para que are tsí Jesucristo janha nchao tsonona chjoin de ixin jaha ra ixin are mé janha tsonona que tti xa que janha jointtaha jeha jamaoncoa ni coingaha jamaoncoa.

¹⁷ Co masqui janha senhe na para que cuerpona rroxettexin de tti jaha ra danjo ra ngain Dios ixin jaha ra ditticaon ra jehe, janha chahna co rinaho que cain jaha ra rrochaha ra cai.

¹⁸ Chaha jaha ra cai co chaha ra inchin janha chahna.

Tti joinchehe Timoteo co Epafrodito

¹⁹ Jesucristo, tti chonda joachaxin para ixin ján na, si jehe sinao que janha rrorroanha Timoteo, janha rrorroanha jehe toin para siji sitsjaha ra co are jehe roocjan, janha rrochahna are janha tsonona de ixin jaha ra.

²⁰ Ixin nttihi ixonhi iná chojni que chonda janha que rroxaxaon inchin janha, co xonhi iná chojni xaxaon de ixin que xén sintte ra jian.

²¹ Cain chojni nttihi icha rinao na jehó xé na nchehe na co nahi xé Jesucristo.

²² Pero jaha ra onoha ra que Timoteo jehe anto jian co cjoenguijna na janha para nichja na joajné Jesucristo inchin ná chjan que ttjenguijna xan ndodé xan.

²³ Mexinxin, janha rinaho rrorroanha Timoteo para siji sitsjaha ra are janha tsonona quehe xaxaon chojni sinchehe nganji na nttihi tti rrihi.

²⁴ Co cai janha chonda confianza que Jesucristo, tti chonda cainxin joachaxin para ixin ján na, sanjo joachaxin para que janha mismo sasotsjaha ra.

²⁵ Pero cai xaxanho que rrogonda rrorroanha ra Epafrodito, tti xicompañerona de ngain xa que janha rrinntaha, tti jaha ra rroanna ra para cjoenguijna na ixin jehe vachjana tti janha vagondana.

²⁶ Jehe anto rinao sicon cain jaha ra co anto jita joachjaon ixin jaha ra conoha ra que ixin jehe conihi.

²⁷ Ján, ndoa que jehe venihi hasta merocoa ndarroguenhe, pero Dios coiaconoehe jehe, co jeoha jehe coiaconoehe Dios, cai janha, para que janha icoaha icha joachjaon, jehó joachjaon que tti janha chonda jaxon.

²⁸ Mexinxin janha anto rinaho rrorroanha jehe Epafrodito nganji ra para que jaha ra anto rrochaha ra are sicon ra iná, co para que janha isarichinha icha.

²⁹ Dayehe ra jehe Epafrodito chjoin ngain ansean ra inchin xanchó ra ixin jehe co jaha ra ditticaon ra Jesucristo, tti chonda cainxin joachaxin. Co cainxin nchanho chjehe ra respeto cain chojni que nchehe inchin jehe Epafrodito,

³⁰ Ixin merocoa ndarroguenhe por ixin jehe joinchehe xé Jesucristo. Jehe coín en peligro vidé are jehe cjoenguijna na janha ixin jaha ra mismo choha cjoenguijna ni ra.

3

Pablo nichja de ixin vida que ján jian jí

¹ Co jai janha rinaho que rrochaha ra ngain Jesucristo, tti chonda cain joachaxin. Para ixin janha, xonhi molestia si roocjan na rronhattjo ra iná tti ocjin na ixin nona que sonda para ixin jaha ra.

² Mexinxin janha rrindattjo ra iná que ttjiho ra cuidado de cain chojni que nchehe jianha inchin tti conia ditsi; cain chojni mé ta xohe de circuncisión ngain cuerpo para ndacho que ixin jehe mero chojni Dios.

³ Pero ján na tti chojni que ndoa techonda na xohe ngain ansean na ixin ján na tti nttosayehe na Dios ngain ansean na co chá na ixin ján na chojni Jesucristo na, co chondaha na confianza ngain costumbré chojni.

⁴ Si costumbré chojni rocojian ngattoxon con Dios, janha cai rrochonda confianza ngain cain costumbré mé. Co xonhi chojni rrochonda icha razón que janha para rrochonda confianza ngain costumbré mé.

⁵ Janha coá xohe de circuncisión are janha joarichonda jni nchanho de concjina, co janha razé chojni Israel, co janha de ngain grupoe Benjamín, co janha chojni hebreo na de are concjina ixin jannana co ndodana cayoi na chojni hebreo na. Janha vaguitticanho ley de chojni judío inchin tjago xifariseo.

⁶ Co janha anto joinao que cainxin chojni rrojinchehe na inchin costumbré chojni judío, mexinxin feo vanttaha ngain chojni que vitticaon Jesús. Co ngain vidana que janha joarichonda xonhi chojni vanichja ixin janha vaguitticaonha ley mé.

⁷ Pero cain cosa jihi, are saho para ixin janha anto jian, pero jai ndačhjan que cain cosa mé xonhi xé ixin jai janha joatsoan tti mero ndoa que ttetonha Jesucristo.

⁸ Co icha que yá, janha ndačhjan que cain cosa mé xonhi rentte ixin icha rentte joatsoan palabré Jesucristo, tti chonda joachaxin para ixin janha. De ixin Jesucristo janha

jointtatján cainxin mé co ndächjan que cain cosa mé inchin caxineno ixin icha rentte que janha cjan na chojni Jesucristo

⁹ co rrihi conixin jehe. Icha saho janha vařaxanho ixin jian na ixin vaguitticanho ley de chojni judío. Pero jai nona que jehó Dios nchao ndácho si janha jian na o ani nahi, co jehe ndoa ndácho ixin jian na pero jehó ixin ditticanho ngain Jesucristo.

¹⁰ Joxon rinaho rrochonxin icha co icha de ixin Jesucristo co tsonona tti joachaxin que xechonxin are ndavenhe, co tsonona tti tangui que jehe conohe co tsonna inchin jehe conhe are ndavenhe,

¹¹ para que janha nchao rrochonda confianza que ján rroxechon na conixin niondadenhe.

Pablo ndácho tti jiquininxin sinchehe ni para rrochonda ni iná vida naroaxin

¹² Jeha rrocho que ixin janha ojoacha cain yá, ni jeha rrocho que ixin janha ojian na, nahi, rrochoha jamé ixin janha řa sinttaha sígue icha ixin rinaho sarihi inchin Jesucristo rinao.

¹³ Janha mismo rrindattjo jaha ra que janha řa chondaha cain jihi, tti janha rrinttaha que janha rrotjařana cain cosa que ojointtaha, co jai janha sinttaha lucha para sacha tti jichonhe para ixin janha

¹⁴ para que janha tsjena řana co sacha tti premio que Dios que ttjen ngajni danjo nganji ján na ixin dotticaon na Jesucristo.

¹⁵ Janha rinaho que cainxin ra, řo anto jian ttinxin ra tti dotticaon na, řaxaon ra řajehó inchin janha řaxanho. Pero si ná cosa rrořaxaon ra ojé, Dios tsjagoha ra tti ndoa.

¹⁶ Pero chonda na que rrořaxaon na co sonttoho na inchin tti ocoangui na.

¹⁷ Rinaho janha que nchehe ra inchin janha rrinttaha, co cai nchehe ra caso tti chojni que tenchehe inchin janha na jointtacoanha ra.

¹⁸ Janha ondattjo ra tsje nttiha, co řa cjan na rrindattjo ra iná hasta conixin ndacon que jai řa jí tsje chojni que nchehe jianha ixin jehe na ndosenha na que Cristo ndavenxin nganito cruz para ixin jehe na.

¹⁹ Pero ngain nchanho que tsí, cain chojni mé tsji na ngain infierno para cainxin tiempo ixin dios de jehe na jehó tti rinao cuerpoe na, co tti jehe na tenchehe na tonohé na anto řhjoin co řaxaonha na tosoé na ixin tti jehe na tenchehe na jehó joasoaxin para ixin jehe na. Jehe na jehó řaxaon na ngain cosa de ngataha nontte.

²⁰ Pero ján na ngajni jí nontteha na co techonhe na que de nttiha tsixin Jesucristo, tti chonda joachaxin para ixin ján na, co jehe tti tsjenguijna na para rrochondaha na castigo de cain tti jianha que jointtoho na.

²¹ Jehe tsentoxinhi cuerpoa na tehe, tti cuerpo que ndadenhe, para sayé na cuerpo inchin cuerpo que jehe chonda ngajni. Co jehe sinchehe mé conixin joachaxin que jehe chonda para ttetonhe cainxin cosa.

4

Cainxin tiempo chaha ra ngain Jesucristo

¹ Janha anto rinaho sicon jaha ra. Co janha anto chahna de ixin jaha ra co jaha ra inchin tti sacha janha de ixin řa que rrinttaha janha. Co rinaho que jaha ra cainxin tiempo jian sitticaon ra Jesús, tti chonda joachaxin para ixin ján na.

² Janha nttatsán řiao cayoi něhi que dinhi Evodia co Síntique que sitticaon chó něha inchin rrocji chó něha ixin cayoi něha ditticaon něha Jesús, tti chonda joachaxin para ixin ján na.

³ Co jaha, tti xicompañerona que anto vitticaon na de ngain řa que janha rrinttaha, janha rinaho que jaha tsjenguijna cayoi něhi mé ixin jehe něha cjoenguijna na něha janha para ndattjan chojni tti jian joajné Jesucristo, cayoi něhi mé conixin Clemente cai co icanxin chojni que cjoenguijna na janha. Nombré cain chojni mé otetaxin ngain libroe Dios tti tetaxin nombré cain chojni que rrochonda iná vida naroaxin.

⁴ Cainxin tiempo Jesucristo jí ngain ansean ra, mexinxin janha rinaho que cainxin tiempo chaha ra ngain jehe. Rrocjan na rrondattjo ra iná: řchaha ra cainxin tiempo ngain jehe tti chonda joachaxin para ixin ján na!

⁵ Janha rinaho que cain chojni rrochonxin jaha ra ixin nda ansean ra para cain chojni ixin Jesucristo, tti chonda joachaxin para ixin ján na, otoiń tsí.

⁶ Taha ra joachjaon de ni ná cosa; cainxin tiempo ndache ra Dios cainxin tti tsonohe ansean ra, co danchiehe ra cain tti sondaha ra, però danjo ra gracias ngain jehe.

⁷ Cottimeja jehe Dios rrochjá ra tti anto řhjoin tsonohe ansean ra que ni cain chojni řhoha tsinxin ixin mé anto tsje co anto jian. Co si jaha ra chonda ra tti řhjoin que tonohé ansean ra, řonhi joachjaon rrochonda ansean ra ixin ditticaon ra Jesucristo.

řaxaon ra ngain cosa jian

⁸ Co jai saho que janha tsjena carta jihi, rinaho rronhattjo ra icha. Ttenchjinha ra ngain joarrixaon ra cain cosa ndoa, co cain cosa que jiquininxin respeto, conixin cainxin cosa que chonda jian joarrixaon, cain cosa que joxon jian, cain cosa que sincheꝑoxinhi ansén chojni jian, co cain cosa que chojni nichja jian de ixin cosa mé. Jaha ra ꝑaxaon ra cainxin cosa que jian co que jiquininxin tsosayehe.

⁹ Nchehe ra tti janha jointtacoanha ra. Tangui ra tti coinhi ra que ndaꝑhjan janha co tti vicon ra jointtaha. Nchehe jaha ra cain yá co Dios, tti chjé tti ꝑhjoin ngain ansén chojni, sehe nganji ra.

Tti joanjo chojni filipense ngain Pablo

¹⁰ Janha anto chahna ngain Jesucristo, tti chonda joachaxin para ixin ján na, ixin jaha ra ocjan ra ꝑaxaon ni ra janha. Janha ndaꝑhjanha ixin ndatjañaha ni ra jeho ixin joichondaha ra oportunidad para cjoenguijna ni ra.

¹¹ Pero jeha ndaꝑhjan ixin janha anto gondana ixin janha onona chahna si janha chonda tsje o tsjeha.

¹² Janha nona queꝑén vidé ni are noa ni, co nona queꝑén vidé ni are anto chonda ni. Janha tonona ꝑhjoin ngain ansenna de ngain quexeho cosa mé; janha tonona ꝑhjoin ngain ansenna si sehe jicaon o jidenhe jintta, co cai are xehe cosa, co cai are naꝑoinxon chonda.

¹³ Janha nchao tsixinna ngain cain cosa ixin Jesucristo nchesoji na janha.

¹⁴ Masqui jamé, jaha ra joinchehe ra jian ixin cjoenguijna ni ra janha de ngain cain cosa tangui que dattoa.

¹⁵ Jaha ra ꝑo Filipo ra noha ra cai are janha sacjoixin de ngain regioen Macedonia co coexian ndattjan chojni tti jian joajna, jeho jaha ra ngain nihngo nttiha Filipos cjoenguijna ni ra janha ixin rroanna ni ra tti janha gondana. Jaha ra joinchehe ra jamé ixin chaha ra ixin janha tti jointtacoanha ra queꝑén sitticaon ra Jesús.

¹⁶ Are janha ꝑa joarihi ngain Tesalónica, jaha ra rroanna ni ra tomi icha que ná nttiha para que vagondana.

¹⁷ Pero janha ꝑaxaonha jeho ngain tti janha dayá ixin icha rinaho que jaha ra rrochonda ra icha premio ngain Dios.

¹⁸ Janha ovayá cainxin hasta ovayá icha de tti dondana. Conixin tti jaha ra rroanna ni ra ngain Epafrodito janha chonda tsje. Tti tomi que jaha ra rroanna ni ra, mé inchin tti tsjoca que anto ꝑhjoin ꝑajni que jaha ra danjo ra ngain Dios que jeha ncheꝑoxinhi.

¹⁹ Dios que ttjen ngajni chonda cain cosa jian co rrochjá ra cain tti rrogondaha ra ixin jaha ra ditticaon ra Jesucristo.

²⁰ Co Dios Ndodá na que ttjen ngajni, ¡nchecoanxinhi ra Ndo cainxin tiempo! Amén.

Pablo joexin cjin carté co rroanha joajna

²¹ De ixin nombré Jesucristo chjehe ra joajnana cainxin chojni que ditticaon Dios. Chojni que ditticaon Dios que te nganji na nttihi rroanha na joajna para ixin jaha ra.

²² Cainxin chojni que te nttihi co ditticaon na Dios, co icha mero ninchehe xé xiemperador romano rroanha ra na joajna.

²³ Jesucristo, tti chonda joachaxin para ixin ján na, sinchenciaon cainxin jaha ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Colosas

Pablo rroanha joajna jihi ngain chojni de ciudad de Colosas

¹ Janha Pablo na, Dios joinao que janha rrihi ná representanté Jesucristo. Conixin Timoteo,

² Janha cjin na carta jihi para nganji jaha ra xó jian ditticaon ra Jesucristo ngain ciudad de Colosas, xó tequininxin ra ngain Dios. Dios, Ndodá na, co Jesucristo, tti chonda cain joachaxin para ixin ján na, sinchenchaon nganji ra, co rrochjá ra tti chjoin que tsonohe ansean ra.

Pablo nchetsenhe ñao Dios para ixin cain chojni que ditticaon Jesucristo

³ Are janha na danjo na gracias por ixin jaha ra ngain Dios, Ndodé Jesucristo, cai nttatsán na ñao jehe por ixin jaha ra.

⁴ Ixin janha na ndachjenji na na que ixin jaha ra ndoa jian ditticaon ra Jesucristo, co ixin anto rinao ra cain chojni Dios.

⁵ Jamé nchehe ra ixin jaha ra chonda ra seguro que Dios jittenchjinha iná vida naroaxin para ixin jaha ra nttiha ngajni. Jaha ra coexinhi ra joichonda ra seguro de ixin mé are coinhi ra tti joajna ndoa, que mé tti jian joajné Jesucristo.

⁶ Jehe joajna jihi, tti coinhi ra, co jai chojni nichja na joajna jihi ngoixin mundo, co cain lugar tsje chojni ditticaon na joajna jihi xajeho inchin are jaha ra vitticaon ra desde ngain tiempo que jaha ra coinhi ra que ixin Dios anto rinao chojni co conoha ra que jihi ndoa.

⁷ Cain jihi tti jointtaoanha ra Epafras, tti hermano que ján na anto rinao na, co joinchehe xa conixin janha na. Co jehe mé ná jian ninchehe xé Jesucristo para tsjenguijna ra.

⁸ Co jehe mé tti joindachjenji na que ixin jaha ra jian ditticaon ra Jesucristo, co ixin anto rinao chó ra.

⁹ Mexinxin janha na, desde ngain nchanho que conona na cain jihi, tinttoaha na de nttatsán na ñao Dios para ixin jaha ra, co danchia na Dios que jehe sinttagatsoan ra jian tti jehe rinao, co sinttaquianxin ra cain cosa jian de ixin Espíritu Santo.

¹⁰ Jañá para que jaha ra nchao sinchehe ra inchin jiquininxin nchehe chojni Jesucristo. Rrocho que cain tiempo sinchehe ra tti rinao Jesús, co inchin jaha ra sanjo ra ná jian cosecha ngain Jesucristo de cain cosa que jaha ra sinchehe ra. Co cai jaha ra sinchehe ra sigue rrochonxin ra icha co icha de ixin Dios.

¹¹ Co janha na danchia na que Dios sinttasoji ra conixin tti anto joachaxin que jehe chonda para que nchao tsixinha ra conixin paciencia ngain cainxin cosa tangui co masqui tangui jí, jaha ra rroché ansean ra ixin tsixinha ra ngain cain mé.

¹² Co jaha ra danjo ra gracias ngain Dios ixin jehe tti jointtajian na para sayé na parte ngain tti rrochjé chojni jehe que chji ngain joadingasán, rrocho tti chojni que chonxin jian de ixin jehe.

¹³ Dios vinttjianxin na de ngain joachaxin tti naxin xehe, rrocho que vinttjianxin na de ngain tti jianha, co jehe chjá na jai parte ngain tti ttetonha Xenhe que jehe anto rinao.

¹⁴ Co Xenhe ndavenhe Xan de nganito cruz, jamé para cjoenga Xan hna cainxin tti jianha que jointtoho na, co jamé Dios jointtatjañá na cain tti jianha mé.

Ján na anto chjoin tonoa na ngattoxon con Dios ixin ovenhe Jesucristo para ixin ján na

¹⁵ Jehe ni choha dicen ni Dios, pero jehe goan ná xí co jói ngataha nontte para que chojni nchao vatsoan na jehe Dios. Co jehe mé joiconhe are concjiji Cristo, tti Xenhe Dios, co jehe Cristo ovehe icha saho de que cain cosa que jí rroconchjian.

¹⁶ Co de ixin jehe Cristo, Dios joinchechjian cain cosa que jí ngajni co nttihi ngataha nontte. Cosa que choha dicen ni conixin cosa que nchao dicen ni, Dios joinchechjian cain por ixin Cristo. Cai de ixin Cristo Dios joinchechjian cain tti ángel que ttetonha nttiha ngajni. Cain mé conchjian de ixin jehe co para ixin jehe.

¹⁷ Cristo ovehe icha saho que cainxin cosa, co jehe tti jinda cain cosa jihi para jian sintte cain cosa.

¹⁸ Co cai Cristo inchin já cain chojni que ditticaon jehe, co cain chojni mé inchin cuerpoe jehe. Co jehe tti danjo vida ngain cuerpo jihi. Jehe tti saho xechon de ngain tti ndavenhe, co mexinxin jehe tti icha importante de cain chojni.

¹⁹ Co Dios joinao que cain joachaxin que jehe chonda sehe ngain Cristo cai para que Cristo nchao tsetonhe cain cosa.

²⁰ Co cai joinao Dios que de ixin Cristo, Dios ncheroa cain cosa que jí ngataha nontte, co cain cosa que jí ngajni. Co jili joinchehe are Cristo ndavenxin nganito cruz para ixin ján na.

²¹ Are saho jaha ra vechonxinha ra de ixin Dios, co vintte ra inchin niningaconhe Dios ixin vařaxaon ra co vanchehe ra tsje cosa jianha ngattoxon con jehe. Pero jai Dios joiñttaroa para que nchao tsonchienne ra ngain jehe.

²² Mexinxin Dios rroanha Jesucristo para ndavenhe de ngain cuerpoe que jehe vechonda are jehe vacji nttihi ngataha nontte. Jamé joinchehe Dios para que jaha ra nchao tsonchienne ra ngattoxon con jehe inchin chojni que jiquininxin para ixin jehe, que xonhi mancha ni cosa jianha chonda ra ngain ansean ra.

²³ Pero para que sintte ra jamé jaha ra chonda ra que sintte ra inchin ná nttá que jingattjen soji ixin nihnga jiřavá noehe nttá, rrořho ixin chonda ra que sinchehe ra sigue de jian sitticaon ra, co sinchehe ra sigue de sitticaon ra que ixin Dios seguro rrochjá ra iná vida naraoxin inchin ndařho tti jian joajna que jaha ra coinhi ra. Co joajna jili tti jinichja chojni cainxin parte de mundo, co janha Pablo na ttjenguijna chojni para dindachjan na joajna jili.

Pablo ná ninchehe xé Dios para ttjenguijna chojni que ditticaon Jesucristo

²⁴ Co jai janha chahna de ngain tti tangui que tonna por ixin jaha ra, ixin mé rrořho ixin rroxette de ngain cuerpona tti řa ditján de cain tti tangui inchin conhe Cristo para cjoenguijna na cain ján na, řo inchin cuerpoe jehe Cristo.

²⁵ Janha ttjenguijna cain chojni que ditticaon Cristo. Dios chjana řa jili para que janha ttjenguijna jaha ra ixin řa mé řa de sindattjo ra ngoixin tti jian joajné jehe.

²⁶ Co joajna jili, mé tti Dios vechonda jima sé tiempo are icha saho. Pero jai Dios cjoago joajna jili ngain chojni jehe.

²⁷ Dios joinao joinchenohe chojni tti anto rentte co jian palabra que chonda jehe joajna que vema jili. Co mé para ixin chojni inchin jaha ra que jaha judío ra. Co tti vema jili, rrořho que Cristo jí nganji jaha ra co de ixin jehe, jaha ra seguro rrochonda ra gloria que jehe ndařho.

²⁸ Mexinxin janha na ndattjan na cain chojni de ixin Cristo. Janha na chjé na consejo cain chojni de ixin Jesucristo, co nttacoán na cain na de ixin jehe para que cainxin na tsinxin na jian de ixin jehe co para que rrochonxin na tsje de ixin Cristo.

²⁹ Mexinxin janha rrinttaha řa jili conixin cainxin fuerza co cain joachaxin que chjana Cristo.

2

¹ Janha rinaho que jaha ra tsonoha ra que janha anto tsje nttiha nttatsán řao Dios que jehe tsanchjandaha ra ngain tti jianha. Co cai nttatsán řao Dios para cain nite ngain Laodicea co cai para ixin cainxin chojni que janha řa řonhi tiempo joitsjá.

² Janha danchiá Dios que cainxin ra soan ra animado ngain ansean ra, co ixin cain ra sinao chó ra, co anto rrochonda ra confianza ngain Dios ixin tsinxin ra icha jian. Jamé para que jaha ra jian satsoan ra Cristo, tti are saho vehe jimao, pero jai Dios tjago ngain cain chojni.

³ Co de ixin Cristo ján na nchao tsinxin na co tsonoa na cain cosa de ixin Dios. Co mé tti anto rentte que jí ngain Jesucristo.

⁴ Cain jili rrindattjo ra jaha ra para que řonhi chojni sinttayaha ra conixin palabra řhjoin que ndoaha.

⁵ Masqui janha coha na nganji ra, pero janha anto rriřaxanho de ixin jaha ra, co anto chahna ixin nona que anto řhjoin ditticaon chó ra, co ixin anto jian ditticaon ra Jesucristo.

⁶ Mexinxin jańá inchin jaha ra icha saho coexinhi ra vitticaon ra Cristo, tti chonda cain joachaxin; jańá cai cain ra chonda ra que sinchehe ra sigue sinchehe ra inchin jehe rinao.

⁷ Jamé ditticaon ra jian ngain Cristo inchin ná nttá que nihnga jiřavá noehe nttá co soji jingattjen nttá. Co inchin cocoanha ra, cainxin tiempo danjo ra gracias ngain Dios.

Tti vida naraoxin de ngain Cristo

⁸ Ttjiho ra cuidado, co dittoaxinha ra nchehe ra inchin sinao tti chojni que rinao sinttayaha ra para sinchehe ra inchin jehe na teřaxaon na que mé jaha ndoa. Chojni mé chondaha na confianza ngain Cristo; jeho chonda na confianza ngain costumbre chojni nttihi ngataha nontte, co ngain tti řaxaon cain chojni de ixin cain cosa que jí nttihi.

⁹ Cain tti ndoa co cain joachaxin que chonda Dios, cain mé jí cai ngain cuerpoe Cristo.

¹⁰ Co cain mé jí nganji ra jaha ra cai ixin jaha ra conixin Cristo te ra inchin nacoa chojni. Co jehe tti tetonhe cain espíritu que tetonha nttiha ngajni co nttihi ngataha nontte.

¹¹ Cai ixin jaha ra te ra ngain Cristo, rrocho que Cristo ochjá ra tti xohe que dinhi circuncisión, pero mé jeha xohe de ngain cuerpoa ra inchin chonda nijudío. Xohe que jaha ra chonda ra, mé de ngain ansean ra ixin Cristo tti cjoenguijna ra para que tti rinao cuerpoa ra ixonhi joachaxin chonda nganji ra. Jihí rrocho tti xohe que ttixin de ngain Cristo.

¹² Are jaha ra joiguite ra de ngain jinda, mé rrocho que jaha ra xavá ra conixin Jesucristo, co jamé cai xechon ra conixin jehe ixin vitticaon ra ngain joachaxín Dios que joinchexechon Jesucristo.

¹³ Are icha saho jaha ra espirítua ra inchin ondavenhe de ixin cain tti jianha que vanchehe ra co ixin chondaha ra tti xohe que dinhi circuncisión ngain cuerpoa ra. Pero jai Dios ojointsatjána ra cain tti jianha que vanchehe ra co ochjá ra vida naraoxin ngain Jesucristo.

¹⁴ Ley que vehe are saho ndacho ixin ján na tequininxin na tsji na infierno ixin jointtoha na inchin jitaxin ley mé. Pero cain tti teca na are mé Dios joinchetjañehe are Cristo ndavenhe nganito cruz.

¹⁵ Jesucristo are jehe ndavenxin nganito cruz, jehe joacha ngain inchínji co cain icha espíritu jianha que vechonda joachaxin. Cottimeja jehe savicao cain espíritu xijianha inchin tti deaxinhi para cjoago ngain cain chojni co ngain cain ángel de Dios ixin jehe joacha.

Ttjé ra tti chjoin que ttixin de nganji

¹⁶ Mexinxin xonhi chojni chonda derecho de rronichja feo de ixin jaha ra de ixin tti jintte ra o de ixin tti dihi ra, o si nchesayeha ra quiai de chojni judío, masqui quiai que ttí cada nano, o que ttí cada conittjao, o tti nchanho que nchegogaha chojni cada semana. Icha saho que joí Cristo, chojni judío vitonhe de joinchehe cain mé.

¹⁷ Pero cain jihí jehó inchin ná sanho de tti ndoa que joija, co tti mero ndoa, mé Cristo.

¹⁸ Mexinxin jaha ra dittoaxinha ra que santsjaha ra na tti premio que jaha ra ochonda ra. Rrocho que ditticaonha ra chojni que nchehe na inchin chojni humilde co nchesayeha na ángel. Jehe na ndacho na ixin vícon na cosa que ni ndoahe vícon na, co dintteconohe na anto orgulloso de ixin tti jehó na xaxaon na.

¹⁹ Chojni mé iteha na ngain Jesucristo, tti ttetonha ngain cain chojni que ditticaon jehe, co cain niditticaon mé ni inchin cuerpoe jehe, co jehe nchegangui cuerpo mé, co nchesoji cuerpo, co jehe tti jittinhi cuerpo mé cain parte inchin rinao Dios.

²⁰ Ixin jaha ra ditticaon ra Jesucristo, mé rrocho que jaha ra ndavenhe ra conixin jehe, rrocho que jaha ra isincheha ra cain tti xaxaon chojni ntíhi ngataha nontte. Mexinxin, ¿quedonda jaha ra xa nchehe ra inchin nchehe cain chojni co xa ditticaon ra cain costumbre na?

²¹ Inchin ná ejemplo, jehe na ndacho na: “Catteha ra cosa jihí, ni jintteha ra cosa jiha, ni tseha ra cosa yá ngá rá ra.”

²² Cain costumbre jihí jehó para ngain cosa que atto daca ndattjexin, co cain costumbre jihí jehó tti ttetonha chojni, co tti jehe na tjago na.

²³ Já n ndoa que cainxin costumbre mé chojni tonohé na que anto importante ixin costumbre mé ttetonha ngain na ixin jañá jiquininxin sinchesayehé ni Dios ixin ni sintteha ni orgulloso co ixin sinchecastigá ni cuerpoe ni, pero cain mé ttjenguijnaha ni para sacha ni ngain tti jianha que rinao cuerpoe ni.

3

¹ Jai jaha ra oxechon ra conixin Cristo, mexinxin xaxaon ra cosa que ttixin de ngajni tti ttjen Cristo lado jian de Dios.

² xaxaon ra cosa de ngajni; xaxaonha ra cosa jianha de ntíhi ngataha nontte.

³ Jai jaha ra ncheha ra inchin vanchehe ra are saho, co mé rrocho ixin ndavenhe ra conixin Cristo co jai Cristo jittenchjianha ra vidá ra ngain Dios.

⁴ Jhehe Cristo mismo mé chjá na jai tti vida jian que chonda na, co are jehe rocjan tsí iná, cottimeja jaha ra tsononxin ra conixin jehe co rrochonda ra parte ngain tti ttetonha jehe.

Tti vida que vechonda na icha saho co tti vida naraoxin que chonda na jai

⁵ Mexinxin jaha ra nchetján ra cain cosa jianha que jí nganji ra, rrocho cosa jianha de ngataha nontte jihí: rrocho que xonhi ra tsontaonxin ra iná nchí que jeha chiha ra, ni ncheha ra cosa jianha, ni ncheha ra inchin rinao cuerpoa ra co inchin tti jianha que jaha ra xaxaon ra, co ni dintteha ra ambicioso ixin chojni ambicioso xajehó inchin tti nchesayehé ídolo.

⁶ Ixin chojni que tenchehe na cain cosa jihí rrochonda tti anto soji castigoe Dios ixin chojni mé tti ncheha inchin ttetonha Dios.

⁷ Co jaha ra cai vanchehe ra cain jihí are icha saho.

⁸ Pero jai ttinttohe ra de toñaohé chó ra, de ttetocoho chó ra, de nchehe ra cosa jianha, de ttjehe ra chijni iná chojni, co de nichja ra palabra feo.

⁹ Nchekhjenha chó ra mentira ná ra co iná ra, ixin jaha ra ojoinchexantte ra vidá ra que joichonda ra are saho de ngain cain cosa jianha que vanchehe ra.

¹⁰ Co jai chonda ra iná vida naroaxin, co Dios jinttajian ra icha co icha para que jaha ra sintte ra inchin jehe rinao co para que jaha ra rrochonxin ra jian cainxin de ixin jehe.

¹¹ Para ixin Dios, ijeha importante si ján na judío na o ni nahi, ni si chonda na tti xöhe que dinhi circuncisión o ni nahi, ni si ján na joixin na de ngain ojé nontte o ni nahi, ni si chonxin na xón o ni nahi, o ni si esclavo na o ni nahi; para ixin Dios jeha importante cain mé, sino que Cristo jehó mé tti importante, co jehe tti jí ngain cainxin chojni jehe.

¹² Dios anto rinao jaha ra co jehe ocoinchiaha ra para que sintte ra chojni jehe. Mexinxin jaha ra dintte ra jian; rrocho ttiacoñohe chó ra, co ditticaon chó ra, co tonoaaha ra ixin jaha ra anto importante ra, co dintte ra amable, co chonda ra paciencia.

¹³ Chondehe chó ra paciencia ná ra co iná ra, co nchetjañehe chó ra naná ra are chonda ra problema. Jañá inchin Cristo jointtatjañaha ra, jañá nchehe ra jaha ra cai.

¹⁴ Pero tti icha importante de cainxin cosa yá, que jaha ra anto sinao chó ra, ixin jamé rroxettjaxin cain tti jian que nchehe ra co sintte ra inchin nacoa chojni.

¹⁵ Co dittoaxin ra que tti thjoin que Dios ttín ngain ansean ra, que mé tsetonha ra. Ixin mé tti coetonha Dios jiquinixin sinchehe ra jaha ra xo inchin nacoa cuerpo para ixin jehe. Co danjo ra gracia ngain ixin cain mé.

¹⁶ Que joajné Jesucristo rrocaon de ngain ansean ra. Co nchecoñehe chó ra joajna jihi co ncheanimá chó ra ná ra co iná ra conixin jian joarrixaon. Co tsje ra canxin Salmo, co himno, co coro; jamé danjo ra gracias ngain Dios de ngain ansean ra.

¹⁷ Quexeho cosa que sinchehe ra o rrondacho ra, pero nchehe ra conixin nombré Jesucristo, tti chonda cain joachaxin, co are mé danjo ra gracias de ixin jehe ngain Dios Ndodá na, ixin Cristo cjoenguijna na.

Quexén jiquinixin sintte cain chojni que oditticaon Jesucristo

¹⁸ Jaha ra xo nchi ra que otecoho ra xixiha ra chonda ra que sitticaon ra tti tsetonha ra xixiha ra ixin jihi tti jiquinixin sinchehe jaha ra xo oditticaon ra Cristo.

¹⁹ Co jaha ra xo xí ra, que otecoho ra nchichiha ra, rinao ra ncha co xonhi tiempo ttetocoho ra ncha.

²⁰ Co jaha ra xo xannchinnchinchjan ra ditticaon ra ndodá ra co janná ra cain tti tsetonha ra na ixin jihi tti ncheoxinhi Jesucristo.

²¹ Co jaha ra xo ondodaha ra de ngain chjan, ncheñaoha ra xanha ra para que jehe xan soanha xan desanimado.

²² Co jaha ra xo nchehe ra xa ngain ninajni, ditticaon ra nchehe ra cain tti tsetonha ra ninajnia ra nntihi ngataha nontte, co jeoha are jehe na tatetsjehe na nganji ra para que jaha ra sittoaxin ra jian ngain na, sino que jaha ra cain tiempo nchehe ra jian ngain xé na ixin jaha ra xagonhe ra Dios.

²³ Quexeho cosa que jaha ra sinchehe ra, pero que nchehe ra conixin jian ansean ra inchin rrojinchehe ra xé Cristo co nahi xé chojni.

²⁴ Jaha ra onoha ra que Jesucristo rrochjá ra inchin ná premio tti vida naroaxin que sayehe ra, ixin jaha ra tenchehe ra xé Cristo ixin jehe tti mero xinajnia ra.

²⁵ Pero xo sinchehe ra jianha, jamé rroxengaha ra hna de tti jianha que jaha ra sinchehe ra; co para ixin Dios xonhi chojni icha jian o icha rentte que iná; cain na xajeho na.

4

¹ Co jaha ra xo najni ra chonda ra que sintte ra jian co nchehe ra inchin jiquinixin ngain nichehe xá ra. xaxaon ra que cai jaha ra chonda ra ná Xinajni que ttjen ngajni.

² Nchehe ra sigue nchecoanxinhi ra Dios co danjo ra gracias, pero xaxaon ra jian quehe rronichja ra.

³ Nchetsenhe ra ñao Dios cai por ixin janha na para que jehe rrochjana na jian oportunidad de rronichja na joajné jehe, co de rronattjan na icha chojni tti conhe Jesucristo para cjoenga hna cain tti jianha que jointtoho na, que mé inchin ná cosa jima para ixin jehe na. Co jai janha rriaxinna ixin ndattjan chojni cain jihi.

⁴ Nchetsenhe ra ñao Dios para que janha jian sinttaquianxin chojni de ixin jihi inchin jiquinixin sinttaha.

⁵ Dintte ra chojni jian para ngain tti chojni que ditticaonha Jesucristo co nchegonda ra cain oportunidad para ndache ra na de ixin Jesucristo.

⁶ Are rronichja ra ngain chojni mé chonda que cain tiempo rronichja ra jian para que jehe na sincheoxinhi na co chonda ra que tsonoha ra quehe rrondache ra cada chojni que sanchianguiha ra de ixin Jesucristo.

Ntthi joexinxin carté Pablo

⁷ Tíquico, que mé hermanoa na que anto rinao na, jehe mé cain tiempo anto ttjenguijna icha chojni que ditticaon Jesucristo, co cai ttjenguijna na janha cai de tenttaha na xé Jesucristo. Jehe Tíquico tti rronhattjo ra cain tti jitonna janha, co cain tti rrinttaha.

⁸ Mexinxin janha rrorroanha jehe Tíquico nganji ra para rronhattjo ra quexén te na janha na ntthi co para que sinttanímá ra de ngain Jesucristo.

⁹ Jehe Tíquico sijicaho Onésimo que jehe Onésimo cai ná hermano que anto rinao na co tti anto ditticaon Jesucristo. Co jehe Onésimo mé joixin de ngain rajná ra. Cayoi jehe chojni jiji tti rronhattjo ra cain tti jitonhe ntthi.

¹⁰ Aristarco, xicompañerona ntthi ngain cárcel rroanha xa joajna nganji ra cai, co cai Marcos, xiprimoe Bernabé rroanha xa joajna nganji ra. Jaha ra onoha ra de ixin jehe Marcos, co si jehe siji sitsjaha ra, dayehe ra jian.

¹¹ Cai Jesús, tti jehe cai dinhi Justo, rroanha joajna nganji ra cai. De cain chojni judío que ditticaon Jesucristo, jecho tti ní chojni yá tti tettjenguijna na janha de tenttaha na xa para ixin Dios. Co jehe na anto jie consuelo cjoí na para ixin janha.

¹² Epafras cai rroanha joajna para ixin jaha ra, jehe cai ná ninchehe xé Jesucristo, co jehe cai joixin de ngain rajná ra. Jehe Epafras cain tiempo que jehe nchecoanxinhi Dios, jehe anto nchetsenhe ñao Dios para ixin jaha ra, para que jaha ra cain tiempo jian sitticaon ra Dios, co de rroñanjo ra jian de sinchehe ra inchin rinao Dios.

¹³ Ixin janha nona quexén Epafras anto xaxaon de ixin jaha ra, co cai jehe anto xaxaon de ixin cain chojni que ditticaon Jesucristo que te ngain ciudad de Laodicea co ciudad de Hierápolis.

¹⁴ Lucas, tti xinchexoan que ján na anto rinao na, conixin Demas, cayoi chojni mé cai rroanha na joajna para ixin jaha ra.

¹⁵ Noyá chjehe ra joajna cain chojni que ditticaon Jesucristo, tti nite ngain ciudad de Laodicea. Cai chjehe ra joajna Ninfas conixin cain chojni que ditticaon Jesucristo, tti niñatte nittiha ngain nchiandoha jehe Ninfas para servicioe na.

¹⁶ Cain jaha ra are tsjexin tsinhi ra quehe jiçho carta jiji, cottimeja rroanha ra carta para ngain nihngo que jí ngain Laodicea para que ntthi cai cain chojni que ditticaon Jesucristo tsinhi na quehe jitaxin carta jiji, co cai jaha ra tsjehe ra quehe jitaxin cartana que sijixin de nihngo que jí ngain Laodicea.

¹⁷ Ndache ra Arquipo que ndachjan janha que tsinttoeha de sinchehe tti xa que Dios joanjo ngain jehe.

¹⁸ Janha Pablo na, rricjinha ra parte jiji conixin rana co letrana. xaxaon ra que janha jiaxinna jai ngain cárcel. Que Dios sinttanhaon ra. Amén.

Saho Carta Que Dicjin Pablo Para Ixin Chojni Ngain Ciudad De Tesalónica

Pablo co xicompañeroe chjé na joajna chojni ngain nihngo Tesalónica

¹ Janha, Pablo na, conixin Silvano co Timoteo rroanha carta jiji para ngain chojni que ditticaon Jesucristo ngain ciudad de Tesalónica, co chojni mé te ngain Dios Ndodá na co ngain Jesucristo, tti chonda cain joachaxin. Co Dios Ndodá na co Jesucristo, tti chonda joachaxin para ixin ján na, sinchenchaon nganji ra co rrochjá ra tti chjoin que tsonohe ansean ra.

Tti coinhi icha chojni de icha rajna de ixin confianzé chojni Tesalónica ngain Cristo

² Janha na cainxin nchanho chjaha na gracias ngain Dios de ixin cainxin jaha ra, co xaxanho na cain jaha ra are janha na nttacoanxian na Dios.

³ Co xaxanho na quexén jaha ra ditticaon ra Jesucristo, mexinxin tenchehe ra tsje cosa jian. Co xaxanho na quexén jaha ra anto rinao ra jehe Jesús, mexinxin anto tettjenguijna ra icha chojni. Co cai xaxanho na quexén jaha ra tenchehe ra sigue jian ditticaon ra que jehe Jesús tsí iná. Mexinxin janha na chjaha na gracias Dios para ixin cain yá.

⁴ Dios rinao cain jaha ra, co janha na nona na ixin jehe coinchiehe jaha ra

⁵ ixin are janha na joasondattjo ra tti jian joajna, jeha jamaoncoa ixin janha na ndattjo ra conixin joachaxín Espíritu Santo co janha na chonda na seguro ixin tti janha na ndačhjan na seguro ndoa. Co jaha ra jian noha ra que janha na jian jointtaha na nganji ra ixin janha na rinaho na jian sintte ra.

⁶ Co jaha ra joinchehe ra inchin janha na nttaha na co tti joinchehe Jesucristo. Co de ixin Espíritu Santo ansean ra anto ché are vayehe ra tti jian joajna, masqui anto tangui conha ra.

⁷ Mexinxin jaha ra ná ejemplo para cain chojni que ditticaon Jesucristo ngain nonttehe Macedonia co Acaya.

⁸ Anto tsje chojni nohe ixin jaha ra ditticaon ra tti jian joajné Jesucristo, tti chonda cain joachaxin. Co jeoha chojni ngain Macedonia co Acaya tti ninohe, cai nohe chojni de cainxin nontte. Co ixin cain na nohe na ixin jaha ra ditticaon ra Jesucristo, mexinxin janha na ichondaha na que rronichja na jian de ixin jaha ra.

⁹ Sino que jeha na nittequin ixin joitsjaha ra, co ttequin na tti jian que joinchehe ra nganji janha na, co ttequin na quexén cointtohe ra de vitticaon ra ídolo co coexinhi ra vitticaon ra Dios que jichon.

¹⁰ Cai ttequin na ixin quexén jaha ra techonhe ra tiempo jeha Xenhe Dios rrocjan tsí Xan iná. Co jehe mé, Jesús tti Dios joinchexechon. Co jehe mé tti tsančhjangaha na para ngain tti anto soji castigo que tsí.

2

Xa que joinchehe Pablo ngain Tesalónica

¹ Jaha ra jian noha ra que are joasotsjaha ra, jeha jamaoncoa.

² Co masqui icha saho janha na joinchesattena na na co anto tangui conna na ngain ciudad de Filipos inchin jaha ra onoha ra pero masqui jamé, Dios cjoenguijna na para joasondattjo ra tti jian joajné jehe que danjo iná vida naroaxin, co jehe cjoenguijna na para xonhi xagoan na masqui tsje chojni joinaoha tti janha na nichja na.

³ Co cain tti janha na ndattjo ra ján ndoa, co tti nichja na jeha para jointtaxin na ná cosa jianha, co jeha jointtayaxin na chojni.

⁴ Pero Dios chonda confianza nganji janha na, co jehe chjana na tti jian joajna que danjo iná vida naroaxin. Co mexinxin janha na nichja na joajna mé. Janha na nichjaha na para sinchexoxinhi chojni, janha na nichja na para sinchexoxinhi Dios ixin jehe tti chonxin jian tti jí ngain ansenna na.

⁵ Jaha ra noha ra ixin janha na xonhi tiempo jointtayaxin ra conixin palabra chjoin ni ndattjo ra icha cosa para vachaxin na tomi. Cai Dios nohe cain jiji.

⁶ Janha na xonhi tiempo joinaho na para que chojni rrojinchesayana na, sia jaha ra o icanxin chojni, masqui janha na chonda na joachaxin para rrojinttaha na jamé ixin janha na representante na de Jesucristo.

⁷ Pero janha na jeha jamé jointtaha na, janha na rinaho na cain jaha ra inchin ná jannaha rinao jan xenhe jan are jinchehangui jan xan.

⁸ Janha na anto rinaho na jaha ra hasta que rinaoha na rrochjaha ra jeha tti jian joajné Dios, sino que hasta rinaho na rrochjaha ra vidana na cai, jañá janha na anto rinaho na cain jaha ra.

⁹ Jaha ra xaxaon ra quexén janha na jointtaha na xa co tangui jointtaha na para joacha na tti joine na. Ngoixin tiempo are janha na ndattjo ra tti jian joajna que joixin de ngain Dios, janha na jointtaha na xa nchanho co ttie para que ni ná jaha ra vechondaha ra que chjana ra tti joine na.

¹⁰ Cain jaha ra jian noha ra co Dios cai nohe ixin janha na jointtaha na joxon tti jian nganji ra co xonhi chojni nchao sinchecaxin janha na ni ná cosa jianha.

¹¹ Cai cjoenguijna ra cada ra para ixonhi joachjaon coá ansean ra, co para ivinttechinha ra cada ra, jamé jointtaha na inchin nchehe ná ndodaha ngain xenhe ndo.

¹² Co jointtatsanha na ñao ra que sinchehe ra inchin jiquinixin nchehe chojni Dios, tti chojni que Dios vayé para rrochonda na parte ngain lugar que Dios ttetonha co ngain glorié Dios.

¹³ Co cai janha na cainxin tiempo chjaha na gracias ngain Dios ixin are jaha ra coinhi ra tti jian joajné Dios que janha na ndattjo ra, jaha ra vayehe ra inchin joajné Dios, co jeha inchin joajné chojni. Co, ján, ndoa joajné Dios, mexinxin jaha ra xo ditticaon ra, coentoxinhi ra vidá ra.

¹⁴ Hermanos, are tangui conha ra de ixin chojni ngain rajná ra, conha ra inchin conhe chojni que vitticaon Dios conixin Jesucristo ngain regioen Judea. Cai jehe na tangui conhe na ngain chojni rajné na, tti chojni judío.

¹⁵ Jehé chojni judío tehe tti nagoenxon Jesús, tti chonda cain joachaxin. Co cai ngain tiempo vatto chojni judío nagoenxon na profeté Dios, co jai chojni judío vengui na na janha na cai. Dios nchexoxinha tti nchehe jehe na co jehe na ningaconhe na cain chojni.

¹⁶ Ixin are joinaho na nichjá na chojni que jeha judío para que jehe na cai rrochonda na iná vida naroaxin, jehe chojni judío joinaoha rrocanchjanda na. Mexinxin jañá merocoa jicaontja tti jidingachjian cainxin tti jianha que nchehe na cainxin tiempo. Co jai, nchoe joi ngain na tti anto tangui castigo que Dios rroanha para ixin jehe na.

Pablo rinao sitsjehe chojni Tesalónica iná

¹⁷ Hermanos, are janha na sajoixin na de nganji ra para nchion tiempo, co vaguiconha ra, pero anto xaxanho na de ixin jaha ra co janha na anto joinaho na rrogasotsjaha ra iná.

¹⁸ Joitaha na de rrogaso na. Cai janha Pablo tsje nttiha joinaho rrogaso tti te ra, pero cada nttiha mé Satanás rroanha problema para cayaconhna.

¹⁹ Joinaho na rrogasotsjaha ra ixin chonda na confianza nganji ra ngattoxon con Dios co anto rrochahna co anto chjoin tsonohe ansenna na de ixin jaha ra are tsí Jesucristo, tti chonda cain joachaxin para ixin ján na.

²⁰ Ndoa, jaha ra tti razón para anto chjoin tsonona na co anto rrochahna na.

3

¹ Mexinxin ixin coixinnaha na choan na icha para conona quexén te ra ngain tti ditticaon ra, xaxanho na vittona na janho na ngain ciudad de Atenas,

² co rroanha na Timoteo para joihi joitsjaha ra. Jehé ná nchehe xé Dios co nchehe xa conixin janha na are janha na ndachjan na tti jian joajné Jesucristo. Jehé Timoteo nchao joinchesoji tti jaha ra ditticaon ra co jointtanimá ra,

³ para que ni ná ra tsingaxintonha ra ixin ningaconha ra na. Jaha ra onoha que ján na chonda que anto tangui tsoan na ixin icha chojni ningacoan na na.

⁴ Are xa vintte na nganji ra, ndattjo ra que tangui tsoan na, co jamé conhe, inchin jaha ra onoha ra.

⁵ Co ixin icoixinnaha choan icha, janha rroanha Timoteo para joanchianguiha ra si xa ditticaon ra jian ngain Jesucristo, ixin xaon na que puede Satanás rronduche ansean ra co rrojinchehe ra jianha co tti janha na ndattjo ra irrocoxonhi xé.

⁶ Pero jai Timoteo ojoixin de Tesalónica co ndachjenji na ixin jaha ra anto jian ditticaon ra Jesucristo co anto rinao ra icha chojni. Cai ndachjenji na que jaha ra cainxin tiempo xaxaon ra de ixin janha na co anto rinao ra sicon ni ra janha na, jañá inchin janha na rinaho na sicon na jaha ra.

⁷ Mexinxin hermanos, masqui anto tsje cosa tangui tonna na, pero janha na anto chahna na ixin conona na que cain jaha ra xa jian ditticaon ra ngain Jesucristo.

⁸ Inchin ná vida naroaxin para ixin janha na are conona na que jaha ra jian ditticaon ra ngain Jesucristo.

⁹ Jaxon janha na danjo na anto tsje gracias ngain Dios ixin janha na anto chahna na ngattoxon con jehe Dios de ixin jaha ra.

¹⁰ Nchanho co tte jointtatsán na ñao Dios ixin rrochjana na joachaxin para saso na nttiha co para tsjagoha ra cain tti xa ditján ngain tti ditticaon ra.

¹¹ Janha na rinaho na que jehe Dios Ndodá na cainxin na co Jesucristo, tti chonda joachaxin para ixin ján na, tsjenguijna na janha na para nchao saso na sasotsjaha ra.

¹² Co janha na nttatsán na ñao Jesús, tti chonda cain joachaxin, ixin tsjenguijna ra para que sinao chó ra icha co icha, co para sinao ra icha chojni cai inchin janha na rinaho na jaha ra.

¹³ Co nttatsán na ñao Dios ixin rroquehe ansean ra co santsjexin ra de ngain tti jianha, co santsjexin de ngain ansean ra cain cosa jianha para sintte ra jian ngattoxon con Dios Ndodá na are tsí Jesucristo, tti chonda cain joachaxin, conixin cainxin chojni jehe.

4

Vida que nchexoxinhi Dios

¹ Jai nttatsanha na ñao ra co rrondattjo ra jihi conixin joachaxin co nombré Jesús, tti chonda cain joachaxin: inchin janha na jointtacoanha ra quexehe tipo de vida Dios nchexonhi, jañá nchehe ra icha co icha.

² Jaha ra chonxin ra tti janha na jointtacoanha ra, inchin coetonna na Jesús, tti chonda cain joachaxin.

³ Dios rinao que jaha ra dačhjejeyxin ra de ngain tti jianha co dintte ra jian ngain jehe Dios. Mexinxin xonhi ra ncheyehe ra čihi iná tattita, ni nčhi sincheyeha xixihi iná nanita.

⁴ Cada ra rrochonda ra nanacoa nčičiħi ra inchin Dios rinao, co rrochonda respeto ngain nħa.

⁵ Co nchehe ra tti jianha que rinao cuerpoa ra inchin nchehe chojni que chonxinha de ixin Dios.

⁶ Co jañá xonhi ra sincheyehe ra icha chojni ixin Dios anto soji castigo rrorroenhe cain chojni que sinchehe cosa jianha mé inchin ondattjo ra.

⁷ Dios ndačhoha que ján na sontte na chojni jianha, Dios rinao que ján na sačhjejeyxin na de ngain tti jianha para que sontte na jian ngain Dios.

⁸ Jañá, si ná chojni ditticaonha jihi, jeha palabré inacoa chojni tti ditticaonha, sino que chojni mé ditticaonha Dios, tti chjá na Espiritu Santo.

⁹ Janha ichondaha que rrocjinha ra ixin chonda ra que sinao chó ra, ixin Dios ojointtacoanha ra para que sinao chó ra naná ra.

¹⁰ Co jamé tenchehe jaha ra ngain cainxin chojni que ditticaon Dios que te ngoixin nonttehe Macedonia. Pero nttatsanha na ñao ra que sinao chó ra icha.

¹¹ Tsjehe ra quexén sinchehe ra para nchehe ra xá ra jian, co dixintteha ra ngá xé iná chojni tti jaha ra chondaha ra que sicon ra. Sino que nchehe ra xá ra inchin janha na coetonha ra jaha ra,

¹² para que icha chojni que ditticaonha Jesucristo sicao na respeto nganji ra co jañá xonhi cosa sinttaha ra falta.

Quehe tsonhe are tsí Jesucristo

¹³ Rinaho janha na que jaha ra tsonoha ra quehe tonhe ngain chojni que ndadenhe para que jaha ra sinttechinha ra inchin icanxin chojni que ditticaonha, ixin chojni que ndadenhe rrocjan rroxingamehe.

¹⁴ Jañá inchin ján na dotticaon na que Jesús venhe co xechon, jañá dotticaon na que Dios sinchexechon cainxin chojni que vitticaon Jesús co ndavenhe na. Co jehe Dios tsiaho cain chojni mé conixin Jesús.

¹⁵ Mexinxin janha na ndattjo ra inchin cjoago Jesús, tti chonda cain joachaxin, que ján na xo xa sonttechon na are jehe Jesucristo tsí, ján na čhoha sotaon na nttiha que niondavenhe.

¹⁶ Ixin jehe Jesucristo rroxincanjixin de ngajni co rronichja soji ixin chonda joachaxin. Co tti ángel que chonda tsje joachaxin rronichja soji co tsoyao trompeté Dios. Cottimeja chojni que ondavenhe co vitticaon na Cristo, chojni mé rroxingamehe na de ngayehe tti nindadiguenhe;

¹⁷ cottimeja ján na xo xa sonttechon na satsjiho na na ngacjan ttjoi para sigotanxin na ngataonhe čhintto jehe Jesucristo, tti chonda cain joachaxin. Cottimeja sontte na conixin jehe para cainxin tiempo.

¹⁸ Mexinxin ndache chó ra jihi naná ra para sincheanimá chó ra.

5

¹ Pero chondaha que rrocjinha jaha ra de ixin nchanho co tiempo que tsonhe jihi.

² Jaha ra atto jian noha ra que nchaoen Jesucristo tsí nchaoen are ján na ni rrořaxaonha na inchin are tti ná tti chehe are tie.

³ Are chojni tendačo na: “Cainxin nchao jí co seguro”, cottimeja anto daca tsí castigo ngataha chojni mé inchin tti dolor que ditaha ná nanita are osincheconcjihí chjan; co jehe na čhoha satsinguehe na castigo mé.

⁴ Pero jaha ra que ditticaon ra Dios iteha ra ngain naxin xehe para que jehe nchanho mé sinttaxaon jaha ra inchin are xagoen ni ná tti chehe.

⁵ Ixin cainxin jaha ra chojni que čhji tti jinchengasán nchanho ixin jaha ra ditticaon ra tti ndačo Jesucristo. Ján na jeha chojni que čhji tti ni jeha chojni que čhji tti naxin xehe ixin chojni que nchehe jianha, mé tti čhji jamé.

⁶ Mexinxin ján na sonttečhincoaha na inchin ica chojni. Ján na chonda na que tasanttsjehe na conixin jian joarrixaon na.

⁷ Chojni que dinttejoa, dinttejoa na are ttie; co chojni que coan, coan na are ttie;

⁸ pero ján na, xo chojni de joadingasán na, chonda na que sontte na cain tiempo conixin joarrixaon na jian. Are dotticaon na Jesús co are rinao na ica chojni cayoi mé tti ttjengujna na para xonhi tsoan na inchin xisoldado are tteto xa xonhi tonhe xa ixin jingá pechoe xa ná chia que dinhi armadura. Co ján na chonda na seguro ixin rrochonda na iná vida nara; co jiji anto ttjengujna na inchin tti jocho que ttjinga xisoldado para xonhi tonhe já xa.

⁹ Ixin Dios coinchiaha ján na para sayé na castigo, sino que Dios coinchiá ján na para sayé na iná vida nara.

¹⁰ Jesucristo ndavenhe para ixin ján na para que sonttechon na ján na conixin jehe masqui xa techon na o ondavenhe na are jehe rrocran tsí.

¹¹ Mexinxin ncheanin chó ra co nchesoji chó ra ansean ra inchin jaha ra otenchehe ra.

Pablo chjé consejo chojni que ditticaon Jesucristo

¹² Nttatsanha na ñao ra hermanos que chonda ra respeto ngain chojni que nchehe xa ngayaha ra, tti chojni que Jesucristo coinchiehe para que rronddattjo ra de ixin que xén sinchehe ra co para sinttaoanha ra.

¹³ Chonda ra que rroaxaxaon ra jian de ixin jehe na co anto sino ra na de ixin tti xa que jehe na nchehe na. Dintte ra čhjoin naná ra.

¹⁴ Janha na ttetonha ra que chjehe ra consejo chojni que čhoha nchehe xa, co ncheanimá ra chojni que chonda joachjaon para que ixonhi joachjaon rronchonda ansén na, co ttjengujna ra chojni que antoha jian ditticaon co chonda ra paciencia ngain cain chojni.

¹⁵ Ttjho ra cuidado que xonhi chojni tsjengaxin hna jianha ngain chojni que joinchehe jianha ngain jehe. Ncheha ra jamé, sino que cain nchanho nchehe chó ra jian naná ra co hasta cainxin chojni ngoixin nontte.

¹⁶ Cainxin nchanho dintte ra contento.

¹⁷ Nchecoanxinhí ra Dios cainxin tiempo.

¹⁸ De cainxin tti tsonhe danjo ra gracias ngain Dios ixin jamé Dios rinao de nganji ra xo ditticaon ra Jesucristo.

¹⁹ Cayacoenha ra tti nchehe Espíritu Santo.

²⁰ Are chojni rronddattjo ra ná joajna que vayé de ngain Dios, ttinhí ra jian co ncheha ra menos joajna mé.

²¹ Cain joajna que tsinhí ra, xaxaon ra si joixin de ngain Dios ani nahi co ttenchjinha ra jehó tti jian que joixin de ngain Dios.

²² Dachjenda ra de ngain cainxin cosa jianha.

²³ Jehe Dios tti ncheconohe ansean na čhjoin santsjenda ra de ngain cain tti jianha co tsenchjinha espiritua ra, alma ra, co cuerpoa ra para xonhi tti feo xehe rrochonda ra are tsí Jesucristo, tti chonda cain joachaxin para ixin ján na.

²⁴ Dios tti vayaha ra, nchehe cain tti ndačo co jehe sinchehe cain jiji.

Pablo joexin cjin carté co rroanha joajna

²⁵ Jaha ra nchetsenhe ra ñao Dios de ixin janha na.

²⁶ Chjehe ra cain chojni que ditticaon Jesucristo jian joajna.

²⁷ Janha rritetonha ra conixin joachaxin Jesucristo que tsjehe ra carta jiji ngain cain chojni que ditticaon Jesucristo nntiha.

²⁸ Que Jesucristo, tti chonda cain joachaxin para ixin ján na, sinchenchaon nganji ra. Amén.

Yoxin Carta Que Dicjin Pablo Para Ixin Chojni Ngain Ciudad De Tesalónica

Pablo co xicompañeroe chjé na joajna chojni ngain nihngo Tesalónica

¹ Janha, Pablo na, conixin Silvano co Timoteo rroanha carta jiji para ngain chojni que ditticaon Jesucristo ngain ciudad de Tesalónica, co chojni mé te ngain Dios Ndoá na co ngain Jesucristo, tti chonda cain joachaxin.

² Dios Ndoá na co Jesucristo, tti chonda cain joachaxin, sinchenchaon nganji ra co rrochjá ra tti chjoin que tsonohe ansean ra.

Are Jesucristo tsí, Dios sinchejuzgá cain chojni

³ Janha na chonda na que sanjo na gracias ngain Dios para ixin jaha ra cainxin nchanho. Jamé jiquininxin sinttaha na ixin jaha ra icha co icha ditticaon ra Jesucristo co cai ixin jaha ra icha co icha rinao chó ra naná ra.

⁴ Mexinxin janha na chahna na nichja na ngain icha ningoe Dios de ixin tti paciencia que jaha ra chonda ra co ixin jaha ra nacoa ditticaon ra ngain Dios, masqui anto tsje tangui conha ra.

⁵ Cain jiji tjago ixin Dios ná juez jian ixin jehe nchegonda cain cosa tangui mé para que jaha ra siquininxin ra sintte ra tti lugar que Dios tsetonha.

⁶ Cai jehe Dios sinchehe inchin jiquininxin ixin rrorroanha cosa tangui ngain tti chojni que tenchehe na cosa tangui nganji jaha ra.

⁷ Co ján na que anto tangui toan na, Dios sanjo joachaxin para tasehe tti anto tangui mé are Jesús, tti chonda cain joachaxin, tsixin de ngajni ngacjan neje xohi conixin ángel de jehe que chonda tsje joachaxin.

⁸ Tsí para rrochjé castigo tti chojni que chonxinha de ixin Dios co ni ditticaonha na tti jian joajna de ixin Jesucristo, tti chonda cain joachaxin para ixin ján na.

⁹ Chojni jiji ndasitján ansén na para cainxin tiempo co satsjixin na de ngattoxon con jehe tti chonda cain joachaxin co de glorié jehe co de ngain joachaxín jehe

¹⁰ are jehe tsí ngain nchanho mé para tsosayehe co soan admirado de ixin chojni que vitticaon jehe. Cainxin jaha ra sintte ra nntiha nchanho mé cai ixin ovitticaon ra tti janha na ndattjo ra.

¹¹ Mexinxin janha na nttatsán na ñao Dios para ixin jaha ra cainxin tiempo. Danchiá na Dios para tsentoxinhí vidá ra para sintte ra inchin jiquininxin chojni que jehe ovayé. Co cai nttatsán na ñao Dios ixin jehe sinchegonda joachaxin para sinchejian ra inchin jaha ra rinao ra co para tsjengujna jaha ra sinchehe ra cain cosa que jaha ra nchehe ra para ixin Jesucristo.

¹² Jañá nombré Jesucristo, tti chonda cain joachaxin para ixin ján na, tsosayehe nombre nganji ra, co jehe sinttasayaha jaha ra cai. Jiji tti tsonhe ixin anto jian Dios conixin Jesucristo, tti chonda cain joachaxin.

2

Xí anto jianha que tsí antes que tsí Jesús

¹ Janché janha rrondaçhjan de ixin are tsí Jesucristo, tti chonda cain joachaxin para ixin ján na, co are sigatse na co sontte na ngain jehe. Nttatsanha na ñao ra,

² ttentoxinha ra tti jian xaxaon ra co ni xaonha ra are ná chojni rronhattjo ra ixin nchaoen Jesucristo ojoí nchaon. Co puede ná chojni rrondaçho ixin Dios ceotonhe mé, o puede ná chojni que tsinhí ra jimichja ngain anto tsje chojni ixin quexén nchehe na, o puede jaha ra sayehe ra ná carta co chojni ndaçho ixin janha na cjin na carta mé, co ndoaha.

³ De cain yá dittoaxinha ra sinttayaxin ra na ni ná. Ixin saho que tsí nchanho yá chonda que tsonhe yó cosa: saho tsje chojni rroningaonhe na Dios, cottimeja rroçago ná xí anto jianha, co xí mé chonda que tsji ngain infierno.

⁴ Xí jiji rroningaonhe xa cainxin tti ditticaon Dios co cain cosa que jiquininxin tsosayehe. Co xí jiji hasta siguehe xa ngain ningoe Dios icha importante como si jehe xa rrocjé xa Dios, co jehe xa rrondaçho xa ixin jehe xa Dios xa.

⁵ ¿Açaxaonha ra are janha xa joarihi nganji ra, janha vandattjo ra cain jiji?

⁶ Co jai jaha ra onoha ra quehe tançhjangandaha xí mé para tsí xa. Jehe xa çhoha tsí xa icha saho que mero nchaoen xa.

⁷ Tsje cosa jianha que sinchehe xí mé, ojí. Pero cain tti tsonhe xa çhoha tsonhe hasta tsajandaja tti jicayaoen jai.

⁸ Cottimeja tsononxin xí anto jianha jiha, co Jesús, tti chonda cain joachaxin, nasoenxon xí mé jeha sanotte Jesús xa conixin rroha Jesús co ndarroxantte xí mé conixin chíxo que singasán are tsí Jesús.

⁹ Jehé xí mé tsí pero Satanás tti rrorroanha xa co tsí xa conixin tsje joachaxin co sinchehe xa tsje milagro co señal pero cain mé ndoaha ixin tsixin joachaxín Satanás.

¹⁰ Co sinchegonda xa cainxin cosa jianha para sincheyexin xa chojni que sitján ansén. Co cain chojni mé sitján ansén na ixin xonhi tiempo sitticaon na Jesús, co rrochondaha na iná vida naraa.

¹¹ Mexinxin Dios tsančhjanda chojni mé para sitticaon na tti ndoaha.

¹² Co Dios sinchecondená cainxin chojni mé ixin rročhoha na sitticaon na tti ndoa, sino que sincheoxinhi na cosa jianha.

Quexén sinchehe chojni que Dios coinchiehe

¹³ Pero janha na cainxin tiempo chonda na que rrochjaha na gracias ngain Dios de ixin jaha ra que Dios rinao ra ixin Dios coinchiaha ra desde are saho para sayehe ra iná vida naraaxin. Cain yá conhe ixin Espíritu Santo joinchechjian jaha ra chojni jian co ixin vitticaon ra tti ndoa.

¹⁴ Dios vayaha jaha ra para ixin cain jiji de ixin tti jian joajna que janha na ndačhjan na para que jaha ra tsosayaha ra conixin Jesucristo, tti chonda cain joachaxin para ixin ján na.

¹⁵ Mexinxin cain jaha ra dintte ra soji co tjañaha ra tti janha na jointtacoanha ra are joaso na nganji ra co ngain carta que janha na rroanha ra.

¹⁶ Jesucristo, tti chonda cain joachaxin para ixin ján na, co Dios Ndoá na tti rinao na co chjá na Ndo consuelo para cainxin tiempo co ttjenguijna na ján na para rrochonda na confianza ixin cain cosa tsonhe inchin jehé Ndo ndačho Ndo.

¹⁷ Que Dios co Jesucristo sincheanimá ansean ra co sinttasoji ra para que cain tti rronichja ra co cain tti sinchehe ra sehe jian.

3

Pablo rinao que chojni sinchetsenhe na ñao Dios para ixin jehé co xicompañeroe

¹ Hermanos, nchetsenhe ra ñao Dios para ixin janha na para que tti jian joajné Jesucristo, tti chonda cain joachaxin, jaca siji ngain chojni ngoixin nontte co para que jehé na jian sayé na tti jian joajna mé. Jañá inchin jaha ra vayehe ra.

² Cai nchetsenhe ra ñao Dios para que janha na xonhi sinchena na cain xí feo que nchehe tsje cosa jianha, ixin cainxinha chojni ditticaon na Dios.

³ Pero Jesucristo, tti chonda cain joachaxin, ndoa nchehe cain tti ndačho co jehé sinttasoji ra co senda ra para que tti jianha xonhi sinchehe nganji ra.

⁴ Co janha na chonda na confianza ngain Jesucristo que ixin jaha ra sinchehe ra sigue sinchehe ra cain tti janha na ttetonha ra.

⁵ Que Jesucristo tsjenguijna ra para que tsonoha ra quexén Dios rinao ra co para rrochonda ra paciencia inchin Cristo chonda.

Chojni chonda que nchehe xa

⁶ Hermanos, janha na ttetonha ra conixin joachaxín co nombré Jesucristo, tti chonda cain joachaxin para ixin ján na, que dačhjendehe ra quexeho nirinaoha sinchehe xa co nisincheha tti janha na cjoagoha ra.

⁷ Jaha ra jian noha ra quexén sinchehe ra para sinchehe ra inchin janha na nttaha na. Ixin are janha na vintte na ngayaha ra, xonhi tiempo vintte na sin que jointtaha na xa,

⁸ co ni joincoaha na niotsanho ni ná chojni co cjoengaha na hna. Janha na xonhi tiempo jointtaha na mé, sino que jointtaha na xa nchanho co ttie masqui anto cončhjen na, para que ni ná jaha ra conoaha ra tangui de ixin janha na.

⁹ Masqui janha na joichonda na derecho para que rrondattjo ra ixin rrocjenguijna ni ra, pero janha na joinaoha na jamé. Janha na jointtaha na xa soji para que jaha ra vicon ra co para sinchehe ra inchin janha na.

¹⁰ Ixin are janha na vintte na nganji ra, ndattjo ra regla jiji: tti rinaoha sinchehe xa, sineha cai.

¹¹ Janha na ndachjenji na na ixin ttaha de jaha ra ncheha ra xa co atto rinao ra que xonhi sinchehe ra.

¹² Ngain chojni mé tettetonha na conixin joachaxín co nombré Jesucristo, tti chonda cain joachaxin para ixin ján na, que sinchehe chojni mé xa čhjoin para que sacha na tti sine na.

¹³ Hermanos, dinttecončhjenha ra de nchehe ra tti jian.

¹⁴ Si čhonja chojni čhoha sitticaon tti janha na ndačhjan na ngain carta jiji, ttjiho ra cuidado quensen mé co tatoha ra para que tsooé chojni mé.

¹⁵ Pero ningacoenha ra chojni mé, sino que chjehe ra chojni mé consuelo como si rrocji ná xanchó ra.

Pablo joexin cjin carté

¹⁶ Co Jesucristo, tti danjo tti chjoin que tonohé ansén ni, sanjo tti chjoin mé nganji ra para cainxin tiempo co ngain cainxin tti sinchehe ra. Que jehe Jesús sehe nganji ra cain ra.

¹⁷ Janha Pablo na cjin na letra conixin rana ngain tti joexinxin carta jhi para ixin jaha ra. Janhi nntafirmá cain cartana, co janha cjin na.

¹⁸ Que Jesucristo, tti chonda cain joachaxin para ixin ján na, sinchénchaon nganji cain ra. Amén.

Saho Carta Que Dicjin Pablo Para Ngain Timoteo

Pablo chjé joajna Timoteo

¹ Janha Pablo na, ná representanté Jesucristo. Dios co Jesucristo coetonna janha mé. Dios tti chjá na vida naroaxin para cainxin tiempo co Jesucristo tti ján na techonhe na hasta jehe tsí iná.

² Janha rricjin na carta jiji para ixin jaha, Timoteo, jaha tti cjoí inchin xanhna ixin jaha ndoa vitticaon ngain Jesucristo are janha jointtaconha jaha. Dios Ndoá na co Jesucristo, tti chonda cain joachaxin para ixin ján na, sinttanhaon jaha, tsiaconoaha, co rochjá tti chjoín que tsonohe ansean.

Tti ndačo Pablo de ixin chojni que tjago tti ndoa

³ Inchin ojointsatsanha ñao are janha sacjoí para nonttehe Macedonia, janha rrittat-sanha ñao jai que jaha dittoha ngain ciudad de Efeso para que tsetonhe canxion chojni que te nttiha que itsjagoeha na icha chojni tti jeha ndoa,

⁴ ni sincheha na caso cuento que xonhi xé, co ni tti jitaxin de ixin nigoelito xanchjen. Cain cosa jiji joxon tti xonhi xé que ttequincaho chó na co ttjengujnaha na na para sinttoho na tti coetoan na Dios. Chonda que sotticaon na Dios para sinttoho na tti coetoan na.

⁵ Janha rritetonha jiji para que chojni nttiha conixin ján na sonao chó na naná na conixin ansean na roa que xonhi jianha chonda na, co sinttoha na cosa jianha que nchenihi ansean na, co sotticaon na tti ndoa.

⁶ Canxion chojni vaguitticaon na canio cosa jiji pero vačhenda na co ndavitján na.

⁷ Chojni mé rinao sintte na ximaestroé ley que vayé Moisés, pero ni ttinxinha na tti jehe na nichja na co ni tti jehe na tjagoé na chojni conixin anto confianza.

⁸ Noa na ixin ley que vayé Moisés jian, pero chonda que sonttogonda na inchin jiquin-inxin.

⁹ Chonda na que tsonoa na que ni ná ley dehe para ixin tti chojni que nchehe jian. Ley dehe ley para jeha chojni que ncheha tti ndačo ley co nchehe tsje cosa jianha. Ley dehe para ixin chojni que ningaconhe Dios, co ditticaonha ngain Dios, para ixin chojni que dicaoha respeto ngain Dios, para ixin chojni que nadoenxon ndodé o janné, co para ixin cain chojni que nadoenxon chó.

¹⁰ Co ley cai para ixin chojni que ncheyehe chó para dinttejoacaho chó que jeha xixihi o nchičhihi, para ixin chojni que dinttejoacaho chó xí co xí, para ixin chojni que tté chojni, para ixin chojni que nichja cosa ndoa co chojni que nchejurá de ixin cosa que jeha ndoa. Co ley cai para ixin cain tti chojni que ningaconhe tti joajné Jesús que nttocoenhe na chojni.

¹¹ Co cain jiji que nttocoenhe na chojni jiji jí de acuerdo conixin tti joajna mé que jiquininxin tsosayehe. Co Dios, tti anto jian, tti coetonna janha para ixin nichja joajna mé.

Pablo joanjo gracias ngain Dios

¹² Janha chjaha gracias Jesucristo, tti chonda cain joachaxin para ixin ján na, ixin jehe tti chjana fuerza para nichja cain cosa jiji ixin jehe tti ndačo ixin janha jiquininxin na xá jiji, co jehe tti joinchegonda na janha para ngain xé.

¹³ Jehe joinchehe cain jiji nganji na janha masqui feo vanichja de ixin jehe, co varroá chojni que vaguitticaon jehe co vantaha feo ngain na. Pero Dios coiaconoana janha ixin janha xá vaguitticaonha Jesús co venonaha quehe vantaha.

¹⁴ Mexinxin jehe Jesucristo anto joinchenchaon na janha co cjoengujna na janha para ditticanho co para rinaho chojni inchin jehe ttjengujna cain chojni que te na conixin jehe.

¹⁵ Palabra janhi anto ndoa co cain chojni chonda na que sitticaon na: Jesucristo jói ngataha nontte para chjé cain chojni que nchehe cosa jianha iná vida naroaxin. Co de cain chojni mé, janha tti saho na.

¹⁶ Pero de cain tti jianha que janha jointtaha, Dios coiaconoana janha para que de ixin janha Jesucristo cjoago cainxin paciencia que jehe chonda. Co jañá joigarihi janha ná ejemplo para icha chojni que sitticaon Jesús co rrochonda na iná vida naroaxin que xonhi tiempo tsjexin.

¹⁷ Mexinxin janha cain tiempo sinttasayá co rrondačhjan ixin Dios anto jian. Jehe Rey para cainxin tiempo co xonhi tiempo senhe co ni čhoha dicon ni. Dios nacoaxinxon co chonxin cainxin cosa. Amén.

¹⁸ Timoteo, jaha que inchin xanhna; janha rritetonha jiji para que nchao sincheluchá jian para ixin Jesucristo inchin ndattjo chojni are nichja na joajna que joixin de ngain Dios para ixin jaha. Mexinxin sinchehe jamé. Co jian ditticaon Jesucristo conixin ansean roa.

¹⁹ Canxion na joincheha na caso tti nchenihi ansén na para nchehe na jianha co jehe nimé joinchetján na tti jehe na vitticaon na.

²⁰ Jañá conhe ngain Himeneo co ngain Alejandro, tti ni janha coančhanda ngain Satanás para que tsanguí na rronichjaha na feo de ixin Dios.

2

Quexén sinchecoanxinhi ni Dios

¹ Saho rritetonha jaha que chojni que ditticaon Jesucristo chonda que sinchetsenhe na ñao Dios, sinchecoanxinhi na Dios, sanchia na Dios co sanjo na gracias ngain Dios para cainxin chojni.

² Jañá nchetsenhe ñao Dios para ixin cain chojni que chonda joachaxin para ttetonha ngain gobierno co chojni que ttetonha ngain cain rajna para que ján na nchao sontte na čhjoin co xonhi tseto na co sontte na inchin Dios rinao co para icha chojni rrochonda na respeto nganji na.

³ Cain jiji jian co tti ncheoxinhi Dios tti chjá na iná vida naroa.

⁴ Jehe rinao que cainxin chojni sayé iná vida naroa co satsoan na tti ndoa.

⁵ Jí nacoaxinxon Dios, co jí nacoa tti nchao tsintte chojni para ngain Dios, co tti xí mé, jehe Jesucristo.

⁶ Jesucristo joanjo cuerpoe para ndavenhe para que cjoenga hna tti jianha que nttoho na cainxin na. Co jiji joiconhe ngain tiempo que Dios ondacho icha antes que rrojiconhe.

⁷ Mexinxin Dios coinchiehe na janha para ná representanté Jesucristo co para tjagoa tti chojni que jaha judío de ixin tti ndoa que dotticaon na. Janha ditticanho Cristo, mexinxin janha nichja tti ndoa co nichjaha tti ndoaha.

⁸ Mexinxin janha rinaho que ngain ngoixin nontte xí sinchecoanxinhi xa Dios. Co are rrotsin rá xa para sinchecoanxinhi xa Dios, pero joxon rá tti chojni que xonhi jianha joinchehe para que Dios sicon rá naroa. Co tsoñaoha xa ni tsetocaoha chó xa de ixin chijni.

⁹ Co janha rinaho que něhi sinttengá něha lonttoe něha inchin jiquininxin conixin jian joarrixaon co rrožanotaon cuerpoe něha tti jiquininxinha sicon chojni. Are rrojinji něha co tsette lazoe něha pero inchin jiquininxin co xonhi cosa anto rentte tsentaha já něha, ni cosa anto rentte que settea něha, ni lontto que anto rentte para sengá něha.

¹⁰ Něhi sehe něha čhjoin, pero de ixin tti jian que sinchehe něha inchin něhi que dačhjejeyin ngain cosa jianha co dintte něha jian ngain Dios.

¹¹ Něhi chondaha něha que rronichja něha are tsinhi něha ngaxinhi nihngo para jamé tsanguí něha inchin chojni que ditticaon tti ditonhe.

¹² Janha danjoha joachaxin para que něhi sincheoenhe něha chojni are icha chojni sintte na ngaxinhi nihngo, co ni tsetoanha něha ngain xí; chonda něha que rrotenco a něha.

¹³ Ixin Dios saho joinchechjian Adán, cottimeja Eva.

¹⁴ Co jaha Adán tti joincheyehe Satanás, sino que Eva tti joincheyehe Satanás. Co ixin Satanás nchao joincheyehe Eva, mexinxin después Eva joinchehe cosa jianha.

¹⁵ Pero masqui Dios ndačo que anto tanguí para ná něhi are ncheconcjihí něha chjan, pero xonhi tsonhe něha si jehe něha ditticaon něha Dios, co si rinao něha cain chojni, co si sehe něha jian inchin rinao Dios conixin jian joarrixaoen něha.

3

Quexén sinchehe chojni que ttetonha ngain nihngo

¹ Palabra jiji atto ndoa: si čhonja chojni rinao rrochonda joachaxin ngain nihngo, atto jian ná xa que jehe rinao sinchehe.

² Mexinxin, tti rinao sehe tti ttetonha ngain nihngo chonda que sehe jian para que ni ná chojni čhoha sinchesattehe. Čhoha secoa iná něhi si jehe jicao něhičhihi, co sicao ná vida jian para que icha chojni rrochonda na respeto ngain jehe, co tsjanoha de ixin cosé Dios co sehe jian ngain joarrixaoen. Co chonda que sehe jian cainxin nchanho para sayé chojni que tsji ngain nchiandoha. Co chonda que rrochonxin quexén nchao tsjagoe icha chojni.

³ Seha dicoan, co xonhi chijni tsjé ngain iná chojni, co sinaoha tomi que sachaxin de cosa jianha. Seha jamé, sino que jehe chonda que sinchehe cain cosa jian co tsetocaoha chojni co tantoha sinao tomi.

⁴ Chonda que tsonohe tsetonha jian ngain nchiandoha para que xenhe sitticaon xan co rrochonda xan respeto,

⁵ Ixin si ná chojni, ni ngain nchiandoha noeha ttetonha, ¿quexén nchao tsetonha ngain ningoe Dios?

⁶ Mexinxin tti tsetonha ngain ningoe Dios jeha ná tti nandá vitticaon ngain Jesucristo, ixin puede jehé rroŋaxaon ixin anto nohe co jamé jianha sinchehe mexinxin sayé castigoe Dios inchin conhe Satanás.

⁷ Cai chojni que ŋa ditticaonha ngain Jesucristo chonda que rrochonda respeto ngain tti tsetonha ngain ningoe Dios. Jañá chojni čhoha rronichja jianha de ixin jehé co Satanás ŋonhi rrocayacoen jehé.

Queŋén sinchehe tti chojni diáconos

⁸ Jañá cai diáconos, tti chojni que ttjenguijna jehé que ttetonha ngain ningoe Dios, chojni diaconos mé chonda que sintte na jian chojni cai. Co icha chojni chonda que rrochonda na respeto ngain chojni mé. Co chojni diáconos čhoha rronichja tti ndoaha, ni rrocoanha na, ni čhoha anto sinao na tomi que sachaxin de cosa jianha.

⁹ Chonda na que sintte na ngain tti ndoa que joixin de ngain Dios tti ján na dotticaon na, co sincheha na cosa jianha que sinchenihi ansén na.

¹⁰ Co jaha chonda que tsonoha saho si cain tattita mé seguro ditticaon co si seguro nchehe jian, cottimeja jehé na nchao sinchehe na ŋa de tsjenguijna na jehé tti ttetonha ngain nihngo.

¹¹ Cai nčhičhihi xa chonda que rrochonda chojni respeto ngain nčha, co rronichjaha nčha cosa que jiquininxinha de iná chojni, co tsjanoha nčha de ixin cosé Dios, co sehe nčha jian ngain cainxin tti nchehe nčha.

¹² Ná chojni diácono čhoha rrochonda yó nčhi nacoa tiempo co chonda que tsonohe jian queŋén tsetonha ngain xenhe co ngain nchiandoha.

¹³ Ixin chojni diácono que nchehe ŋé jian, jehé na dacha na icha tsje respeto co icha rroŋaonha na para rronichja na de ixin tti ditticaon na de ixin Jesucristo.

Tti dotticaon na

¹⁴ Janha rinaho sasotsjaha toin, pero janha rricjinha cain jiji

¹⁵ para que si janha tsončjenna, jaha onoha queŋén sinchehe chojni Dios, co chojni mé rročo ningoe Dios que jichon. Co chojni mé tti ttixinhi co ttjenguijna tti ndoa.

¹⁶ ŋonhi chojni rrondačo que tti dotticaon na jieha, ixin janhi ndačo ngain tti jitaxin Palabré Dios:

Dios jói ngataha nontte inchin ná xí;
co Espiritu Santo cjoago ixin jehé jian,
co tsje ángel vicon jehé
co chojni nichja na de ixin jehé ngain cainxin nación.
Co ngoixin mundo jí chojni que vitticaon na ngain jehé
co jehé sacoján ngajni.

4

Chojni que sachjenda de ngain tti dotticaon na

¹ Pero Espiritu Santo ndačo claro are ndačo que icha saho que tsjexin mundo ttoha chojni sachjenda na de tti ditticaon na de ixin Dios, co sitticaon na ojé espiritu que ncheyehe chojni co sitticaon na tti sinchecoehne na ninchehe ŋé xijianha.

² Co jehé na tsinhi na co sitticaon na tti rronichja chojni que ncheha inchin ndačo na co sincheyaxon na, co itsonoeha na feo are sinchehe na cosa jianha ixin tti sinchenihi ansén na, mé inchin ná cosa que ndache ngain ŋohi.

³ Chojni jiji rrondačo na ixin jianha para tsottehe na, co cai rrondačo na ixin čhoha sine na canxin cosa que jine ni. Pero Dios joinchechjian cainxin tti jine ni para ixin tti chojni que ditticaon jehé, nichonxin tti ndoa. Mexinxin nimé nchao sanjo na gracias ngain Dios co sine jiji.

⁴ Ixin cainxin tti joinchechjian Dios, mé jian, co ján na čhoha rrondačo na ixin jehé jianha; sino que ján na sayé na co sanjo na gracias ngain Dios

⁵ ixin tti ndačo Dios, co tti gracias que danjo na ngain Dios, mé nchejian cain cosa mé.

Queŋén sinchehe ná tti jian ninchehe ŋé Jesucristo

⁶ Si jaha sinchecoehne chojni que ditticaon Dios cain jiji, jaha sarihi ná jian xinchehe ŋé Jesucristo. Co jaha sarichonxin tti palabra que ján na dotticaon na co tti jian que rrinchecoehne chojni de ixin Jesucristo.

⁷ Pero jaha ncheha caso tti cuento que jehé chojni ŋaxaon ixin cuento mé ŋonhi ŋé. Nchehe jehé tti rinao Dios.

⁸ Masqui tti nchetsontaon ni cuerpoe ni donda nchin, pero are sinchehe ni inchin rinao Dios, mé tti donda para cainxin ixin mé ttjenguijna ni ngain vidé ni jiji co cai ngain vida que tsí.

⁹ Palabra jiji atto ndoa, co cain chojni chonda na que sitticaon na.

¹⁰ De ixin cain jiji, ján na nttoho na xa masqui tangui toan na ixin noa na que Dios jichon co sinchehe jian nganji na co jehe rinao tsjenguijna cainxin chojni para rrochonda na iná vida naraoxin, co icha para chojni que ditticaon jehe.

¹¹ Cain cosa jiji chonda que tsetonhe chojni co tsjagohe na.

¹² Jaha chjeha oportunidad chojni para que jehe na sinttaha na menos jaha ixin xa tsjeha nano chonda jaha, sino que darihi ná ejemplo para ixin chojni que ditticaon Dios. Mexinxin ttjiho cuidado quexen rronichja co quexen sinchehe; sinao cain chojni, jian ditticaon Jesucristo, co nchehe jeha cosa jian inchin Dios rinao.

¹³ Ngoixin tiempo hasta que janha saso, jaha nchehe de que tsjehe ngain nihngo tti jitaxin Palabré Dios, co ncheanimá chojni que ditticaon Jesucristo, co nchecoenhe cain chojni tti ndoa.

¹⁴ Jaha tjañaha tti joachaxin que Dios chjá are canxion chojni que chonda joachaxin ngain nihngo coín rá ngataha jaha co nichja joajna que joixin de ngain Dios para ixin jaha.

¹⁵ Ttin cuidado cainxin tiempo ngain cosa tehe para que sicon cainxin chojni que xen jaha tsojian.

¹⁶ Ttjiho cuidado de jaha co de tti nchecoenhe chojni, co darihi soji de cain. Si sinchehe jiji, jaha rrochonda iná vida naraoxin co cai jaha tsjenguijna tti chojni que ditticaon tti jaha ndačo para que rrochonda na iná vida naraoxin.

5

Quexén sinchehe ni ngain icha chojni que ditticaon Jesucristo

¹ Nchesatteha ná dachichjan, sino que jion dachjeyecoxin de ngayehe chojni para ndache dachichjan mé inchin rrocji ndodá, co nchehe jian ngain xanxi inchin rrocji xanchó.

² Nchehe jian ngain nachichjan inchin rrocji janná, co xannché nchehe jian ngain xan inchin rrocji xanchó, co ni ná cosa jianha xaxaonha de ixin jehe xan.

³ Ttjenguijna nchiganha si jehe ncha chondaha ncha nindoha ncha.

⁴ Pero si ná nchiganha chonda ncha xenhe ncha o xanntí ncha, jehe xan mé xan chonda que tsjenguijna ncha. Co jamé jiquininxin xan para que tsjenga xan hna tti jica xan ngain nindoha xan ixin are nchinnchin xan anto joinao nindoha xan. Co jiji tti anto ncheoxinhi Dios.

⁵ Tti nché que ndoa chondaha nindoha co vittohe jeoxinxon, jehe ncha chonhe ncha quehe sinchehe Dios co tinttoeha ncha de ncheoanxinhi ncha Dios nchanho co ttie.

⁶ Pero nchiganha que icha ncheoxinhi cain cosa que jí ngataha nontte, nché mé ondavenhe espiritue ncha masqui xa jichon ncha.

⁷ Ttetonhe na cai cain cosa jiji para que ni ná chojni rrochondaha na de quehe tsosettatin na.

⁸ Co si choan chojni sincheha caso chojni jehe co icha ngain nindoha, xajeho inchin chojni mé ndačo ixin jehe iditticaonha Jesucristo, co chojni mé icha nchaoha nchehe que tti chojni que xonhi tiempo ditticaon Jesucristo.

⁹ Are tsentaxin ra nombre nchiganha que tsjenguijna ra, pero jeha nchiganha que chonda icha de sesenta nano, co jeha nchiganha que vecaoha yó xí nacoa tiempo.

¹⁰ Co chonda que rrochonxin chojni tti jian que jehe ncha joinchehe ncha. Inchin si joichonda ncha chjan co jian joinchegangi ncha xan, o si joinchehe ncha jian ngain cain chojni que ttji ndoha ncha, o si joinchehe ncha ndacoa ngain xé chojni que ditticaon Jesús co ndačoha ncha ixin jehe ncha nché anto jian, o si cjoenguijna ncha chojni que anto tangui conhe, o quexeho iná cosa jian que joinchehe ncha.

¹¹ Co ttentaxinha ra nombré nchiganha que xa tsjeha nano chonda ixin puede rroaxaon ncha de ixin jeha ncha co secoa ncha xí iná.

¹² Co jañá isincheha ncha xa que jehe ncha ndačo ncha que seguro sinchehe ncha para ixin Cristo.

¹³ Co cai puede jehe ncha chji ncha nchia co nchia co ndanchetján ncha tiempoe ncha, co jeoha tiempoe ncha nchetján ncha, cai ncheoxinhi ncha nichja ncha cosa que jiquininxinha de iná chojni.

¹⁴ Mexinxin janha rinaho que nchiganha que xa chondaha tsje nano secoa ncha xixihi ncha co rrochonda ncha chjan co sicao ncha cuidado ngain nchiandoha ncha, co sanjoha ncha oportunidad ngain tti ningaconhe ncha para que rronichjaha na feo de ixin jehe ncha.

¹⁵ Ixin canxion nchiganha ovačjenda ncha de Cristo, co nchehe ncha inchin rinao Satanás.

¹⁶ Si ná de chojni que ditticaon Jesús, ðhonia familié vittoeganha, jehe chonda que tsjengujna co tsanchjandaha jeha nihngo sinchexinhi tomi para ixin jehe ncha. Jañá cai nihngo nchao tsjengujna nchiganha que ndoa rrongondehe.

¹⁷ Cain xí que ttetonha jian ngain nihngo jiquininxin icha tsje respeto, co jiji icha ndoa de ixin nimé que nichja cain tiempo ngayehe chojni co nchecoehne na na.

¹⁸ Ixin ndaño ngain tti jitaxin Palabré Dios: "Ttengueha ra coxintá nchisen are jitonndai va trigo." Co cai ndaño: "Tti xinchehe ða chonda que rroxenguehe xa hna tomí xa."

¹⁹ Jaha ncheha caso tti icha chojni tsjanguihi na ná xí que ttetonha ngain nihngo si seha yó o ní chojni que vicon tti joinchehe xí mé.

²⁰ Pero tti chojni que sinchehe cosa jianha, jaha chonda que rrochjehe na consejo ngattoxon con cainxin chojni, para que icha na tsosoé na co isincheha na cosa jianha.

²¹ Ngattoxon con Dios co Jesucristo, tti chonda cain joachaxin, co ngattoxon con cain ángel que jehe coinchiehe, janha rritetonha que jaha nchehe cain jiji jian, co nchehe ðajeho para cainxin chojni masqui amigoa o chojni que ningaconha.

²² Saho tsjehe jian para saqué ná chojni que tsetonha ngaxinhi nihngo ixin si sanjo joachaxin ngain ná chojni que jinchehe jianha, icha chojni rroðaxaon que cai jaha nntaðoxinha cosa jianha. Ttjiho cuidado para que tti jianha seha nganji.

²³ Co diha jeha jinda, sino que dihi nchion vino cai ixin nchion tsje nchanho jaha ttín tsé.

²⁴ Tti jianha que nchehe canxion chojni nchao dicon ni icha saho que Dios sinchejuzguehe na, pero tti jianha que nchehe icanxin na diconha ni hasta nchanho mé.

²⁵ Cai dicon ni tti jian que nchehe chojni, co masqui diconha ni daca cain tti jian que jehe na nchehe na, pero ðhoha sema cainxin para cainxin tiempo.

6

¹ Tti chojni que nchehe ða chonda que rrochonda tsje respeto ngain xinajní, para que ðonhi chojni rronichja feo de ixin nombré Dios co ni de ixin tti ján na tjagoe na chojni.

² Si xinchehe ða chonda xa xinajni que ditticaon Jesús, xinchehe ða mé ðhoha rrochonda xa icha tsjehe respeto jeha ixin cayoixin na ditticaon na ngain Jesucristo. Pero xinchehe ða mé chonda xa que sinchehe xa icha ða ixin tti sayé ða mé ditticaon Jesús co jehe xa rinao xa inchin ná xanchó xa. Jaha, Timoteo, ndache na co nchecoehne na de ixin jiji.

¿Quexehe tti icha nchao; sinao ni Dios o sinao ni tomi?

³ Si ðhonia chojni tsjagoe icha chojni tti jeha ndoa, co cosa mé jeha de acuerdo ngain tti jindaño tti jian que cjoagoa na Jesucristo, tti chonda cain joachaxin para ixin ján na, ni jehe de acuerdo ngain tti dotticaon na,

⁴ chojni mé anto orgulloso, pero ðonhi nohe. Jehe joxon rinao chojni tsetocaho na ngain chijni, mexinxin chojni tsonchjoehe, rroningaconhe chó na, rrondache chó na feo, co ðaxaon chó na jianha,

⁵ co chojni que chonda joarrixaoen jianha ðonhi tiempo ttjexin toñahe chó co chonxinha na tti ndoa. Jehe na chojni mé ðaxaon na que tti jehe na nchecoehne na chojni de ixin Dios, mé para sachaxin na anto tsje tomi. Jaha daðhenda de ngain chojni que nchehe jañá.

⁶ Ján ndoa que tti ján na nttocoehne na chojni de ixin Dios anto rentte, pero jeha si ján na te na contento conixin tti ján na ochonda na.

⁷ Ján na joihi na ngataha nontte pero ðonhi joicoho na, ni are satsji na ðonhi tsjinho na;

⁸ pero si chonda na tti jontte na co chonda na lonttoa na, conixin jeha yá otsje para que ján na sontte na contento.

⁹ Pero tti chojni que rinao rrochonda anto tsje tomi, ttixinha na ngain prueba ixin toin sinchehe na cosa jianha para rrochondaxin na icha tomi, co toin dinttji na ngain trampé joarrixaon que ðonhi ðé, co mé tti ndanchenihnga na co ndanchetján na.

¹⁰ Ixin tti anto rinao ni tomi, mé tti ttexinxin cainxin cosa jianha; co te canxion chojni ixin anto joinao na tomi mexinxin ndatjañehe na tti jehe na vitticaon na, co anto tangui conhe na ngain vidé na.

Pablo ndache Timoteo quexén sinchehe para rrotjañeha Dios

¹¹ Pero jaha xí que ditticaon Dios, mexinxin sattinguehe cain jiji. Co nchehe inchin Dios rinao, co rinao jeha Dios, chonda confianza ngain Dios, rinao cain chojni, chonda paciencia conixin jehe na, co dariha orgulloso.

¹² Jaha ncheluchá jian para tti jaha ditticaon, tsjehe jian para que jaha rrochonda iná vida naroaxin para cainxin tiempo. Ixin Dios vayaha jaha para cain jiji co jaha ondaño claro ngattoxon con tsje chojni ixin jaha jian ditticaon Dios ngattoxon con tsje chojni.

¹³ Co jai ngattoxon con Dios, tti chjé vida cainxin cosa que jí, co ngattoxon con Jesucristo, tti cai ndačo jian are ndačo cain tti ndoa ngattoxon con Poncio Pilato; ngattoxon con cayoi na janha rritetonha

¹⁴ que ditticaon tti vitonha, co ttenoxinha, para que rrochondaha de quehe tsosattaxin, jaha nchehe mé hasta are tsí Jesucristo, tti chonda cain joachaxin para ixin ján na.

¹⁵ Co jehe tsí ngain tiempo que ondačo. Dios sinchehe jian cain jiji ixin jehe tti nacoaxinxon Dios co ngain jehe jí cainxin tti jian, jehe Rey de cainxin tti rey, co jehe tti Ttetonha de cainxin tti ttetonha.

¹⁶ Co jeha jehe Dios tti xonhi tiempo senhe, co jehe jí ngain joadingasán tti xonhi chojni nchao tonchienhe. Ni ná chojni viconha jehe, co ni čhoča sicon na. ¡Jehe tti jiquininxin tsosayehe co jiquininxin cainxin joachaxin para cainxin tiempo! Amén.

¹⁷ Ttetonha tti chojni que chonda tsje tomi ngataha nontte jiji que sintteha na orgulloso, ni rrořaxaonha na que ixin tomí na tti icha tsjenguijna na, ixin mé xonhi xé. Icha jian rrořaxaon na ngain Dios que jichon, co tti chjá na cainxin cosa para que ján na nttogonda na.

¹⁸ Jaha ttetonha na que sinchehe na tti jian para que rrochonda na tsje pero de ixin tti jian que jehe na sinchehe na, co ixin sintte na listo para tsonchjejehe na icha chojni tti jehe na ochonda na.

¹⁹ Co jańá sintte na rico ngain Dios, co jamé jehe na nchao rrochonda na seguro ixin jehe na rrochonda na iná vida naraoxin que xonhi tiempo tsjexin.

Ntthi joexin tti coetonha Pablo ngain Timoteo

²⁰ Jaha Timoteo, tjańaha de nchehe cain tti coetonha Dios. Jaha ncheha caso tti chijni que tjao chojni, ixin chijni mé xonhi xé. Co ncheha caso tti nichja chojni que ndačo na ixin anto nohe na pero ndoa,

²¹ ixin chojni que řaxaon jehe tti anto nohe, nimé ndatjańehe na tti jehe na vitticaon na. Que Dios sinchenaon nganji. Amén.

Yoxin Carta Que Dicjin Pablo Para Ngain Timoteo

Pablo chjé joajna Timoteo

¹ Janha Pablo na, ná representanté Jesucristo. Janha tti rroanha na Dios ixin jehe joinao, para ndattjan chojni de ixin iná vida naroaxin que danjo Jesucristo.

² Janha rricjin na carta jihi para ixin jaha Timoteo que inchin xanhna que anto rinaho. Dios Ndo dá na co Jesucristo, tti chonda cain joachaxin para ixin ján na, sinttanchaon nganji jaha co tsiaconoaha jaha co rrochjá tti çhjoin que tsonohe ansean.

Tti ndaço Pablo de ixin Jesucristo

³ Cainxin tiempo que janha nttacoaxian Dios, janha çaxanho jaha; nchanho co tte janha chjaha gracias ngain Dios tti janha nttaha ça ngain conixin ansenna roa inchin joinchehe nindogoelitona icha xançhjen.

⁴ Janha anto çaxanho de ixin ndacon que jaha cointtji are janha sacjoixin de nganji jaha, co janha rinaho sicon jaha para anto rrochahna janha.

⁵ Janha çaxanho ixin jaha ndoa jian ditticaon. Jangoelitá Loida co janná Eunice anto vitticaon na, co janha chonda seguro que jaha cai ditticaon jamé.

⁶ Mexinxin janha rritettonha jaha que nchegonda tti joachaxin que chjá Dios are janha coín rana ngataha jaha.

⁷ Ixin Dios rinaoha que ján na rroçaon na, mexinxin Dios chjá na Espíritu Santo co Espíritu mé chjá na joachaxin co ttjenguijna na para rinao na chojni, co chjá na jian joarrixao.

⁸ Jaha chondaha joasoaxin para rronichja tti ndoa que jaha noha de ixin Jesucristo, tti chonda cain joachaxin para ixin ján na, co ni chondaha jaha joasoaxin de ixin janha cai tti rriaxinna de ixin causexin jehe. Sino que jaha dittoaxin tsonha tti anto tangui que tsí de ixin causexin tti jian joajna co Dios sinttasoji jaha.

⁹ Dios tti chjá na iná vida naroaxin, co jehe coinchiá na para que ján na sontte na jian ngain jehe, pero jaha de ixin tti jian que jointtoho na, sino que ixin jehe oçaxao jañá, co ixin jehe rinao na ján na ixin dotticaon na Jesucristo. Dios joinao cain ján na icha saho que nontte rroguehe,

¹⁰ Co jai jehe cjoagoa na que ján rinao na ixin rroanha Jesucristo, tti chjá na iná vida naroa. Co jehe Jesús joinchexante joachaxin de tti ndadenhe ni, co joinchegonda tti jian joajna para cjoago iná vida naroaxin que içhoha tsjexin.

¹¹ Dios tti coinchiehe na janha para rronichja tti jian joajna mé, co rroanha na janha para sarihi ná representanté Jesucristo para sinttacoán chojni que jaha judío.

¹² Mexinxin jí razón que janha anto tangui jitonna de ixin cain cosa jihi. Pero janha chonda confianza ixin janha nona quensen ngain vitticanho co chonda seguro que jehe mé chonda joachaxin para sinchehe sigue tsjenguijna na ngain ça que jehe chjana hasta are tsí nchaoen jehe.

¹³ Jaha rroehé tti ejemplo jian que janha jointtacoanha co darihi ngain tti jian que ján na dotticaon na co rinao cain chojni. Jamé nchao sinchehe ixin Jesucristo ttjenguijna cain chojni jehe para nchehe na jamé.

¹⁴ Espíritu Santo que jí nganji na tsjenguijna jaha para tsjiho cuidado ngain tti chjá Dios.

¹⁵ Inchin jaha onoha, cainxin chojni nonttehe Asia ndacointtona na jaonxinxon. Cai Figelo co Hermógenes ndacointtona na.

¹⁶ Que Jesucristo, tti chonda cain joachaxin, tsiaconoehé nindoha Onesíforo ixin jehe tsje nntiha cjoenguijna na, co jehe cosoeha que janha rriaxinna.

¹⁷ Co are jehe joí nntihi ciudad de Roma jehe cointtoeha de cjoé na janha hasta que vittja na.

¹⁸ Mexinxin janha nttatsán ñao Jesucristo que tsiaconoehé jehe ngain nchaoen jehe Jesús. Jaha jian çaxaoen cai que jehe anto cjoenguijna na janha na ngain ciudad de Efeso.

2

Quexén sinchehe ni inchin ná jian xisoldadoe Jesucristo

¹ Timoteo, jaha inchin xanhna, tosoji jaha de ixin tti jian que chonda na ixin te na ján na ngain Jesucristo.

² Tti jaha coinhi que janha nichja de ixin Jesús ngattoxon con tsje chojni, mé tti nchecoehé icha xí que chonda jaha confianza ngain; xí que nchao sinchecoehé icha chojni tti jaha noha.

³ Jaha tixinha ngain tti anto tangui que tsonha inchin ná jian xisoldadoe Jesucristo.

⁴ Ni ná xisoldado que jí ngain xé čhoha sinchehe xa caso vidé iná chojni que jeha soldado ixin chonda xa que sinchehe xa jeha inchin tsetonha xittetonhe xa.

⁵ Co cai ná tti tsonaon čhoha sayé ni ná premio si jeha rrotsontaonha inchin jiquininxin ná juego.

⁶ Tti nchehe xa ngataon jngui chonda derecho que jeha tti saho rrotsín tti soanxin ngataon jngui mé.

⁷ Xaxaon tti janha ndačhjan, co Jesucristo, tti chonda cain joachaxin, tsjenguijna jaha para tsinxin cain.

⁸ Xaxaon Jesucristo, tti xechonxin de ngacjén nindadiguenhe co tti cjoí xanntí icha xančhjen de rey David. Co jiji tti ndačho tti jian joajna que janha ndattjan tsje chojni.

⁹ Causexin tti jian joajna jiji janha tangui jitonna hasta janha rriaxinna co rričhoaxin conixin cadaena inchin ná chojni que joinchehe tsje cosa jianha. Pero tti jian joajna de ixin Dios, čhoha sečhoa joajna.

¹⁰ Mexinxin janha ttixinna cain tti anto tangui jiji para ixin cain chojni que Dios coinchiehe sayé na iná vida naroaxin que anto jian co que xonhi tiempo tsjexin. Co mé ján na nchao rrochonda na ixin te na ngain Jesucristo.

¹¹ Palabra jiji ndoa:

Si ján na ndavenhe na conixin jeha, cai sonttechon na conixin jeha.

¹² Si ján na tsixian na are anto tangui tsoan na, cai ján na rrochonda na parte ngain tti ttonha jeha.

Pero si rrondačho na nahi de ixin jeha, cai jeha rrondačho nahi de ixin ján na.

¹³ Si ján na cainxinha tiempo dotticaon na, pero jeha ján cainxin tiempo rinao na ján na ixin Dios čhoha rrondačho nahi de ixin jeho mismo.

Ná xinchehe xa jian

¹⁴ Nchečaxaon chojni jaha jiji co ttonhe na ngattoxon con Dios, tti chonda cain joachaxin, que tsetocaoha na chojni de ixin čijni. Ixin čijni jiji xonhi xé, jeha nchehe jianha ngain chojni que ttinhi.

¹⁵ Jaha tsjehe quečén nchehe para que tonchienhe ngattoxon con Dios inchin ná xinchehe xa jian que rrochondaha xa que tsosoé xa. Co jian nchecoenhe icha chojni quehe ndačho tti jitaxin Palabré Dios.

¹⁶ Jaha ncheha caso tti čijni xonhi xé que nichja chojni, ixin tti chojni que nichja jamé icha co icha ndaditján na ngain cosa jianha.

¹⁷ Co jeha tti čijni que nichja na, mé tsinga inchin tti chin que anto daca ncherrenga nntao. Jeha jiji tti jitonhe Himeneo co Fileto.

¹⁸ Chojni jiji ndavačhjenja na de ngain tti ndoa ixin ndačho na que Dios ojoinchexechon chojni, co jańá tencheyehe na canxion chojni que icha saho vitticaon ngain Jesús.

¹⁹ Pero Dios vaquehe ná base anto soji co jeha mé chonda ná joajna que ndačho: “Dios, tti chonda cain joachaxin, chonxin chojni jeha”, co “Cain chojni que ndačho ixin jeha ditticaon Cristo chonda que sačhjenja de ngain cosa jianha.”

²⁰ Ngain ná nchia jie jí jeha traste de oro co plata, cai jí traste de nntá co nchečhin. Ttoha traste mé para dondehe na ngain čhonja quiai, co ittoha traste para dondehe na cain nchanho.

²¹ Si sačhjexin ni de ngain cain cosa jianha, jeha ni sintte ni inchin tti traste de joxon oro, co Jesucristo, tti chonda cain joachaxin, nchao sinchegonda ni ngain quexeho xa jian.

²² Sattinguehe cain tti nchaoha que xaxaon ni are xa tsjeha nano chonda ni, co roehe ná vida nao, co ditticaon Jesús, rinao cain chojni co tsetocoha icha chojni. Jańá nchehe jaha conixin cain chojni que chonda ansén na roa que nchetsenhe na ñao Jesucristo, tti chonda cain joachaxin, para jeha tsjenguijna na.

²³ Jaha ncheha caso tti čijni xonhi xé que nichja chojni, jaha onoha que čijni mé nchequeto chojni.

²⁴ Ixin nchaoha para ná tti nchehe xé Jesucristo tsetocaho iná chojni. Sino que jeha chonda que sehe jian ngain cain chojni. Chonda que sehe jian co rrochonda paciencia ngain chojni.

²⁵ Co are rrondate tti chojni que ditticaonha ixin tsentoxinhi na vidé na, pero rročaxaonha ixin jaha icha jian, sino que chonhe co nchetsenhe ñao Dios ixin sinchequentoxinhi vidé na co tsjenguijna na rrochonxin na cain tti ndoa.

²⁶ Jamé para que jeha na rroxingamehe na co satsingaxin na de ngain tti trampé inchinji tti jeha na teaxinhi na para sinchehe na inchin jeha inchinji rinao.

3

Quexén sintte chojni are ochiaon tsjexin mundo

¹ Cai chonda jaha que tsonoha jiji: que ngain tiempo que ochiaon mundo sitján, tsí tsje nchanho tangui para ixin chojni.

² Anto rroḡaxaon na de ixin jeha na, anto sinao na tomi, tsonohe na ixin jeha na ni icha jian, co tsonohe na que jeha na ni icha ḡhjoin te. Co rronichja na nchaoha de ixin Dios, sitticaonha na ndodé na co janné na, ḡonhi tiempo sanjo na gracias ngain tti chojni que sinchehe jian ngain na, co sinchesayeha na Dios.

³ Co sinaoha na iná chojni ni tsiaconoeha na chojni, rronichja na tti ndoaha de iná chojni, tsinttoeha na de sinchehe na cosa jianha que jehe na rroḡaxaon na, jehe na roché na are sinchehe na feo ngain iná chojni, co rroningaonhe na cain tti jian.

⁴ Co sintte chojni traicionero, sitticaon na jeha na, co rrondaḡho na ixin jehe na icha chonxin na. Co jehe na sinchehe na inchin jehe na rroḡaxaon na, co irroḡaxaonha na Dios.

⁵ Jehe na tsji na ngain nihngo, pero rrondaḡho na que Dios chondaha joachaxin.

Jaha diyeha cain chojni jiji.

⁶ Ixin chojni jiji dixinhi nchiandoha nḡhí que ḡaxaonha jian co tonohe nḡha feo de ixin tsje cosa jianha que nchehe nḡha. Co chojni mé dixinhi na nchiandoha nḡhí mé co nchecoeha na nḡha tti ndoaha. Nḡhí jiji, ḡaxaon nḡha jeha de ixin tti jehe nḡha rinao nḡha,

⁷ co cainxin tiempo tetangui nḡha pero ḡonhi tiempo ttinxin nḡha tti ndoa.

⁸ Inchin tti xí Janes co Jambres coñao ngain tti ndaḡho Moisés, jañá cain chojni mé toñaohe na tti ndoa. Xí que nchehe jamé ngain nḡhí, jianha jí ngain joarrixaon xa co ndoaha ixin ditticaon xa Jesús.

⁹ Pero cosaha tsje sinchehe xí mé ixin cainxin chojni tsonohe na ixin xí mé ḡonhi ḡé tti ḡaxaon xa, jañá inchin conhe Janes co Jambres tti xí que coñaohe Moisés.

Ultima cosa que Pablo coetonha ngain Timoteo

¹⁰ Pero jaha ojoinchehe caso tti janha jointtacoanha, queḡén jointtaha, co queḡén rinaho icha chojni. Jaha jian chonxin tti janha ditticanho, co ixin chonda paciencia, co ixin janha coixinna

¹¹ are anto tsje chojni coñao nganji na co are anto tangui conna. Jaha noha cain tti janha conna ngain ciudad de Antioquia, co ngain ciudad de Iconio, co ngain rajna Listra. Co jaha noha cain tti anto tangui que conna ixin anto tsje chojni coñao, pero Jesucristo, tti chonda cain joachaxin, cjoenguijna na para vattoo cain yá.

¹² Co ndoa que anto tangui tsonhe cain chojni que rinao sintte jian para ixin Jesucristo.

¹³ Pero cain tti chojni jianha co tti chojni que ncheyehe icha chojni, jehe na cada nchanho icha jianha sintte na. Jehe na sincheyehe na icha co icha chojni, co chojni sincheya ngain na cai.

¹⁴ Pero jaha darihi soji ngain tti jaha coangui, co tti jaha ovitticaon. Jaha noha quensen jointtacoanha,

¹⁵ ixin de ḡa nḡhín jaha ojoatsoan quehe jitaxin Palabré Dios, co mé tti sinttanoha icha jian ixin nchao sayé ni iná vida naroa si ditticaon ni ngain Jesucristo.

¹⁶ Cain tti ḡón que jitaxin Palabré Dios, jehe Dios tti chjé chojni joajna para que conohe na quehe palabra cjín na ngain ḡón mé. Co ḡón mé para que ján na tsonoa na tti ndoa, co para nttanoa na ixin nttoho na jianha, co queḡén tsentoxinhi na vidá na, co ḡon mé tsjenguijna na sontte na ngain ná vida nao.

¹⁷ Mexinxin tti xí que nchehe ḡé Dios nchao tsangui xa tti rinao Dios para que jehe xa nchao sinchehe xa cainxin jian.

4

¹ Janha anto rritetonha ngattoxon con Dios co ngattoxon con Jesucristo, tti chonda cain joachaxin, co tti tsí inchin rey para sinchejuzguehe cain chojni, masqui ondavenhe na o ḡa techon na.

² Janha rritetonha que rrondache chojni joajné Dios. Jaha chonda que rrondache chojni joajna mé, masqui rinao na tsinhi na o rinaoha na tsinhi na. Ncheguitticaon na joajna mé, chjehe na consejo, ttjenguijna na para sitticaon na, co chonda paciencia are sinchecoeha na joajna mé.

³ Ixin tsí tiempo que chojni isinaoha na tsinhi na tti jian que ján na nttocoeha na na co sinchehe na inchin jehe na sinao na. Jehe na tsjé na anto tsje ximaestro para sinchecoeha xa na inchin jehe na sinao na tsinhi na.

⁴ Sinaoha na tsinhi na tti ndoa, co sinchehe na caso cain cuento que ḡonhi ḡé.

⁵ Pero jaha cainxin tiempo darihi conixin joarrixaon jian co ttixinha ngain tti anto tangui, co nchanho co nchanho ndache chojni tti jian joajna co nchehe jian cain ḡa.

⁶ Janha ochian jói nchanho que chojni nasoenxon na na co ojitonchiaon hora que janha tsinttoa vida jiji.

⁷ Janha atto jointtaluchá para ixin Jesús, co janha atto coinga ngoixin nttié Jesucristo hasta que joexin vidana, co cainxin tiempo janha vitticanho.

⁸ Co jai jichonna premio para ixin tti vida nao. Co Jesucristo, tti chonda cain joachaxin, rrochjana premio mé ngain nchanho que tsí, co jehe mé ná juez jian ngain nchanho que tsí. Co jeoha janha rrochjana, cai rrochjé cain chojni que anto rinao tti nchanho que tsí jehe Jesucristo.

Joajna que cjin Pablo para jehó Timoteo

⁹ Jaha tsjehe quexén sinchehe para que sitysena toin,

¹⁰ ixin Demas ndacointtona janho ixin icha joinao cosa ngataha nontte, co sacjoi para ngain ciudad de Tesalónica. Co Crescente sacjoi para nonttehe Galacia, co Tito sacjoi para nonttehe Dalmacia.

¹¹ Jehó Lucas jí nganji janha. Ttjé Marcos co sicohna ixin jehe mé tti nchao tsjenguijna na ngain xa que janha chonda.

¹² Tíquico janha rroanha para ngain ciudad de Efeso.

¹³ Are jaha sihi, sicohna noxana noxa bocamanga que janha cointtoa ngain nchiandoha Carpo ngain ciudad de Troas, cai sicohna librona co icha rinaho sicohna xonna.

¹⁴ Alejandro, tti nchechjian cosa de chia, joinchehe atto tsje cosa jianha nganji janha. Jesucristo, tti chonda cain joachaxin, tsjenguehe hna cain tti jehe joinchehe.

¹⁵ Jaha ttjiho cuidado de ixin jehe, ixin jehe anto ningaconhe tti ján na ndacho na.

¹⁶ Are saho nttiha que janha ndachjan ngain xijuez cain tti ndoa que janha nttaha, ni ná chojni cjoenguijnaha na janha; cainxin na ndacointtona na janho. Janha rinaho que Dios irroxaonha quehe joinchehe jehe na.

¹⁷ Pero Jesucristo, tti chonda cain joachaxin, cjoenguijna na janha co joinchesoji na para que janha nchao joena ndattjan chojni que jeha judío tti jian joajna. Jáñá jehe Jesús coanchjandaha na janha para ndarroguenhe na,

¹⁸ co tsanchjandaha na janha de cainxin cosa jianha co jehe tsenchjinha na janha para ngain tti lugar que jehe ttetonha ngajni. Jehe jiquininxin tsosayehe para cainxin tiempo! Amén.

Pablo joexin cjin carté co rroanha joajna

¹⁹ Janha rroanha joajna para ixin Prisca co Aquila, co ngain nindoha Onesíforo.

²⁰ Erasto vittohe ngain ciudad de Corinto, co Trófimo nihi cointtoa ngain rajna Mileto.

²¹ Jaha tsjehe quexén sinchehe pero sihi icha saho que ngain tiempo quin, si nchao. Cai Eubulo, Pudente, Lino, Claudia co cain icha chojni que ditticaon Dios nttihi rroanha joajna para ixin jaha.

²² Jesucristo, tti chonda cain joachaxin, sehe nganji, co Dios sinchenchaon nganji cainxin jaha ra nttiha. Amén.

Carta Que Dicjin Pablo Para Ngain Tito

Pablo chjé joajna Tito

¹ Janha Pablo na, ná xinchehe xé Dios co ná representanté Jesucristo. Janha tti jehe rroanha na para que janha ttjenguijna chojni que Dios coinciehe para jehe na ditticaon na, co para que jehe na satsoan na tti mero ndoa de ixin tti dotticaon na,

² co para jehe na rrochonxin na que seguro rrochonda na iná vida naroo que xonhi tiempo tsjexin. Dios čhoha sincheyaxon, co icha saho que nontte rroguehe, jehe seguro ndačo ixin ján na rrochonda na vida mé.

³ Co jai, mero ngain tiempo que jehe coinciehe, jointtagatsoan na joajné, co joajna mé tti janha rrinichja. Dios tti ttjenguijna na coetonna jamé.

⁴ Janha rricjinha carta jihí, Tito; jaha inchin xanhna ixin vitticaon Jesucristo are janha jointtacoanha jaha. Dios Ndodá na co Jesucristo, tti chonda cain joachaxin para ixin ján na co tti danjo iná vida naroo, sinttančaon jaha, co sinttaniha jaha ngain ansean, co rrochjá tti čhjoin que tsonohe ansean.

Quexehe xa jinchehe Tito ngain Creta

⁵ Are cointtoha ngain tti nontte que dinhi Creta que jí ngosine ndachaon, jamé para que jaha rrocjaha tti xa que xa vitján conhe, co para jaha cjoé xí que tsetonha ngain nihngo cada rajna inchin janha coetonha jaha.

⁶ Co xaxaon jaha ixin xí mé chonda que sehe xa jian ngain vidé xa para que ni ná chojni chondaha na de quehe sinchesattexinha xí mé. Co čhoha chonda xa yó nčhí nacoa tiempo, co cain xenhe xa chonda xan que ditticaon xan Dios co xonhi cosa jianha joinchehe xan ni tsoñaoha xan de ixin tti sitonhe xan.

⁷ Tti ttetonha ngain ningoe Dios chonda que nchehe jamé ixin jehe nchehe xa para ixin Dios, mexinxin chonda que jehe dicao ná vida jian. Seha terco co ndacoa sinchehe ngain cain chojni, rrocoanha ni čhinttoha sehe, ni sinoaha tomi que sachaxin de ngain cosa jianha.

⁸ Jehe chonda que sayé chojni que tsji ngain nchiandoha, co jehe chonda que sehe na xí que nchehe jian, co sehe jian de ngain joarrixaon, co sinchehe inchin jiquininxin, co sachjeyexin de ngain tti jianha. Jehe chonda que sinchesayehe Dios, co sincheha jehó inchin rinao cuerpoe.

⁹ Chonda que rrorroé tti joajna ndoa que jehe cocoenhe para que jehe cai nchao sincheanimá icha chojni are sinchecoehne na co para que sincheguitticaon tti chojni que ditticaonha joajné Cristo.

¹⁰ Ixin jí atto tsje chojni que toñaon nganji na co de cainxin na, chojni judío tti icha xonhi xé tti nichja na co ncheyehe na icha chojni.

¹¹ Cain chojni mé chonda que tsejehe ni rroha na ixin ncheguitticaon na tsje familia ixin tjagoe na na tti jiquininxinha jehó para dachaxin na tomi, co jianha jí tti tenchehe na.

¹² Ná profeta que vehe ntiha ngain mero nonttehe Creta, ndačo janhi de ixin chojni ngain Creta: “Chojni ngain Creta cainxin tiempo nichja na cosa que ndoaha, co te na inchin coxigo čhintto ngagaha jna, co atto xengo na, co atto sehe na.”

¹³ Co ndoa tti jehe ndačo. Mexinxin jaha nchesattehe na soji para sintte na jian ngain tti ditticaon na,

¹⁴ co para que sincheha na caso tti cuento que dičaxaon chojni judío, ni sincheha na caso tti ttetonha tti chojni que rinaoha ditticaon tti ndoa.

¹⁵ Para ixin tti chojni que chonda joarrixaon jian, para ixin jehe nimé cainxin cosa jian co roa cosa; pero para ixin tti chojni que ditticaonha co ni joarrixaon na jianha, xonhi cosa jian para ixin jehe na ixin hasta joarrixaon na co tti nchenihí ansén na para sinchehe na jianha, hasta cayoi mé jianha cai.

¹⁶ Jehe na ndačo na ixin chonxin na Dios, pero tti nchehe na tjago que ndoaha tti ndačo na, ixin icha chojni ningaconhe jehe na, co jehe na ningaconhe na cain tti ttetonhe na co xonhi xé ttjelé na para sinchehe na ni ná cosa jian.

2

Pablo ndache Tito ixin ndacoa sinchecoehne chojni

¹ Are jaha nchecoehne chojni chonda que nchecoehne na inchin ndačo palabra que nichja tti ndoa.

² Nchecoehne dačhichjan ixin rrocoanha, co ixin sinchehe jian para que chojni rroaxaon na jian de ixin jehe, co ixin rrochonda ná vida nao. Co cai nchecoehne

dañichjan ixin jian sitticaon, ixin sinao chojni, co ixin tsoncha are chojni feo sinchehe na ngain.

³ Xajeho ngain nañichjan cai, ncheoenhe ixin sinchehe inchin jiquininxin ngattoxon con Dios co ixin rronichjaha cosa que jiquininxinha de ixin iná chojni, co ni rrocoanha. Jehe nañichjan mé chonda que sanjo ná jian ejemplo

⁴ para que jamé tsjagoé cain nñhi que icha tsjeha nano chonda para sinao ncha xixihi ncha conixin xenhe ncha,

⁵ co para rrochonda ncha jian joarrixaoen ncha, para xonhi jianha sinchehe ncha, para sicao ncha cuidado ngain nchiandoha ncha, para sincheniha ncha tti sanjo ncha ngain icha chojni, co para sitticaon ncha tti rrondaño xixihi ncha. Cain jihi sinchehe ncha para que xonhi chojni rronichja mal de ixin joajné Dios.

⁶ Cai ncheanimá xanxi que xa tsjeha nano chonda para sintte jian joarrixaoen xan,

⁷ co jaha mismo chonda que chjehe xan ná jian ejemplo de cainxin cosa. Co are sincheoenhe chojni, ncheoenhe na nao conixin respeto.

⁸ Jaha nichja palabra jian para que xonhi chojni nchao rronichja jianha de ixin palabra mé. Jañá tsooé quexeho chojni que tsoñaonganji jaha ra co choha rronichja jianha de ixin jaha ra.

⁹ Ndache ninchehe xa que sitticaon na cain tti tettonha xinajni na; sintte ansén na çhjoin para ixin jehe xa, co rronichjanguiha na xa.

¹⁰ Co tseha na cosé xa, sino que sintte na jian chojni para que cainxin icha chojni sicon na queñén vidé na co jamé rrochonxin na ixin anto çhjoin cho Palabré Dios, tti chjá cain na iná vida narao.

¹¹ Ixin Dios cjoagoo na tti jian que jehe nchehe nganji na para ttjenguijna cain chojni para sayé iná vida narao que jehe danjo.

¹² Co tti jian mé que ttixin de ngain Dios tjagoa na ixin chonda na que tsinttohe na cosa jianha co tti nchaoha que ján na xaxaon na ngataha nontte jihi, co sonttoho na cosa ngataha nontte jihi inchin nchehe chojni de jian joarrixaoen, co chonda na que rrochonda na ná vida nao inchin Dios rinao.

¹³ Para que jamé rrochonhe na tti nchanho que jehe ndaño are socon na rroçago tti chíxo que tsiaho Dios, que chonda anto tsje joachaxin, conixin Jesucristo, tti danjo iná vida narao.

¹⁴ Jehe joanjo cuerpo para ndavenhe para ixin ján na para que danjo iná vida narao co para que joincheroa almá na para que ján na sontte na chojni jehe; chojni que anto sinao sinchehe tti jian.

¹⁵ Cain jihi tti jaha chonda que tsjagohe chojni, co ncheanimá na, co chjehe na consejo conixin cainxin joachaxin que jaha chonda de ngain Dios. Jaha danjoha oportunidad para que rroçaxaonha chojni ixin jaha xonhi xá.

3

Tti jiquininxin sinchehe chojni que ditticaon Jesucristo

¹ Ncheçaxaon chojni que sitticaon na cain gobernación co cain tti tettonha, co sittoexin na sinchehe na quexeho cosa jian.

² Ndache na que rronichjaha na jianha de ni ná chojni, ni tsetocaoha na chojni, co sinchehe na cain cosa jian ngain icha chojni co sintteha na orgulloso ngain icha chojni.

³ Ixin cai ján na are saho vechonxinha na co vagotticaonha na ngain Dios, co vacjin na inchin chojni que ndadiguitján. Co ján na gontte na inchin ninchehe xa de ngain cain tti jianha que cuerpoa na joinao, co de ngain cain tti jianha que vanttaçoxian na vanttoho na. Vanttoho na cosa jianha co vaconchjoá na ngain chojni co vacoñaon na ngain na co jaon na vacoñaohé chó na.

⁴ Pero are Dios, tti chjá na iná vida narao, cjoagoo na ixin jehe jian nchehe co ixin jehe rinao cain chojni,

⁵ are mé jehe cjoenguijna na para que chonda na iná vida narao. Pero jeha ixin ján na jointtoho na ná cosa jian, sino que ixin jehe coiaconoá na. Jehe joinchehe jamé are Espiritu Santo cjoén almá na, co mexinxin coentoxinhi vidá na co chjá na iná vida naraoxin.

⁶ De ixin Jesucristo, tti danjo iná vida narao, Dios anto chjá na joachaxin de ngain Espiritu Santo

⁷ para que conixin tti jian que joixin de ngain jehe, ján na jamé tsojian na co sayé na tti iná vida naraoxin que xonhi tiempo tsjexin que ján na techonhe na.

⁸ Palabra jihi atto ndoa. Co rinaho que jaha anto tsje ntthi rrondache chojni cain cosa jihi para que tti chojni que ditticaon Dios sinchehe na tti jian. Cain cosa jihi jian co ttjenguijna cain chojni.

⁹ Pero jaha ncheha caso tti chijni que xonhi xé, ni tti jitaxin de ixin quexén joinchehe nigoelito icha xanchjen are saho, ni ncheha caso tti ningaconhe chó chojni, ni tti ttetocaho chó na de ixin quexén ttetonha ley que vayé Moisés. Cain cosa mé xonhi xé co ttjenguijnaha chojni.

¹⁰ Si chonja chojni santsjenda chojni de ngain nihngo, jaha nichjehe chojni mé co ndache ná o yó nttiha que isincheha jaña, co si rrochoha sinttaha caso, jaha denguixin chojni mé de ngayehe chojni que ditticaon Jesucristo.

¹¹ Ixin jaha onoha que chojni mé ocjamangui joarrixaoen, co tti jianha que nchehe chojni, mé tjago ixin jianha jehe.

Tti ndacho Pablo para jeho Tito

¹² Are janha rrorroanha Artemas o Tíquico, jaha tsjehe quexén sinchehe pero jaha sihi sitsjena ngain rajna Nicópolis ixin janha oxaxanho que nttiha sattoxin tiempo quin.

¹³ Conixin cainxin tti nchao sinchehe jaha, ttjenguijna xiabogado Zenas co cai Apolos, co chjehe na tti rrogondehe na para ngain tti satsji na para que xonhi sitjañehe na.

¹⁴ Co ttjenguijna cain chojni que ditticaon inchin ján na para que tsangui na sinchehe na jian co ttjenguijna na chojni are jehe na rrogondehe na para que vidé na sonda para ixin Dios.

Pablo joexin cjin carté co rroanha joajna

¹⁵ Cainxin chojni que te nganji janha rroanha na joajna para ixin jaha. Chjehe joajna cain amigo na que ditticaon na Jesucristo nttiha. Que Dios sinchenchaon nganji ra. Amén.

Carta Que Dicjin Pablo Para Ngain Filemón

Pablo chjé joajna Filemón

¹ Janha Pablo na que rriaxinna jai ngain cárcel ixin causexin Jesucristo, rricjinha carta jilhi janha conixin Timoteo para nganji jaha Filemón. Jaha xicompañerona na de ngain xa que nttaha na co anto rinaho na jaha.

² Co cai carta jilhi para ngain chojni que ditticaon Jesucristo que xatte ngain nchiandoi para servioia ra, co cai para ngain nchi que dinhi Apia que cai ditticaon ncha Jesucristo, co xí que dinhi Arquipo tti ttjenguijna na ngain xé Dios.

³ Dios Ndodá na co Jesucristo, tti chonda cain joachaxin, sinchenchaon nganji ra co rrochjá ra tti chjoin que tsonohe ansean ra.

Pablo ché ixin Filemón anto rinao co ditticaon Dios

⁴ Janha cainxin tiempo chjaha gracias ngain Dios de ixin jaha, Filemón, co xaxanho jaha are janha nttacoanxian Dios

⁵ ixin janha coian que jaha rinao co jian ditticaon Jesucristo co ixin cai rinao cain chojni que ditticaon jehe.

⁶ Janha danchiá Dios que tti chojni que ovitticaon Jesucristo ixin jaha ndache na, chojni mé icha tsinxin na tti jian que Jesucristo rroán na.

⁷ Janha atto chahna co darihi animado ixin jaha rinao cain chojni hasta que anto jian nchehe ngain cain chojni que ditticaon Jesucristo.

Pablo danchia ná joatotsenhe ñao para ixin tti nchehe xa Onésimo

⁸ Mexinxin masquí chonda derecho janha para tsetonha quehe chonda que sinchehe jaha,

⁹ pero jehorinaho sinttatsanha ñao ixin janha anto rinaho jaha. Janha Pablo na, ojonchjan na co jai rriaxinna ngain cárcel ixin causexin Jesucristo,

¹⁰ co janha danchiaha jaha ná joatotsenhe ñao na para ixin Onésimo, tti joigoan inchin xanhna ntthi ngain cárcel tti vitticaon Jesús are janha jointtacoán.

¹¹ Are icha saho Onésimo cjoí ná tti nchehe xa que xonhi xé para ixin jaha, pero jai jehe rrogondá na para ixin jaha co para ixin janha cai.

¹² Janha rrorroanha Onésimo iná. Dayehe inchin rrocji ansenna janha.

¹³ Janha rrojinaho que jehe rroguitohe ntthi nganji na para que tti rrojinchehe jaha nganji na janha, jehe tti rrojinchehe mé cain nchanho que janha rriaxinna ixin causexin tti jian joajna.

¹⁴ Pero xonhi rinaho sinttaha si jaha sariha de acuerdo para que tti joatotsenhe ñao na que jaha sinchehe nganji janha jaha afuerza, sino que jehorinaho si jaha ján sinao.

¹⁵ Puede Onésimo vahjenda de nganji jaha ná tiempo, para que jai jehe sehe nganji jaha para cainxin tiempo.

¹⁶ Co jai ijeha inchin ná tti nchehe xa ixin sehe icha jian que ná tti nchehe xa, rrocho, inchin ná xanchó na ngain Cristo que anto rinao na. Janha atto rinaho Onésimo, pero jaha chonda que icha sinao ixin jeha jehorinaho inchin xinchehe xá, nahi, sino que inchin ná xanchó para ngain Jesucristo, tti chonda cain joachaxin.

¹⁷ Jañá remé, ixin janha xicompañeroa na, dayehe Onésimo inchin rrogayena janha.

¹⁸ Si choan nchaoha joinchehe nganji jaha, o si choan jica nganji jaha, nchena cobro janha.

¹⁹ Janha, Pablo na, cjin na conixin rana co letrana janhi: janha tsjengaha hna, masqui janha nchao rrojintaxaxaon que jaha rricana janha ngoixin vidá jaha.

²⁰ Ján, nchehe tti joatotsenhe ñao jilhi nganji janha para ixin Jesucristo, tti chonda cain joachaxin, co nchehe jamé para que rrochjana consuelo inchin ná xanchian de ngain Cristo.

²¹ Rricjin na nganji jaha ixin janha chonda seguro que jaha sitticaon tti janha danchiaha co nona que jaha sinchehe icha que tti janha danchiaha jaha.

²² Co cai janha danchiaha jaha ná cuarto tti janha sarihi, ixin janha chonda seguro que Dios rrochjá ra tti joachaxin que jaha ra danchiehe ra para que janha sasotsjaha ra.

Pablo joexin cjin carté co rroanha joajna

²³ Canxion chojni rroanha na joajna para ixin jaha, saho Epafras, xicompañerona ngain cárcel de ixin causexin Jesucristo.

²⁴ Co cai Marcos, Aristarco, Demas, co Lucas cain tti nittjenguijna na ngain xé Dios rroanha na joajna para ixin jaha.

²⁵Que Jesucristo, tti chonda cain joachaxin para ixin ján na, sinchenchaon nganji cainxin ra. Amén.

Carta Para Ixin Chojni Judío Que Nichja Nguigoa Hebreo

Dios joinchegonda Xenhe para que jehe nichjé chojni

¹ Ngain tiempo are saho, Dios joinchegonda profeta para que Dios nichja tsje nttiha co de tsje manera ngain nindogelitoa na xan'chjen.

² Pero jai, ngain nchanho tehe, Dios joinchegonda Xenhe para que jehe nichjá na ján na. Dios joinchegonda cainxin cosa que jí ngain mundo jiji pero de ixin jehe Xenhe, co jehe cointtoehe Xan cainxin cosa jiji para que jehe Xan tsetonha Xan.

³ Jehe Xenhe Dios mé tti Xan tjago glorié Ndodé Xan, co jehe Xan jí Xan mero xajeho inchin Dios jí, co jehe Xan, Xan jiquehe cainxin cosa de ixin palabré Xan, ixin palabré Xan chonda anto tsje joachaxin. Co are joexin jointtaroa na Xan ján na de cain tti jianha que teca na, jehe Xan sajoiguehe Xan ngain lado jian de tti lugar que retaha Dios nttiha ngajni.

Xenhe Dios chonda Xan icha joachaxin que cain ángel de Dios

⁴ Mexinxin Xenhe Dios joiguehe Xan icha importante que cain ángel de Dios, ixin Dios chjé jehe Xan de herencia ná cargo icha importante que cargoe cain ángel.

⁵ Ixin Dios xonhi tiempo nda'cho ngain ni ná ángel janhi:

Jaha tti Xanhna;

janha chjaha vida jai.

Ni nda'choha Dios de ixin ni ná ángel:

Janha sarihi Ndodé jehe,

co jehe sehe Xanhna janha.

⁶ Pero are Dios rroanha tti nacoa Xenhe, xansaho co icha jian ngataha nontte jiji, jehe nda'cho:

Cainxin ángel de Dios chonda que sinchesayehe jehe Xan.

⁷ Co de ixin cain ángel de Dios, jehe Dios nda'cho:

Janha nchao nttacjamanga cain ángel inchin chintto que jitja,

co cain ángel que nchehe xana janha nchao nttacjamanga inchin neje xohi.

⁸ Pero de ixin Xenhe Dios, jehe nda'cho janhi:

Tti joachaxin que jaha chonda, oh Dios, xonhi tiempo tsjexin;

co tti jaha tteonha, ján rritteonha inchin jiquininxin.

⁹ Jaha cain tiempo rinao cain cosa jian, co ningaconhe cain cosa jianha;

mexinxin janha, tti Dios de jaha, coincchiá jaha

co nda'chjan que jaha icha rrochaha

que cain nicompañeroa.

¹⁰ Co cai nda'cho Dios ngain Xenhe:

Jaha, tti chonda cain joachaxin, desde are saho jaha tti joinchegonda nontte,

co jaha joinchegonda ngajni conixin rá.

¹¹ Nontte co ngajni ndatsjexin, pero jaha sarihi para cainxin tiempo.

Nontte co ngajni ndatsonttaxi inchin lontto.

¹² Co jaha tsjadoho nontte co ngajni jian inchin rocji ná vestido,

co jaha tsentoxinhi cayoi cosa jiji inchin chojni ttentoxinhi lonttoe na.

Pero jaha cainxin tiempo sarihi xajeho,

co vida xonhi tiempo tsjexin.

¹³ Co Dios xonhi tiempo nda'cho ngain ni ná ángel:

Jaha darihi lado jian na

hasta que janha sinttagacha jaha de ngain cain tti ningaconha.

¹⁴ Cain ángel jehe espíritu para ngain xé Dios, co Dios rroanha ángel mé para tsjenguijna cain tti chojni que sayé iná vida naroaxin.

2

Chonda ni que sicao ni cuidado para que sayé ni iná vida naroaxin

¹ Mexinxin ján na chonda na que icha tsjinho na cuidado de ngain tti ocoini na para que sa'chjendaha na de ngain tti nttiha ndoa.

² Tti joajna que Dios coetonhe ángel para joinda'cho ngain nindogelitoa na xan'chjen are saho, joajna mé Dios cjoago que ján ndoa. Co tti chojni que joincheha inchin coetonha joajna mé, Dios joinchecastigá na inchin jiquininxin na.

³ Mexinxin ján na ¿queñén satsinguehe na castigoe Dios si sonttoha na caso jehe tti vida naroaxin que danjo jehe Dios? Ixin Jesús mismo tti saho joiñdaçho de ixin jehe vida naroaxin jihi, co después tti chojni que coinhi de ngain Jesús de ixin jehe vida naroaxin jihi cjoago na que ján ndoa, co jehe na ndatto na na ján na de ixin vida naroaxin jihi.

⁴ Co Dios mismo joiñchese gurá joajna de ixin vida naroaxin jihi ixin jehe cjoago tsje señal co milagro co icha cosa que joiñtheadmirá chojni. Co cai jehe Dios rroáñ na Espíritu Santo, tti chjá na cada na jejú tipo de joachaxin inchin jehe rinao.

Jesucristo vayá na para sontte na inchin xanchó jehe

⁵ Dios chjehe joachaxin cain ángel para que jehe tsetonha ngain mundo que tsí, de jehe tti mundo que janha na tenichja na.

⁶ Sino que ngain ná parte de tti jitaxin Palabré Dios, nntiha ndaço:

Oh Dios, ¿quedonda soixin ñaxaon de ixin chojni?

O ¿quedonda soixin anto ta joachjaon de ixin chojni ngataha nontte nntihi?

⁷ Para nchion tiempo, soixin chjehe chojni icha tsjehe joachaxin que cain ángel, pero cottimeja soixin chjehe na ñajeho gloria que soixin chonda, co joiñchesayehe na, co chjehe na joachaxin para que jehe na ttetonhe na cain cosa que soixin joiñchechjian.

⁸ Co soixin chjé chojni joachaxin ngain cain cosa mé.

Jañá are Dios joanjo cain joachaxin ngain chojni para cainxin cosa, Dios cointtoeha ni ná cosa que sitticaonha ngain chojni. Pero masqui jamé, ña doconha na que cain cosa ditticaon ngain na.

⁹ Pero ján na chonxin na de ixin Jesús, que Dios chjé icha tsjehe joachaxin que cain ángel para nchion tiempo. Ixin Dios anto rinao cainxin chojni, mexinxin jehe joanjo Jesús para que ndavenhe para ixin cainxin na ján na. Co jai Dios chjé jehe gloria co nchesayehe ixin jehe ndavenhe masqui anto tangui.

¹⁰ Cainxin cosa que te ngain mundo jihi, te para ixin Dios co cain cosa mé te ixin Dios joiñchechjian; co Dios rinao que cainxin chojni que ocjan na chojni jehe rrochonda na parte ngain glorié jehe. Mexinxin Dios joiñao que Xenhe Jesucristo anto tangui conhe Xan para que jehe Jesucristo vachje ná chojni jian, jamé jehe nchao ttjenguijna chojni para rrochonda na iná vida naroaxin.

¹¹ Ixin cain ján na ño ocoroa na, conixin jehe tti jointtaroa na ñajeho nacoa Ndadá na chonda na. Mexinxin Xenhe Dios, Jesucristo, tosoeha de ncheguinhí ján na xanchó jehe.

¹² Inchin jehe ndaço ngain tti jitaxin Palabré Dios:

Janha rronichja de ixin soixin ngain xanchian,

co rrotsje na himno para ixin soixin, janha conixin icha chojni ngain nihngo.

¹³ Cai ndaço ngain tti jitaxin Palabré Dios:

Janha rrochonda confianza ngain Dios.

Co ndaço ngain iná parte:

Janha nntihi rrihi, conixin cain chjan que Dios chjana.

¹⁴ Cain chjan mé chojni que chonda nntao co jni. Mexinxin Jesús cjoí chojni cai que chonda nntao co jni para que jehe nchao ndavenhe co jamé joiñchexante tti vechonda joachaxin para navagoenxon chojni, co mé rroçho inchínji.

¹⁵ Co jamé Jesús joanjo libertad ngain cain tti chojni que anto ñaon na ixin ndasenhe na ixin chojni mé te na inchin esclavo ngain joañoon mé ngoixin vidé na.

¹⁶ Ixin seguro que Jesús joiha para joiñcenguijna cain ángel, sino que Jesús joí para joiñcenguijna cain chojni Abraham.

¹⁷ Co para que jehe joiñchehe jamé, jehe chonda que cjoí chojni inchin cain xanchó jehe, para que jehe nchao ttiaconoehe cain ján na co para ixin ján na joiguehe ná jian dána ngattoxon con Dios. Co jamé jehe nchao joiñcheroa cain chojni de tti jianha que nchehe na de ixin tti anto tangui conhe jehe.

¹⁸ Co ixin jehe mismo tangui conhe co vitaha de rrojinchehe cosa jianha are ngataha nontte jihi, mexinxin jai jehe nchao ttjenguijna cain chojni que ditaha de sinchehe cosa jianha.

3

Jesús icha importante que Moisés

¹ Mexinxin, hermanos, jaha ra ño ocoroa ra ixin Dios jointtaguinhi ra chojni jehe, tsjehe ra jian ngain Jesucristo ixin jehe tti representanté Dios para ixin ján na, co jehe tti dána icha importante de ngain tti dotticaon na.

² Ixin Jesús jehe vanchehe jian cain tti rinao Dios, mexinxin Dios chjé ña jihi. Inchin Moisés cai vanchehe jian cain ña que jehe vechonda para ixin chojni Dios.

³ Pero Jesús jiquininxin icha tsosayehé que Moisés, jañá inchin tti nchechjian ná nchia icha jiquininxin tsosayehé jehe que nchia mismo.

⁴ Cada nchia chonda que tonchjian nchia de ná chojni, pero Dios jehe tti joinchechjian cain cosa que jí.

⁵ Jamé, Moisés cjoí jian ninchehe xé Dios ngayé chojni Dios. Co jehe chonda xa de vandache chojni de ixin quehe rrojinchehe Dios después ngain na.

⁶ Pero Cristo, ixin jehe Xenhe Dios, jehe chonda joachaxin de ttetonhe chojni Dios, co mé ján na mismo, si ján na ndoa sonttoho na sigue jian sotticaon na co si rrochonda na confianza ngain jehe cainxin tiempo hasta ndasenhe na co si sonttoho na sigue çhoin tsonoa na ixin techonhe na tti jian que sayé na de ngain Dios.

Dios rinao que chojni jehe sinchejogaha

⁷ Mexinxin ndaço Espiritu Santo ngain tti jitaxin Palabré Dios:

Jai, si jaha ra ttinhi ra tti ndaço Dios,

⁸ dintteha ra cha de ngain ansean ra, inchin vintte tti chojni judío que vitticaonha na tti ttetonha Dios.

co jehe na joinao na viconxin na paciencié Dios are vacji na ngagaha jna tti çonhi chojni jí.

⁹ Mexinxin ndaço Dios ngain Palabré:

Nttiha nigoelitoa ra çançhjen vaquenanaxin na prueba

masqui vicon na cain cosa que janha jointtaha ngoixin tti cuarenta nano que jehe na sacjoi na nttiha.

¹⁰ Mexinxin janha çoñaho ngain chojni mé,

co ndaçhjan: “Cain tiempo ndadiguitján na de ngain ansén na, co rinaoha na datsoan na tti nttiha que janha tjagoa na.”

¹¹ Mexinxin, janha çoñaho ngain na co ndattjan na conixin ná juramento, que ixin jehe na çhoaha rroguiji na tti rrojinchejogaha na conixin janha.

¹² Hermanos, ttjiho ra cuidado que ni ná de jaha ra rrochondaha ra ansean ra janha que sachjendehe Dios que jichon, co isitticaonha ra ngain jehe.

¹³ Sino que cada nchanho ncheanimá chó ra, ná ra co ná ra are xa jí tiempo, para que ni ná de jaha ra sitticaonxinha ra ngain cosa janha, co ansean ra tsochaha para ngain Dios.

¹⁴ Ixin si ján na sonttoho na sigue hasta ndasenhe na, de rrochonda na tti confianza que ján na techonda na desde are nacoexinxon na gotticaon na, cottimeja ján na rrochonda na parte ngain Cristo.

¹⁵ Jañá ndaço ngain tti jitaxin Palabré Dios:

Jai, si jaha ra ttinhi ra tti ndaço Dios,

dintteha ra cha de ngain ansean ra inchin vintte tti chojni que vitticaonha na tti ttetonha Dios.

¹⁶ Co, çquexehe tti chojni que coinhi na tti ndaço Dios co después vitticaonha na? Mé cjoí cain tti chojni judío que Moisés joantsjexin de ngain nonttehe Egipto.

¹⁷ Co çquensen Dios çoñao ngain ngoixin tti cuarenta nano? Mé ngain tti çajeho chojni judío que joinchehe janha, tti chojni que ndavenxin ngagaha jna tti çonhi chojni jí.

¹⁸ ¿Co quensen ngain tti ndaço Dios conixin ná juramento que çhoaha tsji na tti rrojinchejogaha na ngain Dios? Mé ngain çajeho chojni judío que vitticaonha tti ttetonha Dios.

¹⁹ Mexinxin ján na ttinxin na que jehe na çhoaha joiji na nttiha ixin jehe na vitticaonha na Dios.

4

¹ Mexinxin jai que ján na xa chonda na oportunidad de tsjin na sinttojojogaha na ngain Dios, chonda que rrochonda na cuidado, no sea que çhonja de jaha ra çhoaha tsji ra sinchejogaha ra ngain Dios.

² Ixin ján na cai coinhi na tti joajna ndoa que danjo iná vida naroa, inchin jehe na cai coinhi na. Pero para ixin jehe na çonhi xé que jehe na coinhi na mé, ixin masqui coinhi na, jehe na vitticaonha na.

³ Pero ján na xo ogotticaon na, ján na tti tsjin na sinttojojogaha na ngain Dios. Pero para ixin tti chojni que vitticaonha Dios, para ixin jehe na conhe inchin ndaço Dios ngain tti jitaxin Palabré:

Mexinxin janha çoñaho ngain na co ndattjan na conixin ná juramento,

que ixin jehe na çhoaha rroguiji na rrojinchejogaha na nganji na janha.

Pero ixinha jamé, jí lugar tti chojni nçhao sinchejogaha ngain Dios ixin jehe ojinchejogaha desde are jehe joehe xé de joinchechjian mundo.

⁴ Ixin ngain ná parte de tti jitaxin Palabré Dios ndaço janhi de ixin tti yatoxin nchanho: Dios joinchejogaha ngain nchanho yatoxin de cain xa que jehe joinchehe.

⁵ Co ngain iná parte jitaxin janhi:

Sijlha na sinchejogaha na nganji na janha.

⁶ Co chojni mé que saho coinhi na tti joajna ndoa que danjo iná vida naroa, joiijha na joinchejogaha na ngain Dios, ixin jehe na vitticaonha na joajna mé. Pero te icha chojni que ján siji sinchejogaha ngain Dios.

⁷ Ixin tsje nano después de tti tiempo mé Dios cjan coín iná nchanho, co nchanho mé, jai. Co Dios joinchenichja David janhi de ixin nchanho jai inchin jitaxin Palabré Dios:

Jai si jaha ra ttinhi ra tti ndacho Dios,
dintteha ra cha de ngain ansean ra.

⁸ Si Josué rroganjo ngain chojni Israel oportunidad jihi de rrojinchejogaha na ngain Dios are joiiji na nonttehe Canaan, Dios irrocjanha rroganjo iná nchanho después.

⁹ Mexinxin jihi rrocho ixin xa dittohe oportunidad para que chojni Dios sinchejogaha na jian ngain jehe.

¹⁰ Ixin tti chojni que nchejogaha ngain Dios, chojni mé nchejogaha de cain xé que jehe joinchehe, jañá inchin joinchejogaha Dios are joexin joinchehe xé.

¹¹ Mexinxin, ján na chonda na que rrotsjehe na queXérn sinttoho na para que tsjin na sinttojogaha na ngain Dios, co tsjiho na cuidado que ni ná na sonttoha na inchin joinchehe cain tti chojni que vitticaonha tti tetonha Dios.

¹² Ixin palabré Dios jichon co chonda joachaxin. Palabra mé icha yao que cain espada que chonda filo de yoixin lado. Co inchin espada nchao dattodoho hasta quexeho parte de cuerpoe ni, jamé palabré Dios dattodoho ngain almé co ngain espiritue ni. Co palabra mé tti jian nchenohe ni tti xaxaon ni co tti rinao ansén ni sinchehe.

¹³ Xonhi cosa jí que Dios joinchechjian que nchao sema de ngain jehe. Para ngattoxon con Dios cain cosa jíxago, co ján na rrochonda na que rrondacho na ngain jehe cain tti jointtoho na.

Jesús jehe tti dána icha importante

¹⁴ Jesús, tti Xenhe Dios, mé tti dána icha importante para ixin ján na, co jehe tti cjoijougehe tti ttjen Dios. Mexinxin, ján na chonda na que sonttoho na sigue sotticaon na inchin tetonha Dios.

¹⁵ Co jehe tti dána icha importante para ixin ján na, mé tti nchao tsiacoaná na ján na are jianha dotticaon na ixin jehe cai anto joitaha de rrojinchehe cain tipo de cosa jianha, pero jehe xonhi tiempo joinchehe ni ná cosa jianha.

¹⁶ Mexinxin, ján na tsonchienhe na ngain tti ttjen Dios co rroxaonha na ixin jehe Dios anto rinao na, co jehe tsiacoaná na ján na co tsjenguijna na are ján na tangui tsoan na.

5

¹ Cada dána icha importante para ngain chojni judío joixin de ngayé chojni judío, co Dios ttinchiehe jehe para que jehe sehe representanté Dios para ixin chojni mé, co para que dána mé saquehe cosa de ofrenda ngain alté Dios para que Dios sinchetjañehe chojni tti jianha que jehe na joinchehe na.

² Co ixin jehe dána mé nchehe cosa jianha inchin cain chojni, mexinxin jehe nchao rrochonda paciencia ngain tti chojni que tsjehe chonxin de ixin Dios co ngain tti chojni que ncheha jian.

³ Co ixin dána mé cai nchehe cosa jianha, mexinxin jehe chonda que danjo cosa para ngain Dios para que Dios sinchetjañehe tti jianha que jehe joinchehe cai, xajeho inchin nchehe para que Dios sinchetjañehe tti jianha que nchehe cain chojni.

⁴ Xonhi chojni siguehe dána icha importante de ixin jehó mismo, sino que Dios tti nchegayé chojni mé joachaxin jihi, inchin conhe ngain Aarón tti cjoijougehe saho dána.

⁵ Co jañá conhe ngain Cristo cai; jehe vinha dána icha importante ixin jehó joinao, sino que Dios joinchegayé joachaxin mé; inchin Dios ndacho ngain Cristo:

Jaha tti Xanhna;

janha tti chjaha vida jai.

⁶ Cai ndacho Dios ngain Cristo ngain iná parte de tti jitaxin Palabré Dios:

Jaha ná dána para cainxin tiempo,

co jaha xajeho clase de dána inchin Melquisedec.

⁷ Are Cristo vehe nttihi ngataha nontte, jehe anto joinchecoanxinhi Dios co anto joinchet-senhe ñao Dios, co are joinchehe jamé, jehe nichja soji co hasta joinchequina ndacon para ngain Dios tti chonda joachaxin para que rrocanchjandaha Jesucristo para ndarroguenhe. Co Dios coinhi cain tti ndacho Cristo ixin jehe Cristo anto vanchesayehe Dios.

⁸ Mexinxin Cristo masqui jehe Xenhe Dios, jehe coangu vitticaon joinchehe cain tti tetonha Dios de ngain tti anto tangui que conhe.

⁹ Co después que Cristo jañá vachje anto jian, are mé jehe nchao danjo iná vida naroa que xonhi tiempo tsjexin ngain cain chojni que ditticaon ngain jehe.

¹⁰ Ixin Dios tti joincheguinhí Jesucristo tti dána icha importante, co ndacho ixin jehe xajeho clase de dána inchin Melquisedec.

Tti anto tangui que jí si tsinttohe ni tti confianza que chonda ni ngain Cristo

¹¹ Janha na xa chonda na tsje que rrondattjo ra de ixin asunto jihí, pero atto tangui para rrondattjo ra ixin jaha ra rinaoha ra ttinxin ra.

¹² Ovatto tsje tiempo que jaha ra ditticaon ra Jesucristo, co jai jaha ra onchao rrojincheoenhe ra icha chojni de ixin Cristo. Pero jai jaha ra xa dondaha ra iná chojni que rrondattjo ra iná cain cosa icha tanguiha de ixin Dios. Cjan ra anto sojiha ra de ngain tti ditticaon ra inchin ná xanletsjochjan que chonda que sihi xan tsjin en lugar de sine xan comida soji.

¹³ Co tti chojni jamé, jehe na inchin tti xanletsjochjan que tetai, rrocho ixin jehe na xa ttinxinha na jian quehe rrocho tti vida nao.

¹⁴ Co tti comida soji, mé para ixin chojni yeye, que onohe dinchiehe quexehe tti jian co quexehe tti jianha.

6

¹ Mexinxin nntofo na sigue de tangui na icha de ixin Dios para que rrocjan na inchin chojni yeye de ngain tti dotticaon na. Co tsinttohe na ná lado tti coangui na are nacoexinxon na coangui na de ixin Jesucristo, inchin quexén ttentoxinhí ni vidé ni para isincheha ni cosa jianha que dicaon ni para ngain infierno, co de quexén sitticaon ni ngain Dios,

² co de ixin quedonda chonda ni que diguite ni, co de ixin quedonda ttin rá ni ngataha já iná chojni que ditticaon Jesucristo co nchetsenhe ñao Dios ixin jehe sinchenchaon chojni mé, co quexén rroxechon cain chojni que ndadenhe co ixin Dios sinchejuzguehe cain chojni co rrondache na quehe tsonhe cada na para cainxin tiempo.

³ Ján na onoa na cain yá, mexinxin sonttofo na sigue tsanguí na icha si Dios sanjo joachaxin.

⁴ Ixin chojni que ovayé joadingasán co ochonxin na de ixin tti jian que danjo Dios, co ojé Espíritu Santo ngain na,

⁵ co oconohe na tti jian joajné Dios co ochonda na tti joachaxín Espíritu Santo que icha rroxago ngain mundo que tsi;

⁶ tti cain chojni que ochonxin na cain yá, co si rrocjan na isitticaonha na ngain Jesucristo, ni ná chojni nchao sincheanimá chojni mé para tsentoxinhí vidé na iná ixin xajeho inchin jehe na mismo tejjan na tettenganito na Xenhe Dios nganito cruz iná co tetjanoa na Xenhe Dios ngattoxon con cain chojni.

⁷ Co cain chojni ngataha nontte inchin ná jngui que ndadihi cain chin que dinttji ngataon jngui. Co Dios nchenchaon jngui mé si danjo ná cosecha jian para ixin tti chojni que nchehe xa ngataon jngui mé.

⁸ Pero si jngui mé danjo jehó canchaha co icha ca que xonhi xé, nontte mé xonhi rentte nontte. Co Dios rrondacho que nontte mé jiquininxin roche nontte.

Confianzá na ngain Cristo nntasoji na para techonhe na tti jian que sanjo Dios

⁹ Pero masqui janha na ndachjan jañá nganji ra tti janha na anto rinaho na, pero janha na chonda na seguro ixin jaha ra jeha inchin tti chojni que ttinttohe na de ditticaon na ngain Cristo, sino que ixin jaha ra sayehe ra cainxin tti jian que ttí de ngain Dios ixin ditticaon ra ngain.

¹⁰ Ixin Dios jehe nchehe inchin jiquininxin, co jehe rrotjañeha tti jian que jaha ra joinchehe ra ni rrotjañeha que jaha ra ján ndoa rinao ra jehe Dios co mexinxin cjoenguijna ra icha chojni que ditticaon Jesucristo co ixin cain mé tenchehe ra jai cai.

¹¹ Pero janha na rinaho na que cada ra jaha ra sinchehe ra sigue xajeho inchin tenchehe ra jai para que jamé Dios nchao rrochjá ra tti jaha ra techonhe ra.

¹² Janha na rinaoha na que jaha ra tsosaha ra, sino que rroehé ra ejemploe cain tti chojni que jian ditticaon ngain Cristo co que chonda paciencia. Ixin chojni mé tedayé na tti herencia que Dios ndacho sanjo.

¹³ Ixin are Dios chjé promesa Abraham de ixin tti sanjo Dios, jehe joinchejurá conixin nombré jehe ixin xonhi iná nombre icha importante para rrojinchejuraxin que jehó nombré jehe.

¹⁴ Co Dios ndacho ngain Abraham: "Ján ndoa que janha anto sinttanchaon jaha co tsotsje xanttia xanchjen."

¹⁵ Abraham chonhe mé conixin paciencia, co jamé jehe vayé tti ndacho Dios ngain.

¹⁶ Are chojni nchejurá na, jehe na nchejurá na conixin iná nombre icha importante que jehe na; co are jamé nchesejurá na, ichondaha na que tjao na icha.

¹⁷ Mexinxin Dios joinchesejurá tti promesé jehe conixin ná juramento ixin jehe joinao cjoago claro ngain tti chojni que sayé promesé ixin jehe ján sanjo tti jehe ndačo, co xonhi cosa tsentoxinhi.

¹⁸ Jañá tti promesé Dios co tti juramentoe Dios yó cosa que čhoha sitoxinhi. Dios čhoha sincheyaxon de ixin cayoi cosa jihi. Co mexinxin Dios chjá na consuelo jian ján na čo conchienne na ngain jehe para que jehe tsjenguijna na, co chonda na confianza ngain promesé jehe.

¹⁹ Co jehe mé tti nchesoji co nchesejurá almá na inchin ancla que dečhoa ngangui jinda para nchesejurá barco. Co tti confianza que ján na chonda na ngain promesé Dios, mé tti ttenčhoa na ngain Dios tti ttjen toenxin cortiné nihngo nttiha ngajni.

²⁰ Nttiha tti joixinhi Jesús icha saho para joanttjé nttiha para que ján na nchao tsjin na tti ttjen Dios. Co jañá mexinxin Jesús joiguehe para cainxin tiempo tti dána que icha importante, co jehe xajeho clase de dána inchin Melquisedec.

7

Jesús xajeho clase de dána inchin Melquisedec

¹ Jehe Melquisedec cjoí rey de ngain ciudad de Salem co cjoí dána para ixin Dios que ttjen ngajni. Co are Abraham cjanxin de ngain tti guerra que Abraham cjoa cha ngain cainxin rey que jehe coetocaho, are mé jehe Melquisedec vigueta ngatja nttiha, co nttiha Melquisedec, conixin joachaxin Dios, joinchenciaon Abraham.

² Co Abraham joanjo ngain Melquisedec ná ttexin parte de cainxin tti jehe joacha ngain guerra mé. Tti nombre Melquisedec, mé rročo saho “rey que nchehe tti jian”; co ixin jehe tti rey de ngain ciudad de Salem, co ixin nombré ciudad mé rročo “paz”, mexinxin rročo nombré rey mé “rey que xonhi guerra ttjé.”

³ Co xonhi lugar jitaxin de ixin quensen cjoí ndodé ni quensen cjoí janné jehe Melquisedec, ni de ixin quensen cjoí nindogelitoe xančhjen. Cai xonhi lugar jitaxin quesa concjhi ni quesa ndavenhe; mexinxin jehe Melquisedec nchao sottocainxin na Xenhe Dios ixin cai jehe Melquisedec cjoí ná dána para cainxin tiempo.

⁴ Nchao ji remé, jai xaxaon ra de ixin Melquisedec. Jehe anto importante vehe, ixin hasta Abraham, tti cjoí ndogelitoe xančhjen cain chojni Israel, jehe ndo mismo joanjo ndo ngain Melquisedec ná ttexin parte de cain que jehe ndo joantsjehe ndo cain rey que coetocaho ndo ngain guerra.

⁵ Ján ndoa que tsje nano después, ley que vayé Moisés ndačo que jeha xannti xančhjen de Leví nchao doan dána. Co ley mé cai chjé dána mé joachaxin de sinchecobrá ngain chojni Israel ná tti ttexin parte de cain cosa que jehe na chonda na, masqui cain jehe na co xidána mé xajeho razé co chojni Abraham.

⁶ Pero Melquisedec masqui jehe haza razé Leví, pero jehe vayé tti ttexin parte de tti joacha Abraham. Co jañá Melquisedec joinchenciaon Abraham, tti vayé promesé Dios.

⁷ Co cain chojni nohe na que ná tti nchenciaon ná cosa o ná chojni, mé tti icha importante que tti tonchaon.

⁸ Co nttihi ngayá na ján na, dána que dayé ttexin parte, chojni mé jai xa denhe na. Pero tti jitaxin Palabré Dios nichja de ixin Melquisedec inchin ná chojni que xa jichon.

⁹ Co cai nchao rrondačo ni que Leví co cain dána razé Leví, que jai nchecobrá tti ttexin parte de cain cosa que chonda chojni Israel, cain nimé cai cjoenga na hna tti ttexin parte ngain Melquisedec ngain rato are Abraham cjoenga hna tti ttexin parte ngain Melquisedec.

¹⁰ Ixin are mé rročo que Abraham ojoicoa cain razé mé ngain cuerpoe, masqui are mé jehe na xa toncjha na are Melquisedec joigueta ngatin Abraham ngatja nttiha.

¹¹ Cain chojni Israel vayé na ley pero de ngain dána razé Leví, co cain dána mé xannti xančhjen Aarón, tti saho dána. Pero ley que dána ndache chojni, ley mé xonhi joachaxin chonda para nchejian chojni ngattoxon con Dios. Mexinxin chonda que joi iná dána; nahi dána que chonda joachaxin inchin Aarón, sino que ná dána que chonda joachaxin inchin Melquisedec.

¹² Ixin si ditoxin clase de dána, cai ley chonda que ditoxin.

¹³ Co tti iná clase de dána, mé Jesucristo, tti chonda cain joachaxin para ixin ján na. Co jehe Jesús jeha razé Leví, sino que jehe joixin razé Judá. Co xonhi tiempo ná tti razé Judá cjoí dána.

¹⁴ Ixin anto jian nohe ni que Jesucristo joixin razé Judá, co Moisés xonhi ndačo de ixin jehe raza jihi are jehe nichja de ixin cain dána.

¹⁵ Co jihu icha claro para tsinxin na are noa na ixin tti dána naroaxin que joicononxin, mé inchin Melquisedec.

¹⁶ Ixin Jesús cjoí dána mé pero jeha inchin coetonha ley, ixin ley ndačo jeha chojni razé Leví nchao soan na dána. Rročo que Jesús cjoí dána pero ixin jeha chonda joachaxin para sechon cainxin tiempo.

¹⁷ Ixin Dios ndačo janhi de ixin jeha:

Jaha ná dána para cainxin tiempo,

co jaha xajeho clase de dána inchin Melquisedec.

¹⁸ Jañá, mexinxin tti ley que vayé chojni are saho, icoha jai ixin čhoha cjoengujina chojni co xonhi rentte ley mé.

¹⁹ Rročo que tti ley que vayé Moisés čhoha nchejian ni ná chojni. Co jai en lugar de ley mé, chonda na confianza ngain Jesucristo; co de ixin confianza mé, ján na nchao tonchienhe na ngain Dios.

²⁰ Co Dios ndačo conixin ná juramento que ixin Jesucristo, mé tti dána jai.

²¹ Tti icha dána vintteguinhi dána pero sin ni ná juramento de Dios. Pero are Jesucristo vinhi dána, Dios joinchejurá, ixin ngain tti jitaxin Palabré Dios ndačo:

Dios joinchejurá, co tsentoxinha tti jeha ndačo:

“Jaha ná dána para cainxin tiempo,

co jaha xajeho clase de dána inchin Melquisedec.”

²² Mexinxin Jesús jeha tti joinchesejurá nganji na tti trato naroaxin jihu que mé icha jian que tti trato saho.

²³ Tsje chojni vintte na de dána, ixin are ná dána ndadenhe, iná xí dehe xa de dána, co jañá ni ná xidána mé nchao nchehe sigue xé para cainxin tiempo.

²⁴ Pero ixin Jesús jeha xonhi tiempo senhe, mexinxin jeha xonhi tiempo sanjo xé de dána que jeha chonda ngain iná chojni.

²⁵ Mexinxin Jesús jeha nchao danjo iná vida naroaxin que xonhi tiempo tsjexin ngain cain tti chojni que tonchienhe ngain Dios por ixin jeha Jesucristo, ixin jeha jichon para cainxin tiempo para que nchetsenhe ñao Dios para ixin jeha na.

²⁶ Mexinxin Jesucristo, jeha tti mero dána icha importante que ján na rrogondá na. Ixin Jesús jeha joxon jian ngattoxon con Dios, jeha xonhi cosa nchaoaha ni jianha joinchehe. Jeha vačhjenhe chojni que nchehe jianha, co sacojinhi icha noi que ngajni.

²⁷ Icha dána chonda que doen coxigo para daquehe jni va ngain alté Dios cada nchanho. Saho nchehe mé para ditjañehe cain tti jianha que jeha joinchehe; cottimeja para ditjañehe cain tti jianha que joinchehe icha chojni. Pero Jesús chondaha que nchehe jamé ixin jeha xanjo venhe nacoa nttiha para vitjañenxin cainxin tti jianha que nchehe cain chojni co mé donda para cain tiempo.

²⁸ Ley que vayé Moisés nchequinhi dána icha importante xí que teca tsje cosa jianha que joinchehe. Pero tti juramento que Dios ndačo después de ley mé, juramento mé tti nchequinhi Xenhe Dios dána icha importante, co jeha Xan ni ná cosa jianha joincheha Xan.

8

Jesús jeha tti abogado de ngain tti trato naroaxin

¹ Tti cosa icha importante que janha na tendačhjan na, mé janhi: tti dána que icha importante para ixin ján na, jeha joxon jian, co sajoiguhe ngain lado jian de tti retaha Dios nttiha ngajni.

² Co nttiha ngajni jeha jinchehe xa de dána ngain tti mero ningoe Dios nttiha; co Dios, tti chonda cain joachaxin, mé tti joinchexjian nihngo mé, co jeha chojni tti joinchexjian.

³ Co cain icha dána que icha importante vinchiehe na para que jeha dána mé saquehe cosa co nntaöhe coxigo ngain altar para ixin Dios. Co mexinxin rrogonda que Jesucristo cai vanjo cosa para ixin Dios.

⁴ Si jeha Jesucristo xa rroguhe nttihi ngataha nontte, jeha ni rroguhe de dána ixin jai xa de dána que daquehe cosa para ixin Dios inchin ttetonha ley que vayé Moisés.

⁵ Pero tti nchehe cain dána nttihi ngataha nontte, jeha inchin ná copia o inchin sanho de cain cosa que jí ngajni. Já n na noa na que ixin mé jeha inchin ná copia de lo que tti jí ngajni ixin icha saho que Moisés joinchexjian ningoe Dios, jeha Dios ndačo ngain Moisés: “Ttjiho cuidado co nchexjian nihngo ngataha nontte xajeho inchin janha cjoagoha are ngagaha jna.”

⁶ Pero Jesucristo, tti dána icha importante para ixin já n na, co jeha mé chonda icha jian xa de dána que cain dána nttihi ngataha nontte ixin Jesucristo jeha tti abogado de ngain ná trato icha jian que trato saho. Co promesé Dios para nganji na ngain trato naroaxin jihu, mé anto icha jian promesa que promesa vehe ngain trato saho.

⁷ Ixin si tti saho trato nchao rrojinchejian chojni ngattoxon con Dios, irrogondaha rroconchjian tti trato yoxin.

⁸ Pero Dios vicon que chojni jehe vintteha na jian, mexinxin Dios ndačo janhi de ixin jehe na ngain tti jitaxin Palabr :

Dios ndačo: Ts  nchanho

que janha sinttachjian in  trato naroaxin ngain chojni de Israel, co ngain chojni de Jud .

⁹ Ijeha inchin trato que janha jointtachjian ngain nigoelitoe na xanchjen,

are janha ts  r  na para joantsjexin na de ngain nonttehe Egipto,

pero jehe na joincheha na inchin ndačo trato m ,

co mexinxin janha ijointtaha na caso, ja    cho Dios.

¹⁰ Tti trato que janha sinttachjian ngain chojni Israel ngain nchanho que ts , janhi rročo trato m ,  o Dios:

Janha ts n tti janha tteonha ngain joarrixaoen na, co tti janha tteonha ndasittohe ngain ans n na.

Cottimeja janha sarihi Dios de jehe na,

co jehe na sintte na chojnina janha.

¹¹ Co irrochondaha que in  chojni sinchecoenhe in  chojni;

irrochondaha que n  chojni sinchecoenhe compa eroe, o ni xanch  para que rrochonxin na de ixin janha, tti Dios de jehe na,

ixin cainxin na rrochonxin na de ixin janha,

desde xannchinnchinchjan hasta ni icha ojonchjan.

¹² Co janha sinttatja n  na cain tti jianha que nchehe na,

co ixonhi tiempo janha rro axanho de cain cosa jianha que jehe na joinchehe na.

¹³ Are Dios nichja de ixin in  trato naroaxin, rročo ixin jehe ondačo que tti saho trato ondaconttaxi. Co cosa que ondaconttaxi iseha donda, co otoin ndasitj n.

9

Tti nihngo nttihi ngataha nontte co tti nihngo nttiha ngajni

¹ Tti saho trato vaquetonha ngain chojni que  en vanchecoanxinhi na Dios, pero de ngaxinhi n  nihngo nttihi ngataha nontte.

² Co nihngo jiji janhi conchjian: tti saho cuarto vinhi Lugar Santo, co nttiha vehe tti candelero de y to r , co n  mesa tti vetaha niottja que vaganjo na para ngain Dios.

³ Co toenxin tti manta ngain yoxin puerta, vehe in  cuarto que vinhi Lugar Sant simo.

⁴ Nttiha vehe n  altar de oro tti vachetaxin tsjoca para ixin Dios, co nttiha cai vehe n  caja co ngama caja m  vey  joxon oro. Co ngaxinhi caja m  vehe n  chichjan de oro que veringa nchion man , co nttiha cai veng  nttacottohe Aar n, tti ntt  que  hima reto o, co nttiha cai veng  tti tabla de  o que vetaxin tti saho trato.

⁵ Co ngataha caja m  vintte dibujoe y   ngel que dinhi querubines, co m  rročo lugar tti tjjen Dios. Co jehe dibujoe  ngel m  conixin nenech n vacjanotaon ngataha caja m  tti vanchetja enxin Dios chojni tti jianha que vanchehe na. Pero janha na jai irrondattjoha ra icha de ixin cain cosa jiji.

⁶ Ja n  vintte cain cosa ngain nihngo m , co d na vaguintteguixinhi cada nchanho tti saho cuartoe nihngo m  para que nttiha vanchecoanxinxin Dios.

⁷ Pero ngain tti yoxin cuartoe nihngo m , nttiha vaguixinhi jehe tti d na icha importante, co jeha nacoa nttiha cada nano. Co are d na m  vaguixinhi nttiha, jehe chonda que vaguicao jni coxigo para vaganjo ngain Dios para que Dios vanchetja ehe tti jianha que joinchehe d na m , co tti jianha que joinchehe icha chojni.

⁸ Conixin cain jiji Espiritu Santo nttaquianxin na, que masqui icha d na co chojni nchao nchegonda cuarto saho para vanchecoanxinxin na Dios, jehe na vechondaha na joachaxin para vaguixinhi na tti yoxin cuarto que vinhi Lugar Sant simo.

⁹ Cain jiji inchin n  ejemplo para ixin j n na jai ixin tti cosa co nttaohe coxigo que nttiha vaganjonxin na ngain Dios, cain m   hoha sinchejian ans n cain chojni que nchesayexin Dios ja n .

¹⁰ Ixin cain m  jeha inchin canxion regla que vinttechonda na de ixin quexehe cosa nchao jine na co quexehe cosa nchao dihi na, co que  en jiquininxin ncheroa cuerpoe na. Co cain cosa m  jeha chonda joachaxin hasta que Dios joinchechjian in  trato naroaxin.

¹¹ Pero ojo  Cristo, co jai jehe tti d na icha importante que ttjenguijna na para say  na cain cosa jian que Dios rroanha ngain chojni jehe. Ngain nihngo tti jehe jinchehe  a de d na, nihngo m  tti icha importante co icha jian. Co nihngo m  jeha chojni joinchechjian, rročo que nihngo m  jiha ningo ngataha nontte jiji.

¹² Cristo jehe tti ndoa joixinhi ngain tti Lugar Santísimo nttiha ngajni pero jeha para joiganjo jni cochivatochjan co jni coxinttachjan, sino jehe joanjo jni jehe mismo. Co jañá jehe joixinhi nttiha nacoa nttiha co mé gonda para cainxin tiempo, co jamé jehe nchao chjá na iná vida naroaxin que xonhi tiempo tsjexin.

¹³ Ján ndoa que jni coxintá co jni cochivatochjan co nchonihí nttaohe coxinttachjan que chexin ngataha altar, vintjtite ngataha tti chojni que joincheha inchin ttonha ley que vayé Moisés. Co janá cain mé chonda joachaxin de joincheroa cuerpoe chojni, pero ansén nahi.

¹⁴ Si cain mé jañá chonda joachaxin, ¡mexinxin jni Jesucristo chonda icha joachaxin! Co de ixin Espíritu Santo tti xonhi tiempo ndasenhe, Cristo mismo joanjo cuerpoe ngain Dios co Cristo joxon jian; xonhi jianha chonda jehe, co jni Jesucristo ncheroa ansean na de cain cosa jianha que nchetján chojni. Jamé para que ján na nchao sonttoho na inchin rinao Dios que jichon.

¹⁵ Mexinxin Jesucristo jehe tti abogado na de ngain tti trato o testamento naroaxin. Jesucristo ndavenhe para que vitjañehe cain cosa jianha que joinchehe chojni ngain trato que vechonda joachaxin icha saho, co para que tti chojni que Dios coinchiehe nchao sayé na tti iná vida naroaxin para cainxin tiempo, que jehe Dios ndaño sanjo.

¹⁶ Ixin nttihi ngataha nontte are dittohe ná testamento, mé tti ndaño quehe tsonhe cain cosé chojni que ndavenhe. Co para que chojni familié sinchehe na inchin jindaño ngain testamento mé, chonda na que tsjago na ná Xón, que chojni mé ndoa ndavenhe.

¹⁷ Ixin ná testamento xonhi rentte si xa jichon tti joinchekhjan testamento mé, sino que are ndadenja tti nchekhjan testamento.

¹⁸ Mexinxin Dios are vaquehe tti saho trato chonda que vinttji jni coxigo.

¹⁹ Jihi tti conhe: Moisés ndache cain chojni cain tti ttonha ley que jehe vayé. Cottimeja jehe coá ná ramé nttahisepo co coenjcin ntta chjon jatse, co xanguí ngain jni coxinttachjan co cochivatochjan co tettecjan jni jinda, co cointjtite ngataha tti libro que jitaxin ley que jehe vayé co cai cointjtite jni mé cain chojni.

²⁰ Cottimeja ndaño ngain na: “Jihi tti jni que nchegurá trato que Dios coetonha para ixin jaha ra.”

²¹ Co Moisés cai cointjtite jni nganito nihngo, co cain cosa que vagonda ngaxinhi nttiha para vacocoanxinxin Dios.

²² Co inchin jitaxin ley mé, merocoa cain cosa chonda que toroa conixin jni; co Dios thoha sinchetjañehe ná cosa jianha si diguintjtiteha jni.

Tti tangui que Cristo vetan, mé jointatjañanxin na Dios cain tti jianha que jointtoho na

²³ Jañá que cain cosa yá vagondehe jni coxigo para vacoroaxin, co cain cosa mé jeha ná copia de cain cosa que jí ngajni. Pero cain cosa que tequinoxin ngajni, mé gondehe icha jian jni que jni coxigo para coroaxin, co mé jni Jesucristo.

²⁴ Ixin Cristo jehe joixinha ngaxinhi nihngo que chojni joinchekhjan, que lugar mé jeha ná copia de nihngo mero ndoa, sino que Cristo joixinhi mero ngain nihngo que jí ngajni tti jai jehe jinchetsenhe ñao Dios para ixin ján na.

²⁵ Tti dána judío icha importante vixinhi ngaxinhi nihngo ngain Lugar Santísimo nacoa nttiha cada nano para joiganjo jni que jeha jni jehe. Pero Cristo xanjoha tsje nttiha para ndadenhe.

²⁶ Ixin si jamé rroconhe, jehe Cristo rrochonda que rrogenhe anto tsje nttiha desde que nontte conchjan. Pero tti conhe que jai are ochian ndajittjexin mundo, Cristo xago co joanjo cuerpoe mismo ngain Dios para cjoenga hna cain tti jianha que nchehe chojni. Co mé conhe nacoa nttiha co donda para cainxin tiempo.

²⁷ Jañá inchin cain chojni chonda que senhe na para nacoa nttiha, cottimeja Dios sinchejuzgá ngain na,

²⁸ Jañá cai Cristo xanjo venhe para nacoa nttihi para que cjoenga hna cain tti jianha que nchehe chojni ngataha nontte jihi. Después jehe rroxago nttia yoxin, pero ijeha para sicjenga hna tti jianha que nchehe chojni, sino que para sichjé iná vida naroaxin cain chojni que otechonhe jehe.

10

¹ Tti ley que vayé Moisés cjoí jeha inchin ná sanho de cain cosa jian que tsí co tjugoha claro que xén sintte cain cosa mé. Co masqui chojni que vaconchienne ngain Dios vaganjo na tsje cosa ngain jehe, pero ley jihi xonhi tiempo joinchejian ansén chojni mé ixin nano co nano vaganjo na xajeho cosa.

² Ixin si ley mé nchao rrojinchejian ansén jehe na, cain cosa que vaganjo na para ixin Dios, irroganjoha na nanao. Ixin cain tti chojni que vaganjo cain cosa mé, are jehe na

orrocoroa na para cainxin tiempo de cain tti jianha que joinchehe na, jehe na irroconoeha na feo de ixin tti jianha que joinchehe na.

³ Jañá rrocho que cain cosa que vaganjo na, cosa mé jeha para vancheꝯaxaon na cain tti jianha que jehe na nchehe na cada nano,

⁴ ixin jní coxintá co jní cochivatochjan ꝯonhi tiempo nchao rroxengaxin hna cain tti jianha que nchehe chojni.

⁵ Mexinxin are Jesucristo jói ngataha nontte jiji, jehe ndaꝯho ngain Dios:

Soixin irinaoha tti nntaohex coxigo ni icha cosa que chojni chjá,

mexinxin soixin joinchechjian ná cuerpo para ixin janha.

⁶ Soixin nntaꝯoxianha nntaohex coxigo que che ngataha ꝯohi ni icha cosa que chojni nchehe na para nchetjañenxin na tti jianha que jehe na nchehe na.

⁷ Mexinxin janha ndachjan: “Ntthi joihi janha para sinttaha inchin soixin rinao, oh Dios, jañá inchin jitaxin de ixin janha ngain libroe Moisés.”

⁸ Cristo saho ndaꝯho que Dios jinaoha ni joincheꝯoxinha cain cosa que vaganjo chojni, ni coxigo que vaganjo chojni, ni nntaohex coxigo que vacjaga chojni para ixin Dios, para vitjañenxin na tti jianha que nchehe na. Jamé ndaꝯho Cristo masqui cain cosa mé ley que vayé Moisés coetonha para que vanjo na.

⁹ Cottimeja Cristo ndaꝯho: “Ntthi joihi janha para sinttaha inchin soixin rinao, oh Dios.” Rrocho que jehe jói para vinttjian cain cosa que vaganjo chojni, co jehe vanjo iná cosa que icha jian.

¹⁰ Dios ojointtajian na ixin Jesucristo joinchehe inchin rinao Dios are Jesucristo joanjo cuerpoe jehe mismo para ngain Dios. Co jehe joinchehe jiji nacoa nntiha, co mé donda para cainxin tiempo.

¹¹ Cain xidána judío vanchehe xa xé xa cada nchanho, co vaganjo xa tsje nntiha ꝯajeho cosa ngain Dios masqui cain cosa mé ꝯonhi tiempo nchao cjoenga hna cain tti jianha que vintteca chojni.

¹² Pero Jesucristo joanjo jeha nacoa cosa ngain Dios para cainxin tiempo, co mé cuerpoe para cjoenga hna cain tti jianha que nchehe chojni. Cottimeja Jesucristo sajoiguehe ngain lado jian de Dios.

¹³ Nntiha jichonhe Jesucristo hasta tti nchanho que Dios sinchegacha jehe de ngain cain tti ningaconhe.

¹⁴ Ixin de tti nacoxinxon nntiha que jehe ꝯanjo ndavenhe para Dios jehe joinchejian para cainxin tiempo cainxin chojni que tequininxin para ngain Dios.

¹⁵ Co Espíritu Santo nntasegurá na cain jiji ixin saho ndaꝯho:

¹⁶ Janhi sehe tti trato que janha sinttachjian ngain chojni ngain tti nchanho que tsí, tho Dios que chonda cain joachaxin.

Tsín tti ttetonha janha ngain ansén na, co tti janha ttetonha ndasittohe ngain joarrixaoen na.

¹⁷ Cottimeja ndaꝯho:

Iꝯonhi tiempo janha rroꝯaxanho de cain cosa jianha que jehe na nchehe na.

¹⁸ Jañá mexinxin are cain tti jianha que vintteca chojni ovitjañehe na, ichondaha na que sanjo na icha cosa ngain Dios para sitjañenxin na cain cosa jianha mé.

Ján na chonda na que tsonchián na ngain Dios

¹⁹ Mexinxin hermanos, jai ján na nchao soxinhi na conixin confianza ngaxinhi tti Lugar Santísimo nntiha ngajni ixin Jesucristo ocointtji jní para ixin ján na.

²⁰ Are Jesucristo vanjo cuerpoe para ndavenhe, are mé rrocho ixin cortina para ngain Lugar Santísimo xiré cortina para que ján na nchao satto na cortina mé co tsjia na ngain ná nntiha naroxin que danjo iná vida que ꝯonhi tiempo tsjexin.

²¹ Jehe Jesús, tti dána que icha importante, mé tti ttjengujina ján na nntiha tti ttjen Dios.

²² Mexinxin ján na chonda na que tsonchián na ngain Dios conixin ansean na jian conixin ná confianza seguro ngain Dios. Jamé ixin Jesucristo ojoincheroa ansean na para que ján na tsona na seguro que iꝯonhi teca na de cain tti jianha que jointtoho na, co cai inchin Dios ojoinchetsinda cuerpoe na para que ján na nchao tsonchián na ngain.

²³ Ján na sonttoho na sigue cainxin tiempo de sotticaon na ngain Dios co ꝯonhi tiempo tsentoxinhi na tti ján na dotticaon na ixin Dios rrochjá na tti jehe ndaꝯho.

²⁴ Co chonda na que rrotsjehe na de queꝯén sonttoho na para tsjengujina chó na para sonao chó na co para sonttoho na jian.

²⁵ Rochondaha na que sonttoho na inchin nchehe tti chojni que iꝯatthea para nch-esayehe Dios, sino que ján na chonda na que sonttoanimá chó na para que tsji na ngain tti xatte na mé, co icha jai que ojitonchian tti nchanho que Jesucristo tsí iná.

²⁶ Ixin si ján na sonttoho na sigue de sinao na sonttoho na jianha después de que ján na ojoatsoan na tti ndoa, iñonhi cosa jí para que ján na sanjo na ngain Dios para que jehe sinttatjañá na cosa jianha que sonttoho na.

²⁷ Si jamé sonttoho na, ján na jecho nchao rrochonhe na tti anto soji castigo ngain xohi que jiche para rrochexin cain tti ningaconhe Dios, are Dios sinchejuzgá cain cosa.

²⁸ Are çhonja çhojji que xa vitticaon ngain ley que vayé Moisés joincheha inçhin coetonha ley mé co si vintte yó o ní çhojní de testigo que ndaço ixin ndoa vicon que tti iná çhojní joincheha inçhin coetonha ley mé, çhojní mé vayé castigo de navenxon co xonhi çhojní coaxin joachjaon.

²⁹ Mexinxin janto icha soji castigo tequininxin tti çhojní que ningaconhe Xenhe Dios, co xaxaon na ixin xonhi rentte jní Xan que coingo Xan, co nichja na feo de ixin Espíritu Santo de Dios, tti anto rinao jehe na! Co jehe jní Cristo, mé tti nchese gurá tti trato naroaxin, co trato mé tti joinchejian çhojní mé.

³⁰ Ján na noa na que Dios, tti chonda cain joachaxin, ndaço: “Janha tti sinttacastigá çhojní jianha; janha tti tsjengá na hna inçhin tequininxin na.” Co cai ndaço: “Dios, tti chonda cain joachaxin, sinchejuzguehe çhojní jehe.”

³¹ Ixin anto tangui tsonhe çhojní que teca jianha ngattoxon con Dios que jichon!

³² Pero xaxaon ra jaha ra ngain tiempo vatto are jaha ra nandá vayehe ra joadingasán, rroço que coexinhi ra vitticaon ra Jesucristo, are mé jaha ra coixinha ra conixin paciencia tti anto tangui que conha ra are jaha ra joincheluchá ra para ditticaon ra Jesucristo.

³³ Are mé canxion de jaha ra feo xanttjo ra na co joinchehe na feo nganji ra ngattoxon con icha çhojní. Co icanxin ra conoha ra tangui are vicon ra ixin nicompañeroa ra vetan na tangui.

³⁴ Jaha ra coiaconoeha ra çhojní Jesucristo que teaxinhi ngain cárcel, co masqui joants-jaha ra na cosá ra pero çaha ra ixin onoha ra que ngajni çhonda ra cosa icha jian que cosa nntihi ngataha nontte, co cosa mé tsonçhenhe para cainxin tiempo.

³⁵ Mexinxin nchetjanha ra confianza que jaha ra çhonda ra ixin confianza yá tti tsiaho para ixin jaha ra ná jian premio.

³⁶ Jaha ra rrogondaha ra rrochonda ra paciencia para sinchehe ra inçhin rinao Dios co para sayehe ra tti jehe ndaço sanjo.

³⁷ Ixin ngain tti jítaxin Palabré Dios nntiha ndaço:
Daca, çhonda que anto daca,

tsí jehe tti çhonda que tsí, co jehe tsonçhenha.

³⁸ Pero tti çhojní que janha rrondaçhjan ján ixin jehe jian çhojní, mé sinttechon na ixin ditticaon na na janha,

pero si jehe na isitticaonha na na janha, janha isariha contento ngain jehe na.

³⁹ Pero ján na jaha tti çhojní que isitticaonha co sitján, sino que ján na tti çhojní que ditticaon cain tiempo co jamé tettençhinha na almá na.

11

Tti confianza ngain Dios

¹ Are ján na çhonda na confianza ngain Dios, mé rroço ixin çhonda na seguro que ján sayé na tti ján na techonhe na, co tedotticaon na mé, masqui ján na xa doconha na.

² Canxion nigoelitoa na xançhjen are saho, çjoi na jian ngattoxon con Dios ixin vechonda na confianza ngain Dios.

³ Por ixin confianzá na ngain Dios, noa na que jehe coetonha para conchjian cain mundo. Mexinxin cain cosa que jai docon na conchjianxin de ngain ná tti çhoja docon na.

⁴ Co Abel ixin jehe vechonda confianza ngain Dios, mexinxin jehe joanjo ná cosa icha jian ngain Dios que tti joanjo xanchó Caín, co mexinxin Dios ndaço que ján Abel jehe jian, co Dios vayé tti joanjo Abel. Jañá mexinxin masqui Abel ondavenhe, pero ján na xa tetangui na de ixin Dios de ixin tti confianza que vechonda Abel.

⁵ Cai Enoc ixin jehe vechonda confianza ngain Dios, jehe ndavenha; Dios sajoicao para ngajni, co icha çhojní iviconha na Enoc ixin Dios sajoicao para ngajni. Co cai ngain tti jítaxin Palabré Dios, nntiha ndaço que icha saho que Dios sajoicao Enoc para ngajni, Dios joincheçoxinhi cain tti joinchehe Enoc.

⁶ Pero Dios jehe çhoja rroché ngain ná çhojní si çhojní mé çhondaha confianza ngain Dios, ixin para tsonchian ni ngain Dios, jehe ni çhonda ni que sitticaon ni que ixin Dios ján jí co ixin sinçhenchaon cain çhojní que ttjé na jehe Dios.

⁷ Cai Noé vechonda confianza ngain Dios. Mexinxin are Dios joinchenohe Noé ixin siconhe cosa que Noé xa xonhi tiempo vicon, Noé vitticaon tti ndaço Dios co Noé joinchechjian arca para que nifamilié ndavenxinha na de ixin jinda. Co de ixin confianzé

Noé ngain Dios, Noé cjoago que ixin cain chojni que vaguitticaonha Dios ngain tiempo mé jianha na ngattoxon con Dios. Pero Dios ndaço que Noé jehe jian ixin vechonda confianza ngain Dios.

⁸ Cai Abraham vechonda confianza ngain Dios, mexinxin are Dios nichjé jehe, jehe vitticaon co vachje sacjoi para ngain tti nontte que después Dios joanjo de herencia ngain jehe. Jehe Abraham vachjexin de ngain nonttehe co sacjoi pero venoeha para ttinó sajittji.

⁹ Co ixin Abraham vechonda confianza ngain Dios, mexinxin jehe vehe ngain tti nontte que Dios ndaço joanjo, masqui inchin chojni que joixin de cjin. Mexinxin jehe vexinhi nchia de carpa, co cai jamé joinchehe xenhe Isaac co Jacob, que cai vayé na tti ndaço Dios que rroganjo.

¹⁰ Jamé vanchehe Abraham ixin jehe chonhe cjoix ngain tti ciudad que tonchjenhe para cainxin tiempo, que Dios joinchechjian, co mé rroço ngajni tti ttjen Dios.

¹¹ Cai Sara, nchichihí jehe Abraham, ixin jehe ncha misma vechonda ncha confianza ngain Dios, masqui jehe ncha anto onačhichjan para rrojincheconcjihí chjan, pero vayé ncha joachaxin de joincheconcjihí ncha ná chjan, co jamé jehe ncha cjoix ncha janné chjan mé ixin vechonda ncha confianza que Dios ján rrojinchehe tti jehe ndaço.

¹² Jañá conhe Abraham masqui anto odačhichjan, pero řa joichonda ná xenhe, co de xan mé después anto cotsje chojni Abraham hasta que chojni mé inchin cain conotse ngajni co inchin cain řochjenhe nchise que jí ngandehé ndachaon, que čhoha ttequin ni.

¹³ Cain chojni mé ndavintteguenhe na co vayeha na cain cosa que Dios ndaço ixin rroganjo ngain na. Pero ixin jehe na vechonda na confianza co vitticaon na ixin Dios ndoa rroganjo cain inchin jehe ndaço, mexinxin jehe na anto vaché na ixin vechonxin na ixin cain mé rroguiconhe después. Co mexinxin jehe na ndaço na que jehó joigatto na ngain mundo jihí ixin jehe na jeha de nttihi na, čho na.

¹⁴ Mexinxin cain chojni que nichja jañá, jehe na tendaçho na claro que řa tettjé na iná nontte que soan nonttehe na.

¹⁵ Si jehe na řa rrořaxaon na de ngain tti nontte que joixin na, jehe na nchao rrocjan na nttiha iná.

¹⁶ Pero jehe na joinao na iná nontte icha jian, rroço que jehe na rinao na ná lugar nttiha ngajni. Mexinxin Dios tosoeha de dinhi Dios de jehe na, ixin jehe ojoinchechjian ná ciudad nttiha ngajni para ixin jehe na.

¹⁷ Abraham, ixin vechonda confianza ngain Dios, mexinxin are Dios vaquehe prueba ngain Abraham, are mé Abraham joiaho Isaac, xenhe jehe para narrogoenxon xan co rroganjo xan ngain Dios. Abraham vehe dispuesto de rroganjo tti nacoaxinxon xenhe que jehe vechonda masqui Dios ondaço ngain Abraham:

¹⁸ "De ngain xanha Isaac tsotsjexin anto tsje chojnia jaha."

¹⁹ Abraham jamé joinchehe ixin jehe vechonxin que Dios chonda joachaxin hasta para sinchexechon chojni que ndadenhe. Co ján na nchao rrondaço na cai que Abraham cjan vayé xenhe iná de ngayé nindadiguenhe ixin Abraham ovehe dispuesto para narrogoenxon jehe xan.

²⁰ Cai Isaac ixin jehe vechonda confianza ngain Dios, mexinxin jehe ndaço ngain Jacob co ngain Esaú, xenhe jehe Isaac, que ixin Dios seguro sinchenchaon xan.

²¹ Cai Jacob ixin jehe vechonda confianza ngain Dios, mexinxin are ochiaon nda-joiguenhe, jehe ndaço ngain cayoi xenhe José que ixin Dios sinchenchaon cayoi xan. Co Jacob vingattjenxin conixin nttacottohe co joinchecoanxinhi Dios.

²² Cai José vechonda confianza ngain Dios, mexinxin are ochiaon ndavenhe, jehe ndaço que después cain chojni Israel sachjexin na de nttiha ngain nonttehe Egipto. Co jehe José coetonha que are satsji na chonda na que sasicao na nttaloroe jehe.

²³ Cai nindoha Moisés vechonda na confianza ngain Dios, mexinxin are concjihí Moisés, jehe na coema na Moisés ngoixin ní conittjao ixin vicon na que Moisés ná xanxichjan anto čhjoin jí, co řaonha na masqui coetonha rey que ixin cain xanxichjan de chojni Israel chonda que narrogoenxon na xan.

²⁴ Cai Moisés vechonda confianza ngain Dios, mexinxin are jehe ojoiixi ná xí, jehe čhoha para que vinhi xenhe nchichjehe rey de Egipto.

²⁵ Sino que jehe icha joinao vetan tangui cai inchin icha chojni Dios en lugar de que jehe čhjoin rroconohe de rrojinchehe cosa jianha inchin joinao cuerpoe, ixin jehe venoeha que mé jehó para nchion tiempo.

²⁶ Moisés, jehe conohe icha rentte para jehe vetan tangui de ixin causexin Cristo que jehe rrogechonda cain cosa que jí ngain nonttehe Egipto, ixin jehe venoeha jian quehe sacha nttiha ngajni.

²⁷ Cai ixin Moisés vechonda confianza ngain Dios, mexinxin jehe sacjoixin de ngain nonttehe Egipto, co jehe xañha ixin rrocoñao rey de nntiha, sino que Moisés jehe joinchehe sigue jian vaguitticaon ngain Dios inchin orroguicon Dios que ni ná chojni diconha.

²⁸ Cai ixin Moisés vechonda confianza ngain Dios, mexinxin jehe coetonhe cain chojni Israel que sinchehjian na tti quiai pascua. Co coetonhe na ixin tsinga na jni coleco ngaré puerté nchia para que are jói ángel de Dios para nagoenxon cain xanxi xenhe chojni Egipto, xansaho ángel mé xonhi joinchehe ngain xenhe chojni Israel.

²⁹ Cai ixin cain chojni Israel vechonda confianza ngain Dios, mexinxin jehe na vatto na ndachaon que dinhi Mar Rojo inchin si rrocji ngataha jinche xema. Co are xisoldado de Egipto joinao xa rrogatto xa jamé cai, pero nntiha ndacjonhe xa jinda.

³⁰ Cai ixin chojni Israel vechonda confianza ngain Dios, mexinxin are jehe na ngariandanji na yáto nchanho ngain ciudad Jericó ttjarioho jie que vechonda ciudé na para vaguinttemanxin na are vaquetocaho na icha chojni, ttjarioho mé vetsinga ttjario.

³¹ Cai Rahab, tti nñhi que vanchecji cuerpoe ngain tsje xí, pero por ixin confianza que jehe ncha coexinhi ncha vechonda ncha ngain Dios, mexinxin jehe nñhi mé venha ncha are ndavintteguenhe cain icha chojni ngain ciudad mé ixin nñhi mé jian vayé ncha tti chojni Israel que joitsaya ciudad mé.

³² ¿Co quehe icha rrondachjan janha? Janha ichondaha tiempo para rronhattjo ra de ixin Gedeón, de Barac, de Sansón, de Jefeé, de David, de Samuel co de ixin cain profeté Dios.

³³ Cain nimé cai ixin confianzé na ngain Dios, mexinxin canxion na joacha na tsje nontte, co icanxin na coetonha na jian ngain chojni, co Dios cjoengujna na inchin jehe ndacho ngain na. Co icanxin na are vetan na coleón, Dios cjoengujna na para que joineha na va.

³⁴ Co icanxin na are vinttjin na ngacjan xohi que anto soji, pero xonhi conhe na. Co icanxin na, masqui chojni joinao narrogoenxon na conixin espada, pero nahi. Co tti chojni que tsangaha, jehe na contsanga na, co anto soji coeto na are ngain guerra co coixinhi na joacha na ngain cain soldadoe xivaningaconhe na.

³⁵ Co vintte nñhi que masqui ndavenhe xenhe ncha, pero Dios joinchexechon xan mé iná para ixin jehe ncha.

Co icanxin chojni vechoa co anto soji vicaon na. Co tti cjoaya ndache na ixin ixonhi cosa feo rroconhe na si irroguitticaonha na ngain Dios. Pero jehe na choha na, ixin jehe na icha rinao na que Dios sinchexechon jehe na para rrochonda na ná vida icha jian.

³⁶ Co icanxin chojni vetan na tangui are icha chojni cjoanoa na na co vicaon na conixin nttá, co hasta cadena vinttechiaxin na co viaxinhi na ngain cárcel.

³⁷ Co icanxin na nagoenxon na na conixin xo, icanxin na hasta conchinjidonga na na, icanxin na icha chojni joinao que jehe na rrogachjenda na de ngain Dios, icanxin na venxin na conixin espada; co icanxin na vangaria na cain parte co vintténgá na jehi roé coleco co contenttento, co anto noa na, coá na joachjaon, co feo conhe na ngain icha chojni.

³⁸ Cain chojni mé anto icha jian na que icha chojni. Vacjicoa na ngagaha nttá, co ngagaha jna, co vintte na ngaxinhi cueva, co ngain lugar que techjadoho nontte.

³⁹ Cain chojni mé masqui Dios ovicon que ixin ján ndoa jian vaguitticaon na ngain Dios, pero vayeha na tti ndacho Dios rroganjo ngain na,

⁴⁰ ixin Dios jehe xaxaon iná cosa icha jian para ixin ján na, ixin jehe ndacho que cain chojni mé tsojian ngattoxon con Dios pero hasta conixin ján na cai.

12

Ján na rrotsjehe na ejemploe Jesucristo

¹ Mexinxin ixin cainxin chojni mé que vitticaon na are saho cointtoá na na ejemplo mé, jai ján na tsin na ná lado cain cosa que xonhi xé co cain cosa jianha que ditaha na de sonttoho na, para que nchao conixin paciencia sonttoho na xé Jesucristo que ján na chonda na.

² Ján na rrotsjehe na ejemploe Jesucristo ixin jehe tti joiaoa na confianza que chonda na ngain Dios. Co jehe tti tsjengujna na para sotticaon na mé para cain tiempo. Jesús jehe vetan tangui nganito cruz, co jehe joincheha caso tti joasoaxin que ixin jehe ndavenxin nntiha, ixin jehe ovenohe que después de setan tangui, jehe chjoin tsonohe co rroché. Co sajoiguhehe ngain lado jian de tti ttjen Dios.

³ Mexinxin jaha ra chonda ra que xaxaon ra ejemploe Jesús, que jehe anto tangui conhe de ngá rá chojni jianha; mexinxin jaha ra tonchjenha ra ni doanha ra desanimado de ngain xé Jesús.

⁴ Ixin masqui jaha ra tencheluchá ra ngain cosa jianha, pero ni ná ra xa ndadena ra ixin tenchehe ra jamé.

⁵ ¿Aondatjañaha ra tti Dios ndattjo ra ixin jaha ra inchin xenhe jehe? Jehe ndačo janhi ngain tti jitaxin Palabré:

Hijo mio, ndačoha ixin xonhi xé tti castigo que chjá Dios, para que jaha tsangui sinchehe cosa jian,

ni doanha desanimado are sinttasattaha jehe.

⁶ Ixin Dios nchejian cain chojni que jehe anto riano, co nchecastigá cain tti chojni que jehe dayé inchin xenhe.

⁷ Tonsoji ra ngain castigo mé ixin Dios jehe jamé sinchehe nganji ra ixin jaha ra xenhe jehe. ¿Apoco jí ná chjan que ndodé xan nchecastigaha ndo xan?

⁸ Pero si Dios sinttastigaha jaha ra inchin jehe nchecastigá cain xenhe jehe, mexinxin rročo que jaha ra jaha ra xenhe jehe.

⁹ Cai ján na are nchinnchin gontte na, ndodá na de nntihi ngataha nontte vanttastigá na ndo, co ján vanttorespetá na ndo. Mexinxin ¿quedonda ján na sotticaonha na Ndo dá na que ttjen ngaini para que jamé ján na rrochonda na iná vida nroaxin?

¹⁰ Cain ndodá na nntihi ngataha nontte vanttastigá na ndo nntihi ngain vida jiji que seha sonttechon na, inchin jehe ndo vaconohe ndo que nchao jí. Pero Dios jehe nntastigá na para tsjenguijna na para que jehe nttajian na inchin jianxin jehe.

¹¹ Ján ndoa que ni ná castigo nntaxoxianha na ngain rato que ján na tedayé na castigo, sino que anto ttín na are mé: pero tti chojni que tangui de ngain castigo mé, después chojni mé chonda na vida jian co chjoin tonohé na de ngain ansén na.

Tti tsonhe chojni que rinaoha ditticaon tti ndačo Dios

¹² Jañá ixin castigoe Dios anto rentte, mexinxin doan ra animado de nchehe ra tti jehe ndačo, co dinttechinha ra.

¹³ Co ttjé ra tti nntiha nao, co sattji ra ngatja nntiha mé para que chojni que jai ditticaonha jian, sicon na ejemplo ra co sitticaon na icha en lugar de isitticaonha na.

¹⁴ Nchehe ra de que cain ra dintte ra chjoin conixin icha chojni ngain vida jiji, co dačhjenjehe ra cain cosa jianha, ixin chojni que dačhjenjeha na de ngain cosa jianha čhoha rrochonxin na Dios.

¹⁵ Ttjho ra cuidado para que ni ná ra tsinttoeha ra de sayehe ra ayuda que ttixin de ngain Dios, co para que ni ná ra sintteha ra inchin ná ca que anto tsja que nchejianha icha ca.

¹⁶ Co ttjho ra cuidado cai que ni ná jaha ra dinttečicoha ra iná nčhí que jaha nčhíčiha ra, ni ndačoha ra ixin cosé Dios xonhi rentte inchin joinchehe Esaú, co mexinxin jehe joincheceji derecho que jehe vechonda de chjan saho ngain xanchó xanJacob. Cain mé joincheceji por ixin nacoa comida.

¹⁷ Co jaha ra noha ra que después, are Esaú joinao que ndodé rrojoinchetsenhe ndo ñao Dios para que Dios rrojoinchenchaon jehe Esaú, ndodé Esaú ichoha ndo. Co masqui jehe Esaú anto tsjanga pero jehe čhoha vittja quexén rrojoinchehe para rroquentoxinhi tti jehe joinchehe.

¹⁸ Jaha ra conchienha ra ngain ná jna que nchao catte ni inchin joinchehe chojni Israel que conchienne na ngain jna Sinaí tti jiche xohi, co tti vehe anto naxin xehe co tti anto soji cjoa čhintto.

¹⁹ Ni jaha ra coinha ra are coyao trompeta nntiha ni are nichja Dios ngain jehe na. Co cain chojni que coinhi mé, jehe na joinchetsenhe na ñao Moisés que ixin irronichjaha Dios icha jañá ngain jehe na.

²⁰ Jehe na ndačo na jañá ixin coixinha na de joaxaon, de ixin tti coetonha Dios are ndačo: “Quexeho chojni o coxigo que tsingachje ngagaha jna jiji, jaha ra chonda ra que nasoexon ra chojni mé o coxigo mé conixin xo o conixin ná lanza.”

²¹ Cain na anto xaon na de ixin tti vicon na ngain jna mé, que hasta Moisés mismo ndačo: “Janha rriřanga na de joaxaon.”

²² Pero en lugar de jiji, jaha ra conchienne ra ngain jna de Sión co ngain tti ciudad de Dios, cayoi mé rročo ngain Jerusalén de ngaini, co ngain tsje miles de ángel.

²³ Co conchienne ra ngain icha chojni xenhe Dios que tequininxin ngaini; co jaha ra conixin jehe na co cain ángel mé tenchecoanxinhi ra Dios. Co jaha ra oconchienne ra ngain Dios tti Juez de cainxin chojni co de ngain cain espiritue chojni jian que Dios joinchejian.

²⁴ Co jaha ra conchienne ra ngain Jesús, tti abogado na ngain Dios para tti trato nroaxin, co chonda ra confianza ngain jni Jesús que jehe counttji para nttajian na ján na; co jni jehe danjo icha jian cosa que jni Abel.

²⁵ Mexinxin jaha ra ttjho ra cuidado de nchehe ra caso Dios, tti jinichjá na. Ixin Dios anto soji joinchecastigá chojni Israel are jehe na joincheha na caso tti Dios ndache na de ngain Moisés are ngain jna Sinaí que jí ngataha nontte jiji. Mexinxin ján na seguro soan na castigado si sonttoha na caso tti jindattjoxin na Dios desde ngaini.

²⁶ Are Dios nichjexin chojni Israel de ngagaha jna Sinaí, are mé tté jehe joinchequingui nontte, pero jai jehe ndaço: “Iná nttiha janha sinttaquingui jeoha nontte, sino que cai ngajni.”

²⁷ Are jehe ndaço “iná nttiha”, ján na ttinxin na que are mé rroxante cain cosa que nchao ttingui que Dios joinchechjian, co jeho siguehe tti çhoja tsingui.

²⁸ Tti lugar que Dios chjá na, tti jehe ttetonha, mé çhoja tsingui. Mexinxin ján na chonda na que rrochjé na gracias ngain Dios de ixin cain jihi, co sonttocoanxinhí na jehe Dios inchin jiquininxin, conixin respeto inchin jehe rinao,

²⁹ ixin Dios jehe inchin ná çohi que tjaga cain cosa jianha.

13

Queçén sinchehe ni para sincheçoxinhí Dios

¹ Ttinttoeha ra de rinao chó ra inchin rrocji ra ichó ra cainxin ra.

² Co çonhi tiempo tjañaha ra de dayehe ra chojni que diji nchiandoi ra ixin jamé canxion chojni vayé na ángel de Dios ngain nchiandoha na, masqui jehe na ni vanjoha na cuenta que tti vayé na jehe ángel de Dios.

³ Co çaxaon ra cain chojni que teaxinhí ngain cárcel, inchin rrocji que jaha ra rroguint-teaxinha ra nttiha cai conixin jehe na. Co çaxaon ra de ixin tti chojni que vicaon por ixin nichja de ixin Jesús, ixin jaha ra cai chonda ra ná cuerpo que tonohe ttín.

⁴ Cain ra ço tottaha ra, nchehe ra inchin tequininxin chojni que ototthe, co danjoha ra cuerpoa ra ngain iná chojni ixin Dios sinchejuzguehe cain tti chojni que danjo cuerpoe ngain ojé chojni que jeha xixihi ni jeha nçhiçhihi, co ngain tti chojni que chonda xicoxehe o nchicoxehe.

⁵ Çaxaonha ra de rrochonda ra icha tomi, sino que dintte ra contento conixin jeha tti ochonda ra ixin Dios ndaço: “Janha çonhi tiempo tsinttoha jaho, co çonhi tiempo satsjixin de nganji.”

⁶ Mexinxin jai ján na nchao rrondaço na conixin confianza:

Dios jehe tti ttjenguijna na janha;

co çagoanha ni ná cosa que sinchena çonja chojni.

⁷ Çaxaon ra de ixin tti chojni que coetonha ngain ningoa ra, co de ixin tti chojni que ndattjo ra joajné Dios. çaxaon ra queçén joinchehe na ngain vidé na, co ditticaon ra ngain Dios inchin jehe na vitticaon na.

⁸ Jesucristo çonhi tiempo ojé; jehe çajeho jna, jai, co para cainxin tiempo.

⁹ Jaha ra dittoaxinha ra que icha chojni sinttacoanha ra na ojé cosa que ndoaha de ixin Dios. Icha jian tsojoji ansean na de ixin tti jian que ttixin de ngain Dios, co sotticaonha na tti regla de ixin quehe sine ni, ixin regla mé ttjenguijnaha pero ni tti chojni que ditticaon regla.

¹⁰ Co Jesucristo tti joanjo vidé para ixin ján na, pero tti dána que nchehe inchin ttetonha ley que vayé Moisés chondaha derecho de sayé ayuda ngain Cristo.

¹¹ Ixin dána judío icha importante çanxinhí jní coxigo ngaxinhí Lugar Santísimo de ngain ningoe na. Jní mé tti danjo dána ngain Dios para ditjañehe tti jianha que nchehe cain chojni judío. Pero cuerpoe cain coxigo mé che ngain çohi, ndoja de rajné na.

¹² Jamé cai Jesús vetan tangui are ndavenhe, pero ndoja de ciudad para joinchejian cain chojni conixin jní jehe.

¹³ Mexinxin çhjin na ngain jehe masqui chojni ndaço ixin anto soaxin ixin dotticaon na ngain jehe.

¹⁴ Ixin ngataha nontte nttihi ján na chondaha na ni ná ciudad que tsonçhenhe para cainxin tiempo, sino que ján na tettjé na tti ciudad que tsí después.

¹⁵ Mexinxin cainxin tiempo ján na chonda na que sonttocoanxinhí na Dios por ixin ngain nombré Jesucristo co mé tti jiquininxin sonttoho na. ¡Mexinxin cain na sonttocoanxinhí na Dios conixin rroha na!

¹⁶ Co çonhi tiempo tjañaha ra de nchehe ra jian co ttjenguijna ra icha chojni conixin tti chonda ra, ixin mé tti ncheçoxinhí Dios dayé de nganji na.

¹⁷ Ditticaon ra tti chojni que ttetonha ngain ningoa ra, co nchehe ra tti jehe na rrondaço na ixin jehe na nitedicao cuidado de ixin almá ra ixin nohe na que jehe na nisanjo cuenta ngain Dios. Mexinxin nchehe ra de que jehe na rroché na nganji ra co jeha de que sinttechín na nganji ra, ixin si jaha ra nchehe ra para que jehe na sinttechín na, jaha ra setan ra tangui.

¹⁸ Nchetsenhe ra ñao Dios para ixin janha na ixin janha na chonda na seguro ixin nttaha na inchin jiquininxin, co rinaho na que cainxin tti sinttaha na, mé jian.

¹⁹ Janha anto danchiaha ra que jaha ra nchetsenhe ra ñao Dios para que Dios rrochjana joachaxin rrocjan na toin para sasotsjaha ra iná.

Tti joexinxin joajna jihi

²⁰ Dios, tti rroanha tti ehjoin que tonohé ansén ní, mé tti joinchexechon Jesucristo, tti chonda cain joachaxin para ixin ján na, co tti chonda cuidado para ixin ján na inchin ná tti jian ttingaria coleco dicao cuidado ixin colecoe, co jehe joinchese gurá tti trato naroaxin que xonhi tiempo tsjexin, conixin jní jehe.

²¹ Que Dios mé sinttajian ra para que nchao sinchehe ra inchin jehe rinao, co de ixin Jesucristo jehe sinchehe de nganji cain ján na inchin jehe sinao. ¡Gloria ngain Cristo para cainxin tiempo! Amén.

²² Hermanos, janha nttatsanha ñao ra que chonda ra paciencia para ttinxin ra cain palabra de consejo jihi, ixin janha cjinha ra carta jihi, pero atto nchín carta.

²³ Janha rrinttanoha jaha ra que hermano Timoteo ovachjexin de ngain cárcel tti jehe vehe. Si jehe tsí nttihi toin, janha sasoquian are janha saso para sasotsjaha ra iná.

²⁴ Chjehe ra joajna cain chojni que ttetonha ngain ningoa ra, co cain chojni que ditticaon ngain Jesucristo. Cain chojni que ditticaon ngain Jesús nttihi nonttehe Italia rroanha na joajna para ixin cain jaha ra.

²⁵ Que Dios sinttanchaon ra cain ra jaha ra. Amén.

Carta Que Dicjin Santiago

Santiago rroanha joajna ngain cain chojni Israel

¹ Janha Santiago na, janha ná ninchehe xé Dios co Jesucristo, tti chonda cain joachaxin. Janha rrichjaha joajna jiji tti tteyó grupoe chojni Israel que dichjequé ngoixin mundo.

Dios nchenohe chojni jehe

² Hermanos, jaha ra chonda ra que tsonoha ra chjoin are rrochonda ra quexeho clase de problema, ixin mé Dios sacaha ra prueba.

³ Ixin jaha ra onoha ra que are Dios dacaha ra prueba ixin andoa ditticaon ra jehe, are mé jaha ra tangui ra de chonda ra icha paciencia.

⁴ Pero nchehe ra que paciencia yá sehe nao, para que jaha ra sintte ra chojni que jian ditticaon Dios co de cainxin sintte ra chojni jian, co jamé cainxin ra xonhi tiempo sitjanha ra tti jian que ttixin de ngain Dios.

⁵ Si chonja de jaha ra noaha ra quehe rinao Dios, ndache ra jehe co jehe sinttanoaha ra, ixin Dios cainxin tiempo jehe anto rinao nchenohe cain chojni co jehe xonhi tiempo ttjengueyexin de tti jehe danjo.

⁶ Pero are sanchiehe ra Dios, chonda ra seguro que ján sinttanoaha ra. xaxaonha ra que ixin puede sinttanoaha ra, ixin tti xaxaon jamé jehe inchin olé ndachaon que sadicaon chinto de ná lado a iná lado.

⁷ Tti chojni que xaxaon jamé, xonhi sayé de ngain Dios,

⁸ ixin tti chojni que jai rinao ná cosa co ndoexin jehe rinao oje cosa, chojni mé chondaha seguro de ngain tti jehe xaxaon.

⁹ Co tti chojni que ditticaon Jesucristo co noa na de nntihi ngataha nontte, chojni mé chonda que tsonohe chjoin ixin jehe na rico na para ngain Dios.

¹⁰ Co tti chojni que ditticaon Jesucristo co jehe na rico na de nntihi ngataha nontte, chojni mé chonda que tsonohe na chjoin para ngain Dios are tsonoa na ixin para Dios xonhi xé cain cosa que chonda na nntihi ngataha nontte. Ixin chojni rico inchin tsjohe ná ca que seha tonchjenhe.

¹¹ Are chinhi nchanho co anto tosoa, ca mé ndaxema ca co tsjohe ca ndadinttjin tsjo co ndattjexin tti anto chjoin que te tsjo mé. Jamé cai chojni rico ndadenhe co ndadittohe cain negocio que jehe na chonda na.

Are Dios daquehe ni prueba, co ditaha ni de sinchehe ni cosa jianha

¹² Anto chjoin para ixin tti chojni que ttixinhi conixin paciencia are Dios daquehe prueba. Ixin are jehe ottixinhi ngain prueba mé, Dios rrochjé chojni mé de premio inchin ná corona, ixin chojni mé sayé tti vida naraoxin que Dios ndacho sanjo ngain cain chojni que rinao na jehe.

¹³ Are chonja de jaha ra ditaha ra de sinchehe ra ná cosa jianha, xaxaonha ra que ixin Dios rroanha joarrixaon mé nganji ra, ixin Dios xonhi tiempo ditaha de sinchehe ná cosa jianha, ni jehe nchexaxaonha iná chojni para sinchehe na jianha mé.

¹⁴ Sino que are ná chojni anto rinao sinchehe cosa jianha ixin jehe deporsin jamé xaxaon, jamé ditaxin daca de sinchehe cosa jianha.

¹⁵ Co de ngain tti jianha que jehe xaxaon jiji, mé nchexin cosa jianha, co are cosa jianha jiji ttixinhi ngain chojni mé, Dios chjé na castigo de ttji na ngain infierno.

¹⁶ Hermanos, janha anto rinaho jaha ra. Dintte ra listo de ditticaonha ra cosa que jeha ndoa.

¹⁷ Ixin cain tti jian que ján na dayé na ttixin de ngajni ngain Dios, tti joinchexjian cain xohi que jí ngajni. Dios jehe xajeho, co ngain jehe xonhi ditoxin que tsiaho jeho sanho.

¹⁸ Dios chjá na vida naraoxin ixin dotticaon na tti joajna ndoa na tti jehe rroán na para que ján na sontte na chojni icha jian para ixin jehe, ixin jehe jamé rinao.

Tti palabra que ján ndoa

¹⁹ Mexinxin cada ra jaha ra chonda ra que dintte ra listo para ttinhi ra, pero saho de rronichja ra xaxaon ra jian co dacaha toñao ra.

²⁰ Ixin tti chojni que toñao, mé ncheha inchin rinao Dios.

²¹ Jañá mexinxin ncheha ra cain cosa jianha, co cain cosa nchaoha que anto nchehe chojni ngain tiempo jiji, co ditticaon ra jian tti joajna ndoa que vittohe ngain ansean ra ixin joajna mé chonda joachaxin de tsjenguijna almá ra para tsjia ngain infierno.

²² Pero nchehe ra inchin jittetonha joajna jiji, co jeoha ttinhi ra joajna jiji, ixin si jeha ttinhi ra co ncheha ra inchin jittetonha joajna, jamé jaha ra tencheyehe ra ansean ra.

²³ Tti chojni que jehó ttinhi joajna jíhi co ncheha inchin jittetonha joajna, chojni mé inchin tti nchexoan ngá con ngá ná espejo.

²⁴ Jehé tsjehe quexén jítsehe, pero are jehé sattji ndatjañehe quexén jítsehe.

²⁵ Pero tti chojni que tjañeha tti jehé ttinhi, sino que jehé tsjehe jian ngain tti jítaxin cain tti ttetonha Dios, co nchehe cain tti jittetonha Dios, ixin mé joxon cosa jian co mé tti chjá na libertad; Dios sinchenchaon cain tti nchehe chojni mé.

²⁶ Si çhonja chojni xaxaon na que ixin jehé na anto ditticaon na Jesucristo, pero si jehé na nichjacoa na palabra que jiquininxinha, jehó na noeha na quehe tenchehe na co tti jehé na ditticaon na xonhi xé.

²⁷ Tti chojni que ndoa ditticaon ngain Jesucristo co chondaha ni ná cosa jianha ngattoxon con Dios Ndodá na, mé tti chojni que ttjenguijna çhjan noa que chondaha ndodé ni janné, co nçhiganha que tangui tonhe, co cai chojni mé ncheha cosa jianha que jí ngataha nontte nttihi.

2

çhoha tsinchiexon ni chojni que sinao ni

¹ Hermanos, jaha ra que ditticaon ra Jesucristo, tti anto jian co tti chonda cain joachaxin para ixin ján na, jaha ra çhoha tsinchiexon ra chojni que icha sinao ra.

² Ixin ná ejemplo: Si ná chojni sixinhi ningoa ra que anto jian lonto jingá conixin cochianingo que anto rentte, co ngain rato mé cai sixinhi ná chojni noa que jingá lonto que xonhi xé,

³ co si icha jian sinchesayehe ra tti jingá lonto icha fino co rrondaço ra ngain: “Jaha nttihi darihi ngain ná lugar icha jian”, co tti chojni noa rrondaço ra ngain: “Jaha yá daringattjencoa, o nttihi darihi ngatacoa nontte”,

⁴ are jañá tenchehe ra, jaha ra otettinchiexon ra chojni que icha rinao ra, co jamé jaha ra tenchejuzguehe ra chojni mé inchin xaxaon chojni que ditticaonha ngain Jesucristo.

⁵ Hermanos, janha anto rinaho jaha ra. Ttinhi ra jíhi. Dios coinchiehe chojni noa de ngataha nontte jíhi para que jehé na sintte na rico de ngain tti jehé na ditticaon na Jesucristo, co para que jehé na sayé na de herencia parte ngain tti ttetonha Dios, que jehé ndaço sanjo ngain cain chojni que rinao na jehé.

⁶ Co jaha ra xaxaonha ra jamé, sino que jaha ra tjanoa ra chojni noa. ¿Anoaha ra que chojni rico, mé tti anto nttanttaha ra xa, cottimeja ttianganji ra na para ngain juzgado?

⁷ Co chojni rico, mé tti nichja jianha de ixin tti nombre jian que jaha ra chonda ra ixin dinhi ra cristiano ixin ditticaon ra Jesucristo.

⁸ Tti icha importante que ttetonha Dios tti jítaxin: “Rinao ra icha chojni jañá inchin rinao ra cuerpoa ra.” Si jaha ra ndoa tenchehe ra jíhi, ján tenchehe ra jian.

⁹ Pero si jaha ra ttinchiexon ra chojni que icha rinao ra, mé tenchehe ra jianha ixin tenchehe ra inchin ttetonha Dios.

¹⁰ Ixin si ná chojni nchehe cainxin tti ttetonha Dios, pero si chojni mé ncheha naoa cosa de cain tti ttetonha Dios, chojni mé xa jica de cain tti ttetonha Dios.

¹¹ Ixin Dios mismo ndaço: “Ncheyeha çhihi iná chojni”, cai ndaço: “Dantsjeha vidé iná chojni.” Mexinxin si ná chojni chondaha nçhicoexehe, pero jehé joantsjehe vidé iná chojni, chojni mé ivitticaonha cain tti ttetonha Dios.

¹² Mexinxin nichja ra jian co nchehe ra jian inchin jiquininxin sinchehe chojni que Dios sinchejuzguehe conixin ley de Cristo que danjo libertad.

¹³ Ixin tti chojni que coiaconoeha iná chojni, Dios cai tsiaconoeha chojni mé; pero tti chojni que coiaconoeha iná chojni, chojni mé tti sacha are Dios sinchejuzguehe cainxin chojni.

Chojni Jesucristo chonda que sinchehe jian

¹⁴ Hermanos, xonhi xé si ná chojni ndaço que jehé chonda confianza ngain Jesucristo co ncheha cosa jian. ¿Ançhao jehé tti confianza mé tsjenguijna para que tsjiha ngain infierno?

¹⁵ Jíhi ná ejemplo: Si ná chojni que ditticaon Jesucristo chondaha lonto ni tti jine

¹⁶ co si ná de jaha ra rrondache ra: “Jian gracia ndoe. Jintte co dihi, co daritsi jian para tsonquianha”, pero rrochjeha ra lonto ni tti sine, xonhi xé tti jaha ra rrondache ra.

¹⁷ Jañá tonhe ngain confianza que chonda na ngain Jesucristo cai. Jehó mé xonhi xé. Chonda na que sonttoho na cosa jian para tsjago na que ján chonda na confianza ngain Jesucristo.

¹⁸ Pero puede çhonja chojni rrondattjo: “Jaha chonda confianza ngain Jesucristo, co janha nttaha cosa jian.” Mexinxin janha ndaçhjan: “Jaha tjagohna quexén jaha chonda confianza ngain Jesucristo si sincheha cosa jian, co janha tsjagoha jaha ixin chonda confianza ngain Jesucristo de ixin tti jian que janha rrinttaha.”

¹⁹ Jaha anto chonda confianza que jí nacoaxinxon Dios, co de mé jaha jian nchehe, pero cainxin demonio chonda confianza mé cai, co xanga de joaxaon ixin nohe que Dios sinchecastigá.

²⁰ Jaha que xaxaonha nao, zarinaoha tsonoha que tti confianza que jehe ni chonda ni ngain Jesucristo chonda que rrožago de ngain tti jian que jehe ni nchehe ni, co jamé nchoe ján jian confianza mé?

²¹ Xaxaon ra ngain Abraham, tti ndogoelitoa na xanchjen. Dios ndačo ixin jehe jian are Abraham narrogoenxon xenhe, xan vinhi Isaac ixin Dios jamé coetonha ngain Abraham.

²² Jaha onoha que Abraham anto vechonda confianza ngain Dios ixin jehe vehe dispuesto de joinchehe quexeho cosa que Dios rrondačo. Tti confianza que jehe vechonda xettexin de ngain tti jehe joinchehe.

²³ Mexinxin ndačoxin ngain tti jitaxin Palabré Dios que Abraham vechonda confianza ngain Dios, co Dios ndačo que Abraham jian de ngain ansén ixin chonda confianza mé. Co hasta Dios joincheguini Abraham amigoe Dios.

²⁴ Jańá jaha ra onoha ra que Dios dayé chojni de ixin tti jian que jehe na nchehe na, co jeoha de ixin tti confianza que jehe na chonda na.

²⁵ Cai jamé conhe ngain Rahab, tti nčí que vanchecji cuerpoe ngain icha xí. Dios vayé nčí mé de jian nča ngattoxon con Dios de ixin tti jehe nča joinchehe nča ixin jehe nča joanjo nča nchia tti vintte tti ní xí que rroanha Josué, co cjoenguijna nča canio xí mé para sacjoixin xa ngain oje ntilha.

²⁶ Jańá inchin cuerpoea na are icoha espiritua na jehe ndadiguenhe, jamé cai tti confianza que ján na chonda na inchin ndadiguenhe si nttoha na tti jian.

3

Tti nchehe neje ni

¹ Hermanos, icha jian sintteha ngayaha ra tsje tti sinttacoanha ra ixin jaha ra onoha ra que janha na, xo nttacoanha ra, icha soji soanna na juzgado.

² Cainxin na atto tsje cosa nchaoha nttoho na co nchaoha nichja na. Si čhonja chojni cainxin tti jehe nichja jian, chojni mé joxon jian que cai nchao ttetonhe ngoixin cuerpoe.

³ Are ján na ttinhi na freno ngain rroha ná conxin, jehe va ditticaon na va ttjinho na va tti ján na rinao na.

⁴ Xaxaon ra cai ngain barco; masqui anto yeye barco, co čhintto que tonxınca barco cai anto soji, pero tti deca barco nchegonda ná nttá anto nčin que dinhi tímón. Conxin nttá mé dicaoxin barco tti jehe rinao.

⁵ Jańá tonhe cai ngain neje ni. Neje ni ná parte anto nčin de ngain cuerpoe ni, pero jehe tonhe que nchao sinchekhjian tsje problema tangui. Neje ni inchin ná jachjenhe cerillo que anto nčin pero tsixinhi tsjaga ngoixin ná jna.

⁶ Co neje ni, jehe inchin ná xohi. Neje ni ná cosa anto jianha que jí ngain cuerpoe ni, mé ná cosa jianha que nchejianha ngoixin cuerpoe ni. Neje ni jidacaon conxin mero xoi infierno, co xohi mé jitjaga ngoixin cuerpoe ni cain tiempo que techon ni.

⁷ Chojni nchao nchesancho cain tipo de coxigo čhintto co tsanga, co conttoa co conché co cain coxigo que jí ngangui ndachaon. Chojni ttixinhi nchesancho cain coxigo mé.

⁸ Pero xonhi chojni ttixinhi ngain neje. Neje ni ná cosa jianha que xonhi chojni ttixinhi ngain, co neje ni chonda inchin veneno que nadoenxon chojni.

⁹ Conxin neje na, nttocoanxinxin na Dios Ndođa na, co xajeho neje na jiji danchiixin na cosa jianha para ixin chojni que Dios joinchekhjian inchin jehe mismo.

¹⁰ De rroha na nttocoanxinxin na Dios co de rroha na danchiixin na cosa jianha para ixin chojni. Nttatsanha ñao ra, jiji jiquininxinha sonttoho na.

¹¹ Ixin žapoco nchao tti rročinxin jinda que anto čhjoin jni, ntilha nchao rročinxin jinda que anto tsja?

¹² ŽO apoco ná nttahigo nchao sinchekhjian nttá aceituna, o ná nttauva nchao sinchekhjian nttá ttihigo? Jańá cai tti jichinxin jinda que anto xijntta, ntilha čhoha rročinxin jinda que anto čhjoin jni.

Quexén Dios nchenohe chojni tti anto jian

¹³ Si jí ngayaha ra ná chojni que nohe jian de ixin Dios co ttinxin jian, chojni mé chonda que tsjago de ngain tti jian que jehe nchehe, co jehe tsjago conxin paciencia que ttixin de ngain tti jehe nohe.

¹⁴ Pero si jaha ra anto choja ra, co ttenchjinha ra coraje ngain ansean ra, co de cain cosa rinao ra que jaho ra tti sintte ra icha importante, de cain yá jaha ra chondaha ra que tsonoha ra orgulloso de ixin noha ra de ixin Dios, ixin si jaha ra tonoha ra orgulloso, mé rročho que jeha ndoa tti jaha ra tenchehe ra.

¹⁵ Ixin cain yá ttixinha de ngain Dios, yá jehó tti nchehe chojni ngataha nontte co yá tti rinao inchníji.

¹⁶ Ixin tti jí joachjoehe co tti rinao na que jehó na nisintte icha importante, nntiha xonhi respeto jí, co nntiha jí cain clase de cosa jianha.

¹⁷ Pero tti chojni que Dios nchequinxin na, chojni mé chonda na ná vida jian; jehé na chinttoha na, sino que amable na, co jehé na ndácho ansén na para ttjenguijna icha chojni, co ttiaconoehe na chojni, co nchehe na cosa jian. Cai jehé na cainxin tiempo chonda na confianza ngain Jesucristo, co jehé na jeha ncheyaxon na.

¹⁸ Co tti chojni que ncheconohe chjoin ngain ansén icha chojni, chojni mé nchehe na jian para que icha chojni rrochonda cainxin inchin jiquininxin.

4

Chojni que anto ncheXoxinhi cosa ngataha nontte rinaoha Dios

¹ ¿De ttinó ttixin tti ningaconhe chó ra co tti ttetocoho chó ra? Mé ttixin de ngain tti jianha que jaha ra xaxaon ra ixin jehé mé cainxin tiempo jincheXaxaon ansean ra de sinchehe ra jianha.

² Jihí tti tonhe: Jaha ra rinao ra ná cosa, co ixin choha chonda ra, jaha ra hasta nadoenxon ra chojni para nchao chonda ra tti jaha ra rinao ra. Co jí tiempo que tonchjoaha ra de quexeho cosa que chonda iná chojni, co ixin jaha ra choha chonda ra cosa mé, mexinxin jaha ra ttetocoho ra chojni. Jaha ra choha chonda ra tti jaha ra rinao ra ixin danchieha ra Dios.

³ Ndoa que jaha ra danchia ra, pero jeha jian tti jaha ra danchia ra, mexinxin Dios chjaha ra tti jaha ra danchia ra ixin tti jaha ra rinao ra jehó para sonda inchin rinao cuerpoa ra.

⁴ Jaha ra chojni jianha! ¿Anoaha ra que si jehé ni anto sinao ni cosa jianha que jí ngataha nontte, jehé ni isinaoha ni Dios? Quexeho chojni que anto sinao cosa jianha que jí ngataha nontte, chojni mé cjan ningaconhe Dios.

⁵ Mexinxin jí razón ndácho ngain tti jítaxin Palabré Dios: “Espíritu Santo que Dios cointohe nganji na, Espíritu mé anto rinao na pero cai anto chjio para ixin ján na.”

⁶ Pero Dios, jehé anto ttjenguijna na ján ná ixin jehé anto jian, ixin ndácho ngain tti jítaxin Palabré: “Dios toñaon ngain chojni orgulloso, pero jehé ttjenguijna tti chojni que jeha orgulloso ixin Dios anto jian.”

⁷ Mexinxin nchehe ra inchin tti ttetonha Dios. Ttixinha ra para ncheha ra inchin rinao inchníji, co jamé jehé satsjixin de nganji ra.

⁸ Tonchian ra ngain Dios, co jehé tsonchian nganji ra. Jaha ra que tenchehe ra jianha, ttentoxinhi ra vidá ra. Co jaha ra xo xaxaon ra ixin nchao sinao ra Dios co sinao ra cosa jianha que jí ngataha nontte ngain nacoa tiempo, ttin ra ansean ra para ixin jehó Dios.

⁹ Dinttechinhi ra, tsjanga ra, co ta ra joachjaon de ixin tti jianha que joinchehe ra. En lugar de tsjano ra, tsjanga ra; co en lugar de rrochaha ra, dinttechinhi ra.

¹⁰ Tonoaha ra importante para ngain Dios, co jamé jehé sinttachjian ra chojni importante ngattoxon con jehé.

Jehé ni chondaha ni que sinchejuzguehe ni iná chojni

¹¹ Hermanos, nttatsanha ñao ra nichjaha ra jianha de ixin iná chojni que ditticaon Jesucristo. Tti nichja jianha de ixin ná chojni que ditticaon Jesucristo o jinchejuzgá ngain na, chojni mé jinichja jianha de ixin ley que coetonha Dios co jinchejuzguehe ley mé. Co si jaha ra sinchejuzguehe ra ley mé, rrocho que jaha ra tti juez ra de ngain ley mé en lugar de sitticaon ra cain tti ttetonha ley mé.

¹² Ixin jehó nacoa tti joanjo ley mé, co jehé mé tti Juez, co jehé mé tti nchao tsjenguijna na o sinttatján na. Pero jaha ra, ¿quehe joachaxin chonda ra para sinchejuzguehe ra iná chojni?

Noeha ni quehe tsonhe ndoe o rejngui

¹³ Jai ttinhi ra jihí jaha ra xo ndácho ra: “Jai o ndoe satsjin na ngain quexeho ná ciudad, co nntiha sontte na ná nano para sonttó na negocio co sacha na tsje tomí.”

¹⁴ Jaha ra ni noaha ra quehe siconhe ngain nchanho ndoe. ¿Quejanhi nano tonchjenhe vidé jehé ni? Vidé jehé ni inchin ná ranontte que xago ná rato, cottimeja jaico ndaditján.

¹⁵ Janhi tti jiquininxin rrondacho jaha ra: “Si Dios rinao, ján na sonttechon na co sonttoho na jihí co jiha.”

¹⁶ Pero jaha ra ni ndáchoha ra jañá, sino que jaha ra nichja ra conixin orgullo de jaho ra, co cain orgullo yá jianha.

¹⁷ Tti chojni que nohe quexehé tti jian co ncheha, chojni mé jianha jinchehe.

5

Tti vitonhe chojni rico

¹ Jaha ra chojni rico, ttinhi ra jiji! Tsjanga ra co toyao ra ixin tti anto tangui jichonha ra.
² Cain cosa rentte que jaha ra chonda ra jai ixonhi xé, co lonttoa ra anto fino que chonda ra ndadijine cochí.

³ Cain oro co plata que chonda ra ndadiguihi chjín, co chjín mé tjago ixin jaha ra joincheha ra inchin jiquininxin conixin tomia ra. Co mé tsjaga nntaoha ra inchin rrocji xohi. ¿Quedonda anto joatse ra tomi co cosa anto rentte ngain tiempo jiji que ochian ndatsjexin mundo?

⁴ Jaha ra cjoengueha ra hna tti chojni que joinchehe xá ra ngataon jnguiha ra co tomí chojni mé tti techo jie jai para ixin jaha ra. Co Dios, tti chonda cain joachaxin, jinohe cain jiji.

⁵ Nttilhi ngataha nontte jaha ra techonda ra ná vida anto çhjoin ixin nchehe ra cain tti rinao ra co jintte ra cain tti nntaxoxinha ra, tetjonttao ra xá coleco para ngain nchanho de matanza.

⁶ Jaha ra joitho ra jie para ixin chojni que xonhi teca co nagoenxon ra na. Co jehe na tsinha rá na nganji ra.

Quexén rrochonda ni paciencia co quexén sincheoanxinhí ni Dios

⁷ Mexinxin hermanos, chonda ra paciencia hasta que Jesús tsí iná. Inchin tti ttenga ngataon jngui si jehe rinao rrotsín jian cosecha, jehe chonda que rrochonhe conixin paciencia hasta tsija çhin.

⁸ Jamé jaha ra cai chonda ra paciencia co doanha ra desanimado ixin ochiaon jói nchanho que Jesucristo tsí iná.

⁹ Hermanos, toñaoha chó ra para que Dios sinchejuzgaha nganji ra ixin Dios tti Juez co jehe ochian jói.

¹⁰ Hermanos, tse ra de ejemplo tti tangui que conhe cain profeta que nichja conixin joachaxín nombré Dios co tti paciencia que jehe na vechonda na.

¹¹ Ixin ján na xaxaon na feliz tti chojni que ttixinhí are jehe tangui tonhe. Jaha ra ocoinhí ra tti paciencia que vechonda Job. Co jaha ra onoha ra quexén joinchehe Dios ngain Job después ixin Dios jehe anto ttiaconohe ni.

¹² Pero de cainxin cosa nttatsanha ñao ra hermanos que ncheha ra jurado ni de ixin ngajni, ni de ngataha nontte, ni de iná cosa chondaha ra que sinchehe ra jurado. Are rrondaço ra: “Ján”, que ján jamé tsonhe. Co are rrondaço ra: “Nahi”, que jamé nahi, para que Dios rrochjaha ra castigo.

¹³ Si çhonja de jaha ra tedetan ra tangui, chonda ra que nchetsenhe ra ñao Dios para que jehe sinttjian tangui mé. Si çhonja ra anto chaha ra, chonda ra que tsje ra alabanza para ixin Dios.

¹⁴ Si çhonja de jaha ra niha ra, chonda ra que dayehe ra chojni que chonda joachaxin ngain nihngo para que chojni mé sinchetsenhe na ñao Dios para ixin jehe tti nihi mé. Co conixin joachaxin nombré Dios tsinga na aceite já tti nihi mé.

¹⁵ Co are sinchetsenhe ra ñao Dios co rrochonda ra seguro que Dios sinchexingamehe jehe tti nihi mé, tti nihi mé rroxingamehe co Dios sinchetjañehe tti jianha que joinchehe jehe tti nihi mé.

¹⁶ Mexinxin ndache chó ra naná ra tti jianha que joinchehe ra co nchetsenhe ra ñao Dios para ixin icha nicompañeroa ra para que cain ra rroxingamaha ra. Are ná chojni jian ngattoxon con Dios sinchetsenhe ñao Dios conixin ansén, palabré chojni mé chonda tsje joachaxin.

¹⁷ Profeta Elías cjoí ná chojni janhi inchin ján na, co are jehe joinchetsenhe ñao Dios ixin itsiha çhin, jamé conhe; ijoiha çhin ngataha nontte jiji ní nano co rioho.

¹⁸ Co después, are jehe joinchetsenhe ñao Dios iná ixin tsí çhin, jamé conhe; cjan jói çhin iná co nontte joanjo nontte cosecha.

¹⁹ Hermanos, si çhonja de jaha ra isitticaonha ra Dios co sinchehe ra oje cosa, co si iná chojni tsjenguijna ra para que jaha ra rrocjan ra sitticaon ra Dios iná,

²⁰ ttettexin ñao ra que chojni que sinchequentoxinhí vidé iná chojni para que jehe isincheha jianha, chojni mé tsançhjangaha almé chojni para que tsji ngain infierno, co tti chojni que rrondaço jamé, jehe sinchehe que tti iná chojni sitjañehe tsje jianha que jehe joinchehe.

Saho Carta Que Dicjin Pedro

Pedro rroanha joajna ngain chojni judío que ditticaon Jesucristo co teha ngain nacioen

¹ Janha Pedro na, janha ná representanté Jesucristo. Cjin na carta jìhi para ixin jaha ra ðo judío ra que teha ra ngain nontteha ra co ditticaon ra Jesucristo; jaha ra ðo te ra ngain nonttehe Ponto, nonttehe Galacia, nonttehe Capadocia, nonttehe Asia, co nonttehe Bitinia.

² Jaha ra tti Dios Ndodá na coinchiaha ra desde osé tiempo vatto para que sintte ra chojni jehe Ndo. Co Espiritu Santo joincheroa ansean ra para que sitticaon ra tti coetonha Dios, co para que cain tti jianha que joinchehe ra oxenga hna conixin jni Jesucristo. Dios rrochjá ra tsje tti jian co tti ðhjoin que tsonhe ansean ra.

Tti vida naroaxin que ðonhi tiempo tsjexin

³ Ján na sonttocoanxinhi na Dios Ndodé Jesucristo, tti chonda cain joachaxin para ixin ján na, ixin Dios mé tti coiaconoá na, mexinxin chjá na vida naroaxin ixin jehe joinchexechon Jesús. Co jehe joinchehe jañá para que ján na rrochonda na seguro ixin sonttechon na ngain vida naroaxin para cainxin tiempo.

⁴ Co jehe Dios rrochjá ra tti herencia que jehe jittenchjinha nttiha ngajni, co cosa mé ðhoaha rroxantte ni ðhoaha rrochonda mancha, ni rroxentteha inchin tsjo.

⁵ Co ixin jaha ra ditticaon ra Dios, jehe jinda ra conixin joachaxin jehe para que sayeha almá ra castigo. Co cosa jìhi jaha ra sicon ra ngain último tiempo are ochiaon ndatsjexin mundo.

⁶ Mexinxin jai jaha ra anto chaha ra, masqui puede chonda que nchion tiempo jaha ra atto tangui tetonha ra.

⁷ Ixin chonda que jamé tetonha ra para que nchao ðago ixin jaha ra ndoa ditticaon ra Jesucristo. Co cai oro, masqui chonda que ndatsjexin, pero tangui tonhe are ðotte ngacjan ðohi para que chojni dicon si ndoa jian oro. Pero tti jaha ra ditticaon ra, mé icha rentte que oro que ndattjexin. Mexinxin chonda que anto tangui tonha ra para que ðago si jaha ra ditticaon ra jian ngain Jesucristo. Co si jaha ra tsixinha ra cain cosa tangui yá, jiquinxin que Jesucristo rronichja jian de ixin jaha ra, co anto sinttasayaha ra are jehe tsí iná.

⁸ Jaha ra rinao ra Jesucristo masqui ðonhi tiempo vicon ra, co chonda ra confianza ngain jehe jai masqui diconha ra. Mexinxin jai jaha ra anto chaha ra que hasta ni ðhoaha rronichja ra de ixin queðén ðhjoin tonoha ra,

⁹ Ixin jaha ra ochonda ra vida naroaxin ixin ditticaon ra Jesucristo.

¹⁰ Ngain tiempo are saho, profeté Dios anto cjoé ngain tti jitaxin Palabré Dios, co coangui jian para rroquinxin de ixin tti jaha ra ditticaon ra jai, co vanichja de ixin queðén Dios sinchenchaon nganji jaha ra.

¹¹ Espiritu Santo, que rroanha Cristo, vanchenohe profeta desde are saho de ixin quexehe cosa tangui tsonhe jehe Cristo co de ixin después cain chojni sinchesayehe na jehe. Co jehe profeté Dios anto joinao rroconohe ixin quensen jehe tti Cristo co quesa rroqui.

¹² Pero Dios joinchenohe cain profeta que tti ða que jehe vanchehe jeha para ixin jehe, sino para ixin ján na. Co cain tti jehe vanichja, mé ðajeho tti jian joajné Jesucristo que jaha ra conoha ra después. Co tti chojni que jointtanoha ra joajna mé, jehe na vinttechonda na joachaxin Espiritu Santo que joixin de ngajni. Co cain cosa jìhi hasta cain ángel orrojinao rroguintteguicon.

Dios rinao que ján na sontte na ngain ná vida jian

¹³ Mexinxin, ðaxaon ra jian tti jaha ra sinchehe ra co nchegonda ra joarrixaon ra. Co chonda ra seguro ngain Dios que jehe sinttanchoon ra ngain nchanho are Jesucristo tsí iná.

¹⁴ Ditticaon ra tti ndaño Dios inchin chjan jian que ditticaon xan ndodé xan, co ncheha ra cosa jianha inchin jaha ra vajinao ra vanchehe ra are icha saho que jaha ra rroguitticaon ra Dios.

¹⁵ Incheha ra jamé, sino que dintte ra ngain ná vida jian ixin Dios que coinchiaha ra jehe jian,

¹⁶ Ixin ndaño ngain tti jitaxin Palabré Dios: “Jaha ra dintte ra ngain ná vida jian ixin janha jian na.”

¹⁷ Dios tti nchejuzgá tti nchehe cada chojni, co nchejuzgá inchin tequininxin cada chojni. Co si jaha ra ndaño ra ixin Dios mé tti Ndodá ra, jaha ra chonda ra que rroðagonhe ra jehe Dios ngoixin tiempo que jaha ra sinttechon ra ngataha nontte jìhi.

¹⁸ Dios icoançhândaha jaha ra para ða rroguintte ra ngain tti vida que ðonhi ðé para ixin Dios, inchin tti vida que jointtacoanha ra nindogolitoa ra. Co jaha ra noha ra jian que tti

vitte vida que chjá ra Dios; xengaxinha hna conixin cosa que nchao ndatsjexin inchin oro o plata,

¹⁹ sino que xengaxin hna conixin jní Jesucristo. Jesucristo ni ná cosa jianha joinchehe. Mexinxin jehe ndavenhe para cjoenga hna cain cosa jianha que jointtoho na, inchin are saho chojni vagoen na coleco para vaganjo na ngain Dios para vaxenga hna tti jianha que vanchehe na.

²⁰ Jesucristo ovequininxin jañá desde icha saho que nontte rroconchjian. Pero jehe xa coenha mé, jehe joiconhe hasta ngain tti último nchanho tehe que ondajittjexin mundo. Jehe joiçago co conhe jañá para que cjoenguijna jaha ra.

²¹ De ixin Jesucristo jaha ra ditticaon ra Dios. Co Dios joinchexechon co joinchesayehe Jesucristo. Mexinxin ansean ra ndaço para que ditticaon ra Dios co chonhe ra que Dios jian sinchehe nganji ra.

²² De ixin joachaxín Espíritu Santo jaha ra ditticaon ra tti joajna ndoa que joixin de ngain Dios, mexinxin jai jaha ra ocoroa ra. Co mexinxin jaha ra nchao rinao ra cain chojni que ditticaon Jesucristo. Jañá chonda ra que anto sinoa chó ra naná ra conixin ansean ra.

²³ Jaha ra cjan ra goan ra iná, pero ijeha de ngain chojni de ntíhi ngataha nontte ixin chojni mé ndadenhe. Jaha ra cjan ra goan ra iná pero de ngain palabré Dios, co palabra mé tti danjo iná vida naroaxin co tsonçhenhe para cainxin tiempo.

²⁴ Ixin tti jitaxin Palabré Dios ndaço:

Cainxin chojni jeha inchin ná ca,
co cainxin cosa jian que jehe na chonda na, mé inchin tsjohe ca.

Ca ndaxema ca, co tsjohe ca ndadingo tsjo;

²⁵ pero palabré Dios tonçhenhe para cainxin tiempo.

Co palabra jíhi tti jian joajna que jaha ra vayehe ra.

2

¹ Mexinxin, ttinttohe ra cainxin cosa jianha, inchin de tti ncheyehe ra chojni, co tti jaha ra nchehe ra para chojni xaxaon na ixin jaha ra anto jian ra, co ndoaha, ixin ngain ansean ra ojé teçaxaon ra, co ttinttoehe ra tti joachjoehe para ngain chojni, co tti cain clase de chijni que jeha ndoa.

² Nchehe ra inchin chjan que nandá toncjíhi; ttjé ra palabré Dios inchin jehe xan ttjé xan tsjin, para que icha sitticaon ra Jesucristo co para rrochonda ra iná vida naroaxin.

³ Nchehe ra jamé si jaha ra ndoa ditticaon ra que Dios ján jian.

Jesucristo inchin ná xo que jichon

⁴ Ditticaon ra Jesucristo icha co icha ixin jehe inchin ná xo que chonda vida. Janha ndattjo ra jañá ixin jehe inchin tti xo icha importante ngain esquiné nchia, co nchia mé rroço ningoe Dios. Chojni are saho ndaço na que xo jíhi xonhi xé xo, pero para ixin Dios xo jíhi anto jian xo co anto rentte xo.

⁵ Jaha ra cai inchin xo que chonda vida. Mexinxin dittoaxin ra que Dios sinttagonda ra para que de jaha ra Dios sinchexjian ná ningoe. Co cain jaha ra ná grupo de xidána jian para ixin Dios que de ixin Jesucristo jaha ra nchesayehe ra Dios ixin nchehe ra jian, co jehe Dios nchao sayé tti jaha ra nchehe ra.

⁶ Janha ndaçhjan jañá ixin ndaço ngain tti jitaxin Palabré Dios:

Janha tsín ngain ciudad de Sión ná chojni que sehe inchin tti xo que nchegonda chojni para nchexjian na esquiné ningona, pero xo mé ná xo que janha coinchiá co anto rentte xo mé.

Co cain chojni que ditticaon ngain xo mé, xonhi tiempo sinttechín na de ixin jehe xo mé.

⁷ Jaha ra que ditticaon ra, noha ra que xo mé atto rentte xo; pero para ixin tti chojni que ditticaonha, diconhe inchin ndaço ngain tti jitaxin Palabré Dios are ndaço:

Tti xo que xialbanil ndaço que xonhi xé,

pero xo mé xo icha importante de cain xo.

⁸ Co cai tonhe inchin ndaço ngain tti jitaxin Palabré Dios are ndaço:

xo jíhi tti tonttenguixin chojni, co tti jehe na xantjaxin na.

Ndoa jehe na tonttenguixin na ixin ditticaonha na tti jian joajna, ixin ojamé viquininxin na.

Tti chojni Dios

⁹ Pero jaha ra joxon chojni que Dios coinchiehe, jaha ra ná grupo de dana que nchesayehe Dios ixin mé tti rey; jaha ra ná nación jian, co jaha ra chojni Dios. Co jañá para que jaha ra rrondache ra icha chojni tti jian que nchehe Dios, tti vayaha jaha ra para sajoixin ra de ngain tti naxin sehe que vintte ra, para que jai te ra ngain tti anto çhjoin jí joadingasán que jehe chonda.

¹⁰ Are icha saho jaha ra ni jeha chojní Dios vintte ra, pero jai jaha ra ochojní Dios ra; are icha saho jaha ra xonhi quensen vaquaconoaha ra, pero jai Dios ttiaconoaha jaha ra.

Dintte ra ninchehe xé Dios

¹¹ Hermanos, jaha ra que teha ra ngain nacioan ra, nttatsanha ñao ra que xonhi tiempo dittoaxin ra nchehe ra tti jianha que xaxaon ni, ixin jehe mé tti ttetocaho almé ni.

¹² Jaha ra nchehe ra jian ngayé cain chojní que xa ditticaonha Dios. Jamé jehe na, masqui nichja na jianha de ixin jaha ra jai, inchin rrocji ra chojní que joinchehe tsje cosa jianha, pero jehe na sicon na tti jian que jaha ra tenchehe ra, co are tsi nchanho que Dios sinchejuzgá ngain chojní, cottimeja nchoe jehe na rronichja na jian de ixin Dios.

¹³ Ixin jaha ra rinao ra sinchesayehe ra Jesucristo, mexinxin ditticaon ra cai cain chojní que chonda joachaxin para ttetonha nttihí ngataha nontte, inchin tti ttetonha xiemperador que chonda icha jie joachaxin.

¹⁴ Co ditticaon ra cain tti rrondaçho cain xigobernador que jehe xiemperador rroanha para sinchecastigá xa tti chojní que nchehe jianha co para sinchesayehe xa tti chojní que nchehe jian.

¹⁵ Ixin Dios rinao que jaha ra sinchehe ra jian, para que cain chojní que xonhi chonxin de ixin Dios co cain chojní que xonhi xé tti jehe xaxaon çhoaha rronichja na jianha de ixin jaha ra.

¹⁶ Janha rrindattjo ra ixin ditticaon ra cain chojní que chonda joachaxin para ttetonha nttihí ngataha nontte, pero masqui jamé, xaxaon ra ixin chonda ra libertad. Pero mé rroçhoaha que ixin jaha ra nchao sinchehe ra cosa jianha ixin chonda ra que sitticaon ra Dios ixin jaha ra chojní jehe.

¹⁷ Jaha ra chonda ra respeto ngain cain chojní. Rinao ra cain chojní que ditticaon Dios, chonda ra que rroçagonhe ra Dios, co chonda ra respeto ngain xiemperador.

Tti anto tangui que conhe Jesucristo, mé ná ejemplo para ixin ján na

¹⁸ Jaha ra, ço nchehe ra xa ngain ná xinajni, chonda ra que sitticaon ra tti tsetonha ra xinajnia ra, co jamé sinchehe ra jeoha ngain xinajni que anto jian para ixin jaha ra, cai ngain xinajni que jeha jian.

¹⁹ Ixin mé ná cosa jian si jehe ni tsixinhi ni tti tangui que tsonhe ni masqui xonhi razón pero jeha ixin jehe ni rinao ni Dios.

²⁰ Ixin si jaha ra nchehe ra canxion cosa jianha co mexinxin nttacastigaxin ra na, mé masqui tsixinha ra conixin paciencia pero jaha ra cjoé ra para tsonha ra jamé. Pero si jaha ra tenchehe ra jian co xa tenttastigá ra na co jaha ra tettixinha ra conixin paciencia, jamé nchoe ján jian tenchehe ra ngattoxon con Dios.

²¹ Mexinxin para ixin jamé Dios coinchiaha jaha ra. Co cai Jesucristo anto tangui conhe para ixin jaha ra, para çhjá ra ná ejemplo, para que jaha ra jamé sinchehe ra cai.

²² Jesucristo ni ná cosa jianha joincheha, co jehe xonhi tiempo joincheyehe ni ná chojní.

²³ Co are icha chojní vanichja na jianha ngain jehe, jehe xonhi jianha vanichja ngain jehe na. Co are vanchegetan na Jesús tangui jehe vancheçaonha na, sino que jehe chonhe para tti sinchehe Dios ixin Dios tti Juez que nchehe inchin jiquininxin ngain cainxin chojní.

²⁴ Cainxin tti jianha que ján na nttoho na, Jesucristo ocjoenga hna are jehe vengano cruz; jehe conhe jamé para ján na vaçhjexin na de ngain cosa jianha, para que jai te na ngain cosa jian. Co jehe vicaon hasta conihí cuerpoe para que jointtaxingamaha jaha ra cai.

²⁵ Are icha saho jaha ra vacji ra inchin tti coleco que diguiçhoe, pero jai ocjan ra ngain Jesucristo co jehe dicao cuidado de ixin jaha ra inchin ná tti ttngaria coleco co jehe dicao cuidado de ixin almá ra.

3

Vida que rrochonda chojní que otottehe

¹ Jamé cai jaha ra ço nçhí ra are osinttecoho ra xixiha ra ditticaon ra tti tsetonha ra xa, para que si ttoha de xixiha ra xa ditticaonha xa joajné Jesucristo, jehe xa nchao sitticaon xa jeha conixin sicon xa tti jian que jaha ra sinchehe ra, co irrogondaha que jaha ra rrondate na xa.

² Ixin jehe xa osicon xa que çhihi xa chonda nçha respeto co nchehe nçha joxon jian.

³ Jaha ra ço onçhiçhihi ná xí xaxaonha ra de ixin queçén sinchehe ra para icha çhjoin sintte ngama cuerpoe ra, inchin tti sinchejinji já ra anto najni, o are tsín ra ngama cuerpoe ra cosa de joxon oro, o are sinttengaha ra vestido que anto çhjoin te.

⁴ Jaha ra dintte ra çhjoin pero de ngain ansean ra, co tti çhjoin de ngain ansean ra, mé xonhi tiempo tsjexin, co mé rroçho que ansean ra anto nda co çhjoin tonohe, co jehe jihí anto rentte ngattoxon con Dios.

⁵ Ixin cai ngain tiempo vatto osé, cain nčí que vechonda confianza ngain Dios vanchehe ncha jamé, co cai vaguitticaon ncha tti vaquetonhe xixihi ncha.

⁶ Jamé joinchehe Sara cai; jehe vitticaon cain tti ndačo Abraham xixihi jehe Sara. Co Sara joincheguinhí jehe Abraham, “soixin.” Jaha ra cai nchao sintte ra ngain vidá ra inchin jehe vehe ngain vidé si sinchehe ra jian co xonhi cosa rroxagonhe ra.

⁷ Cai jaha ra, xo oxixihi ná nčí, chonda ra que rroxaxaon ra jian de ixin nčíchiha ra. Co ttjiho ra respeto ngain ncha inchin jehe ncha jiquininxin ncha, jeoha ixin nčí icha sojiha ncha, sino cai ixin Dios chjé ncha iná vida naroaxin que xonhi tiempo tsjexin inchin chjá jaha ra. Nchehe ra cain jihí para que xonhi quehe rrocayacoen oracioan ra ngain Dios.

Chojni que anto tangui tonhe por ixin nchehe tti jian

⁸ Jańá dintte jaha ra cain ra, ditticaon chó ra co ttiacnoehe chó ra naná ra, co rinao chó ra inchin rrocji ichó ra. Chjoin nichjehe ra cain chojni co xaxaonha ra ixin jaha ra anto jian ra.

⁹ Ncheha ra jianha ngain chojni que sinchehe jianha nganji ra, co nichjaha ra feo de ixin tti chojni que rronichja feo de ixin jaha ra, icha jian nchetsenhe ra ñao Dios para que Dios sinchenchaon ngain chojni mé, ixin Dios coincchiaha jaha ra para sinttanchaon ra.

¹⁰ Ixin ndačo ngain tti jitaxin Palabré Dios:
Tti anto rinao vidé co rinao sehe chjoin cain nchanho de ngain vidé, chonda que sicao cuidado que rronichjaha cosa jianha, ni rronichjaha mentira.

¹¹ Chojni mé chonda que sačhenda de isincheha cain cosa jianha, co sinchehe jehó cosa jian;

jehe tsjé quexén sinchehe para chjoin sehe ngain cain chojni, co cain tiempo jamé sinchehe.

¹² Ixin Dios jinda tti chojni que nchehe jian co jehe ttinhí cain tti ndačo na ngain jehe, pero cain tti chojni que nchehe jianha jehe tońao ngain na.

¹³ Xonhi chojni sinchehe jianha nganji ra si jaha ra cainxin tiempo sinchehe ra jian, ¹⁴ co masqui tangui tsonha ra ixin nchehe ra jian, pero jaha ra chjoin tsonohe ansean ra. xagoenha ra ni ná chojni ni xonhi tiempo chonda ra joaxaon,

¹⁵ sino que jaha ra nchesayehe ra Cristo ngain ansean ra ixin jehe tti chonda joachaxin para ixin ján na. Jaha ra cainxin tiempo dintte ra listo para sinchenohe ra quexeho chojni que sanchianguiha ra de ixin quedonda jaha ra anto chonda ra seguro que ixin jaha ra chonda ra iná vida naroaxin. Ndache ra na, pero jion conixin respeto.

¹⁶ Jańá nchehe ra joxon cosa jian para que cain tiempo tsonohe chjoin ansean ra. Jamé cain chojni que nichja jianha de ixin tti jaha ra nchehe ra ixin ditticaon ra Cristo, jehó na tsosoé na de ixin tti jehe na nichja na.

¹⁷ Icha jian tsonoha ra tangui ixin sinchehe ra jian, si Dios jamé rinao, co naha ixin sinchehe ra jianha.

¹⁸ Ixin Cristo mismo tangui conhe ndavenhe para cjoenga hna nacoa nttiha de ixin tti jianha que ján na nttoho na. Cristo jehe jian, pero jehe tangui conhe para ixin ján na xo jianha na, para satsjinho na ngain Dios. Cuerpoe jehe ndavenhe cuerpo pero espiritue venha espiritu.

¹⁹ Co de ngain espiritue cjoí ngain infierno para joinichja ngain espiritue cain nindadiguenhe que te nttiha.

²⁰ Cain espíritu jihí espiritue tti chojni que vaguitticaonha Dios ngain tiempoe Noé. Ngoixin tiempo que Noé joinchexian arca, Dios chonhe para que icha chojni rroguitticaon na, pero jehó jni chojni tti xonhi conhe de ngain jinda ixin joixinhi na arca.

²¹ Co jinda mé rročo tti jinda que ján na diguittexin na jai; de ixin jinda mé ján na ditjańá na cain tti jianha que jointtoho na. Are diguittexin na, jinda jeha tsinda cuerpoa na, sino que are mé ján na danchiehe na Dios que irrocjanha na sinttoho na jianha co jehe rrochjá na ná conciencia jian. Co Dios tsančhjangaha almá na tsji ngain infierno ixin Jesucristo xechonxin,

²² co jehe Jesucristo sacoańin para ngajni co nttiha jí ngain lado jian de Dios co jehe tti chonda joachaxin para jittetonhe cain ángel co icha cosa que chonda joachaxin nttiha.

4

Sonttoho na inchin tti joachaxin que chjá na Dios

¹ Mexinxin, inchin anto tangui conhe Jesucristo ngain cuerpoe, cai jaha ra chonda ra que dittoaxin ra para setan ra tangui. Ixin tti chojni que vetan tangui ngain cuerpoe ixin ditticaon Jesucristo, chojni mé incheha cosa jianha,

²para que cain nchanho que sinttechon chojni mé jehe na sinchehe na inchin rinao Dios, co isincheha na tti jianha que jehe na xaxaon na.

³Oatto tsje joinchehe ra ngain tiempo vatto, jaha ra vanchehe ra tti nchexoxinhi cain chojni que ditticaonha Dios. Ngain tiempo mé jaha ra vinttechonda ra tsje vicio, vanchehe ra tti jianha que vaaxaon ra, co anto vacoan ra, co vaquín ra vandango para vacoanxin ra conixin icha chojni, co anto vaguihi ra cosa que coanxin chojni, co vanchesayehe ra ídolo que Dios ndacho jianha sinchesayehe ni cosa mé.

⁴Co jai cain chojni mé ttinxinha na quedonda jaha ra icoancoha ra co ichjioha ra na ngain vida nchaoha mé, mexinxin nichja na jianha de ixin jaha ra.

⁵Pero chojni mé chonda na que sanjo na cuenté na ngain Dios tti sinchejuzguehe cain chojni que xa techon conixin cain chojni que ondavenhe.

⁶Ixin tti chojni que ondavenhe are xa vinttechon na, cjoí chojni joindacho joajné Dios ngain jehe na para que espiritue na nchao rroguinttechon jai inchin jichon Dios, masqui jehe na ndavintteguenhe na de ngataha nontte inchin cain chojni chonda que ndasenhe.

⁷Ochian joí tiempo que ndatsjexin cainxin cosa. Mexinxin jaha ra xaxaon ra jian co cainxin tiempo nichja ra ngain Dios.

⁸Co tti icha rinao janha, que jaha ra anto sinao chó ra cada ra ixin tti chojni que rinao icha chojni jehe nchao sinchetjañe chojni que nchehe cosa jianha.

⁹Dayehe ra jian tti chojni que siji nchiandoi ra co ndachoha ra ixin mé ná molestia para ixin jaha ra.

¹⁰Cada ra Dios chjá ra naná clase de joachaxin para tsjenguijna chó ra. Co inchin ná tti nchehe jian ngain ná xa, jamé nchehe ra cai; nchegonda ra cain tti jian que ttixin de ngain Dios para ttjenguijna ra icha chojni.

¹¹Tti chojni que chonda joachaxin para nichja quehe rrocho Palabré Dios ngain icha chojni, chonda que rronichja inchin jiquininxin. Co tti chojni que chonda joachaxin para tsjenguijna icha chojni, que sinchehe jian de ngain ansén inchin joachaxin que Dios joanjo ngain jehe. Cain cosa jian que sinchehe ra, nchehe ra para tsosayexin Dios de ixin tti joinchehe Jesucristo. Co Jesucristo jiquininxin que cain chojni sinchesayehe jehe co jiquininxin cain joachaxin para cainxin tiempo. Amén.

Tti tangui que tonhe chojni Jesucristo

¹²Hermanos, dinttechinha ra are anto tangui tsonha ra ixin jamé tonhe cain chojni que ditticaon Jesucristo, para que Dios datsoan ngain ansén ni si seguro ditticaon ni Jesucristo ani nahi.

¹³Jaha ra icha jian chaha ra are tsonha ra tti anto tangui ixin chonda ra oportunidad de tsonha ra inchin conhe Jesucristo, para que cai anto rrochaha ra are sicon ra tsí Jesucristo iná inchin ngacjan tsje chiñoe nchanho.

¹⁴Si chojni nichja na feo nganji ra ixin ditticaon ra Jesucristo, jaha ra anto chjoin vidá ra ixin Espiritu Santo, que anto jian, jí nganji ra. Jehe na tenichja na jianha de ixin jehe Espiritu Santo jñi, pero jaha ra tenchesayehe ra.

¹⁵Si choan de jaha ra tangui tetonha ra, pero que jaha ixin jaha ra nagoenxon ra iná chojni, o ni jaha ixin coehe ra cosé iná chojni, o ni jaha ixin joinchehe ra cosa jianha, o ni jaha ixin jaha ra joixintte ra problema de iná chojni, ixin cain mé anto joasoaxin para ixin jaha ra.

¹⁶Pero si choan ra tangui tonha ra ixin dinhi ra cristiano, rrocho ixin jaha ra ditticaon ra Jesucristo, jaha ra chondaha ra que tsooaha ra, sino que danjo ra gracias ngain Dios de ixin jehe tti tangui que tsonha ra.

¹⁷Ojoí tiempo que Dios tsexinhi sinchejuzgá ngain chojni jehe. Co si nganji ján na jittexinxin Dios jinchejuzgá, ¿mé quexén tsonhe are sinchejuzgá Dios ngain tti chojni que ditticaonha joajné Dios?

¹⁸Si para chojni jian tangui sacha na iná vida naraoxin, ¿mé quexén tsonhe chojni jianha?

¹⁹Mexinxin tti chojni que tonhe tangui ixin jamé rinao Dios, chojni mé chonda na que sinchehe na sigue de sinchehe na tti jian, co rrochonda na cainxin confianza ngain Dios que joinchchjian na ixin jehe Dios cainxin tiempo nchehe inchin ndacho.

5

Consejo para cain chojni que ditticaon Jesucristo

¹Jai janha rrochjaha consejo nittetonha nganji ra ngain ningoa ra. Ixin cai janha chonda joachaxin inchin jehe na, co janha vicon cain tti anto tangui que conhe Jesucristo, co janha cai tsosayana inchin jehe na are Jesucristo tsí iná.

²Nttatsanha ñao ra que inchin cuidado que dicao tti ttingaria coleco, jamé ttijho ra cuidado de ixin chojni Dios, tti chojni que jaha ra chonda ra responsable de sinchecoehne

ra na de ixin Dios. Nchecoehne ra na conixin ansean ra jian, inchin rinao Dios co jeha ixin afuerza chonda ra que sinchecoehne ra na, ni jeha ixin rinao ra sachá ra tomi. Nchehe ra xa jihi pero conixin ansean ra jian,

³Jeha inchin xinajni sintte ra para ngain chojni que sinchecoehne ra, sino nchehe ra jian cain nchanho para jamé sicon jehe na ná ejemplo.

⁴Jamé sinchehe ra para que are tsí Jesucristo, jaha ra sayehe ra ná premio anto jian, que xonhi tiempo ndatsjexin.

⁵Jamé jaha ra cai, xo xa tsjeha nano chonda ra, ditticaon ra tti ttonha dañichjan que chonda tsje nano. Cainxin ra chonda ra que sitticaon chó ra naná ra conixin jian ansean ra. Ixin ndaño ngain tti jitaxin Palabré Dios:

Dios toñaon ngain chojni orgulloso,

pero jehe ttjenguijna tti chojni que xaaxonha ixin jehe chojni anto jian.

⁶Mexinxin dintteha ra orgulloso ngattoxon con Dios para que jehe sinttasayaha ra are jehe sinchejuzguehe ngoi mundo jihi.

⁷Ndache ra Dios cainxin joachjaon que jaha ra chonda ra ixin jehe cain tiempo jinda ra.

⁸Xaaxon ra jian cainxin tiempo co dintte ra listo ixin inchínji tti ningaonha ra rridehe xa ná coleón que anto jitoñaon co rrittjé va chojni para nasoenxon va.

⁹Jaha ra sinttaxaonha ra inchínji, sino que dintte ra jian ngain tti jaha ra ditticaon ra ixin noa na que cainxin chojni que ditticaon Jesucristo ngoixin mundo tedetan na tangui inchin jaha ra.

¹⁰Pero después que jaha ra setan ra tangui nchion tiempo, Dios sinttachjian jaha ra chojni jian que rrochondaha ni ná cosa jianha, co jehe sinttachjian jaha ra chojni soji co seguro de ngain tti ditticaon ra. Co xajeho Dios mé tti anto nttanchaon na jai, vayá na para que ján na sontte na tti jí glorié jehe para cainxin tiempo; ján na conixin Jesucristo.

¹¹Co jehe Dios tti jiquininxin para cainxin chojni sinchesayehe na jehe co jehe tti rrochonda cainxin joachaxin para cainxin tiempo. Amén.

Ntthi joexinxin joajné Pedro

¹²Silvano, tti janha datsoan que jehe cainxin tiempo ditticaon Jesucristo, jehe tti cjin palabrana ngain carta jihi. Co ngain carta jihi janha rrichjaha ra consejo co rrindattjo ra seguro que cain tti jian que jaha ra vayehe ra, mé tjagoa na ndoa que Dios rinao na ján na. Nchehe ra sigue ditticaon ra jihi cainxin tiempo.

¹³Cain chojni que ditticaon Jesucristo, nite ngain ciudad de Babilonia, tti ni Dios coinchiehe inchin coinchiaha jaha ra, cain chojni mé rroanha na joajna nganji ra. Co cai Marcos, tti rinaho inchin xanhna, jehe rroanha joajna nganji ra cai.

¹⁴Chjehe chó ra joajna jian inchin nchehe ra ngain xanchó ra.

Cainxin jaha ra xo ditticaon ra Jesucristo, Dios rrochjá ra tti ðhjoin que tsonohe ansean ra. Amén.

Yoxin Carta Que Dicjin Pedro

Pedro rroanha joajna para ngain chojni que ditticaon Jesucristo

¹ Janha Pedro na, janha ná ninchehe xé Jesucristo. Co cai janha ná representanté jehe. Janha rricjin na carta jihi para ixin nganji jaha ra xo chonda ra ná fe anto çhjoin inchin janha na. Jamé ixin Dios co Jesucristo, tti chonda cain joachaxin, nchehe inchin jiquininxin.

² Dayehe ra tsje tti jian que ttixin de ngain Dios co tti çhjoin que tsonohe ansean ra, ixin jaha ra chonxin ra tti rinao Dios co Jesucristo, tti chonda joachaxin para ixin ján na.

Quexén sinchehe chojni que ditticaon Jesucristo

³ Dios chjá na de ixin joachaxín jehe cain tti rrogondá na ngain vidá na, co cai para sonttosayehe na jehe ixin dotticaon na Jesucristo, tti vayá na ján na de ixin joachaxín jehe co de ixin tti tsje cosa jian que jehe joinchehe.

⁴ De ixin cayoixin cosa jihi jehe chjá na tsje cosa jian co rentte para que de ixin jehe cosa jian jihi, jaha ra nchao sintte ra inchin Dios cointtoexin sehe chojni desde are joinchechjian saho xí ntlihi ngataha nontte co satsinguehe ra cain cosa jianha que xaxaon chojni jai.

⁵ Mexinxin jeoha sitticaon ra Jesucristo, cai chonda ra que sinchehe ra jian; co de jian, cai chonda ra que jian tsinxin ra tti coetonha Jesucristo;

⁶ co are otsinxin ra jian tti coetonha Jesucristo, chonda ra que tsetonhe ra cuerpoa ra, co de yá cai chonda ra que rrochonda ra paciencia; co de paciencia, cai chonda ra que sinchesayehe ra Dios,

⁷ co de ya, cai chonda ra que rrottjoehé co sinao chó ra jaha ra xo ditticaon ra Jesucristo.

⁸ Si jaha ra nchehe ra cain cosa jihi icha co icha, vidá ra anto jian sehe, co jeha jamaoncoa vitticaon ra Jesucristo, tti chonda joachaxin para ixin ján na.

⁹ Pero tti chojni que ncheha cain cosa jihi, chojni mé te inchin tti chojni que diconha, o inchin tti chojni que diconha jian. Chojni mé ndatjañehe ixin oxenga hna cain cosa jianha que jehe joinchehe are saho.

¹⁰ Mexinxin hermanos, onchao que Dios ovayaha ra co ocoinchiaha ra, ttiho ra cuidado para que sincheha ra cosa jianha, co si jaha ra tsjiho ra cuidado jihi xonhi tiempo rrotjañaha ra tti ditticaon ra.

¹¹ Co solo jamé nchao sayehe ra jie joachaxin para sixinhi ra co sintte ra para cainxin tiempo ngain lugar tti ttetonha Jesucristo, tti chonda cain joachaxin para ixin ján na, co tti cjoenguijna na para xonhi castigo rrochonda na de ixin cain cosa jianha que jointtoho na.

¹² Mexinxin janha sinttaha sigue de sinttaxaxaon ra cain cosa jihi, masqui jaha ra onoha ra co te ra jian de ngain tti ndoa que jaha ra chonxin ra.

¹³ Janha tonona que jian ixin jaxon que xa rrichon janha rronichjaha ra para rronhattjo ra cain consejo jihi.

¹⁴ Jesucristo, tti chonda joachaxin para ixin ján na, ojoinchenona que atto toin janha chonda que tsinttoa vida jihi.

¹⁵ Pero janha sinttaha lucha de sinttacoanha ra cain cosa jihi para que después de janha ndasenne na jaha ra xa rroxaxaon ra cain cosa jihi.

Canxion chojni que vicon ixin Jesús anto tsje joachaxin chonda

¹⁶ Tti janha na jointtacoanha ra de ixin quexén jói Jesucristo co de ixin tti joachaxin que jehe chonda, mé jeha ná cuento que jeha chojni joinchechjian, ixin mé janha na conixin jmacon na viconxin na tti anto tsje joachaxin que jehe chonda.

¹⁷ Janha na vicon na are Dios Ndoá na joinchesayehe Ndo jehe co chjé Ndo chíxo de jehe Ndo. Co de ngajni ndaçhoxin ndo: “Jihi tti Xanhna que janha anto rinaho co de ixin jehe Xan janha anto chahna.”

¹⁸ Janha na mismo coian na palabra yá que joixin de ngajni are janha na tatequinha na Jesucristo ngagaha tti jna santo.

¹⁹ Cai chonda na iná cosa icha seguro, co mé tti joajné Dios que dicjin cain profeta. Jaha ra jian nchehe ra ixin nchehe ra caso joajna mé ixin joajna mé inchin ná lámpara que nchengasán are naxin xehe hasta que nchanho rroçhinhi, co Jesucristo tti inchin conotse jie que çhinhi are ndoyo para nchengasán ngain ansean ra.

²⁰ Pero saho xaxaon ra cain cosa jihi que janha rrondaçhjan: que ni ná profeta que dicjin ngain tti jitaxin Palabré Dios rrocjinha si Dios rrocjenguijnaha.

²¹ Ixin xonhi tiempo ná profeta dicjin inchin jeha xaxaon; sino que Espíritu Santo tti vanchenohe na quehe vacjin na ixin Dios coinchiehe chojni mé para nichja na de ixin jehe.

2

*Tti chojni que nchecoehne icha chojni cosa que jeha ndoa
(Judas 4-13)*

¹ Pero cai ngayé chojni Israel vintte profeta que vanichja cosa que jeha ndoa. Co jamé cai ngayaha ra te chojni que ndačoho ixin nttacoanha ra cosa de Dios, pero jeha ndoa tti jeha na ndačoho na. Ixin de ngacjan palabra mé jeha na jimao nttacoanha ra na cosa jianha ixin jeha na mé isitticoanha na Jesucristo tti cjoenga hna para cain cosa jianha que nchehe na. Co mexinxin anto daca ndasinchetján almé na.

² Co tsje chojni sitticoanha na tti ndoaha que ndačoho chojni mé, co de ixin causexin jeha na icha chojni rronichja feo de ixin tti jian joajné Jesucristo.

³ Co chojni mé anto rinao na tomi, mexinxin sinttacoanha ra na cosa ndoaha para sachaxin na tomi nganji ra. Pero Dios osé ndačoho ixin jeha na sayé na ná castigo soji, co otsí nchanho que jeha na seguro sayé na castigo mé.

⁴ Dios joinchetjañeha tti cain ángel que joinchehe jianha ngain Dios, sino que Dios rroanha cain ángel mé para ngain infierno co nttiha tečoaxin cain ángel mé conixin cadena ngain tti naxin xehe. Co Dios coenchjinha cain ángel mé nttiha hasta are tsí tti nchanho que Dios sinchejuzgá cain.

⁵ Ni cai joinchetjañeha Dios tti chojni que vinttechon are osé, rročoho tiempo are vechon Noé. Dios rroanha jinda ngoixin nontte para joinchetján cain chojni jianha co Dios joinchexehe jeha Noé conixin yáto chojni Noé. Noé venha are mé ixin jeha joinchehe jian co vandache tsje chojni ixin rrojinchehe na jian cai, pero jeha na vitticoanha na.

⁶ Co cai Dios cjoaga ciudad de Sodoma co Gomorra. Che cayoi ciudad mé hasta que cjan ciudad joxon nttésó. Jamé conhe para que cain chojni hasta tiempo jili rrochonxin na quehe tonhe tti chojni que nchehe jianha.

⁷ Pero Dios joinchexehe Lot de ngain ciudad Sodoma ixin jeha cjoí xí jian para ixin Dios, co feo vaconohe are vaguicon cain cosa jianha que vanchehe tti icha chojni de ngain ciudad mé.

⁸ Cainxin nchanho que jeha xí jian mé vehe ngayé na, anto feo vaconohe ansén xa are vaguicon xa co are vaquinhí xa cain cosa jianha que vanchehe cain chojni mé.

⁹ Jañá noa na que Dios nchao sinchexehe de ngain castigo cain chojni que ditticoon palabré jeha. Pero cain chojni jianha jeha sinchegayé na castigo ngain tti nchanho que jeha sinchejuzgá.

¹⁰ Dios icha sinchecastigá tti chojni que cainxin tiempo puro xaxaon sinchehe cosa jianha co ncheha na caso tti coetonha Jesucristo, tti chonda cain joachaxin. Jeha na terco na co čhintto na, co xañha na para nichja na feo ngain tti chonda icha joachaxin para ixin jeha na.

¹¹ Ni cain ángel de Dios, masqui jeha chonda anto tsje fuerza co joachaxin, pero jeha xao para tsjanguihi chojni jianha conixin palabra feo ngain Dios, masqui chojni mé xonhi joachaxin chonda inchin ángel.

¹² Pero chojni jianha mé inchin coxígo que xonhi joarrixaon chonda va co nchehe va jeha inchin rinao cuerpoe va. Co doan va para que iná chojni tse va co nadoenxon va. Jamé tonhe cain chojni mé. Jeha na nichja na jianha de ixin cosa que jeha na ttinxinha na. Mexinxin jeha na sintteguenhe na inchin denhe cain coxígo mé.

¹³ Jeha na jamé soan na sufrido ixin jeha na jamé joinchesufrí na icha chojni. Jeha na tonhe na anto čhjoin are nchehe na cosa jianha que jeha na rinao na. Co cain mé ná joasoaxin co ná cosa feo para ixin jaha ra are jinttecoho ra na ixin nchehe na cosa feo para ncheyexin na icha chojni.

¹⁴ Cain nčhí que jeha na dicon na puro xaxaon na de rrotsontaonxin na nča. Tončhjenha na de nchehe na cosa jianha. Co ncheyehe na chojni que xa antoha jian ditticoon Jesucristo, co anto chonxin na que xén sincheyehe na icha chojni para sachaxin na tomi. Chojni mé chonda que sayé na castigoe Dios.

¹⁵ Jeha na noeha na tinó rridintte na ixin vačhenda na de ngain nttiha nao. Jeha na rroé na ejemploe tti profeta que vinhi Balaam, xitsihí ná tti vinhi Beor. Jeha profeta mé joinao rrogachaxin tomi conixin cosa jianha.

¹⁶ Co jeha colocohe nichja va inchin chojni para joinchesattehe va jeha ixin vanchehe cosa jianha. Co jeha tti nichja coloco mé lcoančhjangandaha profeta mé para joinchehe cosa jianha que jeha xaxaon rrojinchehe ngain nchanho mé.

¹⁷ Cain chojni mé inchin tti pozo que xonhi jinda teria, co inchin ttjoi que rroganjo čhin pero čhintto sadicao ttjoi. Dios ondačoho ixin cain chojni mé para cainxin tiempo sintte na ngain infierno tti anto naxin xehe.

¹⁸ Jamé ixin nichja na palabra orgulloso que xonhi xé, co de ixin tti jianha que nchehe na, co de ixin tti jianha que xaxaon na, jehe na ncheyehe na icha chojni que nandá vachjeyexin de ngayé cain chojni jianha mé.

¹⁹ Chojni jianha mé ndache na icha chojni que si xonhi sitticaon na, ni ley de Dios, ni iná regla jamé jehe na sintte na ngain ná vida libre. Pero jeha na mismo te na inchin esclavo de ngain vida jianha. Ixin cada chojni te inchin esclavo de ngain quexeho cosa jianha que tteonha ngain vidé.

²⁰ Co cain chojni que oditticaon Jesucristo, tti chonda cain joachaxin tti cjoenguijna na para rrochondaha na castigo de ixin tti jianha que nchehe na, chojni mé ova'chjeyexin de cain cosa jianha que jí ngain mundo jiji. Co si después, jehe na xa rrocjan na sinchehe na cosa jianha mé iná, jehe na rrocjan sintte na chojni icha jianha que are saho.

²¹ Ixin si después de vatsoan na joajné Jesucristo, jehe na cjan na joincheha na caso tti tteonha Jesucristo ngain na, icha jian para ixin jehe na si rrogatsoanha na joajna mé.

²² Pero jañá nchehe na para que de jehe na doan cumple tti dicho ndoa que nda'cho: "Conia cjan va jine va tti toncjan va. Co cocochi que ttjexin tsinda va, cjan va ttngariacjan va ndanchetjaho."

3

Are tsí Jesucristo iná

¹ Hermanos, jiji tti yoxin carta que janha cjin na nganji ra. Co ngain cayoi carta jiji janha rinaho que jaha ra rro'axaon ra jian de ixin consejo que janha rrindattjo ra.

² Xaxaon ra tti nda'cho cain profeté Dios are saho, co tti coetonha Jesucristo ngain representanté jehe, para que representante mé jointtacoanha ra jaha ra tti coetonha Jesucristo, tti chonda cain joachaxin co tti danjo iná vida naroaxin ngain chojni.

³ Janha rinaho que anto jian tsonoha ra cosa jiji: que are ochian tsí nchanho que Jesucristo tsí iná, sintte chojni que tsjanao cosa de Dios, co sinchehe na cainxin cosa jianha que jehe na rro'axaon na.

⁴ Co are mé jehe na sanchiangui na co rronda'cho na: "¿Cja tti nda'cho Cristo ixin jehe rroquí iná? Pues de tiempo que ndavenhe cain nigoelitoa na xan'chjen co hasta jai cain nchanho xajeho inchin desde are nacoexinxon vehe mundo."

⁵ Chojni mé jamé rronda'cho ixin rinaoha na tsonohe na que ngain tiempo icha sé Dios joinchchjian ngajni co nontte, co de ngangui jinda chinxin nontte, co de ixin jinda cain cosa jichon.

⁶ Cai de ixin jinda joinchetjanxin Dios mundo are saho.

⁷ Pero ngajni co nontte que jí jai, Dios jittenchjinha para que rroche conixin xohi, ixin Dios jamé tteonha. Co jehe xohi mé tti tsjaga ngajni co nontte ngain tti nchanho are Dios sinchejuzguehe cainxin chojni, co are mé Dios sinchetján cainxin chojni jianha.

⁸ Co tjañaha ra, hermanos, que para ixin Jesucristo, tti chonda cain joachaxin, para ixin jehe, ná nchanho inchin mil nano, co tti mil nano inchin nacoa nchanho para ixin jehe.

⁹ Jaha ixin jehe jiton'chjenhe para sinchexin tti jehe nda'cho, inchin xaxaon canxin chojni, jaha jamé, sino que jehe chonda paciencia para ixin ján na. Co jehe rinaoha sitján almé ni ná chojni, sino que jehe rinao que cain na sachjenda na de ngain cosa jianha.

¹⁰ Pero nchanho are Jesucristo tsí iná, nchanho mé ni ná chojni rro'axaonha ixin quesa tsí nchanho mé, inchin are tti ná tti chehe are ttie. Cottimeja ngajni rroxantte de ixin ná ruido anto soji que tsinhi ni, que cainxin chojni rro'axaon na. Co cain cosa que docon na ngajni rroche conixin xohi, co nontte rroche nontte conixin cainxin cosa que jí ngataha nontte.

¹¹ Jañá sitjanxin cainxin cosa, mexinxin jaha ra chonda ra que sintte ra chojni jian que Dios rinao, co sinchesayehe ra jehe.

¹² Chonhe ra tti nchanho que tsí Dios co tsjehe ra que'xén nchehe ra para que nchanho mé icha daca tsí nchanho. Ngain nchanho mé ngajni rroche conixin xohi co cain cosa que docon na nttiha satanga conixin neje xohi.

¹³ Pero ján na rrochonhe na tti ngajni naroaxin co tti nontte naroaxin tti nda'cho Dios que rrochjá na, co ngain nontte mé sehe cainxin inchin jiquininxin, co jian.

¹⁴ Mexinxin, hermanos, jai que xa techonhe ra cain cosa jiji, ttjiho ra cuidado que xonhi cosa jianha nchehe ra para que are tsí Dios, xonhi cosa jianha techonda ra ngain vidá ra co para que ansean ra chjojn tsonohe cai.

¹⁵ Xaxaon ra jian que ixin tti paciencia que jichonda Jesucristo jai para ixin ján na, mé para que ján na tsentoxinhi na vidá na para que jehe nchao tsjenguijna na para que xonhi castigo rrochonda na de ixin tti jianha que jointtoko na. Jañá dicjin Pablo nganji jaha ra cai. Jehe cjin palabra que joanjo Dios ngain jehe.

¹⁶ Cainxin carta que jehe dicjin, jehe dindattjo ra de ixin cain cosa jihi, masqui te parte nchion tanguí para tsinxin ra. Co tti chojni que rinaoha tsinxin cosa jihi, co tti chojni que xa antoha jian ditticaon Cristo, jehe na daca ttentoxinhi na sentido de ixin quehe rrocho jihi co nchehe na inchin jehe na xaxaon na, jañá inchin jehe na ttentoxinhi na canxion parte de ngain tti jitaxin Palabré Dios. Jamé jehó na ttjé na tti sitjanxin almé na.

¹⁷ Mexinxin, hermanos, jaha ra que onoha ra cain cosa jihi, ttjiho ra cuidado que xonhi chojni jianha sinttayaha ra. Si nahi, puede sinchehe ra inchin jehe na nchehe na co ndarrojtajñaha ra tti ditticaon ra Cristo.

¹⁸ Pero jaha ra ditticaon ra icha jian ngain Jesucristo, tti chonda cain joachaxin para ixin ján na co jehe tti danjo iná vida naroaxin nganji na ján na, co xago ra ngain Jesús co jehe tsjagoha ra quexén jehe anto rinao ra jaha ra. ¡Co jehe tti jiquininxin que cain chojni sinchesayehe na jehe jai co para cainxin tiempo! Amén.

Saho Carta que Dicjin Juan

Jesucristo dinhi: Palabra que chjé chojni vida

¹ Janha rricjinha jaha ra de ixin jehe tti ovehe are cainxin coexinhi. Janha na coian na tti ndačo jehe co vicon na jehe conixin jmacon na, co janha na tsjá na co catte na conixin rana na. Co jehe mé tti dinhi Palabra que chjé chojni vida.

² Palabra jiji cononxin para joatsoan ni co mé tti chjé ni vida. Co janha na vicon na co ndačhan na que ján ndoa que jehe Palabra mé cononxin. Co janha na nttañoa ra jaha ra de ixin jehe tti danjo iná vida naraixin que xonhi tiempo tsjexin. Co jehe vehe ngain Ndodá na ngain co después cononxinna na.

³ Janha na ndattjo ra jaha ra tti janha na vicon na co tti janha na coian na para que jaha ra rroché ansean ra inchin janha na ché ansenna na ixin ján na ndoa te na ngain Dios tti Ndodá na co ngain Xenhe Ndo que mé Jesucristo.

⁴ Jañá remé, rricjinha ra cain cosa jiji para que ansean ra anto rroché.

Dios jehe joadingasán

⁵ Tti joajna ndoa que Jesucristo cjoagohna na, mé tti janha na rrindattjo ra jaha ra jaxon. Co joajna mé ndačo ixin Dios jehe tti joadingasán, co ngain jehe xonhi naxin xehe jí.

⁶ Si ndačo na ixin te na ngain jehe co xajeho tiempo ján na te na ngain tti naxin xehe, ján na ndoa tti ndačo na co cai xonhi xé tti nttoho na.

⁷ Pero si ján na te na ngain joadingasán, jañá inchin Dios jí ngain joadingasán, jañá sotticaon chó na cain na co jni Jesucristo Xenhe Dios, jni mé jni nttañoa ján na de cainxin tti jianha que jointtoho na.

⁸ Si ndačo na ixin xonhi jianha jointtoho na, ján na nttoyaxon na co jeha ndoa que ján na dotticaon na tti jian joajné Jesucristo.

⁹ Pero si ttendoenhe na ñao na tti jianha que nttoho na, nchao rrochonda na confianza ngain Dios que jehe sinchehe inchin jiquininxin; rročo que jehe sinttatjañá na tti jianha que ján na jointtoho na co sinttao na de cainxin cosa nchaoha.

¹⁰ Pero si ndačo na ixin xonhi jianha jointtoho na, jañá inchin rrondačo na que Dios jehe ncheyaxon co ndoa que dotticaon na tti jian joajné jehe.

2

Jesucristo tti abogadoa na

¹ Jaha ra inchin xannchinnchinchjanhna que anto rinaho ra, co rricjin na cain cosa jiji para ixin jaha ra para que xonhi jianha sinchehe ra. Pero si çhonja ra sinchehe jianha, chonda na ná xiabogado ngattoxon con Ndodá na, co xiabogado mé jehe Jesucristo, co xonhi tiempo jehe jointtoho jianha.

² Co de ixin jehe Jesucristo cain cosa jianha que jointtoho na vitjañá na, co jeoha tti jianha que ján na nttoho na, cai cainxin tti jianha que nchehe cainxin chojni ngoixin mundo vitjañehe na cai.

³ Si dotticaon na tti ttetonha Dios, jamé conoa na que joatsoan na jehe.

⁴ Pero si çhonja chojni ndačo: “Janha chonxin jehe”, co ditticaonha tti ttetonha Dios, chojni mé ncheyaxon co ndoa tti jehe ndačo.

⁵ Co tti chojni que nchehe inchin ttetonha Dios, chojni mé ndoa anto rinao Dios. Mexinxin jamé noa na que te na conixin jehe si ján na anto rinao na Dios.

⁶ Co chojni que ndačo ixin jehe jí conixin Dios, chojni mé chonda que sinchehe jian inchin Jesucristo.

Juan ncheaxaon chojni de ixin cosa naraixin que Jesucristo cjoago

⁷ Hermanos, janha xonhi cosa naraixin rritetonha ra ngain carta jiji, ixin mé xajeho tti vitonha ra are nacoexinxon ra vitticaon ra. Co mé tti coinhi ra desde are mé.

⁸ Pero masqui jamé, tti janha rricjinha ra jehe inchin ná cosa naraixin que ditonha, ixin Jesucristo tti saho cjoago cosa jiji co jai jaha ra tjago ra cosa jiji cai ngain vidá ra. Rročo que inchin ixonhi naxin xehe jí ngain ra ixin Jesucristo joinchengasán ngain ansean ra.

⁹ Si çhonja chojni ndačo que jehe jí ngain joadingasán, pero si jehe ningaconhe icha chojni que ditticaon Jesucristo, jehe xa jí ngain tti naxin xehe.

¹⁰ Pero tti chojni que rinao icha chojni que ditticaon Jesucristo, jehe jí ngain tti joadingasán co chondaha ni ná cosa para que jehe sinchehe jianha.

¹¹ Pero tti ningaconhe ná de tti chojni mé, jehe jí co rridehe ngain tti naxin xehe, co noeha tinó rridehe ixin jehe que ningaconhe iná chojni çhoha dicon nttié Dios.

¹² Jaha ra xo nandá vitticaon ra ngain Jesús, janha rricjin nganji jaha ra que por ixin Jesucristo Dios jointtatjañaha jaha ra tti jianha que joinchehe ra.

¹³ Cain jaha ra que osé vitticaon ra Jesús, janha rricjinha nganji ra ixin ojoatsoan ra jehe tti ovehe are cainxin coexinhi vehe. Co jaha ra xo xa seha vitticaon ra, janha rricjin ngain ra ixin jaha ra nchao coixinha ra ngain inchínji.

Janha cjinha jaha ra xo nandá vitticaon ra ixin ojoatsoan ra Dios Ndodá na.

¹⁴ Co janha cjinha jaha ra que osé vitticaon ra Jesús ixin ojoatsoan ra jehe tti ovehe are cainxin coexinhi vehe. Cai cjin na para ixin jaha ra que xa seha vitticaon ra ixin jian ditticaon ra ngain Jesucristo co vayé ra palabré Dios ngain ansean ra, co ixin coixinha ra ngain inchínji.

¹⁵ Janha rritetonha ra que sinaoha ra joxon cosa de ngain mundo jiji. Si chonja chojni rinao joxon cosa de ngain mundo jiji, chojni mé rinaoha na Dios Ndodá na,

¹⁶ ixin xonhi cosa que mundo danjo ttixin de ngain Dios Ndodá na. Cosa mé ttixin jehode ngain mundo. Rrocho que tti jianha que rinao cuerpo chojni, tti ncheoxinhi jmacon ni para rrochonda ni, co tti anto orgullo que tonohe ni ixin chonda ni tsje cosa, cain jiji tti danjo mundo.

¹⁷ Co mundo ndajittjexin conixin cainxin que rinao ni que jí ngain mundo jiji, pero chojni que nchehe inchin rinao Dios, sechon para cainxin tiempo.

Chojni que nichja ndoa co chojni que nichja ndoaha

¹⁸ Jaha ra inchin xannchinnchinchjanhna co rrindattjo ra que ochiaon ndatsjexin tiempo. Jaha ra ocoini ra que tsí ná chojni que anto rroningaconhe Cristo. Co jai cononxin atto tsje chojni que ningaconhe na Cristo, mexinxin ján na noa na que ochian tsí nchanho que ndatsjexin tiempo.

¹⁹ Cain chojni mé vachjeyexin de ngayá na, pero jehe na jeha ndoa chojnia na na ixin si rrocji na chojnia na rroguittohe na nganji na. Pero jañá conhe para que vicon ni que ndoa chojni mé jeha chojnia na.

²⁰ Pero jaha ra Cristo hjá ra Espíritu Santo, mexinxin cain ra chonxin ra tti ndoa.

²¹ Mexinxin janha rricjin nganji ra ixin chonxin ra tti joajna ndoa que joixin de ngain Dios co nahi ixin chonxinha ra. Co jaha ra noha ra que ni ná cosa ndoaha nchao tsixin de ngain joajna mé.

²² ¿Achonxinha ra quensen jehe tti nichja ndoaha? Jehe mé tti mero ndacho ixin Jesús jeha tti Cristo, tti Dios rroanha ngataha nontte. Chojni mé tti ningaconhe Cristo ixin ditticaonha na ni Jesucristo ni Dios Ndodá na.

²³ Cainxin chojni que ndacho ixin Jesucristo jeha Xenhe Dios Ndodá na, cai jehe Ndo jija Ndo ngain na. Pero tti chojni que ndacho ixin Jesucristo Xenhe jehe Ndo, cai chojni mé Ndodá na jí Ndo ngain chojni mé.

²⁴ Mexinxin, ttenchjinha jaha ra ngain ansean ra tti jian joajna que coinhi ra de are nacoexinxon ra vitticaon ra. Co si tti coinhi ra are icha saho sittohe ngain ansean ra, jaha ra cai cainxin tiempo sintte ra ngain Ndodá na co ngain Xenhe Ndo.

²⁵ Co Jesucristo ndacho que jehe rrochá na iná vida naraoxin que xonhi tiempo tsjexin.

²⁶ Janha cjinha ra cain jiji de ixin tti chojni que rinao nttayaha ra.

²⁷ Pero jaha ra chonda ra Espíritu Santo que Jesucristo hjá ra, mexinxin ixonhi chojni rrogondaha ra para sinttacoanha ra, ixin jeha Espíritu Santo tti sinttacoanha ra cain cosa co tti jehe sinttacoanha ra, mé ndoa co jeha ixin ndoaha. Mexinxin jañá nchehe ra para dintte ra cain ra ngain Cristo inchin nttacoanha ra jehe Espíritu Santo.

²⁸ Mexinxin jaha ra xo xannchinnchinchjanhna, dintte ra cain ra ngain Cristo para que rrochonda na confianza are jehe rrožago co rrochondaha na joasoaxin ngattoxon con jehe are jehe tsí.

²⁹ Jai que onoha ra que Jesucristo nchehe jian, chonda ra que tsonoha ra cai que cain chojni que nchehe jian, cain chojni mé xenhe Dios.

3

Quexén sinchehe tti chojni que xenhe Dios

¹ Tsjexinxin ra, Dios Ndodá na anto rinao na hasta que ján na nchao dinhi na xenhe Dios, co ján ndoa ján na xenhe Dios na. Mexinxin tti chojni que ditticaonha Jesucristo ttinxinha tti ján na xaxaon na ixin jehe na xa datsoanha na Dios.

² Ján na oxenhe Dios na, co xa xagoaha na quexén sontte na después. Pero noa na que are Jesucristo tsí, ján na sontte na inchin jehe ixin socon na jehe mero inchin jehe jí.

³ Co cain chojni que ditticaon jiji tojian na inchin Jesucristo jehe jian.

⁴ Pero cain chojni que nchehe jianha ditticaonha na tti coetonha Dios, ixin are nchehe ni jianha rrocho ixin jehe ni ncheha ni tti coetonha Dios.

⁵ Jaha ra onoha ra que Jesucristo jói ngataha nontte para que cjoenga hna cain tti jianha que ján na jointtoho na co noha ra cai que jehe xonhi jianha joinchehe.

⁶ Mexinxin jañá cain chojni que te ngain Cristo sincheha sigue sinchehe cosa jianha. Pero cain chojni que tenchehe sigue nchehe cosa jianha, chojni mé xa datsoanha na ni ditticaonha na Jesucristo.

⁷ Jaha ra inchin xannchinnchinchjanhna co janha rrindattjo ra que dittoaxinha ra que xonhi chojni sinttayaha ra. Chojni que nchehe jian, chojni mé Dios ndaño ixin jehe na jian na inchin Jesucristo jian.

⁸ Pero tti chojni que tenchehe jianha, chojni mé chojni inchínji ixin inchínji jianha jinchehe desde are nacoexinxon vehe nontte. Co Jesucristo, tti Xenhe Dios jói Xan para joinchexantte Xan tti joinchehe inchínji.

⁹ Ni ná chojni que jehe na xenhe Dios na nchehe na sigue nchehe cosa jianha ixin chonda na iná vida que Dios joanjo ngain na, mexinxin ðoha sinchehe na sigue sinchehe na cosa jianha ixin jehe na xenhe Dios na.

¹⁰ Nohe ni quexehé chojni xenhe Dios co quexehé chojni tti xenhe inchínji ixin quexehé chojni que ncheha jian, o rinaoha chojni que ditticaon Jesucristo, chojni mé jeha chojni Dios.

xo ditticaon na Jesucristo chonda que sinao chó na

¹¹ Tti joajna ndoa que jaha ra coinhi ra are nacoexinxon ra vitticaon ra rroño jiji: que chonda na que sonao chó na naná na.

¹² Chondaha na que sontte na inchin Caín que mé chojni inchínji co nagoenxon xanchó. ¿Co quedonda nagoenxon xan? Ixin tti vanchehe Caín, mé jianha, co tti vanchehe xanchó mé jian.

¹³ Hermanos, xaonha ra si rroningaconha ra chojni que ditticaonha Jesucristo.

¹⁴ Já n na donao na cain chojni que ditticaon Jesucristo inchin xanchó na, co jiji tjago ixin ovattohe na tti ndadenhe ni co jai chonda na iná vida naraixin. Pero tti chojni que rinaoha icha chojni que ditticaon Jesucristo, chojni mé xa ndadiguenhe de ngain espiritue na.

¹⁵ Cainxin chojni que ningaconhe icha chojni, chojni mé Dios ndaño ixin xajeho inchin tti chojni que nadoenxon chojni. Co jaha ra noha ra que ni ná tti nadoenxon chojni chonda iná vida naraixin que xonhi tiempo tsjexin.

¹⁶ Já n na chonxin na quexén Jesucristo rinao na já n na ixin jehe joanjo vidé para ixin já n na. Co jañá cai já n na chonda na que sonao chó na naná na co si nchao hasta sanjo na vidá na para ixin chojni que ditticaon Jesucristo.

¹⁷ Si ná ni chonda ni tti rronondehe ni para sinttechonxin ni co sicon ni ná chojni que ditticaon Jesucristo rronondehe na, co si jehe ni tsiaconoeha ni na ¿quexén nchao jehe ni rinao ni Dios ngain ansén ni?

¹⁸ Jaha ra inchin xannchinnchinchjanhna co janha rritetonha ra que chondaha na que jeho rrondaño na conixin rroha na ixin sonao na chojni, sino que rrochonda na que tsjenguina na para jamé seguro ndoa donao na chojni.

Quexén chojni nchao rrochonda confianza ngattoxon con Dios

¹⁹ Jañá, para que nchao tsonoa na que já n na tti nichja na tti ndoa, co jamé sontte na seguro ngattoxon con Dios.

²⁰ Co masqui puede ansean na tsjanguia na ná cosa, pero Dios icha jie joachaxin chonda que ansean na co jehe nohe cainxin.

²¹ Co si ansean na xonhi tsjanguia na, já n na rrochonda na confianza ngattoxon con Dios,

²² co jehe rrochjá na cainxin tti sanchiehe na ixin ditticaon na tti jehe ttetonha co nttoho na tti ncheoxinhi Dios.

²³ Co janhi tti jehe ttetonha: que sotticaon na ngain Jesucristo Xenhe jehe Dios co ixin sonao chó na naná na inchin jehe Jesucristo ocoetoan na.

²⁴ Tti chojni que ditticaon tti coetonha Dios, chojni mé te na ngain jehe co jehe jí ngain jehe na. Noa na que jehe jí nganji na ixin chonda na Espíritu Santo que jehe chjá na.

4

Espíritu Santo co tti espíritu que ningaconhe Jesucristo

¹ Hermanos, dacaha ditticaon ra cain tti chojni que ndaño ixin tti jehe na ndaño na mé joajna que joixin de ngain Dios, sino que saho ttijho ra cuidado para sicon ra si chojni mé chonda Espíritu Santo que ttixin de ngain Dios o ni nahi. Ixin ngoixin nontte ndajicaon de chojni jianha que ndaño ixin jehe na nichja na de ixin Dios pero ndoaha.

² Pero janhi sinchehe cain chojni que chonda Espíritu Santo que ttixin de ngain Dios para que jaha ra nchao rrochonxin ra: cain chojni que datsoan na co ndaño na ixin Jesucristo are jehe jói jehe joigoan ná xí, chojni mé chonda na Espíritu Santo que ttixin de ngain Dios.

³ Pero tti chojni que datsoanha que Jesús cjoí ná xí, chojni mé chondaha na Espíritu Santo que ttixin de ngain Dios, sino que chojni mé chonda tti espíritu que ningaconhe Cristo. Jaha ra ocoini ra que espíritu mé chonda que tsí, co jai espíritu mé ojí ngataha nontte.

⁴ Jaha ra inchin xannchinnchinchjanhna, co jaha ra chojni Dios co coixinha ra ngain cain chojni mé ixin Espíritu Santo que jí nganji ra chonda icha joachaxin que tti espíritu que jí ngain chojni que ditticaonha Jesucristo.

⁵ Chojni mé jehó chojni de ngataha nontte, co mexinxin tjago na cosa que joxon chojni xaxaon, co icha chojni que ditticaonha Jesucristo nchexoxinhi na ttinhi na cosa mé.

⁶ Pero ján na chojni Dios, co tti chojni que chonxin Dios ttinhi na tti ndaño ján na. Pero tti jeha chojni Dios, nimé ttinha na tti ndaño ján na. Co jañá, nchao satsoan na quexehé chojni chonda tti Espíritu Santo que nichja tti ndoa co quexehé chojni chonda tti espíritu que ncheyexon chojni.

Dios anto rinao na ján na

⁷ Hermanos, cain ján na chonda na que sonao chó na naná na ixin tti rinao chó ni ttixin de ngain Dios. Cain chojni que rinao icha chojni, chojni mé xenhe Dios co chonxin na Dios.

⁸ Co tti chojni que rinaoha icha chojni, chojni mé xa chonxinha Dios ixin Dios rinao cain chojni.

⁹ Dios cjoagoa na que jehé rinao na are jehé rroanha tti nacoaxinxon Xenhe ngataha nontte para que ján na rrochonda na iná vida naraoxin de ixin jehé Xan.

¹⁰ Ttinxin na que jeha ján na joinao na Dios, sino que jehé tti joinao na ján na, co mé rroanxin Xenhe para que de ixin jehé Xan cainxin tti jianha que jointtoho na oxenga hna.

¹¹ Hermanos, si Dios joinao na jañá, ján na cai chonda na que sonao chó na naná na.

¹² Xonhi tiempo ná chojni vicon na Dios, pero si rinao chó na naná na, Dios jí nganji na co jamé icha sonao chó na inchin Dios rinao na.

¹³ Dios chjá na Espíritu Santo, mexinxin ján na chonxin na que Dios jí nganji na co ján na te na ngain jehé.

¹⁴ Co janha na vicon na, co ndačhan na que Dios Ndojá na rroanha Ndo Xenhe Ndo para que danjo Xan iná vida naraoxin ngain cainxin chojni ngoixin nontte.

¹⁵ Quexehé chojni que datsoan co ndaño ixin Jesús ján Xenhe Dios, chojni mé jí ngain Dios co Dios jí ngain jehé cai.

¹⁶ Co jañá ján na noa na co dotticaon na que Dios rinao na. Co Dios mé tti rinaonxin chó na co tti chojni que cainxin tiempo rinao icha chojni, chojni mé jí ngain Dios co Dios jí ngain chojni mé.

¹⁷ Jañá ján na rinao na icha chojni inchin Jesucristo rinao na ján na para que ján na rrochonda na confianza are tsí tti nchanho que Dios sinchejuzguehe cain chojni. Ixin ján na te na ngataha nontte jiji co donao na icha chojni inchin joinchehe Jesucristo are jehé nttihi ngataha nontte.

¹⁸ Dios anto rinao na ján na co si ján na rinao na Dios, xonhi joaxaon rrochonda na. Ixin si ndoa rinao na Dios čhoha rrochonda na joaxaon ixin Dios joantsje cain joaxaon que vonttechonda na. Si čhonja chojni chonda joaxaon rročo que ixin jehé joinchehe cosa jianha co xagoen castigoe Dios, ixin si xagoen ni Dios, mé ixin xa antoha jian rinao ni Dios.

¹⁹ Ján na rinao na Dios ixin jehé tti joinao na ján na saho.

²⁰ Pero si čhonja chojni ndaño: "Janha rinao Dios", co xajehé tiempo ningaconhe na iná chojni que ditticaon Jesucristo, chojni mé ncheyaxon. Ixin si ná ni rinaoha ni iná chojni que ditticaon Jesucristo que ovicon ni, mexinxin ¿quexén sinao ni Dios tti xonhi tiempo vicon ni?

²¹ Jehé Ndo coetoan na Ndo jiji: que tti chojni que rinao Dios cai chonda que sinao icha chojni que ditticaon Jesucristo.

5

Quexén ján na nchao tsixian na ngain cosa jianha

¹ Cain chojni que ditticaon que ixin Jesús tti Cristo que Dios rroanha ngataha nontte, chojni mé xenhe Dios. Co si sinao ni ná ndodaha, cai rinao ni xenhe ndodaha mé.

² Mexinxin si rinao na Dios co nttoho na tti jehé ttetonha, noa na que cai rinao na cain xenhe Dios, rročo cain chojni que ditticaon ngain Jesucristo.

³ Ixin si rinao ni Dios, chonda que sitticaon ni tti jehé ttetonha, co tti jehé ttetonha tanguiha,

⁴ ixin cainxin chojni que xenhe Dios nchao tsixinhi na ngain cosa jianha ngataha nontte. Co tti confianza que ján na chonda na ngain Jesucristo, mé tti jointtagacha na de cain cosa jianha que jí ngataha nontte.

⁵ Co jecho chojni que ditticaon ixin Jesús Xenhe Dios nchao tsixinhi ngain cain cosa jianha mé.

Tti ndačo Juan de ixin Jesucristo Xenhe Dios

⁶ Jesucristo joiguite ngain jinda co vinttji jni are ndavenhe, jańa para cjoagoe chojni ixin Dios tti rroanha jehe. Jeoha cjoago mé are joiguite, ixin cai cjoago mé are vinttji jni co ndavenhe. Co Espiritu Santo tti ndačo ján que ixin Dios rroanha Jesucristo, co Espiritu mé tti ndoa.

⁷ Ngajni jí ní tti ndačo ján de ixin cain jiji: Ndodá na, co Jesucristo tti dinhi Palabra, co Espiritu Santo, co canio jiji inchin jecho nacoa.

⁸ Co cai jí ní ngataha nontte que ndačo ján de ixin cain jiji: Espiritu Santo, jinda, co jni, co canio jiji ndačo xajeho.

⁹ Ján na dotticaon na tti ndačo chojni, pero tti ndačo Dios icha rentte, mexinxin chonda na que sotticaon na tti ndačo Dios de ixin Xenhe.

¹⁰ Co tti chojni que ditticaon ngain Xenhe Dios, chojni mé ditticaon ngain ansén tti ndačo Dios de ixin Jesús, pero tti ditticaonha jamé, jehe ncheguinihi Dios inchin ná tti nichja ndoaha ixin chojni mé ditticaonha tti ndačo Dios de ixin Xenhe Ndo.

¹¹ Janhi tti ndačo Dios: que de ixin Xenhe, jehe Dios chjá na iná vida naroaxin que xonhi tiempo tsjexin.

¹² Chojni que ditticaon Xenhe Dios cai chonda na jehe vida naroaxin jiji, pero tti chojni que ditticaonha Xenhe Dios, chojni mé chondaha vida naroaxin.

Juan ttjexin carté co danjo icha consejo

¹³ Janha rricjin nganji jaha ra xo ditticaon ra ngain Jesucristo, para que noha ra jian que ixin chonda ra iná vida naroaxin que xonhi tiempo tsjexin.

¹⁴ Ján na chonda na confianza ngain Dios ixin noa na que si sanchiehe na quexeho cosa inchin jehe rinao, jehe tsinhi quehe sanchiehe na.

¹⁵ Co jańa inchin noa na que Dios ttian na tti ján na danchiehe na jehe, cai noa na que orrochonda na tti joanchiehe na.

¹⁶ Si chonja chojni sicon que ná chojni Cristo jinchehe ná cosa jianha, pero cosa mé jiquininxinha para que Dios rrorroanha castigo de ndasitján almé chojni mé, chojni que sicon jamé chonda que sinchetsenhe ñao Dios para ixin chojni que jinchehe cosa jianha mé, co Dios sanjo iná vida naroaxin para ngain chojni que jinchehe cosa jianha mé, si jeha ná cosa jianha que jiquininxin castigo de ndasitján almé chojni. Jí cosa jianha que jiquininxin para Dios rrorroanha castigo de sitján almé chojni que nchehe cosa mé, co ndačhanha que sinchetsenhe ni ñao Dios para chojni que nchehe cosa jianha mé.

¹⁷ Cainxin cosa jianha nchexoxinha Dios, pero te cosa jianha que xa jiquininxinha castigo de sitján almé ni.

¹⁸ Noa na que tti chojni que chonda Dios inchin Ndodé, chojni mé ncheha na sigue nchehe na cosa jianha ixin Xenhe Dios jinda chojni mé co inchínji catteha na.

¹⁹ Noa na que ján na chojni Dios na, pero tti icha chojni que ditticaonha Jesucristo, chojni mé inchínji ttetonhe.

²⁰ Noa na cai que Xenhe Dios jói Xan ngataha nontte para ttjenguijna na Xan para datsoan na Dios tti ján ndoa. Co ján na te na ngain tti mero ndoa, rročo, ngain Jesucristo, Xenhe Dios. Jehe Xan tti mero Dios ndoa co jehe Xan tti chjá na iná vida naroaxin que xonhi tiempo tsjexin.

²¹ Jaha ra xo inchin xannchinnchinchjanhna, ncheha ra caso cain cosa que chojni nchesayehe inchin Dios pero que jeha Dios ndoa. Amén.

Yoxin Carta que Dicjin Juan

Chojni que ditticaon Jesucristo chonda que sinao chó na naná na

¹ Janha tti representante de Jesucristo tti ditticaon jehe de osé tiempo, co cjin na carta jiji para n'chí que ditticaon Jesucristo. Dios coinchiehe n'chí mé conixin xenhe n'cha tti ni janha rinaho ndoa, co jeoha janha, cai cain chojni que joatsoan tti ndoa.

² Rinaho jaha ra de ixin jehe tti ndoa que chonda na ngain ansean na co que sehe nganji na para cainxin tiempo.

³ Dios tti Ndoá na conixin Xenhe, tti chonda cain joachaxin, sinchenciaon nganji ra co tsiacoñoaha ra co sanjo ra tti çhjoin que tsonohe ansean ra. Cain jiji sehe nganji ján na que joatsoan tti ndoa co tti rinao chó na.

⁴ Atto chahna janha ixin coian que canxion xanha te xan conforme ngain tti ndoa, jañá inchin Dios Ndoá na coetoan na.

⁵ Co jai, nttatsanha ñao jaha que ján na sonao chó na naná na. Tti rricjinha jiji jeha ná cosa nroaxin que ján na vitoan na, çajeho tti ján na chonda na de are nacoexinxon na gotticaon na.

⁶ Tti rinaonxin chó ni rroçho ixin chonda ni que sintte ni inchin coetonha Dios. Inchin ocoinhi jaha ra de are nacoexinxon na gotticaon na, ján na vitoan na para sonao chó na co sonao na Dios.

Tti chojni que ncheyehe icha chojni

⁷ Ngoixin ngataha nontte çhji chojni que ncheyehe icha chojni co chojni mé datsoanha na ixin Jesucristo tti Dios rroanha ngataha nontte inchin ná xí ndoa co jian. Chojni mé tti niningaonhe Jesucristo, co ncheyehe na icha chojni.

⁸ Jaha ra chonda ra cuidado para que sinchetjanha ra tti joacha ra co jamé jaha ra sayehe ra cain tti jaha ra ojoacha ra.

⁹ Quexeho chojni que ndasitján de ngain tti cjoago Jesucristo, chojni mé ditticaonha Dios, pero tti chojni que sitticaon tti cjoago Jesucristo, chojni mé jí ngain Ndoá na co Xenhe Ndo cai.

¹⁰ Si çhonja chojni sitsjaha jaha ra co ditticaonha jiji, çjeha ra na joachaxin para rronichja na ngain nihngo ni nichjeha ra na inchin nichjehe ra chojni Jesús

¹¹ ixin tti chojni que rronichjé chojni mé inchin chojni Jesús, jehe tsjenguijna chojni mé para sincheyehe na icha chojni.

Joexin joajné Juan

¹² Chonda atto tsje que rrondattjo jaha ra pero irinaoha sinttaha conixin çón co ndajni ixin janha rrochoan para saso sasotsjaha ra co rronichja na janha co jaha ra para que jamé icha jian rrochá na.

¹³ Nttili cain chojni que ditticaon Jesucristo, tti chojni que Dios coinchiehe rroanha joajna para ixin jaha. Amén.

Ninxin Carta que Dicjin Juan

Juan nichja jian de ixin ná xí vinhi Gayo

¹ Janha tti representante de Jesucristo tti ditticaon jehe de osé tiempo, cjin na carta jiji para ixin xiamigona Gayo, tti janha ndoa rinaho.

² Janha danchia Dios que jehe jian sinchenchaon nganji, co ixin xonhi tti tsonihi cuerpoa, jañá para sarihi jian ngain cuerpoa inchin jianxin ansean.

³ Janha atto chahna are jói canxion chojni que ditticaon Jesucristo co coequinna na ixin jaha jian ditticaon Jesús co quexén rridarihi jaha ngain tti ndoa.

⁴ xonhi cosa jí que janha icha rrochananxin jeho tsonona que chojnina te na inchin ndačo tti ndoa.

⁵ Jaha rrihi soji ngain tti jaha rrinchehe ngain quexeho chojni que ditticaon Jesucristo co icha jian ixin jaha ttjenguijna chojni que joixin na de iná nontte.

⁶ Co nimé ni ndačo ngattoxon con cain chojni que xatte para servicio nntihi quexén jaha rinao chojni mé. Nttatsanha ñao, ttjenguijna chojni mé de ixin tti rrogondehe na para que sinchehe na sigue ngain viajé na para ixin Dios.

⁷ Co jehe na sacjoi na viaje de ixin Jesucristo, co xonhi vanchia na ngain chojni que chonxinha Dios.

⁸ Mexinxin ján na chonda na que tsjinho na cuidado de ixin jehe na para tsjenguijna na na, co jañá ján na tsjenguijna na na de ngain xa de rrondatehe na chojni tti joajna ndoa.

Cosa nchaoha que Diótfrefes nchehe

⁹ Janha cjin na ná carta para cain chojni que xatte para servicio nntiha, pero Diótfrefes čhoaha nchehe caso tti janha ttetonha ixin jehe nchexoxinhi dehe tti icha nohe de ngayé cain na.

¹⁰ Mexinxin are janha saso, janha rronichjá para rrondatehe tti jehe nchehe, ixin nichja feo co nichja ndoaha de ixin janha. Co xa jiha contento conixin cain yá, jehe ttjenguijnaha tti chojni que čhji viaje de ixin Jesucristo, co tti chojni que ttjenguijna chojni mé, jehe Diótfrefes ndačo ngain na que sinchehe na jamé, co denguijna na de ngain cain chojni que xatte para servicio nntiha.

¹¹ Janha rritetonha que rroehe tti ejemplo jianha inchin ejemplo Diótfrefes, jaha rroehe joxon tti ejemplo jian. Tti chojni que nchehe jian, mé chojni Dios, pero tti chojni que nchehe jianha, chojni mé xa chonxinha na Dios.

Tti jian ejemplo que joinchehe Demetrio

¹² Cainxin chojni nichja na jian de ixin Demetrio, co tti jehe nchehe xago que jehe Demetrio seguro ditticaon Jesucristo. Janha na cai chonxin na ixin quexén nchehe jehe Demetrio, co jaha ra noha ra que janha na nichja na tti ndoa.

Joexin joajné Juan

¹³ Janha rrichonda atto tsje tti rrondatehe, pero rinaoha sinttaha conixin ndajni co lapi

¹⁴ ixin janha rinaho sicon jaha daca, cottimeja tsjoan na janha co jaha.

¹⁵ Que tsonoha čhjoin ngain ansean. Cain xiamigoa na nntihi rroanha na joajna para ixin jaha. Nttatsanha ñao, jaha mismo chjehe joajna naná xiamigoa na.

Carta Que Dicjin Judas

Judas rroanha joajna ngain tti chojni que ditticaon Dios

¹ Janha Judas na, janha ná ninchehe xé Jesucristo na, co janha xanchó Jacobo na. Cjin na carta jiji para cain jaha ra xo Dios Ndoá na vayaha ra para te ra chojni Ndo. Jaha ra tti chojni que jehe Ndo cjoenchjinha Ndo ixin jaha ra ditticaon ra Jesucristo.

² Dios anto tsiaconoaha jaha ra, co rrochjá ra tti çhjoin que tsonohe ansean ra cain ra, co sinoa ra icha co icha.

Tti chojni que tjago cosa que jeha ndoa
(2 Pedro 2.1-17)

³ Hermanos, janha anto joiçaxanho de rrocjinha ra are saho de ixin quehe rroçho tti vida naroaxin que ján na chonda na. Pero hasta tti jai nchoe janha chonda que rricjinha ra carta jiji, para rrinttatsanha ñao ra que çonhi chojni sinttaoanha ra oje cosa de ixin tti jian joajné Jesucristo. Dios rroanha joajna mé nacoa nttiha para ngain cain chojni que ditticaon jehe co mé donda para cainxin tiempo.

⁴ Jamé rrrindattjo ra ixin tsje chojni jianha otenchecoehne na icha chojni cosa que jeha ndoa. Jehe na ndaço na ixin Dios anto jian nganji ján na, mexinxin nchao sinchehe ni inchin rinao ni co çonhi castigo rrochonda ni, co ndaço na ixin ndoaha jí Dios, tti nacoaxinxon que ttetonha ján na, co ndaço na que jeha ndoa de ixin Jesucristo, tti chonda cain joachaxin para ixin ján na. Pero ngain tti jitaxin Palabré Dios, nttiha ndaço desde osé tiempo de ixin quehe castigo tequininxin cain chojni jianha mé.

⁵ Masqui jaha ra onoha ra cain jiji, pero janha rinaho sinttaçaxaon ra que ixin Dios, masqui jehe joantsjexin cain chojni Israel de nonttehe Egipto, pero después, jehe joichetján tti chojni que vitticaonha jehe.

⁶ Co tti cain ángel que joinaoha vitticaon Dios, cain ángel mé Dios coiaxinhí ngain infierno, tti lugar anto naxin xehe, co nttiha teçoaxin cadena para cainxin tiempo hasta tsija tti nchanho que Dios sinchejuzgá.

⁷ Cai ciudad de Sodoma co ciudad de Gomorra co cain ciudad chian de nttiha cain chojni mé vitticaonha na Dios inchin vinttenchehe cain ángel que teaxinhí jai. Co jehe na icha je cosa jianha joinchehe na. Jehe na joiatte na çhihi iná na co jeha na xo xí na joiattea chó na para joinchehe na cosa jianha que tequininxinha ngain cuerpoe na. Cain chojni mé che na conixin çohi de are maho, co mé ná ejemplo para cainxin chojni que nchehe jianha rrochonxin na ixin çonhi tiempo tsjexin rroche na ngain çohi.

⁸ Pero masqui jamé, jai ça te chojni jianha co jehe nimé ni nttacoanha ra tti jeha ndoa, co chojni jiji tonoeha na ixin tenchehe na cosa jianha. Mexinxin conixin cuerpoe na nchexin na cosa jianha, co ditticaonha na joachaxin que chonda Cristo, co nichja na feo de ixin tti chonda icha joachaxin que jehe na.

⁹ Ni tti arcángel Miguel, are jehe co inchínji coetoxin na cuerpoe Moisés de ixin quexehé tti chonda joachaxin ngain cuerpo mé, ni are mé jehe arcángel mé ndaçoaha feo de ixin quehe tsonhe inchínji, sino que jeha ndaço ngain inchínji: "Dios tti sinttasattaha jaha."

¹⁰ Pero cain chojni jianha tehe, jehe na nichja na feo de ixin cosa que jehe na chonxinha na. Co cain cosa que chonxin na ttinxinha na jian tti chonxin na, mé inchin chonxin coxigo que chondaha joarrixaon. Co jehe na nchehe na jamé para ndanchetjanxin na almé na jeha na.

¹¹ ¡Atto tangui tsonhe chojni mé! ixin jehe na nchehe na jianha inchin joinchehe Caín. Co ixin jehe na rinao na sacha na tomi, mexinxin vaçhienda na de tti nttiha nao inchin conhe Balaam. Co inchin Dios joinchetján Coré tti joinaoha vitticaon ngain Dios, cai Dios sinchetján chojni mé.

¹² Cain tti nchehe chojni jianha jiji ná joasoaxin para ixin jaha ra are jinttecoho ra na ngaxinhí nihngo. Nttiha jehe na jine na co dihi na hasta tti içhoaha co tjanogaxin na co çonhi respeto chonda na ngaxinhí nttiha. Co jehe na inchin tti ttingaria coleco pero que dicao cuidado jeha de ixin jehe. Co jehe na inchin tti ttjoi que chondaha çhin, jeha çhinto sadicao ttjoi mé. Jehe na inchin tti nttá que danjoha ttotchjoin. Co nttá mé rroçho que ndadixema nttá jian co digaçhjengui nttá conixin cainxin noehe nttá.

¹³ Chojni jiji inchin tti olé ndachaon que ttiaho caxineno ngandehé nda, mé tti joasoaxin que jehe na nchehe na. Co jehe na inchin tti conotse que ndadinchetján direcioen. Chojni jiji tti ndaço Dios, que jehe na tsji na ngain infierno tti anto naxin xehe co çonhi tiempo saçhjexin na de nttiha.

¹⁴ Cai Enoc, ná tti cjoí xanhtjen de ngain Adán, jehe nichja de ixin jihi cai ixin Dios chjé joachaxin are jehe ndačho: “Janha vicon jehe tti chonda cainxin joachaxin joí conixin anto tsje miles de ángel

¹⁵ co sinchejuzguehe cain chojni co sinchecondená cain chojni jianha de ixin cainxin cosa jianha que nchehe na, co de ixin cainxin palabra jianha que jehe na nichja na de ixin Dios.”

¹⁶ Jehe na nchešoxinhi na tjanguihi na iná chojni, co jehe na nchešoxinhi na ttequin na cuentoe iná chojni, co jehó ttjé na tti nchešoxinhi cuerpoe na. Jehe na nichja na palabra orgulloso, co nichja na jian de ixin canxion chojni pero jehó para que chojni mé sinchehe jian ngain jehe na.

Tti vitonhe chojni que ditticaon Jesucristo

¹⁷ Pero jaha ra, hermanos, šaxaon ra que desde are saho ondattjo ra cain representanté Jesucristo:

¹⁸ “Ngain tiempo que ochian tsí Jesucristo iná, sintte chojni que tsjanao na cosa de Dios co sinchehe na cosa jianha inchin jehe na rrošaxaon na.”

¹⁹ Co cain chojni jihi tti ttjé pleito co nchešoxinhi na nchehe na cain cosa jianha que jí ngain mundo jihi, co chojni jihi coha Espiritu Santo de Dios ngain na.

²⁰ Pero jaha ra, hermanos, dintte ra soji ngain tti jian que jaha ra ditticaon ra. Nchecoanxinhi ra Dios conixin joachaxín Espiritu Santo.

²¹ Dintte ra čhjoin ngain vidá ra inchin rinao Dios co chonhe ra tti nchanho que Jesucristo rrochjá na tti iná vida naroaxin que šonhi tiempo tsjexin. Co jehe rrochjá na vida mé ixin jehe anto ttiaconoa na.

²² Ncheguitticaon ra tti chojni que chondaha seguro ixin Cristo rrochjá na vida jihi.

²³ Ttjenguijna ra cain chojni mé para que jehe na rrocheha na ngain šohi. Co ttiaconoehe ra icha chojni cai, pero ttijho ra cuidado de ncheha ra tti jianha que jehe na tenchehe na ngain vidé na.

Nttihi joexinxin joajné Judas

²⁴⁻²⁵ Tti nacoaxinxon Dios chonxin cainxin cosa, co jehe tti ttjenguijna na ján na para šonhi castigo rrochonda na de cain cosa jianha que jointtoho na. Co jehe mé tti chonda joachaxin para senda jaha ra para que šonhi cosa jianha sinchehe ra, co para que are tsonchienne ra ngattoxon con jehe šonhi jianha rrochonda ra co anto rrochaha ra. Co de ngain nombré Jesucristo rrondačo na ixin Dios jiquininxin tsosayehe co jehe jiquininxin cain joachaxin desde are saho co jai co para cainxin tiempo. Amén.

Tti Vicononxini Juan

Tti joinchenohe Jesucristo Juan

¹ Jihi tti Dios joinchenohe Jesucristo, para que Jesucristo joinchenohe cain chojni que tenchehe xé cain tti chonda que siconhe otoi. Co Jesucristo rroanha ná ángel de jehe para joinchenohe Juan, xinchehe xé jehe, cain jihi.

² Co janha Juan na ndachjan nao cainxin tti vicononxinna, co janha tti ndachjan ixin joajné Dios que Jesucristo joinchese gurá, joajna mé ján ndoa joajna.

³ Anto chjoin para ixin tti chojni que tsjehe xón jihi; co anto chjoin para ixin cain tti chojni que ttinhi joajna jihi que joixin de ngain Dios, co nchehe na caso cain tti jitaxin ngain xón jihi, ixin ochiaon jói tiempo are cainxin tti jitaxin nttihi siconhe.

Juan rroanha joajna ngain yáto nihngo

⁴ Janha Juan rricjin na joajna jihi para nganji ra xo ditticaon ra Jesucristo ngain nonttehe Asia. Dayehe ra tti jian co tti chjoin que tonohé ansean ra, ixin cayoi mé ttixin de ngain Dios, tti ttjen jai, tti vehe are saho, co tti tsí iná; co cai de tti yáto espíritu que te nttiha ngaca lugar tti ttjen Dios dayehe ra cayoi joajna jihi;

⁵ co cayoi joajna jihi cai ttixin de ngain Jesucristo, tti testigoe Dios que nichja nao, co jehe tti saho xechon, co jai jehe tti chonda joachaxin para ngain cain xí que ttetonha ngataha nontte jihi. Co jehe Cristo anto rinao na ján na co ojointtaroa na conixin jni que jehe cointtji para ixin cain cosa jianha que ján na jointtoho na.

⁶ Co jehe ochjá na joachaxin de tsetonha na conixin jehe co de sontte na dané Dios, Ndodé jehe. ¡Jehe Jesucristo jiquininxin tosayehe co cainxin joachaxin para cainxin tiempo! Amén.

⁷ ¡Tsjexin ra, Cristo tsí ngacjan ttjoi! Cainxin chojni sicon na mé hasta cai tti cjoaya ngain jehe Cristo. Co chojni de cain rajna de ngoixin mundo rrotsjanga na are sicon na mé. Ján, jañá siconhe.

⁸ Cristo, tti chonda cain joachaxin, tti jí jai, tti vehe desde are saho, co tti tsí iná, mé jehe ndačo: “Janha tti icha saho varichon de cainxin cosa co janha sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra.”

Are Cristo xago ngain Juan

⁹ Janha Juan, ná hermano de jaha ra de ngain Cristo, co janha rridetan tangui cai inchin jaha ra; co janha chonda parte ngain tti ttetonha Dios inchin jaha ra; co janha cai tonona chjoin de ixin tti paciencia que Cristo chjá na. Janha viaxinna ngain isla que dinhi Patmos ixin ndattjan chojni joajné Dios que Jesucristo joinchese gurá.

¹⁰ Co ná nchanho domingo jói joachaxin Espíritu Santo nganji na janha, co coian anto sén noton na inchin ná tté chojni, que mé inchin are toyao ná trompeta.

¹¹ Co chojni mé ndachjenji na:

—Janha tti icha saho varichon de cainxin cosa, co janha sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra. Jaha cjin ngain ná libro tti rridicon jaxon, co rroanha cain mé ngain tti chojni que ditticaon na na janha ngain tti yáto nihngo que te ngain regioen Asia; jihi rrocho tti ngain nihngo Efeso, Esmirna, Pérgamo, Tiatura, Sardis, Filadelfia, co ngain Laodicea.

¹² Janha ngaria tsjá para vicon quensen jinichjahna. Co are janha jointtaha mé, janha vicon yáto candelero de oro.

¹³ Co ngayé tti yáto candelero mé janha vicon ná tti inchin xenhe ná xí. Co jehe jingá ná lonto jini que jicaxin hasta ngataha nontte, co jittedonga ná cinturón de oro ngain pechoe.

¹⁴ Co Xajá anto roa Xa, inchin chjon roa, o sea inchin chintta ngataha jnanchaha. Co jmacon Xá Xohi teche.

¹⁵ Rotté conguxima inchin chia que dinhi bronce que xottexin ngain Xohi, co digoan chia pulido. Co tté anto soji inchin ruido que nchexjian jinda de tsje río.

¹⁶ Ngá rá lado jian jichonda yáto conotse, co de ngain rroha vačhexin ná espada anto yao que chonda filo de yoixin lado. Co ngá con jitungúxin inchin nchanho are anto soa.

¹⁷ Are janha vicon mé, joaritsinga ngaca rotté Xá ndavenhe na. Pero jehe coín rá lado jian ngataha na, co ndachjenji na:

—Xaonha jaha, ixin janha tti icha saho varichon de cainxin cosa, co janha tti sarihi are cainxin cosa ndatsjexin.

¹⁸ Janha tti rrichon jai. Masqui venhe na, pero jai rrichon para cainxin tiempo. Janha chonda joachaxin ngain tti ndadenhe ni co ngain lugar tti ttji cain chojni que ndadenhe.

¹⁹ Mexinxin cjin tti jaha vicon, tti jitonhe jai co tti siconhe después.

²⁰ Janhi rrocho tti yáto conotse que jaha vicon ngain rana lado jian na, co tti yáto candelero de oro: tti yáto conotse rrocho tti dicao joajna ngain tti yáto nihngo. Co tti yáto candelero rrocho tti yáto nihngo.

2

Ntthi tsexinxin joajna para tti yáto nihngo: Joajna para ngain nihngo Efeso

¹ 'Cjin joajna jihí ngain jehe tti dicao joajné Dios ngain nihngo que jí ngain ciudad de Efeso: "Janhi ndacho jehe tti chonda tti yáto conotse ngá rá jian co tti rridehe ngayé tti yáto candelero de oro:

² Janha nona cain tti jaha ra nchehe ra co janha chonxin ixin anto soji nchehe ra xá ra, co ixin chonda ra paciencia, co ixin dittoaxinha ra que sintte chojni jianha ngayaha ra. Co janha nona ixin vaquehe ra prueba tti chojni que ndacho ixin jehe na representantena na janha, pero ndoaha, co jaha ra vatsoan ra ixin jehe na ncheyaxon na.

³ Anto chonda ra paciencia, vetan ra tangui co anto joinchehe ra xa para ixin janha, co masqui jamé, xonhi tiempo goan ra desanimado.

⁴ Pero janha chonda ná cosa nchaoha que tenchehe ra jaha ra: que ixin irinaoha ni ra jai inchin are nacoexinxon ra vitticaon ni ra.

⁵ Mexinxin xaxaon ra que xén vintte ra are nacoexinxon ra vitticaon ni ra co ttenoxinhi ra vidá ra co nchehe ra inchin vanchehe ra are mé. Si nahi, janha toin saso nganji ra co sinttjianxin ningoa ra de tti jí ningo, pero si tsentoxinhi ra vidá ra isinttjianha ningo.

⁶ Pero masqui jamé, anto nchao ixin jaha ra ningaconhe ra tti nchehe chojni nicolaítas, ixin janha cai ningacoan tti nchehe chojni mé.

⁷ Jaha ra que ttinxin ra jian, ttinhi ra tti ndacho Espíritu Santo ngain nihngo tehe: Tti chojni que tsixinhi de sincheha cosa jianha, janha rrochjaha joachaxin para sine na tti ttotchjoin de ngain ntatotchjoin que danjo vida, que nttá mé jí nnta ngain huerté Dios."

Joajna para ngain nihngo Esmirna

⁸ 'Co cjin joajna jihí ngain jehe tti dicao joajné Dios ngain nihngo que jí ngain ciudad de Esmirna: "Janhi ndacho jehe tti icha saho vehe de cainxin cosa, tti sehe are cainxin cosa ndatsjexin, co jehe tti ndavenhe co cjan jichon jai:

⁹ Janha nona cain tti nchehe ra, co chonxin cain tti tangui que tedetan ra co nona ixin anto noa ra de ngain cosa de ngataha nontte jihí, pero masqui jamé, anto rico ra de ngain Dios. Co janha nona ixin chojni judío que ditticaonha nganji na janha, chojni mé nichja jianha de ixin jaha ra, pero chojni mé chojni Satanás.

¹⁰ Jaha ra xaonha ra de cain cosa tangui que sattohe ra, ixin inchínji tsixinhi canxion de jaha ra ngain cárcel para que cainxin ra satto ra prueba. Co chonda que tangui tsonha ra inchin tté nchanho. Pero jaha ra nchehe ra sigue ditticaon ra Dios hasta que ndasene ra co janha rrochjaha ra iná vida naroaxin inchin ná premio para ixin jaha ra.

¹¹ Jaha ra que ttinxin ra jian, ttinhi ra tti ndacho Espíritu Santo ngain nihngo tehe: Tti chojni que tsixinhi de sincheha cosa jianha, xonhi tsonhe chojni mé are icha chojni ndasene yoxin nttiha."

Joajna para ngain nihngo Pérgamo

¹² 'Co cjin joajna jihí ngain jehe tti dicao joajné Dios ngain nihngo que jí ngain ciudad de Pérgamo: "Janhi ndacho jehe tti jichonda espada anto yao que chonda filo de yoixin lado:

¹³ Janha nona cain tti tenchehe ra co nona que ixin jaha ra te ra ngain lugar tti ttetonha Satanás. Pero masqui jamé, jaha ra cain tiempo jian ditticaon ni ra. Co hasta cointtoeha ra de vitticaon ni ra ni ngain tti tiempo que Antipas, tti testigona que vitticaon na janha cainxin tiempo, nagoenxon na ngayaha ra nttiha ngain lugar tti jí Satanás.

¹⁴ Pero janha chonda canxion cosa nchaoha que tenchehe ra jaha ra: que ixin nttiha ngain ciudad de Pérgamo chonda ra canxion chojni que nchehe na inchin joinchehe Balaam, tti joinchecoeha Balac que xén para joinchejianha chojni Israel ngattoxon con Dios ixin joine na cosa que tosayexin ídolo co ixin vancheyehe na iná nchí que jeha nchíchihí na.

¹⁵ Co cai nchaoha ixin nttiha ngayaha ra te canxion chojni que nchehe inchin chojni nicolaítas, co tti nchehe na, mé tti janha ningacoan.

¹⁶ Mexinxin ttenoxinhi ra tti tenchehe ra, ixin si nahi, janha saso daca nganji ra co tsetoquinha chojni mé conixin tti espada que jidachjexin de rroha na janha.

¹⁷ Jaha ra que ttinxin ra jian, ttinhi ra tti ndacho Espíritu Santo ngain nihngo tehe: Tti chojni que tsixinhi de sincheha cosa jianha, janha rrochjaha chojni mé joachaxin para sine tti maná que jima jai. Co rrochjaha chojni mé ná xo roa, co nganito xo mé setaxin ná nombre naroaxin para ixin chojni mé que xonhi chojni chonxin nombre mé sino que jeha tti chojni que sayé xo mé."

Joajna para ngain nihngo Tiatira

¹⁸ Co cjin joajna jìhi ngain jehe tti dicao joajné Dios ngain nihngo que jí ngain ciudad de Tiatira: “Janhi ndačo jehe tti Xenhe Dios, tti jiche inchin xohi ngain jmacon, co rotté inchin chia que dinhi bronce que digoan pulido:

¹⁹ Janha nona cain tti nchehe ra co chonxin ixin anto rinao ni ra janha, co ixin anto ditticaon ni ra janha, co ixin anto tenchehe ra xa para ixin janha, co ixin chonda ra paciencia. Co janha nona que jai jaha ra icha tsje tenchehe ra que are nacoexinxon ra vitticaon ni ra.

²⁰ Pero janha chonda ná cosa nchaoha que tenchehe ra jaha ra: que ixin dittoaxin ra que dehe ngayaha ra ná nchí que nchehe ncha inchin vanchehe nchí que vinhi Jezabel. Janhi nchehe nchí jìhi; ndačo ncha ixin nichja ncha joajna que dayé ncha de ngain Dios, pero jehe ncha jehocheyehé ncha chojni que nchehe xana janha para que jehe na tsontaonxin na iná nchí que jeha nchíchihi na co jine na cosa que tosayexin ídolo.

²¹ Janha ochjaha ncha tiempo para que jehe ncha tsentoxinhi ncha tti jinchehe ncha, pero jehe ncha xa choha ncha. Co xa ttinttoeha ncha de danjo ncha cuerpoe ncha ngain tsje xí.

²² Co jai janha sinttaha que jehe ncha tsonihi ncha co setsingataha ncha nontte, co cai cainxin chojni que nchehe inchin jehe ncha setan na tangui si jehe na tsinttoeha na de tti tenchehe na.

²³ Co janha nasoenxon cain chojni que ocoangui na ditticaon na cain tti ndačo ncha. Jamé cainxin chojni ngain cainxin nihngo tsonohe na ixin janha chonxin hasta tti ngain joarrixaoen cada chojni co ngain ansén na. Co janha rrochjaha ra cada ra inchin tti jaha ra joinchehe ra.

²⁴ Pero icha ra que te ra nttiha ngain ciudad de Tiatira, jaha ra xo ncheha ra tti nchehe nchí mé, ni xonhi tiempo joatsoan ra tti jehe na ncheguinhí na tti secreto anto jima de Satanás, janha rrindattjo ra que irrochjaha ra iná cosa tangui hasta que jehochonda ra.

²⁵ Pero ttenchjinha ra tti jian que jaha ra ochonda ra jai hasta que janha sihi iná.

²⁶ Cain tti chojni que tsixinhi de sincheha cosa jianha co tti nisinchehe sigue sinchehe na inchin janha rinao hasta que tsjexin mundo, janha rrochjaha cain chojni mé joachaxin de tsetonhe na cain nación,

²⁷ jañá inchin Ndodana chjana Ndo joachaxin janha. Co jehe na tsetonhe na cain nación conixin ná nttacotto de chia. Co chojni nación que sitticaonha sicaonxin nttacotto mé hasta rrochjeca cuerpoe como si rocjoi ná chi.

²⁸ Co cai janha rrochjaha chojni mé tti conotse que nchengasán are ndoyo.

²⁹ Jaha ra que ttinxin ra jian, ttinhi ra tti ndačo Espíritu Santo ngain nihngo tehe.”

3*Joajna para ngain nihngo Sardis*

¹ Co cjin joajna jìhi ngain jehe tti dicao joajné Dios ngain nihngo que jí ngain ciudad de Sardis: “Janhi ndačo jehe tti chonda tti yáto espiritue Dios co tti yáto conotse: Janha nona cain tti nchehe ra co nona ixin jai jaha ra ondadiguenhe ra de ngain espiritua ra masqui chojni ndačo na ixin xa techon ra.

² Mexinxin, xingamaha ra, co chjehe ra fuerza cain cosa que xa jí masqui cosa mé ondajidenhe, ixin janha vicon que tti nchehe ra xa jeha jian ngattoxon con Dios de janha.

³ Mexinxin xaxaon ra tti coangui ra, co nchehe ra sigue mé jai, co ttentoxinhi ra tti tenchehe ra jai. Si sincheha ra jamé, janha saso contra nganji ra xá ná tti chehe sin que tsonoaha ra quesa o quehe hora.

⁴ Masqui nchaoha tenchehe ra canxion ra, pero cai nttiha ngayaha ra ngain ciudad de Sardis te canxion chojni que xonhi quitta dichjé na lonttoe na; mé rročo xonhi cosa jianha rridinchehe na. Co jehe nimé ni sacji nganji na janha conixin lonttoe na roa, ixin jamé tequininxin na.

⁵ Cain tti chojni que tsixinhi de sincheha cosa jianha, chojni mé tti sinttengá lonttoe roa, co janha tsonxantteha nombré na de ngain xón tti tetaxin cain chojni que chonda iná vida naroaxin. Co janha rrondačjan ixin chonxin chojni mé ngattoxon con Ndodana co ngattoxon con cain ángel que te nttiha.

⁶ Jaha ra que ttinxin ra jian, ttinhi ra tti ndačo Espíritu Santo ngain nihngo tehe.”

Joajna para ngain nihngo Filadelfia

⁷ Co cjin joajna jìhi ngain jehe tti dicao joajné Dios ngain nihngo que jí ngain ciudad de Filadelfia: “Janhi ndačo jehe tti anto jian co tti nichja tti ndoa, co tti chonda joachaxin de

rey David que are jehe danttjé ná puerta, ni ná chojni čhoha ttejé puerta, co are jehe ttejé ná puerta ni ná chojni čhoha danttjé puerta.

⁸Janha nona cain tti nchehe ra. Janha coín nganji ra ná puerta jixangué co ni ná chojni čhoha tsejé puerta, ixin masqui jaha ra chondaha ra tsje fuerza, jaha ra joinchehe ra caso ngain joajnana janha co xonhi tiempo ndache ra icha chojni ixin chonxinha ni ra.

⁹Mexinxin janha rrorroanha nganji ra tti chojni que nchehe inchin rinao Satanás, chojni mé judío na pero ditticaonha na nganji na janha inchin jiquininxin chojni judío de ngain ansén na. Janha rrorroanha chojni mé nganji ra co tsetoan na que sinttettoxin nttajochijhi na ngaca rotteha ra para que tsonohe na que janha ján rinaho ra.

¹⁰Jaha ra chonda ra pacienciá inchin janha coetonha ra, co mexinxin janha tsjenguijna ra para que xonhi tsonha ra are tsí tiempo are Dios saquehe prueba ngain cain chojni ngoixin mundo jiji.

¹¹Janha sihi toin. Jaha ra nchehe ra sigue tti jian que jaha ra tenchehe ra para que xonhi chojni santsjaha ra premiao ra que sayehe ra.

¹²Cain tti chojni que tsixinhi de sincheha cosa jianha, janha rrondachjan que chojni mé sintte na inchin columna que jiquehe ningoe Dios de janha, co jehe nimé xonhi tiempo sachjexin na de nttiha. Co nganito jehe na janha tsentaxin nombré Dios, co nombré tti ciudadé Dios, rrocho tti Jerusalén naroaxin que tsixin de ngajni tti ttjen Dios. Co janha tsentaxin nganito jehe na tti nombrena naroaxin.

¹³Jaha ra que ttinxin ra jian, ttinhi ra tti ndačo Espíritu Santo ngain nihngo tehe.”

Joajna para ngain nihngo Laodicea

¹⁴Co cjin joajna jiji ngain jehe tti dicao joajné Dios ngain nihngo que jí ngain ciudad de Laodicea: “Janhi ndačo jehe tti mero ndoa, tti jian testigoe Dios que nichja ndoa, co tti vehe icha saho de cain tti joinchechjan Dios:

¹⁵Janha nona cain tti nchehe ra. Co nona ixin jaha ra inchin jinda que jeha quin ni jeha soa. Mé rrocho que rinaoha ra rrocjan ra inchin chojni que ditticaonha nganji na janha ni inchin chojni que jian ditticaon nganji na janha. ¡icha nchao si ditticaon ni ra o ditticaonha ni ra!

¹⁶Pero ixin jaha ra jeha inchin jinda yáso co jeha quin ra ni soa ra, janha tsoncjan jaha ra de ngain rroha na janha.

¹⁷Ixin jaha ra ndačo ra ixin anto rico ra co ixin de cain cosa, anto jian te ra co xonhi nchetján ra. Pero jaha ra tonoaha ra que techinhi ra co tangui tonoha ra ngain espiritua ra, cai noa ra, chejo ra co tolocho ra de ngain espiritua ra.

¹⁸Mexinxin janha rrindattjo ra que ttehna ra de nganji na janha oro jian que dixotte ngain xohi co que ixonhi jinche jiyá oro; jamé para jaha ra ndoa sintte ra rico. Co ttehna ra lontto roa de nganji na janha para sinttengaha ra co rroxanotaon tti joasoaxin que chonda ra jai. Co ttehna ra xoan de nganji na janha para sinttjinguí jmacon ra para que nchao sicon ra.

¹⁹Janha nttasattá co nttacastigá cain chojni que janha rinaho. Mexinxin chonda ra que ttentoxinhi ra vidá ra hasta que anto sinao ra sinchehe ra tti janha rritettonha ra.

²⁰Tsjexinxin ra, janha rrindanguia puerté nchia para rrinichjá chojni. Si čhonja chojni tsinhi ttana co santtjé na nchiandoha na, janha sixinhi co sinequinha chojni mé, co jehe sine nganji na janha.

²¹Cain tti chojni que tsixinhi de sincheha cosa jianha, chojni mé nttiha sariquinha tti janha rrihi rritettonha, inchin janha coixinna co joacha tti rritettonha čhica Nododana.

²²Jaha ra que ttinxin ra jian, ttinhi ra tti ndačo Espíritu Santo ngain nihngo tehe.”

4

Janhi tocoanxin ngajni tti ttjen Dios

¹Después de cain jiji, janha tsjá iná co vicon ná puerta jixangué ngajni co tti tté Jesucristo que nichjahna icha saho que inchin tté ná trompeta are toyao, mé ndachjenji na janha:

—Tani nttihi co tsjagoha cain cosa que chonda que siconhe después de cain jiji.

²Ngain rato mé jói Espíritu Santo nganji na janha conixin anto tsje joachaxin, co janha vicon ná nttaxintaon importante jí nttiha ngajni, co ngataha nttaxintaon mé tajitaha xá figuré ná tti xí.

³Co tti jitaha nttaxintaon mé ngá con jehe anto jitonguixin inchin ná xo fino que dinhi jaspe o xo que dinhi cornalina. Co ngandanji nttaxintaon mé jí ná conchecha que jitonguixin inchin tti xo que dinhi esmeralda.

⁴Co ngandanji nttaxintaon mé janha vicon iveinticuatro nttaxintaon, co nttiha tetaha veinticuatro nittettonha que tengá na lontto roa co techjinga na corona de oro.

⁵ Co de ngain tti nttaxintaon saho que janha vicon, de nttiha ttedachjexin xoi rayo co icha ruido co jidatte. Co nttiha ngain nttaxintaon mé teche yáto candil de xohi, que mé tti yáto espíritu Dios.

⁶ Co nttiha ngaca nttaxintaon mé jí ná cosa inchin ndachaon que nchao dicondoxin ni inchin xoxao.

Co ngandanji nttaxintaon mé jí nó cosa que jichon. Co cosa mé ngoixin ngama chonda jmacon de ngajinxin co notonxin.

⁷ Tti saho de tti canoi cosa jiji jí inchin ná coleón. Co tti yoxin jí inchin ná coxintá. Co tti ninxin jichonda con inchin ngá con ná xí. Co tti nonxin jí inchin ná coaguila que jitjaganga.

⁸ Canoi cosa que techon mé techonda incjaon nenechán cada. Co ngoixin ngama co ngaxinhi techonda jmacon; de tti co de nchanho joxon tendaço:

Santo, santo, santo,

Dios, soixin que chonda cainxin joachaxin,

soixin tti Dios que varih desde are saho, co rrihi jai, co soixin tti sihi iná.

⁹ Co cada nttiha que jehe tti canoi cosa que techon nchesayehe co danjo gracias ngain jehe tti jitaha nttaxintaon icha importante, tti jichon para cainxin tiempo,

¹⁰ cada nttiha mé tti veinticuatro nittetonha dinttettoxin nttajochjihí na ngain jehe tti jichon para cainxin tiempo, co ttín na coroné na nttiha ngaca nttaxintaon mé, co ndaço na:

¹¹ Soixin tti Dios na na janha na, soixin tti jiquininxin

cainxin gloria, co jiquininxin tosayaha co cainxin joachaxin;

ixin soixin tti joinchechjian cainxin cosa,

co ixin soixin jamé joinao, mé texin co conchjianxin cainxin cosa.

5

Xón co Colecoe Dios

¹ Cottimeja janha vicon ixin jehe tti jitaha nttaxintaon mé jiyá xón ngá rá lado jian. Xón mé jixea inchin ná rollo, co jitaxin de ngaxinhi xón mé co de ndojaxin, co jixexin xón conixin yáto sello.

² Co vicon janha ná ángel que chonda tsje joachaxin que jidanchiangui anto sén co jindaço:

—¿Quensen chonda joachaxin de santté xón jiji co tsinchje cain sello que jiyá xón?

³ Pero ni de nttiha ngajni, ni nttihi ngataha nontte, ni de ngangui nontte coha ná chojni que nchao rrogantté xón mé, ni para rrotsjehe na ngain xón.

⁴ Co janha anto tsjanga ixin xa xonhi quensen tsoxiré xón co tsjao xón, ni para rrotsjehe xón.

⁵ Cottimeja ná de tti veinticuatro nittetonha ndachjenji na janha:

—Jaha itsjangaha icha, ixin Coleón que joixin de ngain grupoe Judá de chojni Israel, tti mé cjoí razé rey David, mé ojoacha para que jehe nchao santté xón jiji co tsinchje tti yáto sello que jiyá xón.

⁶ Cottimeja ngaca tti nttaxintaon icha importante co ngayé jehe tti nó cosa que techon, co ngayé tti veinticuatro nittetonha, janha vicon ná Coleco tatingattjen va nttiha masqui dicon ni ixin digoén na va. Co jichonda va yáto ntehe va co yáto jmacon va. Co tti yáto jmacon va mé rroço tti yáto espíritu que Dios rroanha ngoixin ngataha nontte.

⁷ Jehe Coleco mé cjoí va co coá va xón que jiyá ngá rá lado jian de jehe tti jitaha nttaxintaon icha importante nttiha.

⁸ Are jehe Coleco coá va xón mé, tti canoi cosa que techon co tti veinticuatro nittetonha vinttettoxin nttajochjihí na ngattoxon con Coleco mé. Cada nittetonha mé techonda na naná arpa co teyá na naná vaso de oro tecaon tsjoca, co mé rroço cain tti nchecoanxin cain chojni Dios.

⁹ Co tetsje na ná himno naroaxin que ndaço janhi:

Soixin jiquininxin de sayehe xón yá co tsinchje cain sello que jiyá xón;

ixin soixin onagoenxon na ngataha nontte, co jnia cjoengaxin hna

cain tti jianha que nchehe chojni de cain raza, chojni de cain nguigoa, chojni de cain rajna, co chojni de cain nación.

¹⁰ Soixin ochjana ni ra joachaxin de tsetonha na conixin soixin co de sintte na dané Dios de ján na.

Co ochjana ni ra joachaxin de tsetonha na ngataha nontte.

¹¹ Cottimeja tsjá iná co coian tté de anto tsje ángel que tate ngandanji nttaxintaon icha importante nttiha co ngandanji tti canio cosa que techon co ngandanji tti veinticuatro nittetonha que te nttiha. Nttiha te anto tsje millones de ángel.

¹² Co tendaĉo s n:

Tti Coleco que nagoenxon na ngataha nontte, co m  co jiġuininxin say  va cain joachaxin co cain cosa que j , co jehe va jiġuininxin say  va cain tti nohe Dios, co cain fuerza, co jehe va jiġuininxin tsosayehe va co tsocoanxinhi va.

¹³ Co cai cain cosa que Dios joinchechjian que te nttiha ngajni co nttihi ngataha nontte, co tti te ngangui nontte, co tti te ngain ndachaon, co cain cosa que j  coian tendaĉo janhi: Tti jitaha nttaxintaon co tti Coleco, cayoi m  tequininxin tsocoanxinhi co tsosayehe, co joachaxin jehe sehe para cainxin tiempo.

¹⁴ Co tti canoi cosa que techon nttiha tendaĉo:

—j n, jam  tsonhe!

Co tti veinticuatro nittetonha vinttettoxin na nttajochjihi na co joinchesayehe na jehe tti jichon para cainxin tiempo.

6

Tti y to sello que jiy  x n

¹ Cottimeja janha vicon que Colecoe Dios coinchje va saho sello que jiy  x n m , co ngain rato m  coian nichja n  de tti n  cosa que techon nttiha. Tt  jehe anto soji inchin are datte, co jehe cosa m  ndaĉo:

—j acoi co tsjehe!

² Janha tsj  co vicon n  conxin roa. Co tti jitaha va jiy  n  chijno. Co digay  n  corona ixin ojoacha, co sacjoi para joinchehe sigue joigacha icha.

³ Are Colecoe Dios coinchje va tti yoxin sello, janha coian nichja tti yoxin cosa que techon nttiha. Co jehe cosa m  ndaĉo:

—j acoi co tsjehe!

⁴ Co vachje n  conxin jatse. Co tti jitaha va vay  joachaxin de saqueha contento ans n chojni ngataha nontte para que jehe na tsexinhi na tseto na co nasoenxon ch  na. Co jehe tti jitaha conxin m  vay  n  espada anto jie.

⁵ Are Colecoe Dios coinchje va tti ninxin sello, janha coian nichja tti ninxin cosa que techon nttiha. Co jehe cosa m  ndaĉo:

—j acoi co tsjehe!

Janha tsj  co vicon n  conxin ttie. Co tti jitaha va jiy  n  balanza ng  r .

⁶ Co ngay  tti canoi cosa que techon, nttiha janha coian tt  Dios que ndaĉo:

—Jeho nacoa kilo de trigo rentte tti dacha ni ngain n  nchanho. Co jam  rentte n  kilo de cebada cai. Pero nchexincoaha ra aceite ni vino.

⁷ Are Colecoe Dios coinchje va tti nonxin sello, janha coian nichja tti nonxin cosa que techon nttiha. Co jehe cosa m  ndaĉo:

—j acoi co tsjehe!

⁸ Janha tsj  co vicon n  conxin sine. Co tti jitaha va dinhi Muerte. Co noton m  j i tti representant  lugar tti tji chojni ndadiguenhe. Co cayoi jehe na vay  na joachaxin para nadoenxon na n  cuarta parte de cain chojni ngoixin mundo conixin guerra, jintta, chin, co coxigo ĉhintto de ngataha nontte.

⁹ Are Colecoe Dios coinchje va tti naonxin sello, janha vicon ngangui altar que j  nttiha, cain alm  cain chojni que vintteguenhe ixin vandache na icha chojni tti jian joajn  Dios co ixin cjoj na jian testigo de joajna m .

¹⁰ Cain alm  chojni jihi tendaĉo s n:

—Dios, soixin tti jian co cain tiempo nchehe tti soixin ndaĉo,  quejanhi tiempo  a tsonĉhjanha para sinchejuzguehe co sinchecastig  tti chojni que nagoenxon na na janha na que te ngataha nontte?

¹¹ Cottimeja cain alm  chojni m  vay  na lontto roa co vitonhe na que  a sinchejogaha na v  nchion, hasta rroxetteja senhe cainxin chojni que chonda que ndasenhe inchin cain tti chojni que te nttiha, ixin jehe na  a tenchehe na  e Jesucristo.

¹² Are Colecoe Dios coinchje va tti incjaonxin sello, janha tsj  co vicon que anto soji coingui nontte. Co nchanho ndaconaxin xehe inchin lontto ttie, co conittjao ngoixin va ndacjan va inchin jni.

¹³ Co conotse que te ngajni vinttji va para ngataha nontte inchin are nttahigo dingongui nttattochoj n nttat  are anto soji tja ĉhintto.

¹⁴ Co ngajni ndavitj n inchin n  x n are xea x n. Co cain jna co cain isla coinguixin de tti te.

¹⁵ Cottimeja cain rey de ngataha nontte, conixin icha chojni importante co chojni rico, co xittetonha ngain xisoldado, co icha chojni que chonda joachaxin, co cainxin chojni que te

esclavo co cainxin chojni libre; cainxin chojni mé tavinttema na ngaxinhi cueva co ngayé ttjao ngain jna.

¹⁶ Co vinttendačo na ngain jna co ngain ttjao:

—Dinttji ra ngataha na janha na, co ttema ni ra de ngattoxon con tti jitaha nttaxintaon icha importante, co de ngain tti anto soji castigo que sanjo Colecoe Dios.

¹⁷ Ixin ojoí nchanho para castigo icha soji de cainxin castigo, ¿co quensen tsixinhi ngain castigo jihi?

7

Chojni Israel que Dios coinchiehe para vayé selloe

¹ Después de cain jihi, janha vicon nó ángel tatengattjen ngataha tti nó lado de ngataha nontte tti ttixin čhintto. Co tatequehe tti nó čhintto para que xonhi čhintto tsja ngataha nontte, ni ngataonhe ndachaon, ni ngataon ni ná nttá.

² Cai vicon iná ángel que joixin de tti čhinxin nchanho co jichonda selloe Dios que jichon. Jehe ángel jihi coyaotte soji tti nó ángel que vayé joachaxin para sinchenihi ngataha nontte co ngain ndachaon co ndačo:

³ —Ķa ncheniha ra nontte ni ndachaon ni cain nttá, hasta que janha na tsjexin tsín na selloe Dios ngain nttattjen cain ninchehe xé Dios de ján na.

⁴ Co janha coian ixin cain tti chojni que vayé selloe Dios ngain nttattjen cjoí ciento cuarenta y cuatro mil chojni de ngayé cain tti tteyó grupoe chojni Israel.

⁵ Tteyó mil de tti chojni que vayé sello cjoí de ngain grupoe Judá, tteyó mil na de ngain grupoe Rubén, tteyó mil na de ngain grupoe Gad,

⁶ tteyó mil na de ngain grupoe Aser, tteyó mil na de ngain grupoe Neftalí, tteyó mil na de ngain grupoe Manasés,

⁷ tteyó mil na de ngain grupoe Simeón, tteyó mil na de ngain grupoe Leví, tteyó mil na de ngain grupoe Isacar,

⁸ tteyó mil na de ngain grupoe Zabulón, tteyó mil na de ngain grupoe José, co itteyó mil na de ngain grupoe Benjamín.

Tti anto tsje chojni que tengá lontto roa

⁹ Después de cain jihi, janha tsjá co vicon anto tsje chojni de cainxin nación, co de cain raza, co de cain nguigoa co de cain rajna que jí ngataha nontte nttihi. Co cain nimé tatengattjen na nttiha ngaca nttaxintaon icha importante, co ngaca Colecoe Dios. Vintte anto tsje chojni mé que hasta ni ná chojni coixinha coequin na, co tengá na joxon lontto roa, co cain na teyá na cajne ngá rá na.

¹⁰ Cain na tetoyao na co tendáčo na:

Ján na chonda na iná vida naroaxin de ixin Dios tti ttjen ngataha nttaxintaon importante co de ixin Colecoe Dios.

¹¹ Co cainxin ángel de nttiha tatengattjen nttiha ngandanji tti veinticuatro nittetonha, co ngandanji tti nó cosa que techon cai. Co cain ángel mé vinttecjañantaha nontte ngaca nttaxintaon mé co joinchesayehe Dios.

¹² Cain ángel mé ndačo:

¡Amén! Para cainxin tiempo Dios de ján na jiquininxin tsocoanxinhi, jiquininxin nohe cainxin, co jiquininxin que chojni sanjo na gracias ngain, co jehe jiquininxin tsosayehe, co jiquininxin cain joachaxin co fuerza. Amén.

¹³ Cottimeja ná de tti venticuatro nittetonha mé joanchianguina janha co ndačo:

—¿Quensen cain chojni jihi que tengá lontto roa co de ttinó joixin na?

¹⁴ Janha ndattjan:

—Soixin noha.

Co jehe ndachjenji na:

—Cain chojni jihi tti ni anto tanguí conhe na co jehe cain niyá nijoincheroaxin lonttoe conixin jní tti Colecoe Dios.

¹⁵ Mexinxin jai jehe na te na ngandaxinhi Dios co nchesayehe na Dios de nchanho co de ttie ngain nchiandoha Dios. Co jehe Dios, tti retaha nttaxintaon yá, senda cain chojni yá.

¹⁶ Cain chojni yá isenha na jinta ni jinda, ni irrochjanha na ni tanguiha tsonohe na ngandaohé soa,

¹⁷ Ixin tti Colecoe Dios que jí ngaca nttaxintaon mé tti senda jehe na, inchin tti ttngaria coleco dicao cuidado de ixin coe, co jehe sicao va ngain tti jičhinxin jinda que danjo iná vida naroaxin. Co Dios tti sinchexema ndacon cain jehe na.

8

Tti yatoxin sello conixin tti oro que chexin tsjoca

¹ Are Colecoe Dios coinchje va tti yatoxin sello que jiyá xón mé, nttiha ngajni xonhi ruido vehe inchin rioho hora.

² Cottimeja janha vicon tti yáto ángel que tengattjen nttiha ngattoxon con Dios, co cain ángel mé vayé naná trompeta.

³ Cottimeja janha vicon iná ángel conixin ná chi de oro que chexin tsjoca, co joiguen-gattjen ángel nttiha ngaca altar. Co vayé ángel mé anto tsje tsjoca, para sanjo cain tsjoca mé conixin cain joatotsenhe ñaoe cain chojni Dios nttiha ngataha altar de oro que jí nttiha ngaca nttaxintaoen Dios.

⁴ Nchin de tsjoca mé conixin cain tti joatotsenhe ñaoe chojni Dios cjoinhi de ngá rá ángel mé para ngattoxon con Dios.

⁵ Cottimeja jehe ángel mé coá jehe chia que chexin tsjoca mé, co joinchecaon de xoittja que jí nttiha ngain altar mé co cjoa para ngataha nontte. Cottimeja coexinhi anto joatte, co anto vehe ruido, anto cjoa rayo, co soji coingui nontte.

Tti joiconhe are coyao trompeta

⁶ Cottimeja tti yáto ángel que teyá tti yáto trompeta ovintte listo para sanoa trompeta.

⁷ Tti saho ángel vanoa trompeta, co vania ttoni co xóhi que jittecjan jni. Cain mé vinttji para ngataha nontte co che ná tti ninxin parte de ngataha nontte, conixin ná tti ninxin parte de cain nttá, conixin ná tti ninxin parte de cain ca yoa.

⁸ Tti yoxin ángel vanoa trompeté, co joiguetsiangui ngangui ndachaon ná cosa inchin ná jna jie que jiche conixin xóhi. Co ná tti ninxin parte de ndachaon ndacjan nda jni.

⁹ Co ná tti ninxin parte de cain cosa que techon ngangui nda ndavenhe, co ná tti ninxin parte de cain barco que jí ngain nda ndaxantte.

¹⁰ Tti ninxin ángel vanoa trompeté, co ná conotse anto jie vetsingaxin va de ngajni, co jiche va conixin xóhi. Co vetsinga va ngain ná tti ninxin parte de cain río co cain tti techinxin jinda.

¹¹ Co conotse mé vinhi va Tsja co ná tti ninxin parte de cain jinda mé ndacontsja nda. Co anto tsje chojni ndavintteguenhe na ixin vihi na jinda mé, que anto ndacontsja.

¹² Tti nonxin ángel vanoa trompeté, co conihí ná tti ninxin parte de nchanho, co cai ná tti ninxin parte de conittjao, co cai ná tti ninxin parte de conotse. Mexinxin ná tti ninxin parte de cain cosa mé ndaconaxin xehe, co cain mé vanjoha xóí ngoixin ná tti ninxin parte de nchanho ni de ttie.

¹³ Cottimeja janha tsjá co coian jindačo ná ángel que jitjaganga hasta ngosine ngajni co nichja sén, co ndačo:

—¡Anto tanguí tsonhe cain chojni que te ngataha nontte are sanoa tti iní ángel trompeté!

9

¹ Are tti naonxin ángel vanoa trompeté, janha vicon ná conotse que xincanjinxin va de ngajni para ngataha nontte. Co conotse mé vayé va llavé tsaga anto nihnga.

² Cottimeja conotse mé vanttjé va jehe lugar mé co nttiha cjoinxin ná nchin anto jie inchin nchin que ttixin de ngain ná horno anto jie. Co nchin mé ndajoinchenaxin xehe nchanho co chintto.

³ Co de ngain nchin mé vachjexin anto tsje coxoali que cjoaganga va ngataon nontte. Co cain coxoali mé vayé va joachaxin inchin joachaxin que chonda conttanchia nttihi ngataha nontte.

⁴ Co vitonhe va que xonhi sinchehe va ngain cain ca que te ngataha nontte, ni ná cosa yoa, ni ngain ná nttá yoa, sino que jecho sinchenihí va cain tti chojni que chondaha marca de selloe Dios ngain nttattjen.

⁵ Pero coaha va joachaxin de nasoexon va chojni mé, sino que jecho sincheguetan va chojni mé tanguí cuerpoe ngoixin naho conittjao. Co tti anto tsín na mé inchin ttinxin ná chojni are nehe ná conttanchia.

⁶ Ngain cain nchanho mé chojni sinao na ndasenhe na, pero čhoha senhe na. Masqui jehe na anto sinao na ndasenhe na, pero čhoha ixin la muerte satsjixin de ngain na.

⁷ Jehe coxoali mé te va inchin conxin que te listo para guerra. Ngataha já va tetaha ná cosa que te inchin ná corona de oro, co ngá con va te inchin ngá con chojni.

⁸ Co xájá va inchin xájá nchí, co neno va te xá neno coleón.

⁹ Co ngoí cuerpoe va tengá ná cosa inchin chia, co ruido que nchechjian nenehe va are tjaganga va inchin ruido que nchechjian tsje carroe conxin are ttinga carro para ngain guerra.

¹⁰ Chonda va nttané va xá nttané conttanchia que chonda nchaha. Co nttiha ngain nttané va chondaxin va joachaxin para ncheninxin va chojni ngoixin naho conittjao.

¹¹ Cain coxoali mé chonda va ná tti ttetonha ngain va co jehe mé tti ángel de ngain tti tsaga anto nihnga; co jehe ángel jihi dinhi de ngain nguigoa hebreo Abadón, co ngain nguigoa griego dinhi ángel jihi Apolión, co cayoi nombre mé rrocho: tti nchexantte cain cosa.

¹² Ojoixin tti saho cosa anto tangui, pero xa ditján iyó cosa tangui.

¹³ Are tti ángel incjaonxin vanoa trompeté, janha coian ná tté ángel que vachjexin de ngayé tti nó ntehe altar de oro que jí nttiha ngattoxon con Dios.

¹⁴ Co jehe tté ángel mé ndacho ngain jehe tti incjaonxin ángel que jiyá trompeta:

—Tonxindanguehe tti nó ángel que techia te ngaca río Eufrates que anto jie.

¹⁵ Jamé xindanguehe jehe tti canoi ángel mé, para nagoenxon ná tti ninxin parte de cain chojni, ixin ángel mé ote listo para sinchehe jamé ngain hora mé, ngain nchanho mé, ngain conittjao mé, co ngain nano mé.

¹⁶ Janha coian quejanhi tsjexin xisoldadoe canoi ángel mé, co de tti xitetaha conxin, yó ciento de millón tsjexin xa.

¹⁷ Co jañá viconxin con janha cain conxin yá. Co xitetaha va, ngain pechoe xa tedicaoxin xa chia de ní color; jatse inchin xohi, co azul inchin ngajni, co sine inchin azufre. Co cain conxin mé techonda já va inchin já coleón, co de ngain rroha va tedachjexin xohi, co nchin, co azufre.

¹⁸ Tti ninxin parte de cain chojni ndavintteguenhe na de ixin jehe tti ní tipo de castigo que tedachjexin ngain rroha conxin, co castigo mé: xohi, co nchin, co azufre.

¹⁹ Ixin tti cjoayaxin cain conxin mé techonda va ngain rroha va co ngain nttané va. Nttané va chonda já xá conché, co, conixin nttané va mé goenxin va chojni.

²⁰ Pero tti ittoha chojni que xehe, tti nindavenha de ixin jehe chin jihi, nimé cointtoeha na de nchehe na cosa jianha que jehe na tenchehe na, ni cointtoeha na de nchesayehe na espíritu jianha, co cain ídolo de oro, de plata, de bronce, de xo, co de nttá. Co cain ídolo mé thoha dicon, ni ttinha, ni chjiha.

²¹ Ni cai cain chojni mé cointtoeha na de nadoenxon na chojni, ni de dantonga na chojni, ni de ncheyehe na iná nchí o iná xí, ni de ttehe na cosé iná chojni.

10

Angel conxin ná librochjan

¹ Cottimeja janha vicon iná ángel que chonda tsje joachaxin que jixincanjinxin de ngajni ngacjan ttjoi conixin ná conchecha ngataha já. Co ngá con ángel mé jitonguixian xá nchanho, co rotté inchin columna de xohi.

² Co ángel mé jiyá ná librochjan que jixangué. Co coín rotté lado jian ngataonhe ndachaon, co rotté lado cjon coín ngataha nontte.

³ Cottimeja ángel mé coyao sén inchin are soji tojiede ná coleón. Co are jehe coyao, yáto tti dattehe nichja conixin tté jehe mismo.

⁴ Co después de que yáto tti dattehe mé nichja, janha rroquentaxin cain palabra mé, pero coian tté Dios desde ngajni que ndachjenji na:

—Ttenchjinha cain jihi, co ndachoha tti ndacho tti yáto dattehe yá, co ttenxaxinha palabra yá.

⁵ Cottimeja jehe tti ángel que janha vicon tajangattjen de ngataonhe ndachaon co ngataha nontte, tsín rá lado jian para ngajni,

⁶ co joinchejurá de ixin tti jichon para cainxin tiempo, tti joinchechjan ngajni, nontte, ndachaon co cainxin cosa que jí ngain cain parte yá, co ángel mé ndacho:

—Itsonchjenha icha tiempo,

⁷ ixin are tsí tti nchanho que tti yatoxin ángel tsexinhi sanoa trompeté, are mé otsonhe tti anto jimao que xaxaon Dios desde are saho, inchin jehe ndacho ngain ninchehe xé, rrocho ngain cain profeta.

⁸ Tti tté Dios que janha coian joixin de ngajni, cjan nichja nganji na janha iná co ndacho:

—Jaha ttji co ta tti librochjan que jixangué que jiyá ángel jiha tti jingattjen desde ngataonhe ndachaon co ngataha nontte.

⁹ Cottimeja janha cjoí ngain ángel mé para joiganchiá librochjan mé co jehe ndachjenji na:

—Jenhe, dayehe librochjan co jintte librochjan. De ngain rroha tsonoha anto dulce inchin tsjen, pero de ngaxinhi tsé anto ndatsontsja.

¹⁰ Cottimeja janha cóa librochjan mé de ngá rá ángel mé co joine. Co de ngagaha rroha na, janha conona que anto dulce inchin tsjen, pero después que janha joine ndacontsja ngaxinhi na.

¹¹ Cottimeja ndachjenji na na:

—Jaha chonda que rrocjan rrodache chojni iná tti ndacho Dios de ixin tsje rajna, de ixin tsje nación, de ixin tsje nguigoa co de ixin tsje rey.

11

Tti yó testigo

¹ Pero dattechoaha tti patio que jí inchin ná nttá que xattechoaxin, co vitonna:

—Dingattjen co dattechoha nchiandoha Dios conixin altar cai, co ttequin quejanhi chojni nchesayexin Dios nttiha.

² Pero dattechoaha tti patio que jí ndoja de nchiandoha Dios, ixin mé ovayé chojni de icha nación, co nimé ní feo sinchehe ngain tti ciudad santa ngoixin cuarenta y dos conittjao.

³ Co janha rrorroanha yó testigona que rronichja ngain chojni de ixin janha ngoixin tti mil dosciento sesenta nchanho mé, co cayoi testigo mé sinttengá lonnto ttie inchin lonnto dinttengá chojni que ta joachjaon are ndadenhe ná nifamilié.

⁴ Jehé tti yó testigo mé tti yó ntaolivo, co tti yó candelero que te ngattoxon con Dios que ttonha ngataha nontte.

⁵ Co si chonja chojni sinao sinchenihi jehe testigo tehe, jehe de rroha sinttecxin xohi que ndatsjaga cain tti chojni que rroningaonhe. Co jañá chonda que senhe quexeho chojni que sinao sinchenihi testigo mé.

⁶ Jehé cayoi testigo jiji chonda joachaxin de tsejé ngajni para que irrochjeha chin ngataha nontte ngoixin tiempo que jehe rronichja de ixin Dios. Co cai chonda joachaxin para que jinda tsoncjan nda jni, co para sincheguetan tangui cain chojni ngataha nontte conixin cain tipo de chin cainxin nttiha que jehe sinao.

⁷ Pero are jehe tsjehe xé, tti coxigo jianha tsajinxin va de ngain tti tsaga anto nihnga, co tsetocaho va jehe cayoi testigo mé, co jehe tsixinha ngain va. Jehé va tsjaya va co nasoexon va jehe cayoi testigo jiji.

⁸ Co cuerpoe sinttji cuerpo ngá nttiha de tti ciudad que anto jie, tti cjoixin crucificado Cristo. Co ciudad mé ogoan inchin ciudad de Sodoma co nonttehe Egipto tti vehe joxon cosa jianha.

⁹ Co para ní nchanho co rioho, chojni de cain rajna, chojni de cain raza, chojni de cain nguigoa, co chojni de cain nación sicon na cuerpoe jehe cayoi testigo jiji, co tsanchjandaha na cayoi cuerpo jiji para que rroxává.

¹⁰ Cain chojni que te ngataha nontte rroché na ixin ndasenhe cayoi testigo jiji, co anto rroché na que hasta rrorroenhe chó na regalo ná na co ná na ixin tti cayoi xí mé que vanichja de ixin Dios, ná cosa anto tangui para ixin jehe na.

¹¹ Pero después de tti ní nchanho co rioho mé, Dios joinchexechon cayoi xí mé, co vintteguingattjen xa iná, co cain chojni que vicon mé anto vintteñaxon na.

¹² Cottimeja jehe cayoi testigo mé vinttequinhi tté Jesucristo que joixin de ngajni co ndacho anto sén:

—Tani ra nttihi noi.

Cayoi testigo mé savinttecajin para ngajni ngacjan ná ttjoi co cain chojni que ningaonhe vicon na.

¹³ Co ngain rato mé anto soji coingui nontte, co ná tti ttxin parte de ciudad mé ndaxante co yáto mil chojni ndavintteguenhe na ixin coingui nontte. Co ittoha chojni que xa xehe, joinchecoanxinhi na Dios que ttjen ngajni ixin anto vintteñaxon na.

¹⁴ Ojoexin tti yoxin cosa anto tangui yá, pero toin tsí tti ninxin.

Tti yatoxin trompeta

¹⁵ Tti yatoxin ángel vano trompeté co anto sén coinhi ni tté de tsje chojni que joixin de ngajni que ndacho:

Tti joachaxin para ttonha ngataha nontte ojoiguehe para Dios conixin Cristo;

co jehe Dios tti tsetonha para cainxin tiempo.

¹⁶ Cottimeja tti veinticuatro nittetonha que tatetaha na nttaxintaoen na nttiha ngattoxon con Dios, cainxin nimé vinttecañantaha na nontte co joinchecoanxinhi na Dios.

¹⁷ Co ndacho cain nimé:

Chjaha ra gracias soixin

Dios que chonda cainxin joachaxin,

soixin tti ttjen jai, tti joarihi desde are saho, co soixin tti rrocjan sihi iná,

chjaha ra gracias ixin soixin vayehe tti anto soji joachaxian

co soixin ocoexinhi coetonha.

¹⁸ Chojni de cain nación ndavinttecoñao na,

pero ojoí nchanho que soixin sinchecastigá na,
 co cai ojoí rato que soixin sinchejuzguehe cain chojni que ondavenhe,
 co rrochjehe ninchehe xá que nichja na de ixin soixin tti tequininxin na sayé na,
 co cai tti chojni que coequininxin para ixin soixin, co tti chojni que nchesayehe nombrea,
 masqui jehe na yeye na o nchinnchin na;
 co jói tti rato que soixin sinchetján cain chojni que ncheyehe co nchetján icha chojni nttihi
 ngataha nontte.

¹⁹ Cottimeja ningoe Dios que jí nttiha ngajni xiré, co vicon ni tti cajón que jingá tti tratoe
 Dios que jí nttiha ngaxinhi nihngo. Co anto conguixin, co goan ruido, co vattehe, co coingui
 nontte, co anto vinttji ttoni.

12

Tti nchí conixin tti colantta jie de yáto já

¹ Cottimeja ngain ngajni cononxin señal anto jie jiji: ná nchí jisiama ncha nchanho
 inchin ná vestido jingá ncha, conixin conittjao ngangui rotté ncha, co ngataha já ncha
 jítaha ná corona de tteyó conotse.

² Jehe nchí jiji jiyá ncha chjan, co jitoyacaho ncha dolor co jidetan ncha tangui ixin
 sincheconcjihí ncha chjan.

³ Cottimeja nttiha ngajni cononxin iná señal jiji: ná colantta jie co jatse va que jichonda
 va yáto já va co tte ntehe va co cada já va tetaha naná corona.

⁴ Conixin nttané va coingajinxin va ná tti ninxin parte de cain conotse que jí ngajni
 co cjoa va cain conotse mé para ngataha nontte. Co jehe colantta jiji tavengattjen va
 ngattoxon con jehe tti nchí que osincheconcjihí chjan, para rrojine va xenhe ncha nttihi
 rroconcjihí xan.

⁵ Co nchí mé joincheconcjihí ncha ná xanxí, co xanxí mé xan tsetonhe cain nación inchin
 rrocji conixin ná nttacotto de chia. Cottimeja xenhe ncha mé vachjehe ncha xan para sacjoi
 xan para ngain Dios co ngain lugar tti jí nttaxintaoen Dios.

⁶ Co jehe nchí jiji sacoiinga ncha para ngagaha jna. Nttiha Dios joinchechjienhe ncha ná
 lugar para que nttiha rrochjé na ncha sine ncha ngoixin mil doscientos sesenta nchanho.

⁷ Después vehe ná guerra nttiha ngajni, co arcángel Miguel conixin cain ángel de jehe
 coetocaho na colantta jiji conixin cain ángel de jehe va.

⁸ Pero colantta conixin cain ángel de jehe va coixinha joacha ngain guerra mé, co iveha
 lugar nttiha ngajni para ixin jehe colantta jiji conixin cain ángel de jehe va.

⁹ Co jañá sacjoixin de nttiha jehe tti colantta que anto jie, jehe tti jí desde anto tsje nano
 que dinhi inchínji co Satanás, tti ncheyehe chojni de ngoixin mundo. Jehe colantta mé
 conixin cain ángel de jehe va saxincanji para ngataha nontte.

¹⁰ Cottimeja janha coian tté ná ángel anto sén de ngajni que ndacho:

—Ojoi tiempo que Dios tsjenguijna chojni, co Dios ocjoago joachaxin que jehe chonda co
 osiquetonha Dios de ján na, co ocjoago joachaxin Cristoe Dios; ixin osacjoixin inchínji de
 nttihi, jehe mé tti tjanguihí cain chojni que ditticaon ngain Cristo, jehe tti vacjanguihí na
 de ttie co nchanho ngattoxon con Dios de ján na.

¹¹ Jehe cain nimé ocjoa na cha ngain coxigo yá de ixin jni Jesucristo, tti Colecoe Dios,
 conixin joajné Dios que jehe na ndache na icha chojni nttihi ngataha nontte, ixin jehe na
 xaonha na de ndavenhe na, sino que jehe na vintte na dispuesto de vintteguenhe na.

¹² Mexinxin jí razón que chaha jaha ngajni, co cain jaha ra que te ra nttiha. Pero anto
 tangui para ixin cain tti te ngataha nontte co cain tti te ngain ndachaon, ixin inchínji
 oxincanji ngayaha ra. Co jehe anto jitoñaao ixin nohe que tsjeha tiempo dittoehe.

¹³ Co are coxigo mé vicon va que osaxincanji va ngataha nontte, jehe va coexinhi va
 joinchehe va feo ngain tti nchí que joincheconcjihí xanxichjan.

¹⁴ Pero jehe nchí mé vayé ncha yó nenechán coaguila yeye, para que nchao cjoaganga
 ncha para ngain tti lugar que vayé ncha ngagaha jna. Lugar mé cjin de ngain coxigo mé co
 nttiha sayé ncha tti sine ncha ngoixin ní nano co rioho.

¹⁵ Pero jehe coxigo mé cjoaxin va jinda de ngain rroha va para conchjian ná río para que
 rroguetsiangui jehe tti nchí mé.

¹⁶ Pero nontte cjoenguijna jehe tti nchí mé ixin nontte xiré co nttiha saxincanji jehe tti
 río que coxigo mé cjoaxin va rroha va.

¹⁷ Mexinxin jehe va anto coñaao va ngain tti nchí co sacjoi va joiquetocaho va tti icha
 chojni ncha que xa xehe, tti chojni que ditticaon cain tti tettonha Dios co cain tiempo
 nchehe na sigue de nchehe na tti ndoa que ndacho Jesucristo.

13

Tti yó coxigo yeye co jianha

¹ Janha joaringattjen ngandehe ndachaon, co vicon cjoinxin de ngain ndachaon ná coxigo jie co jianha va que jichonda va yáto já va co tte nttehe va. Co cada nttehe va techonda naná corona co ngain cada já va techonda ná nombre que ncheofendé Dios.

² Jehe coxigo jianha que janha vicon, jí va inchin ná cotigre, co rotté va inchin rotté co-oso, co rroha va inchin rroha coleón. Co tti colantta jie joanjo va joachaxin ngain coxigo jiji para sinchehe va tsje cosa, co cai joanjo va nttaxintaoen va que tjago ixin chonda va joachaxin mé.

³ Ná de cain já jehe coxigo mé anto jie diconihi co chonda que ndarroguenhe va. Pero jehe herida mé ndacoñoenhe co chojni de ngoixin mundo anto xaon na co vitticaon na ngain jehe coxigo mé.

⁴ Co joinchesayehe na jehe colantta mé ixin joanjo va joachaxin ngain tti coxigo jianha, co cai joinchesayehe na tti coxigo jianha, co ndačo na:

—¡xonhi chojni chonda joachaxin inchin coxigo jie jiji, co xonhi chojni tsixinhi tsetocaho va!

⁵ Cai vayé coxigo mé joachaxin de nichja va inchin chojni orgulloso co para ndačo va cosa jianha de ixin Dios. Co vayé va joachaxin de coetonha va ngoixin cuarenta y dos conittjao.

⁶ Co janhi joinchehe coxigo mé: nichja va jianha de ixin Dios, de ixin nombré Dios, de ixin ningoe que jí ngajni, co de ixin cain cosa que jí nttiha ngajni.

⁷ Cai coá va joachaxin de coetocaho va chojni Dios, hasta que cjoa va cha. Co cai vayé va joachaxin para ngain cain chojni de cain raza, de cain rajna, de cain nguigoa, co de cain nación.

⁸ Jehe coxigo jianha mé joinchesayehe cainxin chojni que te ngataha nontte; jehó tti chojni que tetaxin nombré na ngain tti libro que desde are conchjian nontte jitaxin nombré cain chojni que chonda iná vida naroaxin, jehó chojni mé nijoinchesayeha na coxigo mé. Co jehe libro jiji jichonda Cristo, tti Colecoe Dios que ndavenxin ngataha nontte.

⁹ Si chonja chojni ttinxin jian, tsinhi tti ndačo jiji.

¹⁰ Tti chojni que ttiaxinhi icha chojni ngain cárcel, cain chojni mé chonda que siaxinhi na cai. Co tti chojni que nadoenxon iná chojni conixin espada, cain jehe na chonda que nasenon na conixin espada cai. Mexinxin chojni Dios chonda que rrochonda na paciencia co sitticaon na jian.

¹¹ Después, janha vicon iná coxigo jianha que coajinxin va de ngadoho nontte. Jehe coxigo jiji jichonda va yó nttehe va inchin nttehe coleco, pero nichja va inchin colantta que chonda tsje já.

¹² Co jichonda va xajeho joachaxin que jichonda tti coxigo jianha que cjoinxin de ngain ndachaon, co de ngattoxon con jehe coxigo jiji vanchegonda va joachaxin jiji co joinchehe va para que nontte co cain chojni que te ngataha nontte sinchesayehe tti saho coxigo jianha que cjoinxin de ngain ndachaon co coñoenhe tti herida anto jie que vechonda.

¹³ Cai jehe tti coxigo que cjoinxin de ngadoho nontte joinchehe va jie milagro, co hasta vechonda va joachaxin de vanchexincanji va xohi de ngajni para ngataha nontte ngattoxon con cain chojni.

¹⁴ Co de ixin cain milagro jiji que jehe va coá va joachaxin de vanchehe va ngattoxon con tti coxigo que saho cononxin de ngain ndachaon, joincheyehe va cain chojni que te ngataha nontte, co coetonha va ngain na que sinchexjian na ná retratoe tti coxigo coninxin já de ixin espada co masqui jamé, jehe va nchao vechon va.

¹⁵ Co tti coxigo que cononxin de ngadoho nontte vayé va joachaxin de chjé va vida jehe retratoe tti coxigo que cononxin de ngain ndachaon, para que retratoe co mé nchao nichja co coetonha va navenxon cain chojni que joinchesayeha retrato mé.

¹⁶ Co retrato jiji joinchehe icha, ixin coetonhe cain chojni desde yeye na co nchinnchin na, nírco co ninoa, o chojni libre o esclavo, cainxin na afuerza rrochonda na ná marca ngain rá na lado jian o nganito nttattjen na.

¹⁷ Co xonhi chojni nchao tsehna cosa ni sinchecji cosa si chondaha na marca mé o nombré coxigo mé, o quejanhi tsjexin nombré va.

¹⁸ Cain jiji rrongdehe joarriaon; mexinxin tti chojni que ttinxin, nchao tsonohe quejanhi tsjexin coxigo jiji, ixin número mé rročo numeroe ná xí. Co número mé seisciento sesenta y seis.

14

Quexén tsje tti ciento cuarenta y cuatro mil chojni

¹ Después janha tsjá, co vicon jehe tti Colecoe Dios tajingattjen va ngataha tti jna que dinhi Sión. Co ngain jehe va te ciento cuarenta y cuatro mil chojni que tetaxin nganito nttattjen na nombré jehe va conixin Ndadé va.

² Cottimeja janha coian ná ruido que joixin de ngajni, que ruido mé inchin tti ruido que nchechjian tsje río co inchin are dattehe ngayé jna, co mé coinhi ni inchin are tsje chojni tedinga arpa.

³ Co tetsje na ná són naroaxin nttiha ngaca lugar tti jí nttaxintaoen Dios co nttiha ngattoxon con tti canoi cosa que techon, co ngattoxon con tti veinticuatro nittetonha que te nttiha cai. Ni ná chojni choha coangui són mé, sino que jecho tti ciento cuarenta y cuatro mil chojni que vayé iná vida naroaxin de ngayé cain chojni que te ngataha nontte.

⁴ Cain chojni jihi tti xonhi nchí ni xí joincheyehe, mexinxin vittohe joxon chojni jian co ditticaon na cainxin tti ttonha jehe tti Colecoe Dios. Jehe na vayé na iná vida naroaxin co mexinxin vachjeyexin na de ngayé cain chojni ngataha nontte para te na inchin ná regalo anto jian para ixin Dios co para ixin jehe Colecoe Dios.

⁵ Vinchoeha ni ná mentira ngain rroha na; cain chojni mé joxon chojni jian ngattoxon con Dios.

Tti joajna que joiaho tti ní ángel

⁶ Cottimeja janha vicon iná ángel que jitjaganga ngosine ngajni co jichonda tti jian joajné Dios que ndoa para cainxin tiempo co que danjo iná vida naroaxin. Co ángel mé cjoí joindache chojni que te ngataha nontte; chojni de cainxin nación, de cain raza, de cain nguigoa, co de cain rajna.

⁷ Co ángel mé jindačo sén:

—Xagonhe ra jecho Dios co jecho jehe tti nchecoanxinhí ra ixin ojoí hora que jehe sinchejuzguehe cain chojni. Nchesayehe ra tti joinchechjian ngajni, nontte, ndachaon, co cain parte tti tečhinxin jinda.

⁸ Cottimeja rroé iná ángel, que ndačo:

—Ondaxante tti ciudad jie que vinhi Babilonia, ixin jehe tti joinchecoan chojni de cainxin nación conixin tti vino que jehe joinchechjian, co jihi rročo ixin joinchecoehne chojni para vechonda na icha nchí que jeha nchíchíhi na.

⁹ Cottimeja rroé tti ninxin ángel, que jindačo sén:

—Si chonja chojni nchesayehe tti coxigo jianha conixin retratoe va co sittoexin na senganito marqué va nganito nttattjen na o nganito rá na,

¹⁰ chojni mé chonda que sayé tti anto soji castigo que ttixin de ngain Dios ixin Dios tsoñao. Co castigo jihi rročo ixin chojni mé rroche na ngain xohi conixin azufre ngattoxon con cain ángel Dios conixin Cristo.

¹¹ Co nchin que tsjinxin de ngain cuerpoe chojni mé tsajinhí nchin mé para cainxin tiempo, co xonhi tiempo sinchejogaha cuerpoe cain chojni mé ixin rroche na de nchanho co de ttie. Jamé tsonhe cain tti chojni que nchesayehe tti coxigo jianha conixin retratoe va, o dayé na marca de nombré va.

¹² Mexinxin cain tti chojni que tequininxin para ixin Dios co ditticaon na nchehe na tti ttonha Dios co tti ttonha Jesús, chojni mé rrongondehe na paciencia.

¹³ Cottimeja janha coian tté ná ángel que joixin de ngajni co ndachjenji na:

—Janhi cjin: “De nttihi pa ndaha anto chjoin tsonohe cain tti chojni que xa ditticaon Jesucristo are ndasenhé na.” “Ján”, ndačo Espíritu Santo, “ixin sinchejogaha na de ngain xé na, co cain tti jian que jehe na joinchehe na, mé tti tsonchiencaho na ngain Dios.”

Tti cosecha que ttjinxin de ngataha nontte

¹⁴ Cottimeja janha tsjá co vicon ná ttjoi roa, co ngataha ttjoi mé tajitaha ná tti jí inchin ná chojni. Jichjinga ná corona de oro co jiyá ná joso anto yao.

¹⁵ Co vachjexin de ngaxinhí nihngo ngajni iná ángel, que jindačo sén ngain jehe tti jitaha ttjoi mé:

—Xanguihi josoa co ttjejo cosecha ixin ojoí hora co cosecha ngataha nontte joexin cha cosecha.

¹⁶ Cottimeja jehe tti jitaha ttjoi mé joinchegatto josoe ngataha nontte, co joatse tti cosecha que jí ngataha nontte.

¹⁷ Cottimeja iná ángel vachjexin de ngaxinhí nihngo que jí ngajni; cai ángel mé jidicao ná joso anto yao.

¹⁸ Co vachjexin de ngain altar nttiha iná ángel, que chonda joachaxin para ngain xohi, co ángel jihi vayé jehe tti ángel que jichonda tti joso anto yao co ndačo:

—Xanguihi josoa co ttjejo cosecha de uva que jí ngataha nontte, ixin ojoexin dichje uva.

¹⁹ Co jehe ángel mé joinchegatto josoe ngataha nontte, co joatse cosecha de uva que jí ngataha nontte. Co coenga cain uva mé ngá ná tanque jie tti nchao seninxin na ttouva, co jiji rroçho tti castigo anto soji que rrorroanha Dios.

²⁰ Cain ttouva jiji ndoja de ngain ciudad veninxin na tto, co de ngain tanque que veninxin na tto, nttiha vaçhjin jni, co jni jiji cjoinxin jni de ngataha nontte hasta tti noinxin dicaoxin conxin frenoe va, co trescientos kilómetro cjinxin vingo jni jiji.

15

Tti yáto ángel co tti yáto último cosa tangui para ixin chojni

¹ Cottimeja janha vicon ngajni iná señal jie co hasta joincheçaon na. Janha vicon yáto ángel conxin tti yáto último cosa tangui, co cosa mé tsjexinxin corajé Dios.

² Cai vicon xá ná ndachaon que nchao dicondoxin ni que jittecan nda mé xohi. Co tti cain chojni que coixinhi cjoa cha ngain tti coxigo jianha conxin retratoe va, conxin tti quejanhi tsjexin nombré va cain chojni mé tatengattjen na ngandehé ndachaon mé conxin arpa que Dios joanjo ngain na.

³ Co tetsje na ná són inchin soen Moisés tti cjoí ninchehe xé Dios, co inchin soen Colecoe Dios; co són mé ndaço son:

Anto importante co çhjoin cainxin cosa que soixin joinchehe,
oh Dios, soixin tti chonda cain joachaxin;

nao co anto ndoa cain nttiá soixin,
co soixin tti Rey para cainxin nación.

⁴ ¿Quensen rroxagoanha soixin?

¿O quensen sinttacoanxianha soixin?

Ixin jehó soixin tti anto santo,
co tsí chojni de cainxin nación para sinttacoanxinha na,
ixin jehé na ovicon na tti jian que soixin nchehe.

⁵ Después de cain jiji, janha tsjá, co vicon tti nihngo que jí ngajni xiré, tti vechjianxin tti yó tabla que vetaxin tti tte mandamiento que coetonha Dios.

⁶ Co de ngain lugar mé vaçhjin jehe tti yáto ángel que sasicao tti yáto cosa tangui ngataha nontte. Co ángel mé tengá lonnto anto fino co hasta tetonguixima lonnto mé; xonhi jinche dica lonnto mé. Co tettedonga cinturón de oro ngain pechoe.

⁷ Cottimeja ná tti nó cosa que techon joanjo ngain cada tti yáto ángel mé naná vaso de oro, tecaon de tti castigo que anto soji que ttixin de ngain Dios, tti jichon para cainxin tiempo.

⁸ Co jehe lugar mé ndacaon de nchin ixin Dios anto jian co chonda cain joachaxin. Co xonhi quensen nchao joixinhi nttiha hasta joexinja tti yáto cosa tangui que joica tti yáto ángel.

16

Tti vaso de castigo

¹ Cottimeja janha coian tté Dios anto sén que vaçhjin de ngaxinhi que jí nihngo nttiha que ndaço ngain tti yáto ángel:

—Ttji ra co ttinttjite ra tti anto soji castigoe Dios que jí ngain tti yáto vaso na.

² Tti saho ángel cjoí co cointtjite tti jiria vasoe ngataha nontte, co cainxin chojni que techonda marqué tti coxigo jianha, co nchesayehe na retratoe va, cain chojni mé vaçhjema na tton anto feo co anto coín na.

³ Tti yoxin ángel cointtjite tti jiria vasoe ngataonhe ndachaon, co jinda mé cjan nda inchin jní chojni que ndadenhe, co ndavenhe cain cosa que techon ngangui jinda mé.

⁴ Tti ninxin ángel cointtjite tti jiria vasoe ngataonhe cain río co cain tti teçhinxin jinda co cain jinda mé ndacjan nda jni.

⁵ Cottimeja janha coian ndaço tti ángel de jinda:

—Soixin joinchehe inchin iquinxin ixin joinchejuzgá jañá, oh Dios santo, soixin que rrihi jai co joarihi are saho.

⁶ Ixin chojni jianha coingo na jní tti chojnia soixin, tti cain chojni que jian nichja de ixin soixin, co jai chojni jianha soixin joincheguihi na jni, ixin jamé tequininxin na.

⁷ Co cai coian nichja ná ángel desde ngain altar co ndaço:

—Ján, oh Dios, soixin que chonda cain joachaxin, joinchejuzguehe cain chojni yá ndoa inchin tequininxin na, co nao joinchejuzguehe na.

⁸ Tti nonxin ángel cointtjite tti jiria vasoe ngataha nchanho, co nchanho vayé joachaxin de cjoaga chojni conxin xoí nchaon.

⁹ Co cainxin chojni anto feo che na. Pero jehe na coentoxinha na de tti jianha que jehe na tenchehe na, ni joinchecoanxinha na Dios, sino que ndačo na palabra jianha para ixin Dios, tti chonda joachaxin para ngain cain cosa tangui jihí.

¹⁰ Tti naonxin ángel cointtjitte tti jiria vasoe ngataha nttaxintaoen tti coxigo jianha, co tti jehe va vaquetonha va ndaconaxin xehe. Co chojni anto coín na hasta joinchje neje na de ixin tti coín na.

¹¹ Pero masqui jamé cointtoeha na de joinchehe na cosa jianha que vanchehe na, sino que ndačo na palabra jianha para ixin Dios que ttjen ngajni; nichja na jańá ixin jehe na anto coín na.

¹² Tti incjaonxin ángel cointtjitte tti jiria vasoe ngain tti río anto jie que dinhi Eufrates, co jinda de ngain río mé ndaxema nda co xiré ná nttiha para ixin vatto tti rey que vinttequixin de ngain lado tti čhinxin nchanho.

¹³ Cottimeja janha vicon joí ní espíritu jianha. Ná vačhjexin de ngain rroha tti colantta que chonda tsje já, co iná vačhjexin de ngain rroha tti coxigo jianha, co tti ninxin espíritu jianha mé vačhjexin de ngain rroha tti ndačo ixin nichja joajné Dios pero ndoaha. Co canio espíritu jianha mé te xá corrana.

¹⁴ Jehe canio espíritu jihí, espiritue demonio que nchehe milagro, co vagachje para joatse cain rey de ngoixin mundo para guerra ngain nchaoen Dios, tti chonda cainxin joachaxin; co are mé jehe Dios tsjago joachaxin mé.

¹⁵ Co Cristo ndačo: “Tsjexin ra, janha sihi anto daca inchin ná xichehe. Anto čhjoin para ixin tti chojni que cain tiempo te listo para que tsí nchanho mé, co jamé chojni mé inchin tti chojni que ttenchjinha lontoe co jamé xonhi tiempo čhji na ttolocho na co xonhi chojni nchao dicon cuerpoe na.”

¹⁶ Cottimeja tti ní espíritu jianha mé joatse cain rey que ttetonha ngataha nontte para ngain lugar que dinhi ixin nguigoa hebreo Armagedón.

¹⁷ Tti yatoxin ángel cointtjitte tti jiria vasoe ngataonhe čhintto. Co desde ngaxinhi nihngo que jí ngajni, co de nttaxintaoen Dios vačhjexin tté Dios co ndačo sén:

—Ojoexin cain.

¹⁸ Cottimeja congúxin cain lado, co anto goan ruido, co anto joatte, co coingui nontte anto soji que xonhi tiempo coingui nontte jamé desde que chojni vehe ngataha nontte.

¹⁹ Co tti ciudad que anto jie vichjenga hasta ní parte, co cain ciudad de ngoixin mundo ndaxante ciudad. Co Dios xaxaon tti ciudad anto jie que dinhi Babilonia para que vayé ciudad mé tti castigo anto soji que Dios joanjo ixin jehe cońahe ciudad mé.

²⁰ Cain isla co cain jna ndavintteguítján.

²¹ Cai vinttjixin de ngajni para ngataha nontte ttoni anto yeye que yexin hasta cuarenta kilo. Co chojni ngataha nontte nichja na jianha de ixin Dios ixin vinttji ttoni mé, ixin mé ná castigo anto soji para ixin jehe na.

17

Castigo que vayé ciudad jianha

¹ Cottimeja joí ná de tti yáto ángel que chonda tti yáto vaso, co ndachjenji na janha:

—Xacoi, co tsjagoha tti castigo que sayé tti něhí que nchecji cuerpoe ngain icha xí, rročo tti jie ciudad jianha que tají ngandehe ndachaon.

² Cain rey que ttetonha ngataha nontte joinchehe cosa jianha ngain ciudad mé, co cain chojni que te ngataha nontte ndavichoe na de ixin cosa jianha que nchehe chojni ngain ciudad mé.

³ Cottimeja are janha xa vicon tti cjoagohna Espíritu Santo, ná ángel sacjoinha para ngaha jna co nttiha viconxin ná něhí que jitaha něha ná coxigo jianha co jatse va. Co ngoixin coxigo mé jitsama va de nombre feo para ixin Dios. Co jichonda va yáto já va co tte ntehe va.

⁴ Jehe něhí jihí jingá něha lonto morado co jatse, co ditsonji něha de oro, conixin xo que anto fino, co perla. Co jiyá něha ná vaso de oro jicaon de cain cosa feo co jianha que nchehe něha.

⁵ Co nganito nttattjen něha jitaxin ná nombre que chojni xa chonxinha co ndačo: “Tti jie ciudad de Babilonia, tti cjoí inchin janné cain něhí que nchecji cuerpoe ngain icha xí, co de cain cosa jianha ngataha nontte.”

⁶ Cottimeja vicon jian que něhí jihí ndadicoan něha conixin jní chojni Dios, tti chojni que nagoenxon na ixin cjoí na testigoe Jesús. Co are janha vicon yá, anto goan na admirado.

⁷ Cottimeja tti ángel que cjoagohna jihí, ndachjenji na:

—¿Quedonda rridoan admirado? Janha tsjagoha jaha quehe rrocho tti nchi yá, que mé jima jai; co sinttanoha quehe rrocho tti coxigo jianha que jitaha ncha, tti coxigo que chonda yáto já co tte ntehe.

⁸ Tti coxigo jianha que jaha vicon, yá ná coxigo que vechon are saho, pero jai coxigo yá ijichonha va. Pero masqui jamé, icha saho que jehe va ndasenhe va para cainxin tiempo, jehe va tsajinxin va de ngá tsaga anto nihnga. Cain chojni que te ngataha nontte co tetaxinha nombré na ngain tti libro tti tetaxin nombré cain chojni que chonda iná vida nroaxin, cain tti chojni que tetaxinha nombré nttiha desde are conchjian nontte jiji, cain chojni jiji soan na admirado are sicon na coxigo jianha mé que vechon, co jai ijichonha va, pero que xa rrocjan va tsi va iná.

⁹ Ntthi jinichja nchion para ixin tti chojni que nchao ttinxin: Tti yáto já va, mé rrocho tti yáto jna que ciudad jie yá jitaha.

¹⁰ Co cai tti yáto já va yá rrocho yáto rey. Naho de tti rey yá ojoexin coetonha na, co ná de jehe rey yá jittetonha jai, co iná xa ttiha. Co are tsi tti último rey, jehe mé tsonchjenha tsje tiempo.

¹¹ Tti coxigo jianha que vechon are saho co jai ijichonha va mé tti njinxin rey, masqui cai jiji iná de tti yáto rey, co después ndasitján para cainxin tiempo.

¹² Co tti tte ntehe va que jaha vicon, mé rrocho tti tte rey que xa ttexinha ttetonha; pero cain jehe sayé joachxin de rey para jeha nchion tiempo. Co jehe na tsetonha na junto conixin tti coxigo jianha mé.

¹³ Jehe tti tte rey jiji te de acuerdo, co sanjo na joachxin mé ngain tti coxigo jianha.

¹⁴ Co tsetocaho na Coleco Dios, pero Coleco mé tsixinhi va sacha va ngain cain rey mé conixin ngain jehe coxigo jianha, ixin jehe Coleco tti ttetonha cainxin cosa co cain chojni, co jehe tti Rey de cainxin rey. Co cain chojni que te ngain jehe, mé Dios ndache na ixin tsi na ngain jehe, ixin jehe coinciehe na; co cain tiempo ditticaon na jian ngain Dios.

¹⁵ Co ángel ndachjenji na cai:

—Cain ndachaon que jaha vicon tti jindehe tti nchi que rrocho tti jie ciudad cain ndachaon yá rrocho cain rajna, cain chojni, cain nguigoa, co cain nación.

¹⁶ Co tti tte ntehe va que jaha vicon co tti rrocho tte rey, cain yá tti rroningaconhe nchi jitaha va, co tsinttohe na ncha jeha ncha co ttolocho ncha; co sine na cuerpoe ncha, co tsjaga na ncha ngain xohi.

¹⁷ Jamé tsonhe tti ciudad mé ixin Dios coín ngain ansén tti tte rey yá para que sinchehe inchin rinao Dios, mexinxin jehe na vintte na de acuerdo para joanjo na joachxin de rey ngain tti coxigo jianha hasta que tsoenja tti ndacho Dios.

¹⁸ Co tti nchi que jaha vicon, mé tti ciudad importante que ttetonha cainxin rey de ngoixin mundo.

18

Are xantte ciudad de Babilonia

¹ Después de cain jiji, janha vicon iná ángel que jixincanjinxin de ngajni conixin tsje joachxin, co ngoixin ngataha nontte vingasantaha de ixin chixo que joiaho ángel mé.

² Co jitoyao soji co ndacho:

—Ovetsinga Babilonia, tti ciudad anto importante, co jai ndacjan nchiandoha demonio, co cuevé cainxin clase de espíritu jianha, co caqué cain conttoa tjoaha co feo.

³ Ixin chojni de cainxin nación ndavichoe na de ixin tti jianha que nchehe chojni de ngain ciudad mé, co cain cosa jianha mé inchin ná vino que nchecoan chojni mé, co cainxin rey de ngoixin mundo joinchehe na joxon cosa jianha ngain ciudad jiji, co xicomerciante de ngoixin mundo ndacjan xa rico de ixin cain cosa rentte que vaquehna ngain ciudad mé co vanchejci ngain icha chojni.

⁴ Cottimeja coian tté Dios que joixin de ngajni co ndacho:

—Dachjexin ra de ngain ciudad yá, jaha ra xo chojnina jianha, para que sinchehe ra tti jianha que nchehe icha chojni de ngain ciudad yá, ni rrotseha ra castigoe na.

⁵ Ixin tti jianha que jehe na tenchehe na, anto ndacotsje co vixintja chó co joiji hasta tti ngajni, co Dios xaxaon co nichja de ixin cain tti jianha mé que jehe na tenchehe na.

⁶ Danjo na ngain ciudad yá inchin jehe joanjo ngain icha chojni, co ttjenguehe ra ciudad yá hna doble de tti jehe joinchehe nganji ra. Co ttinttecjan ra ná tti siji yó nttiha icha soji que tti jehe ciudad yá cointtecjan para icha chojni.

⁷ Inchin chjoinxin que conohe ciudad yá co chjoin que vehe, jamé tsjexin dolencia co tangui ncheguetan ra ciudad yá, ixin ndacho ngain ansén: “Ntthi tarrihi janha inchin ná reina; janha jeha ganha na, ni xonhi tiempo setan tangui.”

⁸ Mexinxin ngain nacoa nchanho, tsí cain castigoe ciudad yá: jehe ndasenhe, co tsa joachjaon, senhe jintta co rroche conixin xohi, ixin Dios tti jichonda cain joachaxin jañá joinchecondená ciudad yá.

⁹ Cain rey de ngoixin mundo tti joinchehe jianha ngain ciudad yá co ché, cain rey mé rrotsjanga co tsa joachjaon de ixin ciudad yá are jehe sicon tsajinhi nchin are rroche ciudad yá.

¹⁰ Cjin sintte cain rey mé ixin rroxagoen castigo que sayé ciudad yá co rrondaço:
—¡Ay! ¡Anto tangui para ixin jaha, ciudad que anto jie Babilonia, ciudad que chonda anto joachaxin! Ixin ngain nacoa rato joí cain castigoa.

¹¹ Cai cain xicomerciante de ngoixin mundo rrotsjanga xa co tsa xa joachjaon de ixin tti tsonhe jehe ciudad yá, ixin iseha quensen tsené xa carga que tsiaho xa.

¹² Inchin carga de oro, de plata de xo anto fino, de perla, de manta fino que dinhi lino, de seda de color morado co jatse; cai de cain clase de nttá que çhjoin çajni, de cain cosa que diconchjian joxon marfil, de nttá que anto rentte, de bronce, de hierro, co de marmol,

¹³ co carga de canela co icha ca que çhjoin çajni, tsjoca, mirra, perfume, vino, aceite, harina fina, trigo, co cai coxigo que tama, coleco, conxin, carro, co hasta chojni vanchecji xa para vaguittohe na de esclavo.

¹⁴ Cain xicomerciante mé rrondaço xa ngain ciudad jiji:
—¡Ichondaha cain cosa çhjoin que anto vanttaçoxinha, co ndajoinchetján para cainxin tiempo cain cosa rentte co cain cosa que anto jian que joarichonda!

¹⁵ Cain tti chojni que vanchexin negocio de ixin cain cosa yá co ndacorrico na de ixin ciudad yá sinttengattjen na cjin de jehe ciudad, ixin rroxagoen na tti castigo que sayé ciudad yá co rrotsjanga na co tsa na joachjaon,

¹⁶ co rrondaço na:
—¡Ay! ¡Anto tangui para ixin ciudad que anto jie vehe! Ciudad yá vehe inchin ná nçhí que vengá lonto fino conixin lonto de color morado co jatse, co vetsonji nçha de oro, co de xo que anto fino conixin perla.

¹⁷ ¡Co ngain nacoa rato ndajoexin tti anto tsje cosa rentte que vechonda ciudad yá!
Cainxin xicapitán de ngain barco conixin cain chojni pasajero conixin cain ximarineru, co cain chojni que nchehe ça ngain ndachaon, tavinttengattjen na cjin,

¹⁸ co are vicon na nchin que jittjinxin de ngain xohi que jichexin ciudad yá, jehe na coyao na co ndaço na:

—¿Quexehe iná ciudad vehe icha importante inchin ciudad jiji?
¹⁹ Co de ixin joachjaon que coá na cointtjitte na jinche já na, co tsjanga na, coá na joachjaon, coyao na, co ndaço na:

—¡Ay! ¡Anto tangui para ixin tti ciudad que anto jie vehe! ¡Conixin cain cosa rentte que vechonda ciudad yá corricocoxin cain xí que chonda xa barco ngain ndachaon! ¡Co ngain nacoa rato ndaxantte ciudad yá!

²⁰ Pero cain jaha ra xo te ra ngajni, co jaha ra xo cjoí ra representanté Jesucristo, co jaha ra xo nichja ra joajna que dayehe ra de ngain Dios, co cain ra xo chojni Dios, cain jaha ra mé chaha ra ixin ciudad yá goan condenado co Dios joinchehe jie para ixin jaha ra.

²¹ Cottimeja ná ángel que chonda tsje joachaxin tsín ná xo, co xo mé jí xo inchin ná xoçhin jie co joancahngui xo ngangui ndachaon, co ndaço:

—Cai janhi setsiangui Babilonia, tti ciudad anto jie, co içonhi tiempo rrocjan ra sicon ra ciudad iná.

²² ¡Çonhi tiempo rrocjan tsinhi ni ngá nttié ciudad mé soen arpa, flauta, co trompeta. Ni iseha ngain ciudad mé ni ná chojni que chonxin ni ná tipo de ça, ni itsinha ni tti ruido que nchechjian çottja ngataha xoçhin.

²³ Ni isingasanha ngain ciudad yá ni ná xoí lámpara co içonhi tiempo tsinhi ni tti ruido de tti quíe chojni que tottehe. Jamé tsonhe masqui xicomerciante que vintte ngain nttiha are saho vechonda anto tsje joachaxin, co masqui ciudad yá joincheyehe chojni de ngoixin mundo conixin joattosohe.

²⁴ De ngain ciudad yá vinchoexin jní chojni que nichja de ixin Dios, co jní chojni Dios, co jní cain chojni que vinttegoen na ngoixin ngain mundo jiji de ixin causexin Dios.

19

¹ Después de cain jiji, janha coian tté tsje chojni que joixin de ngajni que ndaço soji:
¡Nttocoanxinhi na Dios! Dios de ján na tti danjo iná vida naroxin, co jehe chonda cain gloria co cain joachaxin,

² ixin jehe nchejuzgá inchin jiquininxin, co ndoa tti jehe nchejuzgá; ixin jehe joinchecondená tti ciudad jie co jianha, tti joincheconça xa ngoixin mundo de ixin tti jianha que jehe joinchehe;

Dios joinchecastigá ciudad mé ixin jehe vantsjehe vidé ninchehe xé jehe.

³ Cottimeja cjan cain chojni mé ndačo na iná:

—¡Nttocoanxinhi na Dios! Ixin tti nchin de ciudad mé xonhi tiempo tasehe de tsjinji nchin mé.

⁴ Co tti veinticuatro nittetonha co tti nó cosa que techon vinttecjañantaha nontte co joinchecoanxinhi Dios que retaha nttaxintaoen, co vinttendačo na:

—¡Amén! ¡Nttocoanxinhi na Dios!

⁵ Cottimeja coinhi ni ná tté ángel que joixin de ngaca nttaxintaoen Dios que ndačo:

Nchecoanxinhi ra Dios de ján na

cain jaha ra xo nchehe ra xé

co xagonhe ra jehe

masqui nchinnchin ra o yeye ra.

Tti quiai are Jesucristo tsottehe

⁶ Co cai coian ná cosa que inchin tté tsje chojni co inchin are dařoin jinda de tsje río, co inchin are soji joattehe, co cain tté chojni mé ndačo:

¡Nttocoanxinhi na Dios! Ixin ocoexinhi coetonha Dios de ján na tti chonda cainxin joachaxin.

⁷ Cainxin na rrochá na, anto rrochá na co sonttosayehe na Dios mé,

ixin ojoí tti nchanho que tsottehe Jesucristo, tti Colecoe Dios.

Co čhihi Jesucristo ojí ncha listo,

⁸ co jehe nčhinovia mé vayé ncha joachaxin de vengá ncha tti lontto de ná manta anto fino que dinhi lino; co xonhi mancha chonda lontto mé, co hasta jitonguixima lontto.

Ixin jehe tti lino fino mé rročo tti vida nao que chonda cain chojni Dios.

⁹ Cottimeja jehe ángel mé ndachjenji na janha:

—Jaha ttentaxin janhi: “Anto čhjoin para ixin cain tti chojni que Dios nichjé ixin tsji ngain quiai tti tsottehe Jesucristo, tti Colecoe Dios.”

Co ndachjenji na ángel mé:

—Cain jihi palabra ndoa que ndačo Dios.

¹⁰ Janha joarittoxin nttajochjihna ngaca rotté ángel para rrojinttsayá, pero jehe ndachjenji na:

—Ncheha yá, ixin janha jehó ná ninchehe xé Dios, jañá inchin jaha conixin cain chojni que ditticaon cain tiempo tti ndoa que cjoago Jesús. Mexinxin jaha nchesayehe jehó Dios.

Ixin jehe tti joajna ndoa yá que cjoago Jesús, mé tti nchenichja cain chojni Dios joajné jehe.

Tti jitaha conxin coroa

¹¹ Cottimeja vicon ngajni jixangué co cononxin ná conxin roa, co tti jitaha va dinhi: jehe tti nchehe xé Dios conixin ansén, co tti ndoa. Ixin jehe ttetonha co tteto ngain guerra pero nao inchin jiquininxin.

¹² Jmacon chojni mé conguixin inchin neje xohi, co ngataha já jidicaoxin tsje corona, co jitaxin ná nombre nganito que jehó jehe chonxin nombre mé.

¹³ Chojni mé jingá ná lontto que diguingaxin jni, co nombré chojni mé, mé tti Palabré Dios.

¹⁴ Co terroé xisoldado de ngajni, tengá xa lontto de lino anto fino, co roa lontto mé co xonhi jinche yá lontto, co tetaha xa joxon conxin coroa.

¹⁵ Co jehe tti dinhi Palabré Dios, mé de ngain rroha jidačhjexin ná espada anto yao, para sincheninxin chojni de cainxin nación; co tsetonhe cain nación jihi inchin conixin ná nttacotto de chia. Co jehe sinchejuzguehe cain nación jihi inchin tti deninxin ttouva conixin rotté, co jehe mé sincheguihi cain nación tti vino que sačhjuinguixin ttouva, pero mé rročo que jehe tti sinchegayé na tti castigo anto soji que ttixin de ngain Dios tti anto doñaohé na co tti chonda cainxin joachaxin.

¹⁶ Co nganito tti manta que jitsá chojni mé, co nganito rotté tetaxin nombre jihi: “Rey de cainxin rey, co tti Ttetonha de cain tti ttetonha.”

¹⁷ Cottimeja janha vicon ná ángel que tajingattjen ngataha nchanho, co coyaotte anto soji ngain cain conttoa que tjanganga para noi, co ndačo:

—Xacoí ra co xatte ra para ngain tti cena de Dios,

¹⁸ para sintte ra nttaohe cain rey, co nttaohe cain xigeneral, co nttaohe cain xí čhintto, co nttaohe conxin, conixin nttaohe xitetaha va, co nttaohe cain chojni masqui chojni que te libre o esclavo, co de chojni nchinnchin co yeye.

¹⁹ Cottimeja janha vicon tti coxigo jianha conixin cain rey que ttetonha ngataha nontte, conixin cain xisoldadoe rey mé. Cain na xatte na para tsetocaho na jehe tti jitaha conxin coroa conixin cain xisoldadoe.

²⁰ Jehe tti coxigo jianha mé viaxinhi va ngain cárcel, conixin tti vanda'cho ixin jehe ná tti nichja joajna que vagayé de ngain Dios, pero jeha ndoa. Co jehe mé tti joinchehe tsje milagro ngattoxon con coxigo mé. De ixin jehe cain milagro mé, jehe tti jeha ndoa tti nichja mé, joincheyehe cain tti chojni que vittoexin coá marqué coxigo jianha co joinchecoanxinhi na retratoe va. Cottimeja jehe coxigo jianha mé conixin jehe tti jeha ndoa tti nichja, jamé techon savinttetsingangi tti xohi que jichexin conixin azufre.

²¹ Co tti icha chojni venxin na conixin tti espada que vachjexin de ngain rroha jehe tti jitaha conxin coroa, co cainxin conttoa hasta cojexin va nntaohe cain chojni mé.

20

Tti mil nano

¹ Después janha vicon ná ángel que jixincanjinxin de ngajni conixin llavé tti tsaga anto nihnga co jiyá ná cadena anto jie.

² Jehe ángel jihí tse jehe tti conché mé, tti conché que ovehe desde sé co jehe mé tti inchínji co dinhi Satanás. Co ángel coiaxin va conixin cadena mé para mil nano.

³ Co joaná va ngain tti tsaga anto nihnga, co nttiha coiaxinhi va. Co cointtohe ná sello ngain puerté tsaga mé para que isincheyehe va chojni de cainxin nación hasta que sattoja mil nano. Co después de tti mil nano mé, chonda que rroxindanguehe va nchion tiempo.

⁴ Cottimeja vicon tti tsje nttaxintaon importante, co nttiha tatetaha chojni que vayé joachaxin para sinchejuzgá. Cai janha vicon almé cain tti chojni que chinji já ixin ndache na chojni tti joajné Dios que cjoago Jesús. Cain chojni mé joinchecoanxinhi na tti coxigo jianha ni retratoe va ni vittoexinha na coá na marqué va nganito nttattjen na o nganito rá na. Janha vicon xechon cain chojni jihí co jehe na conixin Jesucristo coetonha na para mil nano.

⁵ Chojni mé tti saho chojni que rroxechon. Pero tti ni icha que vintteguenhe ixechonha na hasta después de tti mil nano mé.

⁶ ¡Anto thjoin co jian tequinoxin para ngain Dios cain tti chojni que rroxechon ngain jehe tti saho tiempo que rroxechon chojni! Tti yoxin nttiha que ndadenhe ni ichondaha ni ná joachaxin ngain na, sino que jehe na sintte na dána para ngain Dios co ngain Jesucristo, co jehe na conixin Jesucristo tsetonha na para mil nano.

⁷ Co are satto jehe tti mil nano mé, Satanás rroxindanguehe co sachjexin de ngain tti siaxinhi,

⁸ co sachje para sincheyehe Gog co Magog, rrocho sincheyehe chojni de cainxin nación de ngoixin mundo, co satsé cain xisoldadoe de ngain chojni que jehe sincheyehe para ngain guerra, co cain xisoldado jihí anto tsje xa inchin nchise ngain ndachaoon.

⁹ Co coani xa hasta tti jicaxin nontte, co vixindanji xa tti sin chojni Dios co tti ciudad que Dios anto rinao. Pero Dios rroanha xohi de ngajni, que cjoaga cainxin xa.

¹⁰ Co Dios rroanha inchínji, tti joincheyehe cain xisoldado mé, para ngatte ndachaoon xohi que jichexin azufre, tti orroanha coxigo jianha conixin tti jeha ndoa ixin vayé joajné Dios. Nttiha rroche na de nchanho co tti para cainxin tiempo.

Tti chojni que goenhe juzgado ngain tti nttaxintaon roa

¹¹ Cottimeja janha vicon ná nttaxintaon anto jie co roa, co cai vicon tti jitaha nttiha. Ngattoxon con mé, ndavitján nontte co ngajni, co ixonhi lugar vehe para rroquehe cayoi cosa jihí.

¹² Co janha vicon cain chojni que ndavenhe, tti yeye co tti nchinnchin, tatengattjen na ngattoxon con Dios. Co xiré cainxin libro, conixin iná libro cai, que mé tti libro que jitaxin nombré cain tti chojni que chonda iná vida naroaxin. Cain chojni que ndadiguenhe, mé goenhe na juzgado inchin jehe na joinchehe na are vinttechon na, inchin tetaxin ngain cain libro mé.

¹³ Ndachaoon joanjo nda cain chojni que ndavenxin ngain nda co tti ndadenhe ni, co tti lugar que tti cain chojni que ndadenhe, cayoi mé joanjo cain chojni que ndavenhe co te nttiha. Co cain chojni mé goenhe na juzgado; cada na inchin jehe na joinchehe na are vinttechon na.

¹⁴ Cottimeja tti ndadenhe ni, co tti lugar que tti cain chojni que ndadenhe, cayoi mé savinttjatte ndachaoon xohi. Jehe xohi jihí rrocho tti yoxin tiempo que ndadenhe ni,

¹⁵ co nttiha vinttjatte cain tti chojni que tetaxinha nombré ngain tti libro que tetaxin nombré cain tti chojni que chonda iná vida naroaxin.

21

Ngajni naroaxin co nontte naroaxin

¹ Después janha vicon ná ngajni naroaxin co iná nontte naroaxin, ixin tti saho ngajni co tti saho nontan ndavitján, co iveha ndachaon.

² Co janha Juan, vicon tti ciudad santa, tti Jerusalén naroaxin, que jixincanjinxin de ngajni, tti ttjen Dios. Ngoixin ciudad mé anto çhjoin jí inchin ná xannovia çhjoin diguitoxinhi para tsottehe xan ngain xixihi xan.

³ Co coian ná tté ángel que joixin de ngajni co ndaço sén:

—Tsjexin, Dios jí jai ngayé chojni. Jehe sehe ngayé na, co jehe na sintte na chojni jehe, co jehe Dios mismo sehe ngain na para sehe Dios de jehe na.

⁴ Dios sinchexema cain ndacon na, co isenha na, ni irrotsjangaha na, ni iseha joachjaon, ni iñonhi tti tsín na, ixin cain tti vehe are saho, mé ovatto.

⁵ Cottimeja jehe tti jitaha nttaxintaon icha importante ndaço:

—Tsjexin, janha nttachjian cain cosa naroaxin.

Cai ndaço:

—Jaha ttentaxin cain jiji, ixin cain palabra jiji ndoa co nchao rrochonda ra confianza ngain palabra jiji.

⁶ Después ndachjenji na:

—Onchao jí cain. Janha tti icha saho varichon de cainxin cosa, co janha tti sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra. Tti chojni que denhe jinda janha rrochjaha chojni mé jinda para sihi, co jinda mé danjo nda iná vida naroaxin, co ðonhi nttacobrâ chojni mé.

⁷ Tti chojni que tsixinhi de sincheha cosa jianha sayé cain jiji inchin herencia, co janha sarihi Dios de chojni mé co jehe sehe xanhna.

⁸ Pero cain tti chojni que ðaon para ndaço ixin janha amigoe na, co tti chojni que ditticaonha nganji na janha, co tti chojni jianha, co tti chojni que dantsjehe vidé icha chojni, co tti chojni que chonda nçhicoxe o xicoxe, co tti chojni que dantonga icha chojni, co tti chojni que nchesayehe idolo, co cain chojni mentiroso; cain chojni mé chonda na que tsji na ngain tti jiche ðohi conixin azufre, co mé rroçho tti yoxin nttiha que ndasenhe na.

Tti Jerusalén naroaxin

⁹ Cottimeja joí ná de tti yáto ángel que teyá tti yáto vaso que tecaon tti último yáto castigo. Co ángel mé ndachjenji na:

—ðacoi, co tsjagoha xannovié Colecoe Dios.

¹⁰ Cottimeja are janha ða vicon tti cjoagohna Espíritu Santo, jehe ángel mé sacjoinha ngataha ná jna anto jie co noi jna mé, co de nttiha cjoagonanxin Jerusalén, tti ciudad santa que jixincanjinxin de ngajni, tti ttjen Dios.

¹¹ Jehe ciudad mé jitonguixima de ixin chíço que chonda Dios, co tti jehe jitonguixin mé inchin ná ðo que anto fino, inchin ná ðo que dinhi jaspe, que ðo mé nchao dicondoxin ni ðo inchin ðoçao.

¹² Ngandanji ciudad mé jindanji ná ttjarioho jie co noi co jichonda tteyó puerta co naná ángel jinda ngain cada puerta mé. Co nganito naná puerta mé tetaxin nombré tti ná tteyó grupoe chojni Israel.

¹³ Jí ní puerta lado tti çhinxin nchanho, co ní puerta lado norte, co ní puerta lado sur, co ní puerta lado tti diataonxin nchanho.

¹⁴ Co jehe tti ttjarioho jie que jindanji ciudad mé jichonda ttjarioho tteyó ðo inchin de base, co nganito naná ðo mé tetaxin nombré tti ná tteyó representanté jehe tti Colecoe Dios.

¹⁵ Tti ángel que jinichja nganji janha jiyá ná nttacotto de oro para joattechoaxin ciudad mé conixin ttjarioe co cain puerta que jichonda ttjario.

¹⁶ Ciudad mé cuadrada; rroçho ixin tti jininxin ciudad ðajeho inchin tonxin ciudad. Jehe ángel mé joattechoha ciudad conixin nttacottohe, co jininxin ciudad dos mil doscientos kilometro, co inchin jininxin cai noinxin, co cai tonxin ciudad ðajeho cai.

¹⁷ Cottimeja joattechoha ángel mé tti ttjarioho que jindanji ciudad, co ttjarioho mé jichonda sesenta y cuatro metros de noinxin. Ángel mé joinchegonda medida que dattechoaxin chojni nttihi ngataha nontte.

¹⁸ Jehe ttjarioho que jindanji ciudad mé diconchjian joxon ðo fino que dinhi jaspe. Co ciudad diconchjian joxon oro, co jitsjehe inchin ðoçao que ðonhi jinche yá.

¹⁹ Co tti tteyó ðo que te de base ngain tti ttjarioho que jindanji ciudad, cain ðo mé ditsonji ðo de cainxin clase de ðo fino: tti ðo saho ditsonji de jaspe, ðo yoxin conixin zafiro, ðo ninxin conixin ágata, ðo nonxin conixin esmeralda.

²⁰ ðo naonxin conixin ónice, co ðo incjaonxin conixin cornalina, co ðo yatoxin conixin crisólito, co ðo jininxin conixin berilo, co ðo nanxin conixin topacio, co ðo ttexin conixin crisoprasa, co ðo ttejngoxin conixin jacinto, co ðo tteyoxin conixin amatista.

²¹ Tti tteyó puerta, mé tteyó perla, co cada puerta diconchjian de nacoa perla. Co tti nttiha icha importante de ciudad mé jia joxon oro, co inchin xo굋ao que nchao dicondoxin ni.

²² Nttiha ngain ciudad mé janha viconha ni ná nihngo, ixin Dios, tti chonda cain joachaxin, mé tti nihngo para ixin ciudad mé conixin jehe tti Colecoe.

²³ Ciudad mé rrongondeha nchanho ni conittjao para sinchengasenne, ixin mero chíxo que Dios chonda nchengasán ngain ciudad mé, co jehe Colecoe, mé tti xohi para ixin ciudad mé.

²⁴ Chojni de cain nación que chonda iná vida naroaxin, cain chojni mé ngoixin tti chji na chonda na joadingasán que danjo ciudad mé. Co cain rey de ngoixin mundo tsiaho ngain ciudad mé cain cosa importante que jehe chonda co sinchesayehe ciudad mé.

²⁵ Cain puerta que jichonda ttjarioe ciudad mé sijeha are nchanho, co nttiha xonhi tti sehe.

²⁶ Co nttiha sicao na cain cosa importante de cainxin nación, co cain tti tosayexin cain nación jiji.

²⁷ Pero xonhi tiempo sixinhi nttiha cosa ttjoaha, ni ná chojni que nchehe cosa jianha o que ncheyehé icha chojni choha sixinhi nttiha. Sino que jehó tti chojni que tetaxin nombré ngain tti libro que tetaxin nombré cain chojni que chonda iná vida naroaxin, co Colecoe Dios jichonda libro mé. Jehó chojni mé tti sixinhi ciudad mé.

22

¹ Cottimeja jehe ángel mé cjoagohna ná río de jinda que xonhi jinche chonda, co jinda mé tti danjo iná vida naroaxin. Jinda mé anto dicondoxin ni nda inchin ná xo굋ao, co jidachjexin jinda mé de ngain nttaxintaen Dios conixin de ngain Colecoe.

² Ngosine tti nttiha icha importante de ciudad mé co cayoixin ngandehe río mé te tti nttá que danjo vida. Co nttá mé danjo nta ttchjoin tteyó nttiha ngá nano ixin danjo nta ttchjoin cada conittjao. Co qué nttattochjoin mé jian ca para xingamenxin chojni de cainxin nación.

³ Nttiha seha chojni ni xonhi cosa que Dios joinchecondená. Nttiha sehe nttaxintaen Dios conixin jehe Colecoe ngain ciudad mé, co ninchehe xé Dios co Jesucristo sinchecoanxinhi na jehe.

⁴ Jehé na sicon na ngá con Jesucristo co jehe sicon ngá con na jehe na, co nganito nttattjen na setaxin nombré jehe.

⁵ Nttiha ixonhi naxin xehe sehe, co cain chojni que sintte nttiha isondeha na xohi de lámpara, ni de nchanho, ixin Dios tti chonda cain joachaxin, jehe tti sinchengasañehe na, co jehe na nitsetonha para cainxin tiempo.

Ochian joí tiempo que Jesucristo tsí iná

⁶ Cottimeja ángel mé ndachjenji na janha:

—Cain palabra jiji ndoa co nchao sehe confianza ngain palabra jiji. Co jehe tti chonda cain joachaxin, que mé Dios mismo que nchenohe cain chojni que nichja joajné, jehe Dios rroanha ángel de jehe para joicjagoe cain ninchehe xé tti siconhe toin.

⁷ Co Jesucristo nda굋ho:

—Janha sihi toin!

¡Anto chjoin para ixin cain tti chojni que nchehe caso joajné Dios que jitaxin ngain libro jiji!

⁸ Janha Juan coian co vicon cain cosa jiji. Co después de coian co vicon, joarittoxin nttajochjihna ngaca rotté ángel tti cjoagohna cain jiji para rrojinttasayá.

⁹ Pero jehe ndachjenji na:

—Ncheha yá, ixin janha jehó ná ninchehe xé Dios, jañá inchin jaha conixin cain chojni que nichja de ixin Dios conixin cain chojni que nchehe caso tti jitaxin ngain libro jiji. Jaha nchesayehe Dios.

¹⁰ Cai ndachjenji na ángel mé:

—Jaha, ttemaha joajné Dios que jitaxin ngain libro jiji, ixin ochian joí tiempo que siconhe cain tti jitaxin nttihi.

¹¹ Mexinxin tančhanda que tti chojni jianha sinchehe na sigue nchehe na tti jianha, co tti chojni ttjoaha sinchehe sigue ngain tti ttjoaha; pero tti chojni jian sinchehe na sigue de nchehe na tti jian, co tti chojni que coequininxin para ixin Dios sinchehe na sigue de ditticaon na jian cainxin tiempo ngain Dios.

¹² Co Jesucristo nda굋ho:

—Ján, janha sihi toin. Co síquian premio que rochjaha cada chojni, inchin jehe na joinchehe na.

¹³ Janha tti icha saho varichon de cainxin cosa co janha tti sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra.

¹⁴ Anto çhjoin para ixin tti chojni que ttjén lonttoe para rrochonda na joachaxin de sine na ttochjoin de ngain tti ntá que danjo vida, co jamé nchao sixinxin na ngain cain puerté ciudad mé.

¹⁵ Pero tti chojni jianha sittohe na ndoja conixin tti chojni que dantonga icha chojni, co tti chojni que chonda nçhicoxehe o xicoxehe, co tti chojni que dantsjehe vidé icha chojni, co tti chojni que nchesayehe ídolo, conixin cain tti chojni que anto rinao ncheyehe icha chojni.

¹⁶ Co Jesucristo ndaço:

—Janha Jesús orroanha ángel de janha para joinchenohe cain jihi chojni de cain nihngo. Janha tti joixin de ngain razé rey David, co janha tti conotse que anto soji nchengasán are nttoyo.

¹⁷ Espíritu Santo co çhihi Coleco ndaço:

—Ķacoi.

Co cain tti ttinhi jihi ndaço:

—Ķacoi.

Cain ra ço senhe ra jinda co ço sino ra sihi ra, çacoi ra co sihi ra jinda que danjo iná vida naroaxin, co çonhi tomi tsjenga ra hna.

¹⁸ Janha Juan rrindaçhjan janhi ngain cainxin chojni que ttinhi co nchehe caso joajné Dios que jitaxin ngain libro jihi: Si çhonja chojni sinchecoeha na chojni icha cosa de ixin tiempo que tsi que jeha cosa que jitaxin nttihi, Dios rrochjé na icha tsje castigo de tti cain castigo que jitaxin ngain çón jihi.

¹⁹ Co si çhonja chojni santsjehe na masqui nchion de ngain joajné Dios que jitaxin ngain çón jihi, Dios santsjehe na tti parte que jehe na chonda na ngain tti libro tti tetaxin nombré cain chojni que chonda na iná vida naroaxin, co santsjehe na tti parte que jehe na chonda na ngain tti ciudad santa. Co çón jihi nichja de ixin libro mé co ciudad mé.

²⁰ Tti ndaço cain cosa jihi, jehe ndaço:

—Ján, janha sihi toin.

Amén. ¡Ķacoi, soixin Jesús!

²¹ Que Jesucristo, tti chonda cainxin joachaxin para ixin ján na, sinttanchaon cainxin ra. Amén.